


# हरियाणवी बाइबलि



The Holy Bible in the Haryanvi Language of India

# हरियाणवी बाइबिल

## The Holy Bible in the Haryanvi Language of India

Copyright © 2021 The Love Fellowship

Language: हरियाणवी (Haryanvi)

Contributor: The Love Fellowship

Read and download Bible and several other Christian materials in various formats :  
[www.freebiblesindia.in](http://www.freebiblesindia.in)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 9 Apr 2023  
58901dbd-3931-5bbb-bd57-5dfafb882aee

## Contents

मत्ती . . . . .	1
मरकुस . . . . .	45
लूका . . . . .	76
यूहन्ना . . . . .	125
प्रेरितों के काम . . . . .	162
रोमियों . . . . .	207
1 कुरिन्थियों . . . . .	228
2 कुरिन्थियों . . . . .	249
1 गलातियों . . . . .	262
इफिसियों . . . . .	270
फिलिप्पियों . . . . .	277
कुलुस्सियों . . . . .	282
1 थिस्सलुनीकियों . . . . .	287
2 थिस्सलुनीकियों . . . . .	292
1 तीमुथियुस . . . . .	295
2 तीमुथियुस . . . . .	301
तीतुस . . . . .	306
फिलेमोन् . . . . .	309
इब्रानियों . . . . .	311
याकूब . . . . .	326
1 पतरस . . . . .	332
2 पतरस . . . . .	338
1 यूहन्ना . . . . .	342
2 यूहन्ना . . . . .	348
3 यूहन्ना . . . . .	350
यहूदा . . . . .	352
प्रकाशित वाक्य . . . . .	354

## मत्ती के जरिये लिख्या गया सुसमाचार

??????

मत्ती के जरिये लिख्या गया सुसमाचार यो सन्देश देवै सै, के यीशु मसीह ए वो उद्धारकर्ता सै, जिसके आण की भविष्यवाणी करी गई थी। परमेश्वर ने पुराणे नियम हजारों साल पहिले अपणे माणसां तै करे गए करार ताहीं उससे उद्धारकर्ता के जरिये पूरा करया। यो सन्देश सिर्फ यहूदी माणसां खात्तर ए कोनी, जिन म्ह यीशु पैदा होया अर पाळा-पोस्या गया, पर सारी दुनिया खात्तर सै।

वर्णन सै। इसकै बाद इस सुसमाचार म्ह यीशु की गलील परदेस तै यरुशलेम नगर तक का सफर अर यीशु मसीह की जिन्दगी के आखरी हफ्तै का वर्णन सै, जिस म्ह उसका क्रूस पै चढ़ाया जाणा अर दुबारा जिन्दा हो जाणा सै।

इस सुसमाचार म्ह यीशु मसीह ताहीं एक महान गुरु के रूप म्ह पेश करया गया सै। उस ताहीं परमेश्वर के नियम-कायदा ताहीं व्याख्या करण का हक सै अर वो परमेश्वर के राज्य की शिक्षा देवै सै। उसकी शिक्षा ताहीं पाँच भागगां म्ह बाटघा जा सके सै: (1) पहाड़ी उपदेश, जो सुर्ग के नागरिकां के चरित्र, फर्ज, खास अधिकार, अर आखरी उम्मीद तै सै (पाठ 5-7); (2) बारहा चेल्यां ताहीं सेवकाई करण की शिक्षा देणा (पाठ 10); (3) सुर्ग के राज्य तै सम्बन्धित उदाहरण (पाठ 13); चेल्यां तै सम्बन्धित शिक्षाएँ (पाठ 18); (5) सुर्ग राज्य के आगमन अर आण आळे युग तै सम्बन्धित शिक्षाएँ (पाठ 24-25)

रूप-रेखा

पीढ़ी अर यीशु मसीह का जन्म 1:1-2:23

यूहन्ना बपतिस्मा देण आळा के सेवा के काम 3:1-12

यीशु का बपतिस्मा अर उसका इम्तिहान 3:13-4:11

गलील परदेस म्ह यीशु के जरिये माणसां की सेवा 4:12-18:25

गलील परदेस तै यरुशलेम नगर तक सफर 19:1-20:34

यरुशलेम नगर म्ह आखरी हफता 21:1-27:66

प्रभु यीशु का दुबारा जिन्दा हो जाणा अर उसका दिखाई देणा 28:1-20

???? ??

(???? 3:23-38)

1 ये यीशु मसीह के पूर्वजां के नाम सै। वो राजा दाऊद का वंशज था, अर राजा दाऊद अब्राहम का वंशज था।

2 अब्राहम का बेटा इसहाक था, अर इसहाक का बेटा याकूब था, फेर याकूब तै यहूदा अर उसके भाईयाँ का जन्म होया।

3 यहूदा के बेटे फेरिस अर जोरह थे। (फेरिस अर जोरह की माँ का नाम तामार था।) फेरिस का बेटा हिस्रोन था। हिस्रोन का बेटा एराम था,

4 एराम का बेटा अम्मीनादाब था। अम्मीनादाब तै नहशोन, अर नहशोन तै सलमोन का जन्म होया,

5 सलमोन का बेटा बोआज था। (बोआज की माँ का नाम राहाब\* था।) बोआज अर रुत तै ओबेद का जन्म होया, अर ओबेद का बेटा यिशै था।

6 अर यिशै का बेटा राजा दाऊद था। (राजा सुलैमान दाऊद का बेटा था।) जो उस बिरबान्नी तै जन्मा था जो पहिले उरिय्याह की घरआळी थी,

\* 1:5 1:5 तामार, राहाब, रुत, बेतसीबा गैर जात की थी

7 सुलैमान का बेटा रहबाम था। अर रहबाम का बेटा अबिय्याह था। अर अबिय्याह तै आसा का जन्म होया।

8 आसा का बेटा यहोशाफात था। फेर यहोशाफात तै योराम अर योराम तै उज्जियाह का जन्म होया।

9 उज्जियाह का बेटा योताम था अर योताम, आहाज का। फेर आहाज तै हिजकिय्याह का जन्म होया।

10 हिजकिय्याह तै मनश्शह का जन्म होया। मनश्शह का बेटा आमोन था, अर आमोन तै योशिय्याह का जन्म होया।।

11 फेर इस्राएल के माणसां नै कैदी बणाकै बेबीलोन देश ले जाण के बखत योशिय्याह तै यकुन्याह, अर उसके भाईयां का जन्म होया।

12 बेबीलोन देश म्ह पोहचाये जाये पाच्छै यकुन्याह तै शालतियेल का जन्म होया, फेर शालतियेल तै जरुब्बाविल का जन्म होया।

13 जरुब्बाविल तै अबीहूद का जन्म होया, अबीहूद तै एलयाकीम का अर एलयाकीम तै अजोर का जन्म होया।

14 अजोर का बेटा सदोक था। सदोक तै अखीम अर अखीम तै इलीहूद का जन्म होया।

15 इलीहूद का बेटा इलियाजार था। अर इलियाजार मत्तान का। मत्तान का बेटा याकूब था।

16 अर याकूब तै यूसुफ का जन्म होया, जो मरियम का धणी था। अर मरियम तै यीशु जो मसीह कुह्वावै सै, पैदा होया।

17 इस तरियां अब्राहम तै दाऊद तक चौदहा पीढ़ी होई, अर दाऊद तै लेकै इस्राएलियां नै कैदी बणाकै बेबीलोन देश भेज्जे जाण तक चौदहा पीढ़ी, अर इस्राएलियां कैदी बणाकै बेबीलोन देश म्ह भेज्जे जाण के बखत तै मसीह तक चौदहा पीढ़ी और होई।

~~~~~

18 यीशु मसीह का जन्म इस तरियां होया, कै जिब उसकी माँ मरियम की सगाई यूसुफ कै गैल होगयी, तो उनका ब्याह होण तै पैहल्याए बेरा पाट्या के वा पवित्तर आत्मा की शक्ति तै गर्भवती सै। 19 पर उसका धणी यूसुफ जो एक धर्मी माणस था, उसनै बदनाम न्ही करणा चाहवै था, इस खात्तर उस ताहीं चुपके तै छोड़ण का विचार करया।

20 जिब वो इन बाततां नै सोचवै ए था तो परमेसवर का सुगंदूत उसनै सपने म्ह आकै कहण लागया, “हे यूसुफ! दाऊद के वंशज, तू अपनी घरआळी मरियम नै अपने उरै ल्याण तै ना डरै, क्यूँके जो उसकी कोख म्ह सै, वो पवित्तर आत्मा की ओड़ तै सै। 21 वो बेटा जांम्यैगी अर तू उसका नाम यीशु धरिये, क्यूँके वो अपने माणसां का उनकै पापां तै उद्धार करैगा।”

22 यो सारा इस खात्तर होया के जो वचन परभु नै यशायाह नबी कै जरिये कह्या था, वो पूरा हो 23 देखो एक कुंवारी गर्भवती होगी अर एक छोरा जण्येगी, अर उसका नाम इम्मानुएल धरया जावैगा, जिसका मतलब सै “परमेसवर म्हारै गैल सै।”

24 फेर यूसुफ नींद तै जाग कै परमेसवर कै सुगंदूत के हुकम कै मुताबिक मरियम नै अपनी घरआळी बणाकै अपने याडै ले आया। 25 अर जिब ताहीं उसनै छोरा ना जण्या जिब तक यूसुफ उसकै धौरै न्ही गया अर उसनै बाळक का नाम यीशु धरया।

## 2

~~~~~

1 हेरोदेस राजा जिब यहूदिया परदेस पै राज करण लागरया था, तो उस परदेस के बैतलहम नगर म्ह यीशु का जन्म होया। तो थोड़े बखत बाद कई विद्वान जो तारां का ज्ञान राख्वै थे, पूरब तै यरुशलेम नगर म्ह आये। 2 वो आकै बुद्धण लागगे, यहूदियां का राजा जिसका जन्म होया सै, वो

कित्त सै? हमनै पूरब दिशा म्ह उसका तारा देख्या सै, जो उसके जन्म के बारे म्ह बतावै सै, इस करके हम उसकी आराधना करण आये सां।

3 यो सुणकै हेरोदेस राजा अर उसके गैल यरुशलेम नगर के सारे लोग चिन्ता करण लागगै। 4 फेर उसनै माणसां के सारे प्रधान याजकां अर शास्त्रियाँ ताहीं कट्टा करके उनतै बुद्धिया, के पवित्तर ग्रन्थ के कहवै सै? “मसीह का जन्म कित्त होणा चाहिये?” 5 उननै उस ताहीं कह्या, “यहूदिया परदेस के बैतलहम नगर म्ह,” क्यूँके नबियाँ के जरिये योए पवित्तर ग्रन्थ म्ह लिख्या गया सै:

6 “हे बैतलहम नगर, तू जो यहूदा के परदेस म्ह सै, तू किसे भी ढाळ तै यहूदा के अधिकारियां म्ह सारा तै छोटा कोन्या। क्यूँके तेरे म्ह तै एक राजा लिकडैगा, जो मेरी प्रजा इस्राएल की रुखाळी करैगा।”

7 हेरोदेस जाणणा चाहवै था के उस बाळक की उमर कितनी सै, इस करके उसनै तारां का ज्ञान राक्खण आळा ताहीं लुहमा बुलाकै उनतै बुद्धिया के तारा ठीक किस बखत दिख्या था। 8 अर राजा नै यो कहकै उन ताहीं बैतलहम नगर भेज्जा, “जाओ, उस बाळक के बारे म्ह ठीक-ठाक बेरा पाड़ो, अर जिव वो मिल ज्या तो मन्ने खबर द्यो, ताके मै भी आणकै उसकी आराधना करूं।”

9 वे राजा की बात सुणकै चले गए, अर जो तारा उननै पूरब दिशा म्ह देख्या था, वो उनके आगै-आगै चाल्या। अर जडै बाळक था, उस घर के उप्पर जाके रुक गया। 10 उस तारे नै देखके वे घणे आनन्दित होए, जो उस घर के उप्पर रुक गया था। 11 उननै उस घर म्ह जाके उस बाळक ताहीं उसकी माँ मरियम के गैल देख्या, अर झुककै बाळक की आराधना करी, अर अपना-अपणा झोळा खोल के उस ताहीं सोन्ना, लोबान, अर गन्धरस की भेट चढ़ाई। 12 फेर सपनै म्ह परमेसवर नै या चेतावनी दी के हेरोदेस राजा के धौरे फेर ना जाइयो, वे राजा ताहीं बिना बताये दुसरे राह तै अपने देश म्ह चले गये।

~~~~~

13 विद्वानां के चले जाणके बाद परमेसवर के एक सुगंदूत नै सपनै म्ह आके यूसुफ तै कह्या, “उठ! उस बाळक नै अर उसकी माँ नै लेके मिस्र देश म्ह भाग ज्या। अर जिव ताहीं मै तेरे तै ना कहूं, जिव ताहीं ओड़ै रहिये। क्यूँके हेरोदेस राजा इस बाळक नै टोहके उस ताहीं उसनै मरवाणा चाहवै सै।”

14 फेर वो रात नै ए उठके बाळक अर उसकी माँ नै लेके मिस्र देश नै चाल पड्या। 15 अर हेरोदेस राजा के मरण तक ओड़ै रह्या। ताके वो वचन जो प्रभु नै होशे नबी के जरिये कह्या था वो पूरा हो “मन्ने अपने बेटे ताहीं मिस्र देश तै बुलाया।”

~~~~~

16 जिव हेरोदेस राजा नै यो देख्या, के विद्वानां नै उसके गैल धोक्खा करया सै, फेर वो छो म्ह भरगया। उसनै सैनिकां ताहीं भेजकै विद्वानां के जरिये ठीक-ठाक बताये होइ बखत के मुताबिक बैतलहम नगर अर उसके लोवै-धोवै की जगहांया के सारे छोरयां ताहीं जो दो साल के या उसतै छोटे थे, वे सब मरवा दिए। 17 फेर जो वचन यिर्मयाह नबी के जरिये कह्या गया था, वो पूरा होया,

18 “रामाह नगर म्ह एक रोण की आवाज सुणाई देई, रोणा अर घणाए बिलाप।

राहेल अपने बाळकां के खात्तर रोवै थी, अर चुप न्ही होणा चाहवै थी,

क्यूँके वे इब मरगे थे।”

~~~~~

19 हेरोदेस राजा के मरण के पाछे, परमेसवर का सुगंदूत मिस्र देश म्ह यूसुफ तै सपनै म्ह बोल्या, 20 “उठ, बाळक अर उसकी माँ नै लेके इस्राएल के देश म्ह चल्या ज्या, क्यूँके हेरोदेस राजा अर उसके माणस जो बाळक नै मारणा चाहवै थे, वे मर लिये सै।”

21 यूसुफ नीद तै जाजा, अर बाळक अर उसकी माँ नै गेल्या लेके इस्राएल देश म्ह बोहड़ आया। 22 पर या सुणकै के अरखिलाउस अपने पिता हेरोदेस राजा की जगहां यहूदिया परदेस पै राज करे सै, ओड़ै जाण तै डरग्या। फेर सपनै म्ह परमेसवर की ओड़ तै चेतावनी पाके गलील परदेस म्ह चल्या

गया। <sup>23</sup> अर नासरत नाम कै नगर म्ह जा बस्या, ताके वो वचन पूरा हो, जो नबियाँ कै जरिये यीशु के बारे कहुआ गया था: “वो नासरी\* कुह्नावैगा।”

### 3

☞☞☞☞☞ ☞☞☞☞☞☞☞ ☞☞ ☞☞☞

(☞☞ 1:1-8; ☞☞☞ 3:1-18; ☞☞☞ 1:6-8,15-34)

1 उन दिनां म्ह यूहन्ना बपतिस्मा देण आळा आके यहूदिया परदेस के जंगल-बियावान म्ह यो प्रचार करण लाग्या: <sup>2</sup> “पाप करणा छोड़ द्यो, क्यूँके सुर्ग का राज्य धोरै आ लिया सै।” <sup>3</sup> यो बोए सै, जिसका जिक्क यशायाह नबी कै जरिये करया गया: “जंगल-बियावान म्ह तै ए कोए रुक्का देवे सै, के प्रभु का राह तैयार करो अर उसकी सड़क सीध्धी करो।”

<sup>4</sup> यूहन्ना ऊँट के रूँ के लत्ते पहणणीया अर अपणी कड़ म्ह चमड़े की पेट्टी-बाँधे रहवे था। उसका खाणपान टिड्डियाँ अर शहद था।

<sup>5</sup> फेर यरुशलैम नगर अर सारे यहूदिया परदेस अर यरदन नदी के लोवै-धोवै की सारी जगहां के माणस उसके धोरै आ गये। <sup>6</sup> उन सारया नै अपणे-अपणे पापां नै मानके यरदन नदी म्ह उसतै बपतिस्मा लिया।

<sup>7</sup> जब उसनै घणे सारे फरीसियाँ अर सद्कियाँ ताहीं अपणे धोरै बपतिस्मा लेण खात्तर आन्दे देख्या, तो बोल्या, “हे साँप के सप्पोलों जिसे माणसों, थम नरक की सजा तै किस ढाळ बचोगे?” <sup>8</sup> इस खात्तर जै थमनै सच म्ह पाप करणा छोड़ दिया सै तो यो दिखाण खात्तर भले काम तो करो। <sup>9</sup> अर अपणे-अपणे मन म्ह न्यू मतना सोचो के म्हारा पिता अब्राहम सै। क्यूँके मै थमनै कहुँ सूँ के परमेसवर इन पत्थरां तै अब्राहम कै खात्तर ऊलाद पैदा कर सकै सै। <sup>10</sup> इब कुहाड़ा दरखतां की जड़ पै धरया सै, इस करके जो-जो दरखत बढ़िया फळ न्ही ल्यांदा, वो काटचा अर आग म्ह झोक्या जावेगा। इसका मतलब यो सै परमेसवर उन सारया नै दण्ड देवेगा जो पाप करणा न्ही छोड़ते।

<sup>11</sup> “मै तो थमनै पाणी तै, पापां ताहीं छोड़ण का बपतिस्मा देऊ सूँ, पर जो मेरै पाच्छे आवेगा, वो मेरै तै भी शक्तिशाली सै। मै उसकी जूती टाण जोगगा भी कोनी। वो थमनै पवित्तर आत्मा अर आग तै बपतिस्मा देवेगा। <sup>12</sup> उसका छाज उसके हाथ म्ह सै, अर वो अपणा खलिहाण आच्छी तरियां साफ करेगा, अर अपणे नाज नै अपणे कोटार (गोदाम) म्ह कटटा करेगा, पर भुरळी ताहीं उस आग म्ह जळावेगा जो कदे बुझे कोनी।”

☞☞☞☞☞ ☞☞☞☞☞☞☞ ☞☞☞ ☞☞☞☞☞☞☞

(☞☞ 1:9-11; ☞☞☞ 3:21,22; ☞☞☞ 1:31-34)

<sup>13</sup> उस बखत यीशु गलील परदेस तै यरदन नदी के कन्टारे यूहन्ना कै धोरै उसतै बपतिस्मा लेण आया। <sup>14</sup> पर या कहके यूहन्ना उसनै रोक्कण लाग्या, “कै मन्ने तो तेरे हाथ तै बपतिस्मा लेण की जरूरत सै, अर तू मेरै धोरै आया सै?”

<sup>15</sup> यीशु नै उसतै जवाब दिया, “कै इब तो योए होण दे, क्यूँके हमने इस्से तरियां तै सारी धार्मिकता पूरी करणा ठीक सै।” फेर उसनै उसकी बात मान ली।

<sup>16</sup> अर यीशु बपतिस्मा लेके जब पाणी तै उप्पर आया, अर अकास खुल गया, अर उसनै परमेसवर की पवित्तर आत्मा ताहीं कबूतर की तरियां उतरते अर अपणे उप्पर आन्दे देख्या। <sup>17</sup> अर देखो, परमेसवर सुर्ग म्ह तै बोल्या, “कै यो मेरा प्यारा बेट्टा सै, जिसतै मै भोत घणा राज्जी सूँ।”

### 4

☞☞☞☞ ☞☞☞☞☞☞☞☞☞

(☞☞ 1:12-13; ☞☞☞☞ 4:1-13)

\* 2:23 2:23 नासरत नगर का रहण आळा

1 बपतिस्मे के बाद पवित्र आत्मा यीशु नै जंगल-बियाबान म्ह लेग्या, ताके शैतान\* उस ताहीं परखै ।

2 वो चाळीस दिन अर चाळीस रात, बिना खाए पिए रह्या, फेर उसनै भूख लागगी । 3 फेर शैतान नै धोरै आणके उसतै कह्या, “जै तू परमेसवर का बेट्टा सै, तो कहकै साबित करदे, के ये पत्थर रोट्टी बण जावे, तांके तू इननै खा सके ।”

4 यीशु नै जबाब दिया: “पवित्र ग्रन्थ म्ह लिख्या सै, माणस सिर्फ रोट्टी तै ए न्ही, पर परमेसवर के हेरेक वचन तै जो उसनै मान्ने सै, जिन्दा रह्यैगा ।”

5 फेर शैतान उसनै पवित्र नगर यरुशलेम म्ह लेग्या अर मन्दर की चोट्टी पै खडचा कर दिया ।

6 अर उसतै बोल्या, “जै तू परमेसवर का बेट्टा सै, तो अपणे-आपनै तळे गेर कै साबित कर । क्यूँके पवित्र ग्रन्थ म्ह लिख्या सै: वो तेरे बाबत अपणे सुर्गदूता नै हुकम देगा, अर वे तन्ने हाथों हाथ उठा लेवैगें कदे इसा ना हो के तेरे पायां म्ह पत्थर तै ठेस लागगै ।”

7 यीशु नै उसतै कह्या, “यो भी पवित्र ग्रन्थ म्ह लिख्या सै, के तू अपणे प्रभु परमेसवर नै ना परखै ।”

8 फेर शैतान उसनै घणे ऊँचे पहाड़ पै लेग्या अर सारी दुनिया का राजपाट अर उसकी शानों-शोकत दिखकै, 9 उसतै बोल्या, “जै तू झुककै मेरी भगति करै, तो मै सारा किमे तन्ने दे दियुंगा ।”

10 फेर यीशु उसतै बोल्या, “हे शैतान दूर हो ज्या, पवित्र ग्रन्थ म्ह लिख्या सै: तू प्रभु अपणे परमेसवर की भगति कर, अर सिर्फ उससे की सेवा करया कर ।”

11 फेर शैतान उसके धोरै तै चल्या गया, अर देख्ये, सुर्गदूत आणके उसकी सेवा करण लागगे ।

🔗🔗🔗🔗 🔗🔗🔗🔗 🔗🔗🔗🔗 🔗🔗🔗🔗 🔗🔗🔗🔗

(🔗 1:14,15; 🔗 4:14-15,31)

12 जिव उसनै न्यू सुण्या के यूहन्ना केदी बणा लिया सै, तो वो यहूदिया परदेस तै लिकड़कै गलील परदेस म्ह चल्या गया ।

13 अर फेर वो गलील परदेस के नासरत नगर नै छोड़के कफरनहूम नगर म्ह, जो गलील समुन्दर कै किनारे था, कफरनहूम उस क्षेत्र म्ह गलील के समुन्दरी तट पै था, जडै जबूलून अर नप्ताली के गोत्र के माणस रहवे थे । 14 ताके जो यशायाह नबी कै जरिये कह्या गया था, वो पूरा हो

15 “जबूलून अर नप्ताली जाति के परदेस, गलील समुन्दर कै किनारे यरदन नदी के पार, गलील परदेस म्ह रहण आळे गैर यहूदी माणस”

16 “जो माणस अन्धकार म्ह जीण लागरे थे, उननै तेज चान्दणा देख्या । वे उस जगहां म्ह जीण लागरे थे, जित्त हर घड़ी मौत का खतरा था, उनपै चान्दणा चमक्या ।”

17 उस बखत तै यीशु नै प्रचार करणा अर कहणा शरु करया, “पाप करणा छोड़ दो, क्यूँके सुर्ग का राज्य धोरै आया सै ।”

🔗🔗🔗🔗 🔗🔗🔗🔗 🔗🔗🔗🔗 🔗🔗🔗🔗 🔗🔗🔗🔗

18 गलील परदेस म्ह गलील समुन्दर के किनारे घूमदे होए उसनै दो भाईयाँ ताहीं शमीन जो पतरस कुह्नावै सै, अर उसके भाई अन्दरयास ताहीं समुन्दर म्ह जाळ गेरते देख्या, क्यूँके वे मछुवारे थे ।

19 यीशु नै उनतै कह्या, “मेरे पाच्छे आओ, मै थमने माणसां ताहीं कटटे करण आळे बणाऊंगा ताके वो मेरे चेल्लें बणे ।” 20 वे जिब्बे जाळां नै छोड़कै उसके चेल्लें बणण खात्तर उसके पाच्छे हो लिये ।

21 ओड़ तै आगै चालकै, यीशु नै दो और भाईयाँ ताहीं यानी जब्दी के बेट्टे याकूब अर उसके भाई यूहन्ना ताहीं देख्या । वे अपणे पिता जब्दी कै गैल किस्ती पै अपणे जाळां ताहीं ठीक करै थे । यीशु नै उन ताहीं भी बुला लिया । 22 वे जिब्बे किस्ती अर अपणे पिता नै छोड़कै उसके चेल्लें बणण खात्तर उसके पाच्छे हो लिये ।

🔗🔗🔗🔗 🔗🔗🔗🔗 🔗🔗🔗🔗 🔗🔗🔗🔗 🔗🔗🔗🔗

\* 4:1 4:1 शैतान ताहीं यूनानी भाषा इबलीस कहवे सै



23 यीशु सारे गलील परदेस म्ह फिरता होया उनके आराधनालयों म्ह उपदेश सुणान्दा, अर राज्य का सुसमाचार सुणान्दा अर माणसां की हरेक ढाळ की बीमारी अर कमजोरियाँ नै दूर करदा रह्या। 24 अर सारे सीरिया<sup>†</sup> परदेस म्ह उसका यश फैल ग्या, अर माणस सारे बिमारां नै, जो कई ढाळ की बिमारियाँ अर दुखां तै जकड़े होए थे, जिन म्ह भुंड़ी आत्मा थी, अर मिर्ची आळे अर लकवे के रोगगी नै उसके धोरे ल्याए उसनै उन ताहीं ठीक करया। 25 अर गलील परदेस, दिकापुलिस नगर, यरुशलेम नगर, यहूदिया परदेस अर यरदन नदी के पार तै भीड़ की भीड़ उसके पाच्छे हो ली

## 5

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ

1 यीशु उस भीड़ नै देखके पहाड़ पै चला ग्या, अर जब बैठ ग्या तो उसके चेल्लें उसके धोरे आए। 2 अर वो अपणी ऊँची आवाज म्ह उननै या शिक्षा देण लाग्या:

ⓂⓂⓂⓂ ⓂⓂ

(ⓂⓂⓂⓂ 6:20-23)

3 “धन्य सै वे, जो या जाणे सै के उननै परमेसवर की जरूरत सै, क्यूँके सुर्ग का राज्य उननै का सै। 4 धन्य सै वे, जो शोक करै सै, क्यूँके वे परमेसवर तै शांति पावेंगे। 5 धन्य सै वे, जो नम्र सै, क्यूँके वे परमेसवर के जरिये धरती के हकदार होंगे। 6 धन्य सै वे, जो धार्मिकता का जीवन जीण खात्तर भूखे अर तिसाए सै, क्यूँके वे परमेसवर के जरिये छिकाए जावेंगे। 7 धन्य सै वे, जो दया करण आळे सै, क्यूँके परमेसवर भी उनपै दया करैगा। 8 धन्य सै वे, जिनके मन शुद्ध सै, क्यूँके वे परमेसवर नै देखेंगे। 9 धन्य सै वे, जो मेल करण आळे सै, क्यूँके वे परमेसवर के बेट्टा-बेट्टी कुह्वावेंगे। 10 धन्य सै वे, जो धार्मिकता के कारण सताए जावै सै, क्यूँके सुर्ग का राज्य उन्हे का सै।”

11 “धन्य सों धम, जिब माणस मेरै कारण थारी बुराई करै सतावै अर झूठ बोल-बोलके थारे बिरोध म्ह सारी तरियां की बुरी बात फैलावै, क्यूँके धम मेरे चेल्लें सों। 12 फेर खुश अर मग्न होइयो, क्यूँके थारे खात्तर सुर्ग म्ह बड़ड़ा ईनाम सै। इस करके के उननै उन नबियाँ ताहीं भी इस्से ढाळ सताया था, जो थारे तै भी भोत पैहल्या थे।”

ⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂ 9:50; ⓂⓂⓂⓂ 14:34,35)

13 “धम धरती पै लोग्गां खात्तर नूण की तरियां सों, पर जै नूण का सुवाद जान्दा रहवै, तो वो किस चीज तै नमकीन करया जावैगा? फेर वो किसे काम का न्ही, सिर्फ इसके के बाहर फेक्या ज्या अर माणसां के पैरां तळै चिकल्या ज्या।”

14 “धम दुनिया के लोग्गां खात्तर चाँदणा की तरियां सों। जो नगर पहाड़ पै बस रह्या सै वो लुहक न्ही सकदा। 15 अर माणस दीवा जळा के बरतन के तळै न्ही पर टांडी पै धैरै सै, फेर उसतै घर के सारे माणसां ताहीं चान्दणा ज्या सै। 16 उससे तरियां थारा चान्दणा माणसां के स्याम्ही चमके के वे थारे भले काम्मां नै देखके थारे पिता की, जो सुर्ग म्ह सै बड़ाई करै।”

ⓂⓂⓂⓂ-ⓂⓂⓂⓂⓂ ⓂⓂ ⓂⓂⓂⓂⓂⓂ

17 “या ना समझो, के मै मूसा के नियम-कायदा या नबियाँ के लेख नै मिटाण आया सूं, मिटाण न्ही, पर पूरा करण आया सूं। \* 18 क्यूँके मै धमने सच कहूँ सूं, के जब ताहीं धरती अर अकास सै, जद ताहीं नियम-कायदा म्ह लिखी हरेक छोट्टी तै छोट्टी बात पूरी होए बिना न्ही रहवैगी। 19 इस करके जो कोए इन छोट्टे तै छोट्टे हुकम म्ह तै किसे एक नै भी न्ही मानता, अर दुसरे माणसां नै भी उसाए सिखावै, वो सुर्ग के राज्य म्ह सारा तै छोट्टा कुह्वावैगा, पर जो कोए उन सारे हुकमां पै

† 4:24 4:24 गलील परदेस के उत्तर दिशा म्ह सै \* 5:17 5:17 (रोम-10:4)

चाल्लैगा अर उननै सिखावैगा, वोए सुर्ग राज्य म्ह महान् कुह्वावैगा।<sup>20</sup> क्यूँके मै थमनै कहूँ सूँ, के जै थारा आत्मिक जीवन शास्त्रियाँ अर फरीसियाँ के आत्मिक जीवन तै बढ़कै न्ही हो, तो थम सुर्ग के राज्य म्ह कदे बड़ न्ही पाओगें।”

☞☞☞☞☞

21 “थमनै सुणया होगा, के थारे पूर्वजां तै कह्या, गया था के ‘खून ना करियो’, अर ‘जो कोए खून करैगा वो कचेहूड़ी म्ह दण्ड के लायक होगा।’<sup>22</sup> पर मै थमनै या कहूँ सूँ, के जो कोए अपणे भाई पै गुस्सा करैगा, वो कचेहूड़ी म्ह दण्ड के लायक होगा, अर जो कोए अपणे भाई नै निकम्मा कहवैगा वो बड़डी सभा म्ह दण्ड के लायक होगा, अर जो कोए कहवै ‘अरै बेकूफ’ वो नरक की आग के दण्ड के लायक होगा।”

23 “इस करकै जै तू अपणा चढ़ावा मन्दर म्ह वेदीं पै चढ़ावै, अर ओड़ै तू याद करै, के तेरे भाई के मन म्ह तेरे खात्तर किमे विरोध सै,<sup>24</sup> तो तू अपणा चढ़ावा ओड़ै वेदी के धारे छोड़दे, अर ज्याकै अपणे भाई तै मेळ-मिलाप कर अर फेर आकै अपणा चढ़ावा चढ़ा।”

25 “जिब तक तू अपणे बैरी के गेल्या राह म्ह सै, तो उसतै जिब्वे मेळ-मिलाप करले, कदे इसा ना हो के बैरी तन्नै न्यायाधीश के हवालै, अर न्यायाधीश तन्नै सिपाही के हवालै करदे, अर तू जेळ म्ह गेर दिया जावै।<sup>26</sup> मै तन्नै सच कहूँ सूँ के जिब ताहीं तू पाई-पाई न्ही भरदे जद ताहीं जेळ तै छुटण न्ही पावैगा।”

☞☞☞☞

27 “थमनै परमेसवर का हुकम सुणया होगा के कह्या गया था, ‘जारी ना करियो।’<sup>28</sup> पर मै थमनै न्यू कहूँ सूँ, के जो कोए किस बिरबान्नी पै भुंडी निगांह गैरे वो अपणे मन म्ह उसतै जारी करग्या।<sup>29</sup> जै तेरी सोळी आँख तेरे तै पाप करवावै सै, तो उसनै लिकाड़ के फेंक दे, क्यूँके तेरे खात्तर योए ठीक सै के तेरे अंगा म्ह तै एक नाश हो ज्या अर तेरी सारी देह नरक म्ह ना गेरी जावै।<sup>30</sup> जै तेरा सोळा हाथ तेरे तै पाप करवावै सै, तो उसनै काट के फेंक दे, क्यूँके तेरे खात्तर योए आच्छा सै के तेरे बाक्की अंगा म्ह तै एक नाश हो जावै अर तेरी सारी देह नरक म्ह न्ही गेरी जावै।”

☞☞☞☞

(☞☞☞☞ 19:9,11,12; ☞☞☞☞ 16:18)

31 “यो भी कह्या गया था, ‘जो कोए अपणी घरआळी नै तलाक देणा चाहवै, तो उसनै तलाकनामा दे।’<sup>32</sup> पर मै थमनै यो कहूँ सूँ के जो कोए अपणी घरआळी नै जारी कै सिवा किसे और कारण तै तलाक दे, तो वो उसतै जारी करवावै सै। अर जो कोए उस छोड़डी होई तै ब्याह करै, वो जारी करै सै।”

☞☞☞☞☞☞☞☞

33 “फेर थमनै सुणया होगा के थारे पूर्वजां तै कह्या गया था, ‘झूटठी कसम ना खाईयो, पर प्रभु के खात्तर अपणी कसम नै पूरी करियो।’<sup>34</sup> पर मै थमनै या कहूँ सूँ के कदे कसम ना खाईयो, ना तो सुर्ग की, क्यूँके वो परमेसवर का सिंहासन सै।<sup>35</sup> ना धरती की, क्यूँके वा उसके पैरां की पिड्डी सै, ना यरुशलम नगर की, क्यूँके वो महाराजा का नगर सै।<sup>36</sup> अपणे सिर की भी कसम ना खाईयो क्यूँके तू एक बाळ नै भी ना तो धोळा, अर ना काळा कर सकै सै।<sup>37</sup> पर थारी बात हॉं की हॉं, या ‘ना’ की ना हो, क्यूँके जो किमे इसतै घणा होवै सै वो शैतान की ओड़ तै होवै सै।”

☞☞☞☞

(☞☞☞☞ 6:29,30)

38 “थमनै नियम-कायदा म्ह सुणया होगा के कह्या था, आँख कै बदले आँख, अर दाँत कै बदले दाँत।<sup>39</sup> पर मै थमनै कहूँ सूँ के बुरे माणस तै झगड़ा मोल ना लियो, पर जो कोए तेरे सोळे गाल

† 5:23 5:23 वेदी-परमेसवर ताहीं भेट चढ़ाण खात्तर एक जगहां

पै थप्पड़ मारै उस कान्ही दुसरा भी फेर दे। 40 जै कोए तेरे पै दाब देकै तेरा कुड़ता लेणा चाहवै, तो उसनै अंगोच्छा भी दे दे। 41 जै कोए अधिकारी तन्नै एक कोस मुफ्त म्ह ले जावै, तो उसकै गेल्या दो कोस चल्या ज्या। 42 जो कोए तेरे तै माँगै, उसनै दे, अर जो कोए तेरे तै उधार लेणा चाहवै, उसतै मुँह ना मोड़।”

43 “थमनै नियम-कायदा म्ह सुण्या होगा के कह्या गया था, अपणे पड़ोसी तै प्यार राखिये, अर अपणे बैरी तै बैर। 44 पर मै थमनै कहूँ सूँ के अपणे बैरियाँ तै प्यार राखवो अर अपणे सतावण आळे के खात्तर प्रार्थना करो, 45 जिसतै थम अपणे सुर्गीय पिता की सिध्द ऊलाद मान्ने जाओगे। क्यूँके वो भले अर बुरे लोग्गां पै अपना सूरज उगाया करै सै, अर धर्मी अर अधर्मी लोग्गां पै मिह बरसावै सै। 46 क्यूँके जै थम अपणे प्यार करण आळा तै ए प्यार करो सों, तो कौण सा बड़ा काम करो सों? के चुंगी लेण आळे भी इसाए न्ही करदे? 47 जै थम अपणे भाईयाँ नै ए नमस्कार करो, तो कौणसा बड़ड़ा काम करो सों? के गैर यहूदी भी इसाए न्ही करदे? 48 इस करकै जरूरी सै के थम भी सिध्द बणो, जिसा थारा सुर्गीय पिता सिध्द सै।”

## 6

???? ? ? ? ? ? ? ? ? ? ?

1 “चौक्कस रहो! थम माणसां नै दिखाण कै खात्तर धर्म के काम\* ना करो, न्ही तो अपणे सुर्गीय पिता तै कुछ भी ईनाम न्ही पाओगे।”

2 “इस करकै ज़िब तू दान करै, तो अपणे आगै ढिंडोरा ना पिटवाईये, जिसा कपटी, आराधनालयों अर गळियाँ म्ह करै सै, ताके माणस उनकी बड़ाई करै। मै थारे ताहीं साच्ची कहूँ सूँ के उननै अपना ईनाम माणसां की बड़ाई के रूप म्ह पा लिया। 3 पर ज़िब तू दान करै, तो उसका किसे और नै बेरा न्ही पाटना चाहिए। 4 ताके तेरा दान छिप्या रहवै, अर ज़िब तेरा पिता जो गुप्त म्ह देखै सै, तन्नै ईनाम देवेगा।”

??????????

(???? 11:2-4)

5 “ज़िब तू प्रार्थना करै, तो कपटियाँ के तरियां ना हो, क्यूँके माणसां नै दिखाण खात्तर आराधनालयों म्ह अर सड़कां के मोड़ां पै खड़े होकै प्रार्थना करणा उननै आच्छा लागै सै। मै थमनै साच्ची कहूँ सूँ के उननै अपना ईनाम माणसां की बड़ाई के रूप म्ह पा लिया। 6 पर ज़िब तू प्रार्थना करै, तो अपनी कोठड़ी म्ह जा, अर किवाड बन्द करकै अपणे पिता तै, जो गुप्त म्ह सै उसतै प्रार्थना कर। जद तेरा पिता, जो तेरे लुहक के करे होए काम्मां नै देखै सै, तो तन्नै उनका ईनाम देवेगा। 7 प्रार्थना करदे बखत दुसरी जात्ता की तरियां बडबडाइये ना, क्यूँके वे समझै सै के उनकै एक बात के बार-बार बोल्लण तै उनकी सुणी जावैगी। 8 इस करकै थम उनकी तरियां ना बणो, क्यूँके थारा पिता थारे माँगण तै पैहल्याए जाणै सै के थारी के-के जरूरत सै। 9 इस करकै थम इस तरियां तै प्रार्थना करया करो

हे म्हारे पिता, तू जो सुर्ग म्ह सै, तेरा नाम पवित्र मान्या जावै।†

10 तेरा राज्य आवै। तेरी इच्छा जिसी सुर्ग म्ह पूरी होवै सै, उसी धरती पै भी हो।

11 म्हारे दिन भर की रोटी आज हमनै दे।

12 अर जिस तरियां हमनै अपणे कसूरवारां ताहीं माफ करया सै, उससे तरियां तू भी म्हारे कसूरां नै माफ करदे।

13 अर म्हारे ताहीं परखै ना, पर बुराई‡ तै बचा, (क्यूँके राज्य, वीरता अर महिमा सदा तेरे ए सै।’ आमीन।)

‡ 5:44 5:44 (रोम-12:14) \* 6:1 6:1 धार्मिकता के काम † 6:9 6:9 (लुका 11:2) ‡ 6:13 6:13 बुराई बुरे जैतान तै बचा

14 “इस करके जै थम माणसां के कसूर माफ करोगे, तो थारा सुर्गीय पिता भी थमनै माफ करैगा।  
15 अर जै थम माणसां के कसूरां नै माफ न्ही करोगे, तो थारा पिता भी थारे कसूर माफ न्ही करैगा।”

☞☞☞☞

16 “जिब थम ब्रत करो, तो कपटियाँ की तरियां थारे मुँह पै उदासी छाई ना रहवै, क्यूँके वे अपणा मुँह बणाई राक्खै सै, ताके माणस उननै ब्रती जाणै। मै थमनै साच्ची कहुँ सूँ के वे अपणा ईनाम माणसां की बड़ाई के रूप म्ह पा चुके। 17 पर जिब तू ब्रत करै तो अपणे सिर पै तेल लगा अर मुँह धो, 18 ताके माणस न्ही पर तेरा पिता तन्नै ब्रती जाणै। तेरा पिता जो तेरे उस गुप्त म्ह करे होए ब्रत नै देखै सै, तो तन्नै उनका ईनाम देगा।”

☞☞☞☞☞☞☞☞

(☞☞☞☞ 12:33-34)

19 “अपणे खात्तर धरती पै धन कट्टा ना करो, जडै कीड़ा अर काई नाश करै सै, अर जडै चोर सेंध लगावै अर चौरै सै। 20 पर अपणे खात्तर सुगं म्ह धन कट्टा करो, जडै ना तो कीड़ा अर ना काई नाश करै सै, अर जडै चोर ना सेंध लगावै अर ना चौरै सै। 21 क्यूँके जडै तेरा धन सै उडै तेरा मन भी लाग्या रहवैगा।”

☞☞☞☞☞☞☞☞

(☞☞☞☞ 11:34-36)

22 “देह का दीवा आँख सै इस करके जै तेरी नजर सही सै तो तेरी सारी देह भी चाँदणे म्ह सै। 23 पर जै तेरी नजर खराब सै तो तेरी सारी देह भी अन्धेरे म्ह सै, इस कारण जो तू सोचै सै के मै चाँदणे म्ह सूँ, पर वो अन्धेरा हो, तो सोचकै देख वो अन्धेरा कितना बड्डा होगा!”

☞☞☞☞☞☞☞☞

(☞☞☞☞ 16:13; 12:22-31)

24 “कोए माणस दो मालिकां की सेवा एक बखत पै न्ही कर सकदा, क्यूँके वो एक तै बैर अर दुसरे तै प्यार राक्खैगा, या एक तै मिल्या रहवैगा अर दुसरे नै छोडटा जाणैगा। थम परमेसवर अर धन दोनुआ की सेवा न्ही कर सकदे।

25 “इस करके मै थमनै कहुँ सूँ के अपणे जीवन के खात्तर या चिंता ना करियो के हम के खावांगें अर के पीवांगें, अर ना अपणी देह के खात्तर के पैहरांगें। के जीवन खाणे तै, के देह लत्यां तै बढ़कै कोन्या? 26 अकास के पंछियाँ नै देखों! वे ना बोवै सै, ना काटै सै, अर ना कुटले (गोदाम) म्ह कट्टा करै सै, फेर भी थारा सुर्गीय पिता उन ताहीं खुवावै सै। के थम पंछियाँ तै घणे कीमती कोनी? 27 थारे म्ह कौण सै, जो चिंता करके अपणी उम्र म्ह एक पल भी बढ़ा सकै सै?”

28 “अर लत्यां के खात्तर क्यूँ चिंता करो सो? जंगळी फुल्लां पै ध्यान करो के वे किस तरियां बढ़े सै, वे ना तो मेहनत करै सै, ना लत्तें बणावै सै। 29 तोभी मै थारे तै कहुँ सूँ के राजा सुलेमान भी, अपणे सारे शानों-शोकत म्ह उन म्ह तै किसे के समान लत्ते पैहरे होए कोनी था। 30 इस करके जिब परमेसवर मैदान की घास नै इसी सुन्दरता देवै सै, जो आज सै अर काल बाड़ म्ह झोक्की जावैगी, तो हे विश्वास म्ह कमजोर माणसां, वो थारी चिन्ता क्यूँ न्ही करैगा?” 31 “इस करके थम चिंता करके न्यू ना कहियो के हम के खावांगें, या के पीवांगें, या के पैहरांगें? 32 क्यूँके गैर यहूदी इन सारी चिज्जां की टोह म्ह रहवै सै, पर थारा सुर्गीय पिता जाणै सै के थमनै इन सारी चिज्जां की जरूरत सै, इस करके चिन्ता ना करो। 33 इस करके पैहल्या थम परमेसवर के राज्य की खोज करो अर पवित्र जीवन जिओ, तो ये सारी चीज भी थमनै अपणे-आप मिल ज्यागीं।” \* 34 इस करके काल की चिंता ना करो, क्यूँके काल का दिन अपणी चिंता आप कर लेवैगा, आज के खात्तर आज का ए दुख भतेरा सै।”

## 7

⚠⚠⚠⚠⚠ ⚠⚠ ⚠⚠⚠ ⚠⚠ ⚠⚠⚠  
(⚠⚠⚠ 6:37,38,41,42)

1 “दुसरयां पै दोष ना लाओ न्ही तो लोग थारे पै भी दोष लगावैगे। 2 क्यूँके जिस तरियां थम दुसरयां पै दोष लगाओ सों, उस्से तरियां परमेसवर भी थारे पै दोष लगावैगा, जिस तरियां तै थम दुसरयां का न्याय करो सों, उस्से तरियां थारा भी न्याय करया जावैगा।”

3 “तू क्यूँ अपने भाई की आँख के तिन्कै जिसी छोट्टी सी बुराई नै देखै सै, अर अपनी आँख म्ह लट जिसी बड़ी बुराई तन्नै कोनी दिखदी?” 4 जब तेरी-ए आँख म्ह लट सै, तो तू अपने भाई तै किस तरियां कहवै सै, “ल्या मै तेरी आँख तै तिन्का लिकाइ द्यु।” 5 इस करके हे कपटी, पैहल्या अपने जीवन की बड़ी बुराई नै दूर कर फेर तू अपने भाई नै आच्छी दाऊँ बुराई तै बचा सकेगा\*।

6 “उन माणसां ताहीं परमेसवर का वचन ना सुणाओ जो उस ताहीं सुणणा न्ही चाहन्दे। जै तू इसा करै सै तो पवित्र चीज कुत्यां कै आगै अर मोत्ती सूअरां के आगै फेक्कण की ढाळ होगा, इसा न्ही हो के वे उनै पैरां तळे चिकलै अर उल्टके थमनै पाडले।”

⚠⚠⚠⚠⚠, ⚠⚠ ⚠⚠⚠⚠⚠  
(⚠⚠⚠ 11:9-13)

7 “परमेसवर तै माँगो, तो वो थमनै देवैगा, टोव्होगे तो थम पाओगे, खटखटाओ, तो थारे खात्तर खोल्या जावैगा। 8 क्यूँके जो कोए माँगै सै, उसनै मिलै सै, अर जो टोव्हें सै, वो पावै सै, अर जो खटखटावै सै, उसके खात्तर खोल्या जावैगा।”

9 “थारे म्ह तै इसा कौण माणस सै, के जै उसका बेट्टा रोड्टी माँगै, तो वो उसनै पत्थर देवै? 10 या मच्छी माँगै, तो उसनै साँप देवै? 11 इस करके जब थम बुरे होके, अपने बाळकां नै आच्छी चीज देणा जाणो सों, तो थारा सुर्गीय पिता अपने माँगण आळा नै आच्छी चीज क्यूँ न्ही देवैगा?† 12 इस कारण जो किमे थम चाहो सों के माणस थारे गेल्या करै, थम भी उनै गेल्या उसाए करो, क्यूँके नियम-कायदे अर नबियाँ की शिक्षा याए सै।”

⚠⚠⚠⚠ ⚠⚠ ⚠⚠⚠⚠⚠ ⚠⚠⚠  
(⚠⚠⚠ 13:24)

13 “थम परमेसवर के राज्य म्ह भी डै फाटक तै ए दाखल हो सको सों, क्यूँके चौड़ा सै वो फाटक अर सीध्दा सै वो रास्ता जो नाश नै पोहच्यै सै, अर घणैए सै जो उस म्ह दाखल होवै सै। 14 क्यूँके भीड़ा सै वो फाटक अर मुश्किल सै वो राह जो अनन्त जीवन की ओड़ पुहचावै सै, अर भोत थोड़े सै वे लोग जो उसनै पावै सै।”

⚠⚠⚠ ⚠⚠ ⚠⚠⚠ ⚠⚠ ⚠⚠⚠⚠⚠⚠

15 “झूट्टे नबियां तै चौक्कस रहो, जो भेड़कां के भेष म्ह थारे धारे आवै सै, पर भित्तर तै वे पाडण आळे भेड़िये सै। 16 उनैके काम्मां तै ए थम उन ताहीं पिच्छाण ल्योगे। के माणस झाड़ियाँ तै अंगूर, या झाड़ बोझड़े तै अंजीर तोड़े सै? 17 इस तरियां हरेक आच्छा दरखत आच्छा फळ ल्यावै सै अर निकम्मा दरखत बुरा फळ ल्यावै सै। 18 आच्छा दरखत बुरा फळ न्ही ल्या सकदा, अर ना निकम्मा दरखत आच्छा फळ ल्या सकै सै। 19 जो-जो दरखत आच्छा फळ न्ही ल्यान्दा, वो काटचा अर आग म्ह गेरया ज्या सै, उस्से तरियां झूट्टे नबियां कै गैल भी इसाए होवैगा। 20 झूट्टे नबियां नै उनके काम्मां तै थम उन ताहीं पिच्छाण ल्योगे।”

21 “जो मेरे तै, हे प्रभु! हे प्रभु! कहवै सै, उन म्ह तै हर एक सुर्ग के राज्य म्ह दाखल न्ही होगा, पर वोए दाखल होगा जो मेरे सुर्गीय पिता की मर्जी पै चाल्ले सै। 22 न्याय के दिन घणखरे-ए माणस मेरे तै कहवैगे, हे प्रभु, हे प्रभु, के हमनै तेरे नाम तै भविष्यवाणी न्ही करी, के हमनै तेरे नाम तै ओपरी आत्मयां ताहीं न्ही लिकाडचा, अर तेरे नाम तै घणैए अचम्भे के काम न्ही करे?” 23 फेर मै

\* 7:5 7:5 पैहले अपनी आँख म्ह तै लट लिकाइ ले फेर तू अपने भाई की आँख का तिन्का दाऊँ तरियां देखके लिकाइ सकेगा।

† 7:11 7:11 (लुका 11:13)

उनतै खुलकै कह दियुंगा, मन्नै धारे ताहीं कदे न्ही अपणाया। हे भुन्डे काम करण आळो, मेरै धोरै तै चले जाओ।”‡

\*\*\*\*\*

24 “इस करके जो कोए मेरी इन बातों नै सुणकै उननै मान्ने सै, वो उस अकलमंद माणस की ढाळ होगा जिसनै अपणे घर की नीम चट्टान पै धरी। 25 अर मिह बरसया, बाढ़ आयी, आँधी आई, अर उस घर तै टकराई, फेर भी वो कोनी गिरया, क्यूँके उसकी नीम चट्टान पै धरी गयी थी। 26 पर जो कोए मेरी ये बात सुणे सै अर उनपै न्ही चाल्दा, वो उस बेकूफ माणस की ढाळ सै, जिसनै अपणे घर की नीम बाळूरेत पै धरी। 27 अर मिह बरसया, बाढ़ आयी, आँधी चाल्ली, अर उस घर तै टकराई अर पड़कै उसका सत्यानाश होगया।”

28 जिव यीशु नै ये बात कह ली, तो इसा होया के भीड़ उसके उपदेश तै हैरान होगी, 29 क्यूँके वो उन ताहीं शास्त्रियाँ की तरियां न्ही पर अधिकार कै गैल उननै उपदेश देवै था।

## 8

\*\*\*\*\*

1 जिव यीशु उस पहाड़ तै उतरा, तो एक बड़डी भीड़ उसके पाच्छै हो ली।

2 अर, एक कोढ़ी नै धोरै आकै उस ताहीं नमस्कार करया अर कहा, “हे प्रभु, जै तू चाहवै, तो मन्नै ठीक कर सकै सै।”

3 यीशु नै हाथ बढ़ाके उस ताहीं छुआ, अर कहा, “मै चाहूँ सूं, के तू इस बीमारी तै ठीक हो ज्या।” अर वो जिब्वे कोढ़ तै ठीक होगया। 4 यीशु नै उसतै कहा, “देख किसै तै ना कहिये, पर जाके अपणे-आपने याजक ताहीं दिखा अर अपणे कोढ़ तै ठीक होण के बारे म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खातर या गवाही हो, के तू ठीक होगया सै।”

\*\*\*\*\*

5 जिव यीशु कफरनहूम नगर म्ह आया तो एक सूबेदार\* नै धोरै आकै उसतै बिनती करी,

6 “हे प्रभु, मेरा नौक्कर लकवे के रोग तै घणा दुखी होरया सै।”

7 यीशु नै उस ताहीं कहा, “मै आकै उसनै ठीक करूँगा।”

8 सूबेदार नै जवाब दिया, “हे प्रभु, मै इस लायक कोनी के तू मेरे घरां आवै, पर सिर्फ मुँह तै कह दे तो मेरा नौक्कर ठीक हो ज्यागा। 9 क्यूँके मै जाणु सूं, के मै भी किसी के आदेशां का पालन करूँ सूं, अर सिपाही मेरै आदेशां का पालन करै सै। जिव मै एक तै कहूँ सूं, जा, तो वो जावै सै, अर दुसरे तै कहूँ, आ, तो वो आवै सै, अर अपणे नौक्कर तै कहूँ सूं, यो कर, तो वो करै सै।”

10 यो सुणके यीशु कै अचम्भा होया, अर जो लोग उसके पाच्छै आवै थें उनतै कहा, “मै थमनै साच्ची कहूँ सूं के मन्नै इस्राएल देश म्ह भी इसा विश्वास न्ही देख्या, जिसा इस सूबेदार का सै।

11 अर मै थमनै कहूँ सूं के पूरब अर पच्छिम तै घणेए गैर यहूदी आवैगें अर भोज म्ह अबराहम अर इसहाक अर याकूब के गेल्या सुर्ग के राज्य म्ह बैटैगें। 12 पर राज्य की ऊलाद (यहूदी लोग) बाहर अन्धेरे म्ह गेर दिये जावैगे उड़ै रोणा अर दाँत पिसणा होगा।”

13 जिव यीशु नै सूबेदार तै कहा, “घर चला जा, जिसा तेरा विश्वास सै, उसाए तेरे खातर होगा।” अर उसका नौक्कर उस्से बखत ठीक होगया।

\*\*\*\*\*

14 यीशु जिव पतरस के घरां आया, तो उसनै उसकी सास्तू ताहीं बुखार म्ह पड्या देख्या। 15 उसनै उसका हाथ पकड्या अर उसका बुखार उतर गया, अर वा उठकै उसकी सेवा-पाणी करण लागगी।

16 जिव साँझ होई फेर माणस उसके धोरै घणेए माणसां नै ल्याए जिन म्ह ओपरी आत्मा थी अर यीशु नै उन आत्मायाँ ताहीं अपणे वचन तै लिकाड़ दिया, अर सारे विमारां ताहीं ठीक कर दिया।

‡ 7:23 7:23 (लूका 13:27) \* 8:5 8:5 सूबेदार-रोमी सेना के सौ सिपाही कै उपर हो सै

17 ताके जो वचन यशायाह नबी के जरिये कहा गया था वो पूरा हो “उसने खुद ए म्हारी कमजोरी ले ली अर म्हारी बीमारी उठा ली।”†

¶¶¶¶ ¶¶ ¶¶¶¶¶¶¶¶ ¶¶¶¶ ¶¶¶¶¶¶¶¶

18 यीशु ने जब अपने चोगरद् एक भीड़ देखी तो अपने चेल्यां ताहीं गलील समुन्दर के परली ओड़ जाण का हुकम दिया। 19 यीशु अर उसके चेल्लें किस्ती की ओड़ जाण लागरे थे, तो एक शास्त्री ने धोरे आके उसतै कहा, “हे गुरु, जइ किते तू जावेगा, मै तेरे पाच्छे हो ल्यूंगा, क्यूँके मै तेरा चेल्ला बणणा चाहूँ सू।”

20 यीशु ने उसतै कहा, “लोमडियां की घुस्खान अर अकास के पच्छियाँ के बसेरे हो सै, पर मुझ माणस के बेट्टे खात्तर सिर छिपाण की भी जगहां कोनी सै।”

21 एक और चेल्लै ने उसतै कहा, “हे प्रभु, पैहले मन्ने घर जाणदे, मै अपने पिता के मरण के बाद उस ताहीं दफना के आऊंगा, फेर तेरा चेल्ला बणुगाँ।”

22 यीशु ने उसतै कहा, “तू मेरे पाच्छे हो ले, अर मेरा चेल्ला बण जा अर जो आत्मिक रूप तै मर चुके सै, उननै मुदे दफणाण दे।”

¶¶¶¶ ¶¶ ¶¶¶¶¶¶¶¶ ¶¶¶¶¶¶¶¶ ¶¶¶¶

23 जब यीशु किस्ती पै चढ्या, तो उसके चेल्लें उसके पाच्छे हो लिए। 24 अर देखो, समुन्दर म्ह एक इसा बड़ड़ा अन्धोड़ उठ्या के किस्ती झाल्लां तै ढक्ण लागगी, अर वो सोण लाग रह्या था। 25 फेर चेल्यां ने धोरे आके उस ताहीं जगाया अर कहा, “हे प्रभु, हमनै बचा, हम डूबके मरण आळे सां।”

26 यीशु ने उनतै कहा, “हे बिश्वास म्ह कमजोर माणसां, क्यूँ डरो सां?” फेर उसनै उठके आँधी अर पाणी ताहीं धमकाया, अर सब शान्त होग्या।

27 अर वे अचम्भा करके कहण लागये, “यो किसा माणस सै के आँधी अर पाणी भी उसका हुकम मान्नै सै।”

¶¶¶¶ ¶¶¶¶¶¶¶¶¶¶ ¶¶¶¶¶¶ ¶¶¶¶¶¶¶¶ ¶¶¶¶¶¶¶¶

28 जब यीशु गलील समुन्दर के परली ओड़ गदरेनियां के देश म्ह पुँहचा, तो दो माणस जिन म्ह ओपरी आत्मा थी कविरस्तान म्ह तै लिक्डके उसनै मिले। वे इतने डरावणे थे के कोए उस रास्ते तै जा न्ही संके था। 29 दोन्नु माणसां ने किल्की मारके कहा, “हे परमेसवर के बेट्टे, म्हारा तेरे ते के काम? के तू बखत तै पैहल्या हमने दुख देण आड़े आया सै?”‡

30 उनतै थोड़ी सी दूर पै घणेए सूअरां का टोळ चरे था। 31 ओपरी आत्मायाँ ने उसतै या कहके बिनती करी के, “जे तू हमनै लिकाड़े सै, तो सूअरां के टोळ म्ह भेजदे।”

32 उसने उन ताहीं कहा, “जाओ!” अर वे ज्या के सूअरां म्ह बैठगी अर देखो, सारा टोळ ढळान पै तै झपटके पाणी म्ह ज्या पड्या, अर डूब मरया। 33 उनके पाळी भाज्ये, अर नगर म्ह जाके ये सारी बात अर जिन म्ह ओपरी आत्मा थी उनका सारा हाल कह सुणाया। 34 फेर सारे नगर के माणस यीशु तै फेटण नै लिक्ड़ाए, अर उस ताहीं देख के बिनती करी के म्हारी सीमा तै बाहर चल्या ज्या।

## 9

¶¶ ¶¶¶¶¶¶ ¶¶ ¶¶¶¶¶¶¶¶ ¶¶¶¶¶¶¶¶ ¶¶¶¶¶¶¶¶

1 फेर यीशु किस्ती म्ह चढके उस पार गया, अर बोहड़के अपने नगर म्ह आया। 2 अर देखो, कई माणस लकवे के एक मरीज नै खाट पै लिटा के उसके धोरे ल्याए। यीशु ने उनका बिश्वास देखके, उस लकवे के मरीज तै कहा, “हे बेट्टे, धीर बाँध, मन्ने तेरे पाप माफ कर दिये।”

3 इसपै कई शास्त्रियाँ ने सोच्या, “यो तो परमेसवर की बुराई करै सै”

† 8:17 8:17 (1 पत्त-2:24) ‡ 8:29 8:29 (लूका 4:34)

4 यीशु नै उनकै मन की बात जाणकै कह्या, “थम माणस अपणे-अपणे मन म्ह वुरा विचार क्यूँ आण देओ सों? 5 आसान के सै? यो कहणा, ‘तेरे पाप माफ होए’, या यो कहणा, ‘उठ अर हाँड-फिर।’ 6 पर इस करकै के थम जाण ल्यो के मुझ माणस के बेट्टे नै धरती पै पाप माफ करण का हक सै।” फेर उसनै लकवे के मरीज तै कह्या, “उठ, अपणे बिस्तर ठाकै, अपणे घरां चल्या जा।” 7 वो उठकै अपणे घरां चल्या गया। 8 माणस यो देखकै डरगे अर परमेसवर की बड़ाई करण लागये जिसनै माणस ताहीं इसा हक दिया सै।

\*\*\*\*\*

9 ओड़ तै आगगे बढ के यीशु नै मत्ती नाम के एक आदमी ताहीं चुंगी की चौकी पै बेटचा देख्या, अर उसतै कह्या, “मेरा चेल्ला बणण खात्तर मेरे पाच्छे हो ले।” अर वो उठकै उसके पाच्छे हो लिया।

10 ज़िब वो अर उसके चेल्ले मत्ती के घर म्ह खाणा खाण खात्तर बेट्टे तो भोत-से चुंगी लेण आळे अर जिननै लोग पापी कहवै सै वे आके उनके गेल्या खाणा खाण बेट्टे। 11 या देखके फरीसियाँ नै उसके चेल्यां ताहीं कह्या, “थारा गुरु चुंगी लेण आळे अर पापी माणसां गेल्या क्यूँ खावै-पीवै सै?”

12 या सुणकै यीशु नै उनतै कह्या, “वैद आच्छे-बिच्छयां खात्तर कोनी पर बिमारां खात्तर जरूरी सै। 13 इस करकै थम जाओ अर समझ ल्यो के पवित्र ग्रन्थ के इस वचन का मतलब के सै: ‘मै बलिदान न्ही पर दया चाहूँ सूँ।’ क्यूँके जो अपणे-आपनै धर्मी कहवै मै उननै न्ही, पर जो अपणे-आपनै पापी कहवै सै उननै बुलाण आया सूँ।”\*

\*\*\*\*\*

14 फेर वपतिस्मा देण आळे यूहन्ना के चेल्यां नै धारे आणकै कह्या, “के कारण सै के हम अर फरीसी इतने ब्रत करा सां, पर तेरे चेल्ले ब्रत न्ही करदे?”

15 यीशु नै उनतै कह्या, “के बराती, ज़िब ताहीं बन्दड़ा उसके गेल्या सै, शोक मना सकै सै? पर वे दिन आवैगें ज़िब बन्दड़ा उनतै न्यारा करया जावैगा, उस बखत वे ब्रत करैगें।”

16 “नये लत्यां की थगळी पुराणे लत्यां पै कोए न्ही लगान्दा, क्यूँके वा थगळी लत्ते तै और भी लत्ता खुस्का दे सै, अर वो और भी घणा पाट ज्या सै। 17 अर माणस नया अंगूर का रस पुराणी मशक म्ह न्ही भरदे, क्यूँके इसा करण तै मशक पाट ज्या सै, अर अंगूर का रस खिंड ज्या सै, अर मशक फूट ज्या सै, पर नया अंगूर का रस नई मशकां म्ह भरा जावै सै तब वे दोनु बचे रहवै सै।”

\*\*\*\*\*

18 वो उनतै ये बात कहण ए लागरया था, के ज़िब्वे आराधनालयाँ के सरदारां म्ह तै एक याईर नाम के आदमी नै आके उस ताहीं नमस्कार करया अर कह्या, “मेरी बेट्टी इब्वे मरी सै, पर तू चाल के अपणा हाथ उसपै धरे, तो वा जिन्दा हो ज्यागी।” 19 यीशु उठकै अपणे चेल्यां समेत उसके पाच्छे हो लिया।

20 अर देखको, एक बिरबान्नी नै जिसकै बारहां साल तै लहू बहण की बीमारी थी, पाच्छे तै आके उसके लत्ते के कोणे ताहीं छू लिया। 21 क्यूँके वा अपणे मन म्ह कहवै थी, “जै मै उसके लत्ते नै छू ल्युँगी तो ठीक हो जाऊँगी।”

22 यीशु नै घूमकै उस ताहीं देख्या अर कह्या, “बेट्टी धीरज राख, तेरे बिश्वास नै तेरे ताहीं ठीक करया सै।” अर वा बिरबान्नी उस्से बखत ठीक होगी।

23 ज़िब यीशु याईर के घर म्ह पुँहचा अर बाँसली बजाण आळे अर भीड़ नै रोळा मचादे देख्या,

24 फेर कह्या, “हट जाओ, छोरी मरी कोनी, पर सोवै सै।” इसपै वे उसका मजाक उड़ाण लागये।

25 पर ज़िब भीड़ लिकाड दी, तो उसनै भित्तर ज्या के उस छोरी का हाथ पकडचा, अर वा जी उठी।

26 अर इस बात का जिक्र सारे देश म्ह फैल गया।

\*\*\*\*\*

\* 9:13 9:13 (होजे 6:6) † 9:20 9:20 (मत्ती 14:36)



27 जब यीशु ओड़े तै आगूँ बढा, तो दो आन्धे उसके पाच्छै, या कहन्दे होए चाल्ले, "हे दाऊद की ऊलाद, म्हारै पै दया कर!"

28 जब वो घर म्ह पहुचा, तो वे आन्धे उसके धोरै आये, अर यीशु नै उनतै कह्या, "के थमनै विश्वास सै के मै थमनै चंगा कर सकू सू?" उननै उसतै कह्या, "हाँ पूरभु!"

29 फेर उसनै उनकी आँखाँ के हाथ लगाके कह्या, "थारे विश्वास के मुताबिक थम चंगे होजाओ।"

30 अर वे जिब्बे देख्खण लागगे। यीशु नै उनतै समझाँ के कह्या, "सावधान, किसे ताहीं या बात ना बताइयो, के मन्नै थारे खात्तर के करया सै।" 31 पर उननै मिलकै सारे देश म्ह उसका नाम फैला दिया।

~~~~~

32 जब वे दोन्नु आन्धे वारणै जाण लागरे थे, तो देख्खो, कई माणस एक गुँगे नै उसके धोरै ल्याए जिसम्ह ओपरी आत्मा थी, जो उसनै बोल्लण कोनी देवै थी। 33 अर जब यीशु नै ओपरी आत्मा लिकाड़ दी, तो गुँगा बोलण लाग्या। इसपै भीड़ नै अचम्भा करकै कह्या, "इस्राएल म्ह इसा कदे न्ही देख्या गया।"

34 पर फरीसियाँ नै कह्या, "ओपरी आत्मयाँ के सरदार इस ताहीं शक्ति देवै सै, इस करकै यो ओपरी आत्मयाँ नै लिकाड़ै से।"

~~~~~

35 यीशु अर उसके चेल्ले सारे नगराँ अर गाम्माँ म्ह फिरता होया अर उनकै आराधनालयौँ म्ह उपदेश सुणांन्दा, अर परमेसवर के राज्य का सुसमाचार सुणादा, अर हरेक ढाळ की बीमारी अर कमजोरियाँ नै दूर करदा रह्या।

36 जब उसनै भीड़ देखी तो उसनै माणसाँ पै तरस आया, ब्यूँके वे उन भेड्या की तरियाँ थे, जिनका कोए पाळी ना हो, वे बेचैन अर भटके होए से थे। 37 फेर उसनै अपने चेल्ल्याँ तै कह्या, "पके होए खेत्ताँ की तरियाँ लोग तो भोत सै जो परमेसवर के वचन नै सुणणा चाहवै सै, पर फसल काट्टण आळे की तरियाँ लोग कम सै जो जाके परमेसवर का वचन सुणावै। 38 इस करकै खेत के माल्लिक यानी परमेसवर तै बिनती करो, के वो और लोग्गाँ नै भेज्जै, ताके परमेसवर का वचन भोत सारे लोग्गाँ ताहीं सुणावै।"

## 10

~~~~~

1 फेर यीशु नै अपने वारहाँ चेल्ल्याँ ताहीं धोरै बुलाकै, उन ताहीं ओपरी आत्मयाँ पै हक दिया के उननै लिकाड़ै अर सारी ढाळ की बिमारियाँ अर सारी ढाळ की कमजोरियाँ नै ठीक करै।

2 इन वारहाँ परेरिताँ के नाम ये सै: पैहल्या शमौन, जो पतरस कुह्वावै सै, अर उसका भाई अन्दिरयास, जब्दी का बेट्टा याकूब, अर उसका भाई यूहन्ना,

3 फिलिप्पुस, अर बरतुल्लै, थोमा, अर चुंगी लेण आळा मत्ती, हलफई का बेट्टा याकूब, अर तद्वै,

4 शमौन जेलोतेस\*, अर यहूदा इस्करियोती जिसनै वो पकड़वा भी दिया।

~~~~~

5 इन वारहाँ चेल्ल्याँ ताहीं यीशु नै यो हुकम देके भेज्या: "गैर यहूदी लोग्गाँ कान्ही ना ज्याइयो, अर सामरियाँ के किसे नगर म्ह दाखल ना होइये।" 6 पर इस्राएल के कुणवे की ए खुई होड़ी भेड्डाँ के धोरै जाईये। 7 अर चालते-चालते यो प्रचार करो: सुर्ग का राज्य धोरै आ गया। 8 बिमाराँ नै ठीक करो, मरै होए नै जीवाओ, कोदियाँ नै शुद्ध करो, ओपरी आत्मयाँ नै लिकाड़ो। थमनै मुफ्त लिया सै मुफ्त द्यो।"

‡ 9:36 9:36 (1 राजा-22:17) \* 10:4 10:4 (एक कट्टर पंथी राजनैतिक दल का नाम था जिसका वो सदस्य था) † 10:5 10:5 (यिर्म-50:6)

9 “अपणे अंगोच्छ्रां म्ह ना तो सोन्ना, ना चाँदी, अर ना ताम्बे के सिक्के राखियो। 10 रास्ते खात्तर ना झोळी लियो, ना दो कुडते, ना जूते अर ना लाट्टी लियो, क्यूँके मजदूर नै उसका खाणा मिलणा चाहिए। 11 जिस किसे नगर या गाम म्ह जाओ, तो बेरा पाड़ो के कुण लायक सै। अर जिब ताहीं उड़ै तै ना लिकड़ो, उससे के गेल्या रहों। 12 घर म्ह बढ़ते आणी उसनै आशीर्वाद दिए। 13 जै उस घर के माणस लायक होंगे तो थारा आशीर्वाद उनपै पुहँचगा, पर जै वे लायक ना हों तो थारा आशीर्वाद थारे धौरे उल्टा ए आ ज्यागा। 14 जो कोए धमनै न्ही अपणावै अर थारी बात ना सुणै, उस घर या उस नगर तै लिकड़दे आणी अपणे पैरां की धूळ झाड़ लियो। 15 मै धमनै सच्ची कहूँ सूँ के न्याय के दिन उस नगर की हालत तै सदोम अर अमोरा<sup>‡</sup> के नगर की हालत घणी सहण जोगगी होवैगी।”

**¶¶¶¶¶¶¶¶¶¶¶¶¶¶**

16 “देक्खो, मै धमनै भेड़्याँ की तरियां भेड़ियाँ के बिचाल्ये भेज्जू सूँ, इस करके साँपां की तरियां अकलमंद अर कबूतरां की तरियां भोळे बणो। 17 पर माणसां तै चौक्कस रहों, क्यूँके वे धमनै बड़े आराधनालयों म्ह सौपेंगे, अर अपणी सभा म्ह थारे कोड़े मारेंगे। 18 धम मेरै खात्तर राज्यपालों अर राज्यां के स्याम्ही अर गैर यहूदी लोगगां म्ह भेज्जे जाओगें। ताके धम मेरे बारे म्ह गवाही दे सको 19 जिब वे धमनै पकड़वावेंगे तो या फिकर ना करियो के हम किस तरियां तै या के कहवागें, क्यूँके जो किमे थारे ताहीं कहणा होगा, वो उससे बखत थारे ताहीं बता दिया जावैगा। 20 क्यूँके बोलण आळे धम न्ही सों, पर थारे सुर्गीय पिता का आत्मा थारे म्ह बोल्लै सै। 21 भाई, भाई नै अर पिता बेट्टे नै, मारण खात्तर सौप देंगें, अर बाळक अपणे माँ बाप के बिरोध म्ह खड़े होके उन ताहीं मरवा देवेंगे। 22 मेरै नाम के कारण सारे माणस थारे तै बैर करेंगे, पर जो अन्त ताहीं धीरज धरैगा उससे का उद्धार होगा। 23 जिब वे धमनै नगर म्ह सतावै, तो दुसरे म्ह भाग ज्याइयो। मै धमनै सच कहूँ सूँ, धम इस्राएल के सारे नगरां म्ह न्ही घूम सकोगें के मै माणस का बेट्टा आ जाऊँगा।”

**¶¶¶¶¶¶¶¶¶¶¶¶¶¶**

24 “चेल्ला अपणे गुरु तै बड़ड़ा न्ही होंदा, अर ना नौक्कर अपणे माल्लिक तै। 25 चेल्लै का गुरु के, अर नौक्कर का माल्लिक के बराबर होणा ए भोत सै। जिब उननै घर के माल्लिक तै शैतान कद्दा तो उसके घरआळां नै के कुछ न्ही कहवेंगे।”

**¶¶¶¶¶¶¶¶¶¶**

26 “इस करके माणसां तै ना डरो, क्यूँके कुछ ढकया कोनी, जो उजागर न्ही करया जावैगा, अर ना कुछ लुहक्या सै जिसका बेरा न्ही पटै। 27 जो मै थारे तै अन्धेरे म्ह कहूँ सूँ, उसनै धम चाँदणे म्ह कहो, अर जो कान्ना-कान सुणो सों, उसनै छात्तां पै चढ़ के प्रचार करो। 28 जो देह नै घात करै सै, पर आत्मा नै घात न्ही कर सकदे, उनतै ना डरियो, पर उस परमेसवर तै डरो जो आत्मा अर देह दोनुआ नै नरक म्ह गेरके नाश कर सके सै। 29 छोट्टी चिडियाँ दो पिस्या की बिके सै, जो ना के बराबर सै तोभी जै वो धरती पे पड़के मरै सै तो पिता परमेसवर नै उसका भी बेरा सै क्यूँके पिता परमेसवर सब कुछ जाणण आळा सै। 30 थारे सिर के बाळ भी सारे गिणे होड़े सै। \* 31 इस करके डरो मतना, धम घणी गौरैयाँ (एक छोट्टी चिडियाँ) तै बढके सो।”

**¶¶¶¶¶¶¶¶¶¶¶¶¶¶¶¶¶¶¶¶**

32 “जो कोए माणसां के स्याम्ही मन्नै मान लेवैगा, उसनै मै भी अपणे सुर्गीय पिता के स्याम्ही मान ल्युँगा। 33 पर जो माणसां के स्याम्ही मेरै बारे म्ह इन्कार करैगा, उसनै मै भी अपणे सुर्गीय पिता के स्याम्ही इन्कार करैगा।”

‡ 10:15 10:15 सदोम अर अमोरा ये वे नगर थे जिस म्ह अब्राहम का भतिज्जा लूत रहया करे था परमेसवर नै ओड़े के माणसां ताहीं उनके बुरे कामां के कारण उन ताहीं आग गेर के नाश कर दिया था § 10:21 10:21 (मीका 7:6) \* 10:30 10:30 (लूका 12:7)

34 “यो ना समझो के मै धरती पै माणसां का मिलाप करवाण आया सूं, मै मिलाप करवाण न्ही, पर न्यारे करण आया सूं। 35 मै तो आया सूं, ताके माणस नै उसके पिता तै, अर बेट्टी नै उसकी माँ तै, अर बहू नै उसकी सास तै न्यारा कर द्यु।”

36 “माणस के बैरी उसके घर के ए लोग होंगे।”

37 “जो अपणे माँ-बाप नै मेरै तै घणा प्यारा मान्नै सै, वो मेरा चेल्ला बणण कै लायक कोनी, अर जो बेट्टा या बेट्टी नै मेरै तै घणा प्यारा मान्नै सै, वो मेरै लायक कोनी।† 38 अर जो अपना दुखां का कूरुस लेकै मेरै पाच्छै, न्ही चाल्लै वो मेरै लायक कोनी। 39 जो अपना जान बचावै सै, वो उसनै खोवैगा, अर जो मेरै कारण अपना जान खोवैगा, वो उसनै पावैगा।”

???

40 “जो धमनै अपनावै सै, वो मन्नै अपनावै सै, अर जो मन्नै अपनावै सै, वो उस परमेसवर नै अपनावै सै, जिसनै मेरे ताहीं भेज्या सै। 41 जो नबियाँ नै नबी जाण के अपनावै, वो नबियाँ के जिसा फळ पावैगा, जिसा नबी नै मिल्लै सै, अर जो धर्मी नै धर्मी जाण के अपनावै, वो धर्मी के जिसा फळ पावैगा। 42 जो कोए मेरे इन चेल्यां म्ह तै एक नै भी मेरा चेल्यां जाण के सिर्फ एक कटोरा टंडा पाणी पियावैगा, मै धमनै सच कहूँ सूं, वो किसे तरियां भी अपना फळ न्ही खोवैगा।”

## 11

?????? ?????????? ??? ??? ?? ?????

1 अपणे बारहां चेल्यां ताहीं इस तरियां समझाण के बाद यीशु ओड़ै तै चाल पड्या, अर गलील परदेस के नगरां म्ह उपदेश अर प्रचार करता घूमता रह्या।

2 यूहन्ना नै जेळ म्ह मसीह के काम्ना की खबर सुणी अर अपणे चेल्यां ताहीं यीशु तै न्यु बुद्धण भेज्या, 3 अर उसतै कह्या, “के आण आळा वो मसीहा जिसका वादा परमेसवर नै करया था, तू ए सै, या हम किसे और की वाट देख्वां?”

4 यीशु नै जवाब दिया, “जो कुछ धम सुणो सो अर देखो सो, यो सारा जाकै यूहन्ना ताहीं कह द्यो, 5 के आन्धे देख्खै सै अर लंगड़े चाल्ले-फिरै सै, कोढ़ी ठीक करे जावै सै अर बहरे सुणे सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै। 6 अर धन्य सै वे, जो मेरै पै शक न्ही करते, अर विश्वास करणा न्ही छोड़ते।”

???? ?? ????? ?????????? ?? ?????

7 जब यूहन्ना के चेल्ले ओड़ै तै जाण लागरे थे तो यीशु भीड़ म्ह माणसां तै यूहन्ना कै बारे म्ह कहण लागग्या, “थम जंगल-बियाबान म्ह के देखण गये थे? के हवा म्ह हाल्दे होए सरकंड्या नै? 8 तो फेर थम के देखण गये थे? के सुथरे लत्ते पहरे होइ माणस ताहीं? देखो, जो सुथरे लत्ते पहरे सै, वे राजघरां म्ह रहवै सै। 9 तो फेर क्यांते गये थे? के किसे नबी नै देखण ताहीं? हाँ, मै धमनै कहूँ सूं, बल्के नबी तै भी बड़े नै।” 10 यूहन्ना वोए सै जिसके बारे म्ह पवित्र ग्रन्थ म्ह लिख्या सै: के “देख, मै अपणे दूत ताहीं तेरे आगै भेज्जू सूं

जो तेरे आगै तेरा रास्ता त्यार करैगा।”\*

11 मै धमनै कहूँ सूं के जो बिरबानियाँ तै जणे सै, उन म्ह तै यूहन्ना बपतिस्मा देण आळे तै बड़डा कोए न्ही होया, पर जो सुर्ग के राज्य म्ह छोट्टे तै भी छोट्टा सै वो उसतै बड़डा सै। 12 यूहन्ना बपतिस्मा देण आळे के दिनां तै इब ताहीं सुर्ग का राज्य बलपूर्वक बढ़ण लाग रहया सै, अर बिरोधी लोग उसनै रोकण की कोशिश करण लागरे सै। 13 यूहन्ना के आण तक सारे नबी अर मूसा के नियम-कायदा म्ह, सुर्ग के राज्य की भविष्यवाणी करी गई। 14 जै थम सच म्ह भविष्यवाणीयाँ पै विश्वास करो सों, तो सुणो यूहन्ना ए वो एलिय्याह सै जो दोबारा आण आळा था।† 15 जिसके कान हों, वो ध्यान तै सुण ले।

16 “मै आज की पीढ़ी के माणसां की बराबरी किसतै करूँ? वे उन बाळकां की ढाळ सै, जो बजारां म्ह बेट्टे होए एक-दुसरे तै रुक्के मारकै शिकायत करै सै:”

17 “हमनै थारे खात्तर बाँसली बजाई, अर थम कोनी नाच्चे, हमनै बिलाप करया, अर थमनै छ्वात्ती कोनी पिट्टी।”

18 “इस्से तरियां यूहन्ना बपतिस्मा देण आळा ना रोट्टी खाया करदा अर ना अंगूर का रस पिया करदा, अर थम कहो सो, ‘उस म्ह ओपरी आत्मा सै।’ 19 मुझ माणस के बेट्टे का खाण-पान और माणसां की तरियां साहा ए सै, लखाओ, थमनै मेरे ताहीं पेट्टू अर पियक्कड़ माणस, चुंगी लेणिये का अर पापियाँ का साथी घोषित कर दिया! पर ज्ञान अपणे काम्मां म्ह सच्चा ठहराया गया सै।”

~~~~~

20 फेर यीशु उन नगरां ताहीं उल्हाणा देण लागया, जिन म्ह उसनै घणे सामर्थ के काम करे थे, क्यूँके उननै पाप करणा न्ही छोड्या अर ना ए परमेसवर के राह पै चाल्लै। 21 “धक्कार सै थारे पै खुराजिन नगर के माणसां! धक्कार सै थारे पै बैतसैदा नगर के माणसां! जो सामर्थ के काम थारे म्ह करे गये, जै वे सूर अर सैदा नगरां म्ह करे जान्दे, तो टाट ओढ़ के, अर राख म्ह बैटके वे कदे के पाप करणा छोड़ देन्दे। 22 पर मै थमनै कहूँ सूँ के न्याय के दिन थारी हालत तै सूर अर सैदा नगरां की हालत घणी सहण जोगगी होवैगी। 23 हे कफरनहूम नगर के माणसां, थम के सोच्चों सों, के थम सुर्ग ताहीं ऊँच्चे करे जाओगें? थम तो अधोलोक तक नीचै जाओगें, जो सामर्थ के काम थारे म्ह करे गये सै, जै सदोम नगर म्ह करे जान्दे, तो वो आज ताहीं बणया रहन्दा। 24 पर मै थमनै कहूँ सूँ के न्याय के दिन तेरी हालत तै सदोम नगर की हालत घणी सहण जोगगी होवैगी।”

~~~~~

25 उस्से बखत यीशु नै कह्या, “हे पिता, सुर्ग अर धरती के प्रभु, मै तेरा शुक्रियादा करूँ सूँ के तन्नै इन बात्तां ताहीं ज्ञानियाँ अर समझदार माणसां तै ल्कोए राख्या, अर बाळकां ताहीं दिखा दिया सै। 26 हाँ, हे पिता, क्यूँके तन्नै योए भाया।”

27 “मेरे पिता नै मेरे ताहीं सब कुछ सौप्या सै, अर कोए बेट्टे ताहीं कोनी जाण्दा, सिर्फ पिता के अलावा, अर कोए पिता ताहीं कोनी जाण्दा, सिर्फ बेट्टे के अलावा, अर हरेक वो माणस जो परम पिता नै जाणे सै, जिसके खात्तर बेट्टे नै उस ताहीं जाहिर करणा चाह्या सै।”

28 “हे सारे मेहनत करण आळी अर बोझ तै दवे होड़े माणसां, मेरे धारे आओ, मै थमनै सुख-चैन दियुंगा। 29 मेरा जूआ अपणे उप्पर टा ल्यो, अर मेरे तै सीखो, क्यूँके मै नरम अर मन का दीन सूँ: अर थम अपणे मन म्ह सुख-चैन पाओगे। 30 क्यूँके मेरा जूआ सोखा अर मेरा बोझ हल्का सै”

## 12

1 तकरीबन उस्से बखत आराम के दिन यीशु चेल्यां के गैल खेत्तां म्ह तै होके जाण लागरया था, अर उसके चेल्यां नै भूख लागगी तो वे गेहूँ की बालें तोड़-तोड़के खाण लागगे। 2 फरीसियाँ नै न्यू देखके उसतै बोल्ले, “देख, तेरे चेल्लें वो काम करै सै, जो नियम-कायदा के मुताबिक आराम के दिन करणा ठीक कोनी।”

3 यीशु नै उनतै कह्या, “के थमनै पवित्तर ग्रन्थ म्ह यो न्ही पढ़या, के दाऊद अर उसके साथियाँ नै जिव वे भूखे होए तो के करया था? 4 वो किस तरियां परमेसवर के घर म्ह गया, अर भेंट की रोट्टी खाई, जिनका खाणा ना तो उस ताहीं अर ना उसके साथियाँ ताहीं पर सिर्फ याजकां ताहीं सही था? 5 यो थमनै नियम-कायदा म्ह न्ही पढ़या के आराम के दिन मन्दर के याजक ए आराम के दिन की विधि ताहीं तोड़ै सै फेर भी उन ताहीं कोए कुछ न्ही कहन्दा? 6 पर मै थमनै कहूँ सूँ के उरै वो सै जो मन्दर तै भी बड़ड़ा सै। 7 जै थम पवित्तर ग्रन्थ म्ह जो लिख्या सै, उसका मतलब जाणदे के, ‘मै बलिदान न्ही पर दया चाहूँ सूँ।’ तो थम बेकसूर ताहीं कसूरवार कोनी ठहरान्दे। 8 मै माणस का बेट्टा तो आराम के दिन का भी प्रभु सूँ।”

9 ओड़ै तै चालकै वो उनके आराधनालय म्ह आया । 10 ओड़ै एक माणस था, जिसका हाथ सूखरया था । फरीसी लोग्गानै यीशु पै दोष लाण खात्तर उसतै बुद्धिया, “मूसा के नियम-कायदा के मुताबिक आराम के दिन ठीक करणा सही सै?”

11 यीशु नै उनतै कह्या, “थारे म्ह तै इसा कौण सै जिसकी एक ए भेड़ हो, अर वा आराम के दिन खडहे म्ह पड़ जावै, तो वो उस ताहीं पकड़कै न्ही काड़डै? 12 फेर माणस तो भेड़ तै भोत घणे खास सै! ज्यातै आराम के दिन भलाई करणा ठीक सै, जिसा के माणसां नै चंगा करणा ।”

13 फेर यीशु नै उस माणस तै कह्या, “अपणा हाथ बढ़ा ।” उसनै बढ़ाया, अर वो दुसरे हाथ की तरियां ठीक होगया । 14 फेर फरीसियाँ नै बाहरणै जाकै उसकै बिरोध म्ह सलाह करी के उसका नाश किस तरियां करया जावै ।

15 न्यू जाणकै यीशु ओड़ै तै चल्या गया । अर घणे माणस उसकै पाच्छै हो लिए, अर उसनै सारया ताहीं ठीक करया, 16 अर उन ताहीं चेतावनी दी, के मेरै बारै म्ह किस ते ना कहियो के मै कौण सूं । 17 ताके जो वचन यशायाह नबी के जरिये कह्या गया था, वो पूरा हो

18 “देखो, यो मेरा सेवक सै, जिस ताहीं मन्नै चुण्या सै, मेरा प्यारा, जिसतै मेरा मन राज्जी सै, मै अपणा आत्मा उसपै तारुगाँ, अर योए दुसरी जात्तां नै न्याय की खबर देवैगा ।

19 “वो ना माणसां के गैल झगड़ा करैगा, अर ना किल्की मारैगा, ना बजारां म्ह उसका कोए शब्द सुणैगा ।

20 “वो कुचले होए सरकण्डे की समान कमजोर माणसां ताहीं कोनी लताड़ैगा, अर बुझते होए दीवे के समान, माणस मरता हो तो वो उसने न्ही मारैगा, वो जिब ताहीं डटया रहूँगा जिब ताहीं न्याय ना दुवा दे ।

21 “अर दुसरी जात उसकै नाम पै आस राखैगी ।”

22 फेर माणस एक आन्धे-गूँगे नै जिसम्ह ओपरी आत्मा थी, जो उसनै देखण अर बोल्लण कोनी देवै थी, उसकै धोरै ल्याए, अर उसनै उस ताहीं ठीक करया, अर वो गूँगा बोलण अर देखण लागया ।

23 इसपै सारे माणस अचम्मा करके कहण लागगे, “यो के दाऊद की ऊलाद सै!” 24 पर फरीसियाँ नै न्यू सुणकै कह्या, “यो तो ओपरी आत्मायाँ के सरदार शैतान की मदद तै ओपरी आत्मायाँ नै लिकाड़ै सै ।”

25 उसनै उनकै मन की बात जाणकै उनतै कह्या, “जिस किसे राज म्ह फूट होवै सै, वो उजड़ जावै सै, अर कोए नगर या घराना जिसम्ह फूट होवै सै, बण्या कोनी रहवैगा । 26 अर जै शैतान ए शैतान नै काड़डै, तो वो अपणा ए बिरोधी बणगया, फेर उसका राज किस तरियां बण्या रहवैगा? 27 भला, जै मै शैतान की मदद तै ओपरी आत्मायाँ नै काढूँ सूं, तो थारी पीढ़ी किसकी मदद तै काड़डै सै? इस करके वैए थारा न्याय करैगे । 28 पर जै मै परमेसवर के आत्मा की मदद तै ओपरी आत्मायाँ नै काढूँ सूं, तो परमेसवर का राज्य थारे धोरै आण पोंहच्या सै ।”

29 “या किस तरियां कोए माणस किसे टाड़डे माणस के घर म्ह बड़कै उसका माळ लूट सकै सै जिब ताहीं के पैहल्या उस टाड़डे ताहीं ना जुड़ ले? जिब वो उसका घर लूट लेवैगा ।”

30 “जो मेरै गेल्या न्ही वो मेरै बिरोध म्ह सै, अर जो मेरै गेल्या न्ही कठठा करदा, वो खिंडावै सै । 31 ज्यातै मै थारे तै कहूँ सूं के माणस का सारे ढाळ का पाप अर बुराई माफ करी जावैगी, पर पवित्तर आत्मा की बुराई माफ कोनी करी जावैगी । 32 जो कोए माणस के बेट्टे के बिरोध म्ह कोए बात कहवैगा, उसका यो कसूर माफ करया जावैगा, पर जो कोए पवित्तर आत्मा के बिरोध म्ह कुछ कहवैगा, उसका कसूर ना तो इस लोक म्ह अर ना परलोक म्ह माफ करया जावैगा ।”

33 “दरखत अपणे फळ तै ए पिच्छाणा जावै सै, जै दरखत नै बढ़िया कहो, तो उसकै फळ नै भी बढ़िया कहो, या दरखत नै निकम्मा कहो, तो उसकै फळ नै भी निकम्मा कहो । 34 हे साँप के सण्पोल्लों जिसे माणसां, थम भुन्डे होके किस तरियां बढ़िया बात कह सको सो? क्यूँके जो मन म्ह भरया सै, वोए मुँह पै आवै सै । 35 भला माणस अपणे मन के भले भण्डार तै भली बात लिकाड़ै सै, अर बुरा

माणस अपणे मन के बुरे भण्डार तै बुराई की बात काढे सै।<sup>36</sup> अर मे थारे तै कहूँ सूँ के जो-जो निकम्मी बात माणस कहवैगें, न्याय के दिन वे हरेक उस बात का लेखा देवैगें।<sup>37</sup> क्यूँके तू अपणी बाततां के कारण बेकसूर, अर अपणी बाततां ए के कारण कसूरवार ठहराया जावैगा।”

<sup>38</sup> इसपै कुछ शास्त्रियाँ अर फरीसियाँ नै उसतै कह्या, “हे गुरु, हम तेरे तै एक चिन्ह-चमत्कार देखणा चाहवाँ सा।”

<sup>39</sup> उसनै उन ताहीं जवाब दिया, “इस युग के बुरे अर जार माणस निशान्नी टोह्वै सै, पर योना नबी की निशान्नी नै छोड़ कोए और निशान्नी उन ताहीं कोनी दी जावैगी।<sup>40</sup> जिस तरियां योना नबी तीन रात अर तीन दिन बड़ी मछली के पेट म्ह रहया, उससे तरियां ए मै माणस का बेट्टा तीन रात अर तीन दिन धरती के भीत्तर रहूँगा।<sup>41</sup> निनवे नगर के माणस न्याय के दिन इस युग के माणसां के गेल्या उठके उन ताहीं कसूरवार ठहरावैगें, क्यूँके उननै योना नबी का प्रचार सुणके अपणे पापां ताहीं स्वीकार किया, अर देखो, उरै वो सै जो योना नबी तै भी बड़ड़ा सै।<sup>42</sup> दक्षिण देश की राणी न्याय के दिन इस युग के माणसां के गेल्या उठके उन ताहीं कसूरवार ठहरावैगी, क्यूँके वा राजा सुलैमान का ज्ञान सुणण के खात्तर धरती के दुसरे सिरे तै आई, अर देखो, उरै वो सै जो सुलैमान तै भी बड़ड़ा सै।”

<sup>43</sup> “जिब ओपरी आत्मा माणस म्ह तै लिकड़के जावै सै, तो सूक्खी जगहां म्ह आराम टोहन्दी फिरै सै, अर पांदी कोनी।<sup>44</sup> फेर कहवै सै, भै उससे माणस म्ह जड़ै तै लिकड़ी धी बोहड़ जाऊँगी।’ अर आके उस माणस नै घर जिसा झाड़ा-बुहारा अर सजा-धज्या पावै सै।<sup>45</sup> फेर वा ओपरी आत्मा जाके अपणे तै और भुंडी सात आत्मायाँ नै अपणे गेल्या ले आवै सै, अर वे उस माणस म्ह बड़के ओड़ै वास करै सै, अर उस माणस की पाच्छली हालत पैहल्या तै भी भुंडी हो जावै सै। इस युग के बुरे माणसां की हालत भी इसीए होवैगी।”

<sup>46</sup> जिब वो भीड़ तै बात करण ए लागरया था, तब उसकी माँ अर उसके भाई बाहरणै खड़े थे अर उसतै बात करणा चाहवै थे।

<sup>47</sup> किसे नै उसतै कह्या, “देख, तेरी माँ अर तेरे भाई बाहरणै खड़े सै, अर तेरे तै बात करणा चाहवै सै।”

<sup>48</sup> या सुणके यीशु नै कहण आळे ताहीं जवाब दिया, “कोण सै मेरी माँ? अर कोण सै मेरे भाई?”  
<sup>49</sup> अर अपणे चेल्यां कान्ही अपणा हाथ बढ़ाके कह्या, “देखो, मेरी माँ अर मेरे भाई ये सै।<sup>50</sup> क्यूँके जो कोए मेरे सुर्गीय पिता की इच्छा पै चाल्लै वोए मेरा भाई, मेरी बेब्वे अर मेरी माँ सै।”

## 13

<sup>1</sup> उससे दिन यीशु घर तै लिकड़के गलील समुन्दर के किनारे जा बेटछा।<sup>2</sup> अर उसके धौरै इसी भीड़ कट्टी होई के वो किस्ती पै चढ़गया, अर सारी भीड़ किनारे पै खड़ी रही।<sup>3</sup> अर उसनै उनतै उदाहरणां म्ह घणीए बात कही “एक किसान बीज बोण लिकड़या।<sup>4</sup> बोदे बखत कुछ बीज राही के किनारे पड़े अर पंछियाँ नै आके उन ताहीं चुग लिया।<sup>5</sup> कुछ बीज पथरीली धरती पै पड़े, जड़ै उनताही घणी माट्टी ना मिली अर इन्धी माट्टी ना मिलण के कारण वे तोळाए जामगे।<sup>6</sup> पर सूरज लिकड़णै पै वे जळगे, अर जड़ ना पकड़ण के कारण सुखगे।<sup>7</sup> कुछ बीज झाड़ियाँ म्ह पड़े, अर झाड़ियाँ नै बढ़के उन ताहीं दाब लिया।<sup>8</sup> पर कुछ बीज आच्छी धरती पै पड़े, कोए सौ गुणा, कोए साठ गुणा, अर कोए तीस गुणा फळ ल्याए।<sup>9</sup> जिसके कान हों, वो ध्यान तै सुण ले।”

<sup>10</sup> चेल्यां नै धौरै आके उसतै कह्या, “तू माणसां तै उदाहरणां म्ह क्यातै बात करै सै?”

<sup>11</sup> उसनै जवाब दिया, “थारे ताहीं सुर्ग के राज्य के भेद की समझ दे राखी सै, पर उन ताहीं न्ही।

<sup>12</sup> क्यूँके जिसके धारे सै, उसतै और दिया जावैगा, अर उसके धारे घणा हो जावैगा, पर जिसके धारे कुछ न्ही सै, उसतै जो कुछ उसके धारे सै, वो भी ले लिया जावैगा।<sup>13</sup> मे उनतै उदाहरणां म्ह ज्यातै बात करूँ सूँ, के वे देखदे होए कोनी देखदे अर सुणदे होए कोनी सुणदे, अर न्ही समझदे।”

14 “उनके बावत यशायाह नबी की या भविष्यवाणी पूरी होवै सै: ‘थम सुणोगे, पर समझोगे कोनी, अर देखोगे, पर थमनै कोनी सूझैगा।’”

15 “क्यूँके इन माणसां का मन मोट्टा होग्या सै, अर वे कान्ना तै ऊँचा सुणै सै, अर उननै अपणी आँख मूद ली सै, कदे इसा ना हो के वे आँखां तै देखै, अर कान्ना तै सुणै अर मन तै समझै, अर पलट जावै, अर मै उननै ठीक करुँ।”

16 पर धन्य सै थारी आँख, क्यूँके वे देखै सै, अर थारे कान क्यूँके वे सुणै सै। 17 मै थमनै साच्ची कहूँ सूँ के घणखरे नबियाँ नै अर धर्मियाँ नै चाह्या के जो बात थम देखो सो, देखै, पर न्ही देख पाए, अर जो बात थम सुणो सो, सुणै, पर न्ही सुण पाए।

18 “इब थम बोण आळे के उदाहरण का मतलब सुणो 19 जो कोए राज्य का वचन सुणकै कोनी समझदा, यो वोए सै जो राही कै किनारे बोया गया था, उस ताहीं दुष्ट आकै खोस ले जावै सै। 20 अर जो पथरीली धरती पै बोया गया सै, यो वो माणस सै, जो वचन सुणकै जिब्बे खुशी कै गेल्या मान लेवै सै। 21 पर अपणे म्ह जड़ न्ही पकड़ण कै कारण वो माड़े से दिन का सै, अर जिब वचन कै कारण क्लेश या संकट आवै सै, तो जिब्बे टोक्कर खावै सै। 22 जो झाड़ियाँ म्ह बोया गया, यो वो सै, जो वचन ताहीं सुणै सै, पर इस दुनिया की फिकर अर धन का धोक्खा वचन नै दावै सै, अर वो फळ कोनी ल्यांदा। 23 जो आच्छी धरती पै बोया गया, यो वो सै, जो वचन ताहीं सुणकै समझै सै, अर फळ ल्यावै सै, कोए सौ गुणा, कोए साठ गुणा, अर कोए तीस गुणा।”

24 यीशु नै उन ताहीं एक और उदाहरण दिया: “सुर्ग का राज उस किसान जिसा सै जिसनै अपणे खेत मै बढ़िया बीज बोया। 25 पर जिब माणस सोवै थे तो उसका बैरी आकै गेहूँ कै बिचाळे जंगळी बीज बोके चल्या गया। 26 जिब अंकुर लिक्ड़े अर बाल लागी, तो जंगळी दाण्या के पौधे भी दिखण लागे।”

27 “इसपै घरेलू नौकरां नै आकै उसतै कह्या, ‘हे माल्लिक, के तन्नै अपणे खेत म्ह बढ़िया बीज कोनी बोया था? फेर जंगळी दाण्या के पौधे उस म्ह कित्त तै आए?’”

28 “उसनै उनतै कह्या, ‘यो किसे बैरी का काम सै।’ नौकरां नै कह्या, ‘के तेरी मर्जी सै के हम जाकै उन जंगळी पौधां नै कट्टे करा?’”

29 “उसनै कह्या, ‘ना, इसा ना हो के जंगळी दाण्या के पौधे कट्टे करदे हाण थम उनकै गेल्या गेहूँ नै भी पाड़ ल्यो। 30 लामणी तक दोनुआ नै एक सेत्ती बधण द्यो, अर लामणी के बखत मै काटण आळा तै कहूँगा के पैहल्या जंगळी दाण्या के पौधे कट्टे करके बाळण खात्तर उनके भरोट्टे जुड़ ल्यो, अर गेहूँ ताहीं मेरै खत्ते म्ह कट्टा करो।’”

31 उसनै उन ताहीं एक और उदाहरण दिया: “सुर्ग का राज राई के एक दाणै की ढाळ सै, जिस ताहीं किसे माणस नै लेके अपणे खेत म्ह बो दिया। 32 वो सारे बीजजां तै छोट्टा तो होवै सै पर जिब बध जावै सै फेर सारे साग-पात तै बड़ड़ा होवै सै, अर इसा दरखत हो जावै सै के अकास के पंछी आकै उसकी डाळियाँ पै बसेरा करै सै।”

33 उसनै एक और उदाहरण उन ताहीं सुणाया “सुर्ग का राज खमीर की ढाळ सै, जिस ताहीं किसे बिरबान्नी नै लेके तीन पसेरी (पन्द्रह किलो) चून म्ह रळाय्या अर होन्दे-होन्दे वो सारा चून खमीर बणग्या।”

34 ये सारी बात यीशु नै उदाहरणां म्ह माणसां तै सिखाई, अर इस तरियां की शिक्षा देण खात्तर वो उदाहरणां का ए इस्तमाल करया करदा। 35 के जो वचन नबी कै जरिये कह्या गया था, वो पूरा होवै: “मै उदाहरण कहण नै अपणा मुँह खोल्लूँगा, मै उन बाततां नै जो दुनिया की शरआत तै लुकही होई सै, जाहिर करूँगा।”

36 फेर वो भीड़ नै छोड़के घरां आया, अर उसके चेल्यां नै उसके धारे आकै कह्या, “खेत म्ह जंगळी दाणै का उदाहरण म्हारे ताहीं समझा दे।”

37 यीशु ने उन ताहीं जवाब दिया, “बढ़िया बीज का बोण आळा, मै माणस का बेट्टा सूं। 38 खेत दुनिया के लोग सै, बढ़िया बीज राज्य की ऊलाद, अर जंगळी बीज शैतान की ऊलाद सै। 39 जिस बैरी ने उन ताहीं बोया वो शैतान सै। लामणी दुनिया का खात्मा सै, अर काटण आळे सुगंदूत सै।”

40 आखर म्ह जिस तरियां जंगळी पौधे कट्टे करे जावै अर बाळे जा सै उससे तरियां दुनिया का खात्मा होवैगा। 41 मै माणस का बेट्टा अपणे सुगंदूतां नै भेज्जूंगा, अर वे उसके राज्य म्ह तै सारे जो खुद पाप करै सै अर दुसरयां नै पाप करण खात्तर उकसावै सै, अर भुन्डे काम करणीया नै कट्टे करैगें। 42 अर उननै आग कै कुण्ड म्ह गरैगें, जडै रोणा, अर दाँत पिसणा होवैगा। 43 उस बखत धर्मि लोग अपणे पिता कै राज्य म्ह सूरज की ढाळ चमकैगें। जिसके कान हों, वो ध्यान तै सुण ले।

44 सुगं का राज्य खेत म्ह लुहके होइ धन की ढाळ सै, जिस ताहीं किसे माणस नै पाया अर लहूको दिया, अर खुशी के मोरे अपणा सारा कुछ बेच दिया अर उस खेत ताहीं मोल ले लिया।

45 फेर सुगं का राज्य एक व्यापारी की तरियां सै जो आच्छे, मोतियाँ की टोह म्ह था। 46 जब उसनै एक घणा महंगा मोती मिल्या तो उसनै जाके अपणा सारा कुछ बेच दिया अर उस ताहीं मोल ले लिया।

47 फेर उसनै कह्या, सुगं का राज्य उस मच्छली के बड़े जाळ की ढाळ सै जो समुन्दर म्ह गेरया जावै, अर हरेक ढाळ की मच्छी ताहीं समेट ल्यावै। 48 अर जब जाळ भरग्या, तो मच्छुआरे उस ताहीं किनारे पे खींच ल्यावै, अर बैठके बढ़िया-बढ़िया मच्छी तो बासणा म्ह कट्टी करी अर बेकार बगा दी। 49 दुनिया के अन्त म्ह इस तरियां ए होवैगा। सुगंदूत आके दुष्ट लोगगां नै धर्मियाँ तै न्यारे करैगें, 50 अर सुगंदूत, दुष्ट लोगगां नै आग कै कुण्ड म्ह गरैगें। जडै रोणा, अर दाँत पिसणा होवैगा।

51 “के थमनै ये सारी बात समझी?” उननै उसतै कह्या, “हाँ।”

52 यीशु ने उनतै कह्या, “इस करके हरेक शास्त्री जो सुगं के राज्य का चेल्ला बणया सै, उस घरवासे की तरियां सै जो अपणे भण्डार तै नयी अर पुरानी चीज काड्डे सै।”

53 जब यीशु नै ये सारे उदाहरण कह लिये, तो ओडै तै चल्या गया।

54 अर अपणे नगर नासरत म्ह आके उनकै आराधनालय म्ह उननै इसा उपदेश देण लागग्या के वे हैरान होके कहण लाग्ये, “इसनै यो ज्ञान अर सामर्थ के काम कित्त तै मिले? 55 के यो खात्ती का छोरा कोनी? अर के इसकी माँ का नाम मरियम अर इसके भाईयाँ का नाम याकूब, यूसुफ, शमौन अर यहूदा कोनी? 56 अर के इसकी सारी बेब्बे म्हारै बिचाळै कोनी रहन्दी? फेर इसनै यो सारा कित्त तै मिल्या?” 57 इस तरियां उननै उसके कारण ठोक्कर खाई, पर यीशु ने उनतै कह्या, “नबी का अपणे गाम अर घर नै छोड़ और किते निरादर कोनी होन्दा।”

58 अर उसनै ओडै उनके अबिश्वास के कारण घणे चमत्कार के काम न्ही करै।

## 14

1 उस बखत चौथाई देश के गलील परदेस के राजा हेरोदेस नै यीशु का जिकर सुणया, 2 अर उसनै अपणे नौकरां तै कह्या, “यो यूहन्ना बपतिस्मा देण आळा सै! वो मरे होया म्ह तै जिन्दा उठया सै, इस्से करके उसतै ये सामर्थ के काम दिक्खै सै।”

3 यूहन्ना ताहीं पकड़के बाँधया अर जेळ म्ह गेर दिया था। क्यूँके हेरोदेस नै अपणे भाई फिलिप्पुस के जिन्दा रहन्दे उसकी घरआळी हेरोदियास ताहीं अपणे धौरै राखली थी, 4 क्यूँके यूहन्ना नै उसतै कह्या था के इस ताहीं राखणा मूसा के नियम-कायदा के मुताबिक तेरे खात्तर ठीक कोनी। 5 ज्यांतै वो उसनै मारणा चाहवै था, पर माणसां तै डरै था क्यूँके वे यूहन्ना नै नबी मान्नै थे।

6 पर जब हेरोदेस का जन्म दिन आया, तो हेरोदियास की बेट्टी नै त्योंहार म्ह नाच दिखाके हेरोदेस ताहीं राज्जी करया। 7 इसपै उसनै कसम खाके वचन भर लिया, “जो कुछ तू माँगैगी, मै तन्नै दियुंगा।”



8 वा अपणी माँ के उकसाण तै बोल्ली, “यूहन्ना वपतिस्मा देण आळे का सिर थाळ म्ह उरै मन्नै मँगवा दे ।” 9 राजा घणा दुखी होया, पर अपणी कसम, अर गेल्या बैठण आळा कै कारण, हुकम दिया के दे दिया जावै ।

10 अर उसनै जेळ म्ह सैनिकां ताहीं भेजकै यूहन्ना का सिर कटवा दिया ।

11 अर उसका सिर थाळ म्ह ल्याया गया अर छोरी ताहीं दिया गया, जिस ताहीं वा अपणी माँ धोरै लेगी । 12 फेर यूहन्ना के चेल्लें आए अर उसकी लाश ताहीं ले जाकै गाड़ दिया, अर जाकै यीशु ताहीं खबर दी ।

13 जिव यीशु नै सुण्या, तो वो किस्ती पै चढ़कै ओड़ै तै किसे सुनसान जगहां ताहीं, एकान्त म्ह चल्या गया । माणस न्यू सुणकै नगर-नगर तै पांए-पाँ उसके पाच्छै हो लिये । 14 यीशु किनारे पै पुहुचा तो एक बड्डी भीड़ देखी अर उनपै तरस खाया, अर उनके विमारां ताहीं ठीक करया ।

15 जिव साँझ होई तो उसके चेल्यां नै उसके धोरै आकै कह्या, “या सुनसान जगहां सै, अर वार होरी सै, माणसां ताहीं विदा करया जावै के वे बस्तियाँ म्ह जाकै अपणे खात्तर खाणा मोल लियावै ।”

16 पर यीशु नै उनतै कह्या, “उनका जाणा जरूरी कोनी! थमे इन्नै खाण नै यो ।”

17 उननै यीशु तै कह्या, “उरै म्हारै धोरै पाँच रोट्टी अर दो मच्छियाँ नै छोड़कै और कुछ कोनी सै ।”

18 यीशु बोल्या, “उन ताहीं उरै मेरै धोरै लियाओ ।”

19 फेर यीशु नै माणसां ताहीं घास पै बैठण खात्तर कह्या, अर उन पाँच रोट्टी अर दो मच्छियाँ ताहीं लिया; सुर्ग कान्ही लखाकै खाणे खात्तर परमेसवर का धन्यवाद करया अर रोट्टी तोड़-तोड़कै चेल्यां ताहीं दी, अर चेल्यां नै माणसां ताहीं । 20 जिव सारे खाकै छिकगे, तो चेल्यां नै बचे होए टुकड्या तै भरी होई बारहां टोकरी ठाई । 21 अर खाण आळे लुगाईयाँ अर बाळकां नै छोड़कै, पाँच हजार माणसां कै करीबन थे ।

22 फेर उसनै जिब्बे अपणे चेल्यां ताहीं किस्ती पै चढ़ण कै खात्तर मजबूर करया के वे उसतै पैहल्या पार चले जावै, जिव ताहीं वो अपणे माणसां ताहीं विदा करै । 23 वो माणसां ताहीं विदा करकै, प्रार्थना करण खात्तर उनतै अलग होके पहाड़ पै चल्या गया; अर साँझ ताहीं वो ओड़ै एकला था । 24 तब तक किस्ती समुन्दर कै किनारे तै भोत दूर जा ली थी अर झाल्लां तै थपेड़े खाकै डगमगाण लागरी थी, क्यूँके हवा स्याम्ही की थी ।

25 यीशु सबेरै तीन बजे कै लोवै-धोवै यीशु समुन्दर पै चाल्दे होए उनकै धोरै आया । 26 चेल्लें उस ताहीं समुन्दर पै चाल्दे होए देखकै घबरागे । अर बोल्ले, “यो भूत सै!” अर भय के मारे किल्की मारण लागगे ।

27 फेर यीशु नै जिब्बे उनतै बात करी अर बोल्या, “होसला राखो! मै सुं, डरो मतना!”

28 पतरस नै उसतै जवाब दिया, “हे प्रभु, जै तू ए सै, तो मन्नै अपणे धोरै पाणी पै चालकै आण का हुकम दे ।”

29 यीशु बोल्या, “आ!” फेर पतरस किस्ती पै तै उतरकै यीशु कै धोरै जाण ताहीं पाणी पै चाल्लण लागया ।

30 पर हवा नै देखकै डरग्या, अर जिव डूब्वण लागया तो किल्की मारकै बोल्या, “हे प्रभु, मन्नै बचा!”

31 यीशु नै जिब्बे हाथ बढ़ाकै थाम लिया अर उसतै बोल्या, “हे अल्पबिश्वासी, तन्नै क्यातै शक करया?”

32 जिव वे किस्ती पै चढ़गे, तो हवा थमगी । 33 इस घटना नै देखकै उसके चेल्यां नै जो किस्ती पै थे, उसकी बड़ाई करकै कह्या, “साच्चए, तू परमेसवर का बेट्टा सै ।”

34 वे गलील समुन्दर पार करकै गान्नेसरत परदेस म्ह पोहचे । 35 ओड़ै के माणसां नै उस ताहीं पिच्छाण लिया अर लोवै-धोवै के सारे देश म्ह खबर भेज दी, अर सारे विमारां नै उसके धोरै ल्याए ।

36 अर उसतै बिनती करण लाग्गै के वे उननै अपणे लत्ते कै पल्ले तै ए छू लेण दे अर जितन्या नै उस ताहीं छुआ वे ठीक होगे ।

## 15

1 फेर यरुशलेम नगर तै कुछ फरीसी अर शास्त्री यीशु कै धारे आकै बोल्ले, <sup>2</sup> “तेरे चेल्लें बुजुर्गां के रीति-रिवाजां ताहीं क्यांतै टाळै सै, क्यों बिना हाथ धोए रोट्टी खावै सै?”

3 उसनै उन ताहीं जवाब दिया, “थम भी अपणी रीति-रिवाज के कारण क्यांतै परमेसवर का हुकम टाळौ सो? <sup>4</sup> क्यूँके परमेसवर नै कह्या, ‘अपणे माँ-बाप की इज्जत कर, अर जो कोए माँ-बाप नै भुंडा बोल्लै, वो मार दिया जावै।’ <sup>5</sup> पर थम कहो सो के जै कोए अपणे माँ-बाप तै कहवै, ‘जो कुछ मननै थारे ताहीं अपणी सम्पत्ति म्ह तै देणा था, वो मननै परमेसवर ताहीं अर्पण ताहीं कर दिया’, <sup>6</sup> तो वो पिता का आदर ना करै, इस तरियां थमनै अपणी रीत-रिवाजां के कारण परमेसवर का वचन टाळ दिया। <sup>7</sup> हे कपटियों, यशायाह नबी नै थारे बरै म्ह या भविष्यवाणी ठीक करी सै”

8 ये माणस होदटां तै तो मेरा आदर करै सै, पर उनका मन मेरै तै दूर रहवै सै।

9 “अर वे खांम-खा मेरी भगति करै सै, क्यूँके माणसां के तरीक्यां नै धर्म उपदेश करके सिखावै सै।”

10 फेर उसनै माणसां ताहीं अपणे धारे बुलाके उनतै कह्या, “सुणो, अर समझो <sup>11</sup> जो मुँह म्ह जावै सै, वो माणस नै अशुद्ध कोनी करदा, पर जो मुँह तै लिकड़ै सै, वोए माणस नै अशुद्ध करै सै।”

12 फेर चेल्यां नै आकै उसतै कह्या, “के तन्नै बेरा सै के फरीसियां नै यो वचन सुणके टोक्कर खाई?”

13 उसनै जवाब दिया, “हेरेक पौधा जो मेरे सुर्गीय पिता नै न्ही लगाया, उखाड़ा जावैगा। <sup>14</sup> उन ताहीं जाण दो; वे आन्धे राह बताणीये सै अर आन्धा जै आन्धे नै राह दिखावै, तो दोन्नु ए खड्डे म्ह गिरैगें।”

15 न्यू सुणके पतरस नै उसतै कह्या, “यो उदाहरण म्हारै ताहीं समझा दे।”

16 यीशु नै उनतै कह्या, “के थम भी इब ताहीं नासमझ सो? <sup>17</sup> के थमनै न्ही बेरा के जो कुछ मुँह म्ह जावै वो पेट म्ह पड़े सै, अर संडास के जरिये लिकड़ जावै सै? <sup>18</sup> पर जो कुछ मुँह तै लिकड़े सै, वो मन तै लिकड़े सै, अर वोए माणस ताहीं अशुद्ध करै सै। <sup>19</sup> क्यूँके भुन्डे विचार, हत्या, जारी, बिगान्नी बिरबान्नी धारे जाणा, चोरी, झूट्टी गवाही अर बुराई मन तै ए लिकड़े सै। <sup>20</sup> येए सै जो माणस नै अशुद्ध करै सै, पर हाथ बिना धोए रोट्टी खाणा माणस नै अशुद्ध कोनी करदा।”

XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX  
(मत्ती 7:24-30)

21 यीशु ओड़े तै लिकड़के, सूर अर सैदा के परदेसां कान्ही चल्या गया। <sup>22</sup> उस परदेस तै एक कनानी बिरबान्नी लिकड़ी, अर किल्की मारके कहण लागगी, “हे प्रभु! दाऊद की ऊलाद, मेरै पै दया कर! मेरी बेट्टी ताहीं ओपरी आत्मा घणी सतावै सै।”

23 पर यीशु नै उसतै कुछ जवाब कोनी दिया। फेर उसके चेल्यां नै आकै उसतै बिनती करी, “इस ताहीं विदा करो, क्यूँके वा म्हारै पाछे रुक्के मारदी आवण लागरी सै।”

24 यीशु नै जवाब दिया, “इस्राएल के कुण्वे की खोई होइ भेड्डां नै छोड़ मै किस के धारे कोनी भेज्या गया।”

25 पर वा आई, अर यीशु ताहीं प्रणाम करके कहण लागगी, “हे प्रभु, मेरी मदद कर।”

26 यीशु नै जवाब दिया, “छोरयां की रोट्टी लेके कुत्त्या के आगूँ गेरणा ठीक कोनी।”

27 उसनै कह्या, “साचची सै प्रभु, पर कुत्ते भी तो मेज के तळै बाळकां की रोट्टी के टुकड़े खा लैवें सै।”

28 इसपै यीशु नै उस ताहीं जवाब दिया, “हे नारी, तेरा विश्वास पक्का सै। जिसा तू चाहवै सै, तेरे खात्तर उसाए हो।” अर उसकी बेट्टी उससे घड़ी तै चंगी होगयी।

29 यीशु ओड़े तै गलील समुन्दर के धारे आया, अर पहाड़ पै चढ़के बैठगया। <sup>30</sup> फेर भीड़ की भीड़ उसके धारे आई। वे अपणे गेल्या लंगड़ा नै, आन्धा नै, टुंडियां नै, गूंगया नै अर दुसरे घणेए माणसां नै उसके धारे ल्याए, अर उन ताहीं उसके पायां म्ह गेर दिया, अर उसनै उन ताहीं ठीक करया। <sup>31</sup> जिव माणसां नै देख्या के गूँगे बोल्ले सै, अर टुंडे चंगे होवै सै, अर लंगड़े चाल्लै सै, अर आन्धे देख्लै सै तो हैरान होके इस्राएल के परमेसवर की बड़ाई करी।

32 यीशु ने अपने चेल्यां ताहीं बुलाया अर कहा, “मन्ने इस भीड़ पै तरस आवै सै, क्यूँके वे तीन दिनां तै मेरै गेल्या सै अर उनके धोरै कुछ खाण नै भी कोनी। मै उननै भूखा बिदा करणा न्ही चाहून्दा, कदे इसा ना हो राह म्ह थक हार कै बेहोस हो जावै।”

33 चेल्यां नै उसतै कहा, “हमनै इस वण म्ह कित्त तै इतनी रोटी मिलैगी के हम इतनी बड्डी भीड़ ताहीं छिकावा?”

34 यीशु नै उनतै बुझया, “थारे धोरै कितनी रोटी सै?” उननै कहा, “सात, अर माड़ी-सी छोटी मच्छी।”

35 फेर उसनै माणसां ताहीं धरती पै बैठण का हुकम दिया। 36 अर उन सात रोटी अर मच्छियाँ ताहीं लिया, परमेसवर का धन्यवाद करके तोड्या, अर अपने चेल्यां ताहीं देन्दा गया, चेल्लें माणसां ताहीं। 37 इस तरियां सारे खाके छिकगे अर चेल्यां नै बचे होइ टुकड्या तै सात टोकरे टाए। 38 खाण आळे बिरवानियाँ अर बाळकां नै छोड़के चार हजार माणस थे। 39 जब वो भीड़ नै विदया करके किस्ती म्ह चढ़या अर मगदन देश की सीमा म्ह आया।

## 16

1 फरीसियाँ अर सद्कियाँ नै धोरै आके उस ताहीं परखण कै खात्तर उसतै कहा, “हमनै सुर्ग की कोए निशान्नी दिखा।”

2 उसनै उन ताहीं जवाब दिया, “साँझ नै थम कहो सो, भौसम खुला रहवैगा, क्यांतैके अकास लाल सै, 3 अर तड़कैए नै कहो सो, ‘आज आँधी आवैगी, क्यूँके अकास लाल अर धूळ-भरया सै।’ थम अकास के लक्षण देखके उसका भेद बता सको सो, पर आज कै बखत म्ह जो होण लाग रह्य सै उसनै देखके भेद क्यूँ न्ही बता सकदे? 4 इस युग के बुरे अर जार माणस चिन्ह-चमत्कार टोह्लें सै, पर योना नबी के चिन्ह-चमत्कार नै छोड़ उन ताहीं और कोए चिन्ह-चमत्कार कोनी दिया जावैगा।” अर वो उननै छोड़के चल्या गया।

5 चेल्लें समुन्दर कै परली ओड़ पोहचे, पर वे रोटी लेणा भूलगे थे। 6 यीशु नै उनकी कपट रूपी शिक्षा के बारे म्ह उनतै कहा, “देखो, फरीसियाँ अर सद्कियाँ कै खमीर तै चौकन्ने रहियो।”

7 वे आप्स म्ह विचार करण लागगे, “हम रोटी कोनी ल्याए ज्यांतै वो इस तरियां कहवै सै।”

8 न्यू जाणके यीशु नै उनतै कहा, “हे अल्प विश्वासियाँ, थम क्यांतै विचार करो सो के म्हारै धोरै रोटी कोनी सै? 9 के थम इव ताहीं न्ही समझे के थमने उन पाँच हजार की पाँच रोटी याद कोनी, अर ना यो के थमने कितनी टोकरियाँ टाई थी? 10 अर उन चार हजार की सात रोटी, अर ना यो के थमने कितने टोकरे टाए थे? 11 थम क्यांतै न्ही समझदे के मन्ने थारे तै रोटियाँ के बाबत न्ही कहा, पर यो के फरीसियाँ अर सद्कियाँ के खमीर तै चौकन्ने रहियो।” 12 फेर उनके समझ म्ह आया के उसनै रोटी कै खमीर तै न्ही, पर फरीसियाँ अर सद्कियाँ की शिक्षा तै चौकन्ने रहण नै कहा था।

13 यीशु कैसरिया फिलिप्पी के परदेस म्ह आया, अर अपने चेल्यां तै बुझण लागया, “लोग मुझ माणस कै बेटे नै के कहवै सै?”

14 वे बोल्ले, “कुछ तो यूहन्ना बपतिस्मा देण आळा कहवै सै, अर कुछ एलियाह, अर कुछ यिर्मयाह या नबियाँ म्ह तै कोए एक कहवै सै।”

15 उसनै उनतै कहा, “पर थम मन्ने के कहो सो?”

16 शमौन पतरस नै जवाब दिया, “तू जिन्दे परमेसवर का बेटा मसीह सै।”

17 यीशु नै उस ताहीं जवाब दिया, “हे शमौन, योना के बेटे, तू धन्य सै; क्यूँके माँस अर लहू नै न्ही, पर मेरै पिता नै जो सुर्ग म्ह सै, या बात तेरे पै जाहिर करी सै। 18 अर मै भी तेरे तै कहूँ सू के तू पतरस सै, अर मै इस पत्थर पै अपनी कलीसिया बणाऊँगा, अर अधोलोक के फाटक उसपै हावी कोनी होवेंगें। 19 मै तन्नै सुर्ग के राज्य की ताळी दियुँगा जो कुछ तू धरती पै बांधेगा, वो सुर्ग म्ह बंधेगा; अर जो तू धरती पै खोलैगा, वो सुर्ग म्ह खुलैगा।” 20 फेर उसनै चेल्यां ताहीं चिताया के किसे तै ना कहियो के मै मसीह सू।

21 उस बखत तै यीशु अपणे चेल्यां तै बतान लाग्या, “जरूरी सै के मै यरुशलेम म्ह जाऊँ अर यहूदी अगुवें, प्रधान याजकां, शास्त्रियाँ के हाथ्यां तै घणा दुख टाऊँ; अर मार दिया जाऊँ; अर तीसरे दिन जी उठूँ।”

22 इसपै पतरस उसनै न्यारा ले जाकै झिडकण लाग्या, “हे प्रभु, परमेसवर इसा ना करै! तेरे गेल्या इसा कदे ना होवैगा।”

23 उसनै पलटकै पतरस तै कह्या, “हे शैतान, मेरै स्याम्ही तै दूर हो! तू मेरै खात्तर ठोक्कर का कारण सै; क्यातैके तू परमेसवर की बात्तां पै न्ही, पर माणसां की बात्तां पै मन लगावै सै।”

24 फेर यीशु नै अपणे चेल्यां तै कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का करूस ठाकै, मेरै पाच्छै हो लेवै। 25 क्यूँके जो अपणी जान बचाणा चाहवैगा, वो उसनै खोवैगा; अर जो कोए मेरै खात्तर जान खोवैगा, वो उसनै पावैगा। 26 जै माणस सारी दुनिया नै पा लेवै, अर अपणी जान का नुकसान ठावै, तो उसनै के फायदा होगा? या माणस अपणी जान कै बदले के देवैगा? 27 मै माणस का बेटटा अपणे सुगंदूतां कै गेल्या अपणे पिता की महिमा म्ह आऊँगा, अर उस बखत मै हरेक नै उसके काम्मां कै मुताबिक प्रतिफल देऊँगा।”

28 “मै थारे तै साच्ची कहूँ सू जो आइ खड़े सै उन म्ह तै कुछ इसे सै के जिव तक वे मुझ माणस के बेटटे नै उसके राज्य म्ह आन्दे होए ना देख लेंगे तब ताहीं मौत उननै छू भी न्ही पावैगी।”

## 17

1 छः दिनां पाच्छै यीशु नै पतरस अर याकूब अर उसके भाई यूहन्ना ताहीं गेल्या लिया, अर उन ताहीं एक्ले म्ह किसे ऊँचे पहाड़ पै लेग्या। 2 ओइ उनकै स्याम्ही उसका रूप म्ह बदलाव होया, अर उसका मुँह सूरज की ढाळ चमक्या अर उसके लत्ते चाँदणे की ढाळ धोळे होग्ये। 3 अर मूसा नबी अर एलिय्याह उसके गेल्या बात करदे होइ दिक्खे।

4 इसपै पतरस नै यीशु तै कह्या, “हे प्रभु, म्हारा उरै रहणा ठीक सै। जै तेरी मर्जी हो तो मै उरै तीन मण्डप बणाऊँ, एक तेरे खात्तर, एक मूसा नबी खात्तर, एक एलिय्याह नबी खात्तर।”

5 वो बोल्लणए लागरया था के एक चमकदा होया बादळ उनपै छाग्या, अर उस बादळ म्ह तै या वाणी लिकडी, “यो मेरा प्यारा बेटटा सै, जिसतै मै राज्जी सू: इसकी सुणो।”

6 चेल्ले न्यू सुणके मुँह के बळ गिरगे अर घणे डरगे। 7 यीशु नै धोरै आकै उन ताहीं छुया, अर बोल्या, “उठो, डरो मतना।” 8 फेर उननै अपणी निगांह करी अर यीशु नै छोड़ और किसे ताहीं कोनी देख्या।

9 जिव वे पहाड़ पै तै उतरण लागरे थे, तो यीशु नै उनतै यो हुकम दिया, “जिव ताहीं मै माणस का बेटटा मरे होया म्ह तै जिन्दा न्ही हो जाऊँगा, तब ताहीं जो कुछ थमनै देख्या सै किसे तै ना कहियो।”

10 इसपै उसके चेल्यां नै उसतै बुझ्याया, “फेर शास्त्री क्यातै कहवै सै के एलिय्याह का पैहल्या आणा जरूरी सै।”

11 उसनै जवाब दिया, “एलिय्याह जरूर आवैगा, अर सारा कुछ सुधरैगा। 12 पर मै थमनै कहूँ सू के एलिय्याह आ लिया, अर माणसां नै उस ताहीं न्ही पिच्छाणा, पर जिसा चाह्या उसाए उसकै गेल्या करया। इस तरियां तै मै माणस का बेटटा भी उनके हाथ्यां तै दुख टाऊँगा।” 13 फेर चेल्यां नै समझया के उसनै म्हारै तै यूहन्ना बपतिस्मा देणीये के बाबत कह्या सै।

14 जिव वो भीड़ कै धोरै पोहचे, तो एक माणस उसके धोरै आया, अर गोड्डे टेक के कहण लाग्या, 15 “हे प्रभु, मेरे बेटटे पै दया कर! क्यूँके उस ताहीं मिर्ची आवै सै, अर वो घणा दुख ठावै सै; अर बार-बार आग म्ह अर बार-बार पाणी म्ह पड़ ज्या सै। 16 अर मै उसनै तेरे चेल्यां धोरै ल्याया था, पर वे उसनै ठीक कोनी कर सके।”

17 यीशु नै जवाब दिया, “हे अबिश्वासी अर जिद्दी माणसों, मै कद ताहीं थारे गेल्या रहूंगा? कद ताहीं थारी सहूंगा? उसनै उरै मेरै धोरै ल्याओ।” 18 फेर यीशु नै ओपरी आत्मा ताहीं धमकाया, वा उस म्ह तै लिकइगयी अर छोरा उस्से बखत ठीक होगया।

19 फेर चेल्यां नै एक्ले म्ह यीशु कै धोरै आकै कह्या, “हम उसनै क्यातै न्ही काढ सके?”

20 उसनै उनतै कह्या, “अपणे बिश्वास की कमी के कारण, क्यूँके मै थमनै साच्ची कहूँ सूँ, जै थारा बिश्वास राई के दाणे के बराबर भी हो, तो इस पहाड़ तै कह सकोगे, ‘उरै तै सरकके ओड़ै चल्या जा’, तो वो चल्या जावैगा, अर कोए बात थारे खात्तर मुश्किल कोनी होवैगी।” 21 (पर या जात बिना प्रार्थना अर ब्रत के कोनी लिकइदी।)

22 जब वे गलील परदेस म्ह थे, तो यीशु नै उनतै कह्या, “मै माणस का बेट्टा माणसां के हाथ्यां म्ह पकड़वाया जाऊँगा। 23 वे मन्नै मार देवेंगे, अर मै तीसरे दिन जिन्दा हो जाऊँगा।” इसपे वे घणे उदास होए।

24 जब वे कफरनहूम पोहचे, तो मन्दर का कर लेण आळा नै पतरस कै धोरै आणके बुद्ध्या, “के थारा गुरु, मन्दर का कर कोनी देदा?”

25 उसनै कह्या, “हाँ, देवै सै।” जब वो घरां आया, तो यीशु नै उसकै बुद्ध्या तै पैहल्याए उसतै कह्या, “हे शमौन, तू के सोचके सै? धरती के राजा चुंगी किन तै लेवै सै? अपणे बेटचाँ तै या बिगान्याँ तै?”

26 पतरस नै उसतै कह्या “बिगान्याँ तै।” यीशु नै उसतै कह्या “तो बेट्टे बचगे। 27 तोभी इस खात्तर के हम उननै ठोक्कर ना खुवावा, तू झील के किनारे जाके कांडा गेर, अर जो मच्छी पैहले लिकड़े, उसनै ले, उसका मुँह खोल्लण पे तेरे ताहीं एक सिक्का (जिसकी किम्मत चार दिन की मजदूरी के बराबर हो सै) मिलेगा, उस्से नै लेके मेरै अर अपणे बदले म्ह दे दिये।”

## 18

1 उस घड़ी चेल्लें यीशु कै धोरै आके बुद्ध्या लागगे, “सुर्ग के राज्य म्ह बड़ड़ा कौण सै?”

2 इसपै उसनै एक बाळक ताहीं धोरै बुलाके उनकै बिचाळे खडचा करया, 3 अर कह्या, “मै थमनै सच कहूँ सूँ के जब ताहीं थम न्ही बदलो अर बाळकां की ढाळ नमूर न्ही बणो, थम सुर्ग के राज्य म्ह बड़ न्ही सकदे। 4 जो कोए अपणे-आपनै इस बाळक की ढाळ छोटटा करेगा, वो सुर्ग के राज्य म्ह बड़ड़ा होवैगा। 5 अर जो कोए मेरै नाम तै एक इसे बाळक ताहीं अपणावै सै वो मन्नै अपणावै सै।”

6 पर जो कोए इन छोटचा बाळकां समान जो मेरै पै बिश्वास करै सै, किसे तै भी पाप करवावै, तो उसकै खात्तर भला योए सै के एक बड़ड़ी चाक्की का पाट उसके गळ म्ह लटकाया जावै, अर वो इन्धा समुन्दर म्ह डबोया जान्दा। 7 ठोकरां के कारण दुनिया पे हाय! ठोकरां का लागणा जरूरी सै; पर थिक्कार सै उस माणस पै जिसकै जरिये ठोक्कर लागगे सै। 8 जै तेरा हाथ या तेरा पैर तेरे तै पाप करवावै सै, तो उसनै काटके बगा दे, टुंडा या लंगड़ा होके जीवन म्ह दाखल होणा इसतै भला सै के दो हाथ या दो पैर रहंदे होए तू अनन्त आग म्ह गेरया जावै। 9 जै तेरी आँख तेरे तै पाप करवावै सै, तो उस ताहीं लिकाड़के फैंक दे, काणा होके अनन्त जीवन म्ह बड़णा तेरे खात्तर भला सै, ना के दो आँख रहंदे होए तू नरक की आग म्ह गेरया जावै।

10 देखो, थम इन छोटचा म्ह तै किसे नै तुच्छ ना जाणीयो, क्यूँके मै थमनै कहूँ सूँ के सुर्ग म्ह उनके सुर्गदूत मेरे सुर्गीय पिता की मौजूदगी म्ह सदा रहवै सै। 11 (क्यूँके मै माणस का बेट्टा खोये होया नै बचाण आया सूँ।)

12 थारा इसके वारें म्ह के विचार सै? जै किसे माणस की सौ भेड़ हों, अर उन म्ह तै एक भटक जावै, तो के वो निन्यानवे ताहीं छोड़के, अर पहाड़ां पै जाके, उस भटकी होई नै कोनी टोहवैगा? 13 अर जै इसा हो के उसने पावे, तो मै थमनै साच्ची कहूँ सूँ, के वो उन निन्यानवे भेड़ों के खात्तर

जो भटकी कोनी थी, इतना आनन्द कोनी करेगा जितना के इस भेड़ के खात्तर करेगा।<sup>14</sup> इस्से ढाळ थारे पिता की जो सुर्ग म्ह सै या मर्जी कोनी के इन छोट्यां म्ह तै एक भी नाश हो।

15 “जै तेरा बिश्वासी भाई तेरे खिलाफ कसूर करै, तो जा अर एकले म्ह बतळा के उसनै समझा, जै वो तेरी सुणके पछतावै तो तन्नै अपणे भाई ताहीं पा लिया।<sup>16</sup> जै वो तेरी न्ही सुणै, तो एक या दो जन नै अपणे गेल्या और ले जा, क्यूँके मूसा नबी के नियम-कायदा के मुताबिक ‘हरेक बात दो या तीन तै ज्यादा गवाह के स्याम्ही सच साबित हो जावै।’<sup>17</sup> जै वो उनकी भी न्ही मान्नै, तो कलीसिया तै कह दे, पर जै वो कलीसिया की भी कोनी मान्नै तो तू यो समझ ले के वो गैर यहूदी अर चुंगी लेण आळे जिसा सै।”

18 “मै थमनै साच्ची कहूँ सूँ, जो कुछ थम धरती पै बांधोगे, वो सुर्ग म्ह बंधेगा अर जो कुछ थम धरती पै खोल्लोगे, वो सुर्ग म्ह खुलैगा।”

19 “फेर मै थमनै कहूँ सूँ, जै थारे म्ह तै दो जणे धरती पै किसे बात के खात्तर एक मन होके बिनती करै, तो वा मेरे पिता की ओड़ तै जो सुर्ग म्ह सै, उनके खात्तर हो जावैगी।<sup>20</sup> क्यूँके जड़ै दो या तीन मेरे नाम पै कट्टे होवै सै, ओड़ै मै उनके बिचाळे म्ह होऊँ सूँ।”

21 जिव पतरस नै धोरै आके उसतै कहा, “हे प्रभु, जै मेरा भाई कसूर करदा रहवै, तो मै कितनी बार उस ताहीं माफ करूँ? के सात बार?”

22 यीशु नै उसतै कहा, “मै तेरे तै यो न्ही कहन्दा के सात बार, बल्के सात बार के सत्तर गुणा तक माफ करिये।”

23 “इस करके सुर्ग के राज्य की तुलना इस उदाहरण तै करी जा सकै सै, किसे राजा नै अपणे नौकरां का लेक्खा (ब्यौरा) लेणा चाह्या।<sup>24</sup> जिव वो लेक्खा लेण लाग्या, तो एक जणा उसके स्याम्ही ल्याया गया जो दस हजार तोड़े\* का कर्जवान था।<sup>25</sup> जिव के चुकता करण नै उसके धोरै कुछ कोनी था, तो उसके माल्लिक नै कहा, ‘थो अर इसकी घरआळी अर बाळ-बच्चे अर जो कुछ इसका सै सारा बेच्या जावै, अर कर्ज चुकता करया जावै।’”

26 “इसपै उस नौक्कर नै उसके पायां म्ह पड़के उस ताहीं कहा, ‘हे राजा धीरज धर, मै सारा कुछ भर दियुँगा।’<sup>27</sup> इसपै राजा नै तरस खाके उस नौक्कर ताहीं छोड़ दिया, अर उसका कर्जा भी माफ कर दिया।”

28 “पर जिव वो नौक्कर बाहरणै लिक्डया, तो उसके साथ के नौकरां म्ह तै एक उसतै मिल्या जो उसके सौ दीनार (100 दिन की मजदूरी) का कर्जदार था; उसनै पकड़के उसका गळा घोटचा अर कहा, ‘जो कुछ मेरा तेरे पै कर्ज सै भर दे।’”

29 “इसपै उसका साथ का नौक्कर पायां म्ह पड़के उसतै बिनती करण लाग्या, ‘धीरज धर, मै सारा कुछ भर दियुँगा।’”

30 वो न्ही मान्या, पर जाके उस ताहीं जेळ म्ह गेर दिया के जिव ताहीं कर्जा ना भर दे, तब तक ओड़ैए रहवै।<sup>31</sup> उसके गेल्या के नौक्कर यो जो होया था देखके घणे उदास होए, अर जाके अपणे राजा ताहीं पूरा हाल बता दिया।

32 “फेर राजा नै उस ताहीं बुलाके उसतै कहा, ‘हे दुष्ट नौक्कर, तन्नै जो मेरे तै बिनती करी, तो मन्नै तेरा वो सारा कर्जा माफ कर दिया।<sup>33</sup> ज्यातै जिस ढाळ मन्नै तेरे पै दया करी, उससे तरियां के तन्नै भी अपणे साथ के नौक्कर पै दया न्ही करणी चाहिये थी?’<sup>34</sup> अर उसके माल्लिक नै छो म्ह आके उस ताहीं दण्ड देणआळे के हाथ्यां म्ह सौप दिया, के जिव ताहीं वो सारा कर्जा भर न्ही देवै, तब तक उनके हाथ्यां म्ह रहवै।

35 “इस्से ढाळ जै थारे म्ह तै अपणे भाई नै ना माफ करै तो मेरा पिता जो सुर्ग म्ह सै थारे तै उसाए करैगा।”

\* 18:24 18:24 (1 तोड़ा 15 साल की मजदूरी के बराबर सै)

## 19

1 जिब यीशु नै ये बात कह ली, तो गलील परदेस तै चल्या गया; अर यरदन नदी के परली ओड़ यहूदिया परदेस म्ह आया।<sup>2</sup> फेर बड़्डी भीड़ उसके पाच्छे हो ली, अर उसने ओड़े उन ताहीं चंगा करया।

3 फेर फरीसी उसनै परखण खात्तर धोरै आकै बोल्ले, “के किसे भी कारण तै अपणी घरआळी ताहीं छोड़णा ठीक सै?”

4 उसनै जवाब दिया, “के थमनै न्ही पढ़या के जिसनै उन ताहीं बणाया, उसनै शरूआत तै नर अर नारी बणाकै कहा, <sup>5</sup> इस कारण माणस अपणे माँ-बाप तै न्यारा होकै अपणी घरआळी के गेल्या रहवैगा अर वे दोन्नु एकए तन होवैगें? <sup>6</sup> इस करकै इब वे दो न्ही, पर एक तन सै। इस करकै जिन ताहीं परमेसवर नै जोड़या सै, उन ताहीं माणस न्यारा ना करै।”

7 उननै उसतै कहा, “फेर मूसा नबी नै यो क्यातै ठहराया के तलाक देकै उस ताहीं छोड़दे?”

8 उसनै उनतै कहा, “मूसा नबी नै थारे मन की कठोरता के कारण थारे तै अपणी-अपणी घरआळी ताहीं छोड़ देण का हुकम दिया, पर शरूआत म्ह इसा कोनी था।<sup>9</sup> अर मै थमनै कहूँ सूँ, के जो कोए जारी नै छोड़कै और किसे कारण तै अपणी घरआळी नै छोड़कै दुसरा ब्याह करै, वो जारी करै सै, जो उस छोड़डी होई तै ब्याह करै, वो भी जारी करै सै।”

10 चेल्यां नै यीशु तै कहा, “जै माणस का बिरबान्नी के गेल्या इसा सम्बन्ध सै, तो ब्याह करणा आच्छा कोनी।”

11 यीशु नै उनतै कहा, “हरेक कोए इन उपदेशां पै चाल न्ही सकदे, सिर्फ वे जिन ताहीं या शक्ति देई गई सै।<sup>12</sup> क्यूँके कुछ नपुंसक इसे सै, जो माँ के पेट या गर्भ ए तै इसे जन्मे; अर कुछ नपुंसक इसे सै, जिन ताहीं माणस नै नपुंसक बणाया; अर कुछ नपुंसक इसे सै, जिन नै सुर्ग के राज्य के खात्तर खुद ताहीं नपुंसक बणाया सै। जो इस बात ताहीं समझ सकै सै, वे समझ ले।”

13 फेर माणस बाळकां नै उसके धोरै ल्याए, के वो उनके उप्पर हाथ धरै अर प्रार्थना करै; पर चेल्यां नै उन ताहीं धमकाया।

14 यीशु नै कहा, “बाळकां नै मेरै धोरै आण द्यो, अर उन ताहीं मना मतना करो, क्यूँके सुर्ग का राज्य इसाए का सै।”<sup>15</sup> अर वो उनपै हाथ धरकै ओड़ै तै चल्या गया।

16 एक माणस यीशु के धोरै आया अर उसतै कहा, “हे गुरु, मै कौण सा भला काम करूँ के अनन्त जीवन पाऊँ?”

17 यीशु नै उसतै कहा, “तू मेरै तै भलाई के बाबत क्यातै बुझ्झै सै? भला तो एकए सै, पर जै तू जीवन म्ह दाखल होणा चाहवै सै, तो हुकमां नै मान्या कर।”

18 उसनै यीशु तै कहा, “कौण-से हुकम?” यीशु बोल्या, “खून ना करियो, जारी ना करियो, चोरी ना करियो, झूट्टी गवाही ना दियो,<sup>19</sup> अपणे माँ-बाप का आदर करियो, अर अपणे पडौसी तै अपणे जिसा प्यार राखियो।”

20 उस जवान नै उसतै कहा, “इन सारया ताहीं तो मन्नै मान्या सै, इब मन्नै किस बात की कमी सै?”

21 यीशु नै उसतै कहा, “जै तू सिध्द होणा चाहवै सै तो जा, अपना सारा माळ बेचकै कंगालां ताहीं दे, अर तन्नै सुर्ग म्ह धन मिलैगा; अर आकै मेरा चेल्ला बणण खात्तर मेरै पाच्छे हो ले।”

22 पर वो जवान या बात सुणकै उदास होकै चल्या गया, क्यूँके वो घणा साहूकार था।

23 फेर यीशु नै अपणे चेल्यां तै कहा, “मै थमनै साच्ची कहूँ सूँ के साहूकार का सुर्ग के राज्य म्ह बड़णा ओक्सा सै।<sup>24</sup> थारे ताहीं फेर कहूँ सूँ के जिस तरियां तै ऊँट का सूई के मोरै म्ह तै लिकड़णा आसान हो सकै सै। पर परमेसवर के राज्य म्ह साहूकार का बड़णा भोत मुश्किल सै।”

25 न्यू सुणकै चेल्यां नै हैरान होकै कहा, “फेर किसका उद्धार हो सकै सै।”

26 यीशु नै उनकी ओड़ लखाकै कहा, “माणसां तै तो यो कोनी हो सकदा, पर परमेसवर तै सारा कुछ हो सकै सै।”

27 इसपै पतरस नै उसतै कह्या, “देख, हम तो सारा कुछ छोड़कै तेरे पाच्छै हो लिए सा: तो हमनै के मिलैगा?”

28 यीशु नै उनतै कह्या, “मै थमनै साच्ची कहूँ सूँ के नयी सृष्टि म्ह जिब माणस का बेट्टा अपणी महिमा के सिंहासन पै बैठैगा, तो थम भी जो मेरै पाच्छै हो लिए सो, बारहां सिंहासनां पै बैठकै इस्राएल के बारहां गोत्रां का न्याय करोगे। 29 अर जिस किसे नै घर, या भाई-भाण, या माँ-बाप, या बाळ-बच्चे, या खेतां ताहीं मेरै नाम कै खात्तर छोड़ दिया सै, उस ताहीं सौ गुणा मिलैगा, अर वो अनन्त जीवन का हकदार होवैगा। 30 पर भोत-से जो पैहले सै, पाच्छले होंगे; अर जो पाच्छले सै, पैहले होंगे।”

## 20

1 यीशु नै अपणे चेल्यां ताहीं सिखाण खात्तर एक और उदाहरण दिया, “सुर्ग का राज्य किसे घर के माल्लिक की ढाळ सै, जो तड़कैए लिकड़या के अपणे अंगूर के बाग म्ह मजदूरां नै लावै। 2 वो मजदूरां नै एक दीनार (एक दिन की मजदूरी) रोज की दिहाड़ी पै ल्याया अर उननै अपणे अंगूर के बाग म्ह भेज्या।”

3 “फेर सबैरे के नौ बजे पाच्छै, उसनै लिकड़कै और माणसां ताहीं बजार म्ह खड़े देख्या, 4 अर उसनै कह्या, ‘थम भी अंगूर के बाग म्ह जाओ, अर मै एक दिन की जो भी मजदूरी थारी बणै सै वा थमनै दियुँगा।’ अर वे भी काम पै चले गये। 5 फेर उसनै बारहां बजे अर तीन बजे कै लोवै लिकड़कै उस्से तरियां करया। 6 तकरीबन पाँच बजे फेर वो अपणे घर तै गया अर उसनै फेर कई माणसां ताहीं ओड़ै खड़े देख्या, अर उसनै कह्या, ‘थम क्यांतै सारे दिन उरै बेकार खड़े रहों सों?’ उननै उसतै कह्या, ‘ज्यांतै के किसे नै म्हारै ताहीं मजदूरी पै कोनी लगाया।’”

7 “उसनै उनतै कह्या, ‘थम भी मेरे अंगूर के बाग म्ह काम करण खात्तर जाओ।’”

8 “साँझ नै अंगूर के बाग के माल्लिक नै अपणे भण्डारी तै कह्या, ‘मजदूरां ताहीं बुलाकै पाच्छल्यां तै लेकै पैहल्या ताहीं उननै मजदूरी दे-दे।’”

9 “जो पाँच बजे लगाये थे, उन ताहीं एक-एक दीनार (एक दिन की मजदूरी) मिल्या। 10 जो पैहल्या आये उननै यो सोच्या के म्हारै ताहीं घणा मिलैगा, पर उननै भी एक-एक दीनार (एक दिन की मजदूरी) ए मिल्या। 11 मजदूरी तो उननै ले ली पर वे अंगूर के बाग के माल्लिक पै बिरड़ाकै कहण लागे, 12 ‘जो पाच्छै लागे थे, उननै बस एक घंटा काम करया, अर तन्नै म्हारै ताहीं भी उतनाए दिया जितना उन ताहीं, जिब के हमनै दिन-भर बोझ ठाया अर घाम सहया?’”

13 “बाग के माल्लिक नै उन म्ह तै एक ताहीं जवाब दिया, ‘हे दोस्त, मन्नै तेरे गैल कोए अन्याय कोनी करया। के तन्नै ए मेरै तै एक दीनार (एक दिन की मजदूरी) कोनी तय करया था? 14 जो तेरा सै, ठा ले अर चल्या जा; मेरी मर्जी, के जितना तन्नै दियुँ उतनाए इस पाच्छले ताहीं भी दियुँ। 15 के यो ठीक कोनी के मै अपणे धन का जो चाहूँ वो करूँ? के मेरै भले होण के कारण तू कड़वी नजर तै देकवै सै?’”

16 “इस तरियां तै जो पाच्छले सै, वे पैहले होंगे, जो पैहले सै, पाच्छले होवेंगे।”

17 जब यीशु अपणे बारहां चेल्यां गैल यरुशलेम नगर म्ह जाण लागरया था तो उन ताहीं एकान्त म्ह लेण्या, अर राह म्ह चालते-चालते उनतै बोल्या, 18 “देकखो, हम यरुशलेम नगर म्ह जावां सा; अर मै माणस का बेट्टा प्रधान याजकां अर शास्त्रियाँ कै हाथ्यां पकड़वाया जाऊँगा, वे मेरे खात्तर मौत की सजा तय करैंगे। 19 अर मेरे ताहीं गैर यहूदियाँ कै हाथ्यां म्ह सौपैंगे, वे मेरा मजाक उड़ावैंगे, कोड़े मारैंगे, कूस पै चढ़ावैंगे, अर मै तीसरे दिन जिन्दा हो जाऊँगा।”

20 फेर जब्दी कै बेटचाँ की माँ नै, अपणे बेटचाँ के गेल्या यीशु कै धौरै आकै प्रणाम करया, अर उसतै कुछ माँगण लागगी।

21 यीशु नै उसतै कह्या, “तू के चाहवै सै?” वा यीशु तै बोल्नी, “मन्नै वचन दे, के मेरे ये दो बेट्टे तेरे राज्य म्ह एक तेरे सोळै अर दुसरा तेरे ओळै कान्ही बेट्टै।”



22 यीशु नै जवाब दिया, “थमनै न्ही बेरा के थम के माँगो सों। जो दुख का कटोरा मै पीण पै सूं, के थम वो दुख का कटोरा पी सको सो?” उननै उस ताहीं कह्या, “पी सकां सा।”

23 उसनै उनतै कह्या, “थम मेरे दुख का कटोरा तो पी ल्योगे, पर अपने सोळे अर ओळे कान्ही किसे ताहीं बिठाणा मेरा काम कोनी, पर जिनके खात्तर मेरै पिता की ओड़ तै त्यार करया गया, उननै ए खात्तर सै।”

24 न्यू सुणकै दसो चेल्ले उन दोन्नु भाईयाँ पै छो करण लागगे। 25 यीशु नै उन ताहीं धोरै बुलाकै कह्या, “थम जाणो सो के गैर यहूदियाँ के हाकिम उनपै राज करै सै; अर जो बड़े सै, वे उनपै हक जमावै सै। 26 पर थारे म्ह इसा कोनी होवैगा; जो कोए थारे म्ह बड़ड़ा होणा चाहवै, वो थारा सेवक बणै, 27 अर जो थारे म्ह प्रधान होणा चाहवै, वो दास बणै, 28 जिसा के मै माणस का बेट्टा, ज्यांतै कोनी आया के मेरी सेवा-पाणी करी जावै, पर ज्यांतै आया के खुद सेवा-पाणी करै, अर घणखरयां के छुटकारै के खात्तर अपनी जान देऊं।”

29 जिब वे यरीहो नगर तै लिकड़े थे, तो एक बड़डी भीड़ यीशु कै पाच्छै हो ली। 30 अर दो आन्धे, जो सड़क के किनारे बेट्टे थे, न्यू सुणकै के यीशु जाण लागरया सै, रुक्का मारके कहण लागगे, “हे प्रभु, हे दाऊद की ऊलाद, म्हारै पै दया कर।”

31 माणसां नै उन ताहीं धमकाया के बोल-बाल्ले रहवै; पर वे और भी रुक्के मारके बोल्ले, “हे प्रभु, दाऊद की ऊलाद, म्हारै पै दया कर।”

32 फेर यीशु नै खड़े होके, उन ताहीं बुलाया अर कह्या, “थम के चाहवो सो के मै थारे खात्तर करूँ?”

33 उननै उसतै कह्या, “हे प्रभु, योए के हम देखण लाग जावां।”

34 यीशु नै तरस खाके उनकी आँखां पै हाथ लगाया, अर वे जिब्बे देखण लागगै; अर उसकै पाच्छै हो लिये।

## 21

1 जिब वे यरुशलेम नगर के लोवै पोहचे अर जैतून पहाड़ पै बैतफगे गाम के धोरै आये, तो यीशु नै दो चेल्यां ताहीं न्यू कहके भेज्या, 2 “स्याम्ही के गाम म्ह जाओ। ओड़ै पोहोचदये एक गधी बंधी होई, अर उसके गेल्या बच्चा थमनै मिलेगा। उननै खोल के मेरै धोरै ल्याओ। 3 जै थारे तै कोए कुछ कहवै, तो कहियो के प्रभु नै इसकी जरूरत सै, अर वो तोळा उसनै भेज देवैगा।”

4 जो ज्यांतै होया के जो वचन नबी के जरिये कह्या गया था, वो पूरा हो

5 “यरुशलेम के लोगगां तै कहो, देख, थारा राजा थारे धोरै आवै सै; वो नम्र सै, अर गधे पै बेट्या सै; बल्के गधी के बच्चे पै।”

6 चेल्यां नै जाके, जिसा यीशु नै उनतै कह्या था, उस्से तरियां करया। 7 अर गधी अर बच्चे ताहीं ल्याकै, उसपै अपने लत्ते गेरे, अर वो उसपै बैठगया। 8 फेर घणखरे माणसां नै अपने लत्ते राह म्ह बिछाये, अर माणसां नै दरखतां तै डाळियाँ काटके राह म्ह बिछाई।

9 जो भीड़ आगै-आगै अर पाच्छै-पाच्छै चाल्ली आवै थी, रुक्के मार-मारके कहवै थी, “दाऊद की ऊलाद ताहीं होशाना\* , धन्य सै वो जो प्रभु के नाम तै आवै सै, अकास म्ह होशाना।”

10 जिब वो यरुशलेम म्ह बड़या, तो सारे नगर म्ह खलबल्ली माचगी, अर माणस कहण लागगे, “यो कौण सै?”

11 माणसां नै कह्या, “यो गलील परदेस के नासरत नगर का नबी यीशु सै।”

12 यीशु नै परमेसवर के मन्दर म्ह जाके उन सारया ताहीं, जो मन्दर म्ह लेण-देण करे थे, काढ दिया, अर सर्राफां (पईसा का लेण देण करण आळे) के पीढे अर कवृतर बेचणीयाँ की चौकियाँ उल्ट दी; 13 अर उनतै कह्या, “लिख्या सै, मेरा घर प्रार्थना का घर कुह्लावैगा; पर थम उसनै डाकुवां की गुफा बणाओ सो।”

\* 21:9 21:9 होशाना परमेसवर म्हारे ताहीं बचाओ

14 फेर आन्धे अर लंगड़े, मन्दर म्ह उसके धौरे आये, अर उसने उन ताहीं ठीक करया। 15 पर जिव परधान याजकां अर शास्त्रियाँ नै इन अनोक्खे काम्मां ताहीं, जो उसने करे, अर छोरयां ताहीं मन्दर म्ह दाऊद की ऊलाद ताहीं होशाना रुक्के मारदे देख्या, तो वे छो म्ह भरगे,

16 अर उसतै कहण लागगे, “के तू सुणे सै के ये के कहवै सै?” यीशु नै उनतै कह्या, “हाँ; के थमनै यो कदे कोनी पढ्या: “बाळकां अर दूध पीन्दे बच्चां कै मुँह तै तन्नै घणी जै-जै कार कराई?””

17 फेर वो उननै छोड़के नगर के बाहरणै आकै बैतनिय्याह गाम म्ह गया अर ओड़ै रात बिताई।

18 तड़केए जिव वो नगर नै बोहड़ण लागरया था तो उसने भूख लागगी। 19 सड़क कै किनारे अंजीर का एक दरखत देखके वो उसके धौरे गया, अर पत्त्या नै छोड़ उस म्ह और कुछ ना पाके उसतै कह्या, “इब तै तेरे म्ह फेर कदे फळ कोनी लागगै।” अर अंजीर का दरखत जिब्वे सूखग्या।

20 न्यू देखके चेल्यां नै हैरानी होई अर उननै कह्या, “यो अंजीर का दरखत जिब्वे किस तरियां सूखग्या?”

21 यीशु नै उन ताहीं जवाब दिया, “मै थमनै साच्ची कहूँ सूँ, जै थम विश्वास राख्खो अर शक ना करो, तो ना केवल यो करोगे जो इस अंजीर कै दरखत गेल्या करया गया सै, पर जै इस पहाड़ नै कहोगे, ‘उखड़ जा, अर समुन्दर म्ह जा पड़’, तो यो भी हो जावैगा। 22 अर जो कुछ थम प्रार्थना म्ह विश्वास तै माँगोगे वो सारा थमनै मिलैगा।”

23 वो मन्दर जाके उपदेश देवै था, तो परधान याजकां अर यहूदी अगुवां नै उसके धौरे आके बुझ्झया, “तू ये काम किसके हक तै करै सै? अर तेरे ताहीं यो हक किसनै दिया सै?”

24 यीशु नै उनतै जवाब दिया, “मै भी थारे तै एक बात बुझ्झू सूँ; जै वो मन्ने बताओगे, तो मै भी थमनै बताऊँगा के ये काम किस हक तै करूँ सूँ;। 25 यूहन्ना का बपतिस्मा कित्त तै था? सुर्ग की ओड़ तै या माणसां की ओड़ तै?” फेर वे आप्स म्ह बहस करण लागगे, “जै हम कह्या ‘सुर्ग की ओड़ तै’ तो वो म्हारै तै कहवैगा, ‘फेर थमनै उसका विश्वास क्यातै न्ही करया?’ 26 अर जै कह्या ‘माणसां की ओड़ तै’ तो हमनै भीड़ का डर सै, क्यूँके वे सारे यूहन्ना ताहीं नबी मान्नै सै।”

27 फेर उननै यीशु ताहीं जवाब दिया, “हमनै न्ही बेरा।” यीशु नै भी उनतै कह्या, “तो मै भी थमनै कोनी बतान्दा के ये काम किस हक तै करूँ सूँ।”

28 “आच्छा बताओ थम इस बारें म्ह के कहो सो? के किसे माणस के दो बेटे थे; उसनै पैहले के धौरे जाके कह्या, ‘हे बेटे, आज अंगूर के बाग म्ह काम कर।’”

29 “पर बेटे नै जवाब दिया, ‘मै कोनी जान्दा’, पर कुछ बखत के बाद अपणे दिए होए जवाब पै उसनै भोत पछतावा होया अर वो चल्या गया।”

30 “फेर पिता नै दुसरे के धौरे जाके न्यूए कह्या, उसनै जवाब दिया, ‘जी हाँ जाऊँ सूँ’, पर कोनी गया।”

31 “इन दोनुवां म्ह तै किसनै पिता की मर्जी पूरी करी?” उननै कह्या, “पैहले नै।” यीशु नै उनतै कह्या, “मै थारे तै साच्ची कहूँ सूँ के चुंगी लेण आळे अर बेश्याएँ थारे तै पैहल्या परमेसवर के राज्य म्ह दाखल हो जावैगे। 32 यो मै इस खात्तर कहूँ सूँ क्यूँके यूहन्ना बपतिस्मा देण आळा धर्म की राह दिखान्दे होए थारे धौरे आया, अर थमनै उसका विश्वास कोनी करया; पर चुंगी लेण आळे अर बेश्यायाँ नै उसका विश्वास करया अर थमनै न्यू देखके भी पाप करणा कोनी छोड़्या अर ना ए उसका विश्वास करया।”

33 एक और उदाहरण सुणो एक घर का मालिक था, जिसनै अंगूर का बाग लगाया, अर उसके चौगरदे नै बाड़ा बाँध्या, अर रस का कुण्ड खोद्या, अर रुखाळ खात्तर एक मचान बणाया; अर किसानां ताहीं उसका टेक्का देके परदेस चल्या गया। 34 जिव फळ का बखत लोवै आया, तो उसनै अपणे नौकरां ताहीं उसका फळां का हिस्सा लेण नै किसानां धौरे भेज्या।

35 पर किसानां नै उसके नौकरां ताहीं पकड़के, किसे ताहीं छेल्या, अर किसे ताहीं मार दिया, अर किसे पै पत्थर बरसाए। 36 फेर उसनै पैहल्या तै घणे और नौकरां ताहीं भेज्या, अर उननै भी उससे

तरियां करया।<sup>37</sup> आखर म्ह उसनै अपणे बेट्टे ताहीं उनकै धोरै न्यू सोचकै भेज्या के वे मेरै बेट्टे की इज्जत करैगें

38 “पर किसानां नै बेट्टे ताहीं देखकै आप्स म्ह कह्या, ‘यो तो वारिस सै, आओ, इसनै मार देवा अर इसकी विरासत ले लेवां।’”<sup>39</sup> अर उननै उस ताहीं पकड्या अर अंगूर के बाग तै बाहरणै काढकै मार दिया।

40 “इस करकै जिव अंगूर के बाग का माल्लिक आवैगा, तो उन किसानां कै गेल्या के करैगा?”

41 उननै उसतै कह्या, “वो उन भुन्डे माणसां का भुंडी ढाळ नाश करैगा; अर अंगूर के बाग का टेका दुसरे किसानां ताहीं देवैगा, जो बखत पै उस ताहीं फळ दिया करैगें।”

42 यीशु नै उनतै कह्या, “के थमनै कदे भी पवितर ग्रन्थ म्ह यो कोनी पढ्या: ‘जिस पत्थर ताहीं राजमिस्त्रियाँ नै बेकार ठहराया था, वोए कुणे के सिरे का पत्थर होग्या? यो प्रभु की ओड़ तै होया, अर म्हारी निगांह म्ह अनोक्या सै।’”

43 “ज्यांतै मै थमनै कहुँ सूं के परमेसवर का राज्य थारे तै ले लिया जावैगा अर इसी जात ताहीं दिया जावैगा, जो उसका आच्छा फळ ल्यावै सै।”<sup>44</sup> जो इस पत्थर पै पडैगा, वो चकणाचूर हो जावैगा; अर जिसपै वो पडैगा, उसनै पिस देवैगा।”

45 प्रधान याजक अर फरीसी उसके उदाहरणां नै सुणकै समझगे, के वो उनकै बावत कहवै सै।

46 अर उननै उस ताहीं पकडणा चाह्या, पर माणसां तै डरगे क्यूँके वे उसनै नबी मान्ने थे।

## 22

### ????? ??? ?????? ?? ?????????

1 इसपै यीशु फेर उनतै उदाहरणां म्ह कहण लाग्या,

2 “सुर्ग का राज्य उस राजा की ढाळ सै, जिसनै अपणे बेट्टे का ब्याह करया।<sup>3</sup> अर उसनै अपणे नौकरां ताहीं भेज्या, के न्योँदे होड़ माणसां ताहीं ब्याह के जिमणे म्ह बुलावै; पर उननै आणा न्ही चाह्या।”

4 “फेर उसनै और नौकरां ताहीं न्यू कहकै भेज्या, ‘न्योँदे होड़ माणसां ताहीं कहो देख्खों, मन्ने भोज त्यार कर लिया सै, अर मेरे बळध अर पळे होड़ डान्गर काट लिये सै: सारा कुच्छ त्यार सै; ब्याह के जिमणे म्ह आओ।’”

5 पर वे बेपरवाह होकै चले गये, कोए अपणे खेत्तां म्ह, कोए अपणे धन्धे पै।<sup>6</sup> और कई माणसां नै तो राजा के नौकरां ताहीं पकडकै उनकी बेजती करी अर उन ताहीं मार दिया।<sup>7</sup> जिव राजा नै यो सुण्या तो छो म्ह भरग्या, अर अपणी पलटन भेजकै उन हत्यारा का नाश करया, अर उनके नगर फूँक दिए।

8 फेर राजा नै अपणे नौकरां तै कह्या, ब्याह का भोज तो त्यार सै, पर के न्योँदे होड़ माणस इस जोगगे कोनी ठहरे।<sup>9</sup> इस करकै चौराहयाँ पै जाओ, अर जितने माणस थमनै मिले, सारया ताहीं ब्याह कै भोज म्ह बुला ल्याओ।<sup>10</sup> इस तरियां उसके नौकरां नै सडकाँ पै जाकै के भुन्डे, के आच्छे, जितने मिले सारया ताहीं कट्टा करया; ब्याह का घर मेहमानां तै भरग्या।

11 जिव राजा मेहमानां नै देखण भीत्तर आया, तो उसनै ओड़े एक माणस ताहीं देख्या, जो ब्याह आळे लत्ते कोनी पहररया था।<sup>12</sup> उसनै उसतै बुझ्या, हे दोस्त, तू ब्याह म्ह पैहरे जाण आळे लत्ते पहरे बिना उरै क्यातै आ गया। उसका मुँह बन्द होग्या।

13 फेर राजा नै नौकरां तै कह्या, इसके हाथ-पैर जुड़कै उस ताहीं बाहरणै अन्धेरे म्ह गेर द्यो, ओड़े रोणा, अर दाँत पिसणा होवैगा।

14 “क्यूँके बुलाये होड़ तो घणे सै पर चुणे होए कम सै।”

15 फेर फरीसियाँ नै आके आप्स म्ह विचार करया, के उसनै किस ढाळ वात्तां म्ह फसावा।<sup>16</sup> इस तरियां उननै अपणे चेल्यां ताहीं हेरोदेस राजा के समर्थकाँ के गेल्या उसके धोरै न्यू कहण नै भेज्या, “हे गुरु, हमनै बेरा सै, के तू साच्चा सै, अर परमेसवर की राह सच्चाई तै सिखावै सै; अर किसे की

परवाह कोनी करदा, क्यूँके तू माणसां का मुँह देखके बात कोनी करदा।<sup>17</sup> इस करके हमनै बता तन्नै के समझ आवै सै? कैसर तै चुंगी देणा ठीक सै के न्ही।”

18 यीशु नै उनका कपट जाणके कह्या, “हे कपटियों, मन्नै क्यातै परखो सो? <sup>19</sup> कर का सिक्का मेरै ताहीं दिखाओ।” फेर उसके धोरै एक दीनार (एक दिन की मजदूरी) लियाये। <sup>20</sup> उसनै उनतै कह्या, “या छाप अर नाम किसका सै?”

21 उननै उसतै कह्या, “कैसर का।” फेर उसनै उनतै कह्या, “जो कैसर का सै, वो कैसर ताहीं; अर जो परमेसवर का सै, वो परमेसवर ताहीं हो।”

22 न्यू सुणके उननै हैरानी होई, उस ताहीं छोड़के चले गये।

23 उस्से दिन सद्की जो कहवै सै के मेरे होया का दुबारा जिन्दा उठणा सै ए कोनी, उसके धोरै आये अर उसतै बुझया, <sup>24</sup> “हे गुरु, मूसा नबी नै कह्या था के जै कोए माणस बेऊलादा मर जावै, तो उसका भाई उसकी घरआळी तै ब्याह करके अपणे भाई के खात्तर पीढ़ी पैदा करै। <sup>25</sup> इब म्हारै उरै सात भाई थे; पैहलड़ा ब्याह करके मरगया, अर ऊलाद ना होण के कारण अपणी घरआळी अपणे भाई के खात्तर छोड़ गया। <sup>26</sup> इस्से तरियां दुसरे अर तीसरे नै भी करया, अर सातुवां तक योए होया। <sup>27</sup> सारया पाच्छै वा बिरबान्नी भी मरगी। <sup>28</sup> आखर म्ह जिन्दा होण पै वा सातुवां म्ह तै किसकी घरआळी होवैगी? क्यूँके वा सारया की घरआळी बण ली थी।”

29 यीशु नै उनतै जवाब दिया, “थारी गलती या सै के थम पवित्र ग्रन्थ अर परमेसवर की सामर्थ नै न्ही जाणते। <sup>30</sup> क्यूँके मरके जिन्दा हो जाणके बाद ब्याह शादी कोनी होन्दी, पर सुर्ग म्ह परमेसवर के सुर्गदूत्तां की ढाळ होवैगें। <sup>31</sup> पर मरके जिन्दा हो जाणके बाबत के थमनै यो वचन कोनी पढ़या जो परमेसवर नै थारे तै कह्या <sup>32</sup> भै अब्राहम का परमेसवर, अर इसहाक का परमेसवर, याकूब का परमेसवर सूं? वो मेरे होया का न्ही, पर जिन्दा का परमेसवर सै।”

33 न्यू सुणके माणस उसके उपदेश तै हैरान होए।

34 जब फरीसियां नै सुण्या के यीशु नै सद्कियाँ का मुँह बन्द कर दिया, तो वे कट्टे होए। <sup>35</sup> शास्त्री समाज के माणसां म्ह तै एक नै उस ताहीं परखण के खात्तर उसतै बुझया, <sup>36</sup> “हे गुरु, नियम-कायदा म्ह कौण सा हुकम बड़ड़ा सै?”

37 यीशु नै उसतै कह्या, “तू परमेसवर अपणे प्रभु तै अपणे पूरे मन अर अपणे सारे प्राण अर अपणी सारी बुद्धि के साथ प्यार राख। <sup>38</sup> पैहला अर बड़ड़ा हुकम तो योए सै। <sup>39</sup> अर उस्से जिसा यो दुसरा भी सै के तू अपणे पड़ोसी तै अपणे जिसा प्यार राख। <sup>40</sup> ये दो हुकम सारे नियम-कायदे अर नबियाँ का निचोड़ (आधार) सै।”

41 जब फरीसी कट्टे थे, तो यीशु नै उनतै बुझया, <sup>42</sup> “मसीह के बारे म्ह थम के सोचो सो? वो किसका बेट्टा सै?” उननै यीशु तै कह्या, “दाऊद का।”

43 यीशु नै उनतै बुझया, “तो दाऊद आत्मा म्ह होके उसनै प्रभु क्यातै कहवै सै?”

44 “प्रभु नै, मेरै प्रभु तै कह्या, मेरै सोळे कान्ही बैठ, जब ताहीं के मै तेरे बैरियाँ ताहीं तेरे पायां म्ह ना झुका दियुँ।”

45 “भला, जब दाऊद उसनै प्रभु कहवै सै, तो वो उसका बेट्टा किस ढाळ होया?” <sup>46</sup> उसके जवाब म्ह कोए भी एक बात न्ही कह सक्या। पर उस दिन तै दुबारे उसतै कीमे और बुझण की हिम्मत कोनी करी।

## 23

1 फेर यीशु नै भीड़ तै अर अपणे चेल्यां ताहीं कह्या, <sup>2</sup> “शास्त्री अर फरीसी माणसां नै मूसा नबी के नियम-कायदे सिखाण का हक सै; <sup>3</sup> ज्यातै वे थारे तै जो कुछ कहवै वो करियो अर मानिये, पर उन जिसे काम ना करियो; क्यूँके वे सिखावै तो सै पर खुद करदे कोनी। <sup>4</sup> वे थारे पै कई नियम लागू करै

सै जिसका पालन करणा ओक्खा सै, वे माणसां नै उनपै चाल्लण खात्तर मजबूर करै सै; पर वे खुद अपणे नियमां नै कोनी मानते।<sup>1</sup>

5 वे अपणे सारे काम माणसां ताहीं दिखाण कै खात्तर करै सै: वे अपणे ताबिजां नै चौड़ा करै सै जिनपे वे पवित्र ग्रंथ के वचन लिखके शरीर पे बाँधले सै, अर अपणे लत्यां की झाल्लर बधावे सै, ताके लोग उनने धर्मी समझै।<sup>6</sup> भोज म्ह खास-खास जगहां, अर आराधनालयों के खास-खास जगहां बैठणा, <sup>7</sup> बजारां म्ह नमस्कार, अर माणसां म्ह गुरु कुह्णाणा उननै भावे सै।

8 पर थम गुरु ना कुह्णाणा, क्यूँके थारा एके गुरु सै, अर थम सारे भाई-भाण के समान सों।<sup>9</sup> धरती पे किसे नै अपणा पिता ना कहियो, क्यूँके थारा एके आत्मिक पिता सै, जो सुगं म्ह सै।<sup>10</sup> अर स्वामी भी ना कुह्णाणा, क्यूँके थारा एके माल्लिक सै, यानिके मसीह।<sup>11</sup> जो थारे म्ह बड़ड़ा हो, वो थारा सेवक या नौक्कर बणे।<sup>12</sup> जो कोए अपणे-आपने बड़ड़ा बणावैगा, वो छोटा करया जावैगा: अर जो कोए अपणे-आपने छोटा बणावैगा, वो बड़ड़ा करया जावैगा।

13 हे कपटी शास्त्रियो अर फरीसियों, थारे पै धिक्कार सै! थम माणसां कै खात्तर सुगं राज्य का बारणा बन्द करो सो, ना तो थम खुद उस म्ह दाखल होवो सो अर ना उस म्ह दाखल होण आळा नै दाखल होण द्यो सो।<sup>14</sup> हे कपटी शास्त्रियो अर फरीसियों, थारे पै धिक्कार सै! थम विधवा के घरां नै खा जाओ सो, अर अपणे-आपने धर्मी दिखाण खात्तर घणी वार ताहीं प्रार्थना करदे रही सो: ज्यातै थारे ताहीं परमेसवर की ओड़ तै घणा दण्ड मिलैगा।)

15 हे कपटी शास्त्रियो अर फरीसियों, थारे पै धिक्कार सै! थम एक माणस ताहीं अपणे पंथ म्ह ल्याण कै खात्तर दूर-दूर ताहीं हान्डो सो, अर जब वो पंथ म्ह आ जावे सै, तो खुद तो नरक म्ह जाओ सों पर दुसरयां नै अपणे तै दुगणा नरक जाण का भाग्गी बणा द्यो सो।

16 हे आन्धे अगुवों, थारे पै धिक्कार सै! थम जो या शिक्षा द्यो सो, के जै कोए मन्दर की सूह खावे तो किमे न्ही, पर जै कोए मन्दर कै सोन्ने की सूह खावे तो उसतै बन्द जावैगा।<sup>17</sup> हे बेअक्लो अर आंध्यो, कौण बड़ड़ा सै; मन्दर का सोन्ना या वो मन्दर जिसनै उस सोन्ने ताहीं पवित्र बणाया सै? <sup>18</sup> थम यो भी सिखाओ सो के जै कोए वेदी\* की सूह खावे तो किमे न्ही, पर जो भेंट उसपै सै, जै कोए उसकी कसम खावे तो बन्द जावैगा।<sup>19</sup> हे आंध्यो, कौण बड़ड़ा सै; भेंट या वेदी† जिसम्ह भेंट पवित्र होवे सै? <sup>20</sup> इस करके जो वेदी की कसम खावे सै, वो उसकी अर जो कुछ उसपै सै, उसकी भी कसम खावे सै।<sup>21</sup> जो मन्दर की कसम खावे सै, वो परमेसवर जो उस म्ह रहवे सै, उसकी भी कसम खावे सै।<sup>22</sup> जो सुगं की कसम खावे सै, वो परमेसवर कै सिंहासन की अर उसपै बैठण आळे की भी कसम खावे सै।

23 हे कपटी शास्त्रियो अर फरीसियों, थारे पै धिक्कार सै! थम पुदीने, सौफ, जीरे का दसमां हिस्सा तो द्यो सो, पर थमनै नियम-कायदा की गहरी बाततां ताहीं यानिके न्याय, दया, अर वफादारी का तिरस्कार करो सों; थमनै दसमां हिस्सा भी देणा चाहिये पर उन खास बाततां नै भी नजरअंदाज ना करो।<sup>24</sup> हे आन्धे अगुवों, थम छोटाटे-छोटाटे नियमां का पालन करण का तो भोत ध्यान राख्वों सों, जिस तरियां पाणी म्ह तै माच्छर ताहीं तो छ्याण ल्यो सो, पर परमेसवर के खास हुकम का पालन कोनी करते, जो ऊँट नै निगळ जाणकै समान सै।

25 हे कपटी शास्त्रियो अर फरीसियों, थारे पै धिक्कार सै! क्यूँके थम लालची अर स्वार्थी सों, पर थम अपणे-आपने पवित्र राखण का ढोंग करो सों, इस खात्तर थम उन कटोरे अर थाळी के समान सों जो उप्पर तै तो साफ सै पर भित्तर तै वे गन्दे सै।<sup>26</sup> हे आन्धे फरीसियों, पैहल्या माणस नै लूटणा बन्द करो जिब्बे थम धर्म के काम का पालन कर पाओगे अर फेर थम उस कटोरे अर थाळी के समान होवेंगे जो भीत्तर बाहर तै भी साफ हों सै।<sup>27</sup> हे कपटी शास्त्रियो अर फरीसियों, थारे पै धिक्कार सै! थम चुन्ने फिरी होई कबरां के जिसे सो जो उप्पर तै तो सुथरी दिक्खे सै, पर भीत्तर

\* 23:18 23:18 वेदी-परमेसवर ताहीं भेंट चढ़ाण खात्तर एक जगहां † 23:19 23:19 वेदी-परमेसवर ताहीं भेंट चढ़ाण खात्तर एक जगहां

मुदा की हाइडियाँ अर सारे ढाळ की गन्दगी तै टुकी होई सै। 28 इस्से तरियां तै थम भी उप्पर तै माणसां ताहीं धर्मी दिक्खो सो, पर भीत्तर अधर्म अर कपट तै भरे सो।

29 हे कपटी शास्त्रियो अर फरीसियों, थारे पै धिक्कार सै! थम उन नबियाँ की कबर समारो सो अर धर्मियाँ की कबर सजाओ सो, जिन ताहीं थारे पूर्वजां नै मारा था। 30 “अर कहो सो, ‘जै हम अपने बाप-दादां के दिनां म्ह होन्दे तो नबियाँ की हत्या म्ह उनके साइद्दी कोनी होन्दे।’ 31 इसतै तो थम अपने आप ए या गवाही द्यो सो के थम नबियाँ के हत्यारां के वंशज सो। 32 ठीक सै थम अपने पूर्वजां के पाप का घड़ा भरते जाओ।”

33 हे साँप के सप्पोलों जिसे माणसां, थम नरक की सजा तै किस ढाळ बचोगे? 34 इस करके देखो, मै थारे धोरे नबियाँ अर समझदार अर शास्त्रियाँ ताहीं भेज्जू सूं, अर थम उन म्ह तै कुछां नै मार द्योगे अर क्रूस पै चढ़ावोगे, अर कुछां नै अपने आराधनालयां म्ह कोड़े मारोगे अर एक नगर तै दुसरे नगर ताहीं भजादे फिरोगे। 35 जिसतै धर्मी हाबिल तै लेके बिरक्याह के बेटे जकर्याह तक, जिस ताहीं थमनै मन्दर अर वेदी के बिचाळै मार दिया था, जितने भी धर्मी माणसां ताहीं मारया सै, वो सारा दण्ड थारे सिर पै पड़ेगा। 36 मै थमनै सच कहूँ सूं, ये सब का दण्ड इस पीढ़ी के माणसां नै भुगतणा पड़ेगा।

37 “हे यरुशलेम नगर के लोगो, हे यरुशलेम नगर के लोगो! थम नबियाँ नै मार देओ सो, अर जो थारे धोरे भेज्जै गए, उनपै पत्थर बरसाओ सो। कितनी ए बर मन्नै चाह्या के जिस ढाळ मुर्गी अपने बच्चां ताहीं अपने पाक्खां के तळै छुपा ले सै, उस्से तरियां ए मै भी थारे बाळकां नै कट्टा कर ल्युँ, पर थमनै कोनी चाह्या। 38 देखो, थारा घर थारे खात्तर उजाड़ छोडचा जावै सै। 39 क्यूँके मै थमनै साच्ची कहूँ सूं के इब तै जिब ताहीं थम न्ही कहोगे, ‘धन्य सै वो, जो प्रभु के नाम तै आवै सै’ तब तक थम मन्नै फेर दुबारे कदे कोनी देखोगे।”

## 24

1 जिब यीशु मन्दर तै लिकड़के जाण लागरया था, तो उसके चेल्लें उस ताहीं मन्दर की बणावट दिखाण के खात्तर उसके धोरे आये। 2 यीशु नै उनतै कह्या, “के थम ये सारी इमारत न्ही देखते? मै थमनै साच्ची कहूँ सूं, उरै पत्थर पै पत्थर भी कोनी रहवैगा, जो गेरया ना जावैगा।”

3 जिब यीशु जैतून के पहाड़ पै बठचा था, तो चेल्यां नै एकले म्ह उसके धोरे आके कह्या, “हमनै बता, ये बात कद होवैगी? तेरे आण का अर दुनिया के अन्त की के निशान्नी होवैगी?”

4 यीशु नै उन ताहीं जवाब दिया, “चौकन्ने रहियो! कोए थमनै भकाण न्ही पावै, 5 क्यूँके घणखरे इसे होवैगें जो मेरे नाम तै आके कहवैगें, मै मसीह सूं, अर घणाए ताहीं भकावैगें। 6 थम रोळे अर लड़ाईया का जिक्र सुणोगे, तो घबराईयो ना क्यूँके इनका होणा जरूरी सै, पर उस बखत खात्मा कोनी होवैगा। 7 क्यूँके जात पै जात, अर राज्य पै राज्य चढ़ाई करैगा, अर जगहां-जगहां अकाळ पड़ेंगें, अर हाल्लण आवैगें। 8 ये सारी बात दुखां की शरुआत होवैगी।”

9 फेर माणस क्लेश देण के खात्तर थमनै पकड़वावैगें, अर थमनै मार देवैगें, अर मेरै नाम के कारण सारी जात्तां के माणस थारे तै बैर राक्खैगें, क्यूँके थम मेरे पै विश्वास करो सों। 10 फेर घणखरे मेरे पै विश्वास करणा छोड़ देगें, अर एक-दुसरे नै पकड़वावैगें, अर एक-दुसरे तै बैर राक्खैगें। 11 घणखरे झूठे नबी आवैगें, अर घणाए ताहीं भकावैगें। 12 अधर्म के बढ़ण तै वे एक-दुसरे तै प्यार करणा छोड़ देगें, 13 पर जो अन्त ताहीं मेरे पै विश्वास राक्खैगा, उस्से ताहीं बचाया जावैगा। 14 अर परमेसवर के राज्य का यो सुसमाचार सारी दुनिया म्ह प्रचार करया जावैगा, ताके सारी जात्तां नै इस ताहीं स्वीकार करण का मौक्का मिलै, ताके थम मेरे गवाह होओ, फेर दुनिया का अन्त आ जावैगा।

15 इस करके जिब थम उस उजाड़ण आळी घृणित चीज ताहीं जिसका जिक्र दानियेल नबी के जरिये होया था, पवित्र जगहां पै खडे देखो (जो पढ़ै, वो समझै), 16 फेर जो यहूदिया परदेस म्ह हो, वे पहाड़ां पै भाज जावै। 17 जो छात पै हो, वो अपने घर म्ह तै समान लेण नै तळै न्ही उतरे,

18 अर जो खेत म्ह हो, वो अपना लत्ता लेण नै पाच्छे, न्ही बोहड़ें। 19 उन दिनां म्ह जो गर्भवती अर दूध पिलान्दी बिरबान्नी होवैगीं, उनके खात्तर भागणा भी मुश्किल होगा। 20 प्रार्थना करया करो के धमनै जाड्डे म्ह या आराम के दिन भाजणा ना पडै। 21 क्यूँके उस बखत इसा भारया क्लेश होवैगा, जिसा दुनिया की शरूआत तै ना इब ताहीं होया ना कदे होवैगा।

22 “अर जै वे दिन घटाए न्ही जान्दे तो कोए प्राणी कोनी बचदा, पर छोट्टि होया के कारण वे दिन घटाए जावैंगे। 23 उस बखत जै कोए धमनै कहवै, ‘देखो, मसीह उरै सै!’ या ‘ओड़ै सै!’ तो बिश्वास ना” करियो। 24 क्यूँके झूठे मसीह अर झूठे नबी उठ खड़े होवैंगे, अर बड़े-बड़े चमत्कार, अर अनोकखे काम दिखावैंगे के जै हो सक्या तो छोट्टि होया ताहीं भी भका देवैंगे। 25 देखो, मन्ने पैहल्याए थारे तै यो सारा कुछ कह दिया सै।

26 “इस करके जै वे थारे तै कहवै, ‘देखो, वो बण म्ह सै’, तो बाहरणै ना लिकड़यो; या ‘देखो, वो कोठड़ी म्ह सै’, तो बिश्वास ना करियो। 27 क्यूँके जिस तरियां बिजळी पूरब तै लिकड़के पश्चिम ताहीं चमकै सै, उस्से तरियां मुझ माणस के बेटे का भी आणा होवैगा। 28 जडै लाश हो, उडैए चील कट्टे होवैंगे।”

29 उन दिनां के क्लेश के पाच्छे जिब्बे सूरज अन्धेरै म्ह हो जावैगा, चाँद का चाँदणा जान्दा रहवैगा, अर तारे अकास तै तळै पडैंगे, अर अकास की शक्तियाँ हलाई जावैगीं।

30 फेर माणस के बेटे का निशान अकास म्ह दिखैगा, अर फेर धरती के सारे खानदान्ना के माणस छात्ती पिटैंगे; अर माणस के बेटे ताहीं बड्डी सामर्थ अर महिमा के गेल्या अकास के बादळां पै आन्दे देखोगे। 31 वो तुरही की तेज आवाज के गेल्या अपणे सुगंदूतां नै खन्दावैगा, अर वे अकास के इस सिरे तै उस सिरे ताहीं, च्यारु दिशायां तै उसके चुणे होया नै कट्टे करैंगे।

32 अंजीर के दरखत तै यो उदाहरण सीक्खो: जिब उसकी डाळी कोमल हो जावै अर पत्ते लिकड़ण लाग ज्या सै, तो थम जाण ल्यो के गर्मी का बखत लोवै सै। 33 इस्से तरियां तै जिब थम इन सारी बात्तां नै देखो, तो जाण ल्यो के वो लोवै सै, बल्के दरबाजे पै सै। 34 मै थमनै साच्ची कहूँ सूँ के जिब ताहीं ये सारी बात पूरी ना हो लेवै, जद ताहीं इस पीढ़ी का अन्त कोनी होवैगा। 35 धरती अर अकास टळ जावैंगे, पर मेरी बात कदे न्ही टळैगी।

36 “उस दिन अर उस बखत के बारे म्ह कोए न्ही जाण्दा, ना सुगंदूत अर ना बेट्टा, पर सिर्फ पिता। 37 जिसा पूर्वज नूह के दिनां होया था, उस्से तरियां ए माणस के बेटे का आणा होगा। 38 क्यूँके जिस तरियां बाढ़ तै पैहले के दिनां म्ह, जिस दिन ताहीं नूह जहाज पै न्ही चढ़या, उस दिन ताहीं माणस खावै-पीवै थे, अर उन म्ह ब्याह होवै थे। 39 अर जिब ताहीं बाढ़ आकै उन सारया ताहीं बहा न्ही लेग्या, जद ताहीं उननै किमे बेरा न्ही पाटघ्या; इस्से तरियां ए मुझ माणस के बेटे का आणा भी होगा। 40 उस बखत दो जणे खेत म्ह होंगे, एक ठाया जावैगा अर दुसरा छोड़ दिया जावैगा। 41 दो बिरबान्नी एक साथ चाक्की पीसदी होवैगीं, एक ठा ली जावैगी अर दुसरी छोड़ दी जावैगी।”

42 इस करके जागदे रहो, क्यूँके धमनै न्ही बेरा के थारा प्रभु किस दिन आवैगा। 43 पर न्यू जाण ल्यो के जै घर का माल्लिक नै बेरा हो के चोर किस घड़ी आवैगा तो जागदा रहन्दा, अर अपणे घर म्ह सेंध लागण न्ही देन्दा। 44 ज्यांतै थम भी ल्यार रहो, क्यूँके जिस घड़ी के बारे म्ह थम सोचदे भी कोनी, उस्से घड़ी मै माणस का बेट्टा आ जाऊँगा।

45 “आखर म्ह वो बिश्वास जोगगा अर अकलमंद दास कौण सै, जिस ताहीं माल्लिक नै अपणे नौक्कर-चाकरां पर सरदार ठहराया के बखत पै उननै खाणा देवै? 46 धन्य सै वो नौक्कर, जिस ताहीं उसका माल्लिक आकै इसाए करदा पावै। 47 मै थमनै साच्ची कहूँ सूँ, वो उसनै अपनी सारी धन-सम्पत्ति का माल्लिक बणावैगा। 48 पर जै वो दुष्ट दास सोचण लागगै के मेरै माल्लिक के आण म्ह वार सै, 49 अर अपणे साथी नौकरां नै पिट्टण लागगै, अर शराबियाँ के गेल्या खावै-पीवै। 50 तो उस नौक्कर का माल्लिक उस दिन बोहड़ैगा, जिब वो उसकी बाट ना देख्दा हो, अर इसे बखत म्ह

आवैगा जिसका उसनै ना बेरा हो, <sup>51</sup>जिब वो उसनै भारी सजा देगा उसकी गिणती कपटियाँ कै म्ह गिणी जावैगी: ओडै रोणा अर दाँत पिसणा होगा।”

## 25

1 यीशु नै अपणे चेल्यां ताहीं एक और उदाहरण देकै कह्या, “सुर्ग का राज्य उन दस कुँवारियाँ के जिसा होगा जो अपणी मशाल लेकै बन्दे तै फेटण लिकड़ी। <sup>2</sup>उन म्ह पाँच बेअक्ल अर पाँच समझदार थी। <sup>3</sup>बेअक्ली कुवारियाँ नै अपणी मशाल तो ली, पर अपणे गेल्या फालतू तेल न्ही लिया; <sup>4</sup>पर समझदारां नै अपणी मशालां कै गेल्या अपणी कुपियाँ म्ह तेल भी भर लिया। <sup>5</sup>जिब बन्दे कै आण म्ह वार होई, तो वे सारी ऊँघण लागगी अर सोगी।”

6 “आध्धी रात नै धूम माच्ची: देखो, बन्दे आण लागरया से! उसतै फेटण नै चाल्लो।”

7 “फेर वे सारी कुँवारियाँ उठकै अपणी मशाल ठीक करण लागगी। <sup>8</sup>अर बेअक्लियाँ नै समझदारां तै कह्या, ‘अपणे तेल म्ह तै कुछ हमनै भी द्यो, क्यूँके म्हारी मशाल बुझण लागरी से।”

9 “पर समझदारां नै जवाब दिया, ‘कदे यो म्हारै अर थारे खात्तर पूरा ना पड़े; भला तो योए से के थम बेचणीयाँ कै धोरै जाकै अपणे खात्तर मोल लिया ओ।”

10 जिब वे मोल लेण नै जावै थी तो बन्दे आण पोहँच्या, अर जो त्यार थी, वे उसके गेल्या ब्याह कै घर म्ह चली गई अर बारणा मूद दिया गया।

11 “इसकै पाच्छे, वे दुसरी कुँवारियाँ भी बोहड़कै आई अर बन्दे तै कहण लागगी, हे माल्लिक, हे माल्लिक, म्हारै खात्तर किवाड़ खोल दे।”

12 “उसनै जवाब दिया, मै थारे ताहीं साच्ची कहूँ सूँ, मै थमनै कोनी जाण्दा।”

13 इस करके चोक्करे रहो, क्यूँके मेरे आण के उस दिन नै थम कोनी जाणते, ना उस घड़ी नै जिस दिन म्ह आऊँगा।

14 सुर्ग का राज्य उस माणस के उदाहरण के समान भी से, जिसनै परदेस जान्दे बखत अपणे नौकरां ताहीं बुलाके अपणी कुछ सम्पत्ति उन ताहीं सौप दी, तांके वे व्यापर करके घणा धन जोड़ ले। <sup>15</sup>उसनै एक तै पाँच तोड़े (1 तोड़ा 15 साल की मजदूरी के बराबर से), दुसरे ताहीं दो, अर तीसरे ताहीं एक; यानिके हरेक नै उसकी काबिलियत के मुताबिक दिया, अर फेर परदेस चल्या गया। <sup>16</sup>फेर, जिस ताहीं पाँच तोड़े मिले थे, उसनै जिब्बे जाके उनते लेण-देण करया, अर पाँच तोड़े\* और कमाए। <sup>17</sup>इस्से तरियां तै जिस ताहीं दो मिले थे, उसनै भी दो और कमाए। <sup>18</sup>पर जिस ताहीं एक मिल्या था, उसनै जाके माट्टी खोड़ी, अर अपणे माल्लिक का धन लहको दिया।

19 घणे दिनां पाच्छे उन नौकरां का माल्लिक आया, अर उनतै हिसाब लेण लागया, के उननै उन पईसा तै के कुछ करया। <sup>20</sup>जिसनै पाँच तोड़े मिले थे, उसनै पाँच तोड़े और ल्याकै कह्या, हे माल्लिक, तन्नै मेरै ताहीं पाँच तोड़े सौपे थे, लखा, मन्नै ये पाँच तोड़े और कमाए से।

21 उसकै माल्लिक नै उसतै कह्या, शाबाश, हे भरोस्से के लायक आच्छे नौकर, तू थोड़े-से धन म्ह भी भरोसमंद लिकड़या, मै तन्नै घणी चिज्जां का अधिकारी बणाऊँगा। अपणे माल्लिक कै आनन्द म्ह साइझी हो।

22 फेर जिस ताहीं दो तोड़े मिले थे, उसनै भी आकै कह्या, हे माल्लिक, तन्नै मेरै ताहीं दो तोड़े सौपे थे, देख, मन्नै दो तोड़े और कमाए से।

23 उसकै माल्लिक नै उसतै कह्या, शाबाश, हे भरोस्से के लायक आच्छे नौकर, तू थोड़े म्ह भी भरोसमंद लिकड़या; मै तन्नै घणी चिज्जां का अधिकारी बणाऊँगा। अपणे माल्लिक कै आनन्द म्ह साइझी हो।

24 फेर जिस ताहीं एक तोड़ा† मिल्या था, उसनै आकै कह्या, हे माल्लिक, मै तन्नै जाणु था, के तू इसा माणस से: जित्त किते तू बीज न्ही बोन्दा ओडै फसल काट्टे से, अर जित्त न्ही खिंडान्दा ओडै

\* 25:16 25:16 (1 तोड़ा 15 साल की मजदूरी के बराबर से) † 25:24 25:24 (1 तोड़ा 15 साल की मजदूरी के बराबर से)



तै कट्टा करै सै।<sup>25</sup> जै मै तेरा तोड़ा खो देता तो तू मन्नै दण्ड देता, ज्यांतै मै डरग्या अर जाकै तेरा तोड़ा माट्टी म्ह दबा दिया। देख, जो तेरा सै, वो यो सै।

<sup>26</sup> उसके माल्लिक नै उस ताहीं जवाब दिया, हे दुष्ट अर आलसी नौक्कर, जिब तन्नै न्यु बेरा था के जित्त मन्नै बीज न्ही बोया ओड़ै तै फसल काट्टू सूं, अर जित्त मन्नै न्ही खिंडाया ओड़ै तै कट्टा करूँ सूं; <sup>27</sup> जै तन्नै बेरा था के मै इसा सूं, तो तू मेरा धन सर्राफां नै ए दे देंदा, फेर मै आकै अपना धन ब्याज सुधां ले लेन्दा।

<sup>28</sup> माल्लिक नै अपने नौकरां तै कह्या, ज्यातै वो तोड़ा<sup>‡</sup> उसतै ले ल्यो, अर जिसकै धोरै दस तोड़े सै उसनै दे दो। <sup>29</sup> क्यूँके जिस किसे धोरै सै, उस ताहीं और दिया जावैगा; अर उसके धोरै घणा हो जावैगा: पर जिसकै धोरै न्ही सै, उसतै वो भी जो उसके धोरै सै, ले लिया जावैगा। <sup>30</sup> इस निकम्मे नौक्कर नै बाहर अन्धेरै म्ह गेर दो, जित्त रोणा अर दाँत पिसणा होगा।

<sup>31</sup> जिब मै माणस का बेट्टा अपनी महिमा म्ह आऊँगा अर सारे सुर्गदूत मेरे गेल्या आवैगें, तो मै अपनी महिमा के सिंहासन पै बैठुँगा। <sup>32</sup> अर सारी जात मेरे स्याम्ही कट्टी करी जावैगी; अर जिस ढाळ पाळी भेड़डां नै बकरियाँ तै न्यारी कर देवै सै, उससे तरियाँ मै उननै एक-दुसरे तै न्यारा करूँगा। <sup>33</sup> मै भेड़डां नै अपनी सोळी ओड़ अर बकरियाँ नै ओळी ओड़ खडचा करूँगा।

<sup>34</sup> “फेर मै राजा अपनी सोळी ओड़ आळा नै कहुँगा, हे मेरे पिता के धन्य माणसों, आओ, उस राज्य के हकदार हो जाओ, जो दुनिया की शरूआत तै थारे खात्तर त्यार करया गया सै। <sup>35</sup> क्यूँके जिब मै भूक्खा था, तो थमनै मेरै ताहीं खाण नै दिया; मै तिसाया था, तो थमनै मेरै ताहीं पाणी पिलाया; मै परदेशी था, तो थमनै मेरै ताहीं अपने घरां ठहराया; <sup>36</sup> मै उघाड़ा था, तो थमनै मेरै ताहीं लत्ते पिहराए; मै बीमार था, तो थमनै मेरा बेरा लिया, मै जेळ म्ह था, तो थम मेरै तै मिलण आये।”

<sup>37</sup> “फेर धर्मी उस ताहीं जवाब देवैगें, हे पूरभु, हमनै कद तेरे ताहीं भूक्खा देख्या अर खुवाया? या कद तिसाया देख्या अर पाणी पिलाया? <sup>38</sup> हमनै कद तेरे ताहीं परदेशी देख्या अर अपने घरां ठहराया? या उघाड़ा देख्या अर लत्ते पिहराये? <sup>39</sup> हमनै कद तेरे ताहीं बीमार या जेळ म्ह देख्या अर तेरा बेरा लेण आये?”

<sup>40</sup> “फेर मै राजा उननै जवाब देऊँगा, भै थमनै साच्ची कहुँ सूं के थमनै जो मेरे इन छोट्या तै छोट्टे विश्वासी भाईयाँ म्ह तै किसे एक कै गेल्या करया, वो मेरै ए गेल्या करया।”

<sup>41</sup> “फेर मै ओळै कान्ही आळा ताहीं कहुँगा, हे श्रापित माणसों, मेरै स्याम्ही तै उस अनन्त आग म्ह चले जाओ, जो परमेसवर नै शैतान अर उसके दूतां खात्तर त्यार करी सै। <sup>42</sup> क्यूँके मै जिब भूक्खा था, तो थमनै मेरै ताहीं खाण नै कोनी दिया; मै तिसाया था, तो थमनै मेरै ताहीं पाणी कोनी पियाया; मै जिब परदेशी था, तो थमनै मेरै ताहीं अपने घरां कोनी ठहराया; <sup>43</sup> मै नंगा था, तो थमनै मेरै ताहीं लत्ते कोनी पिहराए; मै जिब बीमार था, तो थमनै मेरा बेरा कोनी लिया, मै जेळ म्ह था, तो थम मेरै तै मिलण कोनी आये।”

<sup>44</sup> “फेर वे जवाब देवैगें, हे पूरभु, हमनै तेरे ताहीं कद भूक्खा, या तिसाया, या परदेशी, या उघाड़ा, या बीमार, या जेळ म्ह देख्या, अर तेरी सेवा-पाणी न्ही करी?”

<sup>45</sup> “फेर मै उननै जवाब देऊँगा, मै थमनै साच्ची कहुँ सूं के थमनै जो मेरे इन छोट्या तै छोट्या म्ह तै किसे एक कै गेल्या न्ही करया, वो मेरै गेल्या भी न्ही करया।”

<sup>46</sup> “अर अधर्मी जन अनन्त दण्ड भोगैगें पर धर्मी जन अनन्त जीवन म्ह दाखल होंगे।”

## 26

<sup>1</sup> जिब यीशु नै ये सारी बात कह ली तो अपने चेल्यां तै कहण लाग्या, <sup>2</sup> “थमनै बेरा सै के दो दिनां पाच्छे फसह का त्यौहार सै, अर मै माणस का बेट्टा कूरूस पै चढ़ाण के खात्तर पकड़वाया जाऊँगा।”

‡ 25:28 25:28 (1 तोड़ा 15 साल की मजदूरी के बराबर सै)

3 फेर प्रधान याजक अर पूजा के यहूदी अगुवें, काइफा नामक महायाजक के आँगण म्ह कट्टे होए, 4 अर आप्पस म्ह विचार करण लागगे के यीशु ताहीं धोक्खे तै पकड़के मार देवा। 5 पर वे कहवै थे, “त्यौहार के बखत न्ही, कदे इसा ना हो के माणसां म्ह रोळा माच ज्या।”

6 जबि यीशु बैतनिय्याह गाम म्ह शमौन कोढ़ी के घरां था, 7 तो एक बिरबान्नी संगमरमर के बरतन म्ह महंगा खसबूदार तेल लेके उसके धोरे आई, अर जबि वो खाणा खाण नै बेटचा था तो उसके सिर पै उंडेल दिया।

8 न्यू देखके उसके चेल्लें खीजके अर कहण लागगे, “इसका क्यातै नाश करया गया? 9 इस ताहीं तो बढ़िया दाम्मां पै बेचके कंगालां म्ह बांडया जा सके था।”

10 न्यू जाणके यीशु नै उनतै कहा, “बिरबान्नी नै क्यातै सताओ सो? उसनै मेरे गेल्या भलाई करी सै। 11 कंगाल तो थारे गेल्या सारी हाण रहवै सै, पर मै थारे गेल्या सारी हाण कोनी रहूंगा। 12 उसनै मेरी देह पै जो यो महंगा खसबूदार तेल उंडेला सै, वो मेरे गाड़े जाणके खातर करया सै। 13 मै थमने साच्ची कहूँ सूँ, के सारे दुनिया म्ह जित्त किते भी यो सुसमाचार प्रचार करया जावैगा, ओड़े उसके इस काम का जिक्र भी उसकी याद म्ह करया जावैगा।”

14 फेर यहूदा इस्करियोती नै, जो बारहां चेल्यां म्ह तै एक था, प्रधान याजकां के धोरे जाके कहा, 15 “जै मै यीशु नै थारे हाथ्यां म्ह पकड़वा दियुँ, तो मन्ने के द्योगे?” उननै तीस चाँदी के सिक्के तौलके दे दिये। 16 अर वो उससे बखत तै यीशु नै पकड़वाण का मौक्का टोहू लागया।

17 अखमीरी रोट्टी के त्यौहार के पैहलड़े दिन, चेल्लें यीशु के धोरे आके बुद्धिण लागगे, “तू कित चाहवै सै के हम तेरे खातर फसह खाण की त्यारी करा?”

18 यीशु बोल्या, “नगर म्ह फलाणा माणस नै जाके उसतै कहो, ‘गुरु कहवै सै के मेरा बखत लोवै सै। मै अपणे चेल्यां के गेल्या तेरे उरै फसह का त्यौहार बणाऊंगा।”

19 आखर चेल्यां नै यीशु का हुकम मान्या अर फसह का भोज त्यार करया।

20 जबि साँझ होई तो यीशु बारहां चेल्यां के गेल्या खाणा खाण के खातर बेटचा। 21 जबि वे खाण लागरे थे तो यीशु नै कहा, “मै थमने साच्ची कहूँ सूँ के थारे म्ह तै एक मन्ने धोक्खा देके पकड़वावैगा।”

22 इसपै चेल्लें घणे उदास होए, अर हरेक उसतै बुद्धिण लागया, “हे गुरु, के वो मै सूँ?”

23 यीशु नै जवाब दिया, “जिसने मेरे गेल्या थाळी म्ह हाथ घाल्या सै, वोए मन्ने पकड़वावैगा।

24 मै माणस का बेटटा तो जिसा मेरे बारे म्ह लिख्या सै, अर जावै ए सै; पर उस माणस पै धिक्कार सै जिसके जरिये मै माणस का बेटटा पकड़वाया जाऊंगा: जै उस माणस का जन्म ए न्ही होंदा, तो उसके खातर भला होंदा।”

25 फेर यीशु के पकड़वाण आळे यहूदा नै कहा, “हे गुरु, के वो मै सूँ?” यीशु उसतै बोल्या, “तन्ने कह लिया।”

26 जबि वे फसह खाण लागरे थे, तो यीशु नै रोट्टी ली, अर आशीष माँगके तोड़ी, अर चेल्यां ताहीं देके कहा, “ल्यो, खाओ; या मेरी देह सै।”

27 फेर यीशु नै अपना कटोरा लेके परमेसवर का धन्यवाद करया, अर उन ताहीं देके कहा, “थम सारे इस म्ह तै पियो, 28 क्यूँके यो करार का मेरा वो लहू सै, जो घणखरयां के खातर पापां की माफी के खातर बहाया जावै सै। 29 मै थमने साच्ची कहूँ सूँ के अंगूर का यो रस उस दिन ताहीं कदे न्ही पीऊंगा, जबि थारे गेल्या अपणे पिता के राज्य म्ह नया न्ही पीऊँ।”

30 फेर वे भजन गाके जैतून के पहाड़ पै गए।

31 फेर यीशु नै उनतै कहा, “थम आज ए रात नै मेरे बाबत टोक्कर खाओगे, क्यूँके लिख्या सै: मै पाळी नै मारूंगा, अर टोळ की भेड़ तित्तर-बितर हो जावैगी।”

32 “पर मै अपणे जिन्दा उठण के बाद थारे तै पैहल्या गलील परदेस म्ह मिलूँगा।”

33 इसपै पतरस नै उसतै कहा, “जै सारे छोड़े तो छोड़े, पर मै तेरा साथ कदे न्ही छोड़ूँगा।”

34 यीशु नै उसतै कह्या, “मै तेरे तै सच कहूँ सू के आज ए रात नै मुर्गे के बाँग देण तै पैहल्या, तू तीन वर मैरे बाँरे म्ह मुकरैगा।”

35 पतरस नै उसतै कह्या, “जै मन्नै तेरे गेल्या मरणा भी पड़े, तोभी मै तेरा इन्कार कदे कोनी करूंगा।” इस्से तरियां और सारे चेल्यां नै भी न्यूर कह्या।

36 फेर यीशु अपने चेल्यां कै गेल्या गतसमनी नामक एक जगहान् म्ह आया अर अपने चेल्यां तै कहण लाग्या, “उरै बेट्टे रहियो, जिब ताहीं मै ओडे प्रार्थना करूँ।” 37 वो पतरस अर जब्दी के दोन्नु बेट्टा नै गेल्या लेग्या, अर उदास अर काल होण लाग्या। 38 फेर उसनै उनतै कह्या, “मेरा मन घणा उदास सै, उरै ताहीं के मेरा जी लिकड़ण नै होरया सै। थम उरै ठहरो अर जागदे रहो।”

39 फेर वो माड़ा और आगुँ सरक कै मुँह कै बळ गिरया, अर या प्रार्थना करण लाग्या, “हे मेरे पिता, जै हो सकै तो यो दुख का कटोरा मैरे तै टळ जावै, तोभी जिसा मै चाहूँ सू इसा न्ही, पर जिसा तू चाहवै सै उस्से तरियां ए होवै।”

40 फेर उसनै चेल्यां कै धोरै आकै उन ताहीं सोन्दे पाया अर पतरस तै कह्या, “के थम मैरे गेल्या एक घड़ी भी कोनी जाग सके? 41 जागदे रहो, अर प्रार्थना करदे रहो के थम परखे ना जाओ, आत्मा तो त्यार सै पर देह कमजोर सै।”

42 फेर उसनै दुसरी वार जाकै या प्रार्थना करी, “हे मेरे पिता, जै यो मैरे पिए बिना न्ही हट सकदा, तो तेरी मर्जी पूरी हो।” 43 फेर उसनै आकै उन ताहीं फेर सोन्दे पाया, क्यूँके उनकी आँखां म्ह नींद भरी थी। 44 उननै छोड़कै वो फेर चल्या गया, अर उन्हे शब्दां म्ह फेर तीसरी वार प्रार्थना करी।

45 फेर उसनै चेल्यां कै धोरै आकै उनतै कह्या, “इब सोन्दे रहो, अर आराम करो: देखो, बखत आण पोंहच्या सै, अर मै माणस का बेट्टा पापियाँ के हाथ्यां पकड़वाया जाऊँगा। 46 उठो, चाल्लां; देखो, मेरा पकड़ण आळा धोरै आण पोंहच्या सै।”

47 वो न्यूर कहण ए लागरया था के यहूदा जो वारहां चेल्यां म्ह तै एक था आया, अर उसकै गेल्या प्रधान याजकां अर यहूदी अगुवां की ओड़ तै बड़्डी भीड़, तलवार अर लाट्टी लिये होए, आई। 48 यीशु के पकड़वाण आळे यहूदा नै उन ताहीं यो इशारा दिया था: “जिस ताहीं मै चूम ल्यूर वोए सै; उस ताहीं पकड़ लियो।” 49 अर जिब्वे यीशु कै धोरै आकै कह्या, “हे गुरु, नमस्कार!” अर उस ताहीं घणा चुम्या।

50 यीशु नै उसतै कह्या, “हे दोस्त, जिस काम कै खात्तर तू आया सै, उसनै करले।” फेर उननै धोरै आकै यीशु पै हाथ गेरया अर उस ताहीं पकड़ लिया। 51 यीशु के साथियाँ म्ह तै एक नै हाथ बढ़ाकै अपनी तलवार खींच ली अर महायाजक के नौक्कर पै चलाकै उसका कान उड़ा दिया।

52 फेर यीशु नै उसतै कह्या, “अपणी तलवार म्यान म्ह धर ले क्यूँके जो तलवार चलावै सै वे सारे तलवार तै नाश करे जावेंगे। 53 के तन्नै न्ही बेरा के मै अपने पिता तै बिनती कर सकूँ सू, अर वो सुर्गदूत्ता की वारहां पलटन तै घणे मैरे धोरै इब्बे हाजर कर देवैगा? 54 पर पवित्र ग्रन्थ की ये बात के इसाए होणा जरूरी सै, किस ढाळ पूरी होवैगी?”

55 उस बखत यीशु नै भीड़ तै कह्या, “के थम तलवार अर लाट्टी लेकै मन्नै डाकू की ढाळ पकड़ण कै खात्तर लिकड़े सो? मै हरेक दिन मन्दर म्ह बैठके उपदेश दिया करूँ था, अर थमनै मैरे ताहीं कोनी पकड़्या। 56 पर यो सारा ज्यातै होया सै के नवियाँ के वचन पूरे होवै।” फेर सारे चेल्ले उसनै छोड़कै भाजगे।

57 फेर यीशु के पकड़ण आळे उस ताहीं काइफा नामक महायाजक कै धोरै लेगे, जित्त शास्त्री अर यहूदी अगुवें कट्टे होए थे। 58 पतरस दूर ए दूर उसकै पाच्छे-पाच्छे, महायाजक कै आँगण ताहीं गया, अर भीत्तर जाकै अन्त देखण नै सिपाहियाँ कै गेल्या बैठग्या।

59 सारे प्रधान याजक अर यहूदी अगुवां की सभा यीशु नै मारण कै खात्तर उसकै बिरोध म्ह झूट्टी गवाही की टोह म्ह थे, 60 पर घणखरे झूट्टे गवाह कै आण पै भी कोनी पाई। आखर म्ह दो

जणे आये, 61 अर बोल्ले, “इसनै कह्या सै के मै परमेसवर के मन्दर नै गेर सकूँ सू अर उस ताहीं तीन दिन म्ह बणा सकूँ सू।”

62 फेर महायाजक नै खड़े होके यीशु तै कह्या, “के तू कोए जवाब न्ही देंदा? ये माणस तेरे बिरोध म्ह के गवाही देवै सै?” 63 पर यीशु बोल-वाल्ला रहया। फेर महायाजक नै उसतै कह्या, “मै तन्नै जिन्दे परमेसवर की कसम दियुँ सू के जै तू परमेसवर का बेट्टा मसीह सै, तो म्हारै ताहीं कह दे।”

64 यीशु नै उसतै कह्या, “तन्नै आप ए कह दिया; बल्के मै तेरे तै यो भी कहूँ सू के इब तै थम मुझ माणस के बेट्टे नै सब तै सर्वशक्तिमान की सोळी ओड़ बेट्टे, अर अकास के बादळां पै आन्दे देखोगे।”

65 फेर महायाजक नै अपने लत्ते पाड़के कह्या, “इसनै परमेसवर की बुराई करी सै, इब हमनै गवाह की के जरूरत? देखो, थमनै इब्बे या बुराई सुणी सै! 66 थम के सोचो सो?” उननै जवाब दिया, “यो मारण जोगगा सै।”

67 फेर उननै उसके मुँह पै थुक्या अर उसके घुम्से मारे, दुसरयां नै थपड़ मारके कह्या, 68 “हे मसीह, म्हारै तै भविष्यवाणी करके कह के किसनै तेरे ताहीं मारया?”

69 पतरस बाहरणै आँगण म्ह बेठचा था के एक नौकराणी उसके धौरै आई अर बोल्ली, “तू भी तो गलीलवासी यीशु के गेल्या था।”

70 उसनै सारया के स्याम्ही यो कहके नाटचा, “मन्नै न्ही बेरा तू के कहवै सै।”

71 जिव वो बाहरणै देहळियाँ म्ह गया, तो दुसरी नौकराणी उसनै देखके उनतै जो ओड़ै थे कह्या, “यो भी तो यीशु नासरी\* के गेल्या था।”

72 वो कसम खाके फेर नाटचा: “मै उस माणस नै कोनी जाणदा।”

73 माड़ी बार पाच्छे माणसां नै जो ओड़ै खड़े थे, पतरस के धौरै आके उसतै कह्या, “साच्चए तू भी उन म्ह तै एक सै, क्यूँके तेरी बोल्ली तेरा भेद खोल्लै सै।”

74 फेर वो धिक्कारण अर कसम खाण लागया: “मै उस माणस नै कोनी जाणदा।” जिब्बे मुर्गे नै बाँग देई। 75 जिव पतरस नै यीशु की कही होई बात याद आई “मुर्गे के बाँग देण तै पैहल्ल्या तीन बर तू मेरा इन्कार करैगा।” अर वो बारणै ज्याके फूट-फूटके रोण लागया।

## 27

1 तड़के ए तड़के सारे प्रधान याजकां अर यहूदी अगुवां नै यीशु ताहीं मारण की सलाह करी।

2 उननै यीशु ताहीं बाँधया अर ले जाके पिलातुस राज्यपाल के हाथ्यां म्ह सौप दिया।

3 जिव उसके पकड़वाण आळे यहूदा नै अहसास होया के यीशु ताहीं मौत की सजा सुणाई गई सै तो वो पसताया अर वे तीस चाँदी के सिक्के प्रधान याजकां अर यहूदी अगुवां ताहीं बोहड़ाया 4 अर कह्या, “मन्नै बेकसूर माणस ताहीं मारण के खात्तर पकड़वाके पाप करया सै।” उननै कह्या, “हमनै के मतलब? तू ए जाणै।”

5 फेर वो उन सिक्का नै मन्दर के आँगण म्ह बगाके बाहरणै चल्या गया, अर जाके अपने-आप ताहीं फाँसी लगा ली।

6 प्रधान याजकां नै उन सिक्का ताहीं लेके कह्या, “म्हारै नियम-कायदे इस बात की इजाजत कोनी देंदा के हम इन सिक्कयां नै मन्दर के खजान्ने म्ह धरा, क्यूँके इसका इस्तमाल किसे ताहीं मारवाण खात्तर करया गया सै, या लहू की किम्मत सै।” 7 आखर म्ह उननै सलाह करके उन सिक्कयां तै परदेशियाँ के गाड़डे जाणके खात्तर कुम्हार का खेत मोल ले लिया। 8 इस कारण वो खेत आज ताहीं लहू का खेत कुह्लावै सै। 9 ताके जो वचन यिर्मयाह नबी के जरिये कह्या गया था वो पूरा होया: “उननै वे तीस सिक्के यानिके उस ठहराए होए मोल ताहीं (जिस ताहीं इस्राएल की ऊलाद म्ह तै कितन्याँ

\* 26:71 26:71 नासत नगर का रहण आळा

नै ठहराया था) ले लिया, <sup>10</sup>अर जिस तरियां परभु नै मेरै ताहीं हुकम दिया था, उस्से तरियां ए उननै कुम्हार के खेत नै खरीदण खात्तर उसका इस्तमाल करया ।”

<sup>11</sup>जिब यीशु राज्यपाल कै स्याम्ही खड्या था तो राज्यपाल नै उसतै बुद्धिया, “के तू यहूदियाँ का राजा सै?” यीशु नै उसतै कह्या, “तू आप ए कहण लागरया सै ।”

<sup>12</sup>जिब प्रधान याजक अर यहूदी अगुवें उसपै इल्जाम लावै थे, तो उसनै कुछ जवाब कोनी दिया ।

<sup>13</sup>इसपै पिलातुस नै उसतै कह्या, “के तू न्ही सुणदा के ये तेरे विरोध म्ह कितनी गवाही देवै सै?”

<sup>14</sup>पर उसनै उस ताहीं एक बात का भी जवाब कोनी दिया, उरै ताहीं के राज्यपाल ताहीं घणी हैरानी होई ।

<sup>15</sup>राज्यपाल का यो रिवाज था के उस त्यौहार म्ह माणसां के खात्तर किसे एक कैदी नै जिसनै वे चाहवै थे, रिहा कर देवै था ।

<sup>16</sup>उस बखत उनके उरै बरअब्बा नाम का एक मान्या होइ कैदी था । <sup>17</sup>आखर जिब वो कट्टे होए, तो पिलातुस नै उनतै कह्या, “थम किसनै चाहो सो के मै थारे खात्तर रिहा करूँ? बरअब्बा ताहीं, या यीशु ताहीं जो मसीह कुह्वावै सै ।” <sup>18</sup>क्यूँके उसनै बेरा था के उननै उस ताहीं जळण तै पकड़वाया था ।

<sup>19</sup>जिब वो न्याय की गद्दी पै बेट्या होया था तो उसकी घरआळी नै उस ताहीं कुहवां भेज्या, “तू उस धर्मी के मामलै म्ह हाथ ना गेरिये, क्यूँके मन्नै आज सपनै म्ह उसके कारण घणा दुख टाया सै ।”

<sup>20</sup>प्रधान याजकां अर यहूदी अगुवां नै माणसां ताहीं उकसाया के वे बरअब्बा नै माँग ले, अर यीशु का नाश करावै ।

<sup>21</sup>राज्यपाल नै उसतै बुद्धिया, “इन दोनुआ म्ह तै किसनै चाहो सो के मै थारे खात्तर छोड़ दियुँ?” उननै कह्या, “बरअब्बा ताहीं ।”

<sup>22</sup>पिलातुस नै उनतै कह्या, “फेर यीशु ताहीं, जो मसीह कुह्वावै सै, के करूँ?” सारया नै उसतै कह्या, “यीशु कूरुस पै चढ़ाया जावै।”

<sup>23</sup>हाकिम नै कह्या, “क्यांतै, उसनै के बुरा करया सै?” पर वे और भी रुक्के मारण लागगे, “वो कूरुस पै चढ़ाया जावै ।”

<sup>24</sup>जिब पिलातुस नै देख्या के किमे न्ही बण पडरया पर उल्टा दंगा बढदा जावै सै, तो उसनै पाणी लेके भीड़ के स्याम्ही अपणे हाथ धोए अर कह्या, “मै इस धर्मी के लहू तै बेकसूर सूँ: थमे जाणो ।”

<sup>25</sup>सारे माणसां नै जवाब दिया, “इसकी मौत के जिम्मेदार हम अर म्हारी ऊलाद होवांगे।”

<sup>26</sup>इसपै उसनै बरअब्बा ताहीं उनके खात्तर रिहा कर दिया, अर यीशु के कोड़े लगवाके सौप दिया, के कूरुस पै चढ़ाया जावै ।

<sup>27</sup>फेर राज्यपाल के सिपाहियाँ नै यीशु ताहीं किले\* म्ह ले जाके सारी पलटन उसके चौगरदे नै कट्टी करी, <sup>28</sup>अर उसके लत्ते तारके उस ताहीं लाल रंग का चोगगा पहिराया, <sup>29</sup>अर काण्डयाँ का ताज गुन्दके उसके सिर पै धरया, अर उसके सोळे हाथ्यां म्ह सरकण्डा दिया अर उसके आगू गोड़डे टेक के उसका मखौल उड़ाण लागगे अर कह्या, “हे यहूदिया परदेस के राजा, नमस्कार!” <sup>30</sup>अर उसपै धुक्या; अर वोए सरकण्डा लेके उसके सिर पै मारण लागगे । <sup>31</sup>जिब उननै उसका मखौल कर लिया, तो वो चोगगा उसपै तै तारके फेर उस्से के लत्ते उस ताहीं पहिराए, अर कूरुस पै चढ़ाण के खात्तर ले चाल्ले ।

<sup>32</sup>बाहरणै जान्दे होए, उन ताहीं शमौन नाम का एक कुरेनी माणस मिल्या । उननै उस ताहीं बेकार म्ह पकड्या के उसका कूरुस ठाके ले चाल्लै । <sup>33</sup>उस जगहां पै पोहचे जो “खोपड़ी” यानी इब्रानी भाषा म्ह “गुलगुता” कुह्वावै सै । <sup>34</sup>उननै सिरका मिल्या होइ अंगूर का रस उस ताहीं पीण नै दिया, पर उसनै चाखके पीणा न्ही चाह्या । <sup>35</sup>फेर उननै उस ताहीं कूरुस पै चढ़ाया, अर पर्ची गेर के उसके

\* 27:27 27:27 जो पिरटोरियम कुह्वावै सै

लत्ते बांड लिये, 36 अर ओड़ै बैठकै उसका पैहरा देण लागगे। 37 अर उसका दोषपत्र लिखकै उसके सिर पै लगाया, के, “थो यहूदियाँ का राजा यीशु सै।”

38 फेर उसके गेल्या दो डाकू एक सोळी ओड़ अर एक ओळी ओड़, करूस पै चढ़ाए गए। 39 राह म्ह आण-जाण आळे सिर हला-हलाकै उसकी बेजती करै थे, 40 अर वे कहवै थे, “हे मन्दर नै ढाण आळे अर तीन दिनां म्ह बणाण आळे, अपणे-आपनै तो बचा! जै तू परमेसवर का बेट्टा सै, तो करूस पै तै उतर आ।” 41 इस्से तरियां तै प्रधान याजक भी शास्त्रियाँ अर यहूदी अगुवां सुधा मजाक करकै कहवै थे, 42 “इसनै औरां ताहीं बचाया, अर अपणे-आपनै न्ही बचा सकदा। यो तो इसराएल का राजा सै। इब करूस पै तै उतर आवै तो हम उसपै बिश्वास करां। 43 उसनै परमेसवर पै भरोस्सा राख्या सै; जै वो इसनै चाहवै सै, तो इब इसनै छुड़ा लेवै, क्यूँके इसनै कहाा था, मै परमेसवर का बेट्टा सू।” 44 इस्से ढाळ डाकू भी जो उसके गेल्या करूस पै चढ़ाए गए थे, उसकी बेजती करै थे।

45 दोफारी तै लेकै तीन बजे ताहीं उस सारे देश म्ह अँधेरा छाया रहया। 46 तीसरे पहर के लोवै यीशु नै जोर तै बोल्या, “एली, एली, लमा शबक्तनी?” यानिके “हे मेरे परमेसवर, हे मेरे परमेसवर, तन्नै मेरै ताहीं क्यातै छोड़ दिया?”

47 जो उड़ै खड़े थे, कितन्याँ नै न्यू सुणकै कहाा, “वो तो एलिय्याह ताहीं बुलावै सै।”

48 उन म्ह तै एक जिब्बे भाज्या, अर स्पंज (फोम) लेकै सिरके म्ह डबोया, अर सरकण्डे पै धरकै उस ताहीं चुसाया। 49 औरां नै कहाा, “रहज्या, देख्खो एलिय्याह उसनै बचाण आवै सै के न्ही।”

50 फेर यीशु नै जोर तै किल्की मारके जी दे दिया।

51 अर देख्खो, मन्दर का पड़दा उप्पर तै तळै ताहीं पाटकै दो टुकड़े होगया अर धरती काम्बगी चट्टान तड़कगी, 52 अर कबरे खुलगी, अर मेरे होड़ भोत-से पवित्र माणस जो पैहले मुदँ थे वे जिन्दा होगये, 53 अर उसके जिन्दा होण के पाच्छे, वे कबरां म्ह तै लिकड़के पवित्र नगर म्ह गए अर घणाए ताहीं दिक्खे।

54 फेर सूबेदार अर जो उसके गेल्या पैहरा दे रे थे, हाल्लण अर जो कुछ होया था उस ताहीं देखकै घणे डरगे अर कहाा, “साच्चए यो परमेसवर का बेट्टा था।”

55 ओड़ै घणखरी बिरबान्नी जो गलील परदेस तै यीशु की सेवा कर दी होई उसके गेल्या आई थी, दूर तै देख्खे थी। 56 उन म्ह मरियम<sup>†</sup> मगदलीनी, अर याकूब अर योसेस की माँ मरियम, अर जब्दी के बेट्टाँ की माँ थी।

57 जब सौँझ होई तो यूसुफ नामका अरिमतिया गाम का एक साहूकार माणस, जो खुदे यीशु का चेल्ला था। 58 उसनै पिलातुस धोरै जाकै यीशु की लाश माँगी। इस करकै पिलातुस नै यीशु की लाश देण का हुकम दिया। 59 यूसुफ नै यीशु की लाश ली, उस ताहीं धोळी चादर म्ह लपेटचा, 60 अर उस ताहीं अपणी नई कब्र म्ह धरया, जो उसनै चट्टान म्ह खुदवाई थी, अर कब्र के बारणै पै एक बड़ड़ा पत्थर गिरड़ा के चल्या गया। 61 मरियम मगदलीनी<sup>‡</sup> अर दुसरी मरियम ओड़ैए कब्र के स्याम्ही बेट्टी थी।

62 आगला दिन आराम का दिन<sup>§</sup> था, उस दिन प्रधान याजकां अर फरीसियाँ नै पिलातुस के धोरै कट्टे होकै कहाा, 63 “हे महाराज, म्हरै ताहीं याद सै के उस धोक्खेबाज नै जब वो जिन्दा था, तो उसनै न्यू कहाा था, मै मरण के तीन दिन पाच्छे जिन्दा हो जाऊँगा।” 64 इस करकै हुकम दे के तीसरे दिन ताहीं कब्र की रुखाळी सावधानी तै करी जावै, इसा ना हो के उसके चेल्लेँ आके उसकी लाश नै चुरा ले जावै, अर माणसां तै कहण लागगे, ‘वो मेरे होया म्ह तै जिन्दा होगया सै।’ फेर पाच्छला धोक्खा पैहलड़े तै भी बड़ड़ा होगा।” (पैहला धोक्खा के वो खुद नै परमेसवर का बेट्टा बतावै सै, दुसरा यो के इब वो तीसरे दिन मेरे होया मै तै जी उट्टुँगा।)

† 27:56 27:56 मगदला गाम की मरियम

‡ 27:61 27:61 मगदला गाम की मरियम

§ 27:62 27:62 जो के तैयारी

के बाद का दिन था

65 “पिलातुस नै उनतै कह्या, “थारे धोरै पहेरेदार तो सै जाओ, अपणी समझकै मुताबिक कब्र की रुखाळी करो”। 66 आखर वे पैहेरेदारां नै गैल लेकै गये, अर कब्र के पत्थर पै मोंहर लगाकै कब्र की रुखाळी करी।”

## 28

1 आराम कै दुसरे दिन पाच्छै, हप्तै कै पैहल्ले दिन, तड़कै ए तड़कै मगदला कस्बे की मरियम अर दूसरी मरियम कब्र नै देखण आई।

2 अर देखो, एक बड़डा हाल्लण आया, क्यूँके प्रभु का सुगंदूत सुगं तै उतरया अर धोरै आकै उसनै पत्थर ताहीं गिरइया दिया, अर उसपै बैठग्या।

3 उसका रूप बिजळी बरगा था अर उसके लत्ते पाळे की ढाळ धोळे थे। 4 उसके डर तै पहेरेदार काम्बगें, अर मुर्दे की ढाळ होग्ये।

5 सुगंदूत नै बिरबानियाँ ताहीं कह्या, “मतना डरो, मन्नै बेरा सै के थम यीशु नै जो कूरुस पै चढाया गया था, टोहो सो। 6 वो उरै न्ही सै, पर अपणे वचन कै मुताबिक जिन्दा होग्या सै। आओ, या जगहां देखो, जित्त प्रभु राख्या गया था, 7 अर तावळे जाकै उसके चेल्यां ताहीं कहो के वो मरे होया म्ह तै जिन्दा होग्या सै, अर वो थारे तै पैहल्ल्या गलील परदेस म्ह जावै सै, उडै उसका दर्शन पाओगे! देखो, मन्नै थारे तै कह दिया।”

8 वे भय अर घणी खुशी कै गेल्या कब्र तै तावळी बोहड़कै उसके चेल्यां ताहीं खबर देण नै भाज्जी गई। 9 फेर यीशु उन ताहीं मिल्या। अर कह्या, “सुखी रहो।” उननै धोरै आकै अर उसके पाँ पकड़कै उस ताहीं प्रणाम करया। 10 फेर यीशु नै उनतै कह्या, “मतना डरो; मेरे चेल्यां तै जाकै कहो के गलील परदेस म्ह चले जावै, उडै वो मन्ने देखेंगे।”

11 जिव वे चेल्यां ताहीं या खबर देण जाण लागरी थी। तो पैहेरेदारां म्ह तै, जो कब्र की रुखाळी करै थे, उन म्ह तै कईयाँ नै नगर म्ह आकै सारा हाल प्रधान याजकां तै कह सुणाया। 12 फेर उननै यहूदी अगुवां कै गेल्या कट्ठे होकै सलाह करी अर सिपाहियाँ ताहीं घणाए धन देकै हुकम दिया, 13 “के माणसां तै न्यू कहियो के जिव हम रात नै सोण लागरे थे, तो उसके चेल्लें आकै उसकी लाश नै चुरा लेगे। 14 जै थारे सोण की खबर राज्यपाल कै कान्नां ताहीं पोहोचैगी, तो हम उसनै समझा लेवेंगे अर थमनै जोखिम तै बचा लेवांगे।” 15 आखर उननै रपिये लेकै जिसे सिखाए गये थे, उस्से तरियां ए करया। या बात आज ताहीं यहूदी माणसां म्ह मान्नी जावै सै।

16 ग्यारहां चेल्लें गलील परदेस म्ह उस पहाड़ पै गये, जिस ताहीं यीशु नै उन ताहीं बताया था।

17 उननै उसका दर्शन पाकै उस ताहीं प्रणाम करया, पर कईयाँ नै शक होया के यीशु जिन्दा होग्या सै। 18 यीशु नै उनकै धोरै आकै कह्या, “सुगं अर धरती का सारा हक मेरै ताहीं दिया गया सै। 19 इस करके थम जाओ, सारी जात्तां के माणसां ताहीं चेल्ला बणाओ; अर उननै पिता, पुत्र अर पवित्र आत्मा कै नाम तै बपतिस्मा द्यो, 20 अर उननै सारी बात जो मन्ने थारे ताहीं हुकम दिया सै, मानना सिखाओ: अर देखो मै दुनिया कै अंत तक सदा थारे गैल रहूंगा।”

## मरकुस के जरिये लिख्या गया सुसमाचार



मरकुस के जरिये लिख्या गया सुसमाचार इस बात तै शुरु होवै सै, “परमेसवर के बेट्टे यीशु मसीह का सुसमाचार।” इस म्ह यीशु ताहीं एक अधिकार कै साथ काम करणीये माणस के रूप म्ह दिख्या गया सै। उसका अधिकार उसकी शिक्षाओं म्ह, ओपरी आत्मायाँ पै, उसके अधिकार म्ह, अर माणसां के पापां ताहीं माफ करण म्ह दिखाई देवै सै। इस म्ह यीशु अपणे-आप ताहीं “माणस का बेट्टा” कहवै सै। वो इस करकै आया के माणसां नै पापां तै छुटकारा देण खात्तर अपनी जान देवै। मरकुस यीशु के वचन अर शिक्षा पै न्ही बल्कि उसके काम्मां पै जोर देवै सै। इस करकै वो उसकी कहाँनी नै सीध्दे, आसान अर असरदार तरियां तै पेश कर सै। यूहन्ना बपतिस्मा देण आळा अर यीशु का बपतिस्मा अर उसकी परख तै जुड़ी एक साफ जानकारी के बाद, लेखक जिब्बे यीशु के चंगाई, शिक्षा अर सेवा के काम्मां का जिक्र करण लाग जावै सै। जिस तरियां बखत बीतता गया उस्से तरियां यीशु के चेल्लें उसनै और भी आच्छी तरियां समझदे गये, पर यीशु के बिरोधी और ज्यादा उग्र होन्दे गये। आखरी पाठ म्ह यीशु के संसारिक जीवन के आखरी हफता की घटनायां का जिक्र पेश करै सै। जिन म्ह तै खास सै, उसका क्रूस पै चढ़ाया जाणा अर उसका दुबारा जिन्दा हो जाणा।

### रूप-रेखा

सुसमाचार की शुरुआत 1:1-13

गलील परदेस म्ह यीशु के जरिये माणसां की सेवा करणा 1:14-9:50

गलील परदेस तै यरुशलेम नगर ताहीं का सफर 10:1-52

यरुशलेम नगर म्ह आखरी हफता 11:1-15:47

यीशु का दुबारा जिन्दा हो जाणा 16:1-8

जिन्दा हो जाणकै बाद प्रभु का दिखाई देणा अर सुर्ग जाणा 16:9-20



([मरकुस 3:1-12](#); [मरकुस 3:1-18](#); [मरकुस 1:19-28](#))

1 यो सुसमाचार यीशु मसीह के बारे म्ह सै। जो परमेसवर का बेट्टा सै। अर इसकी शुरुआत इस तरियां होई 2 जिसा के यशायाह नबी की किताब म्ह परमेसवर नै अपने बेट्टे ताहीं कहाँ सै:

“देख, मै अपने दूत नै तेरे आगै भेजूं सूं,

जो तेरे खात्तर लोग्गां नै तैयार करैगा।”\*

3 जंगल-बियाबान म्ह एक रुक्का मारणीये का बोल सुणाई देवै सै के

प्रभु के आण खात्तर अपने-आपनै तैयार करो।”†

4 वो दूत यूहन्ना था, जो जंगल-बियाबान म्ह कहवै था, “पाप करणा छोड़ दो अर बपतिस्मा ल्यो परमेसवर थारे पाप माफ कर देगा।” 5 सारे यहूदिया परदेस के, अर यरुशलेम नगर के सारे बासिन्दे लिंकड़के उसके धारे गए, अर अपने पापां नै मानकै यरदन नदी म्ह उसतै बपतिस्मा लिया।

6 यूहन्ना ऊँट के रूए के लत्ते पहरे, अर अपनी कड़ म्ह चमड़े की पेट्टी बाँधे रहवै था, अर टिड्डियाँ अर शहद खाया करै था।‡ 7 अर न्यू प्रचार करै था, “मेरे पाच्छे, वो आण आळा सै, जो मेरे तै शक्तिशाली सै, मै इस लायक कोनी के झुककै उसके जूट्याँ के फिते खोलूँ। 8 मन्नै तो थारे ताहीं पाणी तै बपतिस्मा दिया सै पर वो धमनै पवित्र आत्मा तै बपतिस्मा देवैगा।”



([मरकुस 3:13-4:11](#); [मरकुस 3:21-22](#); [4:1-13](#))

\* 1:2 1:2 मत्ती 11:10, मला-3:1 † 1:3 1:3 यशा-40:3 ‡ 1:6 1:6 2 राजा-1:8, मत्ती 3:4



9 उन दिनां म्ह यीशु नै गलील परदेस के नासरत नगर तै होकै, यरदन नदी म्ह यूहन्ना तै बपतिस्मा लिया। 10 अर जिब वो पाणी म्ह तै लिकड़के उप्पर आया, तो जिब्बे उसनै अकास ताहीं खुल्दे अर पवित्तर आत्मा ताहीं कबूतर की तरियां अपणे उप्पर आन्दे देख्या। 11 अर परमेसवर सुर्ग म्ह तै बोल्या, “तू मेरा प्यारा बेट्टा सै, तेरे तै मै राज्जी सूँ।”

12 फेर पवित्तर आत्मा नै जिब्बे उस ताहीं जंगल-बियावान कान्ही भेज्या। 13 जंगल-बियावान म्ह चाळीस दिन ताहीं शैतान उस ताहीं परखता रह्या, अर वो जंगल-बियावान म्ह पशुआं के गेल्या रह्या, अर सुर्गदूत उसकी सेवा करदे रहे।

⋯⋯⋯ ⋯⋯⋯ ⋯⋯⋯ ⋯⋯⋯ ⋯⋯⋯  
(⋯⋯⋯ 4:12-17; ⋯⋯⋯ 4:14-15)

14 यूहन्ना के पकड़े जाणके कुछ बखत पाचछै, यीशु नै गलील परदेस म्ह आकै परमेसवर के राज्य का सुसमाचार प्रचार करया, 15 अर कह्या, “बखत पूरा होया सै, अर परमेसवर का राज्य धोरे आरया सै; पाप करणा छोड़ दो, अर परमेसवर के सुसमाचार पै विश्वास करो।”

⋯⋯⋯⋯⋯ ⋯⋯⋯⋯⋯⋯ ⋯⋯⋯  
(⋯⋯⋯ 4:18-22; ⋯⋯⋯ 5:1-11)

16 गलील परदेस म्ह गलील समुन्दर के किनारे जान्दे होड़, उसने शमौन अर उसके भाई अन्दरयास ताहीं समुन्दर म्ह जाळ गर दे देख्या; क्यूँके वे मछवारे थे। 17 यीशु नै उनतै कह्या, “मेरे पाचछै आओ, मै थमने माणसां ताहीं कट्टे करण आळे बणाऊँगा ताके वो मेरे चेल्लें बणे।” 18 वे जिब्बे जाळां नै छोड़के उसके चेल्लें बणण खात्तर उसके पाचछै हो लिये।

19 थोड़ा आगै चालके, उसने जब्दी के बेट्टे याकूब अर उसके भाई यूहन्ना ताहीं, किस्ती पै जाळां ताहीं ठीक करदे देख्या। 20 उसने जिब्बे उन ताहीं बुलाया; अर वे अपणे पिता जब्दी ताहीं मजदूरां के गेल्या किस्ती पै छोड़के, उसके चेल्लें बणण खात्तर उसके पाचछै हो लिये।

⋯⋯ ⋯⋯⋯⋯⋯⋯ ⋯⋯⋯⋯⋯⋯⋯ ⋯⋯⋯⋯⋯⋯⋯⋯⋯  
(⋯⋯⋯ 4:31-37)

21 जिब यीशु अर उसके चेल्लें कफरनहूम नगर म्ह आए, अर वो जिब्बे आराम के दिन आराधनालय म्ह जाके उपदेश देण लाग्या। 22 अर माणस उसके उपदेश तै हैरान होगे; क्यूँके वो उननै शास्त्रियां की ढाळ न्ही, पर अधिकार तै उपदेश देवै था। 23 उस्से बखत, उनके आराधनालय म्ह एक माणस था, जिसम्ह ओपरी आत्मा थी। 24 उसने रुक्का मारके कह्या, “हे नासरत के यीशु, हमनै तेरे तै के काम? के तू म्हारा नाश करण नै आया सै? मै तन्नै जाणु सूँ, तू कौण सै? तू परमेसवर की ओड़ तै भेज्या होया पवित्तर मसीह सै!”

25 यीशु नै उसतै धमकाके कह्या, “चुपचाप रहै, अर इस माणस म्ह तै लिकड़ जा।” 26 फेर ओपरी आत्मा ऊँची आवाज म्ह किल्की मारके उस म्ह तै लिकड़गी।

27 इस बात पै सारे माणस अचम्भा करदे होए आप्स म्ह बहस करण लागगे, “था के बात सै? यो तो कोए नया-ए उपदेश सै! वो हक के गेल्या ओपरी आत्मायाँ नै भी हुकम देवै सै, अर वे उसका हुकम मान्नै सै।”

28 अर उसका नाम जिब्बे गलील के पूरे परदेस म्ह हरेक जगहां फैलग्या।

⋯⋯⋯⋯⋯⋯ ⋯⋯⋯⋯⋯⋯⋯⋯⋯⋯⋯⋯⋯  
(⋯⋯⋯ 8:14-17; ⋯⋯⋯ 4:38-41)

29 यीशु अर उसके सारे चेल्लें जिब्बे आराधनालय म्ह तै लिकड़के, याकूब अर यूहन्ना के गेल्या शमौन अर अन्दरयास के घरां आये। 30 शमौन की सास्सू के बुखार चढ़रया था, अर उसके चेल्यां नै जिब्बे उसके बाबत यीशु ताहीं बताया। 31 फेर यीशु नै धोरे जाके उसका हाथ पकड़के उस ताहीं टाया, अर उसका बुखार उतर ग्या, अर वा उनकी सेवा-पाणी करण लागगी।

32 साँझ के बखत जिब सूरज डूबग्या तो माणस सारे बिमारां ताहीं अर उननै, जिनम्ह ओपरी आत्मा थी, यीशु के धोरे ल्याए। 33 अर साब्ला नगर दरबाजे पै कट्टा होया। 34 उसनै घणखरयां ताहीं जो कई ढाठ की बिमारियाँ तै दुखी थे, ठीक करया, घणखरी ओपरी आत्मायाँ ताहीं काढया, अर ओपरी आत्मायाँ ताहीं बोल्लण कोनी दिया, क्यूँके वे उसनै पिच्छाणै थी, के यीशु परमेसवर की ओड़ तै भेज्या होया मसीह सै।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂⓂⓂ  
(ⓂⓂⓂⓂ 4:42-44)

35 तड़केए दिन लिकड़ण तै पैहल्या, यीशु शमौन के घर तै उठके लिकड़या, अर एक बियावान जगहां म्ह गया अर उडै प्रार्थना करण लागग्या। 36 फेर शमौन अर उसके साथी उसकी टोहू म्ह गए। 37 जिब वो मिल्या, तो उस ताहीं कह्या, “सारे नगर के माणस तन्नै टोहवै सै।” 38 उसनै उनतै कह्या, “आओ; हम और किते लोवै-धोवै की बस्तियां म्ह जावां, के मै उडै भी प्रचार करूँ, क्यूँके मै इसे खात्तर आया सूँ।” 39 अर वो सारे गलील परदेस म्ह उनके आराधनालयों म्ह जा-जाके उन ताहीं उपदेश सुणांदा अर ओपरी आत्मायाँ ताहीं लिकाड़दा रह्या।

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ  
(ⓂⓂⓂⓂⓂ 8:1-4; ⓂⓂⓂⓂ 5:12-16)

40 एक कोढ़ी उसके धोरे आया, उसतै बिनती करी, अर उसके आगै गोड्डे टेकके उस ताहीं कह्या, “जै तू चाहवै तो मन्नै ठीक कर सके सै।” 41 उसनै उसपै तरस खाके हाथ बढ़ाके, अर उस ताहीं छू के कह्या, “मै चाहूँ सूँ, के तू इस बीमारी तै ठीक हो ज्या।” 42 अर जिब्बे उसका कोढ़ जान्दा रह्या, अर वो ठीक होग्या। 43 फेर उसनै उस ताहीं चेतावनी देके जिब्बे बिदा करया, 44 अर उसतै कह्या, “लखा, किसै तै कुछ मतना कहिये, पर जाके अपणे-आपने याजक ताहीं दिखा, अर अपणे कोढ़ तै ठीक होण के बारे म्ह जो कुछ मूसा नबी नै जो पवित्तर ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होग्या सै।” 45 पर वो बाहरणै जाके इस बात का घणा प्रचार करण अर याडै ताहीं फैलाण लागग्या के यीशु दुबारे सरेआम नगर म्ह कोनी जा सक्या, पर बाहरणै सुनसान स्थानां म्ह रह्या, अर चौगरदे तै माणस उसके धोरे आन्दे रहे।

## 2

ⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ  
(ⓂⓂⓂⓂⓂ 9:1-8; ⓂⓂⓂⓂ 5:17-26)

1 थोड़े दिनां पाच्छै, यीशु फेर कफरनहूम नगर म्ह आया, अर माणसां नै सुण्या के वो घर म्ह सै। 2 फेर इतने माणस कट्टे होए के दरबाजे धोरे भी जगहां कोनी थी, अर वो उननै परमेसवर के वचन सुणाण लागरया था। 3 अर चार माणस एक लकवे के मरीज ताहीं बिस्तर पै लिटाके उसके धोरे ल्याए। 4 पर जिब वे भीड़ के कारण उसके धोरे कोनी पोहच सके, तो उननै उस छात ताहीं जिसके तल्लै यीशु था, खोल दिया; तो उस बिस्तर समेत जिसपै वो लकवे का मरीज लेटचा था, नीचै उतार दिया। 5 यीशु नै उनका बिश्वास देखके उस लकवे के मरीज ताहीं कह्या, “हे बेटे, मन्नै तेरे पाप माफ कर दिये।”

6 फेर घणे शास्त्री जो उडै बेटे थे, अपणे-अपणे मन म्ह सोच्चण लागगे, 7 “यो माणस न्यू कयाँतै कहवै सै? यो तो परमेसवर की बुराई करै सै! परमेसवर नै छोड़के और कौण पाप माफ कर सके सै?”\*

8 यीशु नै जिब्बे अपणे मन म्ह जाण लिया के वे अपणे-अपणे मन म्ह इसा विचार कयाँतै करण लागरे सै? अर उनतै कह्या, “थम अपणे-अपणे मन म्ह यो विचार क्यूँ करण लागरे सो? 9 आसान के सै? के लकवे के मरीज ताहीं यो कहणा के तेरे पाप माफ होए, या फेर यो कहणा के उठ अपणा बिस्तर ठाके हाँड-फिर? 10 पर जिसतै थम जाण ल्यो के मुझ माणस के बेटे नै धरती पै पाप माफ करण का भी हक सै।” उसनै उस लकवे के मरीज ताहीं कह्या, 11 “मै तेरे तै कहूँ सूँ, उठ, अपणे बिस्तर

\* 2:7 2:7 (यशा-43:25)



1 यीशु फेर आराम के दिन आराधनालय म्ह गया; उड़ै एक माणस था जिसका हाथ सूखरया था, 2 अर फरीसी यीशु पै दोष लाण खात्तर उसकी टाह म्ह थे के देखै, वो आराम के दिन उसनै ठीक करै सै के न्ही। 3 उसनै सूखे हाथ आळे माणस तै कह्या, “बीच म्ह खडया होज्या”

4 अर उनतै कह्या, “के मूसा के नियम-कायदा के मुताबिक आराम के दिन भला करणा ठीक सै या बुरा करणा, जान बचाणा या मारणा?” पर वे बोल-बाल्ले रहे।

5 फेर उसनै उनकै मन की कठोरता तै काल होकै, उन ताहीं छो तै चोगरदेनै देख्या, अर उस माणस ताहीं कह्या, “अपणा हाथ बढ़ा।” उसनै बढ़ाया, अर उसका हाथ ठीक हो गया। 6 फेर फरीसी बाहरणै जाकै जिब्वे हेरोदेस राजा के समर्थकां के गेल्या उसकै विरोध म्ह सलाह करण लागगे के उसका नाश किस तरियां करया जावै।

**मरकुस 3:1-6**

7 यीशु अपण चेल्यां गेल्या गलील समुन्दर कान्ही चल्या गया: अर गलील तै एक बड़डी भीड़ उसके पाच्छे हो ली; 8 अर यहूदिया नगर, अर यरुशलम नगर, अर इदूमिया परदेस, अर यरदन नदी के परली ओड़, अर सूर अर सैदा नगर के लोवे-धोवै तै एक बड़डी भीड़ न्यू सुणकै के वो किसे अचम्भे आळे काम करै सै, उसनै देखण आई। 9 यीशु नै अपण चेल्यां तै कह्या, “भीड़ की बजह तै एक छोट्टी किस्ती मेरै खात्तर त्यार राखियों ताके वे मन्नै दाब न्ही सकै।” 10 क्यूँके उसनै घणखरयां ताहीं ठीक करया था, इस करकै जितने माणस बीमार थे, उस ताहीं छूण खात्तर उसपै पड़ण लागरे थे। 11 जिन म्ह ओपरी आत्मा भी जिब उस ताहीं देखै थी, तो उसके स्याम्ही गिर ज्या थी, अर किल्की मारकै कहवै थी, तू परमेसवर का बेट्टा सै। 12 अर उसनै ओपरी आत्मायाँ ताहीं चेतावनी देकै कह्या के मेरे वारै म्ह किसे तै ना कहियो के मै कौण सँ।

**मरकुस 3:7-16**

**(मरकुस 10:1-4; मरकुस 6:12-16)**

13 फेर यीशु पहाड़ पै चढ़ गया, अर जिन नै वो चाहवै था उन ताहीं अपणे धौरै बुलाया; अर वे उसके धौरै आए। 14 फेर उसनै उन म्ह तै बारहा चेल्यां ताहीं नियुक्त करया के वे उसके गेल्या-गेल्या रहवै, अर वो उननै भेज्जै के वे प्रचार करै, 15 अर ओपरी आत्मा ताहीं काढण का हक राक्खै। 16 वे बारहा चेल्लें ये सै: “शमौन जिसका नाम उसनै पतरस धरया, 17 अर जब्दी का बेट्टा याकूब अर याकूब का भाई यूहन्ना, जिसका नाम उसनै बुअनरगिस यानिके गरजण का बेट्टा धरया।” 18 अर अन्दरयास, अर फिलिप्पुस, अर बरतुलमै, अर मत्ती, अर थोमा, अर हलफई का बेट्टा याकूब, अर तद्दै, अर शमौन कनानी, 19 अर यहूदा इस्करियोती जिसनै उस ताहीं पकड़वा भी दिया था।

**मरकुस 3:17-19**

**(मरकुस 12:22-32; मरकुस 11:14-23; 12:10)**

20 फेर यीशु घरां आया; अर इसी भीड़ कठ्ठी होई, के यीशु अर उसके चेल्यां पै रोट्टी भी कोनी खाई गई। 21 जिब उसके कुणवा आळा न्यू सुण्या, तो वे उस ताहीं घरां ले जाण खात्तर लिकड़े; क्यूँके वे कहवै थे, “के उसका दिमाग ठिकाणै कोनी सै”

22 शास्त्री भी जो यरुशलम नगर तै आये थे, वे कहवै थे, “उस म्ह शैतान सै,” अर न्यू भी के “वो ओपरी आत्मायाँ के सरदार शैतान की मदद तै ओपरी आत्मायाँ नै लिकाड़े सै।”

23 ज्यातै यीशु उननै धौरै बुलाके उदाहरणां म्ह कहण लाग्या, “शैतान क्यूँकर ओपरी आत्मायाँ नै काढ सकै सै?” 24 जै किसे राज्य म्ह फूट पड़े, तो वो राज्य किस तरियां टिक्या रह सकै सै? 25 अर जै किसे घर म्ह फूट पड़े, तो वो घर क्यूँकर डट्या रह सकैगा? 26 इस करकै जै शैतान खुद का ए बिरोधी होकै अपण म्ह फूट गेरै, तो वो किस तरियां बणया रहै सकै सै? उसका तो नाश हो जावै सै। 27 “पर कोए माणस किसे टाड़्डे माणस के घर म्ह बड़कै उसका माळ कोनी लूट सकदा, जिब तक के पैहल्या उस टाड़्डे माणस ताहीं ना जुड़ ले; जिब वो उसके घर नै लूट लेवैगा। 28 मै धमने साच्ची-साच कहुँ सूँके माणसां के सारे पाप अर बुराई जो वे करै सै, माफ करे जावैगे, 29 पर जो कोए

पवित्र आत्मा कै बिरोध म्ह बुराई करै सै, वो कदे माफ कोनी करया जावैगा: बल्के वो अनन्त पाप का कसूरवार बण ज्यागा।”

30 क्यूँके वे न्यू कहवै थे के उस म्ह ओपरी आत्मा सै।

🔗🔗🔗 🔗🔗 🔗🔗 🔗🔗 🔗🔗

(🔗🔗🔗🔗 12:46-50; 🔗🔗🔗🔗 8:19-21)

31 फेर यीशु की माँ अर उसके भाई आए, अर बाहरणै खड़े होके उस ताहीं बुलावा भेज्या। 32 भीड़ उसके लोवै-धोवै बेट्ठी थी, अर उननै उसतै कह्या, “देख, तेरी माँ अर तेरे भाई बाहरणै तन्नै टोहवै सै।”

33 यीशु नै उनतै जवाब दिया, “मेरी माँ अर मेरे भाई कौण सै?”

34 अर जो उसके लोवै-धोवै बेट्ठे थे, उनपै निगांह करके कह्या, “देखो, मेरी माँ अर मेरे भाई ये सै।” 35 क्यूँके जो कोए परमेसवर की इच्छा पै चाल्लै, वोए मेरा भाई, मेरी बेब्बे, अर मेरी माँ सै।”

## 4

🔗🔗🔗 🔗🔗 🔗🔗 🔗🔗 🔗🔗🔗🔗

(🔗🔗🔗🔗 13:1-9; 🔗🔗🔗 8:4-8)

1 यीशु फेर गलील समुन्दर कै किनारे उपदेश देण लागग्या: अर इसी बड़्डी भीड़ उसके धोरै कट्ठी होगी के वो समुन्दर म्ह एक किस्ती पै चढ़के बैठग्या, अर सारी भीड़ जमीन पै समुन्दर कै किनारे खड़ी रही। 2 अर वो उननै उदाहरणां म्ह घणीए बात सिखाण लागग्या, अर अपणे उपदेश म्ह उन ताहीं कह्या, 3 “सुणो! एक किसान बीज बोण लिकइया। 4 बोदे बखत कुछ राही कै किनारे पड़े, अर पंछियाँ नै आके उन ताहीं चुग लिया। 5 कुछ पथरीली धरती पै पड़े जड़े उसनै घणी माट्टी ना मिली, अर ढुंधी माट्टी ना मिलण कै कारण तोळाए उग्या, 6 अर जिव सूरज लिकइया तो जळगे, अर जड़ ना पकड़ण कै कारण सुखगे। 7 कुछ झाड़ियाँ म्ह पड़े, अर झाड़ियाँ नै आगगे बढ़के उन ताहीं दाब दिया, अर वो फळ कोनी ल्याये। 8 पर कुछ आच्छी धरती पै पड़े, अर वो उग्या अर बढ़के फळ ल्याये; अर कोए तीस गुणा, कोए साठ गुणा अर कोए सौ गुणा फळ ल्याया।”

9 फेर उसनै कह्या, “जिसके कान हों, वो ध्यान तै सुण ले।”

🔗🔗🔗🔗🔗 🔗🔗 🔗🔗🔗🔗🔗

(🔗🔗🔗🔗 13:10-17; 🔗🔗🔗 8:9-10)

10 जिव यीशु एकला रहग्या, तो उसके साथियाँ नै उन बारहां चेल्यां सुधा उसतै इन उदाहरणां कै बारे म्ह बुद्धिया। 11 उसनै उनतै कह्या, “थारे ताहीं तो परमेसवर कै राज्य के भेद की समझ दे राखी सै, पर बाहर आळा खात्तर सारी बात उदाहरणां म्ह होवै सै।” 12 इस करके के

“वे देखदे होए देखै पर उननै दिखाई ना देवै

अर सुणदे होए सुणै भी पर ना समझै;

इसा ना हो के वे पाप करणा छोड़दे, अर वे माफ करे जावै।”\*

🔗🔗🔗 🔗🔗 🔗🔗 🔗🔗 🔗🔗🔗🔗🔗 🔗🔗🔗🔗🔗

(🔗🔗🔗🔗 13:18-23; 🔗🔗🔗 8:11-15)

13 फेर यीशु नै उनतै कह्या, “के थम यो उदाहरण कोनी समझै? तो फेर और सारे उदाहरणां नै किस तरियां समझोगे? 14 किसान जो बीज बोण आळा सै वो वचन बोण आळे कै समान सै। 15 राही कै किनारे गिरे बीज उन माणसां की तरियां सै जो वचन सुणै सै, तो शैतान जिब्बे आके वचन नै जो उन म्ह बोया गया था, ठा ले जावै सै। 16 उससे तरियां-ए जो पथरीली धरती पै बीज गिरे सै, ये वे सै जो वचन सुणके जिब्बे खुश होके अपणा लेवै सै। 17 पर उनके भीत्तर जड़ न्ही पकड़ण कै कारण थोड़े-से दिनां के खात्तर रहै सै; इसके बाद जिव वचन कै कारण उनपै क्लेश या संकट आवै सै, तो वे जिब्बे टोक्कर खा जावै सै। 18 जो झाड़ियाँ म्ह बीज गिरे ये वे सै जिन नै वचन सुणया, 19 अर दुनिया

\* 4:12 4:12 (यशा-6:9-10, यिर्मै-5:21)

की फिक्र, अर धन का धोक्सा, अर दुसरी चिज्जां का लालच म्ह पड़के वचन नै दाब देवै सै अर वो फळदा कोनी। <sup>20</sup> अर जो आच्छी धरती पै बीज गिरे, ये वे सै जो वचन सुणके अपना लेवै सै अर फळ ल्यावै सै, कोए तीस गुणा, कोए साठ गुणा अर कोए सौ गुणा।”

ⓂⓂⓂⓂ ⓂⓂⓂⓂⓂⓂ  
(ⓂⓂⓂⓂ 8:16-18)

<sup>21</sup> यीशु नै उनतै एक और उदाहरण दिया, “के दीवै नै इस खात्तर कोनी जळान्दे, के उसनै बरतन या खाट के तळै धर देवां? पर इस खात्तर के टांडी पै धरया जावै? <sup>22</sup> इसा कुछ भी न्ही जो लुक्या हो, अर खोल्या न्ही जावैगा अर ना कुछ गुप्त सै, जिसके बारे म्ह बेरा ना लागवै। <sup>23</sup> जै किसे के कान हों, तो ध्यान तै सुण ले।”

<sup>24</sup> फेर उसनै उनतै कह्या, “चौक्कस रहियो की के सुणो सो। जिस नाप तै थम नाप्पो सों उससे नाप तै थारे खात्तर भी नाप्या जावैगा। अर थारे ताहीं घणा दिया जावैगा। <sup>25</sup> क्यूँके जिसके धोरै सै, उस ताहीं दिया जावैगा, अर जिसके धोरै न्ही सै, उसतै वो भी जो उसके धोरै सै, ले लिया जावैगा।”

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ

<sup>26</sup> फेर यीशु नै उन ताहीं एक और उदाहरण दिया, “परमसवर का राज्य इसा सै, जिसा कोए माणस धरती पै बीज छिड़के सै, <sup>27</sup> अर रात नै सोग्या अर सबेरै जाग गया, अर वो बीज इसा उगै अर बधै सै के उसनै बेराए कोनी लाग्या। <sup>28</sup> धरती खुद-बै-खुद फळ लावै सै, पैहल्या अंकुर, फेर बाल, अर फेर बाल म्ह त्यार दाणा। <sup>29</sup> पर जिब दाणा पक जावै सै, फेर वो जिब्वे दांती लावै सै, क्यूँके लामणी का बखत आण पोहचा सै।”†

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ  
(ⓂⓂⓂⓂ 13:31-32-34; ⓂⓂⓂⓂ 13:18-19)

<sup>30</sup> फेर यीशु नै उन ताहीं एक और उदाहरण दिया, “हम परमसवर के राज्य की बराबरी किसतै करां अर किस उदाहरण तै उसका खुलासा करां? <sup>31</sup> वो राई के दाणै की ढाळ सै: जिब धरती म्ह बोया जावै सै तो धरती के सारे बीज्जां तै छोटटा होवै सै, <sup>32</sup> पर जिब बोया गया, तो जामके सारे सागपात तै बड़डा हो जावै सै, अर उसकी इतनी बड़डी डाळी लिकड़ै सै के अकास के पंछी उसकी छाया तळै बसेरा कर सकै सै।”

<sup>33</sup> यीशु उन ताहीं इस तरियां के घणे उदाहरण दे-देके उनकी समझके मुताबिक वचन सुणावै था, <sup>34</sup> अर इस तरियां की शिक्षा देण खात्तर वो उदाहरणां का ए इस्तमाल करया करदा; पर एक्ले म्ह वो अपने चेल्यां ताहीं सारी बाततां का मतलब बतावै था।

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ  
(ⓂⓂⓂⓂ 8:23-27; ⓂⓂⓂⓂ 8:22-25)

<sup>35</sup> उससे दिन जिब साँझ होई, तो यीशु नै चेल्यां तै कह्या, “आओ, हम समुन्दर के परली ओड़ चाल्लां।” <sup>36</sup> अर वे भीड़ नै छोड़के जिसा वो था, उसाए उस ताहीं किस्ती पै गेल्या ले चाल्ले; अर उसके गेल्या और भी किस्ती थी। <sup>37</sup> फेर बड़ीए आँधी आई, अर पाणी की झाल किस्ती के उरै ताहीं लागी के वा पाणी तै भरण नै होगी। <sup>38</sup> पर यीशु पाच्छले हिस्से म्ह गद्दी लगाई सोण लाग रह्या था। फेर उननै उस ताहीं जगाके उसतै कह्या, “हे गुरु, के तन्नै चिन्ता कोनी के हम डूबके मरण आळे सां?”

<sup>39</sup> फेर उसनै उठके आँधी ताहीं धमकाया, अर पाणी की झाल तै कह्या, “शांत रहै, थम ज्या।” अर आँधी धमगी अर पूरी तरियां शान्त छागी।

<sup>40</sup> उसनै उनतै कह्या, “थम क्यूँ डरो सों? के थमनै इब ताहीं बिश्वास कोनी?”‡

<sup>41</sup> वे घणे डरगे, अर आपस म्ह बोल्ले, “यो कौण सै के आँधी अर पाणी की झाल भी उसका हुकम मान्नै सै?”



27 वा बिरबान्नी यो सुणकै, यीशु माणसां नै ठीक करै सै भीड़ म्ह उसके पाच्छै, तै आई अर उसके लत्ते ताहीं छू लिया, 28 अर वा या भी कहवै थी, “जै मै उसके लत्ते नै छू ल्युंगी, तो ठीक हो जाऊंगी।” 29 अर जिब्बे उसका लहू बहणा बन्द हो गया, अर उसनै अपणे देह म्ह बेरा लागग्या के मै उस बीमारी तै चंगी होगी सू।

30 यीशु नै जिब्बे खुद तै बेरा पाटग्या के मेरै म्ह तै सामर्थ लिकड़ी सै, अर भीड़ कै पाच्छै, फिरकै बुझ्झया, “मेरे लत्ते किसनै छुए?”

31 उसके चेल्यां नै उसतै कह्या, “तू देख्लै सै के भीड़ तेरपे गिरण-पड़ण लागरी सै, अर तू पूच्छै सै के किसनै मेरै ताहीं छुया?”

32 फेर उसनै उस ताहीं देखण खात्तर जिसनै यो काम करया था, चोगरदेनै निगांह घुमाई। 33 फेर वा बिरबान्नी न्यु जाणकै के मेरी किसी भलाई होई सै, डरगी अर काम्बदी होई आई, अर उसके पायां म्ह पड़के उस ताहीं सारा हाल सच-सच कह दिया। 34 यीशु नै उसतै कह्या, “बेट्टी, तेरे विश्वास नै तेरे ताहीं ठीक करया सै, खुशी-खुशी जा, अर अपणी इस बीमारी तै ठीक रह।”†

35 यीशु न्यु कहवै था के आराधनालय कै सरदार याईर कै घर तै माणसां नै आकै कह्या, “तेरी छोरी तो मर ली सै, इब गुरु नै क्यातै काल करै सै?”

36 जो बात वे कहरे थे, उस ताहीं यीशु नै बेगौरी करकै, आराधनालय कै सरदार तै कह्या, “मतना डरै, सिर्फ विश्वास राख।”

37 अर उसनै पतरस अर याकूब अर उसके भाई यूहन्ना नै छोड़, किसे दुसरे ताहीं अपणे गेल्या आण ना दिया।

38 आराधनालय कै सरदार कै घर म्ह पोहचकै, उसनै माणसां ताहीं घणे रोन्दे अर किल्की मारदे देख्या। 39 फेर उसनै भीत्तर जाके उनतै कह्या, “थम क्यातै रोळा मचाओ अर रोओ सो, छोरी मरी कोनी, पर सौवै सै।” 40 वे उसका मजाक उड़ाण लागगे, पर उसनै सारया ताहीं बाहर लिकाड़के छोरी कै माँ-बाप अर अपणे चेल्यां कै गेल्या भीत्तर गया, जित्त छोरी पड़ी थी। 41 अर छोरी का हाथ पकड़के उसतै कह्या, “तलिता कूमी!” जिसका मतलब सै, “हे छोरी, मै तेरे तै कहूँ सू, उठ।” 42 अर वा छोरी जो बारहा साल की थी, जिब्बे उठकै चाल्लण-फिरण लागगी; अर इसपै माणस घणे हैरान होगे। 43 फेर उसनै उन ताहीं चेतावनी देकै हुकम दिया के इस बात का किसे नै भी बेरा ना पाटण दिया अर कह्या, “इसनै कुछ खाण नै द्यो।”

## 6

*Matthew 13:53-58; Matthew 4:16-30*

1 कफरनहम नगर तै लिकड़के यीशु अपणे नासरत नगर म्ह आया, अर उसके चेल्ले भी उसके पाच्छै गए। 2 आराम कै दिन वो आराधनालय म्ह उपदेश देण लागग्या, अर घणखरे माणसां नै सुणकै अचम्भा करया अर कहण लागगे, “इसनै इतनी बात कड़े तै आगी?” यो कौण सा ज्ञान सै जो उस ताहीं दिया होया सै? किस ढाळ के सामर्थ के काम उसके हाथ्यां तै दिक्खै सै? 3 के यो वोए खात्ती कोनी, जो मरियम का छोरा, अर याकूब, योसेस, यहूदा, अर शमौन का भाई सै? के उसकी सारी बेब्बे याड़े म्हारै बिचाळै कोनी रहून्दी? इस करकै उननै उसका विश्वास कोनी करा।

4 यीशु नै उनतै कह्या, “नबी का अपणे गाम, अपणे कुणवे, अर अपणे घर नै छोड़के और किते भी निरादर कोनी होन्दा।” 5 वो उड़े कोए चमत्कार के काम न्ही कर सक्या, सिर्फ थोड़े-से बिमारां पै हाथ धरकै उन ताहीं ठीक करया।

6 अर यीशु नै उनकै अविश्वास पै हैरानी होई अर चौगरदे के गाम्मां म्ह उपदेश सुणान्दा हांडया।

† 5:34 5:34 (लूका 8:48)



☞☞☞☞☞ ☞☞☞☞☞☞☞☞ ☞☞☞☞☞☞☞☞  
(☞☞☞☞☞ 10:5-15; ☞☞☞☞☞ 9:1-6)

7 यीशु ने बारहां चेल्यां ताहीं अपणे धोरै बुलाया अर उननै ओपरी आत्मायां पै हक दिया अर उननै दो-दो करके भेजण लागगया;।

8 उसनै चेल्यां ताहीं हुकम दिया, “रास्ते खात्तर लाट्टी नै छोड़ और कुछ ना लियो, ना तो रोट्टी, ना झोळी, ना बटुए म्ह पईसे, 9 जूत्ते तो पैहरियो पर पैहरण खात्तर दो कुड़ते ना लियो।” 10 अर यीशु नै चेल्यां ताहीं कह्या, “जित्त किते थम जिस घर म्ह जाओ, तो जिब ताहीं उडै तै बिदा ना होइयो तब तक उससे घर म्ह ठहरे रहो। 11 जिस जगहां के माणस थमनै न्ही अपणावे अर थारी न्ही सुणै, उडै तै चाल्दे-ए अपणे ताल्वां की धूळ झाड़ दियो के या उनकै बिरुध्द गवाही होवै।”

12 फेर चेल्यां नै जाके प्रचार करया के पाप करणा छोड़ द्यो, 13 अर घणीए ओपरी आत्मा ताहीं काढया, अर घणे बिमारां पै तेल मळ के उन ताहीं ठीक करया।

☞☞☞☞☞ ☞☞☞☞☞☞☞☞ ☞☞☞☞☞☞☞☞  
(☞☞☞☞☞ 14:1-12; ☞☞☞☞☞ 9:7-9)

14 राजा हेरोदेस नै भी यीशु का जिक्र सुण्या, क्यूँके उसका नाम फैलगया था, अर उसनै कह्या, के “यूहन्ना बपतिस्मा देण आळा मरया होया म्ह तै जिन्दा होया सै, इस्से करके उसतै ये सामर्थ के काम होवै सै।”

15 दुसरे माणसां नै कह्या, “यो एलिय्याह सै।” पर कुछ दुसरयां नै कह्या, “वो एक नबी सै पुराणे नबियां म्ह तै किसे कै बरगा।”

16 हेरोदेस नै न्यू सुणके कह्या, “जिस यूहन्ना का सिर मन्नै कटवाया था, वोए जिन्दा होया सै।”

17 हेरोदेस नै अपणे भाई फिलिप्पुस की घरआळी हेरोदियास के कारण, जिसतै उसनै ब्याह कर लिया था, माणसां ताहीं भेजके यूहन्ना ताहीं पकड़वाके जेळ म्ह गेर दिया था। 18 क्यूँके यूहन्ना नै हेरोदेस तै कह्या था, “अपणे भाई की घरआळी ताहीं राखणा मूसा के नियम-कायदा के मुताबिक तेरे खात्तर ठीक कोनी।”\* 19 इस करके हेरोदियास यूहन्ना तै बैर राख्या करै थी अर वा चाहवै थी के उसनै मरवा देवै, पर इसा हो न्ही सक्या, 20 क्यूँके हेरोदेस यूहन्ना नै धर्मी अर पवित्तर माणस जाणके उसतै डरै था, अर उसका बचाव करै था, अर उसकी बात सुणके घणा घबरावै था, फेर भी उसकी बातं नै आनन्द तै सुणै था।

21 आखिरकार एक इसा मौक्का आया, जिब हेरोदेस नै अपणे जन्म दिन पै अपणे प्रधानां, सेनापतियां, अर गलील के बड़े माणसां के खात्तर जीमणा करया। 22 तो हेरोदियास की बेट्टी भीत्तर आई, अर नाचके हेरोदेस ताहीं अर उसके गेल्या बैठण आळा ताहीं राज्जी करया। फेर राजा नै छोरी तै कह्या, “तू जो चाहवै मेरै तै माँग ले, मै तन्नै वोए दियूंगा।” 23 हेरोदेस नै कसम खाई, “मै अपना आध्धा राज्य तक जो कुछ तू मेरै तै माँगैगी मै तन्नै दियूंगा।”†

24 उसनै बाहरणै जाके अपनी माँ तै बुझया, “मै के माँगू?” वा बोल्ली, “यूहन्ना बपतिस्मा देण आळे का सिर।”

25 वा जिब्बे राजा धोरै भीत्तर आई अर उसतै विनती करी, “मै चाहूँ सूँ के तू इब्बे यूहन्ना बपतिस्मा देण आळे का सिर एक थाळ म्ह मन्नै माँगवा दे।”

26 फेर राजा घणा दुखी होया, पर अपनी कसम के कारण अर गेल्या बैठण आळा के कारण उस ताहीं टाळणा कोनी चाह्या। 27 आखर म्ह राजा नै जिब्बे एक सिपाही ताहीं हुकम देके भेज्या के उसका सिर काट ल्यावै। 28 उसनै जेळखान्ने म्ह जाके उसका सिर काटचा, अर एक थाळ म्ह धरके ल्याया अर छोरी ताहीं दिया, अर छोरी नै अपनी माँ तै दिया। 29 न्यू सुणके यूहन्ना के चेल्लें आए, अर उसकी लाश नै लेगे अर कब्र म्ह धर दी।

\* 6:18 6:18 (लैव्य-18:16, लैव्य-20:21) † 6:23 6:23 (एस्ते-5:3,6, एस्ते-7:2)

?????????? ?? ??????? ?? ???????????

(?????? 14:13-14; ????? 9:10)

30 चेल्लें बाहड्कै यीशु के धारे आय, जो कुछ उननै करया अर सिखाया था, सब कुछ उस ताहीं बता दिया।

31 यीशु नै चेल्यां तै कह्या, “आओ हम किसे एकान्त जगहां म्ह चालकै माडा आराम करां।” क्यूँके घणे माणस आवै-जावै थे, अर उननै खाण का मौक्का भी कोनी मिलै था।

32 ज्यांतै वे किस्ती पै चढ्कै सुनसान जगहां म्ह न्यारे चले गए।

?????? ????? ??????????? ??????? ???????

(?????? 14:15-21; ????? 9:11-17; ??? 6:1-14)

33 घणा नै यीशु अर उसके चेल्यां ताहीं जान्दे देखकै पिछ्छाण लिया, अर सारे नगरां तै कट्टे होकै उड़े पांए-पाँ भाज लिए अर उनतै पैहल्या जा पोहचे।

34 उसनै उतरकै बड्डी भीड़ देख्की, अर उनपै तरस खाया, क्यूँके वे उन भेडचा की तरियां थे, जिनका कोए रुखाळा ना हो; अर वो उननै घणीए बात सिखाण लागग्या।‡

35 जिव दिन घणा ढळग्या, तो उसके चेल्लें उसके धारे आकै कहण लागगे, “था सुनसान जगहां सै, अर दिन घणा ढळग्या सै।” 36 उननै बिदा करकै चौगरदेकै गाम्मां अर बस्तियां म्ह जाकै, अपने खाण खात्तर कुछ मोल लियावै।

37 यीशु नै जवाब दिया, “थमे उननै खाण नै द्यो।” चेल्यां नै उस ताहीं कह्या, “के हम दो सौ दीनार (200 दिन की मजदूरी) की रोट्टी मोल ल्यावां, अर उननै खुआवां?”

38 यीशु नै उन ताहीं कह्या, “जाके देख्खो थारे धारे कितनी रोट्टी सै?” उननै कह्या, “पाँच रोट्टी अर दो मच्छी भी।”

39 फेर यीशु नै उन ताहीं हुकम दिया के सारया नै हरी घास पै टोळ म्ह बिठा द्यो।

40 वे सौ-सौ अर पचास-पचास करकै टोळ म्ह बैठगे। 41 यीशु नै उन पाँच रोट्टी अर दो मच्छियाँ ताहीं लिया, अर सुर्ग के कान्ही लखाकै परमेसवर का धन्यवाद करया, अर रोट्टी तोड़-तोड़कै चेल्यां ताहीं देन्दा गया के वे माणसां ताहीं बाँडे, अर वे दो मच्छियाँ भी उन सारया म्ह बाँड दी।

42 सारे खाकै धापगे, 43 अर उननै टुकडचा अर मच्छियाँ तै भरी होई बारहा टोकरियाँ टाई। 44 जिन नै रोट्टी खाई, वे पाँच हजार आदमी थे।

?????? ?? ??????? ?? ???????

(?????? 14:22-33; ??? 6:15-21)

45 फेर यीशु नै जिब्बे अपने चेल्यां ताहीं किस्ती पै चढण के खात्तर मजबूर करया, ताके वे उसतै पैहल्या उस पार बैतसेदा नगर म्ह चले जावे, जिव तक के वो माणसां ताहीं बिदा करै। 46 चेल्यां नै बिदा करकै यीशु पहाड़ पै प्रार्थना करण खात्तर गया।

47 जिव साँझ होई, तो किस्ती समुन्दर के बिचाळै थी, अर यीशु एकला किनारे पै था। 48 जिव उसनै देख्या के वे किस्ती चलाणा म्ह घणी मेहनत करण लागरे सै, क्यूँके हवा उनके स्याम्ही की थी, तो सबरे तीन बजे के लोवै-धोवै यीशु समुन्दर पै चाल्दे होए उनके धारे आया; अर उनतै आगौ लिकड़ जाणा चाहवै था।

49 पर चेल्यां नै उस ताहीं समुन्दर पै चाल्दे देखकै समझया के भूत सै, अर किल्की मारण लागगे; 50 क्यूँके सारे उसनै देखकै घबरागे थे। पर उसनै जिब्बे उनतै बात करी अर कह्या, “होसला राक्खो, मै सूं; डरो मतना!” 51 फेर वो उनकै धारे किस्ती पै आया, अर हवा धमगी: अर वे घणा अचम्भा करण लागगे। 52 चेल्लें उस रोट्टी की घटना के बारै म्ह कोनी समझै थे, क्यूँके उनके दिल कठोर होरे थे।

?????????????? ??????????????? ??????????? ???????

(?????? 14:34-36)

‡ 6:34 6:34 (2 इति-18:16, 1 रजा-22:17)

53 वे गलील समुन्दर पार करके गन्नेसरत परदेस म्ह पोहचे, अर किस्ती घाट पै लाई। 54 जिब यीशु किस्ती पै तै उतरया तो माणसां नै उस ताहीं पिच्छाण लिया, 55 लोवै-धोवै कै सारे नगर म्ह भाज्जे-भाज्जे, अर बिमारां नै खाट्टां पै लादकै, जित्त-जित्त खबर मिली के यीशु ओडै सै, उडै-उडै लिए हान्डे। 56 अर जित्त किते भी वो गाम्मां, नगरां, या बस्तियाँ म्ह जावै था, माणस बिमारां नै बजारां म्ह धरकै उसतै बिनती करै थे के वो उननै अपने लत्ते कै पल्ले तै ए छू लेण दे: अर जितने उसनै छुवै थे, सारे ठीक हो जावै थे।

## 7

~~~~~  
 (~~~~~ 15:1-9)

1 एक दिन कुछ फरीसी अर शास्त्री जो यरुशलेम नगर तै आए थे, यीशु कै धोरै कट्टे होए, 2 अर उननै उसके कुछ चेल्यां ताहीं बिना सुच्वे होए यानिके बिना हाथ धोए रोट्टी खांदे देख्या। 3 क्यूँके फरीसी अर सारे यहूदी, बडे बुजुगां के रीति-रिवाजां पै चाल्लै सै अर जिब ताहीं ठीक ढाळ हाथ न्ही धो लेंदे जद ताहीं कोनी खान्दे। 4 अर बजार तै आकै, जिब तक के अपने हाथ न्ही धो लेते, जद ताहीं रोट्टी कोनी खान्दे; और घणीए बात सै, जो उनके रीति-रिवाजां का हिस्सा सै, जिस तरियां कटोरे, अर लोट्टे, अर ताम्बे के बरतनां ताहीं धोणा मान्जणा।

5 इस करके उन फरीसियां अर शास्त्रियां नै यीशु तै बुझ्झया, “तेरे चेल्लें क्यातै बडे बुजुगां के रीति-रिवाजां पै कोनी चाल्दे, अर बिना हाथ धोए रोट्टी खावै सै?”

6 यीशु नै फरीसियां अर शास्त्रियां ताहीं कह्या, “यशायाह नबी नै थम कपटियां कै बारे म्ह घणी ठीक भविष्यवाणी करी; जिसा लिख्या सै: ये माणस होट्टां तै तो मेरा आदर करै सै पर उनका मन मेरै तै दूर रहवै सै।\* ”

7 वे खामखां मेरी पूजा करै सै,

क्यूँके माणसां कै हुकमां नै धर्म का उपदेश करके सिखावै सै।†

8 “क्यूँके थम परमेसवर कै हुकम नै टाळकै माणसां कै रिवाजां ताहीं मान्नों सो।”

9 उसनै उन ताहीं कह्या, “थम अपने रिवाजां नै मानण कै खात्तर परमेसवर का हुकम कितनी बढ़िया ढाळ टाळ्यो सो। 10 क्यूँके मूसा नबी नै कह्या सै, ‘अपणे माँ-बाप की इज्जत कर’ अर ‘जो कोए अपने माँ-बाप नै भुंदा बोल्लै, वो जरुर मारया जावै।’‡ 11 पर थम कहो सो के जै कोए अपने माँ-बाप तै कहवै, ‘जो कुछ मननै थारे ताहीं अपनी सम्पत्ति म्ह तै देणा था, वो मननै परमेसवर ताहीं अर्पण कर दिया।’ 12 तो थम उननै उसके माँ बाप की कुछ भी सेवा करण न्ही देन्दे। 13 इस तरियां थम अपनी रीत-रिवाजां तै, जिन ताहीं थमनै ठहराया सै, परमेसवर का वचन टाळ्यो सो; अर इसे-इसे घणखरे काम करो सो।”

~~~~~  
 (~~~~~ 15:10-20)

14 फेर यीशु नै माणसां ताहीं अपने धोरै बुलाकै कह्या, “थम सारे मेरी सुणो, अर समझो। 15 इसी कोए चीज कोनी जो माणस म्ह बाहर तै बड्के उस ताहीं अशुद्ध करै; पर जो चीज माणस कै भीत्तर तै लिंकडै सै, वैए उस ताहीं अशुद्ध करै सै। 16 (जै किसे के कान हो तो वो ध्यान तै सुण ले।)”

17 जिब यीशु भीड़ नै छोडकै घरां आया, तो उसके चेल्यां नै इस उदाहरण कै बारे म्ह उसतै बुझ्झया। 18 यीशु नै उनतै कह्या, “के थम भी इसे नासमझ सो? के थमनै न्ही बेरा के जो चीज बाहर तै माणस कै भीत्तर जावै सै वा उसनै अशुद्ध कोनी कर सकदी? 19 क्यूँके वा उसके मन म्ह न्ही, पर

\* 7:6 7:6 (यशा-29:13) † 7:7 7:7 (यशा-29:13) ‡ 7:10 7:10 (निगं-20:12, व्य-5:16)

पेट म्ह जावै सै, अर संडास म्ह लिकड़ जावै सै?" न्यू कहकै उसनै सारी खाणे की चिज्जां ताहीं शुद्ध ठहराया।

20 फेर उसनै कह्या, "जो माणस म्ह तै लिकड़ै सै, वोए माणस नै अशुद्ध करै सै। 21 क्यूँके भीत्तर तै, यानिके माणस के मन तै, भुन्डे-भुन्डे ख्याल, जारी, चोरी, हत्या, विगान्नी बिरबान्नी के धोरे जाणा, 22 लोभ, दुष्टता, छळ, लुचपण, जलन, बुराई, घमण्ड, अर बेअक्ली लिकड़ै सै। 23 ये सारी भुंडी बात भीत्तर तै ए लिकड़ै सै अर माणस नै अशुद्ध करै सै।"

\*\*\*\*\*  
(\*\*\*\*\* 15:21-28)

24 फेर यीशु ओड़ै तै उठके सूर अर सैदा के परदेस म्ह आया; जित्त एक घर म्ह गया अर वो चाहवै था ताके किसे नै उनके बारे म्ह बेरा न्ही लाग्गै, पर वो लुहक न्ही सक्या। 25 अर जिब्बे एक बिरबान्नी जिसकी छोट्टी छोरी म्ह ओपरी आत्मा थी, उसका जिक्र सुणके आई, अर उसके पायां म्ह पड़गी। 26 वा सुरुफिनिकी परदेस के यूनानी जात की थी। बिरबान्नी नै उसतै बिनती करी के मेरी छोरी म्ह तै ओपरी आत्मा लिकाड़ दे।

27 उसनै उसतै कह्या, "पैहल्या मेरे बच्चें जो यहूदी सै उननै खा लेण दे, क्यूँके बाळकां की रोट्टी लेके कुत्याँ के आगै गेरणा ठीक कोनी।" (यहूदी दुसरी जात के माणसां नै कुत्याँ के समान समझै थे)

28 उसनै उस ताहीं जवाब दिया, "साच्ची सै प्रभु; पर कुत्ते भी तो मेज के तळै बाळकां की रोट्टी के टुकड़े खा लेंवें सै।"

29 यीशु नै उसतै कह्या, "तेरी बात सुणके तेरे विश्वास का बेरा पाट्टे सै इस कारण चली जा; ओपरी आत्मा तेरी छोरी म्ह तै लिकड़गी सै।" 30 उसनै अपणे घरां ओके देख्या के छोरी खाट पै पड़ी सै, अर ओपरी आत्मा लिकड़गी सै।

\*\*\*\*\*

31 फेर यीशु सूर अर सैदा के परदेसां तै लिकड़के दिकापुलिस नगर तै होंदा होड़ गलील समुन्दर पै पोंहच्या। 32 तो आदमियाँ नै एक बैहरै ताहीं जो हाकळा भी था, उसके धोरे ओके उसतै बिनती करी के अपना हाथ उसपै धरै।

33 फेर यीशु उसनै भीड़ तै न्यारा लेग्या, अपनी आन्नाळी उसके कान्ना म्ह घाल्नी, अर अपनी आन्नाळी पै थूकके उसकी जीभ ताहीं छुया; 34 अर सुर्ग कान्ही देखके आह भरी, अर उसतै कह्या, "इप्फत्तह!" यानिके "खुल ज्या!" 35 वो सही तरियां सुणण, अर वो सुथरी-ढाळ बोल्लण लाग्या।

36 फेर उसनै उन ताहीं चिताया कह्या के किसे तै ना कहियो; पर जितना यीशु नै उन ताहीं बताया उतनाए वे और प्रचार करण लागगे। 37 वे घणे हैरान होके कहण लागगे, "उसनै जो कुछ करया सारा ठीक करया सै; वो बैहरया नै सुणण की, गूँगा नै बोल्लण की ताकत देवै सै।"

## 8

\*\*\*\*\*  
(\*\*\*\*\* 15:32-39)

1 एक दिन जिव भीड़ कट्टी होई, अर उनके धोरे इब कुछ खाण नै कोनी बचा था, तो यीशु नै अपणे चेल्यां ताहीं धोरे बुलाके उनतै कह्या, 2 "मन्ने इस भीड़ पै तरस आवे सै, क्यूँके ये तीन दिनां तै बराबर मेरै गेल्या सै, अर इब उनके धोरे कुछ खाण नै भी कोनी बचा। 3 जे मै उननै भूख्खा घरां भेज द्यु, तो राह म्ह थक हार के बेहोस हो ज्यांगे; क्यूँके इन म्ह तै कई लोग दूर तै आरे सै।"

4 उसके चेल्यां नै जवाब दिया, "उरै जंगल-बियावान म्ह इतनी रोट्टी कोए कित तै ल्यावै के वे छिक्क ज्या?"

5 यीशु नै उनतै बुझ्झया, "थारे धोरे कितनी रोट्टी सै?" उननै कह्या, "सात।"

6 फेर उसनै माणसां ताहीं धरती पै बैठण का हुकम दिया, अर वे सात रोट्टी ली अर परमेसवर का धन्यवाद करके तोड़ी, अर अपणे चेल्यां नै देन्दा गया, अर उननै वे रोटी माणसां के आगुँ परोस दी। 7 उनके धोरै माड़ी-सी छोट्टी मच्छियाँ भी थी; उसनै परमेसवर का धन्यवाद करके उन ताहीं माणसां के आगुँ धरण का हुकम दिया। 8 वे खाके छिकगे अर चेल्यां नै बचे होइ टुकड्या के सात टोकरे भरके टाए। 9 अर सारे लोग चार हजार के करीबन थे; फेर यीशु नै उन ताहीं भेज दिया, 10 अर वो जिब्बे अपणे चेल्यां के गेल्या किस्ती म्ह चढके दलमनूता परदेस नै चल्या गया।

XXXXXXXXXX XX XXXXXX XXXXXXXXXXX XXXXXX XX XXXXX  
(16:1-4)

11 जब फरीसियाँ नै देख्या के यीशु दलमनूता परदेस म्ह आ गया तो वे उसतै बहस करण लागगे, अर यो परखण खात्तर के परमेसवर नै यीशु ताहीं भेज्या सै, उसतै कोए सुर्गीय चिन्ह-चमत्कार की माँग करी। 12 यीशु नै अपणी आत्मा म्ह आह भरके कह्या, “इस बखत के माणस क्यातै चिन्ह-चमत्कार टोह्णै सै? मै थमनै साच्ची-साच कहूँ सूँ, के इस बखत के माणसां नै कोए चिन्ह-चमत्कार कोनी दिया जावैगा।” 13 अर वो उननै छोड़के फेर किस्ती पै चढग्या अर गलील समुन्दर के परली ओड़ चल्या गया।

XXXXXXXXXX XX XXXXXXXXXXX XX XXXXX  
(XXXXXXXX 16:5-12)

14 चेल्ले रोट्टी लेणा भूलगे थे, पर किस्ती म्ह उनके धोरै सिर्फ एक-ए रोट्टी थी। 15 यीशु नै उनकी कपट रूपी शिक्षा के बारे म्ह चिताया, “लखाओ, फरीसियाँ अर हेरोदेस के खमीर तै चौकन्ने रहो।”

16 वे आप्स म्ह विचार करके कहण लागगे, “म्हारै धोरै तो रोट्टी सै कोनी।”

17 न्यू जाणके यीशु नै उनतै कह्या, “थम क्यातै आप्स म्ह यो विचार करे सो के म्हारै धोरै रोट्टी कोनी? के इब ताहीं थम न्ही जाणे अर न्ही समझे? के थारा मन कठोर होग्या सै? 18 के आँख होते होए भी कोनी देखदे, अर कान होते होए भी कोनी सुणदे? के थारे याद कोनी। 19 के जिब मन्नै पाँच हजार माणसां के खात्तर पाँच रोट्टी तोड़ी थी तो थमनै बचे होइ टुकड्या के कितने टोकरे भरके टाए थे, उननै उसतै कह्या, बारहा टोकरे।”

20 “अर जिब चार हजार माणसां के खात्तर सात रोट्टी थी तो थमनै बचे होइ टुकड्या के कितने टोकरे भरके टाए थे?” उननै उसतै कह्या, “सात टोकरे।”

21 उसनै उनतै कह्या, “के थम इब ताहीं न्ही समझे?”

XXXXXXXXXX XX XX XXXXXX XXXXXX XXX XXXXX

22 यीशु अर उसके चेल्ले बेतसेदा कस्बे म्ह आए; अर आदमी एक आन्धे नै उसके धोरै लियाये अर उसतै बिनती करी के उसने छुवै। 23 वो उस आन्धे का हाथ पकड़के गाम तै बाहरणै लेग्या, अर अपणी आंगळी पै थूकके उसकी आँखां पै हाथ धरते होए उसतै बुझ्या, “के तू कुछ देखे सै?”

24 उसनै निगाह ठाके कह्या, “मै माणसां नै देखूँ सूँ; वे मन्नै चाल्दे होए दरखां की ढाळ दिक्खे सै।”

25 फेर उसनै दुबारा उसकी आँखां पै हाथ धरे, अर आन्धे नै ध्यान तै देख्या। वो ठीक होग्या, अर सारा कुछ सुथरी-ढाळ देखण लाग्या। 26 उसनै उस ताहीं न्यू कहके घरां भेज्या, “इस गाम म्ह भी ना जाईये।”

XXXXX XXX XX XXXX XXX XXXX XX XXXXXXXXXXXXXXX  
(XXXXXXXX 16:21-23; XXXXX 9:22)

27 यीशु अर उसके चेल्ले कैस्रिया फिलिप्पी परदेस के गाम्मां म्ह चले गये। राह म्ह उसने अपणे चेल्यां तै बुझ्या, “माणस मन्ने के कहवे सै?”

28 उननै जवाब दिया, “यूहन्ना बपतिस्मा देण आळा, पर कोए एलिय्याह अर कोए-कोए तो उसने पुराणे नबियाँ म्ह तै एक सै भी कहवे सै।”

29 उसने उनतै बुद्धझया, “पर थम मनै के कहो सो?” पतरस नै जवाब दिया, “तू मसीह सै।”

30 फेर उसने उन ताहीं समझाके कह्या के मेरै बारै म्ह यो किसे तै ना कहियो।

**\*\*\*\*\***

31 फेर यीशु चेल्यां नै सिखाण लाग्या के माणस के बेटेट (उसने अपणे बोरें म्ह कह्या था) खात्तर जरूरी सै के वो घणा दुख ठावै, यहूदी अगुवें, प्रधान याजकां, अर शास्त्री उसने तुच्छ समझके मार देवें, अर वो तीसरे दिन म्ह जिन्दा हो जावैगा। 32 उसने या बात उनतै साफ-साफ कह दी। इसपै पतरस उसने न्यारा ले जाके झिड़कण लाग्या, क्यूँके उसने सोच्या के मसीह मर न्ही सकदा।

33 पर यीशु नै पलटके अपणे चेल्यां कान्ही देख्या, अर पतरस तै झिड़कके कह्या, “हे शैतान, मेरै स्याम्ही तै दूर हो; क्यूँके तू परमेसवर की बात्तां पै न्ही, पर माणसां की बात्तां पै मन लगावै सै।”

**\*\*\*\*\***

(**\*\*\*\*\*** 16:24-28; **\*\*\*\*\*** 9:23-27)

34 यीशु नै भीड़ ताहीं अपणे चेल्यां सुधा बुलाके कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का क्रूस ठाके, मेरै पाच्छै हो लेवै। 35 क्यूँके जो कोए अपणी जान बचाणा चाहवै वो अनन्त काल खात्तर गवावैगा, पर जो कोए मेरै अर सुसमाचार खात्तर अपणी जान गवावैगा, वो उसने अनन्त काल खात्तर बचावैगा। 36 जे माणस सारी दुनिया की चिज्जां नै पा लेवै अर फेर भी अनन्त जीवन नै न्ही पा सकै, तो उसतै के फैयदा होगा? 37 कोए भी माणस अनन्त जीवन की तुलना दुनिया की किसी भी चीज तै न्ही कर सकता? 38 जो कोए इस जार अर पापी युग के बिचाळै मेरै तै अर मेरे वचन तै इन्कार करैगा, तो मै माणस का बेटटा भी जिब पवित्र सुर्गदूतां के गेल्या अपणे पिता की महिमा सुधा आऊंगा, तो मै भी उसतै इन्कार करैगा।”

## 9

**\*\*\*\*\***

(**\*\*\*\*\*** 17:1-13; **\*\*\*\*\*** 9:28-36)

1 यीशु नै उनतै कह्या, “मै थारे तै साच्ची कहूँ सूं के जो उरै खड़े सै, उन म्ह तै कई इसे माणस सै, के जिब ताहीं परमेसवर के राज्य नै सामर्थ सुधा आन्दा होया न्ही देख लेवेंगे, जद तक न्ही मरेंगे।”

2 छः दिनां पाच्छै यीशु नै पतरस अर याकूब अर यूहन्ना ताहीं गेल्या लिया, अर एकान्त म्ह किसे ऊँचे पहाड़ पै लेग्या। ओड़ै उनके स्याम्ही उसका रूप बदल गया, 3 अर उसके लत्ते इसे चमकण लागगे उरै ताहीं जमा धोळाधप होया, के धरती पै कोए धोब्बी भी उसा धोळा न्ही लिकाड़ सकदा।

4 अर उननै मूसा नबी के गेल्या एलिय्याह नबी दिख्या; वे यीशु के गेल्या बात करै थे।

5 इसपै पतरस नै यीशु तै कह्या, “हे गुरु, म्हारा उरै रहणा ठीक सै: इस कारके हम तीन मण्डप बणावा; एक तेरे खात्तर, एक मूसा नबी खात्तर, एक एलिय्याह नबी खात्तर।” 6 क्यूँके उसने कोनी बेरा था, के वो के जवाब देवै, ज्यांतै के वे घणे डरगे थे।

7 फेर एक बादळ उनपै छाग्या, अर उस बादळ म्ह तै परमेसवर नै कह्या, “थो मेरा प्यारा बेटटा सै, इसकी सुणो।”\*

8 फेर उननै चाणचक चौगरदेके निगांह घुमाई, अर यीशु नै छोड़ अपणे गेल्या और किसे ताहीं कोनी देख्या।

9 पहाड़ तै उतरदी आणी यीशु नै उन ताहीं हुकम दिया के जिब ताहीं मै माणस का बेटटा मरे होया म्ह तै जिन्दा न्ही हो जाऊंगा, तब तक जो कुछ थमनै देख्या सै वो किसे तै ना कहियो। 10 चेल्यां नै या बात अपणे मन म्ह ए राक्खी, अर आप्स म्ह बहस करण लागगे, के “मरे होया म्ह तै जी उठण का के मतलब हो सकै सै?”

11 अर उननै उसतै बुद्धझया, “शास्त्री क्यांतै कहवै सै के एलिय्याह नबी का पैहल्या आणा जरूरी सै?”

\* 9:7 9:7 (2 पत-1:17, भज-2:7)

12 यीशु नै उन ताहीं जवाब दिया, “थो सच सै एलिय्याह नबी पैहल्या आकै सारा कुछ सुधारेगा, पर मेरे बारे म्ह पवित्र ग्रन्थ म्ह यो क्यांतै लिख्या सै के वो घणा दुख ठावेगा, अर तुच्छ गिण्या जावेगा? 13 पर मै थमने कहूँ सूं के एलिय्याह नबी तो (जो यूहन्ना सै) आ लिया, अर जिसा के उसकै बारे म्ह पवित्र ग्रन्थ म्ह लिख्या सै, उननै जो कुछ चाह्या उसकै गेल्या करया।”

ⓂⓂⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂ  
(ⓂⓂⓂⓂ 17:14-21; ⓂⓂⓂⓂ 9:37-43)

14 यीशु अर उसके तीन चेल्लेँ दुसरयां चेल्यां के धोरे आये, तो देख्या के उनकै चौगरदे नै घणी भीड़ लागरी सै अर शास्त्री उनकै गेल्या बहस करे सै। 15 यीशु ताहीं देखदे ए सारे घणे हैरान होण लागे, अर उननै यीशु कान्ही भाजकै उसतै नमस्कार करया।

16 यीशु नै उनतै बुद्धया, “थम इनतै के बहस करे सो?”

17 भीड़ म्ह तै एक नै उसतै जवाब दिया, “हे गुरु, मै अपणे बेट्टे ताहीं जिसम्ह ओपरी आत्मा सै, जो उसनै बोल्लण कोनी देती। मै उस ताहीं तेरे धोरे ल्याया था। 18 जित्त किते ओपरी आत्मा उसने पकड़े सै, उडैए पटक देवे सै: अर वो मुँह म्ह तै झाग भर लावे सै, अर दाँत पिसदा, अर सुखदा जावे सै। मन्ने तेरे चेल्यां तै कह्या के वे ओपरी आत्मा नै काढ देवे, पर वे काढ न्ही सके।”

19 न्यू सुणकै यीशु नै उनतै जवाब देकै कह्या, “हे अविश्वासी माणसों, मै कद ताहीं थारे गेल्या रहूँगा? अर कद ताहीं थारी सहूँगा? बाळक नै मेरे धोरे ल्याओ।”

20 फेर वे बाळक नै यीशु के धोरे लियाये: अर जिब ओपरी आत्मा नै यीशु ताहीं देख्या, तो उस ओपरी आत्मा नै जिब्बे उस ताहीं मरोडचा, अर वो धरती पै पड़गया, अर मुँह तै झाग बगान्दे होए लोट्टण लागया।

21 यीशु नै उसके पिता तै बुद्धया, “इसकी या हालत कद तै सै?” उसने कह्या, “बाळकपण तै। 22 उसने इस ताहीं नाश करण खात्तर कदे आग अर कदे पाणी म्ह गेरया, पर जै तू कुछ कर सकै, तो म्हारे पै तरस खाकै म्हारा भला कर।”

23 यीशु नै उसतै कह्या, “था के बात होई! जै तू कर सकै सै? विश्वास करण आळा खात्तर सारा कुछ हो सके सै।”

24 बाळक के पिता नै जिब्बे जोर तै कह्या, “हे प्रभु, मै विश्वास करूँ सूँ, मेरे अविश्वास का उपाय कर।”

25 जिब यीशु नै देख्या के माणस भाजकै भीड़ लावे सै, तो उस ओपरी आत्मा ताहीं न्यू कहकै धमकाया, “हे गूँगी अर बैहरी करण आळी ओपरी आत्मा, मै तन्नै हुकम दियुँ सूँ, उस म्ह तै लिकड़ आ, अर उस म्ह फेर कदे ना बड़ीये।”

26 फेर वा किल्की मारकै अर उस ताहीं घणा मरोडकै, लिकड़ आई; अर बाळक मरया होया-सा होगया, उरै ताहीं के घणे आदमी कहण लागगे के वो मरगया। 27 पर यीशु नै उसका हाथ पकड़कै उस ताहीं ठाया, अर वो खडचा होगया।

28 जिब वो घरां आया, तो उसके चेल्यां नै एकले म्ह उसतै बुद्धया, “हम उस ताहीं क्यांतै न्ही काढ सके?”

29 उसने उनतै कह्या, “था जात, बिना प्रार्थना किसे और उपाय तै कोनी लिकड़ सकदी।”

ⓂⓂⓂⓂ ⓂⓂ ⓂⓂ ⓂⓂ ⓂⓂ ⓂⓂ ⓂⓂ ⓂⓂ ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂ 17:22-23; ⓂⓂⓂⓂ 9:43-45)

30 फेर यीशु अर उसके चेल्यां नै ओडै तै लिकड़कै, गलील परदेस का राह लिया। यीशु न्ही चाहवै था के कोए उननै जाणै, क्यूँके वो अपणे चेल्यां ताहीं सिखाणा चाहवै था 31 यीशु उपदेश देन्दा अर अपणे बारे म्ह चेल्यां तै कहवै था, मै “माणस का बेट्टा माणसां के हाथ्यां म्ह पकड़वाया जाऊँगा, अर वे मन्ने मार देवेंगे, अर मै मरण के तीसरे दिन जिन्दा हो जाऊँगा।” 32 पर या बात उनकी समझ म्ह कोनी आई, अर वे उसतै बुद्धया तै डरे थे।

ⓂⓂⓂⓂ ⓂⓂ ⓂⓂⓂⓂⓂ ⓂⓂⓂ?

(ⓂⓂⓂⓂⓂ 18:1-5; ⓂⓂⓂⓂⓂ 9:46-48)

33 यीशु अर उसके चेल्ले कफरनहूम कस्बे म्ह आये; अर घर म्ह आके उसने चेल्यां तै बुद्ध्याया, “राह म्ह थम किस बात पै बहस करे थे?” 34 वे बोल-बाल्ले रहे, क्यूँके राह म्ह उननै आप्पस म्ह या बहस करी थी के म्हारै म्ह तै बड्डा कौण सै।

35 फेर यीशु नै बैठके बारहा चेल्यां ताहीं बुलाया अर उनतै कह्या, “जै कोए बड्डा होणा चाहवै, तो सारया तै छोटा अर सारया का सेवक वणे।”

36 अर उसनै एक बाळक लेके उनकै बिचाळै खड्या करया अर उस ताहीं गोद्दी म्ह लेके उन ताहीं कह्या, 37 “जो कोए मेरै नाम तै इसे बाळकां म्ह तै किसे एक नै भी अपणावै सै, वो मन्नै अपणावै सै; अर जो कोए मन्नै अपणावै सै, वो मन्नै न्ही, बल्के मेरै भेजण आळे नै अपणावै सै।”

ⓂⓂ ⓂⓂⓂⓂⓂ ⓂⓂⓂ ⓂⓂⓂⓂ, ⓂⓂ ⓂⓂⓂⓂ ⓂⓂⓂ ⓂⓂ

(ⓂⓂⓂⓂⓂ 9:49-50)

38 यूहन्ना नै यीशु ताहीं कह्या, “हे गुरु, हमनै एक माणस ताहीं तेरे नाम तै ओपरी आत्मा नै लिकाइ दे देख्या अर हम उसनै मना करण लागगे, क्यूँके वो म्हारी तरियां तेरा चेल्ला न्ही था।”

39 उसनै कह्या, “उस ताहीं मना मत करो; क्यूँके इसा कोए न्ही जो मेरै नाम तै अदभुत काम करै, अर दुसरे पल मेरी बुराई करै 40 क्यूँके जो म्हारै बिरोध म्ह न्ही, वो म्हारै कान्ही सै। 41 जै कोए एक कटोरा पाणी भी थमनै ज्यांतै प्यावै के थम मसीह के सो तो मै थमनै सच कहूँ सूँ के वो अपना ईनाम किसे तरियां भी न्ही खोवैगा।”

ⓂⓂⓂⓂⓂ ⓂⓂ ⓂⓂⓂⓂ ⓂⓂⓂ

(ⓂⓂⓂⓂⓂ 18:6-9; ⓂⓂⓂⓂⓂ 17:1-2)

42 पर जो कोए इन छोटे बाळकां के समान जो मेरै पै विश्वास करै सै, किसे तै भी पाप करवावे तो उसकै खात्तर भला योए सै के एक बड्डा चाक्की का पाट उसकै गळ म्ह लटकाया जावै अर वो समुंदर म्ह गेरया जावै। 43 जै तेरा हाथ तेरे तै पाप करवावे तो उसनै काट दे। टुंडा होके अनन्त जीवन म्ह बड्डा तेरे खात्तर भला सै इसके बजाये के दो हाथ रहंदे होए नरक की आग म्ह गेरया जावै जो कदे न्ही बुझै। 44 (जडै उनका कीड़ा कोनी मरदा अर आग कोनी बुझदी।) 45 जै तेरा पैर तेरे तै पाप करवावे तो उसनै काट दे। लंगड़ा होके अनन्त जीवन म्ह बड्डा तेरे खात्तर भला सै इसके बजाये के दो पैर रहंदे होए नरक की आग म्ह गेरया जावै। 46 (जडै उनका कीड़ा कोनी मरदा अर आग कोनी बुझदी।) 47 जै तेरी आँख तेरे तै पाप करवावे तो उसनै लिकाइ दे। काणा होके परमेसवर के राज्य म्ह बड्डा तेरे खात्तर भला सै के दो आँख रहंदे होए तू नरक म्ह गेरया जावै। 48 “जडै उनका कीड़ा कोनी मरदा अर आग कोनी बुझदी।”

49 हरेक माणस आग तै शुद्ध करया जावैगा, जिस तरियां बलिदान नून तै शुद्ध करया जावैगा।

50 “नून एक जरूरत की चीज सै, पर जै नून का सुवाद जान्दा रहवै तो उसनै किस तरियां नमकीन करोगे? अपणे म्ह नून जिसा गुण राखो, अर आप्पस म्ह मेळ-मिलाप तै रहो।”

## 10

ⓂⓂⓂⓂ ⓂⓂ ⓂⓂⓂⓂ ⓂⓂⓂ ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 19:1-12; ⓂⓂⓂⓂⓂ 16:18)

1 यीशु ओडे तै उठके यहूदिया नगर की सीमा नै पार करके, यरदन नदी के परली ओड़ आया। भीड़ उसके धौरे कट्टी होगयी, अर अपणी रीत के मुताबिक उननै दुबारे उपदेश देण लागया।

2 फेर फरीसियां नै यीशु के धौरे आके उस ताहीं परखण खात्तर उसतै बुद्ध्याया, “के यो ठीक सै के माणस अपणी घरआळी नै छोड्डे?”

3 यीशु नै उनतै पूछ्याया, “मूसा नबी नै थारे ताहीं के हुकम दिया सै?”

4 उननै कह्या, “मूसा नबी नै तो तलाकनामा देके अर छोड़ण का हुकम दिया सै।”



5 यीशु नै उनतै कह्या, “थारे मन की कठोरता कै कारण उसने थारे खात्तर यो हुकम लिख्या ।”

6 “पर सृष्टि की शुरुआत तै परमेसवर नै नर अर नारी करकै उन ताहीं बणाया सै । 7 इस कारण माणस अपणे माँ-बाप तै न्यारा होकै अपनी घरआळी गेल्या रहवैगा, 8 अर वे दोन्नु कट्टे रहवैगे; ज्यातै के वे इब दो न्ही पर एक तन सै । 9 इस करकै जिस ताहीं परमेसवर नै जोड्या सै उस ताहीं माणस न्यारा ना करै ।”

10 जब वे दोबारा घरां आये, तो चेल्यां नै तलाक कै बोरें म्ह उसतै फेर बुड्झया । 11 यीशु नै उनतै कह्या, “जो कोए अपनी घरआळी नै छोड़कै दुसरी तै ब्याह करै तो वो उस पैहल्डी कै विरोध म्ह जारी करै सै; 12 अर जै घरआळी अपणे धणी नै छोड़कै दुसरे तै ब्याह करै तो वा जारी करै सै ।”

⚔⚔⚔⚔⚔ ⚔⚔⚔⚔⚔ ⚔⚔⚔⚔⚔⚔⚔

(⚔⚔⚔⚔⚔ 19:13-15; ⚔⚔⚔⚔⚔ 18:15-17)

13 फेर माणस अपणे बाळकां नै उसके धौरें ल्याण लागगे के वो उनपै हाथ धरै, पर चेल्यां नै उन ताहीं धमकाया । 14 यीशु नै न्यु देख छो म्ह होकै कह्या, “बाळकां नै मेरें धौरें आण द्यो अर उननै मना मतना करो, क्यूँके परमेसवर का राज्य बाळकां के समान सै । 15 मै थमनै सच कहूँ सूँ के जो कोए परमेसवर के राज्य नै बाळक की तरियां न्ही अपनावै, वो उस म्ह कदे न्ही बडण पावैगा ।” 16 अर उसनै उन ताहीं गोदी म्ह लिया, अर उनपै हाथ धरकै उन ताहीं आशीर्वाद दिया ।

⚔⚔⚔ ⚔⚔⚔⚔ ⚔⚔ ⚔⚔⚔⚔⚔⚔ ⚔⚔⚔⚔

(⚔⚔⚔⚔⚔ 19:16-30; ⚔⚔⚔⚔⚔ 18:18-30)

17 जब यीशु अर उसके चेल्लें यरुशलम की ओड़ जाण लागरे थे, तो एक माणस उसके धौरें भाज्दा होया आया, अर उसके आगै घुटने टेक कै उसतै बुड्झया, “हे उत्तम गुरु, अनन्त जीवन का हकदार होण खात्तर मै के करूँ?”

18 यीशु नै उसतै कह्या, “तू मन्नै उत्तम क्यातै कहवै सै? परमेसवर नै छोड़कै कोए उत्तम कोनी ।

19 तन्नै हुकमां का तो बेराए सै: खून न्ही करणा, जारी न्ही करणा, चोरी न्ही करणा, झूट्टी गवाही न्ही देणा, छळ न्ही करणा, अपणे माँ-बाप का आदर करणा ।”\*

20 उसने यीशु तै कह्या, “हे गुरु, इन सारया नै मै बाळकपण तै मानता आऊँ सूँ ।”

21 यीशु नै उसपै निगांह करके उसतै प्यार करया, अर उसतै कह्या, “तेरे म्ह एक बात की कमी सै । जा, जो कुछ तेरा सै उसने बेचकै कंगालां ताहीं दे, अर तन्नै सुगं म्ह धन मिलेगा, अर आकै मेरा चेल्ला बणण खात्तर मेरै पाच्छै हो ले ।”

22 इस बात तै उसके मुँह पै उदासी छागयी, अर वो दुखी होंदा होया चल्या गया, क्यूँके वो घणा साहूकार था ।

23 यीशु नै चौगरदेके देखकै अपणे चेल्यां तै कह्या, “साहूकारां का परमेसवर के राज्य म्ह दाखल होणा कितना ओक्खा सै ।”

24 चेल्लें उसकी बात तै हैरान होए । इसपै यीशु नै उनतै दुबारे कह्या, “हे बाळकों, जो धन पै भरोस्सा राखै सै, उनकै खात्तर परमेसवर के राज्य म्ह बडणा कितना ओक्खा सै! 25 ऊँट का सूई के छेद म्ह तै लिकडणा आसान हो सकै सै । पर परमेसवर के राज्य म्ह साहूकार का बडणा भोत मुश्किल सै ।”

26 वे घणेए हैरान होकै आप्पस म्ह कहण लागगे, “तो फेर किसका उद्धार हो सकै सै?”

27 यीशु नै उनकी ओड़ देखकै कह्या, “माणसां तै तो यो न्ही हो सकदा, पर परमेसवर तै हो सकै सै; क्यूँके परमेसवर खात्तर कुछ भी मुश्किल कोनी ।”†

28 पतरस उसतै कहण लागया, “देख, हम तो सब कुछ छोड़कै तेरे चेल्लें बणगे सा ।”

29 यीशु नै कह्या, “मै थमनै साच्ची-साच कहूँ सूँ के इसा कोए कोनी, जिसनै मेरै अर मेरै सुसमाचार कै खात्तर घर, भाण-भाई, माँ-बाप, बाळ-बच्चे या जमीन-जायदाद ताहीं छोड़ दिया हो, 30 अर इब

\* 10:19 10:19 रोम-13:9 † 10:27 10:27 लूका 1:37



51 इसपै यीशु नै उसतै कह्या, “तू के चाहवै सै के मै तेरे खात्तर करूँ?” आन्धे नै उसतै कह्या, “हे गुरु, योए के मै देखण लागू।”

52 यीशु नै उसतै कह्या, “कल्या जा, तेरे विश्वास नै तेरे ताहीं ठीक करया सै।” वो जिब्बे देखण लाग्या, अर राह म्ह उसकै पाच्छै हो लिया।

## 11

?????? ???? ????-??????

(?????? 21:1-11; ?????? 19:28-40; ??? 12:12-19)

1 जिब यीशु अर उसके चेल्लेँ यरुशलेम नगर के लोवै, जैतून पहाड़ पै बैतफगे अर बैतनिय्याह गाम कै धारे आये तो उसनै अपणे चेल्यां म्ह तै दोयां ताहीं न्यू कहकै भेज्या, <sup>2</sup> “स्याम्ही के गाम म्ह जाओ, अर उस म्ह पोहचदे एक गधी का बच्चा, बन्ध्या होया धमनै मिलैगा। जिसकी सवारी किसे नै इब ताहीं न्ही करी से, उसनै खोल ल्याओ। <sup>3</sup> जै थारे तै कोए बुझ्झै, यो के करो सो? तो कहियो, ‘प्रभु नै इसकी जरूरत सै, अर वो तोळा उसनै भेज देवैगा।’”

4 चेल्यां नै जाकै उस गधी के बच्चे ताहीं वाहरणै दरबाजे के धारे आँगण म्ह बन्ध्या होया पाया, अर खोल्लण लागे।

5 उन म्ह तै जो ओड़ै खड़े थे, कई कहण लागे, “यो के करो सो, गधी के बच्चे नै क्यातै खोल्लो सो?” <sup>6</sup> जिसा यीशु नै कह्या था, उससे तरियां उननै कह दिया; फेर माणसां नै उन ताहीं जाण दिया। <sup>7</sup> चेल्यां नै गधी के बच्चे ताहीं यीशु के धारे ल्याकै उसपै अपणे लत्ते बिछाये अर वो उसपै बैठग्या। <sup>8</sup> फेर घणखरे माणसां नै अपणे लत्ते राह म्ह बिछाये अर औरां नै खेत्तां म्ह तै डालियां काटके फैला दी। <sup>9</sup> जो उसके आगै-आगै अर पाच्छै-पाच्छै, चाल्लेँ थे, रुक्के मार-मारके कहन्दे जावै थे, “होशाना!” “धन्य सै वो जो प्रभु के नाम तै आवै सै!”

10 म्हारे पिता दाऊद का राज्य जो आवै सै; “धन्य सै! अकास म्ह होशाना!”

11 यीशु यरुशलेम नगर पोहचके मन्दर म्ह आया, अर चौगरदे की सारी चिज्जां नै देखके बारहां चेल्यां के गेल्या बैतनिय्याह गाम म्ह गया, क्यूँके साँझ होगी थी।

?????? ?? ???? ?? ??? ?????

(?????? 21:18-19)

12 आगले दिन सबेरै जिब यीशु अर उसके चेल्लेँ बैतनिय्याह गाम तै लिकड़े तो यीशु नै भूख लागगी। <sup>13</sup> यीशु दूर तै अंजीर का हरा दरखत देखके उसके धारे गया के, के बेरा उस म्ह कुछ पा ज्या: पर पत्त्या नै छोड़के उस म्ह कुछ न्ही पाया; क्यूँके फळ लागगण का बखत कोनी था। <sup>14</sup> यीशु नै उस दरखत ताहीं देखके उस ताहीं कह्या, “आज के पाच्छै कोए तेरा फळ न्ही खावैगा!” अर उसके चेल्लेँ सुणण लागरे थे।

?????? ?? ????-?????? ?? ????-????

(?????? 21:12-17; ?????? 19:45-48; ??? 2:13-22)

15 फेर यीशु अर उसके चेल्लेँ यरुशलेम म्ह आये, अर वो मन्दर म्ह गया; अर ओड़ै जो व्यापार करै थे उननै वाहरणै लिकाड़ण लाग्या, सर्पां (पईसा का लेण देण करण आळे) के पीद्रे अर कबूतर बेचणीयां की चौकियां उल्ट दी, <sup>16</sup> अर मन्दर म्ह किसे ताहीं भी व्यापार करण खात्तर आण-जाण कोनी दिया। <sup>17</sup> अर उपदेश देके उनतै कह्या, “के पवित्र ग्रन्थ म्ह यो न्ही लिख्या सै, के मेरा घर सारी जात्तां के खात्तर प्रार्थना का घर कुह्वावैगा? पर धमनै इस ताहीं डाकुआं की गुफा बणा दी सै।”\*

18 या घटना सुणके सारे प्रधान याजक अर शास्त्री लोग उसनै मारण का मौक्का तोह्ल लागे; पर वे भीड़ तै डरै थे, क्यूँके सारे माणस उसके उपदेश तै भोत परभावित होवै थे।

\* 11:17 11:17 लूका 19:46

19 अर उस दिन साँझ होन्दे यीशु अर उसके चेल्ले रात काट्टण खात्तर यरुशलेम नगर तै बाहरणै चले गये ।

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬  
(⚬⚬⚬⚬⚬ 21:20-22)

20 फेर तडकेए नै जिब यीशु अर उसके चेल्ले ओड़े कै जावै थे तो उननै उस अंजीर कै दरखत ताहीं जड़ तै ए सूख्या होया देख्या ।

21 पतरस नै वा बात याद आई, अर उसनै उसतै कहा, “हे गुरु, देख! यो अंजीर का दरखत जिस ताहीं तन्नै श्राप दिया था, वो सूख गया सै।”

22 यीशु नै उस ताहीं जवाब दिया, “परमेशवर पै विश्वास राक्खो । 23 मै थमनै साच्ची कहुँ सूँ के जो कोए इस पहाड़ नै कहवै, ‘तू उखड़ जा, अर समुन्दर म्ह जा पड़,’ अर अपणे मन म्ह शक ना करै, बल्के विश्वास करै के जो कहुँ सूँ वो हो जावैगा, तो उसके खात्तर वोए होवैगा । 24 ज्यातै मै थमनै कहुँ सूँ के जो कुछ थम प्रार्थना करकै माँगगो, तो विश्वास कर ल्यो के थमनै मिलग्या, अर थारे खात्तर हो जावैगा । 25 अर जिब कदे थम प्रार्थना खात्तर खड़े होओ, तो जै थारे मन म्ह किसे कै बिरोध म्ह कुछ हो, तो उसनै माफ करो: ज्यातै के थारा सुर्गीय पिता भी थारे अपराध माफ करै । 26 अर जै थम माफ ना करो तो थारा पिता भी जो सुर्ग म्ह सै, थारा कसूर माफ कोनी करैगा ।”

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬  
(⚬⚬⚬⚬⚬ 21:23-27; ⚬⚬⚬⚬⚬ 20:1-8)

27 यीशु अर उसके चेल्ले फेर यरुशलेम म्ह आये, अर जिब वो मन्दर म्ह टहलरया था तो सारे प्रधान याजक अर शास्त्री अर यहूदी अगुवें उसके धौरे आकै बुद्धिण लागगे, 28 “तू ये काम किस हक तै करै सै? अर यो हक तेरे ताहीं किसनै दिया सै के तू ये काम करै?”

29 यीशु नै उनतै कहा, “मै भी थारे तै एक बात बुद्धि सूँ: मन्नै जवाब दियो तो मै थमनै बताऊँगा के ये काम किस हक तै करूँ सूँ । 30 यूहन्ना ताहीं बपतिस्मा देण का हक परमेशवर की ओड़ तै था या माणसां की ओड़ तै था? मन्नै जवाब द्यो ।”

31 फेर वे आपस म्ह बहस करण लागगे के जै हम कहुँ, परमेशवर की ओड़ तै, तो वो कहवैगा, फेर थमनै विश्वास क्यातै न्ही करया? 32 अर जै हम कहुँ, माणसां की ओड़ तै, तो माणसां की भीड़ का डर सै, क्यूँके सारे जाणै सै के यूहन्ना साच्चीये नबी था ।

33 उननै यीशु ताहीं जवाब दिया, “हमनै न्ही बेरा ।” यीशु नै उनतै कहा, “मै भी थारे तै कोनी बतान्दा के ये काम किस हक तै करूँ सूँ ।”

## 12

⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬⚬  
(⚬⚬⚬⚬⚬ 21:33-46; ⚬⚬⚬⚬⚬ 20:9-19)

1 यीशु उदाहरणां म्ह उनतै बात करण लाग्या: “किसे माणस नै अंगूर का बाग लगाया, अर उसकै चौगरेदे नै बाड़ा बाँधया, अर रस का कुण्ड खोद्या, अर रुखाळ खात्तर एक मचान बनाया; अर किसानां ताहीं उसका टेक्का देकै परदेस चल्या गया । 2 फेर फळ तोड़ण का बखत लोवै आया, तो बाग के माल्लिक नै अपणे नौक्कर ताहीं उसका फळ लेण नै किसानां धौरे भेज्या के किसानां तै अंगूर के बाग के फळां का हिस्सा लेवै । 3 पर किसानां नै उस नौक्कर ताहीं पकड़कै छेल्या अर खाल्ली हाथ भेज दिया । 4 फेर उसनै एक और नौक्कर ताहीं उनके धौरे भेज्या; उननै उसकी बेजती करी उसका सिर फोड़ दिया अर । 5 फेर उस माल्लिक नै एक और ताहीं भेज्या; उननै उस नौक्कर ताहीं भी मार दिया । फेर उसनै और घणाए ताहीं भेज्या; उन म्ह तै उननै कुछ तो छेत्ते अर कुछ मार दिये ।”

6 “इब माल्लिक कै धौरे एकैए आदमी रहग्या जो उसका प्यारा बेट्टा था; आखर म्ह उसनै अपणे बेट्टे ताहीं भी उनके धौरे न्यूँ सोचकै भेज्या के वे मेरै बेट्टे की इज्जत तो जरूर करैगें ।”

7 पर उन किसानां नै आप्सस म्ह कह्या, “योए तो वारिस सै; आओ, हम इसनै मार द्या, फेर यो अंगूर का बाग म्हारा हो जावैगा।” 8 अर उननै उस ताहीं पकड़कै मार दिया, अर अंगूर के बाग तै बाहरणै बगा दिया।

9 इस करकै अंगूर के बाग का माल्लिक के करैगा? वो आकै उन किसानां का नाश करैगा, अर अंगूर के बाग का टेक्का दुसरे किसानां नै दे देवैगा। 10 के थमनै पवित्र ग्रन्थ म्ह यो वचन कोनी पढ्या: जिस पत्थर ताहीं राजमिस्त्रियाँ नै बेकार बताया था, वोए कोणे का खास पत्थर होग्या;

11 यो प्रभु की ओड़ तै होया, अर यो म्हारे खात्तर अनोक्खा सै!

12 फेर यहूदियाँ के प्रधान नै उस ताहीं पकड़णा चाह्या; क्यूँके वे समझगे थे, के उसनै म्हारै बिरोध म्ह यो उदाहरण कह्या सै: पर वे माणसां तै डरगे, अर उसनै छोड़कै चले गये।

~~~~~

(~~~~~ 22:15-22; ~~~~~ 20:20-26)

13 फेर यहूदियाँ के प्रधान नै यीशु ताहीं बात्तां म्ह उलझाण खात्तर कुछ फरीसियाँ अर हेरोदेस राजा के समर्थकां ताहीं उसके धोरै भेज्या। 14 उननै आकै यीशु तै कह्या, “हे गुरु, हमनै बेरा सै, के तू साच्चा सै, अर किस की परवाह न्ही करदा, क्यूँके तू माणसां का मुँह देखके बात कोनी करदा, पर परमेसवर की बातें सच्चाई तै सिखावे सै। तो के कैसर\* ताहीं कर देणा ठीक सै या कोनी? 15 हम देवां, या न्ही देवां?” उसनै उनका कपट जाणकै उनतै कह्या, “मन्नै क्यातै परखो सो? एक दीनार (एक दिन की मजदूरी) मेरै धोरै ल्याओ, के मै उसनै देक्खूँ।” 16 वे लियाए, अर उसनै उनतै कह्या, “या छाप अर नाम किसका सै?” उननै कह्या, “कैसर का।”

17 यीशु नै उनतै कह्या, “जो कैसर का सै वो कैसर ताहीं, अर जो परमेसवर का सै परमेसवर ताहीं दो।” फेर वे उसपै घणे हैरान होण लागगे।

~~~~~

(~~~~~ 22:23-33; ~~~~~ 20:27-40)

18 फेर सहूकी लोग भी, जो कहवै सै के मेरे होए जिन्दा होए न्ही सकदे; उसके धोरै आकै उसतै बुझ्झ्या, 19 “हे गुरु, मूसा नबी नै म्हारै खात्तर पवित्र ग्रन्थ म्ह लिख्या सै के जै किसे का भाई बेऊलादा मर जावै अर उसकी घरआळी रह जावै, तो उसका भाई उसकी घरआळी तै ब्याह कर लेवै अर अपणे भाई खात्तर पीढ़ी पैदा करै। 20 उदाहरण के तौर पै सात भाई थे। पैहलड़ा भाई ब्याह करके बेऊलादा मरग्या। 21 फेर दुसरे भाई नै उसकी बिरबान्नी तै ब्याह कर लिया अर वो भी बेऊलादा मरग्या; अर उससे तरियां तीसरे नै भी करया। 22 अर सातुवां कै ऊलाद कोनी होई। सारया पाच्छै वा बिरबान्नी भी मरगी। 23 आखर म्ह जिन्दा होण पै वा उन म्ह तै किसकी घरआळी होवैगी? क्यूँके वा सातुवां की घरआळी हो ली थी।”

24 यीशु नै उनतै कह्या, “थारी गलती या सै के थम पवित्र ग्रन्थ अर परमेसवर की सामर्थ नै न्ही जाणते। 25 क्यूँके जी उठण के बाद ब्याह शादी कोनी होन्दी, पर सुगं म्ह वो परमेसवर के सुगंदूतां की ढाळ होवैगें। 26 मेरे होया कै जिन्दा होण कै वारें म्ह के थमनै मूसा नबी की किताब म्ह जळती होई झाड़ी की कथा म्ह कोनी पढ्या के परमेसवर नै उसतै कह्या, ‘मै अब्राहम का परमेसवर, अर इसहाक का परमेसवर, अर याकूब का परमेसवर सू?’ 27 परमेसवर मेरे होया का न्ही बल्के जिन्दयां का परमेसवर सै; थम बड़्डी भूल म्ह पड़े सो।”

~~~~~

(~~~~~ 22:34-40; ~~~~~ 10:25-28)

28 शास्त्री समाज के माणसां म्ह तै एक नै आकै उन ताहीं बहस करदे सुण्या, अर न्यू जाणकै उसनै उन ताहीं ठीक ढाळ तै जवाब दिया, अर उसतै बुझ्झ्या, “सारया तै खास हुकम कौण सा सै?”

\* 12:14 12:14 रोमी सम्राट

29 यीशु नै उस ताहीं जवाब दिया, “सारे हुकमां म्ह तै यो खास सै: हे इस्राएल के माणसों सुणो! प्रभु म्हारा परमेसवर सिर्फ एक ही प्रभु सै, 30 अर तू प्रभु अपने परमेसवर तै अपने सारे मन तै, अर अपने सारे प्राण तै, अर अपनी सारी समझ तै, अर अपनी सारी शक्ति तै प्यार राखणा ।” 31 अर दुसरा यो सै, ‘तू अपने पड़ोसी तै अपने जिसा प्यार राखणा ।’ इसतै बड़ड़ा और कोए हुकम कोनी ।”

32 शास्त्री नै उसतै कह्या, “हे गुरु, जमा ठीक! तन्नै साच्ची कही के परमेसवर एक-ए सै, अर उस ताहीं छोड़के और कोए कोनी ।” 33 अर उसतै सारे मन तै, अर सारे प्राण तै, अर सारी समझ तै, अर सारी शक्ति तै प्यार राखणा; अर पड़ोसी तै अपने जिसा प्यार राखणा, ये दोन्नु हुकम होमबलियाँ अर बलिदानां तै बाध सै ।”

34 जिव यीशु नै देख्या के उसनै समझदारी तै जवाब दिया, तो उसतै कह्या, “तू परमेसवर के राज्य तै दूर कोनी ।” अर किसै नै फेर उसतै बुद्धि की हिम्मत कोनी होई ।

~~~~~

(~~~~~ 22:41-46; ~~~~~ 20:41-46)

35 फेर यीशु नै मन्दर म्ह उपदेश देन्दे होए न्यू कह्या, “शास्त्री क्यूँ कहवै सै के मसीह दाऊद का बेटा सै? 36 क्यूँ के दाऊद नै खुद ए पवित्र आत्मा म्ह होके कह्या सै, ‘परमेसवर यहोवा नै मेरे प्रभु तै कह्या, ‘मेरे सोळी ओड़ बैठ, जिव ताहीं के मै तेरे बैरियाँ नै हरा कै, तेरे पायां की चौककी न्ही बणा दियुं ।’”

37 “दाऊद तो खुद ए उसनै प्रभु कहवै सै, फेर वो उसका बेटा किस ढाळ होया?” अर भीड़ के माणस उसकी राज्जी होके सुणे थे ।

~~~~~

(~~~~~ 23:1-36; ~~~~~ 20:45-46)

38 यीशु नै अपने उपदेश म्ह उनतै कह्या, “शास्त्रियाँ तै चौकन्ने रहियो, जो लाम्बे-लाम्बे चोगे पहरे होड़ होड़ै अर बजारां म्ह नमस्कार चाहवै सै, 39 अर आराधनालयां म्ह खास-खास जगहां बैठणा, जिम्मण म्ह खास-खास जगहां भी चाहवै सै । 40 वे विधवायाँ के घर खा जावै सै अर दिखाण खात्तर घणी वार ताहीं प्रार्थना करदे रहवै सै । ये घणा दण्ड पावेंगे ।”

~~~~~

(~~~~~ 21:1-4)

41 यीशु मन्दर के भण्डार के स्याम्ही बैठके देखै था के आदमी मन्दर के दानपात्र म्ह किस तरियां पईसे घालें सै; अर घणखरे साहूकारां नै घणाए कुछ घाल्या । 42 इतनै म्ह एक कंगाल विधवा नै आके दो दमड़ी घाल्नीं । (जो एक धेले कै बराबर होवै सै)

43 फेर उसनै अपने चेल्यां ताहीं धोरे बुलाके कह्या, “मै थमनै सच कहूँ सूँ के मन्दर के दानपात्र म्ह घाल्लण आळा म्ह तै इस कंगाल विधवा नै सारया तै बाध घाल्या सै; 44 क्यूँ के सारया नै अपने धन की बढ़दी म्ह तै घाल्या सै, पर इसनै अपनी घटदी म्ह तै जो उसकै धोरे जीवन चलाण खात्तर था, वो सारा घाल दिया ।”

## 13

~~~~~

(~~~~~ 24:1-2; ~~~~~ 21:5-6)

1 जिव यीशु मन्दर तै लिक्ड़े था, तो उसके चेल्यां म्ह तै एक नै उसतै कह्या, “हे गुरु, लखा, किसे बड़े-बड़े पत्थरां तै बणाये होए किसे सुथरे भवन सै!”

2 यीशु नै उनतै कह्या, “के थम ये बड़े-बड़े पत्थरां के भवन देखो सो: पर ऊँ एक पत्थर भी कोनी बचेगा जो गेरया न्ही जावेगा ।”

~~~~~

(~~~~~ 24:3-14; ~~~~~ 21:7-19)

3 जिब यीशु मन्दर कै स्याम्ही जैतून कै पहाड़ पै बेटचा था, तो पतरस, याकूब, यूहन्ना अर अन्दिरयास नै न्यारे जाके उसतै बुद्धझया, 4 “हमनै बता के ये बात कद होवैगी? अर जिब ये सारी बात पूरी होण पै होवैगी उस बखत की के निशान्नी होवैगी?”

5 यीशु उनतै कहण लाग्या, “चौकन्ने रहियो के कोए थमनै भकावै न्ही। 6 क्यूँके घणखरे मेरै नाम तै आकै कहवैगें, भै मसीह सुं! अर घणाए नै भकावैगें। 7 जिब थम रोळे, अर लड़ाईया का जिक्र सुणो, तो घवराईयो ना; क्यूँके इनका होणा जरूरी सै, पर उस बखत खात्मा कोनी होवैगा। 8 क्यूँके जात पै जात, राज्य पै राज्य चढ़ाई करैगा। भोत सारी जगहां पै हाल्लण आवैगें, अर अकाळ पड़ैगें, ये तो दुखां की शरुआत ए होवैगी।”

9 “पर थम अपणे बारै म्ह चौकन्ने रहो; क्यूँके माणस थारे ताहीं बड़डी सभा म्ह सौपैगें अर थम आराधनालयों म्ह छितोगे, अर मेरै कारण हाकिमां अर राजां के आगै खड़े करे जाओगे, ताके थम मेरे बारै म्ह गवाही दे सको। 10 पर जरूरी सै के पैहल्या सुसमाचार सारी जात्तां म्ह पूरचार करया जावै। 11 जिब वे थमनै ले जाके सौपैगें, तो पैहल्या तै फिकर ना करियो इब हम के कहवागें; पर जो कुछ थमनै उस बखत बताया जावै वोए कहियो; क्यूँके बोल्लण आळे थम कोनी सो, पर पवित्तर आत्मा सै।”

12 “भाई नै भाई, पिता नै बेटटा मारण खात्तर सौप देंगे, अर बाळक माँ-बाप के विरोध म्ह खड़े होके उन ताहीं मरवा देवैगें। \* 13 अर मेरै नाम के कारण सारे माणस थारे तै बैर करैगें; पर जो आखर ताहीं धीरज धरेगा, उस्से का उद्धार होवैगा।”

??????-???

(????? 24:15-28; ????? 21:20-24)

14 (पढ़ण आळा इस बात नै समझ लेवें) “जिस दिन थम मन्दर म्ह उस उजाड़ण आळी घृणित चीज नै खड़े देखो, जिस ताहीं मन्दर म्ह न्ही होणा चाहिये, तब जो यहूदिया परदेस म्ह होवे पहाड़ां पै भाज जावै; 15 जो छ्रात पै हो, वो घर म्ह कुछ लेण खात्तर भीत्तर ना जावै, 16 अर जो खेत म्ह हो, वो अपणे लत्तें लेण खात्तर घर नै ना बोहड़ें। 17 उन दिनां म्ह जो गर्भवती अर दूध पिलान्दी बिरबान्नी होवैगी, उनके खात्तर भागणा भी मुश्किल होगा! 18 अर प्रार्थना करया करो के यो जाड्यां म्ह न्ही हो। 19 क्यूँके वे दिन इसे क्लेश के होवैगें के सृष्टि की शरुआत तै, जो परमेसवर नै रचाई सै, इब ताहीं ना तो होए अर ना फेर कदे होवैगें।”†

20 अर जै प्रभु उन दिनां नै न्ही घटान्दा, तो कोए जीव भी कोनी बचदा; पर उन छ्राटि होया के कारण जिन ताहीं उसनै छ्राटचा सै, उन दिनां ताहीं घटाया। 21 उस बखत जै कोए थमनै कहवै, देखो, मसीह उरै सै, या देखो, ओड़ै सै, तो बिश्वास ना करियो; 22 क्यूँके झूटटे मसीह अर झूटटे नबी उठ खड़े होवैगें, अर बड़े-बड़े चमत्कार अर अनोक्खे काम दिखावैगें के जै हो सक्या तो छ्राटि होया ताहीं भी भका देवैगें। ‡ 23 पर थम चौकन्ने रहियो; देखो, मन्ने थारे तै सारी बात बखत तै पैहल्याए बता दी सै।

???? ?? ?????? ?? ????????

(????? 24:29-31; ????? 21:25-28)

24 उन दिनां म्ह, उस क्लेश के पाच्छे सूरज अन्धेरा हो जावैगा, अर चाँद चाँदणा कोनी देवैगा; 25 अर अकास के तारे पड़ण लागैगें; अर अकास की शक्तियाँ हलाई जावैगी। § 26 फेर मुझ माणस के बेटटे नै बड़डी सामर्थ अर महिमा के गेल्या सब लोग बादळां पै आन्दे देखैगे। \* 27 उस बखत मै अपणे सुगर्दत्तां नै भेजकै, धरती के इस सिरे तै अकास के उस सिरे ताहीं, च्यारु दिशायां तै अपणे चुणे होए माणसां नै कट्टा करूंगा। †

\* 13:12 13:12 लूका 21:16 † 13:19 13:19 (मत्ती 24:21) ‡ 13:22 13:22 (मत्ती 24:24) § 13:25 13:25 परका-6:13 \* 13:26 13:26 परका-1:17 † 13:27 13:27 मत्ती 24:31

२२:२२-२३ २२:२२-२३ २२:२२-२३  
(२२:२२ 24:32-35; २२:२२ 21:29-33)

28 अंजीर के दरखत ते यो उदाहरण सीक्खो: जिव उसकी डाळी कोमल हो जावै, अर पत्ते लिकड़ण लागै सै; तो थम जाण ल्यो सो के गर्मी का बखत लोवै सै। 29 इस्से तरियां जिव थम इन बाततां नै होन्दे देख्को, तो जाण ल्यो के वो भोत तावळा आण आळा सै। 30 मै थमनै साच्ची कहूँ सूँ के जिव ताहीं ये बात न्ही हो लेन्दी, जद ताहीं ये पीढी खतम न्ही होवैगी। 31 धरती अर अकास टळ जावैगे, पर मेरी बात कदे न्ही टळैगी। †

२२:२२ २२:२२  
(२२:२२ 24:36-44)

32 “उस दिन या उस बखत कै बारे म्ह कोए न्ही जाण्दा, ना सुर्गदूत अर ना बेट्टा; पर सिर्फ पिता जाणै सै। 33 लखाओ, जागदे अर प्रार्थना करदे रहो; क्यूँके थमनै न्ही बेरा के वो बखत कद आवैगा। 34 मेरे आण का बखत उस माणस के समान सै, जो परदेस जान्दे बखत अपना घर छोड़ जावै, अर अपने नौकरां ताहीं हक देवै, अर हरेक नै उसका काम बता देवै, अर पहरेदार ताहीं जागदे रहण का हुकम देवै।

35 “इस करके जागदे रहो, क्यूँके थमनै न्ही बेरा के घर का माल्लिक कद आवैगा, साँझ नै या आध्धी रात नै, या मुर्गे के बाँग देण के बखत या तड़के ए तड़के नै। 36 इसा ना हो के वो चाणचक आके थमनै सोंदे पावै। 37 अर जो मै थमनै कहूँ सूँ, वोए सारया नै कहूँ सूँ: जागदे रहो!”

## 14

२२:२२ २२:२२ २२:२२ २२:२२  
(२२:२२ 26:1-5; २२:२२ 22:3-6; २२:२२ 11:45-53)

1 दो दिनां पाच्छे फसह अर अखमीरी रोट्टी का त्यौहार होण आळा था। प्रधान याजक अर शास्त्री इस बात की टाह म्ह थे के यीशु ताहीं किस ढाळ कपट तै पकड़के मार देवै; 2 पर वे कहवै थे, “त्यौहार कै दिन न्ही, कदे इसा ना हो के माणसां म्ह रोळा माचवै।”

२२:२२ २२:२२ २२:२२ २२:२२  
(२२:२२ 26:6-13; २२:२२ 12:1-8)

3 जिव यीशु बैतनिय्याह नगर म्ह आया, ओड़े यीशु शमौन नाम के माणस जो कोढ़ तै ठीक होया था, उसके घरां खाणा खाण बेठया, तो एक बिरबान्नी संगमरमर के बरतन म्ह जटामांसी का शुद्ध महंगा खसबूदार तेल लेके आई, अर बरतन तोड़के महंगा खसबूदार तेल उसके सिर पै उंडेल दिया।

4 पर उन म्ह तै कई माणस अपने मन म्ह बड़बड़ाने लागगे, “इस महंगे खसबूदार तेल का क्यातै सत्यानाश कर दिया? 5 क्यूँके यो महंगा खसबूदार तेल तो तीन सौ दीनार (तीन सौ दिन की मजदूरी) तै भी घणी किम्मत पै बेचके कगालां म्ह बांडया जा सके था।” अर उस बिरबान्नी ताहीं झिड़कण लागगे।

6 यीशु नै कह्या, “उस ताहीं छोड़ दो; उसनै क्यातै सताओ सो? उसनै मेरै गेल्या भलाई करी सै। 7 कंगाल थारे गेल्या सारी हाण रहवै सै, अर थम जिव चाहो जद उनतै भलाई कर सको सो; पर मै थारे गेल्या सारी हाण कोनी रहूँगा। 8 जो कुछ वा कर सकी, उसनै करया; उसनै मेरै गाड़डे जाण की त्यारी म्ह पैहला ए महंगा खसबूदार तेल मेरी देह पै उंडेला सै। 9 मै थमनै साच्ची कहूँ सूँ के सारे दुनिया म्ह जित्त किते भी सुसमाचार प्रचार करया जावैगा, जो उसनै करया वो सदा याद करया जावैगा।”

२२:२२ २२:२२ २२:२२ २२:२२  
(२२:२२ 26:14-16; २२:२२ 22:3-6)



10 फेर यहूदा इस्करियोती जो बारहा चेल्यां म्ह तै एक था, प्रधान याजकां कै धोरै गया के यीशु ताहीं उनके हाथ पकड़वा देवै। 11 वे न्यू सुणकै राज्जी होंगे, अर उस ताहीं रपिये देण खात्तर मानगे; अर वो मौक्का टोक्क लाग्या के उस ताहीं किसे ढाळ पकड़वाया जावै।

12 अखमीरी रोटी कै त्यौहार कै पैहलडे दिन, जिसम्ह वे फसह खात्तर मेम्ने का बलिदान करै थे, उसके चेल्यां नै उसतै बुझ्झया, “तू कित्त जाणा चाहवै सै के हम जाकै तेरे खात्तर फसह भोज की त्यारी करा?”

13 उसनै अपने चेल्यां म्ह तै दो ताहीं न्यू कहकै भेज्या, “यरुशलेम नगर म्ह जाओ, अर एक माणस पाणी का पैँढा टाए होए थमनै मिलैगा, उसके पाच्छै हो लियो; 14 अर वो जिस घर म्ह जावै, उस घर कै माल्लिक ताहीं कहियो, ‘गुरु कहवै सै के बैठक कित्त सै? जिसम्ह मै अपने चेल्यां गेल्या फसह भोज खाऊँ।’ 15 वो थमनै एक सजी-सजाई, अर त्यार करी होड़ बड़ी अटारी दिखा देवैगा, ओड़ै म्हारै खात्तर त्यारी करो।”

16 चेल्लें लिकड़कै नगर म्ह आये, अर जिसा यीशु नै उनतै कह्या था, उससे तरियां पाया; अर फसह का भोज त्यार करया।

~~~~~

(~~~~~ 26:17-25; ~~~~~ 22:7-14; 21-23; ~~~~ 13:21-30)

17 जब साँझ होई, तो यीशु बारहा चेल्यां कै गेल्या आया। 18 जब वे बेदटे खाणा खावै थे, तो यीशु नै कह्या, “मै थमनै साच्ची कहूँ सूँ के थारे म्ह तै एक, जो मेरै गेल्या खाणा खाण लागरया सै, वो मन्नै धोक्खा देकै पकड़वावैगा।”

19 उनपै उदासी छागयी अर वे एक-एक करके उसतै कहण लागगे, “के वो मै सूँ?”

20 उसनै उनतै कह्या, “वो बारहा चेल्यां म्ह तै एक सै, जो मेरै गेल्या थाळी म्ह हाथ घालै सै।

21 क्यूँके मै माणस का बेदटा तो, जिसा मेरे बारै म्ह पवित्तर ग्रन्थ म्ह लिख्या सै; मेरा मर जाणा तो पक्का सै, पर उस माणस पै धिक्कार सै जिसकै जरिये मै माणस का बेदटा पकड़वाया जाऊँगा! जै उस माणस का जन्म ए न्ही होंदा, तो उसके खात्तर भला होंदा।”

~~~~~

(~~~~~ 26:26-30; ~~~~~ 22:14-20; 1 ~~~~~ 11:23-25)

22 जब वे खाण ए लागरै थे, उसने रोटी लेकै परमेसवर का धन्यवाद करया, अर आशीष माँगकै तोड़ी, अर उन ताहीं दी, अर कह्या, “ल्यो, या मेरी देह सै।”

23 फेर यीशु नै अंगूर के रस का कटोरा लेकै परमेसवर का धन्यवाद करया, अर उन ताहीं दिया; अर उन सारया नै उस म्ह तै पिया।

24 अर उसनै उनतै कह्या, “यो अंगूर का रस मेरे लहूँ नै दर्शावै सै, जिसका करार परमेसवर नै लोग्गां तै करया जो घणाए खात्तर बहाया जावै सै।”

25 “थमनै साच्ची कहूँ सूँ, के अंगूर के रस नै मै इब तै इसनै उस दिन तक न्ही पीऊँगा, जब ताहीं परमेसवर के राज्य म्ह थारे गेल्या नया रस न्ही पीऊँ।”

26 फेर वे भजन गाकै बाहरणै जैतून कै पहाड़ पै गए।

~~~~~

(~~~~~ 26:31-35; ~~~~~ 22:31-34; ~~~~ 13:36-38)

27 जब यीशु अर उसके चेल्लें राह म्ह थे, तो उसनै उनतै कह्या, “थम सारे मेरा साथ छोड़कै चले जाओगे,” “क्यूँके पवित्तर ग्रन्थ म्ह लिख्या सै:” मै रुखाळे नै मारूँगा, अर झुण्ड की सारी भेड़ तित्तर-बितर हो जावैगी।

28 पर मै अपने जी उठण कै बाद थारे तै पैहल्या गलील परदेस म्ह मिलूँगां।

29 पतरस नै उसतै कह्या, “जै सारे छोड़ै तो छोड़ै, पर मै तेरा साथ कदे न्ही छोड़ूँगा।”

30 यीशु नै उसतै कह्या, “मै तेरे तै सच कहूँ सू आज ए इस्से रात नै मुर्गे के दो बर बाँग देण तै पैहल्या, तू तीन बर मेरै बारै म्ह मुकरैगा।”

31 पर उसनै और भी पक्के विश्वास तै कह्या, “जै मन्नै तेरे गेल्या मरणा भी पड़े, तोभी मै तेरा इन्कार कदे कोनी करूँगा।” इस्से तरियां और सारया चेल्यां नै भी कह्या।

☞☞☞☞ ☞☞ ☞☞☞☞☞☞☞☞  
(☞☞☞☞ 26:36-46; ☞☞☞☞ 22:39-46)

32 फेर यीशु अर उसके चेल्लें गतसमनी नामक बाग म्ह एक जगहां म्ह आए, अर उसनै अपणे चेल्यां तै कह्या, “उरै बेट्टे रहो, जिब ताहीं मै प्रार्थना करूँ।” 33 अर वो पतरस, याकूब अर यूहन्ना ताहीं अपणे गेल्या लेग्या; अर घणाए काल अर दुखी होण लाग्या, 34 अर उनतै कह्या, “मेरा मन घणा उदास सै, उरै ताहीं के मै मरण पै सू: थम उरै ठहरो, अर जागदे रहो।”

35 फेर वो माड़ा आगू सरक्या अर धरती पै पड़कै प्रार्थना करण लाग्या के जै हो सकै तो या मुसीबत की घड़ी मेरै पै तै टल जावै, 36 अर कह्या, “हे अब्बा, हे पिता, तू सारा कुछ कर सकै सै; इस दुख का कटोरे ताहीं मेरै धारै तै हटा ले: तोभी जिसा मै चाहूँ सू उसा न्ही, पर जो तू चाहवै सै वोए हो।”

37 फेर यीशु आया अर चेल्यां ताहीं सोन्दे पाकै पतरस तै कह्या, “हे शमौन, तू सोवै सै? के तू एक घड़ी भी कोनी जाग सक्या? 38 जागदे रहो अर प्रार्थना करदे रहो के थम इन्तहान म्ह ना पड़ो। इस म्ह कोए शक कोनी के आत्मा तो त्यार सै, पर देह कमजोर सै।”

39 अर यीशु फेर चल्या गया अर दोबारा भी वाए प्रार्थना करी। 40 फेर आकै उन ताहीं सोन्दे पाया, क्यूँके चेल्यां की आँख नींद तै भरी थी; अर न्ही जाणै थे, के उसनै के जवाब देवै।

41 फेर तीसरी बर आकै उनतै कह्या, “थम इब भी सोण लागरे सोण सों? बखत आ लिया; देक्खो, मै माणस का बेट्टा पापियाँ के हाथ्यां पकड़वाया जाऊँ सू। 42 उठो, चाल्लां! लखाओ, मेरा पकड़वाण आळा लोवै आण पोंहच्या सै।”

☞☞☞☞ ☞☞ ☞☞☞☞☞☞☞☞  
(☞☞☞☞ 26:47-56; ☞☞☞☞ 22:47-53; ☞☞☞☞ 18:3-12)

43 यीशु न्यू कहण ए लागरया था के यहूदा जो बारहा चेल्यां म्ह तै एक था, अपणे गेल्या प्रधान याजकां अर शास्त्रियाँ अर यहूदी अगुवां की ओड़ तै एक बड्डी भीड़ लेकै जिब्बे आण पोंहच्या, जो तलवार अर लाट्टी लेरे थे।

44 यीशु कै पकड़वाण आळे नै उन ताहीं यो इशारा दिया था के जिस ताहीं मै चुम्बू वोए यीशु होगा, उस ताहीं पकड़कै सावधानी तै ले जाईयो। 45 वो आया, अर जिब्बे उसके धारै जाकै बोल्या, “हे गुरु!” अर उस ताहीं चुम्ब्या। 46 फेर उननै उसपै हाथ गेर कै उस ताहीं पकड़ लिया। 47 उन बारहा चेल्यां म्ह जो धारै खड़े थे, एक नै तलवार खिंचकै महायाजक के नौकर पै चलाई, अर उसका कान उड़ा दिया।

48 यीशु नै उनतै कह्या, “के थम डाकू जाणकै मन्नै पकड़ण कै खात्तर तलवार अर लाट्टी लेकै लिक्के सो? 49 मै तो हरेक दिन मन्दर म्ह धारे गेल्या रहकै उपदेश दिया करूँ था, अर जिब थमनै मेरै ताहीं कोनी पकड़या: पर न्यू ज्यातै होया सै के पवित्तर ग्रन्थ म्ह लिखी बात पूरी होवै।” 50 यो सब देखकै सारे चेल्लें उसनै छोड़कै भाजगे।

51 एक जवान अपनी उघाड़ी देह पै चादर ओढ़े होइ उसके पाच्छै हो लिया, अर माणसां नै उस ताहीं पकड़या। 52 पर वो चादर छोड़कै उघाड़ा भाजग्या।

☞☞☞☞ ☞☞☞☞☞☞ ☞☞ ☞☞ ☞☞☞☞☞☞☞☞  
(☞☞☞☞ 26:57-68; ☞☞☞☞ 22:54,55; ☞☞☞☞ 18:13-14,19-24)

53 फेर वे यीशु ताहीं महायाजक कै धोरै लेगे, अर सारे परधान याजक, यहूदी अगुवें अर शास्त्रीर उसकै ओड़ै कट्टे होंगे। 54 पतरस दूर ए दूर उसकै पाच्छै-पाच्छै महायाजक कै आँगण कै भीत्तर ताहीं गया, अर सिपाहियाँ कै गेल्या बैठकै आग पै सीकण लाग्या।

55 परधान याजक अर यहूदी अगुवां की सभा यीशु ताहीं मारण कै खात्तर उसकै बिरोध म्ह गवाही की टोह म्ह थे, पर कोन्या मिली। 56 क्यूँके घणखरे उसकै बिरोध म्ह झूट्टी गवाही देवै थे, पर उनकी गवाही एक सी कोनी थी।

57 फेर कुछ माणसां नै उठकै यीशु कै बिरोध म्ह या झूट्टी गवाही दी, 58 “हमनै इस ताहीं कहन्दे सुण्या सै, मै इस हाथ कै बणाए होइ मन्दर नै गेर दियुंगा, अर तीन दिन म्ह दुसरा बणाऊंगा, जो हाथ्यां तै न्ही बण्या हो।” 59 इस बात म्ह भी उनकी गवाही एक सी कोनी लिक्ड़ी।

60 फेर महायाजक नै बिचाटै खड़े होकै यीशु तै बुझ्या, “तू कोए जवाब न्ही देँदा? ये माणस तेरे बिरोध म्ह के गवाही देवै सै?” 61 पर वो बोल-बाल्ला रह्या, अर कुछ जवाब न्ही दिया। महायाजक नै उसतै दुवारा बुझ्या, “के तू ए परम धन्य परमेसवर का बेटटा मसीह सै?”

62 यीशु नै कह्या, “हाँ मै ए सूं: अर थम मुझ माणस के बेटटे ताहीं सर्वशक्तिमान परमेसवर की सोळी ओड़ बेटटे, अर अकास के बादळां कै गेल्या आन्दे देखखोगे।”

63 फेर महायाजक नै अपणे लत्ते पाड़कै कह्या, “इब हमनै गवाह की और के जरूरत सै?”\*

64 थमनै या बुराई सुणी। थारी के राय सै? उन सार्या नै कह्या के यो मारण कै जोग्गा सै। 65 फेर कई तो उसपै थूकते, अर कई उसका मुँह ढकते होए, कई उसकै घुस्से मारते होए उसतै कहण लाग्गे, जै तू नबी सै, “तो भविष्यवाणी कर!” के तेरे कौण मारै सै, अर सिपाहियाँ नै उस ताहीं पकड़के थप्पड़ मारे।

???? ? ? ?????

(???? 26:69-75; ???? 22:56-62; ??? 18:15-18,25-27)

66 जब पतरस तळै आँगण म्ह था, तो महायाजक की नौकराणियाँ म्ह तै एक उड़ै आई, 67 अर पतरस ताहीं आग सिक्दे देखके उस ताहीं गौर तै देख्या अर कहण लाग्गी, “तू भी तो उस नासरत के यीशु कै गेल्या था।”

68 पतरस मुकरग्या, अर बोल्या, “मै ना ए जाण्दा अर ना ए समझूँ सूं के तू के कहवै सै।” फेर वो बाहरणै देहळीया म्ह गया; अर मुर्गे नै बाँग दी।

69 वा नौकराणी उसनै ओड़ै देखके उनतै जो धोरै खड़े थे, दुवारा कहण लाग्गी, “यो उन म्ह तै एक सै।” 70 पर वो फेर मुकरग्या। माड़ी बार पाच्छै उननै जो धोरै खड़े थे फेर पतरस ताहीं कह्या, “पक्का तू उन म्ह तै एक सै, क्यूँके तू गलीली भी सै।”

71 फेर वो धिक्कारण अर कसम खाण लाग्या, “मै उस माणस नै, जिसका थम जिक्कर करो सो, कोनी जाण्दा।”

72 फेर जिब्बे दुसरी बार मुर्गे नै बाँग देई। पतरस ताहीं वाए बात जो यीशु नै उसतै कही थी याद आई “मुर्गे कै दो बर बाँग देण तै पैहल्या तू तीन बार मेरा इन्कार करैगा।” अर वो इस बात नै सोचके फूट-फूटके रोण लाग्या।

## 15

?????? ? ? ????????? ???? ?

(???? 27:1-2; 11-14; ???? 23:1-4; ??? 18:28-38)

1 सबेरा होन्दे जिब्बे सारे परधान याजकां, यहूदी अगुवां अर शास्त्रियाँ नै बल्के यहूदी अगुवां की सभा नै सलाह करके यीशु ताहीं बंधवाया, अर उस ताहीं ले जाके यहूदिया परदेस के हाकिम पिलातुस कै हाथ्यां म्ह सौप दिया।

\* 14:63 14:63 (मत्ती 26:65)

2 पिलातुस नै यीशु तै बुद्धझया, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै।”

3 प्रधान याजक यीशु पै घणी बाततां के इल्जाम लावै थे। 4 पिलातुस नै उसतै फेर बुद्धझया, “के तू कुछ जवाब कोनी देंदा, लखा, ये तेरे पै कितनी बाततां के इल्जाम लावै सै?”

5 यीशु नै फेर कुछ जवाब कोनी दिया; उरै ताहीं के पिलातुस नै घणी हैरानी होई।

☞☞☞☞☞☞☞☞ ☞☞ ☞☞☞☞☞☞

(☞☞☞☞☞ 27:15-26; ☞☞☞☞ 23:13-25; ☞☞☞ 18:39; 19:16)

6 पिलातुस उस त्यौहार म्ह किसे एक कैदी नै जिसनै वे चाहवै थे, उन माणसां खात्तर छोड़ दिया करै था।

7 बरअब्बा नाम का एक माणस उन रोळे करणीया गेल्या कैदी था, जिन नै रोळे म्ह खून करया था। 8 अर भीड़ पिलातुस के धारै जाके उसतै बिनती करण लागगी, के जिसा तू म्हारै खात्तर करदा आया सै उससे तरियां कर।

9 पिलातुस नै उन ताहीं जवाब दिया, “थम के चाहो, के मै थारे खात्तर यहूदियाँ के राजा नै छोड़ दिर्युं?” 10 क्यूँके पिलातुस जाणै था के प्रधान याजकां नै यीशु ताहीं चाल तै पकड़वाया था। 11 पर प्रधान याजकां नै माणसां ताहीं उकसाया के वो यीशु की जगहां बरअब्बा नै छोड़ दे।

12 न्यू सुण पिलातुस नै उनतै फेर बुद्धझया, “तो जिसनै थम यहूदियाँ का राजा कहो सो, उसका मै के कहै?”

13 वे फेर रुक्के मारण लागगे, “उसनै क्रूस पै चढ़ा द्यो!”

14 पिलातुस नै उनतै फेर कह्या, “क्यातै उसनै के बुरा करया सै?” पर वे और भी रुक्के मारण लागगे, “उसनै क्रूस पै चढ़ा द्यो!”

15 फेर पिलातुस नै भीड़ ताहीं राज्जी करण की चाहन्ना तै, बरअब्बा ताहीं उनके खात्तर छोड़ दिया, अर यीशु के कोरडे लगवाके सिपाहियाँ के हाथ म्ह सौप दिया के क्रूस पै चढ़ाया जावै।

☞☞☞☞☞☞☞☞ ☞☞ ☞☞☞☞☞☞☞☞☞☞☞☞☞☞☞☞☞☞

(☞☞☞☞☞ 27:27-31; ☞☞☞ 19:2-3)

16 यीशु ताहीं सिपाही किले के भीत्तर कै आँगण म्ह ले गये जो पिरटोरियुम कुह्वावै सै, अर सारी पलटन ताहीं बुला ल्याए। 17 फेर सिपाहियाँ नै उसका मजाक उड़ाण खात्तर उस ताहीं बैजनी लत्ते पहिराए अर काण्डयां का मुकुट गूँथके उसके सिर पै धरया, 18 अर न्यू कहके उस ताहीं नमस्कार करण लागगे, “हे यहूदियाँ के राजा, नमस्कार!” 19 वे उसके सिर पै सरकण्डे मारदे, अर उसपै धूकदे, अर गोड्डे टेक के उसनै प्रणाम करदे रहे। 20 जिव उननै उसका मजाक उड़ा लिया, तो उसपै तै बैजनी लत्ते उतारके उससे के लत्ते पहिराए; अर फेर उस ताहीं क्रूस पै चढ़ाण कै खात्तर बाहरणै ले गये।

☞☞☞☞☞☞☞☞ ☞☞ ☞☞☞☞☞☞☞☞☞☞☞☞☞☞☞☞☞☞

(☞☞☞☞☞ 27:32-44; ☞☞☞☞ 23:26-43; ☞☞☞ 19:17-27)

21 सिकन्दर अर रूफुस का पिता शमोन, जो कुरेन परदेस का बसिन्दा था, वो यरुशलेम की ओड़ आण लागरया था; उननै उस ताहीं बेकार म्ह पकडचा ताके यीशु का क्रूस ठाके ले चाल्लै। 22 वे यीशु ताहीं गुलगुता नामक जगहां पै लियाए, जिसका मतलब खोपड़ी की जगहां सै। 23 ओड़ै उस ताहीं सिरका मिल्या होड़ अंगूर का रस देण लागगे, पर उसनै कोनी लिया। 24 फेर उननै उस ताहीं क्रूस पै चढ़ाया अर उसके लत्यां पै पर्ची गेर कै, के किसनै के मिल्लै, उननै बांड लिये।

25 अर सबरै के नौ बजे थे, जिव उननै यीशु ताहीं क्रूस पै चढ़ाया। 26 अर उसका दोषपत्र लिखके क्रूस कै उपर लगा दिया के “यहूदियाँ का राजा।”

27 उननै उसके गेल्या दो डाकू, एक उसकी सोळी अर एक उसकी ओळी ओड़ क्रूस पै चढ़ा दिये।

28 (तब पवित्र ग्रन्थ का वो वचन के वो अपराधियाँ गेल्या गिण्या गया, पूरा होया।) 29 अर राह म्ह जाण आळे सिर हला-हल्लाके अर न्यू कहके उसकी बेजती करै थे, “वाह! मन्दर के गेरण आळे,

अर तीन दिन म्ह बणाण आळे! <sup>30</sup> कूरूस पै तै उतरकै अपणे-आपनै बचाले।" <sup>31</sup> इस्से तरियां तै प्रधान याजक भी, शास्त्रियाँ सुधा, आप्स म्ह मजाक करके कहवै थे, "इसनै औरां ताहीं बचाया, पर अपणे-आपनै न्ही बचा सकदा। <sup>32</sup> इस्राएल का राजा, मसीह, इब कूरूस पै तै उतर आ, के हम देखकै विश्वास करया।" अर जो डाकू उसकै गेल्या कूरूस पै चढ़ाए गए थे, वे भी उसकी बेजती करै थे।

ॐॐॐ ॐ ॐ ॐ ॐॐॐ

(ॐॐॐॐ 27:45-56; ॐॐॐ 23:44-49; ॐॐ 19:28-30)

<sup>33</sup> दोफारी होण पै सारे देश म्ह अंधेरा छाग्या, अर तीन बजे ताहीं रहया। <sup>34</sup> तीन बजे यीशु नै बड़े जोर तै रुकके मारकै कहा, "इलोई, इलोई, लमा शबक्तनी?" जिसका मतलब यो सै, "हे मेरे परमेसवर, हे मेरे परमेसवर, तन्नै मेरै ताहीं क्यातै छोड़ दिया?"

<sup>35</sup> जो धौरै खड़े थे, उन म्ह तै कितन्याँ नै न्यू सुणकै कहा, "लखाओ, वो एलिय्याह ताहीं बुलावै सै।"

<sup>36</sup> अर एक नै भाजकै फोम ताहीं सिरके म्ह डबोया, अर सरकण्डे पै धरकै उस ताहीं चुसाया अर कहा, "ठैहर जाओ, देख्वां, एलिय्याह उस ताहीं उतारण खात्तर आवै सै के न्ही।"

<sup>37</sup> फेर यीशु नै बड़े जोर तै किल्की मारकै जी दे दिया।

<sup>38</sup> अर मन्दर का पड़दा उप्पर तै तळै ताहीं पाटके दो टुकड़े होगया। <sup>39</sup> जो सूबेदार उसकै स्याम्ही खडचा था, जिव उस ताहीं इस ढाळ किल्की मारकै जी देन्दे देख्या, तो उसनै कहा, "साच्चए यो माणस, परमेसवर का वेट्टा था!"

<sup>40</sup> कई बिरबान्नी भी दूर तै देखवै थी: उन म्ह मरियम मगदलीनी\*, छोट्टे याकूब अर योसेस की माँ मरियम, अर सलोमी थी। <sup>41</sup> जिव यीशु गलील परदेस म्ह था, तो ये जनानियाँ जो यीशु की चेल्ली थी, वो उसकी सेवा-पाणी करया करै थी; अर घणखरी बिरबान्नी भी थी, जो उसकै गेल्या यरुशलैम नगर तै आई थी।

ॐॐॐ ॐ ॐ ॐॐॐ ॐॐ ॐ ॐॐॐॐ ॐॐॐ

(ॐॐॐॐ 27:57-61; ॐॐॐ 23:50-56; ॐॐ 19:38-42)

<sup>42</sup> यो आराम के दिन का एक दिन पैहले की तैयारी का दिन था, अर इब साँझ हो गयी थी।†

<sup>43</sup> अरिमतिया गाम का बासिन्दा यूसुफ आया, जो बड्डी सभा का खास माणस था अर खुद भी परमेसवर के राज्य की बाट देखवै था। वो हिम्मत करके पिलातुस के धौरै गया अर यीशु की लाश माँगी। <sup>44</sup> पिलातुस नै हैरानी होई के वो इतनी तावळी मरग्या, उसनै सूबेदार ताहीं बुलाकै बुझ्झया, "के उस ताहीं मरे होए वार होई सै?" <sup>45</sup> जिव उसनै सूबेदार के जरिये हालत जाण ली, तो लाश यूसुफ ताहीं दुवा दी। <sup>46</sup> फेर उसनै मलमल की एक चादर मोल ली, अर लाश ताहीं उतारकै उस चादर म्ह लपेटा, अर एक कवर म्ह जो चट्टान म्ह खोद राख्खी थी धरया, अर कवर के बारणै पै एक पत्थर गिरडा दिया। <sup>47</sup> मरियम मगदलीनी‡ अर योसेस की माँ मरियम देखवै थी के वो कित धरया गया सै।

## 16

ॐॐॐ ॐ ॐ ॐॐॐ ॐॐ ॐ ॐॐॐॐ ॐ ॐॐॐ

(ॐॐॐॐ 28:1-8; ॐॐॐ 24:1-12; ॐॐ 20:1-10)

<sup>1</sup> जिव आराम का दिन बीतग्या, तो मरियम मगदलीनी\*, अर याकूब की माँ मरियम, अर सलोमी नै खसबूदार चीज मोल ली, ताके आकै यीशु की लाश पै मळै। <sup>2</sup> हफ्ते के पैहलडे दिन तड़कै ए तड़कै सूरज लिकड़ाए था, वे कवर पै आई, <sup>3</sup> अर आप्स म्ह कहवै थी, "म्हारै खात्तर कवर के दरबाजे पै तै पत्थर कौण गिरड़ावैगा?"

\* 15:40 15:40 मगदला गाम की मरियम † 15:42 15:42 (यो सब कुछ विश्रामदिन की तैयारी के एक दिन पैहले होया)

‡ 15:47 15:47 मगदला गाम की मरियम

\* 16:1 16:1 मगदला गाम की मरियम

4 जब उननै कबर की ओड़ निगांह करी, तो देख्या के पत्थर गिरइया होया सै! यो घणाए बड्डा था। 5 कबर कै भीत्तर जाकै उननै एक जवान ताहीं धोळे लत्ते पहरै होइ सोळी ओड़ बेट्टे देख्या, अर उननै घणी हैरान होई।

6 उसनै उनतै कह्या, "हैरान मतना होवो, थम यीशु नासरी† नै टोह्वो सो, जो कूरूस पै चढाया गया था, वो जिन्दा होगया सै, अर उरै कोनी; लखाओ, याए वा जगहां सै, जित्त उननै यीशु की लाश ताहीं धरया था। 7 पर थम जाओ, अर उसके चेल्यां अर पतरस ताहीं कहो के वो थारे तै पैहल्या गलील परदेस म्ह जावैगा। जिसा के उसनै थारे तै कह्या था, थम ओड़ैए उसनै देखोगे।"

8 अर वे लिकइके कबर तै बाहर भाजग्यी; क्यूके वे काम्बगी अर उनकै घबराट होगी थी; अर उननै किसे तै कुछ न्ही कह्या, क्यूके वे डरै थी।

⚠⚠⚠⚠ ⚠⚠⚠⚠⚠⚠⚠⚠ ⚠⚠ ⚠⚠⚠⚠ ⚠⚠ ⚠⚠⚠⚠⚠⚠  
(⚠⚠⚠⚠ 28:9-10; ⚠⚠⚠ 20:11-18)

9 हफ्ते के पैहलडे दिन सबेर होन्दे यीशु जिन्दा होके पैहलम-पैहल्या मरियम मगदलीनी ताहीं जिसम्ह तै उसनै सात ओपरी आत्मा काड्डी थी, दिख्या। 10 उसनै जाकै यीशु के साथियाँ ताहीं खबर दी, जो दुख म्ह डूबरे थे, अर रोवै थे। 11 उननै न्यू सुणकै के वो जिन्दा सै, अर मरियम मगदलीनी नै उस ताहीं देख्या सै, उसकी बात का विश्वास कोनी करा।

⚠⚠ ⚠⚠⚠⚠⚠⚠⚠⚠ ⚠⚠ ⚠⚠⚠⚠ ⚠⚠ ⚠⚠⚠⚠⚠⚠  
(⚠⚠⚠ 24:13-35)

12 इसकै बाद यीशु दुसरे रूप म्ह उन म्ह तै दो चेल्यां ताहीं दिख्या, जब वे गाम कान्ही जावै थे। 13 उननै भी यरुशलेम नगर तै वोहइके दुसरयां ताहीं इस बारें म्ह खबर दी, पर उननै उनका भी विश्वास कोनी करया।

⚠⚠⚠⚠⚠⚠⚠⚠ ⚠⚠ ⚠⚠⚠⚠ ⚠⚠ ⚠⚠⚠⚠⚠⚠  
(⚠⚠⚠⚠ 28:16-20; ⚠⚠⚠⚠ 24:36-49; ⚠⚠⚠ 20:19-23; ⚠⚠⚠⚠⚠⚠ 1:6-8)

14 पाच्छै, यीशु उन ग्यारहां चेल्यां ताहीं भी दिख्या, जब वे खाणा खाण बेट्टे थे, अर उनकै अविश्वास अर मन की कठोरता पै उल्हाणा दिया, क्यूके जिन नै उसकै जिन्दा होण कै पाच्छै उस ताहीं देख्या था, चेल्यां नै उनका भी विश्वास कोनी करया था।

15 अर यीशु नै उनतै कह्या, "थम सारी दुनिया म्ह जाकै सारी सृष्टि के माणसां ताहीं सुसमाचार प्रचार करो। 16 जो विश्वास करै अर बपतिस्मा लेवै उस्से का उद्धार होवैगा, पर जो विश्वास कोनी करैगा वो कसूरवार ठहराया जावैगा; 17 विश्वास करण आळा म्ह या निशान्नी होवैगी के वे मेरै नाम तै ओपरी आत्मायाँ नै काड्डैगें, नई-नई भाषा बोल्लैगें, 18 साँप नै हाथ्यां म्ह टा लेवैगें, अर जै वे गलती तै जहर भी पी जावै तोभी उनका कुछ न्ही बिगडैगा; वे बिमारां पै हाथ धरैगें, अर वे चंगे हो जावैगें।"

⚠⚠⚠⚠ ⚠⚠ ⚠⚠⚠⚠⚠⚠⚠⚠ ⚠⚠⚠ ⚠⚠⚠⚠  
(⚠⚠⚠⚠ 24:50-53; ⚠⚠⚠⚠⚠⚠ 1:9-11)

19 फेर प्रभु यीशु उनतै बात करण कै पाच्छै सुर्ग पै टा लिया गया, अर परमेसवर कै सोळी ओड़ बैठग्या। † 20 अर उननै लिकइके हरेक जगहां प्रचार करया, अर प्रभु उनकै गेल्या काम करदा रहया, अर उन निशान्नी कै जरिये जो गैल-गैल होवै थे, अर साबित करदा रहया के वचन सच्चा सै। आमीन।

† 16:6 16:6 नासरत नगर का रहण आळा ‡ 16:19 16:19 (1 पत्त-3:22)

## लूका के जरिये लिख्या गया सुसमाचार

~~~~~

लूका के जरिये लिखे गये सुसमाचार नै यीशु ताहीं इस्राएली माणसां के खात्तर करे होए वादे का मुक्तिदाता अर सारे मानव जाति का उद्धारकर्ता, दोनुआ ए के तौर पै पेश करया सै। लूका लिखै सै के यीशु ताहीं “कंगालां ताहीं सुसमाचार सुणाण खात्तर” प्रभु की आत्मा नै बुलाया था। इसे कारण यो सुसमाचार कई तरियां की समस्या म्ह पड़े माणसां की चिन्ता तै भरा पड्या सै। लूका के जरिये लिखे गये सुसमाचार म्ह आनन्द के भाव की भी झलक देखै सै, खासकर शरुआती पाटां म्ह, जिन म्ह यीशु के आण की घोषणा करी गई सै, अर आखर म्ह भी जडै यीशु के सुर्ग जाण का जिक्र सै। यीशु के सुर्ग जाणके बाद मसीह बिश्वास की बढ़ोतरी अर ब्यौरे का खुलासा इस्से लेखक के जरिये प्रेरितां के जरिये करे गए काम की किताब म्ह दिया सै। दुसरे अर छटे भाग म्ह भोत सी बात सिर्फ इसे सुसमाचार म्ह पाई जावै सै। मिसाल के तौर पै, यीशु, के जन्म पै सुर्गदत्तां का गीत, पाळीयां का यीशु ताहीं देखण जाणा, यरुशलेम नगर के मन्दर म्ह बाळक यीशु, दयालु सामरी अर उड़ाऊ बेटे की कहानी आदि। पूरे सुसमाचार म्ह प्रार्थना, पवित्र आत्मा, यीशु के जरिये माणसां की सेवा म्ह विरवानियां की भूमिका, अर परमेसवर के जरिये पापां की माफी पै घणा ज्यादा जोर दिया सै।

रूप-रेखा

जानकारी 1:1-4

यूहन्ना बपतिस्मा देण आळा अर यीशु का जन्म अर बचपन 1:5-2:52

यूहन्ना बपतिस्मा देण आळे कै जरिये माणसां की सेवा 3:1-20

यीशु का बपतिस्मा अर इम्तिहान 3:21-4:13

गलील परदेस म्ह यीशु के जरिये माणसां की सेवा 4:14-9:50

गलील परदेस तै यरुशलेम नगर ताहीं का सफर 9:51-19:27

यरुशलेम नगर म्ह आखरी हफ्ता 19:28-23:56

प्रभु का जिन्दा हो जाणा, दिखाई देणा, अर सुर्ग म्ह जाणा 24:1-53

~~~~~

1 हे जनाब थियुफिलुस, घणखरयां माणसां नै म्हारे बिचाळे घटी बाततां का ब्यौरा लिखण की कोशिश करी सै। 2 शरुआत तै ए जो यीशु मसीह की सेवकाई म्ह साथ थे अर वे बाद म्ह वचन के सेवक बणगे, उननै ए आंखां देखी बात म्हारे ताहीं बताई। 3 इस करके हे जनाब थियुफिलुस, मन्नै भी यो ठीक लाग्या के उन सारी बाततां का सारा हाल शरु तै आच्छी दाहू परख के, उननै तेरे खात्तर क्रमानुसार\* लिखूँ 4 के तू या जाण ले के वो बात जिनकी तन्नै शिक्षा पाई सै, वो सच्ची सै।

~~~~~

5 यहूदिया परदेस के राजा हेरोदेस के बखत म्ह अबिव्याह के टोळ म्ह जकरयाह नाम का एक याजक था, अर उसकी घरआळी का नाम एलीशिवा था, अर दोन्नु हारुन की पीढ़ी के थे। 6 वे दोन्नु परमेसवर के स्याम्ही धर्मी थे, अर प्रभु के सारे हुकम अर नियमां पै बेखोट चालण आळे थे। 7 पर उनकै कोए भी ऊलाद कोनी थी, क्यूँके एलीशिवा बाँझ थी, अर वे दोन्नु ए बूढ़े थे।

8 एक दिन मन्दर म्ह जिब याजक के काम की बारी जकरयाह के टोळ की आई, तो वो परमेसवर के स्याम्ही पूजा करण खात्तर ओड़ै मौजूद था, 9 तो याजकां की रीत के मुताबिक उसकै नाम की चिट्ठी लिक्डी के प्रभु के मन्दर म्ह जाके धूप जळावै। 10 धूप जळाण के बखत माणसां की भीड़ बाहरणै आँगण म्ह प्रार्थना करै थी।

\* 1:3 1:3 क्रमानुसार-लंगपतार म्ह

11 उस बखत प्रभु का एक सुर्गदूत धूप की वेदी<sup>†</sup> के सोळी ओड़ खडचा दिख्या । 12 जकरयाह देखके घबराग्या अर घणा डरग्या । 13 पर सुर्गदूत उसतै बोल्या, “हे जकरयाह, डरै ना, क्यूँके परमेसवर नै तेरी प्रार्थना सुणली सै, अर तेरी घरआळी एलीशिबा तेरे खात्तर एक बेट्टा जाम्मैगी, अर तू उसका नाम यूहन्ना धरिये । 14 वो तेरे ताहीं तो आनन्द अर खुशी देवैगा, साथ म्ह भोत-से माणस भी उसके जन्म तै राज्जी होवैगें । 15 क्यूँके वो प्रभु के स्याम्ही घणा महान् होगा, अर उस ताहीं कदे भी मदिरा, नशीली चीज न्ही पीणी सै, अर अपणी माँ की कोख तै ए पवित्तर आत्मा तै भर ज्यागा । 16 अर इस्राएल के भोत-से माणसां के मन प्रभु परमेसवर की ओड़ मोड़ देवैगा । 17 यूहन्ना एलिय्याह नबी की आत्मा अर सामर्थ्य म्ह भरा होगा, अर वो परमेसवर के राह नै तैयार करैगा, वो माँ-बाप का मन बाळकां की ओड़ मोड़ देवैगा । हुकम ना मानण आळे अधर्मियाँ की सोच नै धर्मियाँ की सोच म्ह बदल देवैगा ।”

18 जकरयाह नै सुर्गदूत तै बुझया, “इस बात का मै किस तरियां विश्वास करूँ? के यो म्हारे गैल होवैगा, क्यूँके मै तो बूढ़ा सूं, अर मेरी घरआळी भी बूढ़ी होरी सै ।”

19 सुर्गदूत नै उसतै जवाब दिया, “मै जिब्राईल सूं, जो परमेसवर के आगुँ खडचा रहूँ सूं, अर मै तेरे तै बात करण अर सुसमाचार देण खात्तर भेज्या सूं । 20 अर देख जिब ताहीं ये बात पूरी ना हो लेंगी, तू गुँगा रहवैगा अर बोल न्ही पावैगा क्यूँके तन्नै मेरी बाततां का विश्वास न्ही करया, जो अपणे बखत पै पूरी होंगी ।”

21 बाहर जकरयाह की बाट देखण आळे माणस अचम्भे म्ह पड़गे, के उसनै मन्दर म्ह इतनी वार क्यूँ लागी । 22 जिब वो बाहर आया, तो उन ताहीं बोल न्ही पाया आखर वो जाणगे के उसनै मन्दर म्ह कोए दर्शन पाया सै, अर वो उन ताहीं इशारे करदा रह्या, अर गुँगा होग्या ।

23 जिब उसकी याजकीय सेवा के दिन पूरे होए, तो वो यरुशलेम नगर नै छोड़ अपणे घरां चल्या गया ।

24 कई दिनां पाच्छै उसकी घरआळी एलीशिबा गर्भवती होगी, अर पाँच महिन्ने तैई अपणे-आप ताहीं ल्हकोए राख्या, 25 उसनै अपणे-आप तै कह्या, प्रभु नै इन दिनां म्ह दया की मेहर करके मेरै खात्तर इसा करया सै, “के माणसां के बीच म्ह मेरा अपमान दूर हो ।”



26 एलीशिबा के छटा महिन्ना चढ़ रह्या था, परमेसवर की ओड़ तै जिब्राईल सुर्गदूत, गलील परदेस के नासरत नगर म्ह, 27 एक कुँवारी के धोरे भेज्या जिसकी सगाई यूसुफ नाम के दाऊद के घराने के एक माणस तै होई थी, उस कुँवारी का नाम मरियम था । 28 जिब्राईल सुर्गदूत नै उसके धोरे आके कह्या, “आनन्द अर जयजयकार तेरी हो तेरे पै ईश्वर का अनुग्रह होया सै! प्रभु तेरे गेल्या सै!”

29 मरियम या बात सुणके भोत घबरा गयी, अर सोच म्ह पड़गी के इन बाततां का के मतलब हो सके सै? 30 सुर्गदूत नै उसतै कह्या, “हे मरियम, डरै ना, क्यूँके परमेसवर का अनुग्रह तेरे पै होया सै ।

31 अर देख, तू गर्भवती होगी, अर तेरे एक छोरा पैदा होगा, तू उसका नाम यीशु धरिये । 32 वो महान् होगा अर परमप्रधान का बेट्टा कुह्नावैगा, अर प्रभु परमेसवर उसके पूर्वज दाऊद का सिंहासन उसनै देवैगा, 33 अर वो इस्राएल के घराने पै सदा राज करैगा, अर उसके राज्य का अंत न्ही होगा ।”

34 मरियम नै सुर्गदूत तै कह्या, “यो किस तरियां होगा । मै तो कुँवारी सूं ।”

35 सुर्गदूत नै उस ताहीं जवाब दिया, “पवित्तर आत्मा तेरे पै आवैगा अर परमप्रधान की सामर्थ्य तेरे पै छाया करैगी, इस खात्तर वो जो बाळक पैदा होण आळा सै, पवित्तर अर परमेसवर का बेट्टा कुह्नावैगा । 36 अर सुण, तेरी रिस्तेदार जो एलीशिबा सै उसके भी बुढ़ापे म्ह बेट्टा होण आळा सै, जो बाँझ कुह्नावै थी यो उसका, छटा महिन्ना सै । 37 क्यूँके परमेसवर खात्तर कुछ भी मुश्किल कोनी सै ।”

† 1:11 1:11 वेदी-परमेसवर ताहीं भेट चढ़ाण खात्तर एक जगहां



38 मरियम नै कहुआ, “देख, मै प्रभु की दास्सी सू, मेरै तै तेरे कहैए वचन कै मुताबिक हो।” फेर सुर्गदूत उसके धोरै तै चल्या गया।

~~~~~

39 कई दिनां बाद मरियम ताव्नी तैयार होके पहाड़ी परदेस के यहूदा नगर म्ह गयी, 40 अर जकरयाह कै घर म्ह जाके एलीशिबा ताहीं नमस्कार करया। 41 ज्योए एलीशिबा नै मरियम का नमस्कार सुणया, त्योए बाळक उसके पेट म्ह उछळ्या, अर एलीशिबा पवित्त्र आत्मा तै भरगी। 42 अर उसने ऊँची आवाज म्ह बोलके कहुआ, “तू विरबानियां म्ह धन्य सै, अर तेरी कोख का फळ धन्य सै! 43 मै खुशनसीब सू जो प्रभु की माँ मेरै धोरै मिलण खात्तर आई? 44 देख, ज्योए तेरे नमस्कार का बोल मेरै कान्ना म्ह पड्या, त्योए बाळक मेरे पेट म्ह खुशी तै उछळ पड्या। 45 धन्य सै तू क्यूँके तन्नै विश्वास करया के जो बात प्रभु नै तेरे ताहीं कही, वे पूरी होई!”

~~~~~

46 फेर मरियम नै कहुआ,  
“मेरा जी प्रभु की बड़ाई करै सै  
47 अर मेरी आत्मा मेरै उद्धार करण आळे परमेसवर तै खुश होई,”  
48 “क्यूँके उसने अपणी दास्सी की लाचारी पै निगांह करी सै,‡  
इस खात्तर देखो, इब तै सारे युग-युग कै माणस मन्नै धन्य कहवैगें,”  
49 “क्यूँके उस शक्तिशाली नै मेरै खात्तर बड़े-बड़े काम करै सै। उसका नाम पवित्त्र सै,”  
50 “अर उसकी दया उनपै, जो उसतै डरै सै, पीढ़ी तै पीढ़ी बणी रहवै सै।”  
51 “उसने अपणी शक्ति तै बड़े-बड़े काम करै सै, अर जो अपणे-आप म्ह घमण्ड करै थे, उन ताहीं तित्तर-वित्तर कर दिया।”  
52 “उसने शासकां ताहीं उनके सिंहासनान पै तै गिरा दिया, अर नम्र लोग्गं ताहीं ऊँचा उठा दिया।”  
53 “उसने भूख्या ताहीं बढ़िया चिज्जां तै छिकाया सै, अर साहूकारां ताहीं खाल्ली हाथ भेज दिया।”  
54 “उसने अपणे सेवक इस्राएल ताहीं सम्भाल लिया, ताके अपणी उस दया नै याद करै,”  
55 “जो उसने अब्राहम अर उसकी पीढ़ी पै सदा खात्तर दया करण का वादा करया सै।”  
56 मरियम करीब तीन महिन्ने उसके गेल्या रहके उल्टी अपणे घरां चली गयी।

~~~~~

57 फेर एलीशिबा कै दिन पूरे होए अर उसने बेट्टा जाम्या। 58 उसके पड़ोसी अर रिश्तेदारां नै या सुणके के प्रभु नै उसपै बड़ी दया करी सै, उसके गेल्या खुशी मनाई,  
59 आठवे दिन वे बाळक का खतना करण ताहीं आये, अर उसका नाम उसके पिता के नाम पै जकरयाह धरणा चाहवै थे। 60 इस पर उसकी माँ एलीशिबा नै जवाब दिया, “ना, इसका नाम यूहन्ना धरो।”  
61 उननै उस ताहीं कहुआ, “तेरे रिश्तेदारा म्ह किसे का यो नाम न्ही सै!”  
62 फेर उसके पिता तै इशारा करके पूछ्या कै तू उसका नाम कै धरणा चाहवै सै? 63 उसने लिखण की पट्टी पै लिख दिया, “उसका नाम यूहन्ना सै,” अर सारा नै अचम्भा होया। 64 फेर उसकी आवाज बोहड़ आई, अर वो बोल्लण अर परमेसवर का धन्यवाद करण लाग्या। 65 उसके लोवै-धोरै कै सब रहण आळे डरगे, अर उन सारी बात्तां की चर्चा यहूदिया परदेस कै सारे पहाड़ी देश म्ह फैलगी, 66 अर सब सुणण आळा नै अपणे-अपणे मन म्ह विचार करके कहुआ, “यो बाळक किसा होगा?” क्यूँके प्रभु की शक्ति उसके साथ सै।

~~~~~

67 उसका पिता जकरयाह पवित्त्र आत्मा तै भरग्या, अर भविष्यवाणी करण लाग्या:

- 68 “प्रभु इस्राएल का परमेश्वर धन्य है, क्योंकि उसने अपने माणसां पै निगाह करी अर उनका उद्धार करया है,
- 69 अर अपने दास दाऊद के घराने म्ह म्हारै खात्तर एक शक्तिशाली उद्धारकर्ता तारीं भेज्या है,
- 70 (भोत पैहले प्रभु नै अपने पवित्र नबियाँ के जरिये यो कह्या था)
- 71 के वो हमनै दुश्मनां तै बचावैगा अर मेरे तै नफरत करण आळे की ताकत तै भी हमनै बचावैगा ।
- 72 उसने कह्या, के वो म्हारै पूर्वजां पै दया करैगा अर अपने पवित्र करार नै याद राखैगा,
- 73 अर वो करार जो उसने म्हारै पूर्वज अब्राहम तै करया था,
- 74 उसने वादा करया है, के वो म्हारे दुश्मनां के हाथ तै हमनै छुड़ावैगा,
- 75 ताके जिन्दगी भर उसकै आगुँ पवित्रता अर धार्मिकता तै बिना डरें उसकी सेवा कर सकां ।
- 76 हे मेरे बेटे, तू परमप्रधान का नबी कुह्लावैगा, क्योंकि तू प्रभु का रास्ता तयार करण के खात्तर आगुँ-आगुँ चाल्लैगा,
- 77 तू उसकै माणसां नै उद्धार का ज्ञान देगा, जो पापां की माफी तै मिलै सै ।
- 78 यो म्हारे परमेश्वर की उस बड़ी दया तै होगा । जिस तरियां सूरज चमकै सै, उसी तरियां मसीहा भी सुर्ग तै म्हारे धोरै आवैगा
- 79 ताके अन्धेरे अर मौत की छाया म्ह बैठण आळा नै रोशनी दे, वा रोशनी सही राह पै चाल्लण म्ह म्हारी मदद करैगी ।”
- 80 अर बाळक यूहन्ना देह अर आत्मा म्ह मजबूत होन्दा गया, अर इस्राएल के माणसां पै जाहिर होण तै पैहले वो जंगल-बियाबान म्ह रह्या ।

## 2

ॐॐॐ ॐॐ ॐॐॐ

(ॐॐॐॐ 1:18-25)

1 उन दिनां म्ह ओगुस्तुस कैसर की कान्ही तै हुकम लिक्इया के, सारे रोमी साम्राज्य के माणसां की जनगणना करके उनके नाम लिक्खे जावै । 2 (या पैहली नाम लिखाई उस बखत होई, जिव क्विरिनियुस सीरिया परदेस के इलाके का राज्यपाल था) । 3 सारे माणस नाम लिखाण के खात्तर अपने-अपने पुत्रतैनी नगर म्ह गए ।

4 आखर यूसुफ भी इस करके के वो भी दाऊद के कुण्वे अर पीढ़ी का था, गलील परदेस के नासरत नगर तै गया, यहूदिया परदेस म्ह दाऊद के बैतलहम नगर म्ह आया, 5 ताके अपनी मंगेतर मरियम के गेल्या जो गर्भवती थी, उस जनगणना म्ह नाम लिखवावै । 6 उनके बैतलहम नगर रहन्दे होए उसके जाम्मण के दिन पूरे होए, 7 अर मरियम नै अपना जेट्टा छोरा जाम्या अर उस तारीं लत्ते म्ह लपेटके खोर म्ह धरया, क्योंकि उनके खात्तर सराये म्ह जगहां कोनी थी ।

ॐॐॐॐॐॐॐॐॐ ॐॐ ॐॐॐॐ ॐॐॐॐॐॐॐॐॐ ॐॐॐॐ ॐॐॐॐ

8 अर उस देश म्ह कई पाळी थे, जो रात नै मदानां म्ह रहके अपनी भेड़ों के टोळ की रुखाळ करे थे । 9 अर उस्ते रात नै प्रभु का एक सुर्गदूत उनके धोरै आण खडचा होया, अर प्रभु का प्रताप उसके उप्पर चमक्या, अर वे घणे डरगे । 10 सुर्गदूत नै उनतै कह्या, “मतना डरो, क्योंकि देखो, मै थमनै घणी खुशी की खबर सुणाऊँ सूं, जो सारे माणसां खात्तर होगी, 11 आज दाऊद के नगर बैतलहम म्ह थारे खात्तर एक उद्धारकर्ता जाम्या है, अर योए मसीह प्रभु है । 12 अर उसकी थारे खात्तर या निशान्नी होगी के थम एक बाळक नै लत्ते म्ह लिपटचा होइ अर खोर म्ह लेटचा होइ पाओगे ।”

13 फेर चाणचक उस सुर्गदूत गेल्या सुर्गदूतां का एक टोळ परमेश्वर की भगति करदे होए अर न्यू कहन्दे दिख्या,

14 “अकास म्ह परमेश्वर की महिमा अर धरती पै उन माणसां म्ह जिनतै वो राज्जी है, शान्ति हो ।”

15 जिव सुर्गदूत उसके धौरै तै सुर्ग म्ह चले गए, तो पाळीयाँ नै आप्पस म्ह कह्या, “आओ, हम बैतलहम नगर जाके या बात जो होई सै, अर जो प्रभु नै म्हारै ताहीं बताई सै, देख्वाँ।”

16 अर उननै जिव्बे जाके मरियम अर यूसुफ ताहीं अर खोर म्ह उस बाळक ताहीं लेटचा देख्या।

17 जिव पाळीयाँ नै बाळक ताहीं देख्या तो उननै वे सारी बात जो सुर्गदूत नै इस बाळक कै बाबत उनतै कही थी, यूसुफ अर मरियम ताहीं बताई। 18 अर पाळीयाँ की ये बात सुणकै सारे सुणण आळा नै अचम्भा करया। 19 पर मरियम ये बात अपने मन म्ह धरकै सोचदी रई। 20 अर जिसा पाळीयाँ ताहीं सुर्गदूतां नै कह्या था, सब कुछ उसाए सुणकै अर देखकै, वे परमेसवर की महिमा अर जय-जयकार करदे होए बोहड़गे।

\*\*\*\*\*

21 जिव आठ दिन पूर होए अर उसके खतने का बखत आया, तो उसका नाम यीशु धरया गया, अर यो नाम सुर्गदूत के जरिये, मरियम के गर्भ म्ह आण तै पैहल्या बताया गया था।

\*\*\*\*\*

22 जिव मूसा नबी के नियम-कायदा के मुताबिक मरियम अर यूसुफ कै सूंचे होण के दिन पूरे होए, तो वे दोन्नु यीशु नै यरुशलेम नगर के मन्दर म्ह लेगे के प्रभु कै स्याम्ही ल्याए, 23 (जिसा के प्रभु के नियम-कायदा म्ह लिख्या होइ सै: हरेक जेट्टा बेट्टा प्रभु कै खात्तर पवित्तर ठहरैगा।) 24 अर प्रभु कै नियम-कायदा के वचन के मुताबिक “एक कबूतर या मोड़डी के दो बच्चे ल्याके बलि करै।”

\*\*\*\*\*

25 उस बखत यरुशलेम नगर म्ह शमौन नाम का एक माणस था। वो धर्मी अर परमेसवर का भगत था, अर वो मसीह की बाट देखण लागरया था, ताके इस्राएल के माणसां नै शान्ति मिले अर पवित्तर आत्मा उसपै था। 26 अर पवित्तर आत्मा के जरिये उसपै जाहिर होया था के जिव तक वो प्रभु के मसीह नै देख न्ही लेगा, जद ताहीं मौत नै कोनी देखैगा। 27 शमौन आत्मा की अगुवाई तै मन्दर म्ह आया, अर जिव माँ-बाप उस बाळक यीशु ताहीं भीत्तर ल्याए, ताके उसके खात्तर नियम-कायदा के रिवाज के मुताबिक करै, 28 फेर उसनै बाळक यीशु ताहीं अपनी गोद्दी म्ह लिया अर परमेसवर का धन्यवाद करकै कह्या

29 “हे प्रभु माल्लिक, इब तू अपने दास नै अपने वचन के मुताबिक शान्ति तै इब मर जाणदे,

30 क्यूँके मेरी आँखां नै उद्धारकर्ता ताहीं देख लिया सै,

31 जिस ताहीं तन्नै सारे देशां के माणसां कै स्याम्ही भेज्या सै,

32 ताके वो गैर यहूदियाँ ताहीं चाँदणा देण के खात्तर उजाळा, अर तेरे अपने माणस इस्राएल की महिमा हो।”

33 यीशु के माँ-बाप इन बाततां तै, जो शमौन नै यीशु कै बारे म्ह कही थी, सुणकै अचम्भा करै थे।

34 फेर शमौन नै उन ताहीं आशीर्वाद देकै, उसकी माँ मरियम तै कह्या, “देख, यो बाळक इस्राएल म्ह भोत-से माणसां के पतन अर उत्थान का कारण बणैगा, अर या निशान्ती के रूप म्ह परमेसवर की ओड़ तै भेज्या होया सै, अर भोत सारे लोग उसके विरुध बोल्लैगें। 35 इसका नतिज्जा यो होगा के भोत सारे मनां के विचार जाहिर हो जावेंगे, अर एक भोत बड़ा दुख तेरे पै आवैगा\*।”

\*\*\*\*\*

36 अशर के गीत म्ह तै हन्नाह नामक फनूएल की बेट्टी एक नबी थी। वा घणी बूढ़ी थी, अर ब्याह होण कै सात साल पाच्छै उसका धणी गुजर गया। 37 वा चौरासी साल तै विधवा थी: अर मन्दर म्ह जाणा कोनी छोड्या करै थी, पर बरत अर प्रार्थना कर-करके रात-दिन भगति करया करै थी।

38 जिव यूसुफ, मरियम अर बाळक यीशु, मन्दर म्ह थे, तो हन्नाह उनके धौरै आई अर परमेसवर का धन्यवाद करण लागी, अर उसनै उन सारया ताहीं इस बाळक यीशु के बारे म्ह बताया, जो यरुशलेम कै छुटकारे की बाट देखै थे।

\* 2:35 2:35 अर एक भोत बड़ा दुख तेरे पै आवैगा अर एक तलवार तेरे दिल पै चाल्लैगी

३३३३३ ३३ ३३३३ ३३३३३

39 यहूदी<sup>†</sup> नियम-कायदा ने पूरा करण के बाद यूसुफ अर मरियम गलील परदेस के नासरत नगर म्ह अपणे घरां बोहड़ आये। 40 अर बाळक यीशु बढदा, अर मजबूत होन्दा, अर बुद्धि तै भरपूर होंदा गया, अर परमेसवर का अनुग्रह उसपै था।

३३३३ ३३३३ ३३३३३ ३३३३

41 यीशु के माँ-बाप हरेक साल फसह के त्यौहार म्ह यरुशलेम जाया करै थे। 42 जिव यीशु बारहान साल का होया, तो वे त्यौहार की रीति के मुताबिक यरुशलेम नगर म्ह गए। 43 जिव यीशु के माँ-बाप त्यौहार मनाकै अपणे घरां बोहड़ण लागरे थे, तो बाळक यीशु यरुशलेम म्ह रहगया, अर इसका उसके माँ-बाप ने कोनी बेरा था। 44 वे न्यू समझकै के वो दुसरे मुसाफिरां के गेल्या होगा, एक दिन का सफर पार करगे: अर उस ताहीं अपणे कुणबे आळा म्ह अर जाण-पिच्छाण आळा म्ह टोळ्ण लागगे। 45 पर जिव कोनी मिल्या, टोन्दे-टोन्दे यरुशलेम म्ह दुवारै बोहड़गे, 46 अर तीन दिन के पाच्छे, उननै वो मन्दर के आँगण म्ह उपदेशकां के बिचाळै बेदटे, उनकी सुणदे अर उनतै सवाल बुझते पाया। 47 जितने उसकी सुणै थे, वे सारे उसकी समझ अर उसके जवाब तै हैरान थे। 48 फेर उसके माँ-बाप उस ताहीं देखकै हैरान होए अर उसकी माँ ने उसतै कहा, “हे बेदटे, तन्नै म्हारै गेल्या इसा बरताव क्यातै करया? देख, तेरा बाप अर मै तन्नै ढूँढ-ढूँढके परेशान होरे थे?”

49 उसनै उनतै कहा, “थम मन्नै क्यातै टोह्लो सो? के बेरा कोनी मन्नै मेरे पिता के घरां होणा जरूरी सै?” 50 पर जो बात उसनै उनतै कही, उननै कोनी समझया।

51 फेर वो उनकै गेल्या गया, अर नासरत म्ह आया, अर उनकै बस म्ह रह्या, अर उसकी माँ ने ये सारी बात अपणे मन म्ह राखी। 52 अर यीशु समझ अर कद-काट्टी म्ह, अर परमेसवर अर माणसां के अनुग्रह म्ह बढदा गया।

### 3

३३३३३३ ३३३३३३३३ ३३३३३३ ३३ ३३३३३  
(३३३३३ 3:1-12; ३३ 1:1-8; ३३३ 1:19-28)

1 जिव रोम साम्राज्य म्ह तिबिरियुस कैसर राजा बण्या तो उसके पंदरहवें साल म्ह जिव चौथाई देश म्ह पुन्तियुस पिलातुस यहूदिया परदेस का राज्यपाल था, अर हेरोदेस गलील परदेस म्ह इत्रैया अर त्रखोनितिस परदेस म्ह उसका भाई फिलिप्पुस राज करै था, अर अबिलेने परदेस म्ह लिसानियास राज करै था 2 अर जिव हन्ना अर कैफा महायाजक थे, उस बखत परमेसवर का वचन जंगल-बियाबान म्ह जकरयाह के बेदटे यहून्ना के धारै पोंहच्या। 3 यहून्ना यरदन नदी के लोवै-धोवै के साव्ने परदेस म्ह जाके, पापां की माफी का प्रचार करण लागगया, के पाप करणा छोड़ द्यो अर बपतिस्मा ल्यो। 4 जिसा यशायाह नबी के कहे होए वचनां की किताब म्ह लिख्या सै:

“जंगल-बियाबान म्ह एक रुक्के मारणीये का वचन होरया सै के, प्रभु की राही त्यार करो, उसकी सड़क सीध्नी बणाओ।

5 हरेक घाटी भर दी जावैगी, अर हरेक पहाड़ अर टिल्ला तळै करया जावैगा, अर जो टेढा सै सीध्ना, अर जो ऊँचा नीच्चा सै वो बरोव्वर राह बणैगा।

6 अर हरेक माणस परमेसवर के उद्धार नै देखैगा।”

7 जो भीड़ की भीड़ उसतै बपतिस्मा लेण नै लिकड़ के आवै थी, उनतै यहून्ना कहवै था, “हे साँप के सप्पोलों जिसे माणसां, थारे तै कौण बताग्या के परमेसवर के आण आळे छो तै भागगो। 8 इस खात्तर जै थमने सच म्ह पाप करणा छोड़ दिया सै तो यो दिखाण खात्तर भले काम तो करो, अर अपणे-अपणे मन म्ह न्यू मतना सोचो के हम अब्राहम के वंश तै सां, क्यूँके मै थमनै कहूँ सूँ के परमेसवर इन पत्थरां तै भी अब्राहम के खात्तर ऊलाद पैदा कर सके सै। 9 इब कुहाड़ा दरखाती की

† 2:39 यहूदी प्रभु के

जड़ पै धरया सै, इस करके जो-जो दरखत बढ़िया फळ न्ही ल्यांदा, वो काटचा अर आग म्ह झोक्या जावैगा।” इसका मतलब यो सै परमेसवर उन सारया नै दण्ड देवैगा जो पाप करणा न्ही छोड़ते।

10 फेर माणसां नै उसतै बुझया, “तो हम परमेसवर के दण्ड तै बचण खात्तर के करा?”

11 उसनै जवाब दिया, “जिसके धौरै दो कुड़ते हों, वो उसके गेल्या जिसके धौरै न्ही सै उसके गैल बांड ल्यो अर जिसके धौरै खाणा हो, वो भी न्यूए करै।”

12 चुंगी लेण आळे भी बपतिस्मा लेण आए, अर उसतै बुझया, “हे गुरु, हम के करा?”

13 उसनै उनतै कह्या, “ईमानदार रहों अर जितना रोमी सरकार नै कर\* तय करया सै, उसतै ज्यादा ना लियो।”

14 कुछ सिपाहियाँ नै भी उसतै बुझया, “हम के करा?” उसनै उनतै कह्या, “किसे पै जुल्म करके पईसे ना लियो, अर ना झूठठा इल्जाम लाइयो, अर अपणी तन्वा पै संतोष करियो।”

15 जिव माणस मसीहा की आस लगाये होए थे, अर सारे अपणे-अपणे मन म्ह यूहन्ना के बाबत विचार करे थे, के योए मसीह तो न्ही सै। 16 तो यूहन्ना नै उन सारया तै कह्या, “मै तो थमनै पाणी तै बपतिस्मा दियूं सूं, पर वो आण आळा सै, जो मरै तै घणा शक्तिशाली सै, मै तो इस लायक भी कोनी के उसके जूत्याँ के फित्ते खोल सकूं, वो थमनै पवित्तर आत्मा अर आग तै बपतिस्मा देवैगा।

17 उसका छाज, उसके हाथ म्ह सै, अर वो अपना खलिहाण आच्छी तरियां साफ करैगा, अर नाज नै अपणे कोठार (गोदाम) म्ह कट्ठा करैगा, पर भुरळी ताहीं उस आग म्ह जळवैगा जो कदे बुझै कोनी।”

18 आखर वो घणीए शिक्षा दे-देकै माणसां तै सुसमाचार सुणान्दा रह्या।

19 पर जिव उसनै चौथाई देश म्ह गलील परदेस के राजा हेरोदेस तै उसके भाई फिलिप्पुस की घरआळी हेरोदियास के बाबत अर सारे बुरे काम्मां के बाबत जो उसनै करे थे, उल्हाणा दिया,

20 तो हेरोदेस नै उन सारया तै बढ़कै यो बुरा काम भी करया के यूहन्ना ताहीं जेळ म्ह गेर दिया।

ⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 3:13-17; ⓂⓂ 1:9-11)

21 जिव सारे माणसां नै बपतिस्मा लिया अर यीशु भी बपतिस्मा लेकै प्रार्थना कर रह्या था, तो अकास खुल गया, 22 अर पवित्तर आत्मा शारीरिक रूप म्ह कबूतर की तरियां उसपै उतरया, अर परमेसवर सुगं म्ह तै बोल्या “तू मेरा प्यारा बेटा सै, मै तेरतै राज्जी सूं।”

ⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 1:1-17)

23 जिव यीशु खुद उपदेश देण लाग गया, तो करीबन तीस साल की उमर का था अर (जिसा समझा जावै सै) यीशु यूसुफ का बेटा था, अर यूसुफ एली का बेटा था, 24 अर एली मत्तात का बेटा था, अर मत्तात लेवी का बेटा था, अर लेवी मलकी का बेटा था, अर मलकी यन्ना का बेटा था, अर यन्ना यूसुफ का बेटा था, 25 अर यूसुफ मत्तित्याह का बेटा था, अर मत्तित्याह आमोस का बेटा था, अर आमोस नहूम का बेटा था, अर नहूम असल्याह का बेटा था, अर असल्याह नोगह का बेटा था, 26 अर नोगह मात का बेटा था, अर मात मत्तित्याह का बेटा था, अर मत्तित्याह शिमी का बेटा था, अर शिमी योसेख का बेटा था, अर योसेख योदाह का बेटा था, 27 अर योदाह यूहन्ना का बेटा था, अर यूहन्ना रेसा का बेटा था, अर रेसा जरुब्बाबिल का बेटा था, अर जरुब्बाबिल शालतियेल का बेटा था, अर शालतियेल नेरी का बेटा था, 28 अर नेरी मलकी का बेटा था, अर मलकी अही का बेटा था, अर अही कोसाम का बेटा था, अर कोसाम इलमोदाम का बेटा था, अर इलमोदाम एर का बेटा था, 29 अर एर येशू का बेटा था, अर येशू इलाजार का बेटा था, अर इलाजार योरीम का बेटा था, अर योरीम मत्तात का बेटा था, अर मत्तात लेवी का बेटा था, 30 अर लेवी शमौन का बेटा था, अर शमौन यहूदा का बेटा था, अर यहूदा यूसुफ का बेटा था, अर यूसुफ योनान का बेटा था, अर योनान इलयाकीम का बेटा था

\* 3:13 3:13 कर चुंगी

था, <sup>31</sup> अर इलयाकीम मलेआह का बेट्टा था, अर मलेआह मिन्नाह का बेट्टा था, अर मिन्नाह मत्तता का बेट्टा था, अर मत्तता नातान का बेट्टा था, अर नातान दाऊद का बेट्टा था, <sup>32</sup> अर दाऊद यिश्शै का बेट्टा था, अर यिश्शै ओवेद का बेट्टा था, अर ओवेद वोआज का बेट्टा था, अर वोआज सलमोन का बेट्टा था, अर सलमोन नहशोन का बेट्टा था, <sup>33</sup> अर नहशोन अम्मीनादाब का बेट्टा था, अर अम्मीनादाब अरनी का बेट्टा था, अर अरनी हिस्रोन का बेट्टा था, अर हिस्रोन फिरिस का बेट्टा था, अर फिरिस यहूदा का बेट्टा था, <sup>34</sup> अर यहूदा याकूब का बेट्टा था, अर याकूब इसहाक का बेट्टा था, अर इसहाक अब्राहम का बेट्टा था, अर अब्राहम तिरह का बेट्टा था, अर तिरह नाहोर का बेट्टा था, <sup>35</sup> अर नाहोर सरूग का बेट्टा था, अर सरूग रऊ का बेट्टा था, अर रऊ फिलिग का बेट्टा था, अर फिलिग एबिर का बेट्टा था, अर एबिर शिलह का बेट्टा था, <sup>36</sup> अर शिलह केनान का बेट्टा था, अर केनान अरफक्षद का बेट्टा था, अर अरफक्षद शेम का बेट्टा था, अर शेम नूह का बेट्टा था, अर नूह लिमिक का बेट्टा था, <sup>37</sup> अर लिमिक मथूशिलह का बेट्टा था, अर मथूशिलह हनोक का बेट्टा था, अर हनोक यिरिद का बेट्टा था, अर यिरिद महललेल का बेट्टा था, अर महललेल केनान का बेट्टा था, <sup>38</sup> अर केनान एनोश का बेट्टा था, अर एनोश शेत का बेट्टा था, अर शेत आदम का बेट्टा था, अर आदम परमेसवर का बेट्टा था ।

## 4

ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 4:1-11; ⓂⓂ 1:12-13)

1 फेर यीशु पवित्र आत्मा तै भरया होया, यरदन नदी तै बोहड़या, अर चाळीस दिन ताहीं पवित्र आत्मा के सिखाण तै जंगल-बियावान म्ह हाण्डदा रहया, <sup>2</sup> उन चाळीस दिनां म्ह शैतान उस ताहीं परखता रहया । उन दिनां म्ह उसनै कुछ न्ही खाया, अर जब वे दिन पूरे होए, तो उसनै भूख लागी ।

3 फेर शैतान नै उसतै कहा, “जै तू परमेसवर का बेट्टा सै, तो साबित करदे, अर इस पत्थर तै कह, के रोट्टी बण जावै, ताके तू इननै खा सके ।”

4 यीशु नै उस ताहीं जवाब दिया, “पवित्र ग्रन्थ म्ह लिख्या सै: ‘माणस सिर्फ रोट्टी तै जिन्दा कोनी रहन्दा ।’”

5 फेर शैतान\* उसनै घणे ऊँच्चे पहाड़ पै लेगया अर उस ताहीं माड़ी वार म्ह दुनिया के राज्य दिखाए, <sup>6</sup> अर उसतै बोल्या, “मे यो सारा हक, अर उसकी शानों-शोकत तन्नै दियुंगा, क्यूँके वो मेरेते सौंप्या गया सै: अर जिसनै चाहूँ उसनै दे दियुं सू । <sup>7</sup> इस करके जै तू मेरी भगति करे, तो यो सब कुछ तेरा हो ज्यागा ।”

8 यीशु नै उस ताहीं जवाब दिया, “लिख्या सै: ‘तू प्रभु अपने परमेसवर की भगति कर, अर सिर्फ उससे की भगति कर ।’”

9 फेर उसनै उस ताहीं पवित्र नगर यरुशलेम म्ह ले जाके मन्दर की चोट्टी पै खड्या करया अर उसतै बोल्या, “जै तू परमेसवर का बेट्टा सै, तो अपने-आपनै उरै तै तळै गेर दे अर अपने-आपनै साबित करदे ।” <sup>10</sup> “क्यूँके पवित्र ग्रन्थ म्ह लिख्या सै: ‘वो तेरे बाबत अपने सुगदूत्तां नै हुकम देवैगा, के वे तेरी रुखाळी करै;”

11 “अर वे तन्नै हाथों-हाथ उठा लैवैगें, इसा ना हो के तेरे पायां म्ह पत्थर तै ठेस लागै ।”

12 यीशु नै उस ताहीं जवाब दिया, “पवित्र ग्रन्थ म्ह यो भी लिख्या सै: ‘तू प्रभु अपने परमेसवर नै ना परखे ।’”

13 जब शैतान उस ताहीं परख के हार लिया, तो कुछ बखत खातर उसके धोरै तै चल्या गया ।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 4:12-17; ⓂⓂ 1:14-15)

\* 4:5 4:5 (इबनीस)

14 फेर यीशु पवित्र आत्मा की सामर्थ्य तै भरया होइ गलील परदेस बोहडया, अर उसकी चर्चा लोवै-धोवै के सारे देशां म्ह फैलगी। 15 वो उनके आराधनालयौं म्ह उपदेश सुणान्दा रह्या, अर सारे उसकी बड़ाई करै थे।

⚔⚔⚔⚔ ⚔⚔ ⚔⚔⚔⚔ ⚔⚔ ⚔⚔⚔⚔⚔  
(⚔⚔⚔⚔ 13:53-58; ⚔⚔ 6:1-6)

16 फेर यीशु नासरत नगर म्ह आया, जड़ै पाळा-पोस्या गया था, अर अपनी रीति कै मुताबिक आराम कै दिन आराधनालय म्ह जाकै पवित्रग्रन्थ पढ़ण कै खात्तर खड्या होया। 17 यशायाह नबी की किताब उस ताहीं दी गई, अर उसनै किताब खोल कै, वा जगहां लिकाड़ी जड़ै लिख्या था:

18 “प्रभु का आत्मा मेरै पै सै,

इस करकै के उसनै कंगालां ताहीं सुसमाचार

सुणाण कै खात्तर मेरा अभिषेक करया सै,

अर मेरै ताहीं इस करकै भेज्या सै के कैदियाँ नै छुड़ाण का

अर आंध्याँ नै देखण जोगगा बणाण की खुशी की खबर का प्रचार करै

अर कुचले होया नै छुड़ाऊँ,

19 अर प्रभु कै राज्जी रहण कै साल का प्रचार करै।”

20 फेर यीशु नै किताब बन्द करकै सेवक कै हाथ्यां म्ह दे दी अर बैठग्या, अर आराधनालय के सारे माणसां की निगांह उसपै थी। 21 फेर वो उनतै कहण लागग्या, “आज ए यो पवित्र ग्रन्थ म्ह लिख्या होइ वचन थारे स्याम्ही पूरा होया।”

22 सारया नै उस ताहीं सराहया, अर जो अनुग्रह की बात उसके मुँह तै लिकड़ै थी, उनतै हैरान होए, अर कहण लागगे, “के यो यूसुफ का छोरा कोनी?”†

23 उसनै उनतै कह्या, “थम मेरै पै या कहावत जरूर कहोगे के हे वैद्य, खुद नै ठीक कर! जो कुछ हमनै सुण्या के कफरनहूम नगर म्ह करया गया सै, उसनै उरै खुद कै नगर म्ह भी कर।”

24 अर उसनै कह्या, “मै थमनै सच-सच कहूँ सू कोए नबी अपने गाम म्ह आदर-मान कोनी पान्दा।

25 मेरी सुणो, के एलिय्याह नबी कै दिनां म्ह जिब साढ़े तीन साल ताहीं अकास तै बारिस न्ही होई, उरै ताहीं के सारे देश म्ह बड़ड़ा अकाळ पड्या, तो इस्राएल देश म्ह घणीए विधवा थी। 26 पर एलिय्याह उन म्ह तै किसे के धौरे कोनी भेज्या गया, सिर्फ सैदा परदेस कै सारफत नगर म्ह एक विधवा कै धौरे। 27 अर एलीशा नबी कै बखत इस्राएल देश म्ह घणे कोढ़ी थे, पर सीरिया परदेस का सेनापति नामान नामक कोढ़ी नै छोड़कै उन म्ह तै कोए शुद्ध कोनी करया गया।”

28 ये बात सुणद-ए जितने आराधनालय म्ह थे, सारया कै छो उठग्या, 29 अर उठकै उस ताहीं नगर तै बाहरणै लिकाड़या, अर जिस पहाड़ पै उनका नगर बसया था, उसकी चोटटी पै ले चाल्ले, ताके उसनै उड़ै तै तड़ै गेरकै मार दें। 30 पर यीशु उनकै बिचाळै तै लिकड़कै चल्या गया।

⚔⚔ ⚔⚔⚔⚔ ⚔⚔⚔⚔⚔ ⚔⚔⚔⚔⚔ ⚔⚔⚔⚔ ⚔⚔⚔⚔ ⚔⚔⚔⚔ ⚔⚔⚔⚔⚔ ⚔⚔⚔⚔⚔ ⚔⚔  
(⚔⚔ 1:21-28)

31 फेर वो गलील परदेस कै कफरनहूम नगर म्ह गया, अर आराम कै दिन माणसां ताहीं उपदेश देवै था। 32 वे उसके उपदेश तै हैरान होगे क्यूँके उसका वचन हक सुधां था।

33 आराधनालय म्ह एक माणस था, जिस म्ह ओपरी आत्मा थी, उसनै जोर तै किल्की मारी, 34 “हे नासरत के यीशु, हमनै तेरे तै के काम? के तू म्हारा नाश करण नै आया सै? मै तन्नै जाणुं सू, तू कौण सै? तू परमेसवर की ओड़ तै भेज्या होया पवित्र मसीह सै।”

35 यीशु नै उसतै धमकाकै कह्या, “बुपचाप रहै, अर इस माणस म्ह तै लिकड़ जा!” फेर ओपरी आत्मा उसनै बिचाळै पटककै बिना नुकसान करे उस म्ह तै लिकड़गी 36 इसपै सारे हैरान होए, अर वे आप्स म्ह बतळाण लागगे, “यो किसा वचन सै? क्यूँके वो हक अर सामर्थ्य कै गेल्या ओपरी

आत्मायाँ नै हुकम देवै सै, अर वे लिकड जावै सै।” <sup>37</sup> इस करके चौगरदे नै हरेक जगहां उसका जिक्र होण लागया।

*XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX*  
(XXXXXXXX 8:14-17; XX 1:29-34)

<sup>38</sup> यीशु आराधनालय म्ह तै उठके शमौन कै घरां गया। शमौन की सास्सू कै बुखार चढरया था, अर उननै उस खात्तर उसतै बिनती करी। <sup>39</sup> उसनै उसके धोरै खड्या होके बुखार ताहीं धमकाया अर बुखार उतर गया, अर वो जिब्बे उठके उनकी सेवा-पाणी करण लागगी।

<sup>40</sup> सूरज डूबदे बखत, जिन-जिनके उरै माणस कई ढाळ की विमारियाँ म्ह पड़े होए थे, वे सारे उननै उसके धोरै ल्याए, अर उसनै एक-एक पै हाथ धरके उन ताहीं ठीक करया। <sup>41</sup> अर ओपरी आत्मा भी किल्की मारदी अर न्यू कहन्दी होई के, “तू परमेसवर का बेट्टा सै” घणखरया म्ह तै लिकडगी। पर वो उननै धमकांदा अर बोल्लण न्ही देवै था, क्यूँके वे जाणै थी के यीशु ए परमेसवर की ओड़ तै भेज्या होया मसीह सै।

*XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX*  
(XX 1:35-39)

<sup>42</sup> जिव सबेरै होई तो यीशु लिकडके एक बियावान जगहां म्ह गया, अर भीड़ की भीड़ उसनै टोहन्दी होई उसके धोरै आई, अर उसनै रोकण लागगी के वो उनके धोरै तै न्ही जावै। <sup>43</sup> पर उसनै उनतै कह्या, “मन्नै दुसरे नगरां म्ह भी परमेसवर कै राज्य का सुसमाचार सुणाणा जरूरी सै, क्यूँके मै इसे खात्तर भेज्या गया सूँ।” <sup>44</sup> अर वो गलील परदेस के आराधनालयाँ म्ह उपदेश सुणान्दा रह्या।

## 5

*XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX*  
(XXXXXXXX 4:18-22; XX 1:16-20)

<sup>1</sup> जिव यीशु गन्नेसरत की झील\* कै किनारे पै खड्या था, तो भीड़ परमेसवर का वचन सुणण कै खात्तर उस ताहीं घेरै खडी थी, तो इसा होया <sup>2</sup> के उसनै झील कै किनारे दो किस्ती लागगी होड़ देखी, अर मछुआरे उनपै तै उतरके मच्छियाँ के जाळ नै धोवै थे। <sup>3</sup> उन किस्तियाँ म्ह तै एक पै, जो शमौन की थी, चढके यीशु नै उसतै बिनती करी के किनारे तै माड़ा सा डिगा ले चाल्लै। फेर वो किस्ती पै बैठके माणसां नै उपदेश देण लागगया।

<sup>4</sup> जिव यीशु नै माणसां तै ये बात कर ली, तो शमौन तै बोल्या, “डुंघ्ये म्ह ले चाल, अर मच्छी पकड़ण खात्तर अपना जाळ गेर।”

<sup>5</sup> शमौन नै उसतै जवाब दिया, “हे गुरु, हमनै सारी रात मेहनत करी अर कुछ न्ही मिल्या, फेरभी तेरे कहण तै जाळ गेरूंगा।”

<sup>6</sup> जिव पतरस अर उसके साथियाँ नै इसा करया, तो घणी मच्छी घेर ल्याए, अर उनके जाळ पाटण नै होण लागगे। <sup>7</sup> इस करके उननै दुसरी किस्ती म्ह बेट्टे अपणे साथियाँ ताहीं भी इशारा करके मदद खात्तर बुलाया, वे आ गये अर उननै आके दोन्नु किस्ती उरै ताहीं भर ली के डूबण लागगी।

<sup>8</sup> न्यू देखके शमौन पतरस यीशु कै पायां म्ह पड़गया, अर बोल्या, “हे प्रभु, मेरै धोरै तै जा, क्यूँके मै पापी माणस सूँ!” <sup>9</sup> क्यूँके इतनी मच्छियाँ के पकड़े जाण तै उसनै अर उसके साथियाँ नै घणा अचम्भा होया, <sup>10</sup> अर उससे तरियां जब्दी के बेट्टे याकूब अर यूहन्ना नै भी, जो शमौन के दुसरे साथी थे, अचम्भा होया। फेर यीशु नै शमौन तै कह्या, “मतना डरो, इब तै मै धमनै माणसां ताहीं कट्टे करण आळे बणाऊंगा ताके वो मेरे चेल्ले बणे।” <sup>11</sup> अर वे किस्तियाँ नै किनारे पै लियाए अर वे जिब्बे सब कुछ छोड़के उसके चेल्ले बणण खात्तर उसके पाच्छे हो लिये।।

*XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX*  
(XXXXXXXX 8:1-4; XX 1:40-45)

\* 5:1 5:1 गलील समुन्दर



12 ज़िब वो किसे नगर म्ह था, तो उड़ै कोढ़ तै भरया होया एक माणस आया, अर उसनै यीशु ताहीं देखके अर मोध्धा पड़के बिनती करी, “हे परभु, जै तू चाहवै तो मन्नै ठीक कर सकै सै।”

13 उसनै हाथ बढ़ाके उस ताहीं छुया अर बोल्या, “मै चाहूँ सँ, तू इस बीमारी तै ठीक हो ज्या।” अर उसका कोढ़ जिब्बे जान्दा रह्या।

14 फेर उसनै उस ताहीं समझाके कह्या, “किसे तै ना कहिए, पर जाके अपणे-आपनै याजक ताहीं दिखा, अर अपणे कोढ़ तै ठीक होण के बारे म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होग्या सै।”

15 पर यीशु का जिक्र हरेक जगहां फैल्दा गया, अर भीड़ की भीड़ उसकी सुणण के खात्तर अर अपनी बिमारियाँ तै ठीक होण के खात्तर कट्ठी होई। 16 पर वो सुनसान जगहां म्ह न्यारा जाके प्रार्थना करया करै था।

~~~~~

17 एक दिन इसा होया के यीशु उपदेश देण लागरया था अर ठीक करण खात्तर परभु की सामर्थ उसकै गेल्या थी, अर फरीसी अर शास्त्री उड़ैए बेटटे थे, जो गलील अर यहूदिया परदेस के हरेक गाम अर यरुशलेम नगर तै आए थे। 18 उस बखत कई माणस एक माणस नै जो लकवे का बीमार था, खाट पै ल्याए, अर वे उसनै भीत्तर ले जाण अर यीशु के स्याम्ही धरण का जुगाड़ टोह्ल लागरे थे। 19 पर ज़िब भीड़ के कारण उसनै भीत्तर कोनी ले जा सके तो उननै छात पै चढ़के अर टाट्टी हटाके, उस ताहीं बिस्तर समेत बिचाळै यीशु के स्याम्ही उतार दिया।

20 उसनै उनका विश्वास देखके उसतै बोल्या, “हे भाई, मन्नै तेरे पाप माफ कर दिये।”

21 फेर शास्त्री अर फरीसी बहस करण लागगे, “यो कौण सै जो परमेसवर की बुराई करै सै? परमेसवर नै छोड़ और कौण पाप माफ कर सकै सै?”

22 यीशु नै उनकै मन की बात जाणके, उनतै कह्या, “थम अपणे मन म्ह क्यूँ विवाद करण लागरे सो की मै परमेसवर की बुराई करूँ सँ? 23 आसान के सै? के यो कहणा के तेरे पाप माफ होए, या यो कहणा के ‘उठ अर हाँड-फिर’? 24 पर इस करके के थम जाणो, के मुझ माणस के बेटटे नै धरती पै पाप माफ करण का भी हक सै।” उसनै उस लकवे के मरीज तै कह्या, “मै तेरे तै कहूँ सँ के अपणे बिस्तर ठाके अपणे घरां चल्या जा।” 25 वो जिब्बे उनकै स्याम्ही उठचा, अर जिस खाट पै पडचा था उसनै ठाके, परमेसवर की बड़ाई करदा होया अपणे घरां चल्या गया। 26 फेर सारे हैरान होए अर परमेसवर की बड़ाई करण लागगे अर घणे डरके बोल्ले, “आज हमनै अनोक्खी बात देखी सै।”

~~~~~

27 इसके बाद यीशु बाहरणै गया अर लेवी नाम के एक चुंगी लेण आळे ताहीं चौकी पै बेटटे देख्या, अर उसतै बोल्या, “मेरा चेल्ला बणण खात्तर मेरै पाच्छै हो ले।” 28 फेर वो सारा कुछ छोड़के उसके पाच्छै हो लिया।

29 फेर लेवी नै अपणे घरां उसके खात्तर बड़ड़ा जिम्मण का न्योँदा दिया, अर चुंगी लेण आळे अर दुसरे माणसां की जो उसके गेल्या खाणा खाण नै बेटटे थे, एक बड़डी भीड़ थी। 30 इसपै फरीसी अर उनके शास्त्री उसके चेल्यां तै न्यू कहके बिरडाण लागगे, “थम चुंगी लेण आळे अर जिननै लोग पापी कहवै सै, उनकै गेल्या खाओ-पीओ सो?”

~~~~~

31 यीशु नै उनतै जवाब दिया, “वेद आच्छे-विच्छयां खात्तर कोनी, पर बिमारां खात्तर जरूरी सै। 32 मै धर्मियाँ नै न्ही, पर पापियाँ नै मन पलटन के खात्तर बुलाण आया सँ।”

33 उननै उसतै कह्या, “यूहन्ना के चेल्लें तो बराबर ब्रत अर प्रार्थना करया करै सै अर उससे तरियां फरीसियाँ के चेल्लें भी, पर तेरे चेल्लें तो खावे-पीवै सै।”

34 यीशु नै उनतै कह्या, “के थम बरातियाँ तै, जिब्बताहीं बन्दड़ा उनकै गेल्या रहवै, ब्रत करा सको सो?”

\*\*\*\*\*

35 “पर वे दिन भी आवेंगे, जब बन्दड़ा न्यारा करया जावैगा, फेर वे उन दिनां म्ह बरत करैंगे।”

36 यीशु ने एक और उदाहरण दिया, “कोए माणस नये लत्यां म्ह ते पाड़कै पुराणे लत्यां पै थेगळी न्ही लगान्दा, न्ही तो नया पाट ज्यागा अर वा थेगळी पुराणे पै मेळ भी न्ही खावैगी। 37 अर कोए नया अंगूर का रस पुराणी मशक म्ह न्ही भरदा, न्ही तो नया अंगूर का रस पुराणी मशकां नै पाड़कै वह ज्यागा, अर मशक फूट ज्या सै। 38 पर नया अंगूर का रस नई मशकां म्ह भरणा चाहिए। 39 कोए माणस पुराणा अंगूर का रस पीकै नया अंगूर का रस कोनी चाहन्दा क्यूंके वो कहवै सै, के पुराणा-ए बढ़िया सै।”

## 6

\*\*\*\*\*

1 फेर आराम के दिन यीशु चेल्यां कै गैल खेत्तां म्ह तै होकै जाण लागरया था, अर उसके चेल्लें गेहूँ की बालें तोड़-तोड़के अर हाथ्यां तै मसळ-मसळ के खाण लागरे थे। 2 फेर फरीसियां म्ह तै कुछ कहण लागे, “थम यो काम क्यांतै करो सो जो आराम के दिन करणा ठीक कोनी?”

3 यीशु नै उनतै जवाब दिया, “के थमनै पवित्तर ग्रन्थ म्ह यो न्ही पढ़या के दाऊद नै, जब वो अर उसके साथी भूखे थे तो के करया? 4 वो किस तरियां परमेसवर के घर म्ह गया, अर भेंट की रोटी खाई, जिनका खाणा याजकां नै छोड़ और किसे खात्तर ठीक कोनी, अर अपने साथियां ताहीं भी दी?” 5 अर उसनै उनतै कहा, “मै माणस का बेट्टा आराम के दिन का भी प्रभु सू।”

\*\*\*\*\*

6 इसा होया के किस और आराम के दिन वो आराधनालय म्ह जाकै उपदेश देण लाग्या, अर उड़े एक माणस था जिसका सोळा हाथ सूखरया था। 7 शास्त्री अर फरीसी यीशु पै दोष लाग के मौक्के की टाह म्ह थे के देखै वो आराम के दिन ठीक करै सै के न्ही। 8 पर वो उनकी सोच जाणै था, इस करके उसनै सूखे हाथ आळे माणस कहा, “उठ, बिचाळै खड्या होज्या।” वो उठ खड्या होया।

9 यीशु नै उनतै कहा, “मै थारे तै बुद्धु सू के मूसा के नियम-कायदा के मुताबिक आराम के दिन के ठीक सै, भला करणा या बुरा करणा, जान बचाणा या नाश करणा?”

10 फेर उसनै चोगरदेनै उन सारया कान्ही देखकै उस सूखे हाथ आळे माणस तै बोल्या, “अपणा हाथ बढ़ा।” उसनै न्यूप करया, अर उसका हाथ दुबारा ठीक होगया। 11 पर वे फरीसी अर शास्त्री आप्पे तै बाहर होकै आप्पस म्ह बहस करण लागे के हम यीशु के गैल के करा?

\*\*\*\*\*

12 उन दिनां म्ह यीशु पहाड़ पै प्रार्थना करण लागग्या, अर परमेसवर तै प्रार्थना करण म्ह सारी रात बिताई। 13 जब दिन लिकड़या तो उसनै अपने चेल्यां ताहीं बुलाकै उन म्ह तै बारहां छाँट लिए, अर उन ताहीं प्रेरित कहा,

14 अर वे ये सै: शमौन जिसका नाम उसनै पतरस भी धरया, अर उसका भाई अन्दिरयास, अर याकूब, अर यहन्ना, अर फिलिप्पुस, अर बरतुल्मै, 15 अर मत्ती, अर थोमा, अर हलफई का बेट्टा याकूब, अर शमौन जो जेलोतेस\* कुहावै सै, 16 अर याकूब का बेट्टा यहूदा, अर यहूदा इस्करियोती जो उसका पकड़वाण आळा बण्या।

\*\*\*\*\*

17 फेर यीशु उनकै गेल्या उतरकै चौरस जगहां म्ह खड्या होया, अर उसके चेल्यां की बड़डी भीड़, अर सारे यहूदिया परदेस अर यरुशलेम नगर, सूर अर सैदा नगर के समुन्दर कै किनारे तै घणे माणस, 18 जो उसकी सुणण अर अपनी बिमारियां तै चंगे होण खात्तर उसके धोरे आए थे, उड़े थे, अर ओपरी

\* 6:15 6:15 एक कट्टर पंथी राजनैतिक दल का नाम था जिसका वो सदस्य था

आत्मा तै सताए होए भी ठीक करे जावै थे। 19 सारे उसनै छूणा चाहवै थे, क्यूँके उस म्ह तै सामर्थ लिकड़कै सारया नै ठीक करै थी।

~~~~~

20 फेर यीशु नै अपणे चेल्यां कान्ही देखकै कह्या, “धन्य सो थम जो दीन सो, क्यूँके परमेसवर का राज्य थारा सै।”

21 धन्य सो थम जो इब भूखे सो, क्यूँके थम परमेसवर के जरिये छिकाए जाओगे। धन्य सो थम जो इब रोओ सो, क्यूँके हांसोगे।

22 धन्य सो थम जिब मुझ माणस कै बेटे के बाबत माणस थारे तै बैर करैगें, अर थमनै लिकाड़ देवैगें, अर थारी बुराई करैगें, अर थारा नाम बुरा जाणकै काट देवैगें।

23 उस दिन आनन्द तै उच्छळियो, क्यूँके लखाओ, थारे खात्तर सुर्ग म्ह बड़ड़ा ईनाम सै, उनके पूर्वजां नै भी नबियाँ के गेल्या भी इसाए करया करे थे।

24 पर धिक्कार सै थारे पै! जो साहूकार सो, क्यूँके थमनै अपणे सारे सुख भोग चुके सों।

25 धिक्कार सै थारे पै! जो छिकरे सो, क्यूँके भूखे होओगे। धिक्कार सै थारे पै! जो इब हाँस्सो सो, क्यूँके थम बिलख-बिलख कै रोओगे।

26 “धिक्कार सै थारे पै! जिब सारे माणस थारे ताहीं आच्छा कहवै, क्यूँके थारे पूर्वज भी झूठे नबियाँ के गेल्या भी इसाए करै थे।”

~~~~~

27 “पर मै थम सुणण आळा तै कहूँ सूँ, के अपणे बैरियाँ तै प्यार राखो, जो थारे तै बैर करै, उनका भला करो। 28 जो थमनै श्राप देवै, उननै आशीष दो, जो थारी बेजती करै, उनके खात्तर प्रार्थना करो। 29 जो तेरे एक गाल पै थप्पड़ मारै उसकी ओड़ दुसरा भी फेर दे, अर जो तेरी धोती खोस ले, उसनै कुड़ता लेण तै भी मना मत करो। 30 जो कोए तेरे तै माँगै, उसनै दे, अर जो तेरी चीज खोस ले, उसतै माँगै ना। 31 जिसा थम चाहो सो के माणस थारे गेल्या करै, थम भी उनकै गेल्या उसाए करो।”

32 “जै थम अपणे प्यार करण आळा तै ए प्यार करो, तो उसका के फायदा? क्यूँके पापी भी अपणे प्यार करण आळा कै गेल्या प्यार करै सै। 33 जै थम अपणे भलाई करण आळा ए गेल्या भलाई करो सों, तो थारी के बड़ाई? क्यूँके पापी भी इसाए करै सै। 34 जै थम उननै ए उधार द्यो सो जिनतै थमनै दुबारै मिल जाण की आस हो सै, तो कौण सी बड़ी बात सै? क्यूँके पापी, पापियाँ नै उधार देवै सै, के उतनाए दुबारै पावै। 35 बल्के अपणे बैरी तै प्यार करो, अर भलाई करो, अर दुबारै मिलण की उम्मीद राखके उधार ना द्यो, तो थारे खात्तर बड़ड़ा ईनाम होवैगा, अर थम परमप्रधान की ऊलाद मान्ने जाओगे, क्यूँके परमेसवर का धन्यवाद ना करण आळा अर बुरे माणस पै भी दया करै सै। 36 जिसा थारा पिता दयालु सै, उससे ए ढाळ थम भी दयालु बणो।”

~~~~~

37 “दोष ना लाओ, तो थारे पै भी दोष न्ही लगाया जावैगा। कसूरवार ना ठहराओ, तो थमनै भी कोए कसूरवार कोनी ठहरावैगा। माफ कर द्यो, तो थम भी माफ करे जाओगे। 38 दिया करो तो थारे ताहीं भी दिया जावैगा। माणस पूरा नाप दबा दबाके अर हला-हलाके अर उभरदा होया थारी गोड़ी म्ह घाल्लैगें, क्यूँके जिस नाप तै थम नाप्यो सों, उससे नाप तै थारे खात्तर भी नाप्या जावैगा।”

39 फेर उसनै उनतै एक उदाहरण कह्या, “के आन्धा, आन्धे नै राह बता सकै सै? के दोन्नु खड्डे म्ह कोनी गिरैगें?” 40 चेल्ला अपणे गुरु तै बड़ड़ा न्ही, पर जो कोए आच्छा सीखा होगा, वो अपणे गुरु के ढाळ होगा।

41 “तू क्यूँ अपणे भाई की आँख कै तिन्कै जिसी छोट्टी सी बुराई नै देख्ये सै, अर अपनी आँख म्ह लठ जिसी बड़ी बुराई तन्नै कोनी दिखदी?” 42 जिब तू अपनी ए आँख का लठ कोनी देख्दा, तो अपणे भाई तै किस तरियां कह सकै सै, “हे भाई, आ मै तेरी आँख म्ह तै तिन्का लिकाड़ द्यु?” हे

कपटी, पैहल्या अपणी जीवन की बुराई दूर कर फेर तू अपणे भाई नै आच्छी दाऊँ बुराई तै बचा सकैगा ।

**॥॥॥ ॥॥॥ ॥॥॥ ॥॥॥**

43 “कोए आच्छा दरखत कोनी जो बेकार फळ ल्यावै, अर ना तो कोए बेकार दरखत सै जो आच्छा फळ ल्यावै । 44 हरेक दरखत अपणे फळ तै पिच्छाणा जावै सै, क्यूँके माणस झाड़ियाँ तै अंजीर कोनी तोड़दे अर ना बड़वेरी तै अंगूर । 45 भला माणस अपणे मन के भले भण्डार तै भली बात लिकाड़ै सै, अर बुरा माणस अपणे मन के बुरे भण्डार तै बुराई की बात लिकाड़ै सै, क्यूँके जो मन म्ह भरया सै वोए उसकी जुवान पै आवै सै ।”

**॥॥ ॥॥॥॥ ॥॥॥ ॥॥॥॥ ॥॥॥॥**

46 “जिब थम मेरा कहणा न्ही मान्दे तो क्यातै मन्ने ‘हे प्रभु, हे प्रभु’ कहो सो? 47 जो कोए मेरे धोरे आवै सै अर मेरी बातान नै सुणकै उननै मान्ने सै, मै थमनै बताऊँ सूँ के वो किसकी तरियाँ सै: 48 वो उस माणस की ढाळ सै, जिसनै घर बणादें बखत धरती डुन्धी खोदकै चट्टान पर नीम बणाई, अर जिब बाढ़ आई तो धारा उस घर पै लागगी पर उसनै हला न्ही सकी, क्यूँके वो पक्का बणरया था । 49 पर जो सुणकै कोनी मान्दा वो उस माणस की ढाळ सै, जिसनै माट्टी पै बिना नीम घर बणाया, जिब उसपै धारा लागगी तो वो जिब्वे पड़ग्या अर पड़कै उसका सत्यानाश होग्या ।”

## 7

**॥॥ ॥॥॥॥॥॥॥ ॥॥ ॥॥॥॥॥॥॥**

1 जिब उसनै माणसाँ तै ये सारी बात कह दी, तो कफरनहूम नगर म्ह आया । 2 उड़ै किसे सूबेदार का एक नौक्कर जो उसका प्यारा था, बीमारी तै मरण पै था । 3 उसनै यीशु का जिक्र सुणकै यहूदिया परदेस के कई यहूदी अगुवाँ ताहीं उसतै या बिनती करण नै उसके धोरे भेज्या के आकै मेरे नौक्कर नै ठीक करै । 4 वे यीशु के धोरे आए, अर उसतै घणी बिनती करके कहण लागगे, “वो इस जोगगा सै के तू उसके खात्तर न्यू करै, 5 क्यूँके वो म्हारी जात तै प्यार राक्खै सै, अर उससे नै म्हारे आराधनालय ताहीं बणवाया सै ।”

6 यीशु उनकै गेल्या गया, पर जिब वो घर तै माड़ी-सी दूर था, तो सूबेदार नै उसके धोरे कई साथियाँ तै न्यू कहवाँ भेज्या, “हे प्रभु, काल ना होवै, क्यूँके मै इस लायक कोनी के तू मेरी छात के तळे आवै । 7 इस करकै मन्ने खुद ताहीं इस लायक भी कोनी समझा के तेरे धोरे आऊँ, पर सिर्फ मुँह तै कह दे तो मेरा नौक्कर ठीक हो ज्यागा । 8 क्यूँके मै जाणु सूँ, के मै भी किसी के आदेशाँ का पालन करूँ सूँ, अर सिपाही मेरे आदेशाँ का पालन करै सै । जिब मै एक तै कहूँ सूँ, जा, तो वो जावै सै, अर दुसरे तै, आ, तो वो आवै सै, अर अपणे नौक्कर तै कहूँ सूँ, यो कर, तो वो करै सै ।”

9 यो सुणकै यीशु के अचम्भा होया अर उसनै मुँह फेरकै उस भीड़ तै जो उसके गेल्या आवै थी, कह्या, “मै थमनै कहूँ सूँ के मन्ने इस्राएल म्ह भी इसा विश्वास न्ही देख्या ।” 10 फेर भेज्जे होए वे माणस जिब घराँ बोहड़े तो उननै उस नौक्कर ताहीं निरोगगी पाया ।

**॥॥॥॥ ॥॥ ॥॥॥॥॥ ॥॥॥॥ ॥॥॥॥ ॥॥॥॥**

11 थोड़े दिनाँ पाच्छे यीशु नाईन नाम के एक नगर म्ह गया, अर उसके चेल्लें अर बड़डी भीड़ उसके गेल्या जाण लागरी थी । 12 जिब वो नगर के फाटक के धोरे पोंहच्या, तो लखाओ, माणस एक मुरदे नै बाहरणै लेकै जावै थे, जो अपणी माँ का एकला बेट्टा था, अर वा बिधवा थी, अर नगर के घणखरे माणस उसके गेल्या थे । 13 बिधवा ताहीं देखकै प्रभु नै उसपै तरस आया, अर उसतै कह्या, “मतना रोवै ।”

14 फेर यीशु नै धोरे आकै अर्थी ताहीं छुया, अर अर्थी ठाण आळे टैहरगे । फेर यीशु नै कह्या, “हे जवान, मै तन्ने कहूँ सूँ, उठ!” 15 फेर वो मुर्दा उठ बेटघा, बोल्लण लाग्या । उसनै उस ताहीं उसकी माँ तै सौंप दिया ।

16 इस घटना तै सारे डरगे, अर वे परमेसवर की बड़ाई करके कहण लागगे, “म्हारे बिचाळे एक बड़्हा नबी आया सै, अर परमेसवर नै अपणे माणसां पै दया की निगांह करी सै।” 17 अर उसके बारे म्ह या बात सारे यहूदिया परदेस अर लोवै-धोवै के सारे परदेसां म्ह फैलगी।

### \*\*\*\*\*

18 यूहन्ना ताहीं उसके चेल्यां नै इन बाततां की खबर दी। 19 फेर यूहन्ना नै अपणे चेल्यां म्ह तै दोयां ताहीं बुलाके प्रभु के धोरै न्यू बुद्ध्जण खात्तर भेज्या, “के आण आळा तूए सै, या हम किसे और की वाट देख्वां?”

20 उननै उसके धोरै आके कहा, “यूहन्ना बपतिस्मा देणआळे नै म्हारै ताहीं तेरे धोरै न्यू बुद्ध्जण नै भेज्या सै, के आण आळा वो मसीहा जिसका वादा परमेसवर नै करया था, तू ए सै, या हम किसे और की वाट देख्वां?”

21 उससे बखत उसनै घणाए ताहीं बिमारियां, अर काल्ली, अर ओपरी आत्मायां तै छुटाया, अर घणाए की आँख खोल दी, 22 अर उसनै उनतै कहा, “जो कुछ थमनै देख्या अर सुण्या सै, जाके यूहन्ना ताहीं कह द्यो, के आन्धे देख्वै सै, लंगड़े चाल्लै-फिरै सै, कोढ़ी शुद्ध करे जावै सै, बहरे सुणै सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै। 23 धन्य सै वे जो मेरै पै शक न्ही करते, अर बिश्वास करणा न्ही छोड़दे।”

24 जिव यूहन्ना के भेज्जे होइ माणस चले गये तो यीशु यूहन्ना के बारे म्ह माणसां तै कहण लागग्या, “थम जंगल-बियाबान म्ह के देखण गये थे? के हवा म्ह हाल्दे होए सरकंडे नै?” 25 तो फेर थम बण म्ह के देखण गये थे? के कोमल लत्ते पहरे होए माणस नै? लखाओ, जो चमकदे लत्ते पहरे अर असो-आराम म्ह रहवै सै, वे राजघरां म्ह रहवै सै। 26 तो फेर थम बण म्ह के देखण गये थे? के किसे नबी नै? हाँ, मे थमनै कहूँ सूँ, बल्के नबी तै भी बड़े नै। 27 यो वोए सै, जिसके बारे म्ह लिख्या सै: लखा, “मै अपणे दूत नै तेरे आगगै-आगगै भेज्जू सूँ, जो तेरे आगगै तेरी राही सीध्धी करैगा।”

28 “मै थमनै कहूँ सूँ के जो बिरबानियां तै जणे सै, उन म्ह तै यूहन्ना बपतिस्मा देणआळे तै बड़्हा कोए न्ही पर जो परमेसवर के राज्य म्ह छोटे तै छोटे सै, वो उसतै भी बड़्हा सै।”

29 फेर हरेक किसे नै, उरै ताहीं के चुंगी लेण आळे माणसां नै भी यूहन्ना की बात सुणके उसतै बपतिस्मा लेके यो मान लिया के परमेसवर ए धर्मी सै। 30 पर फरीसियां अर शास्त्रियां नै यूहन्ना तै बपतिस्मा कोनी लेके परमेसवर के मनसां ताहीं अपणे बारे म्ह टाळ दिया।

31 “पर मै इस युग के माणसां की बराबरी किसतै करूँ के वे किसकी ढाळ सै?” 32 वे उन बाळकां की ढाळ सै जो बजारां म्ह बेदटे होए एक-दूसरे तै रुके मारके शिकायत करै सै, हमनै थारे खात्तर बाँसली बजाई, अर थम कोनी नाच्चे, हमनै बिलाप करया, अर थम कोनी रोए!

33 क्यूँके यूहन्ना बपतिस्मा देण आळा ना रोटी खाया होया करदा अर ना अंगूर का रस पिया होया करदा, अर थम कहो सो, उस म्ह ओपरी आत्मा सै। 34 मुझ माणस के बेदटे का खाण-पान और माणसां की तरियां सादा ए सै, लखाओ, थमनै मेरे ताहीं पेट्टू अर पियक्कड़ माणस, चुंगी लेणिये का अर पापियां का साथी घोषित कर दिया। 35 पर ज्ञान अपणे काम्मां म्ह सच्चा ठहराया गया सै।

### \*\*\*\*\*

36 फेर किसे फरीसी नै उसतै बिनती करी के वो उसके गेल्या खाणा खावै, आखर वो उस फरीसी के घरां जाके खाणा खाण बेठचा। 37 उस नगर की एक पापण\* बिरबान्नी न्यू जाणके के यीशु फरीसी के घर म्ह खाणा खाण बेठचा सै, संगमरमर के बरतन म्ह महंगा खसबूदार तेल ल्याई, 38 अर उसके पायां के धोरै, पाच्छे खड़ी होके, रोंदी होई उसके पायां नै आसूआं तै भेण लागगी अर अपणे सिर के बाळां तै पूंझण लागगी, अर उसके पायां नै बार-बार चूमके उनपै महंगा खसबूदार तेल मळ्या।

\* 7:37 7:37 बेश्या या किसे साथ गलत सम्बन्ध हो, बुरे चाल-चलण आळी

39 न्यू देखकै शमौन फरीसी जिसनै यीशु ताहीं बुलाया था, अपणे मन म्ह सोच्चण लागग्या, “जै यो नबी होन्दा तो जाण जान्दा के या जो उसनै छूण लागरी सै, वा कौण अर किसी बिरबान्नी सै, क्यूँके वा तो पापण सै।”

40 यीशु नै उसके मन के विचार जाणकै उस ताहीं उदाहरण म्ह कह्या, “हे शमौन, मननै तेरे तै कुछ कहणा सै।” वो बोल्या, “हे गुरु, कह।”

41 यीशु नै एक और उदाहरण दिया, “कैसे साहूकार के दो देणदार थे, एक पाँच सौ अर दुसरा पचास दीनार (50 दिन की मजदूरी) का देणदार था। 42 जिव उनकै धोरै चुकाण नै कुछ न्ही रह्या तो उसनै दोनुआ का कर्ज माफ कर दिया। इस करकै उन दोन्नु माणसां म्ह तै कौण उसतै घणा प्यार राखैगा?”

43 शमौन नै जवाब दिया, “मेरी समझ म्ह वो माणस, जिसका घणा कर्जा माफ होया।” यीशु नै उसतै कह्या, “तन्नै ठीक कह्या सै।”

44 अर उस बिरबान्नी कान्ही पलटकै उसनै शमौन तै कह्या, “तन्नै देख्या सै के इस बिरबान्नी नै के करया सै? मै तेरे घरां आया पर तन्नै मेरे पैर धोण नै पाणी भी कोनी दिया, पर इसनै मेरे पैर आँसुआँ तै भेये अर अपणे बाळां तै पूजे। 45 तन्नै मेरै ताहीं चुम्यां न्ही, पर जिव तै मै आया सूं जिब्वे तै इसनै मेरे पायां ताहीं चुमना न्ही छोड्या। 46 तन्नै मेरे सिर पै तेल कोनी मळ्या, पर इसनै मेरे पायां पै इतर मळ्या सै। 47 इस करकै मै तन्नै कहुँ सूँ के इसनै कई पाप करे थे, जो माफ होगे, क्यूँके इसनै मेरे तै घणा प्यार करया सै, पर जिसका पाप कम माफ होया सै, वो कम प्यार करै था।”

48 अर उसनै बिरबान्नी तै कह्या, “तेरे पाप माफ होए।”

49 फेर जो माणस उसकै गेल्या खाणा खाण नै बेट्ठे थे, वे अपणे-अपणे मन म्ह सोच्चण लागगे, “यो के परमेसवर सै, जो पापां नै भी माफ कर सके सै?”

50 पर उसने उस बिरबान्नी ताहीं कह्या, “परमेसवर नै तेरे ताहीं बचाया सै, क्यूँके तन्नै मेरे पै बिश्वास करया सै, खुश होकै चली जा।”

## 8

### 8:1-10

1 इसकै बाद यीशु नगर-नगर अर गाम-गाम्मां म्ह प्रचार करदा होया, अर परमेसवर कै राज्य का सुसमाचार सुणादा होया हांडण लाग्या, अर वे बारहां चेल्लें उसकै गेल्या थे, 2 अर कुछ बिरबान्नी भी थी जो ओपरी आत्मायाँ तै अर विमारियाँ तै छुटाई गई थी, अर वे ये सै: \*मरियम जो मगदलीनी कुह्वावै थी, जिसम्ह तै सात ओपरी आत्मा लिक्डी थी, 3 अर हेरोदेस राजा के भण्डारी खुजा की घरआळी योअन्ना, अर सूंसन्नाह, अर घणखरी दुसरी बिरबान्नी। ये अपणे धन तै यीशु अर उसके चेल्यां की सेवा-पाणी करै थी।

### 8:11-18

4 जिव बड्डी भीड़ कट्टी होई अर नगर-नगर के माणस उसकै धोरै चालकै आवै थे, तो उसनै उदाहरण म्ह कह्या 5 “एक किसान बीज बोण लिक्ड्या। बोंदे होए कुछ बीज राही कै किनारे पड़े, अर रोंद्या गया, अर अकास के पंछियाँ नै उस ताहीं चुग लिया। 6 कुछ बीज चट्टान पै पड्या, अर जामग्या, पर नमी ना मिलण कै कारण सूख गया। 7 कुछ झाड़ियाँ के बिचाळै पड्या, अर झाड़ियाँ नै गेलै-गेलै बढ़कै उस ताहीं दबा लिया। 8 कुछ आच्छी धरती पै पड्या, अर उगके सौ गुणा फळ ल्याया।” न्यू कहकै वो जोर तै बोल्या, “जिसके कान हो वो ध्यान तै सुण ले।”

### 8:19-23

9 उसके चेल्यां नै उसतै बुद्धिया का के इस उदाहरण का के मतलब सै? 10 उसनै कह्या, “थारे ताहीं परमेसवर कै राज्य के भेद की समझ दे राखी सै, पर औरां नै उदाहरणां म्ह सुणाया जावै सै, इस करके के वे देखदे होए भी कोनी देखवै, अर सुणदे होए भी कोनी समझै।”

~~~~~

11 उदाहरण का मतलब यो सै: बीज परमेसवर का वचन सै 12 राही कै किनारे के वे सै, जिन नै सुण्या, फेर शैतान आकै उनकै मन म्ह तै वचन टा ले जावै सै के कदे इसा ना हो के वे विश्वास करके उद्धार पावै। 13 चट्टान पै के वे सै, के जिव सुणै सै, तो खुश होके वचन नै अपणावै सै, पर जइ कोनी पकड़दे वे माड़ी वार ताहीं विश्वास राखवै सै अर मुसीबत कै बखत बहक जावै सै। 14 जो झाड़ियाँ म्ह पड्या, यो वे सै जो सुणै सै, पर आगुँ जाके फिकर, अर धन, अर जिन्दगी के ऐसो-आराम म्ह फँस जावै सै अर उनका फळ कोनी पकदा। 15 पर आच्छी धरती के वे सै, जो वचन सुणकै भले अर आच्छे मन तै साम्ये राखवै सै, अर धीरज तै फळ ल्यावै सै।

~~~~~

16 “कोए दीवा जळा के बरतन तै कोनी ढकदा, अर ना खाट तळै धरै सै, पर टांडी पै धरै सै ताके भीत्तर आण आळे नै चाँदणा मिलै। 17 कुछ लुहक्या कोनी जो दिखाया कोनी जावै, अर ना किमे लुहक्या सै जिसका बेरा न्ही पटै। 18 ज्यांतै चौक्कस रहो के थम किस तरियां सुणो सो? क्यूँके जिसकै धरै सै उसतै दिया जावैगा, अर जिसकै धरै न्ही सै उसतै वो भी ले लिया जावैगा, जिसनै वो अपना समझै सै।”

~~~~~

19 यीशु की माँ अर उसके भाई उसके धरै आए, पर भीड़ के कारण उसतै मिल न्ही सके 20 उसतै कह्या गया, “तेरी माँ अर तेरे भाई बाहरणै खड़े होए, तेरे तै मिलणा चाहवै सै।”

21 यीशु नै इसके जवाब म्ह उनतै कह्या, “मेरी माँ अर मेरे भाई येए सै, जो परमेसवर का वचन सुणै अर मानवै सै।”

~~~~~

22 फेर एक दिन वो अर उसके चेल्ले किस्ती पै चढ़े, अर उसनै उनतै कह्या, “आओ, समुन्दर के परली ओड़ चाल्लां।” आखर उननै किस्ती खोल दी। 23 पर जिव किस्ती चालरी थी, तो वो सोग्या अर समुन्दर पै आँधी आगी, अर किस्ती पाणी तै भरण लागगी अर वे खतरे म्ह थे।

24 फेर उननै धरै आके उस ताहीं जगाया, अर कह्या, “हे माल्लिक! हे माल्लिक! हम डूबके मरण आळे सां।” फेर उसनै उठके आँधी ताहीं अर पाणी की झाल्लां ताहीं धमकाया अर वे थमगे अर शान्ति होई। 25 फेर उसनै उनतै कह्या, “थारा विश्वास किन्त था?” पर वे डरगे अर हैरान होके आप्स म्ह कहण लागगे, “यो कौण सै जो आँधी अर पाणी नै भी हुकम देवै सै, अर वे उसकी मानवै सै?”

~~~~~

26 फेर वे गिरासनियों के देश म्ह पोहचे, जो उस पार गलील समुन्दर कै स्याम्ही सै। 27 जिव वो किनारे पै उतरया तो उस नगर का एक माणस उसतै मिल्या जिसम्ह ओपरी आत्मा थी। वो घणे दिनां तै उघाड़ा था अर ना घरां रहवै था बल्के कब्रिस्तान म्ह रह्या करै था। 28 वो यीशु नै देखके जोर तै किल्ली माकै उसकै स्याम्ही पड़के जोर तै बोल्या, “हे परमप्रधान परमेसवर के बट्टे यीशु! मन्नै तेरे तै के काम? मै तेरे तै बिनती करूँ सूँ, मन्नै काल ना करै।” 29 क्यूँके वो उस ओपरी आत्मा ताहीं उस माणस म्ह तै लिक्ड़ण का हुकम देवै था, इस करके के वो उसपै बार-बार हावी होवै थी। ऊतो माणस उसनै साँकळां अर बेलां तै जुड़ै थे फेरभी वो बन्धनां नै तोड़ देवै था, अर ओपरी आत्मा उसनै बण म्ह भजाए फिरै थी।

30 यीशु नै उसतै बुद्धिया, “तेरा के नाम सै?” उसनै कह्या, “सेना,” क्यूँके घणीए ओपरी आत्मा उस म्ह रहवै थी। 31 उननै यीशु बिनती करी के हमनै अथाह कुण्ड म्ह जाण का हुकम ना देवै।

32 उड़ै पहाड़ पै सूअरां का एक बड़ड़ा टोळ चरै था, इस करके उननै उसतै बिनती करी के हमनै उन म्ह बैठणे दे। उसनै उन ताहीं जाण दिया।

33 फेर ओपरी आत्मा उस माणस म्ह तै लिकड़कै सूअरां म्ह जा पड़ी अर वो टोळ ढळान पै तै झपटकै गलील समुन्दर म्ह जा पड्या अर डूब मरया।

34 पाळी यो जो होया था देखकै भाज्ये, अर नगर म्ह अर गाम्मां म्ह जाकै उसकी खबर दी।

35 माणस जो होया था उसनै देखण नै लिकड़े, अर यीशु कै धोरै आकै जिस माणस तै ओपरी आत्मा लिकड़ी थी, उसनै यीशु के पायां कै धोरै लत्ते पहरै अर सोध्दी म्ह बेट्टे देखकै डरगे, 36 अर देखण आळा नै उन ताहीं बताया के वो ओपरी आत्मायाँ का कॉल करया होड़ माणस किस तरियां ठीक होया। 37 फेर गिरासेनियों के लोवै-धोवै के सारे माणसां नै यीशु तै बिनती करी के म्हारै उरै तै चल्या जा, क्यूँके वे घणे डरगे थे। आखर म्ह वो किस्ती पै चढ़कै बोहड़ आया।

38 जिस माणस म्ह ओपरी आत्मा लिकड़ी थी वो उसतै बिनती करण लागया के मन्नै अपणे गेल्या रहण दे, पर यीशु नै उस ताहीं विदा करके कह्या, 39 “अपणे घरां बोहड़ जा अर माणसां तै बता के परमेसवर नै तेरे खात्तर किसे बड़े-बड़े काम करे से।” वो जाकै सारे नगर म्ह प्रचार करण लागया के यीशु नै मेरै खात्तर किसे बड़े-बड़े काम करे।

~~~~~

40 जिव यीशु बोहड़या तो माणस उसतै राज्जी हाके मिले, क्यूँके वे सारे उसकी बाट देख्खे थे।

41 इतनै म्ह याईर नाम का एक माणस आया, जो आराधनालय का सरदार था, अर यीशु कै पायां म्ह पड़कै उसतै बिनती करण लागग्या के मेरै घरां चाल, 42 क्यूँके उसकी बारहां साल की एकलौती बेट्टी थी, अर वा मरण नै होरी थी। जिव वो जाण लागरया था, जद माणस उसपै पड़ण लागरे थे।

43 एक बिरवान्नी नै जिसकै बारहां साल तै लहू बहण की बीमारी थी, अर जो अपणी सारी कमाई डाक्टरां कै पाच्छै बरतगी थी, फेरभी किसे कै हाथ तै चंगी कोनी हो सकी थी, 44 पाच्छै तै आकै उसकै लत्ते ताहीं छुया, अर जिब्बे उसका लहू बहणा बन्द होगा।

45 इसपै यीशु नै कह्या, “मेरैताहीं किसनै छुया?” जिव सारे नाट्टण लागगे, तो पतरस अर उसके साथियां नै कह्या, “हे मार्लिक, तन्नै तो भीड़ दबाण लागरी सै अर तेरे पै पड़ण लागरी सै।”

46 पर यीशु नै कह्या, “किसे नै मेरै ताहीं छुआ सै, क्यूँके मन्नै बेरा पाटग्या के मेरै म्ह तै सामर्थ लिकड़ी सै।”

47 जिव बिरवान्नी नै देख्या के मै लुहूक कोनी सकदी, फेर काम्बदी होई आई अर उसकै पायां पै पड़कै सारे माणसां कै स्याम्ही बताया के उसनै किस कारण उस ताहीं छुया, अर किस तरियां जिब्बे चंगी होई। 48 उसनै उसतै कह्या, “बेट्टी, तेरे विश्वास नै तेरे ताहीं ठीक करया सै, खुशी-खुशी चली जा।”

49 वो न्यू कहवै था के किसे नै आराधनालय कै सरदार याईर कै उरै तै आकै कह्या, “तेरी छोरी मर ली सै: गुरु नै कॉल ना करै।”

50 यीशु नै न्यू सुणकै उसतै जवाब दिया, “मतना डरै, सिर्फ विश्वास राख, तो वा बच जावैगी।”

51 घर म्ह आकै उसनै पतरस, यूहन्ना, याकूब, अर छोरी के माँ-बाप नै छोड़ दुसरे किसे नै अपणे गेल्या भीत्तर कोनी आण दिया। 52 सारे उसके बाबत रोण-पिट्टण लागरे थे, पर उसनै कह्या, “रोओ मतना, वा मरी कोनी पर सौवै सै।”

53 वे न्यू जाणकै के वा मरगी सै उसका मजाक उड़ाण लागये। 54 पर उसनै उसका हाथ पकड्या, अर रुक्का मारकै कह्या, “हे छोरी, उठ!” 55 फेर उसका जी बोहड़ आया अर वा जिब्बे उठ बेट्टी। फेर उसनै हुकम दिया के उसनै कुछ खाण नै द्यो। 56 उसकै माँ-बाप हैरान होए, पर उसनै उन ताहीं चिताया के यो जो होया सै किसे तै ना कहियो।



1 फेर उसने अपने बाराहों चेल्यां ताहीं बुलाके उननै सारी ओपरी आत्मायाँ अर बिमारियाँ ताहीं दूर करण की सामर्थ अर हक दिया, 2 अर उननै परमेसवर के राज्य का प्रचार करण अर बिमारों ताहीं आच्छा करण खात्तर भेज्या। 3 उसनै उनतै कह्या, “राह खात्तर कुछ ना लियो, ना तो लाट्टी, ना झोठी, ना रोट्टी, ना रपिये अर ना दो-दो कुड़ते। 4 जिस किसे घर म्ह उतरो, उड़ै रहो, अर उड़ै तै बिदा होइयो। 5 जो कोए धमनै न्ही अपनावै, उस नगर तै जान्दे होए अपने पायां की धूळ झाड़ दियो के उनपै गवाही होवै।” 6 आखर म्ह वे लिकड़के गाम-गाम सुसमाचार सुणान्दे, अर हरेक माणसां नै ठीक करदे होए हांडदे रहे।

~~~~~

7 चौथाई देश के गलील परदेस का राजा हेरोदेस यो सारा सुणके घबराग्या, क्यूँके कईयाँ नै कह्या, के यूहन्ना मरे होया म्ह तै जिन्दा होया सै, 8 अर कईयाँ नै न्यू कह्या के एलिय्याह दिख्या सै, अर औरां नै न्यू के पुराणे नबियाँ म्ह तै कोए जिन्दा होया सै। 9 पर हेरोदेस नै कह्या, “यूहन्ना का तो मन्नै सिर कटवाया, इब यो कौण सै जिसके बाबत इसी बात सुणु सूं?” अर उसनै उस ताहीं देखण की चाहन्ना करी।

~~~~~

10 फेर प्रेरितां नै बोहड़के जो कुछ उननै करया था, उस ताहीं बता दिया, अर वो उननै न्यारे करके बैतसैदा नामक नगर म्ह लेग्या। 11 न्यू जाणके भीड़ उसके पाच्छे हो ली, अर वो राज्जी होके उनतै मिल्या, अर उनतै परमेसवर के राज्य की बात करण लाग्या, अर जो चंगे होणा चाहवै थे उन ताहीं ठीक करया।

12 जब दिन छिपण लाग्या तो बाराहों नै आके उसतै कह्या, “भीड़ नै जाणदे के चौगरदे के गाम्मां अर बस्तियाँ म्ह जाके ठहरे अर खाणे का जुगाड़ करे, क्यूँके हम उरे बियाबान जगहां म्ह सां।”

13 यीशु नै उनतै कह्या, “थमे उननै खाण नै द्यो।” उननै कह्या, “म्हारे धौरे पाँच रोट्टी अर दो मच्छियाँ नै छोड़के और कुछ कोनी, पर हाँ, जै हम जाके इन सारया खात्तर खाणा मोल ल्यावां, फेर हो सके सै।” वे माणस तो पाँच हजार माणसां के करीबन थे। 14 फेर उसनै अपने चेल्यां तै कह्या, “उननै पचास-पचास करके लेणपतार म्ह बिठा द्यो।” 15 उननै न्यूए करया, अर सारया ताहीं बिठा दिया। 16 फेर यीशु नै वे पाँच रोट्टी अर दो मच्छियाँ ली, सुगं कान्ही लखाके परमेसवर का धन्यवाद करया, अर रोट्टी तोड़-तोड़के चेल्यां ताहीं देदा गया के माणसां ताहीं बाँडे। 17 फेर सारे खाके छिकगे, अर चेल्यां नै बचे होइ टुकड्या तै भरी हाई बाराहों टोकरी ठाई।

~~~~~

18 जब वो एक्ले म्ह प्रार्थना करे था अर चेल्ले उसके गल्या थे, तो उसनै उनतै बुझ्या, “माणस मन्नै के कहवै से?”

19 उननै जवाब दिया, “यूहन्ना बपतिस्मा देण आळा, अर कोए एलिय्याह, अर कोए यो के पुराणे नबियाँ म्ह तै कोए जिन्दा होया सै।”

20 उसनै उनतै बुझ्या, “पर धम मन्नै के कहो सो?” पतरस नै जवाब दिया, “परमेसवर का मसीह।” 21 फेर उसनै उनतै चित्तके कह्या के यो किसे तै ना कहियो।।

~~~~~

22 फेर उसनै कह्या, “मुझ माणस के बेटे खात्तर जरूरी सै के मै घणा दुख ठाऊँ, अर यहूदी अगुवें, प्रधान याजक अर शास्त्री मन्नै तुच्छ समझके मार देवै, अर मै तीसरे दिन जिन्दा हो जाऊँगा।”

~~~~~

23 उसनै सारया तै कह्या, “जो कोए मेरे मेरा चेल्ला बणणा चाहवै, वो अपनी ए इच्छा पूरी ना करे बल्के हरेक दिन अपने दुखां का क्रूस ठाके, मेरे पाच्छे हो लेवे। 24 क्यूँके जो कोए अपनी जान बचाणा चाहवैगा वो उसनै खोवेगा, पर जो कोए मेरी खात्तर अपनी जान खोवेगा वोए उसनै बचावेगा। 25 जै माणस सारी दुनिया नै पा लेवै अर अपनी जान खो दे या उसका नुकसान ठावे, तो

उसने के फायदा? 26 जो कोए मेरै तै अर मेरी बातों तै सरमावैगा, मै माणस का बेट्टा भी, जिब अपणी अर अपणे पिता की अर पवित्र सुगंदता की महिमा सुधां आऊंगा, तो उसतै सरमावैगा।

27 "मै थमनै साच्ची कहूँ सूँ, के जो याडै खड़े सै, उन म्ह तै कुछ इसे सै के जिब ताहीं परमेसवर का राज्य ना देख लेवैं, जद ताहीं मौत उननै कदे छू भी न्ही पावैगी।"

~~~~~

28 इन बातों के कोए आठ दिनां पाच्छै वो पतरस, यूहन्ना अर याकूब नै गेल्या लेकै प्रार्थना करण खात्तर पहाड़ पै गया। 29 जिब वो प्रार्थना करै था, तो उसके मुँह का रूप बदल गया, अर उसके लत्ते धोळे होकै चमकण लागगे। 30 अर लखाओ, मूसा नबी अर एलिय्याह नबी ये दो माणस उसके गेल्या बतळावै थे। 31 ये महिमा सुधां दिक्खे अर यीशु के मरण का जिकर करै थे, जो यरुशलैम म्ह होण आळा था। 32 पतरस अर उसके साथी नींद म्ह होरे थे, अर जिब ठीक तरियां सोध्दी म्ह आए, तो उसकी महिमा अर उन दो माणसां नै, जो उसके गेल्या खड़े थे, देख्या। 33 जिब वे उसके धौरै तै जाण लागगे, तो पतरस नै यीशु तै कह्या, "हे माल्लिक, म्हारा उरै रहणा भला सै: आखर म्ह हम तीन मण्डप बणावा, एक तेरे खात्तर, एक मूसा नबी खात्तर, एक एलिय्याह नबी के खात्तर।" उसनै बेरा कोनी था के कह के रह्या सै।

34 वो न्यू कहवैए था के एक बादळ आके उनपै छाग्या, अर जिब वे उस बादळ तै घिरण लागगे तो वे डरगे। 35 फेर उस बादळ म्ह तै या वाणी लिकडी, "यो मेरा बेट्टा अर मेरा चुण्या होया सै, इसकी सुणो।" 36 या आवाज होन्दे यीशु एकला होग्या, अर वे बोल-बाल्ले रहे, अर जो कुछ देख्या था उसकी कोए बात उन दिनां म्ह किसे तै न्ही कही।

~~~~~

37 दूसरे दिन जिब वो पहाड़ तै उतरया तो एक बड्डी भीड़ उसतै आ मिली। 38 अर लखाओ, भीड़ म्ह तै एक माणस नै किल्की मारके कह्या, "हे गुरु, मै तेरे तै बिनती करूँ सूँ के मेरे बेट्टे पै दया की निगांह फेर दे, क्यूँके वो मेरा एकला बेट्टा सै।" 39 अर दे, एक भुंडी ओपरी आत्मा उसनै पकड़ै थी, अर वो चाणचक किल्की मारै था, अर वा उसनै इसा मरोड़ै थी के वो मुँह म्ह तै झाग भर लावै सै, उसनै रोंदके घणी मुश्किल तै छोड़डै थी। 40 मन्नै तेरे चेल्यां तै बिनती करी के उसनै लिकाड़ै, पर वे कोनी काढ सके।"

41 यीशु ने जवाब दिया, "हे अविश्वासी अर जिद्दी माणसां, मै कद ताहीं थारे गेल्या रहूंगा अर थारी सहूंगा? अपणे बेट्टे नै उरै लिया।"

42 जिब वो आवै था तो ओपरी आत्मा नै उस ताहीं पटकके मरोड्या, पर यीशु नै उस ओपरी आत्मा ताहीं धमकाया अर छोरे ताहीं ठीक करके पिता तै थमा दिया। 43 फेर सारे माणस परमेसवर के घणे सामर्थ तै हेरान होए। पर जिब सारे माणस उन सारे काम्मां तै जो वो करै था, हक्के-बक्के थे, तो उसनै अपणे चेल्यां तै कह्या,

~~~~~

44 "थम इन बातों पै गौर करो, क्यूँके मै माणस का बेट्टा माणसां के हाथ्यां म्ह पकड़वाया जाण पै सूँ।" 45 पर वे इस बात नै कोनी समझै थे, अर या बात उनतै लुक्की रही के उननै उसका बेरा न्ही पाट्टै, अर वे इस बात के बारे म्ह उसतै बुद्धण तै डरै थे।

~~~~~

46 फेर उन म्ह या बहस होण लागगी के म्हारै तै बड्ड़ा कौण सै। 47 पर यीशु नै उनके मन के विचारां ताहीं पढ़ लिया, अर एक बाळक नै लेकै अपणे धौरै खड्या करया, 48 अर उनतै कह्या, "जो कोए मेरै नाम तै इस बाळक नै अपणावै सै, वो मन्नै अपणावै सै, अर जो कोए मन्नै अपणावै सै, वो मेरै भेजण आळें नै भी अपणावै सै, क्यूँके जो थारे म्ह सारया म्ह छोडट्टे तै छोडटा सै, वोए बड्ड़ा सै।"

~~~~~

49 फेर यूहन्ना नै कह्या, “हे स्वामी, हमनै एक माणस ताहीं तेरे नाम तै ओपरी आत्मा लिकाइ दे देख्या, अर हमनै उसतै मना करया, क्यूँके वो म्हारी तरियां तेरा चेल्ला न्ही था।” 50 यीशु नै उसतै कह्या, “उसनै नाटो ना, क्यूँके जो थारे बिरोध म्ह न्ही, वो थारे कान्ही सै।”

~~~~~

51 जिव उसके उप्पर टाए जाण के दिन पूरे होण पै थे, तो उसनै यरुशलेम जाण का विचार पक्का करया। 52 उसनै अपने आगै दूत भेज्जै। वे सामरियाँ कै एक गाम म्ह गए ताके उसके खात्तर जगहां त्यार करै। 53 पर उन माणसां नै उस ताहीं उतरण कोनी दिया, क्यूँके वो यरुशलेम जावै था। 54 न्यू देखके उसके चेल्लें याकूब अर यूहन्ना नै कह्या, “हे प्रभु, तू के चाहवै सै के हम हुकम देवां, के अकास तै आग गिरके उननै भस्म करदे?” 55 पर उसनै बोहड़के उन ताहीं धमकाया (अर कह्या, “थम न्ही जाणदे के थम किसी आत्मा के सो। क्यूँके माणस का बेट्टा लोग्गां नै जान तै मारण कोनी आया, बल्के उननै बचाण आया सै।”) 56 अर वे किसे दुसरे गाम म्ह चले गये।

~~~~~

57 जिव वे राह म्ह जावै थे, तो किसे नै उसतै कह्या, “जित्त-जित्त तू जावैगा, मै तेरे पाच्छे हो ल्यूँगा।”

58 यीशु नै उसतै कह्या, “लोमड़ियां की घुरखाण अर अकास के पच्छियाँ के बसेरे हो सै, पर माणस के बेट्टे खात्तर सिर छिपाण की भी जगहां कोनी।”

59 उसनै दुसरे तै कह्या, “भैरे पाच्छे हो ले।” उसनै कह्या, “हे प्रभु, पैहले मन्नै घर जाणदे, मै अपने पिता के मरण के बाद उस ताहीं दफना के आऊँगा, फेर तेरा चेल्ला बणुगां।”

60 उसनै उसतै कह्या, “जो आत्मिक रूप तै मर चुके सै, उननै मुर्दे दफणाण दे। पर तू जाके परमेसवर के राज्य की कथा सुणा।”

61 एक और नै भी कह्या, “हे प्रभु, मै तेरे पाच्छे हो लूँगा, पर पैहल्या मन्नै जाणदे के अपने घर के माणसां तै बिदा ले आऊँ।”

62 यीशु नै उसतै कह्या, “जो कोए अपना हाथ हळ पै धरके पाच्छे देखे सै, वो परमेसवर के राज्य के जोगगा कोनी।”

## 10

~~~~~

1 इन वात्तां के बाद प्रभु यीशु नै सत्तर और चेल्लें तैयार करे, अर जिस-जिस गाम अर जगहां पै वो खुद जाण आळा था, उडै उननै दो-दो करके अपने आगै भेज्या। 2 उसनै अपने चेल्यां तै कह्या, “पके होए खेत्तां की तरियां लोग तो भोत सै जो परमेसवर के वचन नै सुणणा अर समझणा चाहवै सै। पर फसल काट्टण आळे थोड़े लोग सै, जो उन ताहीं जाके परमेसवर का वचन सुणा अर समझा सकै। इस करके खेत के माल्लिक यानी परमेसवर तै बिनती करो, के वो और लोग्गां नै भेज्जै, ताके परमेसवर का वचन सारे लोग्गां तक पोहच सकै सै।” 3 जाओ, देखवो, मै थमनै भेड़ों की तरियां भेड़ियाँ के बिचाल्ये भेज्जू सूँ। 4 इस करके ना बटुआ, ना झोळी, ना जूते ल्यो, अर ना राह म्ह किसे तै नमस्कार करो।

5 जिस किसे घर म्ह जाओ, पैहले कहो, इस घर का कल्याण हो। 6 जै उडै कोए कल्याण के जोगगा होगा, तो धारा कल्याण उसपै थमैगा, न्ही तो थारे धोरे उल्टा ए आ ज्यागा। 7 उससे घर म्ह रहो, अर जो कुछ उनतै मिले, वोए खाओ-पीओ, क्यूँके मजदूर नै अपनी मजदूरी मिलणी चाहिए, घर-घर न्ही हांडणा।

8 जिस नगर मै जाओ, अर उडै के माणस थमनै उतारै, तो जो कुछ थारे स्याम्ही धरया जावै वोए खाओ। 9 उडै के बिमारां नै ठीक करो अर उनतै कहो, परमेसवर का राज्य थारे धोरे आण पोंहच्या सै। 10 पर जिस नगर म्ह जाओ, अर उडै के माणस थमनै न्ही अपनावे, तो उनके बजारां म्ह जाके कहो, 11 थारे नगर की धूळ भी, जो म्हारे पायां म्ह लागी सै, हम थारे स्याम्ही झाड़ देवां सां, फेरभी न्यू

जाण ल्यो के परमेसवर का राज्य थारे धारे आण पोहच्या सै। 12 मै थमने कहूँ सूँ, “के उस दिन उस नगर की हालत तै सदोम नगर की हालत घणी सहण जोगगी होवैगी।”

???????????? ???? ? ? ?

13 “धक्कार सै थारे पै खुराजिन नगर सों! धक्कार सै थारे पै बैतसैदा नगर के माणसों! जो सामर्थ के काम थारे म्ह करे गये, जै वे सूर अर सैदा नगर म्ह करे जान्दे, तो टाट ओढ़ कै, अर राख म्ह बैठकै वे कदे के पाप करणा छोड़ देन्दे। 14 पर न्याय कै दिन थारी हालत तै सूर अर सैदा नगर की हालत घणी सहण जोगगी होवैगी। 15 अर हे कफरनहूम नगर, तू के सोचै सै, के तू सुर्ग ताहीं ऊँच्चा करया जावैगा? तू तो अधोलोक तक नीचै जावैगा।

16 “जो थारी सुणै सै, वो मेरी सुणै सै, अर जो थमने तुच्छ समझै सै, वो मन्ने तुच्छ समझै सै, अर जो मन्ने तुच्छ समझै सै, वो मेरे भेजण आळे ताहीं तुच्छ समझै सै।”

???? ???? ? ? ?

17 वे सत्तर चेल्ले राज्जी हान्दे होए बोहडे अर बोल्ले, “हे प्रभु, तेरे नाम तै ओपरी आत्मा भी म्हारा कहणा मान्ने थी।”

18 यीशु नै उनतै कह्या, “जिब थम ओपरी आत्मयाँ नै लिकाड़ो थे तो मन्ने शैतान ताहीं सुर्ग तै बिजळी की तरियां पड़ता होया देख्या। 19 लखाओ, मन्ने थारे ताहीं साँपं अर बिच्छुआं ताहीं पायां तळै रोंदण का, अर बैरी की सारी सामर्थ पै हक दिया सै, अर किसे चीज तै थमने कुछ नुकसान कोनी होवैगा। 20 फेरभी इतने राज्जी मतना होवो के आत्मा धारा कहणा मान्ने सै, पर इसतै राज्जी होवो थारे नाम सुर्ग पै लिक्खे सै।”

???? ? ? ?

21 उस्से बखत यीशु पवित्तर आत्मा म्ह होके खुशी तै भरग्या, अर कह्या, “हे पिता, सुर्ग अर धरती के प्रभु, मै तेरा शुक्रियादा करूँ सूँ, के तन्ने इन बातों ताहीं ज्ञानियाँ अर समझदारां तै ल्कोए राख्या, अर बाळकां ताहीं दिखा दिया सै।” हाँ, हे पिता, क्यूँके तन्ने योए भाया।

22 मेरे पिता नै मेरै ताहीं सब कुछ सौप दिया सै, अर किसे नै न्ही बेरा के बेट्टा कौण सै, सिवा पिता के, अर पिता कौण सै न्यू भी किसे नै कोनी बेरा सिवाए बेट्टे कै, अर वो जिसपै बेट्टा उस ताहीं जाहिर करणा चाहवै।

23 फेर चेल्यां की ओड़ बोहड़कै एक्ले म्ह बोल्या, “धन्य सै वे आँख, जो ये बात जो थम देखो सो। 24 क्यूँके मै थमने कहूँ सूँ के घणखरे नबियाँ अर राजयां नै चाह्या के जो बात थम देखो सो, देखै, पर न्ही देखी, अर जो बात थम सुणो सो, सुणै पर न्ही सुणी।”

???? ???? ? ? ?

25 एक दिन यीशु माणसां नै उपदेश देण लागरया था, तो एक शास्त्री उठथा अर न्यू कहके उस ताहीं परखण लाग्या, “हे गुरु, अनन्त जीवन का वारिस होण खात्तर मै के करूँ?”

26 यीशु नै उसतै कह्या, “नियम-कायदा म्ह के लिख्या सै? अर तू उसनै किस तरियां समझै सै?”

27 उसने जवाब दिया, “तू प्रभु, अपणे परमेसवर तै अपणे सारे मन, अपणे पूरे प्राण अर अपणे सारी शक्ति अर अपणी सारी बुद्धि के गेल्या प्यार राख, अर अपणे पड़ोसी तै अपणे जिसा प्यार राख।”

28 यीशु नै उसतै कह्या, “तन्ने ठीक कह्या, न्यूए करिये जिब्वे तू अनन्त जीवन पावैगा।”

29 पर उसनै खुद ताहीं धर्मी जाहिर करण की इच्छा तै यीशु तै बुझ्या, “तो मेरा पड़ोसी कौण सै?”

30 यीशु नै एक कहाँनी बताके जवाब दिया, “एक माणस यरुशलेम नगर तै यरीहो नगर म्ह जावे था, के डाकुआं नै घेर कै, उसका सब कुछ खोस कै, उस ताहीं नंगा कर दिया, अर पिट-छेतके उस ताहीं अधमरा छोड़के चले गये। 31 अर इसा होया के उस्से राही तै एक यहूदी याजक जावे था,

पर उसने उस ताहीं देखके उसकी मदद कोनी करी अर चल्या गया। <sup>32</sup> इस्से ढाळ एक लेवी\* उस जगहां पै आया, उसने भी उसकी मदद कोनी करी, अर वो चल्या गया। <sup>33</sup> फेर सामरी गाम का एक राहगीर ओड़ै तै लिकड़या, अर उस माणस ताहीं देखके उसपै तरस खाया। <sup>34</sup> उसने उसके धौरै आके उसके घायों पै तेल अर अंगूर का रस गेर के पट्टी बाँधी, अर अपने गधे पै चढ़ाके सराय में म्ह लेग्या, अर उसकी सेवा-पाणी करी। <sup>35</sup> दुसरे दिन उसने दो दीनार (दो दिन की मजदूरी) काढ के सराय के माल्लिक तै दिये, अर कहा, इसकी सेवा-पाणी करिये, अर जो कुछ तेरा और लागूगैगा, वो मै बोहड़दा होया भर द्युगां।”

<sup>36</sup> यीशु नै उस ताहीं कहा, “इब यो बता तेरी समझ तै जिस माणस ताहीं डाकुआं नै घायल करा था, उन तीनां म्ह तै उस माणस का सच्चा पड़ोसी कौण था?”

<sup>37</sup> उसने कहा, “बोए जिसने उसपै दया करी।” यीशु नै उसतै कहा, “जा, तू भी न्यूए करया कर।”

\*\*\*\*\*

<sup>38</sup> जब यीशु अर उसके चेल्लें जावै थे तो वो एक गाम म्ह गया, अर मार्था नाम की एक बिरबान्नी नै बड़ी उदारता तै उसका आदर-सत्कार करया। <sup>39</sup> मरियम नाम की उसकी एक बेब्बे थी। वा प्रभु के पायां म्ह बैठके उसका वचन सुणै थी। <sup>40</sup> पर मार्था सेवा-पाणी करदे-करदे परेशान होगी, अर उसके धौरै आके कहण लागगी, “हे प्रभु, के तन्नै कुछ भी फिकर कोनी के मेरी बेब्बे नै सारा काम का बोझ मेरै पै गेर दिया सै? इस करके उसतै कह के मेरी मदद करै।”

<sup>41</sup> प्रभु यीशु मसीह नै मार्था तै जवाब दिया, “मार्था, हे मार्था, तू घणी बातों खात्तर फिकर करै, अर परेशान हो ज्या सै। <sup>42</sup> पर एक बात जरूर सै, अर उस बढ़िया हिस्से ताहीं मरियम नै छाँट लिया सै जो उसतै खोस्या कोनी जावैगा।”

## 11

\*\*\*\*\*

<sup>1</sup> यीशु किस जगहां प्रार्थना करण लागरया था। जब उसने प्रार्थना कर ली, तो उसके चेल्ल्यां म्ह तै एक ने उसतै कहा, “हे प्रभु, जिस तरियां यूहन्ना नै अपने चेल्ल्यां ताहीं प्रार्थना करणी सिखाई उससे तरियां ए तू भी हमने सीखा दे।”

<sup>2</sup> उसने उनतै कहा, “जब थम प्रार्थना करो, तो कहो,  
हे पिता,

तेरा नाम पवित्र मान्या जावै,

तेरा राज्य आवै,

<sup>3</sup> म्हारी दिन भर की रोट्टी हरेक दिन हमने दिया कर,

<sup>4</sup> अर म्हारे पापां नै माफ कर,

क्यूँके हम भी अपने हरेक कसूरवार ताहीं माफ करां सां,

अर म्हारे ताहीं परखै ना।”

\*\*\*\*\*

<sup>5</sup> फेर यीशु नै चेल्ल्यां तै कहा, “मान ल्यो थारा एक दोस्त सै, अर थम आधी रात नै उसके धौरै ज्याके उसतै बिनती करो, हे दोस्त, मन्नै तीन रोट्टी दे। <sup>6</sup> क्यूँके मेरा एक दोस्त सफर करके मेरै धौरै आया सै, अर उस ताहीं खुआण खात्तर मेरै धौरै कुछ भी कोनी। <sup>7</sup> अर वो भीत्तर तै थमने जवाब देवै सै, मन्नै दुखी ना करै, इब तो मन्नै कुवाड़ मूंद राखे सै अर मेरे बाळक मेरै धौरै बिच्छाणा पै सै, इस करके मै उठके तन्नै कुछ भी न्ही दे सकदा? <sup>8</sup> मै थमने कहूँ सूँ, हालाकि वो माणस उस ताहीं रोट्टी ना भी देणा चाहवै, तोभी दोस्त होण के नाते वो जरूर उठैगा, अर दोस्त के बार-बार बिनती करण पै, उसकी जरूरत के मुताबिक उस ताहीं जरूर देवैगा।”

\* 10:32 10:32 (मन्दर म्ह यहूदी याजक की मदद करण आळा एक माणस) † 10:34 10:34 (धर्मशाला)

9 अर मै थारैतै कहूँ सूँ, के माँगगे तो थमने दिया जावैगा, टोव्होगें, तो थम पाओगे, खटखटाओ, तो थारे खात्तर खोल्या जावैगा। 10 क्यूँके जो कोए माँगै सै, उसने मिलै सै, अर जो टोहूँ सै, वो पावै सै, अर खटखटावै सै, उसके खात्तर खोल्या जावैगा।

11 थारे म्ह तै इसा कौण पिता होगा, के जिब उसका बेट्टा रोटी माँगै, तो उसने पत्थर देवै, या मच्छी माँगै, तो बदले म्ह उसने साँप देवै? 12 या अंडा माँगै तो उसने बिच्छु दे? 13 इस करके जिब थम बुरे होके, अपने बाळकां नै आच्छी चीज देणा जाणो सों, तो थारा सुर्गीय पिता अपने माँगण आळा नै पवित्तर आत्मा क्यूँ न्ही देवैगा।

???? ? ? ? ? ? ?

14 फेर यीशु नै एक गूंगा माणस म्ह तै ओपरी आत्मा ताहीं लिकाइया। जिब ओपरी आत्मा लिकइगी तो गूंगा बोलण लागग्या, अर माणसां के अचम्भा होया। 15 पर उन म्ह तै कुछ नै कह्या, “यो तो ओपरी आत्मायाँ के प्रधान शैतान की मदद तै ओपरी आत्मायाँ नै लिकाइै सै।” 16 औरां नै उस ताहीं परखण के खात्तर उसते अकास की एक निशान्नी माँगि।

17 पर उसने उनके मन की बात जाणके, उनतै कह्या, “जिस-जिस राज्य म्ह फूट आवै सै, वो राज्य उजड़ जावै सै, अर जिस घर म्ह फूट होवै सै, वो नाश हो जावै सै।” 18 जै शैतान खुद का विरोधी हो जावै, तो उसका राज्य किस तरियां बण्या रहवैगा? क्यूँके थम मेरै बाबत कहो सो के यो शैतान की मदद तै ओपरी आत्मायाँ नै काइडै सै। 19 भला जै मै शैतान की मदद तै ओपरी आत्मायाँ नै काइडू सूँ, तो थारी ऊलाद किसकी मदद तै काइडै सै? इस करके वैए थारा न्याय करैगें। 20 पर जै मै परमेसवर के सामर्थ तै ओपरी आत्मायाँ नै काइडू सूँ, तो परमेसवर का राज्य थारे धारे आण पोंहच्या सै। 21 जिब टांडा माणस हथियार लिये होए अपने घर की रुखाळी करै सै, तो उसका धन बचा रहवैगा। 22 पर जिब उसते बाध कोए और टांडा धावा बोलके उसने जीत लेवै सै, तो उसके वे राष्ट्र जिनपै उसका विश्वास था, खोस लेवै सै अर उसका धन लूटके बांड देवै सै।

23 जो मेरे गेल्या न्ही वो मेरे विरोध म्ह सै, अर जो मेरे गेल्या न्ही कट्टा करदा, वो खिंडावै सै।

???? ? ? ? ? ? ?

24 “जिब ओपरी आत्मा माणस म्ह तै लिकइके जावै सै, तो सूखी जगहां म्ह आराम टोहन्दी फिरै सै, अर वा पांढी कोनी। फेर वा कहवै सै, मै उससे माणस म्ह जड़ै तै लिकडी थी बोहड़ जाऊँगी। अर आके उस माणस नै घर जिसा झाड़ा-बुहारा अर सजा-धज्या पावै सै। 25 अर आके उसने झाड़ा-बुहारा अर सजा-धज्या पावै सै। 26 फेर वा ओपरी आत्मा जाके अपने तै भुंडी सात और आत्मायाँ नै अपने गेल्या ले आवै सै, अर वे उस म्ह बड़के वास करै सै, अर उस माणस की पाच्छली हालत पैहल्या तै भी भुंडी हो जावै सै।”

???? ? ? ? ? ? ?

27 जिब यीशु ये बात कहवै था तो भीड़ म्ह तै किसे विरबान्नी नै जोर तै बोलके कह्या, “धन्य सै वो विरबान्नी जिस तू जन्मा अर उसका तन्नै दूध पिया।”

28 उसने कह्या, “हाँ, पर धन्य वे सै, जो परमेसवर का वचन सुणै अर मान्ने सै।”

???? ? ? ? ? ? ?

29 जिब बड़डी भीड़ कट्टी होंदी जावै थी तो वो कहण लाग्या, “इस युग के माणस बुरे सै, वे चिन्ह-चमत्कार टोहूँ सै, पर योना नबी के चिन्ह-चमत्कार नै छोड़के उन ताहीं कोए और चिन्ह-चमत्कार कोनी दिया जावैगा। 30 जिसा योना नबी निनवे के आदमियाँ खात्तर निशान्नी ठहरी, उससे तरियां मै माणस का बेट्टा भी इस युग के आदमियाँ के खात्तर टहरूँगा। 31 दक्षिण देश की राणी न्याय के दिन इस बखत के माणसां के गेल्या उठके उन ताहीं कसूरवार ठेहरावैगी, क्यूँके वा राजा सुलैमान का ज्ञान सुणण खात्तर धरती के सिरे तै आई, अर देखीं, उरै वो सै जो राजा सुलैमान तै भी बड़डा सै। 32 निनवे नगर के माणस न्याय के दिन इस युग के माणसां के गेल्या उठके, उन ताहीं

कसूरवार टैहरावैगें, क्यूँके उननै योना नबी का प्रचार सुणकै अपने पापां ताहीं स्वीकार करया, अर देखो, उरै वो सै जो योना नबी तै भी बड़ड़ा सै।



33 “कोए माणस दीवा जळा के बरतन के तळै न्ही धरदा, पर टांडी पे धरै सै के भीत्तर आण आळा नै चाँदणा मिलै। 34 देह का दीवा आँख सै, इस करकै जिब तेरी निगाह आच्छी सै तो तेरी सारी देह भी उजाळा होगा। पर जिब तेरी आँख ठीक कोनी सै तो तेरी सारी देह भी अँधेरे म्ह सै। 35 इस करके चौकन्ने रहो के जो चाँदणा थारे म्ह सै वो अँधेरा ना हो जावै। 36 इस करके जै तेरी देह म्ह चाँदणा हो अर उसका कोए हिस्सा अन्धेरे म्ह ना रहवै तो सारा का सारा इसा चाँदणा होगा, जिसा उस बखत होवै सै जिब दीवा अपनी चमक तै थारे ताहीं चाँदणा देवै सै।”



37 जिब वो बात करै था तो किसे फरीसी नै उसतै बिनती करी के मेरै उरै आकै खाणा खाईयों। वो भीत्तर जाकै खाणा खाण नै बेटचा। 38 फरीसी नै न्यू देखके हैरानी होई के उसनै खाणा खाण तै पैहल्या हाथ कोनी धोए।

39 प्रभु नै उसके मन के विचारां ताहीं पढ़कै उसतै कह्या, “हे फरीसियों, थम कटोरे अर थाळी नै उपपर-उपपर तै तो माँजो सो, पर थारे भीत्तर अन्धेर अर बुराई भरी सै। 40 हे बेअकलो! जिसनै बाहरणै का हिस्सा बणाया, के उसनै भीत्तर का हिस्सा कोनी बणाया? 41 पर हाँ, भीत्तर आळी चिज्जां नै दान कर द्यो, तो देखो, सारा कुछ थारे खात्तर पवित्तर हो जावैगा।”

42 पर हे फरीसियों, थारे पै धिक्कार सै! थम पुदीने अर सुदाब का अर कई तरियां के साग-पात का दसमां हिस्सा द्यो सो, पर न्याय ताहीं अर परमेसवर के प्यार ताहीं टाळ द्यो सो, आच्छा तो था के इन्नै भी करदे रहन्दे अर उननै भी कोनी छोड़दे।

43 हे फरीसियों, थारे पै धिक्कार सै! थम आराधनालयों म्ह खास-खास आसन नै चाहो सो अर बजारां म्ह नमस्कार चाहो सो।

44 “धिक्कार सै थारे पै! क्यूँके थम उन लुकही होई कब्रां की तरियां सो, जिनपै माणस चाल्लै सै पर कोनी जानदे।”

45 फेर एक शास्त्री नै उसतै जवाब दिया, “हे गुरु, इन बाततां नै कहकै तू म्हारी बुराई करै सै।”

46 पर यीशु नै जवाब दिया, “हे शास्त्रियो थारे पै धिक्कार सै! थम नियम-कायदा का इसा बोझ जिनका टाणा ओक्खा सै, माणसां पै लादो सो, पर थम खुद उनकी मदद खात्तर उस बोझ नै अपनी आन्गळी तै भी कोनी छुन्दे।”

47 “धिक्कार सै थारे पै! थम उन नबियाँ की कब्र बणाओ सो, जिन ताहीं थारे पूर्वजां नै मार दिया था।” 48 आखर म्ह थम गवाह सो, अर अपने पूर्वजां के काम्मां तै रजामंद सो, क्यूँके उननै उन ताहीं मार दिया अर थम उनकी कब्र बणाओ सो। 49 इस करके परमेसवर की समझ नै भी कह्या सै, “के मै उनके धारे नबियाँ अर प्रेरितां नै भेज्जूगी, अर वे उन म्ह तै कईयां नै मार देंगे, अर कईयां नै दुखी करैगें।” 50 ताके जित नबियाँ का लहू दुनिया की शरुआत तै बहाया गया सै, सारया का ब्यौरा इस युग के माणसां तै लिया जावै, 51 हाबिल की हत्या तै लेके जकर्याह की हत्या ताहीं, जो वेदी अर मन्दर के बिचाळै मारया गया। मै थारे तै सच कहूँ सूँ, इन सारया का ब्यौरा इस्से बखत के माणसां तै लिया जावैगा।

52 “धिक्कार सै थम शास्त्रियो पै! थमनै ज्ञान की ताळी तो ले ली, पर थम खुद कोनी दाखल होए, अर दाखल होण आळे ताहीं भी रोक द्यो सो।”

53 जिब वो उडै तै लिकड़या, तो शास्त्री अर फरीसी भुण्डी तरियां उसके पाच्छे पड़गे अर छेड़ण लागे के वो घणखरी बाततां का जिक्र करै, 54 अर ताक म्ह लागे रहे के उसके मुँह तै कही होई कोए बात पकड़े।

## 12

~~~~~

1 इतने म्ह जब हजारों की भीड़ लागगी, उरै ताहीं के वे एक-दुसरे पै पड़ण लागगे थे, तो यीशु नै सारया तै पैहल्या अपणे चेल्यां तै यो कह्या, “फरीसियाँ के कपट रूपी खमीर तै चौकन्ने रहो। 2 कुछ ढकया कोनी, जो उघाइया न्ही जावैगा, ना कुछ लुहक्या सै, जिसका बेरा न्ही पटे। 3 इस करके जो कुछ थमनै अन्धेरे म्ह कह्या सै, वो उजाळै म्ह सुण्या जावैगा, अर जो थमनै कोटडियाँ म्ह चुपके-चुपके कह्या सै, वो छात पै तै प्रचार करया जावैगा।

~~~~~

4 “मै थारे तै जो मेरे साथी सो कहूँ सूँ, के जो देह नै घात करै सै पर उसतै ज्यादा और कुछ न्ही कर सकदे, उनतै ना डरियो। 5 मै थमनै समझाऊँ सूँ के थमनै किसतै डरणा चाहिये, घात करण के बाद, जिस ताहीं नरक म्ह गेरण का हक सै, उससे तै डरियो। हाँ, मै थारे तै कहूँ सूँ उससे तै डरियो। 6 के दो पिस्या की पाँच गौरैयाँ (एक छोट्टी चिड़ियाँ) न्ही बिकदी? फेरभी परमेसवर उन म्ह तै एक नै भी कोनी भुल्दा। 7 थारे सिर के एक-एक बाळ भी गिणे होड़े सै, इस करके डरो मतना, थम घणी गौरैयाँ तै बढ़कै सो।”

~~~~~

8 “मै थारे तै कहूँ सूँ जो कोए माणसाँ के स्याम्ही मन्ने मान लेवैगा, उसनै मै माणस का बेट्टा भी परमेसवर के सुर्गदत्ताँ के स्याम्ही मान लेऊँगा। 9 पर जो माणसाँ के स्याम्ही मेरा इन्कार करैगा, उसका भी परमेसवर के सुर्गदत्ताँ के स्याम्ही इन्कार करया जावैगा।” 10 जो कोए मुझ माणस के बेट्टे के बिरोध म्ह कोए बात कहवै, उसका वो कसूर माफ कर दिया जावैगा, पर जो पवित्र आत्मा की बुराई करै, उसका वो कसूर माफ कोनी करया जावैगा।

11 जब माणस थमनै आराधनालायाँ अर हाकिमाँ अर अधिकारियाँ के स्याम्ही ल्यावै, तो फिक्र ना करियो के हम किस तरियाँ तै, या के जवाब देवाँ, या के कहवागें। 12 क्यूँके पवित्र आत्मा उससे बखत थमनै सीखा देगा के, के कहणा चाहिये।

~~~~~

13 फेर भीड़ म्ह तै एक नै यीशु तै कह्या, “हे गुरु, मेरे भाई तै कह के बाप के जमीन-जायदाद नै मेरै गेल्या बांड लेवै।”

14 उसनै उसतै कह्या, “हे भले माणस, किसनै मेरै ताहीं थारा जमीन-जायदाद बटवारा करण आळा न्यायी बणा दिया सै?” 15 अर यीशु नै उनतै कह्या, “चौकन्ने रहो, अर सारी तरियाँ के लोभ-लालच तै खुद नै बचाकै राखो, क्यूँके किसे का जीवन उसकै घणी जमीन-जायदाद तै कोनी होदा।”

16 यीशु नै उनतै एक उदाहरण देकै कह्या, “किसे साहूकार की धरती म्ह घणी पैदावार होई।”

17 फेर वो अपणे मन म्ह विचार करण लागया, मै के करूँ? क्यूँके मेरै धौरे जगहां कोनी जित्त अपणी उपज वैगरा धरूँ।

18 अर उसनै कह्या, मै न्यू करूँगा मै अपणे नाज के गोदाम नै तोड़कै, उनतै नाज के और बड़े गोदाम बणाऊँगा, अर उड़ै अपणा सारा नाज अर धन धरूँगा, 19 अर अपणे-आप तै कहूँगा, के तेरे धौरे घणे साल खात्तर घणा धन धरया सै, चैन कर, खा, पी, मौज कर।

20 पर परमेसवर नै उसतै कह्या, हे बेकूफ, तू इस्से रात मर जावैगा, फेर जो कुछ तन्नै कट्टा करया सै, वो किसका होगा?

21 “इस्से तरियाँ वो माणस भी सै, जो अपणे खात्तर धन कट्टा करै सै, पर परमेसवर की निगांह म्ह साहूकार कोनी।”

~~~~~

22 फेर यीशु नै अपणे चेल्यां तै कह्या, “इस करके मै थमनै कहूँ सूँ, अपणे जीवन के खात्तर या चिंता ना करो के हम के खावागें, ना अपणी देह की के, के पैहरागें। 23 क्यूँके जीवन खाणे तै बढ़कै सै,



अर देह लत्यां तै बढ़कै सै। 24 काग्गा\* पै ध्यान द्यो, वे ना बोवै सै, ना काटै सै, अर ना उनके भण्डार अर गोदाम होवै सै, फेरभी परमेसवर उननै पाळै सै। थारी किम्मत पंछियाँ तै बाध सै।” 25 थारे म्ह तै इसा कौण सै, जो चिंता करण तै अपनी उमर का एक पल भी बढ़ा सकै सै? 26 इस करकै जै थम अपनी जिन्दगी म्ह छोट्टे-छोट्टे काम भी न्ही कर सकदे, तो जिन्दगी की बड़ी-बड़ी बातों खात्तर क्यातै फिकर करो सो?

27 “जंगळी फूल्लां पै ध्यान करो, के वे किस तरियां बढ़ै सै, वे मेहनत करके अपने खात्तर लत्ते कोनी बणाते। तोभी मै थारे तै कहूँ सुं, के राजा सुलैमान भी, अपने सारे शानों-शोकत म्ह, उन म्ह तै, किसे के समान लत्ते पैहरे होए कोनी था। 28 इस करके जै परमेसवर मैदान की घास नै, जो आज सै अर काल बाड़ म्ह झोक्की जावैगी, इसे लत्ते पहरावै सै, तो हे विश्वास म्ह कमजोर माणसों, वो थारी चिन्ता क्यूँ न्ही करैगा? 29 अर थम इस बात की टोह म्ह ना रहो के, के खावांगे अर के पीवांगे, अर शक ना करो। 30 क्यूँके परमेसवर ताहीं ना जाणण आळे लोग, इन सारी चिज्जां की टोह म्ह रहवै सै: पर थारा सुर्गीय पिता जाणै सै, के थमनै इन चिज्जां की जरूरत सै। 31 पर परमेसवर के राज्य की खोज करो तो ये चीज भी थमनै मिल ज्यागी।”

### \*\*\*\*\*

32 “हे छोट्टे टोळ, मतना डरै, क्यूँके थारे सुर्गीय पिता नै न्यू भाया सै, के थमनै अपना राज्य देवै। 33 अपना धन बेचके दान कर द्यो, अर अपने खात्तर इसे बटुए बणाओ, जो पुराणे कोनी होन्दे, यानिके परमेसवर नै खुश करण आळे भले काम करके सुर्ग म्ह इसा धन कट्टा करो जो खतम कोनी होन्दा, अर जिसके धोरे चोर कोनी जान्दा, अर कीड़ा कोनी बिगाड़दा। 34 क्यूँके जड़ै थारा धन सै, उड़ै थारा मन भी लाग्या रहवैगा।”

### \*\*\*\*\*

35 “हमेशा परमेसवर के काम्मां खात्तर तैयार रहों, अर थम प्रभु के आण खात्तर, दीवे जळा के तैयार रहों, 36 अर थम उन माणसां के बरगे बणो, जो अपने माल्लिक की बाट देखते रहवै सै, के वो ब्याह तै कद बोहड़ैगा, ताके जब आके दरवाजा खटखटावै, तो जिब्वे उसके खात्तर खोल द्यो। 37 धन्य सै वे नौक्कर जो माल्लिक के बोहड़ण की बाट देखते होए तैयार रहवै सै, मै थमनै साच्ची कहूँ सुं, के माल्लिक भी खुद एक नौक्कर की तरियां उन ताहीं खाणा खुआण खात्तर बिटावैगा, अर खुद उनकी सेवा-पाणी करैगा। 38 जै वो आध्नी रात नै या उसके बाद आके उन ताहीं तैयार पावै, तो वे नौक्कर धन्य सै। 39 पर न्यू जाण ल्यो, के जै घर का माल्लिक नै बेरा हो, के चोर ठीक किस घड़ी आवैगा तो वो तैयार रहन्दा, अर अपने घर म्ह चोरी न्ही होण देन्दा। 40 थम भी मेरे बोहड़ के आण खात्तर तैयार रहो, क्यूँके जिस घड़ी के बारे म्ह थम सोचदे भी कोनी, उससे घड़ी मै माणस का बेट्टा सुर्ग तै आ जाऊँगा।”

### \*\*\*\*\*

41 फेर पतरस बोल्या, “हे प्रभु, के यो उदाहरण तन्नै म्हारे खात्तर दिया से या सारया खात्तर दिया सै।”

42 प्रभु नै जवाब दिया, “वो विश्वास जोग्गा अर अकलमंद भण्डारी कौण सै, जिसका माल्लिक उस ताहीं नौक्कर-चाकरां पै सरदार टैहरावै, के उननै बखत पै खाणा देवै।” 43 धन्य सै वो नौक्कर, जिस ताहीं उसका माल्लिक आके इसाए करदा पावै। 44 मै थमनै साच्ची कहूँ सुं, वो उस ताहीं अपनी सारी धन-सम्पत्ति का माल्लिक बणावैगा। 45 पर जै वो नौक्कर सोच्चण लाग्गै के मेरा माल्लिक आण म्ह वार कर रह्या सै, उसके साथ के नौक्कर नौकराणियां ताहीं मारण लाग्ग्या अर खाण-पीण अर दारूबाज होण लाग्गे। 46 तो उस नौक्कर का माल्लिक इसे दिन आवैगा, जब वो उसकी बाट देख्दा ना हो, अर इसे बखत म्ह आवैगा जिसका उसनै ना बेरा हो, अर उसनै भारी सजा देके उसकी गिणती विश्वास लायक माणसां म्ह कोनी करी जावैगी।

\* 12:24 12:24 कौवां

47 वो नौक्कर घणा छित्तैगा, जो अपने माल्लिक की मर्जी जाणै था, अर तैयार न्ही रह्या अर ना उसकी मर्जी के मुताबिक चाल्या। 48 पर हरेक वो नौक्कर जो अपने माल्लिक की मर्जी नै कोनी जाणै, फेर इसा काम करै सै जो मार खाण के लायक सै, वो कम छित्तैगा। इस करके जिस ताहीं घणा दिया गया सै, उसतै घणा माँगया जावैगा, अर जिस ताहीं घणा सौप्या सै, उसतै घणा लिया जावैगा।

ॐॐॐ ॐॐ ॐॐ ॐॐ ॐॐॐॐॐॐ

49 "मै धरती पे आग लाण नै आया सू, अर कितना आच्छा होन्दा, के या इस्से बखत सुलग जान्दी! 50 मन्नै तो एक बड़ी भारी बिपदा का बपतिस्मा लेणा सै, अर जब ताहीं वो ना हो ले जद ताहीं मै इस्से बिपदा म्ह रहूँगा! 51 के थम समझो सो के मै धरती पे मिलाप करवाण आया सू? मै थमनै कहूँ सू, ना, बल्के न्यारे करण आया सू। 52 क्यूँके इब तै एक घर म्ह पाँच माणस आप्स म्ह विरोध राक्खेंगे, तीन जन जो मेरे पे विश्वास न्ही करते, वो उन दो जन का विरोध करैंगे जो मेरे पे विश्वास राक्खे सै। 53 पिता बेट्टे तै, अर बेट्टा बाप तै विरोध राक्खेगा, माँ बेट्टी तै, अर बेट्टी माँ तै, सास्सू बहू तै, अर बहू सास्सू तै विरोध राक्खेगी।"

ॐॐ ॐॐ ॐॐॐॐ

54 यीशु नै भीड़ तै कह्या, "जिब थम बाहळ नै पश्चिम† तै उठदे देखो सो, तो जिब्बे कहो सो के मिह आवैगा, अर न्यूए होवे सै, 55 अर जिब दक्षिणी हवा‡ चाल्दी देखो सो, तो कहो सो के बड़ी गर्मी पडैगी, अर न्यूए हो सै। 56 हे कपटियों! थम धरती अर अकास के रूप-रंग म्ह भेद जाण सको सो, पर परमेसवर जो इस युग म्ह करण लागरया सै उसका भेद क्यातै न्ही जाणदे?"

ॐॐॐ ॐॐॐ ॐॐ ॐॐॐॐॐॐ

57 "थम खुद फैसला क्याते कोनी कर लेदे के ठीक सै?" 58 जिब तू अपने बैरी के गेल्या हाकिम के धारे जावे सै, तो राही म्ह उसतै छुटण की कोशिश करले, इसा ना हो के वो तन्नै न्यायाधीश के धारे घसीट के ले जावै, अर न्यायाधीश तन्नै सिपाही के हवालै करदे अर सिपाही तन्नै जेळ म्ह गेर दे। 59 मै तेरे तै कहूँ सू के जिब ताहीं तू पाई-पाई न्ही भर देवैगा, तब तक जेळ तै छुटण न्ही पावैगा।

## 13

ॐॐ ॐॐॐॐ ॐॐ ॐॐ ॐॐ

1 उस बखत कुछ माणस आण पोहचे, अर यीशु तै उन गलीली माणसां का जिक्र करण लागगे, जिन ताहीं पिलातुस नै मन्दर म्ह बलिदान करते बखत मार दिया था, अर उनका ए लहू बलिदान की भेट तै मिला दिया था। 2 न्यू सुणके उसनै उनतै जवाब म्ह कह्या, "के थम समझो सो के ये गलीली माणस और बाकी सारे गलीलवासियाँ तै घणे पापी थे के उनपै इसी बिपदा आण पड़ी? 3 मै थमनै कहूँ सू के ना, पर जै थम पाप करणा न्ही छोड़ोगे तो थम भी इस्से तरियां नाश होओगे। 4 अर थम के सोच्चों सों, के उन अठारह माणसां के बारे म्ह जिनपै शीलोह का गुम्मत पड्या, अर वे दब के मरगे: यरुशलम के दुसरे सारे बासिनदियां तै घणे अपराधी थे? 5 मै थमनै कहूँ सू, के जै थम पाप करणा न्ही छोड़ोगे तो थम भी इस्से तरियां नाश होओगे।"

ॐॐ-ॐॐॐ ॐॐॐॐ ॐॐ ॐॐॐ ॐॐ ॐॐॐॐॐॐ

6 फेर यीशु नै यो उदाहरण भी देके कह्या, "किस अंगूर के बाग म्ह अंजीर का दरखत लागरया था। वो उस म्ह फळ टोहू आया, पर कोनी मिल्या। 7 फेर उसनै बाग के रुखाळे तै कह्या, लखा, तीन साल तै म्ह इस अंजीर के दरखत पे फळ टोहू आऊँ सू, पर कोनी पान्दा। इसनै काट बगा के यो धरती नै भी क्यूँ रुधे।"

8 उसनै उसतै जवाब दिया, "हे माल्लिक, इस साल और रहण दे के मै इसके चौगरदेके माट्टी खोदके खाद गेरू। 9 जै आगले साल इसके फळ आ गया तो ठीक, न्ही तो इसनै कटवा दियो।"

† 12:54 12:54 पश्चिम-भूमध्यसागर तै उठण आळा बादल

‡ 12:55 12:55 दक्षिणी हवा-रेगिस्तान तै आन्दी हवा

१० आराम के दिन यीशु एक आराधनालय में उपदेश देवै था। ११ उड़े एक विरबान्नी थी जिसमें

अठारह साल तै एक कमजोर करण आळी ओपरी आत्मा थी, अर वा कुबड़ी होगी थी अर किसे तरियां भी सीधी कोनी हो सकै थी। १२ यीशु नै उस ताहीं देखकै बुलाया अर कह्या, “हे नारी, तू अपणे इस रोग तै मुक्त होगी से।” १३ फेर उसनै उसपै हाथ धरया, अर वा जिब्बे सीधी होगी अर परमेसवर की बड़ाई करण लागगी।

१४ इस करकै के यीशु नै आराम के दिन उस ताहीं ठीक करया था, आराधनालय का सरदार चिड़ के माणसां तै कहण लागया, “काम करण के छः दिन से, उन ए दिनां में आकै अपणे रोग ठीक कराओ, पर आराम के दिन न्ही।”

१५ न्यू सुणकै प्रभु यीशु नै जवाब दिया, “हे कपटियों, के आराम के दिन थारे में तै हरेक अपणे बळथ या गधे नै थान में तै खोल के पाणी पियाण कोनी ले जान्दा? १६ तो के या विरबान्नी जो अब्राहम की पीढ़ी से, जिस ताहीं शैतान नै अठारह साल तै जुड़ राख्या था, के इस ताहीं आराम के दिन इसके बन्धन तै मुक्त करणा न्ही चाहिये था?”

१७ जिव यीशु नै ये बात कही, तो उसके सारे विरोधी शर्मिन्दा होगे, अर साबली भीड़ उन महान काम्मां तै जो वो करै था, राज्जी होई।

१८ फेर यीशु नै कह्या, “परमेसवर का राज्य किस जिसा से? अर मै उसका उदाहरण किसतै दू?

१९ वो राई के दाणे की ढाळ से, जिस ताहीं किसे माणस नै लेके अपणे बाग में बोया: अर वो बढ़के दरखत बणग्या, अर अकास के पंछियां नै उसकी डाळियां पे बसेरा करया।”

२० यीशु नै दुबारे कह्या, “मै परमेसवर के राज्य का उदाहरण किसतै दू? २१ वो खमीर की ढाळ

से, जिस ताहीं किसे विरबान्नी नै लेके तीन पसेरी (पन्डरह किलो) चून में रळायया, अर होन्दे-होन्दे सारा चून खमीर बणग्या।”

२२ यीशु अर उसके चेल्ले नगर-नगर, अर गाम-गाम होके उपदेश देन्दे होए यरुशलम नगर की ओड़ जावै थे, २३ तो किसे नै उसतै बुझ्झया, “हे प्रभु, के थोड़े ए माणसां का उद्धार होगा?” यीशु नै उनतै कह्या, २४ “भीड़े दरबाजे तै बड़ण की कोशिश करो, क्यूँके मै थमनै कहूँ सूँ के घणखरे उस में बड़णा चाहवैगें, अर कोनी बड़ सकैगें। २५ क्यूँके परमेसवर जो घर का मालिक से उठके दरबाजा भेड़ देगा, अर थम बाहरणै खड़े होए खटखटाके कहण लागो, हे प्रभु, म्हारै खात्तर दरबाजा खोल दे, अर वो जवाब देवै, मै थमनै कोनी जान्दा, थम कित के सो?”

२६ फेर थम कहण लागोगे, हमनै तेरे स्याम्ही खाया-पिया अर तन्नै म्हारे बजारा में उपदेश दिया। २७ पर वो कहवैगा, मै थमनै कहूँ चुक्या सूँ, मै कोनी जान्दा, थम कित के सो। हे भुन्डे काम करण आळो, थम सारे मेरै तै दूर रहो।

२८ जिव अब्राहम अर इसहाक अर याकूब अर सारे नबियां ताहीं परमेसवर राज्य में वेठे, अर खुद नै बाहरणै लिकाड़े होए देखोगे, “उड़े रोणा अर दाँत पिसणा होगा। २९ पूरी दुनिया के माणस आकै परमेसवर के राज्य के भोज में शामिल होवैगें। ३० अर सच्चाई या से के जो पाच्छले से वे पैहले होंगे, अर जो पैहले से वे पाच्छले होंगे।”

३१ उस्से बखत कुछ फरीसियां नै आकै यीशु तै कह्या, “उरै तै लिक्ड़या, क्यूँके हेरोदेस तन्नै मार

देणा चाहवै से।”

32 यीशु ने उनतै कहा, “जाके उस लोमड़ी\* तै कह द्यो के लखा, मै आज अर काल ओपरी आत्मायाँ नै काढू सूं अर बिमारां नै ठीक करूं सूं, अर तीसरे दिन अपना काम पूरा करूंगा। 33 फेर भी यो जरूरी सै के मै आज, काल अर परसो सफर करूं, क्यूँके हो न्ही सकदा के कोए नबी यरुशलेम नगर के बाहरणै मारया जावै।

\*\*\*\*\*

34 “हे यरुशलेम के माणसों! हे यरुशलेम के माणसों! तन्नै भोत-से नबियाँ ताहीं मारया सै, जो भोत पैहले रहवै थे, अर उन माणसां ताहीं भी पत्थरां तै मार दिया जिन ताहीं थारे धौरै भेज्जे थे। कितनी ए बर मन्नै न्यू चाह्या के जिस ढाळ मुर्गी अपणे बच्चां नै अपणे पाक्खां तळे कट्टे करै सै, उस्से तरियां ए मै भी तेरे बाळकां नै कट्टा करूं, पर थमने न्यू न्ही चाह्या। 35 देखो, थारा घर थारे खात्तर उजाड़ छोड्या जावै सै, मै थमने कहुँ सूं: जिब ताहीं थम न्ही कहोगे, ‘धन्य सै वो, जो प्रभु के नाम तै आवै सै,’ ‘जद ताहीं थम मन्नै दुबारे कदे न्ही देखोगे।’”

## 14

\*\*\*\*\*

1 एक खास मौकके पै जिब मसीह आराम के दिन फरीसियाँ के सरदारां म्ह तै किसे के घरां रोट्टी खाण नै गया, अर वे सारे उनने घणी उत्सुकता तै देखण लागरे थे। 2 उडै एक माणस था, जिसम्ह जलोदर\* की बीमारी थी। 3 इसपै यीशु नै शास्त्रियाँ अर फरीसियाँ तै कहा, “के नियम-कायदा के मुताबिक आराम के दिन आच्छा करणा ठीक सै या न्ही?” 4 पर वे बोल-बाल्ले रहे। फेर यीशु नै उस रोगी पै हाथ धरके उस ताहीं ठीक करके, उस ताहीं बिदा कर दिया। 5 अर उनतै कहा, “थारे म्ह तै इसा कौण सै, के जै थारा बेट्टा या बळध कुएँ म्ह आराम के दिन पड़ज्या अर वो उसनै जिब्वे बाहरणै कोनी लिक्डै?” 6 वे इन बाततां का कुछ जवाब कोनी दे पाए।

\*\*\*\*\*

7 जिब यीशु नै देख्या के न्योद होए माणस किस तरियां खास-खास जगहां छूट लेवै सै तो एक उदाहरण देके कहा, 8 “जिब कोए तन्ने ब्याह म्ह बुलावे, तो खास माणसां की जगहां पै न्ही बैठणा, कदे इसा ना हो के उसने तेरे तै भी बड़े ताहीं न्योद राख्या हो, 9 अर जिसने तेरे ताहीं अर उस ताहीं दोनुआ ताहीं न्योदा दिया सै, ओके कहवै, ‘इसने जगहां दे,’ अर फेर तन्ने शर्मिन्दा होके सारया तै पाच्छे बैठणा पड़े। 10 पर जिब तू न्योदा जावै तो सारया तै पाच्छली जगहां बैठ के जिब वो, जिसने तेरे ताहीं न्योदा सै आवै, तन्ने कहवै, ‘हे दोस्त, आगरे बढ़के बैठ,’ फेर तेरे गेल्या बैठण आळा के स्याम्ही तेरी बड़ाई होवैगी। 11 क्यूँके जो कोए अपणे-आपने बड़ा बणावैगा, वो छोट्टा करया जावैगा, अर जो कोए अपणे-आपने छोट्टा बणावैगा, वो बड़ा करया जावैगा।”

12 फेर यीशु नै फिरीसी तै जिसने उसका न्योदा दिया था उसतै कहा, “जिब तू दिन का या रात का भोज करै, तो अपणे साथियाँ या भाईयाँ या कुणबे या साहूकार पड़ोसियाँ नै ना न्योद, कदे इसा ना हो के वे भी तन्ने न्योदा देवै, अर तेरा बदला हो जावै। 13 पर जिब तू भोज करै तो कंगाल, टुंडे, लंगड़े अर आंध्याँ नै न्योद। 14 तब तू धन्य होवैगा, क्यूँके उन माणसां के धौरै बदले म्ह देण खात्तर कुछ कोनी, परमेसवर तन्नै उस काम का बदला धर्मियाँ के जिन्दा होण के बाद देवैगा।”

\*\*\*\*\*

15 यीशु के गेल्या खाणा खाण आळा म्ह तै एक नै ये बात सुणके उसतै कहा, “धन्य सै वो जो परमेसवर के राज्य म्ह भोज खावैगा।”

16 यीशु नै उसतै कहा, “किसे माणस नै बड़ा भोज करया अर घणा ताहीं न्योदा। 17 जिब खाणा त्यार होगया तो उसने अपणे नौक्कर के हाथ न्योदे होए माणसां ताहीं कहवां भेज्या, ‘आओ, इब

\* 13:32 13:32 लोमड़ी चलाक होवे सै इस करके यीशु नै हरोदेस ताहीं लोमड़ी कहा सै रोग से जिस म्ह रोगी के हाथ-पाँ सृज जावै सै)

\* 14:2 14:2 (जलोदर एक इसा

खाणा त्यार सै ।” 18 “पर वे सारे के सारे माफी माँगण लाग्गे । पैहल्डे नै उसतै कह्या, ‘मन्नै खेत मोल लिया सै, अर जरूरी सै के उसनै देखूँ, मै तेरे तै बिनती करूँ सूँ मन्नै माफ करदे ।”

19 दुसरे नै कह्या, “मन्नै पाँच जोड़े बळध मोल लिए सै, उननै परखण जाऊँ सूँ, मै तेरे तै बिनती करूँ सूँ, मन्नै माफ करदे ।”

20 एक और नै कह्या, “मन्नै ब्याह करया सै, इस करके मै न्ही आ सकदा ।”

21 उस नौक्कर नै आके अपणे माल्लिक ताहीं ये बात कह सुणाई । फेर घर के माल्लिक नै खुन्दक म्ह आके, अपणे नौक्कर तै कह्या, “नगर के बजारां अर गळियाँ म्ह इब्बे जाके कन्नालाँ नै, टुड्यां नै, लंगड्यां नै, अर आंध्याँ नै उरै लेके आओ ।”

22 नौक्कर नै दुबारे कह्या, “हे माल्लिक, जिस ढाळ तन्नै कह्या था, उससे तरियां ए करया गया सै, अर फेर भी जगहां सै ।”

23 माल्लिक नै नौक्कर तै कह्या, “सड़कां पै अर बाड्या की कान्ही जा अर माणसां नै मजबूर करके लिया ताके मेरा घर भरज्या । 24 क्यूँके मै थमनै कहूँ सूँ के उन पैहले बुलाए होइ माणसां म्ह तै कोए मेरै खाणे नै कोनी चाखैगा ।”

?????? ?? ? ? ?

25 जिब बड्डी भीड़ यीशु के गेल्या जावै थी, तो उसनै बोहड़के उनतै कह्या, 26 जै कोए मेरा चेल्ला बणणा चाहवै सै, अर अपणे माँ-बाप अर घरआळी अर बाळकां नै अर भाईयाँ नै अर भाणां नै बल्के अपणे जीवन नै भी मेरे तै ज्यादा प्यार करै सै, तो वो मेरा चेल्ला न्ही हो सकदा । 27 अर जो कोए अपणे दुखां का करूस ना ठावै, अर मेरै पाच्छै न्ही आवै, वो भी मेरा चेल्ला कोनी हो सकदा ।

28 उदाहरण के तौर पै “थारे म्ह तै कौण सै जो घर बणाणा चाहन्दा हो, अर पैहल्या बैठके खर्चा न्ही फैळावै के पूरा करण की गुंजास मेरै धोरै सै के न्ही? 29 जै वो आस ना होया करदा हो, तो जिब वो नीम धर ले पर काम पूरा ना कर पावै, तो सारे देखण आळे न्यू कहके उसका मखौल उड़ावैगे, 30 के यो माणस बणाण तो लाग्या पर पूरा कोनी कर पाया?”

31 या कौण इसा राजा सै जो दुसरे राजा तै युध्द करण जान्दा हो, अर जो विचार करले के जो बीस हजार सैनिक लेके मेरै पै चढ़या आवै सै, के मै दस हजार सैनिक लेके उसका सामना कर सकूँ सूँ के न्ही? 32 न्ही तो उसके दूर रहन्दे होए वो दूतां नै भेजके उसतै मिलाप करणा चाहवैगा । 33 इस्से ढाळ थारे म्ह तै कोए अपना सारा कुछ त्याग न्ही देवै, वो मेरा चेल्ला कोनी हो सकदा ।

?????? ??

34 “नूण† तो बढ़िया सै, पर जै नूण का सुवाद जान्दा रहवै, तो वो किस चीज तै नमकीन करया जावैगा । 35 वो ना तो धरती के अर ना खाद के खात्तर काम म्ह आवै सै: उसनै तो माणस बाहरणै बगा देवै सै । जिसके कान हाँ वो ध्यान तै सुण ले ।”

## 15

??? ???? ???? ?? ?

1 सारे चुंगी लेण आळे अर पापी माणस, यीशु के धोरै आया करै थे ताके उसकी सुणै । 2 पर फरीसी अर शास्त्री बरड़ाके कहण लाग्गे, “यो तो पापियाँ तै मिले सै अर उनके गेल्या खावै भी सै ।” 3 फेर उसनै उनतै यो उदाहरण कह्या 4 “थारे म्ह तै कौण सै जिसकी सौ भेड़ हाँ, अर उन म्ह तै एक खुज्या, तो निन्यानमै नै बण म्ह छोड़के, उस खुई होइ नै जिब ताहीं पा न्ही लेन्दी टोहन्दा ना रहवै? 5 अर जिब पा ज्या सै, फेर वो घणा राज्जी होके उस ताहीं कंधे पै ठा लेवै सै, 6 अर अपणे घरां आके साथियाँ अर पड़ोसियाँ नै कटठा करके कहवै सै, ‘मेरै गेल्या खुशी मनाओ, क्यूँके मेरी खुई होइ भेड़ पागी सै ।’ 7 मै थमनै कहूँ सूँ, के इस्से तरियां तै पापां नै छोड़ण आळे एक पापी खात्तर उन निन्यानवे

† 14:34 14:34 नमक-यीशु के चेल्यां के बारे म्ह बताया गया सै

धर्मियाँ की तुलना म्ह सुर्ग म्ह इसतै भी घणा आनन्द मनाया जावै सै, जिननै पापां की माफी माँगण की जरूरत कोनी।”

**एक एक प्रकरण पर प्रकरण**

8 यीशु नै एक ओर उदाहरण दिया “के कौण इसी बिरबान्नी होगी जिसके धोरे दस सिक्के हों, अर उन म्ह तै एक खुज्या, तो वा दीवा बाळ कै अर घर झाड़-बुहारके, जिव ताहीं पा न्ही जावै जी लाकै टोहन्दी ना रहवै? 9 अर जिव पा ज्या सै, तो वा अपनी सहेलियाँ अर पड़ोसणां नै कट्टा करके कहवै सै, ‘मेरे गेल्या खुशी मनाओ, क्यूँके मेरा खुया होया सिक्का पागया सै।’ 10 मै थमनै कहूँ सूँ के इस्से ढाळ जिव कोए माणस अपने पापां नै छोड़के परमेसवर की राह पै चाल्लणा शरू करै सै तो उसके खात्तर भी, परमेसवर के सुर्गदूतां के स्याम्ही उतणा ए आनन्द मनाया जावै सै।”

**एक एक प्रकरण पर प्रकरण**

11 फेर यीशु नै एक ओर उदाहरण देके कहा, “किसे माणस के दो बेटे थे। 12 उन म्ह तै छोटे लै नै पिता तै कहा, हे पिता, सम्पत्ति म्ह तै जो मेरा बाँडे आवै सै वो मन्नै इब्बे दे द्यो। इस करके पिता नै उन ताहीं अपनी सम्पत्ति का बंडवारा कर दिया। 13 घणे दिन कोनी बीते थे के छोटेटा बेटेटा सारा कुछ कट्टा करके दूर देश म्ह चल्या गया, अर उड़ै बुरे काम्मां म्ह अपना धन उड़ा दिया। 14 जिव वो सारा कुछ खर्च कर गया, तो उस देश म्ह भारया अकाळ पड्या, अर वो कंगाल होगया, अर उसके धोरे खाण नै कुछ भी न्ही रहा। 15 इस करके वो उस देश के बाशिंदां म्ह तै एक के धोरे काम करण खात्तर, अर उसनै उस ताहीं अपने खेतों म्ह सूअर चरण खात्तर भेज्या। 16 वो भोत भूख्वा था अर वो चाहवै था के उन फळियाँ म्ह तै जिन नै सूअर खावै थे, अपना पेट भरै, अर उस ताहीं कोए कुछ कोनी देवे था। 17 जिव छोटेटे बेटे के होश ठिकाणै आये अर अपने-आप तै कहण लागया, मेरे पिता के धोरे इसे भोत मजदूर सै जिनके खाणा खाण के बाद भी घणाए बच जावै सै, पर मै उरै भूख्वा मरण लाग रहा सूँ। 18 इस करके मै इब उठके अपने पिता धोरे जाऊँगा अर उसतै कहूँगा के पिता जी, मन्नै परमेसवर जो सुर्ग म्ह सै, उसके अर तेरे विरोध म्ह पाप करया सै। 19 इब इस जोगगा कोनी रहा के तेरा बेटेटा कुह्लाऊँ, मन्नै अपने एक मजदूर की ढाळ राख ले।”

20 “पर वो उस देश नै छोड़ के अपने बाप के घर की ओड़ चाल्या, वो इब्बे कुछ ए दूर था के उसके बाप नै उस ताहीं देख्या उसपै तरस आया, अर भाजके अपने बेटे ताहीं छाल्ती के लगाके, उस ताहीं चुम्ता रहा। 21 बेटे नै उसतै कहा, पिता जी, मन्नै परमेसवर जो सुर्ग म्ह सै, उसके अर तेरे विरोध म्ह पाप करया सै, अर इब इस जोगगा कोनी रहा के तेरा बेटेटा कुह्लाऊँ। 22 पर बाप नै अपने नौकरां तै कहा, ‘तावळ करके सुथरे-सुथरे लत्ते लिकाड़के उसनै पहिराओ, अर उसके हाथ्यां म्ह गुट्टी, अर पायां म्ह जूती पहिराओ, 23 अर बढ़िया भोज तैयार करो ताके हम खावां अर खुशी मनावो। 24 क्यूँके मेरा यो बेटेटा मर गया था, दुबारे जीगया सै: खुगया था अर इब पागया सै।’ अर वे खुशी मनाण लागगे। 25 पर उसका जेटेटा बेटेटा खेत म्ह काम करण लागरया था। जिव वो आन्दे होए घर के धोरे पोंहच्या, तो उसनै गाण-बजाण अर नाचण का बोल सुण्या। 26 आखर म्ह उसनै एक नौकर बुलाके बुझ्या, यो के होण लाग रहा सै? 27 उसनै उस ताहीं कहा, तेरा भाई बोहड़ आया सै, अर तेरे बाप नै बढ़िया भोज तैयार करवाया सै, इस करके के वो ठीक-ठाक घरा आ गया सै। 28 न्यू सुणके वो छो तै भर गया अर भीत्तर जाणा कोनी चाह्या, पर उसका बाप बाहरणै आके उसनै मनाण लागया। 29 उसनै बाप तै कहा, देख, मै इतने साल तै तेरी सेवा-पाणी कर रहा सूँ, अर कदे भी तेरा हुकम कोनी टाळया, फेर भी तन्नै मेरे ताहीं कदे भी कोए बढ़िया चीज कोनी दी, ताके मै अपने साथियाँ गेल्या आनन्द कर सकूँ। 30 पर जिव तेरा यो बेटेटा आया, जिसनै तेरी सम्पत्ति अयाशियाँ म्ह उड़ा दी सै, तो उसके खात्तर तन्नै बढ़िया भोज तैयार करया।’ 31 उसके बाप नै उसतै कहा, मेरे बेटे, तू सारी हाण मेरे गेल्या सै, अर जो कुछ मेरा सै वो सारा तेराए सै। 32 पर इब आनन्द अर मगन होणा चाहिये क्यूँके यो तेरा भाई जो मेरे होए माणसां की तरियां था दुबारा जी गया सै, खुगया था, इब पागया सै।”

## 16



1 फेर यीशु ने चेल्यां ताहीं एक और उदाहरण देकै कह्या, “किसे साहूकार का एक भण्डारी था, अर लोग्गाने नै उसके स्याम्ही उसपै यो इल्जाम लाया के वो तेरा सारा धन उड़ा देवै सै।<sup>2</sup> आखर म्ह उसनै अपणे भण्डारी ताहीं बुलाकै कह्या, ‘थो के सै मै तेरे बाबत के सुणु सू?’ अपणे भण्डारीपण का हिसाब दे, क्यूँके तू आगूँ तै भण्डारी कोनी रह सकदा।”

3 फेर भण्डारी सोच्चण लाग्या, इब मै के करूँ? क्यूँके मेरा माल्लिक इब भण्डारी का काम मेरै तै खोस्सै सै। माट्टी खोदण का काम मेरै तै होवै कोनी, अर भीख माँगदे होए मन्नै शर्म आवैगी।<sup>4</sup> मै जाण गया के मै के करूँ, ताके मै जिब भण्डारी के काम तै हटाया जाऊँ तो माणस मन्नै अपणे घरां म्ह ले लेवै।

5 फेर उसनै अपणे माल्लिक के देणदारां ताहीं एक-एक करकै बुलाया अर पैहल्या तै बुझ्झया, “तेरे उप्पर मेरै माल्लिक का कितना कर्जा सै?”

6 उसनै कह्या, “सौ मण\* तेल,” फेर उसनै उसतै कह्या, “अपणा खात्ता अर बही ले अर बैठकै तावळा पचास लिख दे।”

7 फेर उसनै दुसरे तै बुझ्झया, “तेरे पै कितना कर्जा सै?” दुसरे नै कह्या, सौ मण† गेहूँ, फेर उसनै उसतै कह्या, “अपणा खात्ता अर बही लेके अर बैठकै अस्सी लिख दे।”

8 माल्लिक नै उस अधर्मी भण्डारी ताहीं सराहया के उसनै कितनी चतुराई तै काम करया सै। क्यूँके इस दुनिया के माणस अपणे बखत के माणसां के गेल्या व्यवहार म्ह चाँदणे के माणसां‡ तै घणे चलाक सै।<sup>9</sup> अर मै थमनै कहुँ सूँ के दुनिया की धन-दौलत तै भले काम करकै अपणे खात्तर साथी बणा ल्यो, ताके जिब वो धन दौलत न्ही रहवै तो अनन्त काल के घर म्ह थारे स्वागत हो।

10 वे लोग जो थोड़े-तै भी थोड़े म्ह भी बिश्वास जोग्गे सै, वे घणे म्ह भी बिश्वास जोग्गे होंगे, जो थोड़े-तै भी थोड़े म्ह बेईमान सै, वो घणा म्ह भी बेईमान होंगे।<sup>11</sup> इस करके जिब थम संसारिक धन म्ह बिश्वास जोग्गा न्ही ठहरे, तो साच्चा धन थमनै कौण देवैगा? <sup>12</sup> अर जै थम संसारिक धन-दौलत न इस्तमाल करण म्ह भरोस्सेमंद न्ही ठहरे, तो परमेसवर थमनै सुर्गीय धन क्यूँ देवैगा?

13 “कोए नौक्कर दो मालिकां की सेवा एक बखत पै न्ही कर सकदा, क्यूँके वो एक तै बैर अर दुसरे तै प्यार राक्खैगा, या एक तै मिल्या रहवैगा अर दुसरे नै छोट्टा जाणैगा। थम परमेसवर अर धन दोनुआ की सेवा न्ही कर सकदे।”



14 फरीसी जो लोम्भी थे, ये सारी बात सुणकै, मखौल करण लागगे।<sup>15</sup> यीशु नै उनतै कह्या, “थम तो माणसां के स्याम्ही खुद नै धर्मी ठहराओ सौ, पर परमेसवर थारे मन नै जाणै सै, क्यूँके जो चीज माणसां की निगाह म्ह महान सै, वा परमेसवर के लोवै घृणित सै।”

16 जब तक यूहन्ना आया, जिब ताहीं मूसा के नियम-कायदे अर नबी का प्रभाव माणसां पै रह्या। उस बखत तै परमेसवर के राज्य का सुसमाचार सुणाया जाण लागरया सै, अर हरेक उस म्ह तेज्जी तै इसकी ओड़ खिंचे आण लागरे सै।<sup>17</sup> अकास अर धरती का टळ जाणा आसान सै, पर नियम-कायदा की हर छोट्टी बात भी पूरी होके रहवैगी।

18 उदाहरण के तौर पै “जो कोए अपनी घरआळी नै छोड़के दुसरी तै ब्याह करै सै, वो जारी करै सै, अर जो कोए इसी छोड़डी होई बिरबान्नी तै ब्याह करै सै, वो भी जारी करै सै।”



19 फेर यीशु नै कह्या, “एक साहूकार माणस था जो बैजनी अर मलमल के महँगे लत्ते पहरदा अर हरेक दिन ऐसो-आराम तै अर मौज तै रहवै था।<sup>20</sup> लाजर नाम का एक कंगाल जिसकै घा: होरे थे

\* 16:6 16:6 3700 लिटर † 16:7 16:7 4000 किलो ‡ 16:8 16:8 चाँदणे के माणस-बिश्वासी माणसां नै कहवै सै

उसकी देहली पै छोड़ दिया जावै था। <sup>21</sup> अर वो चाहवै था, के साहूकार के मेज की जूठण तै अपणा पेट भरै, उरै ताहीं के कुत्ते भी आकै उसके घा: नै चाटचा करै थे।”

<sup>22</sup> इसा होया के वो कंगाल मरग्या, अर सुगंदूत्तां नै उस ताहीं लेकै अब्राहम की गोद म्ह पोंहच्या। वो साहूकार भी मारया अर गाडचा गया, <sup>23</sup> साहूकार नरक म्ह गेरया गया, अर नरक की ताड़ना तै दर्द म्ह पड़े होए अपणी निगांह ठाई, दूर तै ए अब्राहम के साथ लाजर ताहीं देख्या। <sup>24</sup> फेर उसनै रुक्का मारकै कह्या, हे पिता अब्राहम, मेरै पै दया करके लाजर नै भेजदे, ताके वो अपणी आन्गळी का कुणा पाणी म्ह डबोकै मेरी जीभ नै शीळी करै, क्यूँके मै इस आग तै तड़फू सूं।

<sup>25</sup> “पर अब्राहम बोल्या, ‘हे बेट्टे, याद कर, के तन्नै अपणी जिन्दगी म्ह बढ़िया तै बढ़िया चीज ले ली सै’, अर उससे तरियां लाजर नै तुच्छ चीज, पर इब वो उरै सुख अर शान्ति पा रह्या सै, अर तू तड़फ रह्या सै। <sup>26</sup> इन सबके अलावा म्हारै अर तेरे बिचाळै एक बड़ी खाई ठहराई गई सै, के जो उरै तै तेरी ओड़ आणा चाहवै, वे ना जा सके, अर ना कोए उड़ै इस पाससै म्हारै धोरै आ सके।”

<sup>27</sup> साहूकार बोल्या, तो हे पिता, मे तेरे तै बिनती करूँ सूं, के उस ताहीं मेरे बाप के घरां भेज, <sup>28</sup> क्यूँके मेरे पाँच भाई सै, वो उनके स्याम्ही इन बात्तां की गवाही दे, इसा ना हो के वे भी दुख की जगहां म्ह आवै।

<sup>29</sup> अब्राहम नै उसतै कह्या, उनके धोरै तो मूसा के नियम-कायदे, नबी अर नबियाँ की किताब सै, वे उनकी सुणै।

<sup>30</sup> साहूकार बोल्या, “न्ही, पिता अब्राहम, पर जै कोए मेरे होया म्ह तै उनके धोरै जावै, तो वे पाप करणा छोड़ देंगे।”

<sup>31</sup> अब्राहम नै उसतै कह्या, “जिब वे मूसा नबी अर नबियाँ की न्ही सुणदे, तो जै मेरे होया म्ह तै कोए जी भी जा, तोभी उसकी कोनी मान्नैगें।”

## 17

### ☞☞☞☞☞ ☞☞ ☞☞☞☞☞☞

<sup>1</sup> फेर यीशु नै अपणे चेल्यां तै कह्या, “हो न्ही सकदा के टोक्कर ना लागगै, पर धिक्कार सै, उस माणस पै जिसकै बाबत टोक्कर लागगै सै। <sup>2</sup> पर जो कोए इन छोट्या बाळकां समान जो मेरै पै विश्वास करै सै, किसे तै भी पाप करवावे तो उसके खात्तर भला योए सै के एक बड़्डी चाककी का पाट उसके गळ म्ह लटकाया जावै अर वो समुंदर म्ह गेरया जावै।”

<sup>3</sup> सावधान रहों, “जै तेरा विश्वासी भाई पाप करै तो उसनै समझा, अर जै पछतावै तो उसनै माफ करदे। <sup>4</sup> जै हरेक दिन वो तेरे बिरुध्द म्ह सात बार भी पाप करै, अर सात्तु बार तेरे धोरै आके कहवै, मै पछताऊँ सूं, तो उसनै माफ करदे।”

### ☞☞☞☞☞

<sup>5</sup> फेर प्रेरितां नै प्रभु यीशु तै बिनती करी, “के म्हारे विश्वास नै बढ़ा।”

<sup>6</sup> प्रभु बोल्या, “जै थमनै राई के दाणै बराबर भी विश्वास होन्दा, तो थम इस शहतूत कै दरखत नै कहन्दे के जड़ तै उखड़के समुन्दर म्ह जा लाग, तो वो थारी मान लेन्दा।”

### ☞☞ ☞☞☞☞☞☞☞☞☞☞

<sup>7</sup> फेर यीशु नै कह्या, “मान ल्यो थारे म्ह तै किसे कै धोरै एक नौक्कर सै जो नौक्कर हळ चलान्दा या भेड़ चरान्दा हो, अर जिब वो खेत तै वोहड़ आवै, तो के थम उसतै कहोंगे, ‘आकै मेरे गैल खाणा खाण बैठ ज्या?’ <sup>8</sup> पर इसके बजाय के वो अपणे नौक्कर न्यु कोनी कहवैगा, ‘मेरे खात्तर खाणा त्यार कर, अर मेरे ताहीं खाणा परोसण खात्तर तैयार हो ज्या, जिब ताहीं मै खाऊँ पीऊँ तब ताहीं मेरी सेवा-पाणी कर, इसके पाच्छे तू भी खा-पी लिये?’ <sup>9</sup> के वो उस नौक्कर का श्यान मान्नैगा के उसने वैए काम करे जिसका हुकम दिया सै? <sup>10</sup> इससे तरियां तै थम भी जिब उन सारे काम्मां नै कर ल्यो



जिसका हुकम थारे ताहीं दिया गया सै, तो उस ताहीं कर लेण के बाद थमनै कहणा चाहिये, 'हम नौक्कर सां, हम किसे बड़ाई के हकदार कोनी हमनै तो बस अपना फर्ज निभाया सै।'

???? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ?

11 फेर जिव यीशु यरुशलेम जाण लागरया था तो सामरिया अर गलील परदेस कै विचाळे की सीमा तै होन्दा होया लिकडया। 12 तो गाम म्ह बड़दे बखत उसनै दस कोढ़ी मिले वे दूर खड़े थे। 13 वे जोर तै रुक्का मारके बोल्ले, "हे यीशु, हे माल्लिक, म्हारै पै दया कर!"

14 यीशु नै उन कान्ही लखाकै कह्या, "यरुशलेम के मन्दर म्ह जाओ, अर खुद नै याजकां ताहीं दिखाओ, ताके वो भी देखै के थम ठीक होए सां के न्ही।" अर जान्दे ए जान्दे वे कोढ़ तै मुक्त होगये।

15 फेर उन म्ह तै एक न्यू देखके के मै ठीक होगया सुं, जोर-जोर तै परमेसवर की बड़ाई करदा होया यीशु कै धोरै बोहड़या, 16 अर यीशु कै पायां पै मुँह कै बळ पड़के उसका धन्यवाद करण लागया, अर वो सामरी था।

17 इसपै यीशु नै कह्या, "के दस कोढ़ी चंगे न्ही होए, तो फेर नौ कित्त सै? 18 के गैर यहूदी नै छोड़ कोए और न्ही लिकडया जो परमेसवर की बड़ाई करदा?" 19 फेर उसनै उस ताहीं कह्या, "उठके चल्या जा, तन्नै विश्वास करया इस खात्तर तू ठीक होगया सै।"

?????? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ? ?

20 फेर फरीसियां नै यीशु तै बुद्धया के परमेसवर का राज्य कद आवैगा, तो उसनै उनतै जवाब दिया, "परमेसवर का राज्य इस ढाळ आवैगा के थम उसनै अपना आँखां तै न्ही देख सकदे। 21 अर ना ए माणस इसके बारे म्ह न्यू कह सकेगे, देखखो यो सै परमेसवर का राज्य। क्यूँके परमेसवर का राज्य थारे विचाळे सै।"

22 फेर यीशु नै चेल्यां तै कह्या, "वो दिन आवैगा, जिव थम उस दिन नै देखणा चाहोंगे जिव मै माणस का बेट्टा बोहड़ के आऊंगा पर थम उस दिन नै देख न्ही पाओगे।" 23 माणस थारे तै कहवेंगे, लखाओ, "मसीहा उड़े सै!" या लखाओ, "वो आड़े सै!" पर थम यो सुणके चले ना जाइयो, अर ना उनके पाच्छै लागियो। 24 क्यूँके जिस तरियां विजळी अकास के एक छोर तै कोंध के अकास के दुसरे छोर ताहीं चमके सै, उससे तरियां मै माणस का बेट्टा भी अपना दिनां म्ह जाहिर होऊंगा। 25 पर पैहल्या जरूरी सै के मै घणा दुख ठावै, अर इस युग के माणस मेरे ताहीं नकार देंगे।

26 जिसा पूर्वज नूह के दिनां म्ह होया था, उससे तरियां मुझ माणस के बेट्टे के दिनां म्ह भी होवैगा। 27 जिस दिन तक नूह जहाज म्ह न्ही चढ़या, उस दिन तक माणस खावै-पीवै थे, अर उन म्ह ब्याह होवै थे। फेर बाढ़ नै उन सारया का नाश करया।

28 ठीक याए हालात लूत के दिनां म्ह होई थी, जिव वो सदोम नगर म्ह रहवै था। माणस खावै-पीवै, लेणा-देणा करदे, दरखत लगान्दे अर घर चिणै थे, 29 पर जिस दिन लूत सदोम तै लिकडया, उस दिन आग अर गन्धक अकास तै बरसी सारे नगर के माणसां ताहीं नाश कर दिया। 30 यो उस दिन की तरियां होगा जिव मै माणस का बेट्टा बिना बताये आ जाऊंगा।

31 "उस दिन जो छात पै हो, अर उसका समान घर म्ह हो, अर वो उसनै लेण खात्तर तळै न्ही उतरें, अर उससे तरियां जो खेत्तां म्ह हो, वो पाच्छै न्ही बोहड़ें। 32 याद राखियो लूत की घरआळी के गैल के होया था! 33 जो कोए अपना जान बचाणा चाहवै, वो उसनै खोवैगा, अर जो कोए उसनै खोवै वो उसनै जिन्दा राखवैगा। 34 मै थमनै कहूँ सूं, उस रात नै दो माणस एक खाट पै होंगे, एक ठाया जावैगा अर दुसरा छोड़ दिया जावैगा। 35 दो बिरबान्नी एक साथ चाक्की पीसदी होवैगी, एक ठा ली जावैगी अर दुसरी छोड़ दी जावैगी। 36 (दो जणे खेत म्ह होंगे, एक ठाया जावैगा अर दुसरा छोड़या जावैगा।)"

37 न्यू सुण उननै उसतै बुद्धया, "हे प्रभु, यो कित्त होवैगा?" यीशु नै उनतै कह्या, "जड़ै लाश हो सै, उड़े चील कट्टे होवै सै, उससे तरियां यो हरेक कोए जाण लेवैगा के यो कित्त होगा।"



मौरे म्ह तै लिक्इणा मुश्किल सै। उस्से तरियां परमेसवर के राज्य साहूकार का बड़णा भी मुश्किल सै।”

26 इसपै सुणण आळा नै कह्या, “तो फेर किसका उद्धार हो सकै सै?”

27 उसनै कह्या, “जो माणसां तै न्ही हो सकदा वो परमेसवर तै हो सकै सै।”

28 पतरस नै कह्या, “लखा, हम तो घर-बार छोड़कै तेरे पाच्छै हो लिये सां।”

29 उसनै उनतै कह्या, “मै थमनै साच्ची-साच कहुँ सूं के इसा कोए कोनी जिसनै परमेसवर के राज्य के खात्तर घर, या घरआळी, भाई, या माँ-बाप, या बाळ-बच्चे ताहीं छोड़ दिया हो, 30 अर इस बखत कई गुणा घणा न्ही पावै अर परलोक म्ह अनन्त जीवन।”

~~~~~

31 फेर उसनै बारहां चेल्यां ताहीं गैल लेके उनतै कह्या, “देखो, हम यरुशलेम नगर म्ह जावां सां, अर जितनी बात मुझ माणस के बेट्टे खात्तर नबियां नै लिक्खी होई सै, वे सारी पूरी होवैगी। 32 क्यूँके मै गैर यहूदियां के हाथ्यां म्ह सौप्या जाऊंगा, अर मेरा मजाक उड़ावैगें, मेरी बेजती करैगें, अर मेरे पै थूकैगें, 33 अर मेरे कोड़े मारैगें, अर मन्नै छेतैगें अर मार देवैगें, अर मै तीसरे दिन जिन्दा हो जाऊंगा।”

34 पर उननै इन बातों म्ह तै कोए बात न्ही समझी, अर या बात उनतै लुक्ही रही, अर जो कह्या गया था वो उनकी समझ कोनी आया।

~~~~~

35 जब वो यरीहो नगर के लोवै पोहच्य़ा, तो एक आन्धा सड़क के किनारे बठचा होया भीख माँगण लागरया था। 36 वो भीड़ के चाल्लण की आवाज सुणके बुझण लागया, “यो के होरया सै?” 37 उननै उसतै बताया, “यीशु नासरी\* जाण लागरया सै।”

38 फेर उसनै रुक्का मारकै कह्या, “हे यीशु, दाऊद की ऊलाद, मेरै पै दया कर!”

39 जो आगुँ-आगुँ जाण लागरे थे, वे उसनै धमकाण लागये के बोल-बाल्ला रहै, पर वो और भी रुक्का मारण लागया, “हे दाऊद की ऊलाद, मेरै पै दया कर!”

40 फेर यीशु नै खड़े होके हुकम दिया के उसनै मेरै धोरै ल्याओ, अर जब वो धोरै आया तो उसनै उसतै बुझया, 41 “तू के चाहवै सै के मै तेरे खात्तर करुँ?” उसनै कह्या, “हे प्रभु, योए के मै देखण लागु।”

42 यीशु नै उसतै कह्या, “देखण लाग, तेरे विश्वास नै तेरे ताहीं ठीक करया सै।” 43 फेर वो जिवे देखण लागया अर परमेसवर की बड़ाई करदा होया उसके पाच्छै हो लिया, अर सारे आदमियाँ नै देखकै परमेसवर की जे-जे कार करी।

## 19

~~~~~

1 यीशु यरीहो नगर म्ह बड़ण लागरया था। 2 ओड़ै जक्कई नाम का एक माणस था जो चुंगी लेण आळा का सरदार, अर साहूकार था। 3 वो यीशु नै देखणा चाहवै था के वो कौण सै। पर भीड़ के कारण देख न्ही सकै था, क्यूँके वो बोन्ना था। 4 फेर उस ताहीं देखण खात्तर वो आगुँ भाजकै गुलर के दरखत पै चढ़गया, क्यूँके यीशु नासरी\* उस्से राह तै जाण आळा था।

5 जब यीशु नासरी उसके धोरै आया, तो उप्पर लखाके उसनै कह्या, “हे जक्कई, तोळा उतरया, क्यूँके आज मन्नै तेरे घरां जरुर रहणा सै।” 6 वो दरखत तै उतरकै राज्जी होके यीशु नै अपने घरां लेगया।

7 न्यू देखकै सारे माणस बरड़ाण लागगे, “वो तो एक पापी माणस के घरां रुकरया सै।”

\* 18:37 18:37 नासरत नगर का रहण आळा \* 19:4 19:4 नासरत नगर का रहण आळा

8 जब यीशु जक्कई के घर खाणा खाण लागरया था तो जक्कई नै खड़े होके पूरभु तै कह्या, “हे पूरभु यीशु, देख, मै अपणी आध्धी सम्पत्ति कंगालां नै द्यु सूं, अर किसे का कुछ भी जुल्म करके ले लिया सै तो उस ताहीं चौगुणा बोहड़ा द्यु सूं।”

9 फेर यीशु नै उसतै कह्या, “आज इस घर के माणसां पै उद्धार आया सै, इस करके के यो भी अब्राहम के वंश तै सै। 10 मै माणस का बेट्टा खोए होया नै टोह्ल अर उनका उद्धार करण आया सूं।”

~~~~~

11 जब वे ये बात सुणे थे, तो यीशु नै एक उदाहरण देके कह्या, इस करके के वो यरुशलम के धोरे था, अर वे समझै थे के परमसेवर का राज्य इब्बे जाहिर होण आळा सै। 12 आखर उसनै कह्या, “एक साहूकार माणस दूर देश तै चल्या के राजपद पाके बोहड़ै।” 13 उसनै अपणे नौकरां म्ह तै दस ताहीं बुलाके उन ताहीं दस मोंहर दी अर उनतै कह्या, “मेरै बोहड़ण ताहीं लेण-देण करियो।”

14 पर उसकै नगर के बासिन्दे उसतै बैर राक्खै थे, अर उसकै पाच्छै, दूत्तां तै कुह्या भेज्या, “हम न्ही चाहन्दे के यो म्हारै पै राज करै।”

15 “जब माल्लिक राजपद पाके बोहड़या, तो इसा होया के उसनै अपणे नौकरां ताहीं जिन ताहीं रपिये दिये थे, अपणे धोरे बुलाया ताके बेरा करै के उननै लेण-देण म्ह के-के कमाया।”

16 फेर पैहलडे नै आके कह्या, “हे माल्लिक, तेरी मोंहर तै दस और मोंहर कमाई सै।”

17 उसनै उसतै कह्या, “शाबाश, हे आच्छे, नौक्कर! तू घणेए थोड़े म्ह भरोसमंद लिकड़या इब दस नगरां का हक राख।”

18 दुसरे नौक्कर नै आके कह्या, “हे माल्लिक, तेरी मोंहर तै पाँच और मोंहर कमाई सै।”

19 माल्लिक नै उसतै कह्या, “तू भी पाँच नगरां पै हाकिम होज्या।”

20 तीसरे नौक्कर नै आके कह्या, “हे माल्लिक, देख, तेरी मोंहर या सै: जिस ताहीं मन्नै अंगोच्छे, म्ह जुड़ राक्खी थी। 21 क्यूँके मै तेरे तै डरूँ था, इस करके के तू कठोर माणस सै: जो तन्नै न्ही धरया उसनै ठा ले सै, अर जो तन्नै न्ही बोया, उस ताहीं काट्टै सै।”

22 माल्लिक नै उसतै कह्या, “हे दुष्ट नौक्कर, मै तेरेए मुँह तै तन्नै कसूरवार ठहराऊँ सूं। जब तन्नै मेरा बेरा सै के करड़ा माणस सूं, जो मन्नै न्ही धरया उसनै ठा ल्यु सूं, अर जो मन्नै न्ही बोया, उस ताहीं काट्टू सूं, 23 तो तन्नै मेरे रपिये सरांफां के धोरे क्यातै कोनी धरे के मै आके ब्याज सुधां ले लेन्दा?”

24 अर जो माणस धोरे खड़े थे, उसनै उनतै कह्या, “वा मोंहर उसतै ले ल्यो, अर जिसके धोरे दस मोंहर सै उसनै दे द्यो।”

25 उननै उसतै कह्या, “हे माल्लिक, उसके धोरे दस मोंहर तो सै।”

26 “मै धमने कहूँ सूं के जिसके धोरे सै, उस ताहीं दिया जावेगा, अर जिसके धोरे न्ही सै, उसतै वो भी जो उसके धोरे सै ले लिया जावेगा। 27 पर मेरे उन बैरियाँ ताहीं जो न्ही चाहवैँ थे के मै उनपै राज करूँ, उन ताहीं उरे ल्याके मेरै स्याम्ही घात करो।”

~~~~~

28 ये बात कहके यीशु यरुशलम नगर के कान्ही चेल्यां के आगै-आगै चाल्या। 29 जब वो जैतून नामक पहाड़ पै बैतफगे अर बैतनिय्याह गाम के धोरे पोहच्या, तो उसनै अपणे चेल्यां म्ह तै दोयां ताहीं न्यु कहके भेज्या, 30 “स्याम्ही के गाम म्ह जाओ, अर उस म्ह पोहोचदये एक गधी का बच्चा जिसपै कोए कदे न्ही बेटछा हो, बन्धया होड़ धमनै मिलेगा, उसनै खोल के लियाओ। 31 जै धारे तै कोए बुझ्झै के क्यातै खोल्लो सो, तो कहियो के पूरभु नै इसकी जरूरत सै।”

32 जो भेज्जै गए थे, उननै जाके जिसा यीशु नै कह्या था, उससे तरियां पाया। 33 जब वे गधी के बच्चे नै खोल्ले रहे थे, तो उसके मालिकां नै उनतै बुझ्झया, “इस बच्चे नै क्यातै खोल्लो सो?”

34 चेल्यां नै कह्या, “पूरभु नै इस ताहीं काम म्ह ल्याणा सै।”

35 वे उसने यीशु के धोरे लियाए, अर अपने लत्ते उस गधी के बच्चे पै गेरकै यीशु ताहीं उसपै बिटा दिया। 36 जब वो जाण लागरया था, तो वे अपने लत्ते राह म्ह बिछान्दे जावै थे।

37 यरुशलम नगर के धोरे आन्दे होए जब यीशु जैतून पहाड़ की ढलाण पै पोंहच्या, तो चेल्यां का सारा टोळ उन सारे सामर्थ के काम्मां के कारण जो उननै देखे थे, राज्जी होकै जोर तै परमेसवर की जय-जयकार करण लागगे

38 “धन्य से वो राजा, जो प्रभु के नाम तै आवै सै! सुर्ग म्ह शान्ति अर अकास मण्डप म्ह महिमा हो!”

39 फेर भीड़ म्ह तै कुछ फरीसी यीशु तै कहण लागगे, “हे गुरु, इस बात के कारण अपने चेल्यां नै धमका।”

40 उसनै जवाब दिया, “मै धमनै कहूँ सूँ, जै ये बोल-बाल्ले रहे तो स्तुति इन पत्थरां तै लिक्ड़ण लागगौगी।”

~~~~~

41 जब यीशु यरुशलम नगर के धोरे आया तो नगर नै देखकै माणसां खात्तर रोया 42 अर बोल्या, “कितना भला होन्दा के तू, हाँ, तू ए आज इतणाए समझ लेन्दा की परमेसवर के साथ शान्ति का के मतलब सै, पर यो तेरे तै लहूको के राख्या गया सै। 43 क्यूँके वे दिन तेरे म्ह आवैगें के तेरे बैरी मोर्चा बाँधकै तन्नै घेर लेवैगें, अर चौगरदे तै तन्नै दबावैगें ताके थारा राह बन्द होज्या, 44 अर तेरा बैरी तन्नै अर तेरे बाळकां ताहीं जो तेरे म्ह सै, माट्टी म्ह मिलवैगें, अर तेरे म्ह पत्थर पै पत्थर भी कोनी रहवैगा, जो गेरया ना जावैगा, क्यूँके तन्नै उस मौकै ताहीं जब तेरे पै दया की निगांह होई थी तो तन्नै कोनी पिच्छाणा।”

~~~~~

45 फेर वो मन्दर म्ह जाके समान बेचण आळा ताहीं बाहरणै लिकाड़ण लाग्या, 46 अर उनतै कह्या, “पवित्र शास्त्र म्ह लिख्या सै, ‘मेरा घर प्रार्थना का घर होगा,’ पर धमनै इस ताहीं डाकुआं की गुफा बना दिया।”

47 वो हरेक दिन मन्दर म्ह उपदेश दिया करै था, अर प्रधान याजक अर शास्त्री अर माणसां के मुखिया उसका नाश करण का मौकका टोहूँ थे। 48 पर कोए जुगाड़ कोनी काढ सकै थे, के यो किस तरियां करा, क्यूँके सारे माणस घणे चाह तै उसकी सुणै थे।

## 20

~~~~~

1 एक दिन इसा होया के जब यीशु मसीह मन्दर म्ह माणसां नै उपदेश देवै था अर सुसमाचार सुणावै था, तो प्रधान याजक अर शास्त्री, यहूदी अगुवां के गेल्या धोरे आकै खडे होए, 2 अर कहण लागगे, “म्हारे ताहीं बता, तू इन काम्मां नै किसके हक तै करै सै, अर वो कौण सै जिसनै तेरे ताहीं यो हक दिया सै?”

3 उसनै उनतै कह्या, “मै भी थारे तै एक बात बुझ्हु सूँ, मन्नै बताओ। 4 यूहन्ना का बपतिस्मा सुर्ग की ओड़ था या माणसां की ओड़ तै था?”

5 फेर वे आप्स म्ह कहण लागगे, “जै हम कह्वां, ‘सुर्ग की ओड़,’ तो वो कहवैगा, ‘फेर धमनै उसका विश्वास क्यातै न्ही करया?’ 6 अर जै हम कह्वां, ‘माणसां की ओड़,’ तो सारे माणस म्हारै पै पत्थर बरसावैगें, क्यूँके सारे जाणै सै के यूहन्ना साच्चीये नबी था।”

7 आखर उननै जवाब दिया, “हमनै न्ही बेरा के वो किस ओड़ तै था।”

8 यीशु नै उनतै कह्या, “तो मै भी कोनी बतान्दा के मै ये काम किस हक तै करूँ सूँ।”

~~~~~

9 फेर वो माणसां तै यो उदाहरण कहण लाग्या: “किसे माणस नै अंगूर का बाग लगाया, अर किसानां तै उसनै टेक्का दे दिया अर घणे दिनां खात्तर परदेस चल्या गया। 10 जब बखत आया तो उसनै किसानां के धोरे एक नौकर ताहीं भेज्या के वे अंगूर के बाग के कुछ फळां का हिस्सा उसनै

देवै, पर किसानानां नै उस ताहीं छेतकै रिक्ते हाथ्यां बोहड़ा दिया। <sup>11</sup> फेर उसनै एक और नौक्कर ताहीं भेज्या, अर उननै उस ताहीं भी छेतकै अर उसकी बेजती करकै रिक्ते हाथ्यां बोहड़ा दिया। <sup>12</sup> फेर उसनै तीसरा भेज्या, उननै उस ताहीं भी घायल करकै लिकाड़ दिया।”

<sup>13</sup> फेर अंगूर के बाग कै माल्लिक नै कह्या, “मै के करुँ? मै अपणे प्यारे बेटटे नै भेज्जूगा, हो सकै सै वे उसकी इज्जत करै।”

<sup>14</sup> जिब किसानानां नै उस ताहीं देख्या तो आप्पस म्ह विचार करण लाग्गे, “यो तो वारिस सै, आओ, हम इसनै मार दया के विरासत म्हारी हो जावै।” <sup>15</sup> अर उननै उस ताहीं अंगूर के बाग तै बाहरणै लिकाड़के मार दिया। इस करके अंगूर के बाग का माल्लिक उनकै गेल्या के करैगा? <sup>16</sup> वो आकै उन किसानानां का नाश करैगा, अंगूर के बाग औरां नै सोपैगा। न्यू सुणकै उननै कह्या, “परमेसवर करै इसा ना हो।”

<sup>17</sup> उसनै उनकी ओड़ देखकै कह्या, फेर यो के लिख्या सै: “जिस पत्थर नै राजमिस्त्रियां नै निकम्मा ठहराया था, वोए कोणे का सिरा होग्या।

<sup>18</sup> “जो कोए उस पत्थर पै पड़ैगा वो चकणाचूर हो ज्यागा, अर जिसपै वो पड़ैगा, उसनै पिस देवैगा।”

### =====

<sup>19</sup> उससे बखत शास्त्रियां अर पूरधान याजकां नै उस ताहीं पकड़णा चाह्या, क्यूँके वे समझ्गे थे के उसनै म्हारै पै यो उदाहरण कह्या, पर वे माणसां तै डरगे।

<sup>20</sup> अर वे उसकी टाह म्ह लाग्गे अर भेदिए भेज्जै के धर्म का भेष धरके उसकी कोए ना कोए बात पकड़ै, ताके उस ताहीं राज्यपाल कै हाथ अर अधिकार म्ह सौंप दें। <sup>21</sup> उननै उसतै न्यू बुद्धिया, “हे गुरु, हमनै बेरा सै के तू ठीक कहवै अर सिखावै भी सै, अर किसे की मेरै कोनी लेन्दा, बल्के परमेसवर की राह सच्चाई तै बतावै सै। <sup>22</sup> के म्हारा कैसर तै चुंगी देणा ठीक सै या कोनी?”

<sup>23</sup> उसनै उनकी श्याणपत ताहीं ताड़कै उनतै कह्या, <sup>24</sup> “एक दीनार (एक दिन की मजदूरी) मन्ने दिखाओ। इसपै किसकी छाप अर नाम सै?” उननै कह्या, “कैसर का।”

<sup>25</sup> उसनै उन ताहीं कह्या, “तो जो कैसर का सै, वो कैसर नै द्यो, अर जो परमेसवर का सै, वो परमेसवर नै द्यो।”

<sup>26</sup> वे माणसां कै स्याम्ही इस बात म्ह उसनै पकड़ कोनी सके, बल्के उसके जवाब तै हैरान होकै बोल-बाल्ले रहगे।

### =====

<sup>27</sup> फेर सद्की जो कहवै सै के मरे होया का जिन्दा होणा सै ए कोनी उन म्ह तै कुछ नै उसके धोरै आकै बुद्धिया, <sup>28</sup> “हे गुरु, मूसा नबी नै म्हारै खात्तर यो लिख्या सै: जै किसे का भाई अपनी घरआळी कै रहन्दे बेऊलादा मर जावै, तो उसका भाई उसकी घरआळी तै ब्याह करले, अर अपणे भाई कै खात्तर पीढ़ी पैदा करै। <sup>29</sup> सात भाई थे, पैहल्ड़ा भाई ब्याह करके बेऊलादा मरग्या। <sup>30</sup> फेर दुसरे <sup>31</sup> अर तीसरे नै भी उस विरबान्नी तै ब्याह कर लिया। इस तरियां तै सातु बेऊलादे मरगे। <sup>32</sup> आखर म्ह वा विरबान्नी भी मरगी। <sup>33</sup> आखर म्ह जिन्दा होण पै वा उन म्ह तै किसकी घरआळी होवैगी, क्यूँके वा सातुवां की घरआळी हो ली थी।”

<sup>34</sup> यीशु नै उनतै कह्या, “इस युग की ऊलादां म्ह ब्याह होवै सै, <sup>35</sup> पर जो माणस इस जोग्गे ठहरैगें के उस युग नै अर मरे होया म्ह तै जिन्दा उठणके पद नै पा लेवै, उन म्ह ब्याह शादी कोनी होन्दी। <sup>36</sup> वे दुबारे मरण के भी कोनी, क्यूँके वे सुगंदूतां की ढाळ होवैगें, अर पुनरुत्थान की ऊलाद होणे तै परमेसवर की भी ऊलाद होवैगें। <sup>37</sup> पर इस बात ताहीं के मरे होए जिन्दा होवै सै, मूसा नबी नै भी झाड़ी की कहाँनी म्ह दिखाया सै के वो प्रभु ताहीं ‘अब्राहम का परमेसवर, अर इसहाक का परमेसवर अर याकूब का परमेसवर कहवै सै।’ <sup>38</sup> परमेसवर तो मुदां का कोनी पर जिन्दा का परमेसवर सै: क्यूँके उसके लोवै सारे जिन्दे सै।”

39 फेर न्यू सुणकै शास्त्रियाँ म्ह तै कुछ नै न्यू कह्या, “हे गुरु, तन्नै ठीक कह्या।” 40 अर उननै दुबारै उसतै कुछ और बुद्धझणा की हिम्मत कोनी करी।

~~~~~

41 फेर उसने उनतै बुद्धझया, “मसीह नै दाऊद की ऊलाद किस तरियाँ कहवै सै?” 42 दाऊद खुदे भजन संहिता की किताब म्ह कहवै सै:

43 प्रभु नै मेरै प्रभु तै कह्या, “मेरै सोळे कान्ही बैठ, जिव ताहीं के मै तेरै बैरियाँ तेरे पायाँ म्ह न्ही झुका दियुँ।”

44 दाऊद तो उसने प्रभु कहवै सै, “तो फेर वो उसकी ऊलाद किस ढाळ होया?”

~~~~~

45 जिव सार सुणे थे, तो उसने अपणे चेल्याँ तै कह्या, 46 “शास्त्रियाँ तै चौकन्ने रहियो, जिनताहीं लाम्बे-लाम्बे चोगे पहरकै हांडणा आच्छा लागू सै, अर जिन नै बजाराँ म्ह नमस्कार, अर आराधनालयाँ म्ह खास बैठणा अर जिम्मण म्ह खास जगहाँ प्यारी लागू सै। 47 वे बिधवायाँ के घर खा जावै सै, अर दिखाण खात्तर घणी वार ताहीं प्रार्थना करदे रहवै सै: ये घणा दण्ड पावैगें।”

## 21

~~~~~

1 फेर उसने निगांह ठाकै सहूकाराँ ताहीं अपणा-अपणा दान भण्डार म्ह घालदे देख्या। 2 उसनै एक कंगाल बिधवा ताहीं भी उस म्ह दो दमड़ी (जो एक धेले के बराबर होवै सै) घालदे देख्या। 3 फेर उसने कह्या, “मै थमनै सच कहूँ सू के इस कंगाल बिधवा नै सारया तै बाध घाल्या सै। 4 क्यूँके उन सारया नै अपणी-अपणी बढ़दी म्ह तै दान म्ह कुछ घाल्या सै, पर इसने अपणी घटी म्ह तै अपणी सारी कमाई घाल्ली सै।”

~~~~~

5 जिव घणखेर माणस मन्दर के बाबत कहरे थे के वो किसे सुथरे पत्थराँ अर भेटाँ की चिज्जाँ तै समारया गया सै, तो उसने कह्या, 6 “वे दिन आवैगें, जिन म्ह यो सारा जिन नै थम देख्को सो, उन म्ह तै उरै किसे पत्थर पै पत्थर भी कोनी रहवैगा, जो गेरया न्ही जावैगा।”

~~~~~

7 उननै उसतै बुद्धझया, “हे गुरु, यो सारा कद होवैगा? अर ये बात जिव पूरी होण पै होवैगी, तो उस बखत की के निशान्नी होवैगी?”

8 उसने कह्या, “चौकन्ने रहियो के भकाए ना जाओ, क्यूँके घणखेर मेरै नाम तै आके कहवैगें, ‘मै वोए सू,’ अर न्यू भी के, ‘बखत लोवे आण पोंहच्या सै।’ थम उनकै पाच्छै ना चले जाइयो। 9 जिव थम रोळे अर झगड़े का जिक्र सुणो तो घबराईयो ना, क्यूँके इनका पैहल्या होणा जरूरी सै, पर उस बखत जिव्बे खात्मा कोनी होवैगा।”

10 फेर उसनै उनतै कह्या, “जात पै जात अर राज्य पै राज्य चढ़ाई करैगा, 11 अर बड़े-बड़े हाल्लण आवैगें, अर जगहाँ-जगहाँ अकाळ अर महामारियाँ पड़ैगी, अर अकास म्ह खतरनाक बात अर बड़े-बड़े निशान जाहिर होवैगें।”

12 पर इन सारी बातताँ तै पैहल्या मेरै नाम के बाबत थमनै पकड़ैगें, अर काल करैगें, अर आराधनालयाँ म्ह सौपैगें, अर जेळ म्ह गिरवावैगें, राज्यपालों अर राजयाँ के स्याम्ही ले जावैगें। 13 पर यो थारे खात्तर गवाही देण का मौक्का हो जावैगा। 14 इस करके अपणे-अपणे मन म्ह ठान ल्यो के हम पैहल्या तै जवाब देण की फिक्र कोनी करगें। 15 क्यूँके मै थारे ताहीं इसा बोल अर समझ दियुंगा के थारे सारे विरोधी सामना या खण्डन कोनी कर सकैगें। 16 थारे माँ-बाप, अर भाई अर कुण्वा, अर साथी भी थमनै पकड़वावैगें, उरै ताहीं के थारे म्ह तै कईयाँ नै मरवा देवैगें। 17 मेरै नाम के कारण सारे माणस थारे तै बैर राखैगें। 18 पर थारे सिर का एक बाळ भी बाँका कोनी होवैगा। 19 अपणे धीरज तै थम अपणी जान नै बचाए राख्खोगे।

XXXXXXXXXX

20 "जिब धम यरुशलेम की पलटन तै धिरया होया देखो, तो जाण लियो के उसका उजड़ जाणा लोवै सै। 21 फेर जो यहूदिया परदेस म्ह हों पहाड़ां पै भाज जावै, अर जो यरुशलेम नगर कै भीत्तर हों वे बाहरणै लिक्ड़ जावै, अर जो गाम्मां म्ह हों वे उस म्ह न्ही जावै। 22 क्यूँके ये बदला लेण के इसे दिन होंगे, जिन म्ह लिक्खी होई सारी बात पूरी हो जावैगी। 23 उन दिनां म्ह जो गर्भवती अर दूध पिलान्दी विखान्नी होवैगीं, उनके खात्तर भागणा भी मुश्किल होगा! क्यूँके देश म्ह बड़ड़ा क्ळेश अर इन माणसां पै बड़ड़ा प्रकोप होवैगा। 24 वे तलवार की कौर हो जावेंगे, अर सारे देश कै माणसां म्ह कैदी होके पोहुचाये जावेंगे, अर जिब ताहीं गैर यहूदी का बखत पूरा कोनी होवै, जद ताहीं यरुशलेम गेरजात्तां तै रोंद्या जावैगा।

XXXX XX XXXXX XX XXXXXXX

25 "सूरज, चाँद, अर तारां म्ह निशान्नी दिखैगी, अर धरती पै देश-देश के आदमियाँ पै संकट होगा, क्यूँके वे समुन्दर कै गरजण अर लहरां के रोळें तै घबरां जावेंगे। 26 भय के कारण अर दुनिया पै आण आळी घटनायां की बाट देखदे-देखदे माणसां कै जी म्ह जी कोनी रहवैगा, क्यूँके अकास की शक्तियाँ हलाई जावैगी। 27 फेर वे माणस के बेट्टे नै सामर्थ अर बड़ड़ी महिमा कै गेल्या बादळां पै आन्दे देखेंगे। 28 जिब ये बात होण लागै, तो सीध्हे होके अपने सिर उप्पर ठाईयो, क्यूँके धारा छुटकारा लोवै होगा।"

XXXXXX XX XXX XX XXXXXX

29 यीशु ने उनते एक उदाहरण देके कह्या, "अंजीर के दरखत अर सारे दरखतां नै देखो। 30 ज्योए उन म्ह कोपले लिक्ड़ै सै, तो धम खुद जाण ल्यो सो, के गर्मी का बखत लोवै सै। 31 इस तरियां तै जिब धम ये बात होन्दे देखो, तो जाण ल्यो के परमेसवर का राज्य लोवै सै।"

32 मै धमनै साच्ची कहूँ सू के जिब ताहीं ये सारी बात न्ही हो ले, जद तक इस पीढ़ी का कदे भी अन्त कोनी होवैगा। 33 धरती अर अकास टळ जावेंगे, पर मेरी बात कदे न्ही टळैगी।

XXXXXX XX

34 "इस करके चौकन्ने रहियो, इसा ना हो के धारा मन खुमार, अर मतवालेपण, अर इस जिन्दगी की फिकर तै सुस्त हो जावै, अर वो दिन धारे पै फन्दे की ढाळ चाणचक आण पड़ै। 35 क्यूँके वो सारी धरती के सारे वासिन्दा पै इस तरियां आण पड़ैगा। 36 इस करके जागदे रहो अर हर बखत प्रार्थना करदे रहो के धम इन सारी आण आळी घटनायां तै बचण अर माणस के बेट्टे के स्याम्ही खड़े होण के जोगगे बण सको।"

37 वो दिन म्ह मन्दर म्ह उपदेश देवै था, अर रात नै बाहरणै जाके जैतून नामक पहाड़ पै रह्या करै था, 38 अर सवैरे नै तड़के सारे माणस उसकी सुणण की खात्तर मन्दर म्ह उसके धौरै आया करै थे।

## 22

XXXX XX XXXXX XXXXX

1 अखमीरी रोट्टी का त्योहार जो फसह कुह्वावै सै, धौरै था, 2 अर प्रधान याजक अर शास्त्री इस बात की टोह् म्ह थे। के यीशु नै किस तरियां मारै, पर वे माणसां तै डरे थे।

XXXXXXXXXX

3 फेर शेतान यहूदा म्ह बडग्या, जो इस्करियोती कुह्वावै अर वारहां चेल्यां म्ह गिण्या जावै था। 4 उसनै जाके प्रधान याजकां अर पहरेदार के सरदारां के गेल्या बातचीत करी के किस तरियां यीशु नै उनके हाथ पकड़वांवां। 5 वे राज्जी होए, अर उस ताहीं रुपिये देण का वादा किया। 6 वो मान गया अर मौक्का टोह् लाग्या के जिब भीड़ न्ही हो तो उसनै उनके हाथ पकड़वा दे।

XXXXXXXXXX XX XXXXXXX XXX XX XXXXX XX

7 फेर अखमीरी रोट्टी के त्योहार का दिन आया, जिसम्ह फसह का मेम्ना बलि करणा जरूरी था।

8 यीशु नै पतरस अर यूहन्ना ताहीं यो कहके भेज्या, "जाके म्हारे खाण खात्तर फसह त्यार करो।"



9 उननै यीशु तै बुझया, “तू कित्त चाहवै सै के हम उसनै त्यार करा?”

10 यीशु नै चेल्यां ताहीं कह्या, देखो, नगर म्ह बड़तेए एक आदमी पाणी का पैदा ठाए होए थमनै मिलेगा, जिस घर म्ह वो जावै थम उसके पाच्छे चले जाइयो, 11 अर उसके घर के मालिक तै कहियो, “गुरु तेरे तै बुझौ सै के वा बैठक कित्त सै जिस म्ह मै अपणे चेल्यां के गेल्या फसह खाऊँ?”

12 वो थमनै एक सजी-सजाई बड़ी अटारी दिखा देवैगा, ओड़ैए त्यारी करियो। 13 उननै जाकै, जिसा उसनै उनतै कह्या था, उससे तरियां पाया अर फसह का भोज त्यार करया।

????-???

14 जद वा घड़ी आगी, के यीशु परेरितां गेल्या खाणा खाण बेटचा। 15 अर उसनै उन ताहीं कह्या “मन्नै बड़ी लालसा थी के मरण तै पैहल्या यो फसह भोज थारे गेल्या खाऊँ। 16 क्यूँके मै थमनै सच कहूँ सूँ के मै इसनै जिब तक न्ही खाऊँगा जब तक यो परमेसवर के राज्य म्ह पूरा न्ही हो।”

17 फेर उसनै अंगूरां के रस का कटोरा लेकै परमेसवर का धन्यवाद करया अर कह्या, “इसनै ल्यो अर आप्स म्ह बाँट ल्यो। 18 क्यूँके मै थमनै कहूँ सूँ के जिब ताहीं परमेसवर का राज्य न्ही आवै तब तक मै अंगूर का रस इब तै कदे न्ही पिऊँगा।”

19 फेर यीशु नै रोटी ली अर परमेसवर का धन्यवाद करकै तोड़ी, अर चेल्यां ताहीं या कहकै दी, “या मेरी देह सै जो थारे खात्तर दी जा सै: मेरी याद म्ह न्यूप करया करो।”

20 इसे तरियां तै उसनै खाणे के पाच्छे कटोरा भी यो कहन्दे होए दिया, “यो कटोरा मेरै उस लहू म्ह जो थारे खात्तर बहाया जा सै नया करार सै। 21 पर देखो, जो मन्नै पकड़वावैगा वो म्हारे गेल्या इस भोज म्ह शामिल सै। 22 क्यूँके मै माणस का बेटा तो जिसा मेरे खात्तर तय करया गया सै, ठीक उससे तरियां होण लागरया सै, पर धिक्कार सै उस माणस पै जिसकै जरिये मै पकड़वाया जाऊँ सूँ!”

23 फेर वे आप्स म्ह पूच्छताछ्छ करण लागये के म्हारै म्ह तै कौण सै, जो यो काम करैगा।

???? ???? ?? ????-????

24 उन म्ह या बहस भी होगी के म्हारे मै तै कौण बड़ड़ा समझा जावै सै।

25 यीशु नै उन ताहीं कह्या, “और गैर यहूदियाँ के राजा उनपे राज करै सै, अर जो उनपे हक जमावै सै वे भले कुह्वावै सै। 26 पर थम इसे ना होइयो, बल्के जो थारे म्ह बड़ड़ा सै वो छोट्टे के बरोब्बर अर जो प्रधान सै, वो सेवक के बरोब्बर बणे। 27 क्यूँके बड़ड़ा कौण सै, वो जो खाणे पै बेटचा सै, या वो जो सेवा करै सै? के वो न्ही जो जिम्मण बेटचा सै? पर मै थारे बिचाठे सेवक बरोब्बर सूँ। 28 थम वो सों, जो मेरी मुसीबतां म्ह लगातार मेरै गेल्या रहे, 29 अर जिस तरियां मेरै पिता नै मेरै खात्तर एक राज्य ठहराया सै, उससे तरियां मै भी थारे खात्तर ठहराऊँ सूँ, 30 ताके थम मेरै राज्य म्ह मेरी मेज पै खाओ-पीओ बल्के सिंहासनां पै बैठकै इस्राएल के बारहां गोत्रां का न्याय करो।”

???? ?? ????? ????-????

31 “शमोन, हे शमोन! देख शैतान नै परमेसवर तै हुकम ले लिया सै, के थारे ताहीं परखै जिस तरियां किसान गेहूँ नै भूसी तै न्यारा करै सै। 32 पर मन्नै तेरे खात्तर बिनती करी ताके थम मेरे पै विश्वास करणा ना छोड़ दे, अर जिब थम पाप करणा छोड़ दे, तो अपणे भाईयाँ नै भी इसाए करण खात्तर कहियो।”

33 उसनै उसतै कह्या, “हे परभु मै, तेरे गेल्या जेळ जाण, बल्के मरण नै भी त्यार सूँ।”

34 उसनै कह्या, “हे पतरस, मै तन्नै सच कहूँ सूँ, के आज मुर्गा बाँग न्ही देवैगा जब ताहीं तू तीन बार मेरै बारै म्ह मुकरैगा जावैगा, के मै तन्नै न्ही जाण्दा।”

????, ????? ????-????

35 फेर यीशु नै चेल्यां ताहीं कह्या, “जिब मन्नै थारे ताहीं वचन सुणाण खात्तर बटुए, अर झोळी, अर जूत्याँ के बिना भेज्या था, तो के थमनै किसे चीज की कमी होई थी?” उननै कह्या, “किसे चीज की न्ही।”

36 उसने चेल्यां तै कहा, “पर इब जिसके धोरे बटुआ ना हो वो उसने ले अर उससे तरियां जिसके धोरे तलवार न्ही हो तो वो अपने लत्ते बेचके एक मोल लेवै। 37 क्यूँके मै थमने कहूँ सूँ, यो जो पवित्र ग्रन्थ म्ह लिख्या सै, ‘वो गुन्हेगार गेल्या गिण्या गया,’ उसका मेरे म्ह पूरा होणा जरूरी सै, क्यूँके मेरे बारे म्ह लिखी सारी बातों का होणा जरूरी सै।”

38 चेल्यां नै कहा, “हे प्रभु याडै दो तलवार सै।” यीशु नै उन ताहीं कहा, “भतेरी सै।”

~~~~~

39 फेर यीशु बारणे लिकड़के अपनी रीत के मुताबिक जैतून के पहाड़ पै गया, अर चेल्ले उसके पाच्छे हो लिये। 40 उस जगहां पोहुच के उसने चेल्यां तै कहा, “प्रार्थना करो के थम परखे ना जाओ।” 41 अर आप उनतै न्यारा एक डळा फेकण के बराबर जितनी दूर गया, अर गोड्डे टेक के प्रार्थना करण लाग्या, 42 “हे पिता जै तू चाहवै तो इस दुख के कटोरे नै मेरे धोरे तै हटा ले, तोभी मेरी न्ही पर तेरी मर्जी पूरी हो।” 43 फेर सुर्ग तै एक सुर्गदूत उसने दिख्या जो उसने सामर्थ दिया करे था। 44 वो और घणे संकट म्ह काल होके और भी मन तै प्रार्थना करण लाग्या, अर उसका पसीन्ना मान्नों लहू की बड्डी-बड्डी बूँदां के जू धरती पै गिरे था।

45 फेर वो प्रार्थना तै उठ्या अर अपने चेल्यां के धोरे आके उन ताहीं उदासी के माँरे सोन्दे पाया।

46 अर उनतै कहा, “क्यूँ सोवों सों? उठो, प्रार्थना करो के थम परखे ना जाओ।”

~~~~~

47 यीशु न्यू कहण ए लागरया था, के एक भीड़ आई, अर उन बारहां चेल्यां म्ह तै एक जिसका नाम यहूदा था उसके आगै-आगै आण लाग रहा था। वो यीशु के धोरे आया के उसने चूम ले।

48 यीशु नै उसतै कहा, “हे यहूदा, के तू चुम्मा लेके माणस के बेट्टा नै पकड़वावै सै?”

49 उसके साथियाँ नै जद देख्या के, के होण आळा सै, तो कहा “हे प्रभु, के हम तलवार चलावां?”

50 अर उन म्ह तै एक नै महायाजक के नौकर पै तलवार चलाके उसका सोळा कान उड़ा दिया।

51 इसपै यीशु नै कहा, “इब बस करो।” अर उसका कान छू के उस ताहीं ठीक करया।

52 फेर यीशु नै प्रधान याजकां अर मन्दर के पैहरेदारां के सरदारां अर यहूदी अगुवां तै, जो उसपै चढ़ गये थे, कहा, “के थम मन्ने डाकू जाणके तलवार अर लाट्टी लेके लिकड़ें सो? 53 जद मै मन्दर म्ह हरेक दिन थारे गेल्या था, तो थमने मेरे हाथ भी कोनी लाया, पर यो थारा बखत सै, अर अन्धकार का हक सै।”

~~~~~

54 फेर वे यीशु नै पकड़के ले चाल्ले, अर महायाजक के घर म्ह लाये, पतरस दूरे ए दूर उसके पाच्छे-पाच्छे चाल्ले था। 55 अर जद वे आँगण म्ह आग सुलगाके कट्टे बेट्टे, तो पतरस भी उसके बिचाळे बैठग्या। 56 फेर एक नौकराणी उस ताहीं आग के चाँदणे म्ह बेट्टा देखके अर उस कान्ही देखके कहण लागगी, “यो भी तो उसके गेल्या था।”

57 पर पतरस नै यो कहके मना कर दिया, के “हे, जनानी मै उसने कोनी जाणदा।”

58 थोड़ी हाण पाच्छे किसे और नै पतरस ताहीं देखके कहा, “तू भी तो उन म्ह तै ए सै।” उसने कहा, “हे भाई, मै वो कोनी।”

59 कोए एक घंटे के पाच्छे एक और माणस पक्के विश्वास तै कहण लाग्या, “सही म्ह यो भी तो उसके गेल्या था, क्यूँके यो गलीलवासी सै।”

60 पतरस नै कहा, “हे भाई, मै न्ही जाणदा के तू के कहवै सै।” वो या कहवैए था के मुर्गे नै बाँग देई 61 फेर घूमके प्रभु नै पतरस की ओड़ देख्या अर पतरस नै प्रभु की बात याद आई जो उसने कही थी: “आज मुर्गे के बाँग देण तै पैहल्या, तू तीन बर इन्कार करेगा।” 62 अर वो बारणै लिकड़के नै फूट-फूटके रोण लाग्या।

~~~~~

63 जो माणस यीशु नै पकड़े होए थे, वे उसका मजाक बनाकै पीटण लागगे, 64 अर उसकी आँख ढँक कै उसतै बुझया, “भविष्यवाणी करकै बता के तेरे किसनै मारया!” 65 अर उननै घणीए बुराई की बात उसके विरोध म्ह कही।

\*\*\*\*\*

66 जिव दिन लिकइया तो यहूदी अगुवे, प्रधान याजक अर शास्त्री कट्टे होए, अर उस ताहीं अपणी बड़डी सभा म्ह ल्याकै बुझया, 67 “जै तू मसीह सै, तो म्हारे ताहीं कह दे!” उसनै उनतै कह्या, “जै मै थारे तै कहूँ, तो बिश्वास कोनी करोगे, 68 अर जै बुझ्हु, तो जवाब न्ही दोगे। 69 पर इव तै मै माणस का बेट्टा सर्वशक्तिमान परमेसवर कै सोळी ओड़ बेठचा रहूंगा।”

70 इसपै सब नै कह्या, “तो के तू परमेसवर का बेट्टा सै?” यीशु नै उन ताहीं कह्या, “थम अपणे-आपे कहो सों, क्यूँके मै सूं।”

71 फेर उननै कह्या, “इव हमनै गवाह की के जरूरत सै, क्यूँके हमनै आपे उसके मुँह तै सुण लिया सै।”

## 23

\*\*\*\*\*

1 फेर सारी मंडळी उठकै यीशु नै राज्यपाल पिलातुस कै धोरै लेगयी। 2 वो ये कहकै उसपै इल्जाम ल्माण लागगे, “हमनै इस ताहीं माणसां नै भकांदे, अर कैसर नै चुंगी देण तै मना करदे, अर खुद नै मसीह, राजा कहन्दे होए सुण्या सै।”

3 पिलातुस नै उसतै बुझ्झया, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै।”

4 फेर पिलातुस नै प्रधान याजकां तै अर माणसां तै कह्या, “मन्नै इस आदमी म्ह कोए खोट न्ही पाया।”

5 पर वे और भी बिश्वास के गेल्या कहण लागगे, “यो गलील परदेस तै लैके याडै ताहीं, सारे यहूदिया परदेस के माणसां नै उपदेश देकै दंगा करवावै सै।”

6 या सुणकै पिलातुस नै बुझ्झया, “के यो आदमी गलीलवासी सै?” 7 अर या जाणकै के वो हेरोदेस की रियासत का सै, उस ताहीं हेरोदेस के धोरै भेज दिया, क्यूँके उस बखत वो भी यरुशलेम म्ह था।

\*\*\*\*\*

8 हेरोदेस यीशु नै देखकै घणा राज्जी होया, क्यूँके वो घणे दिनां तै उसनै देखणा चाहवै था, इस खात्तर के उसके बारे म्ह सुण्या था, अर उसतै किमे चमत्कार देखण की आस राक्खै था। 9 वो उसतै भोत-सी बात बुझता रह्या, पर उसनै उस ताहीं कोए भी जवाब न्ही दिया। 10 प्रधान याजक अर शास्त्री खड़े होए तन मन तै उसपै इल्जाम लगान्दे रहे। 11 फेर हेरोदेस नै अपणे सिपाहियाँ के गेल्या उसकी बेजती करकै मजाक उड़ाया, अर भड़कीले लत्ते पिराह के उस ताहीं पिलातुस के धोरै भेज दिया। 12 उस्से दिन पिलातुस अर हेरोदेस साथी बणगे, इसतै पैहल्या वे एक-दुसरे के दुश्मन थे।

\*\*\*\*\*

13 पिलातुस नै प्रधान याजकां, सरदारां अर माणसां नै बुलाकै उन ताहीं कह्या, 14 “थम इस आदमी नै माणसां का भकाण आळा बताकै मेरै धोरै ल्याए सों, अर देखो, मन्नै थारे स्याम्ही उसकी जाँच करी, पर जिन बाततां का थम उसपै इल्जाम लगाओ सों उन बाततां के बारे म्ह मन्नै इस म्ह कोए भी खोट कोनी पाया, 15 ना हेरोदेस नै दोषी पाया, क्यूँके उसने इस ताहीं म्हारे धोरै भेज दिया सै: अर देखो, उसतै इसा कुछ कोनी होया के वो मौत की सजा के काबिल ठहराया जावे। 16 इस खात्तर मै इसनै छिट्वा के छोड़ दू सूं।” 17 (पिलातुस त्यौहार के बखत उनके खात्तर एक कैदी नै छोड़ण पै मजबूर था।)

- 18 फेर सारे मिलके चिल्ला उठे, “इसका काम तमाम करदे, अर म्हारै खात्तर बरअब्बा नै छोड़दे!”  
 19 वो किसे बलवे के कारण जो नगर म्ह होया था, अर हत्या के कारण जेळ म्ह गेरया गया था  
 20 पर पिलातुस नै यीशु ताहीं छोड़ण की इच्छा तै माणसां ताहीं फेर समझाया, 21 आखर उननै रुक्के मारकै कहा, “उसनै करूस पै चढ़ा, करूस पै!”  
 22 उसनै तीसरी बर उन ताहीं कहा, “क्यातै उसनै के बुरा करया सै? मन्नै उस म्ह मौत की सजा के काबिल कोए बात कोनी पाई। इस तरियां मै इसनै छित्वा कै छोड़ देऊ सूं।”  
 23 पर वे रुक्के मार-मारकै पाच्छै पड़ गये के वो करूस पै चढ़ाया जावै, अर उनका रुक्के मारणा तेज होगया। 24 आखर पिलातुस नै हुकम दिया के उनकी बिनती के मुताबिक करया जावै। 25 उसनै उस आदमी के जो बलवे अर हत्या के कारण जेळ म्ह गेरया गया था, अर जिसनै वो माँगै थे, छोड़ दिया, अर यीशु नै उनकी इच्छा के मुताबिक सौप दिया।

### ~~~~~

- 26 जिव वो यीशु नै लेके जावै थे, तो उननै एक माणस जिसका नाम शमौन कुरेनी था, जो गाम म्ह तै आवै था, पकड़के उसपै करूस लाद दिया के उससे यीशु के पाच्छै-पाच्छै ले चाल्ले। 27 माणसां की भीड़ उसकै पाच्छै-पाच्छै हो ली उन म्ह घणीए बिरबान्नी भी थी जो उसके खात्तर छात्ती पीट्टै अर रोवै धोवै थी। 28 यीशु नै उनकै कान्ही मुड़के कहा, “हे यरुशलेम की बेटियों, मेरै खात्तर ना रोओ, पर अपणे अर अपणे बाळकां के खात्तर रोओ 29 क्यूँके देखो, वे दिन आवै सै, जिन म्ह माणस कहवैगें, ‘धन्य सै वे जो बिरबान्नी जो बाँझ सै अर वे गर्भ जिननै उलाद न्ही पैदा करी, अर वे स्तन जिन नै दूध न्ही पियाया।’ 30 उस बखत ‘माणस पहाड़ां अर टीलां तै कहण लागये के म्हारै पै आण पड़ो, अर हमनै ढँक ल्यो।’”  
 31 क्यूँके वे जिव हरे रुखां गेल्या इसा करै सै, तो सूख्या कै गेल्या के किमे न्ही करया ज्यागा?  
 32 वे और दो माणसां नै भी जो बुरे काम करण आळे थे यीशु कै गेल्या मारण नै ले चाल्ले। 33 जद वे उस जगहां पै पोहचे जो “खोपड़ी” यानी इब्रानी भाषा म्ह “गुलगुता” कुह्वावै सै, तो उननै ओड़ै यीशु ताहीं अर बुरे काम करण आळे ताहीं भी, एक नै सोळी अर दुसरे नै ओळी ओड़ करूस पै चढ़ाए।  
 34 फेर यीशु नै कहा, “हे पिता इन्हनै माफ कर, क्यूँके ये न्ही जानदे के ये के करै सै।” अर उननै पर्चीं गेर कै उसके लत्ते बांड लिए।  
 35 माणस खड़े-खड़े देखै थे, अर सरदार भी मजाक करके कहवै थे “इसनै औरां ताहीं बचाया, जै यो परमेसवर का मसीह सै, अर उसका छाटचा होए सै, तो अपणे-आपनै बचाले।”  
 36 सिपाही भी धौरै आकै अर सिरका देकै उसका मजाक बना के कहवै थे, 37 “जै तू यहूदियाँ का राजा सै, तो अपणे-आपनै बचाले!”  
 38 अर उसकै उप्पर एक दोषपत्र भी लगा दिया: “यो यहूदियाँ का राजा सै।”

### ~~~~~

- 39 जो बुरे काम करणीये ओड़ै लटकाए गए थे, उन म्ह तै एक नै उसकी बेजती करके कहा, “के तू मसीह कोनी? फेर अपणे-आपनै अर हमनै बचा!”  
 40 इसपै दुसरे नै उस ताहीं धमका के कहा, “के तू परमेसवर तै भी कोनी डरदा? तू भी तो वाए सजा पा रया सै, 41 हम तो न्याय के मुताबिक सजा पारे सां, क्यूँके हम अपणे काम्मां की ठीक सजा पारे सां, पर उसनै कोए गलत काम न्ही करया।”  
 42 फेर उसनै कहा, “हे यीशु, जद तू अपणे राज्य म्ह आवै, तो मेरी खियास करिये।”  
 43 उसनै उस ताहीं कहा, “मै तन्नै सच कहूँ सूं के आजै तू मेरै गेल्या सुर्गलोक म्ह होगा।”  
 44 करीबन दोषफारै तै तीन बजे ताहीं सारे देश म्ह अन्धेरा होया रह्या, 45 अर सूरज का चाँदणा जान्दा रह्या, अर मन्दर का पड़दा बिचाळे तै पाटगया, 46 अर यीशु नै जोर तै किल्की मारके कहा, “हे पिता, मै अपणी आत्मा तेरे हाथ्यां म्ह सौंपू सूं।” अर या कह के जी दे दिया।

47 सूबेदार नै जो कुछ होया था देखकै परमेसवर की बड़ाई करी, अर कहा, “पक्का यो माणस धर्मी था।” 48 अर भीड़ जो यो देखखण नै कट्टी होई थी, इस घटना नै देखकै दुख के मारे छात्ती पीटती होई बोहड़गी। 49 पर उसके सब जाण-पिच्छाण, अर जो बिरबान्नी गलील परदेस तै उसके गेल्या आई थी, दूर खड़ी यो सब देखकै थी।

~~~~~

50 ओड़े यूसुफ नाम का यहूदी अगुवां की सभा का एक सदस्य था जो आच्छा अर धर्मी आदमी था 51 वो सभा के फैसले अर इस काम तै राज्जी कोनी था। वो यहूदिया परदेस के नगर अरिमतिया गाम का रहण आळा अर परमेसवर के राज्य की बाट देखण आळा था। 52 उसने पिलातुस के धोरै जाकै यीशु की लाश माँगगी, 53 अर उस ताहीं उतार के मलमल की चादर म्ह लपेटया, अर एक कवर म्ह धरया, जो पत्थरां म्ह खुदी होए थी, अर उस म्ह कोए कदे न्ही राख्या गया था। 54 वो त्यारी का दिन था, अर आराम का दिन शुरु होण आळा था।

55 उन बिरबानियां नै जो उसके गेल्या गलील परदेस तै आई थी, पाच्छै-पाच्छै जाकै उस कवर ताहीं देख्या, अर यो भी के उसकी लाश किस रीति तै राक्खी गयी सै। 56 फेर उननै घर बोहड़ के खुशबुदार चीज अर इत्र त्यार करया, अर आराम के दिन उननै हुकम के मुताबिक आराम करया।

## 24

~~~~~

1 पर हप्तै के पेहलडे दिन तड़के-तड़के नै वे उन खुशबुदार चिज्जां नै जो उननै बणाई थी, लेकै यीशु की कवर पै आई। 2 उननै पत्थर कवर पै तै गिरइया होया पाया, 3 पर भीत्तर जाकै प्रभु यीशु की लाश कोनी पाई। 4 जब वे इस बात तै हैरान होरी थी तो देखको दो माणस चमकदे होए लत्ते पहरी होए उनकै धोरै आण खड़े होए। 5 जिब वे डरगी अर धरती की ओड़ मुँह झुकाए रही तो उननै उन ताहीं कहा, “थम जान्दे नै मरे होया म्ह क्यूँ टोहो सो? 6 वो उरै कोनी, पर जिन्दा होग्या सै। याद करो कै उसनै गलील परदेस म्ह रहंदे होए थारे तै कै कहा था, 7 जरूरी सै कै मै माणस का बेट्टा पापियाँ के हाथ्यां म्ह पकड़वाया जाऊँ, अर क्रूस पै चढ़ाया जाऊँ, अर तीसरे दिन जी उट्टु।” 8 फेर उसकी बात उनकै याद आई,

9 अर कवर तै उल्टे आकै उननै उन गुराहां नै अर, सारया ताहीं ये सब बात कह दी। 10 जिन नै प्रेरितां तै ये बात कही वे \*मरियम मगदलीनी अर योअन्ना अर याकूब की माँ मरियम अर उसके साथ की और भी बिरबान्नी थी। 11 पर उनकी बात उन ताहीं कहाँनी-सी लागगी, अर उननै उसका विश्वास कोनी करया। 12 फेर पतरस कवर पै भाज्या गया, अर झुककै लत्यां की पट्टियाँ का ढेर पड़े देखके, अर जो होया था उसतै अचम्भा होया करदा होया अपण घरां चल्या गया।

~~~~~

13 उससे दिन उन म्ह तै दो चेल्लें इम्माऊस नाम के गाम म्ह जाण लागरे थे, जो यरुशलेम तै कोए सात कौंस की दूरी पै था। 14 वे इन सब बातों पै जो होई थी, आप्स म्ह बातचीत करदे जाण लागरे थे, 15 अर जद वे आप्स म्ह बातचीत अर पूछताछ करे थे तो यीशु खुद धोरै आकै उनकै गेल्या चाल्लण लागया। 16 पर परमेसवर नै उनकी आँख न्यू बन्द कर दी थी कै यीशु ताहीं पिच्छाण ना सकै।

17 यीशु नै उनतै बुझया, “ये कै बात सै, जो थम चाल्दे-चाल्दे आप्स म्ह करो सों?” वे खड़े होगे अर उनका मुँह भोत उदास था। 18 या सुणकै चेल्यां म्ह तै क्लियुपास नाम के एक चेल्लें नै कहा, “इसा लागै सै के तू यरुशलेम म्ह एकला परदेशी सै, जो न्ही जाण्दा के इन दिनां म्ह इस नगर म्ह के-के होया सै?”

\* 24:10 24:10 मगदला गाम की


19 यीशु ने उनसे बुझाया, “कौण सी बात? उनसे उस ताहीं कह्या, यीशु नासरीं जो नबी था उसकी बात, जो परमेसवर अर सारे माणसां के स्याम्ही काम अर वचन म्ह सामर्थी था। 20 अर पूरधान याजकां अर म्हारै सरदारां नै उस ताहीं पकड़वा दिया ताके उसतै मौत का हुकम दिया जावै, अर उस ताहीं क्रूस पै चढ़वाया। 21 पर हमनै उम्मीद थी के योए इस्राएल नै रोमी साम्राज्य तै छुटकारा देवैगा। इन सारी बाततां के सिवा इस घटना नै होए आज तीसरा दिन सै, 22 अर म्हारै म्ह तै कई बिरबानियाँ नै भी म्हारै ताहीं उलझन म्ह गेर दिया, जो आज सबेरै कब्र पै गयी थी, 23 अर जब उसकी लाश कोनी पाई तो वा या कहन्दी आई के हमनै सुर्गदूतां के दर्शन पाये, जिन नै कह्या के यीशु जिन्दा सै। 24 फेर म्हारै साथियाँ म्ह तै कई कब्र पै गये, अर जिसा बिरबानियाँ नै कह्या था उसाए पाया, पर वो कोनी देख्या।”

25 फेर यीशु नै उन दो चेल्यां तै कह्या, “हे सब बेकुफों अर नबियाँ की सारी बाततां पै विश्वास करण म्ह नासमझों! 26 के जरूरी कोनी था के मसीह ये दुख उठाके अपनी महिमा म्ह दाखल हो?” 27 फेर उसनै मूसा नबी तै अर सारे नबियाँ तै शरू करके सारे पवित्र ग्रन्थां म्ह तै अपने बारे म्ह लिखी बाततां का मतलब, उन ताहीं समझा दिया।

28 इतनै म्ह वो उस गाम के धोरे पोहचे जित वे जावै थे, अर उसके ढंग तै इसा लाग्या के वो आगै जाणा चाहवै सै। 29 पर उनसे यो कहके उस ताहीं रोख्या, “म्हारै गेल्या रह, क्यूँके साँझ होली सै अर दिन इब घणा ढळग्या सै।” फेर वो उनके गेल्या रहण के खात्तर भीत्तर गया।

30 जद वो उनके गेल्या खाणा खाण बेटचा, तो उसनै रोटी लेके धन्यवाद कर्या अर उस ताहीं तोड़के उनसे देण लाग्या। 31 फेर उनकी आँख खुलगी, अर उनसे उस ताहीं पिच्छाण लिया, अर वो उनकी आँखां तै ओन्झळ होग्या। 32 उनसे आपस म्ह कह्या, “जद वो म्हारै तै रास्ते म्ह बात करै था अर पवित्र ग्रन्थ का मतलब हमनै समझावै था, तो के म्हारै मन म्ह जोश न्ही आया?”

33 वो उससे बखत जिब्वे उठके यरुशलेम नगर म्ह चले गये, अर उन ग्यारहां चेल्यां अर उनके साथियाँ ताहीं उनसे कटटे मिलगे। 34 वो कहवै थे, “पूरभु साच्चेए जी उठचा, अर शमौन नै दिख्या।” 35 फेर उन दो चेल्यां नै भी राह म्ह होई घटना के बारे ब्यौरा सुण्या अर किस तरियां खाणा खान्दे बखत उनसे मसीह यीशु ताहीं पिच्छाणा लिया था।



36 वे ये बात करे ए थे के वो खुद ए उनके बिचाळै आण खडचा होया, अर उन ताहीं कह्या, “थमनै शान्ति मिलै।”

37 पर वे घबरागे अर डरगे, अर समझे के हम किसे भूत नै देख्वां सां। 38 यीशु नै उनसे कह्या के, “क्यूँ घबराओ सों? अर थारे मन म्ह क्यूँ वैहम हो सै? 39 मेरै हाथ-पायां नै देख्को के मै वोए सूं। मन्ने छू के देख्को, क्यूँके आत्मा के हाड-माँस कोनी होन्दे जिसा मेरै म्ह देख्को सों।”

40 न्यू कहके उसने उन ताहीं अपने हाथ पैर के घा दिखाए। 41 जद खुशी के मारे उनसे विश्वास कोनी होया, अर वो अचम्भा मान्ने थे, तो यीशु नै उन ताहीं बुझाया, “के याड़े थारे धारे किमे खाण नै सै?” 42 चेल्यां नै उस ताहीं भुनी होई मच्छी का टुकड़ा दिया। 43 उसने वो मच्छी का टुकड़ा लेके उनके आगै खाया।

44 फेर उसने उन ताहीं कह्या, “ये मेरी वे बात सै, जो मन्ने थारे गेल्या रहदे होए थारे तै कही थी के जरूरी सै जितनी बात मूसा नबी की नियम-कायदा अर नबियाँ अर भजनां की किताबां म्ह मेरे बारे म्ह लिखी सै, सारी पूरी हों।”

45 फेर उसने पवित्र ग्रन्थ बुझण के खात्तर उनकी बुद्धि खोल दी, 46 अर उनसे कह्या, “यो पवित्र ग्रन्थ म्ह लिख्या सै के मसीह दुख ठावेगा, अर तीसरे दिन मरे होया म्ह तै जी उठेगा, 47 अर यरुशलेम तै लेके सारी जात्तां म्ह पापां नै छोड़ण का अर पापां की माफी का प्रचार, उसके-ए नाम तै करया जावैगा। 48 थम इन सारी बाततां के गवाह सों। 49 अर देख्को, मै थारे पै पवित्र

आत्मा भेज्जुँगा जिंसा मेरे पिता नै कहुया सै, जिब तैई पवित्र आत्मा थारे पै न्ही आवै, अर थम सुर्ग तै सामर्थ ना पाओ, जब ताहीं इसे नगर म्ह रुके रहो।”

*~~~~~*

<sup>50</sup> फेर यीशु उननै बैतनिय्याह गाम ताहीं बाहर लेगया, अर अपने हाथ ठाकै उन ताहीं आशीर्वाद दिया, <sup>51</sup> अर उननै आशीष देदे होए वो उनतै न्यारा होगया अर सुर्ग पै उठा लिया। <sup>52</sup> फेर वो उसनै नमस्कार करकै बड़ी खुशी तै यरुशलेम चले गए, <sup>53</sup> अर वे लगातार मन्दर म्ह हाज्जर होकै परमेश्वर की भगति करया करै थे।

## यूहन्ना के जरिये लिख्या गया सुसमाचार

### ???????

यूहन्ना के जरिये लिखे गये सुसमाचार म्ह यीशु ताहीं परमेसवर अनन्त वचन के तौर पे पेश करया गया सै, जिसनै देह धारण करके म्हारे बीच म्ह डेरा करया। इस किताब म्ह यो साफ कह्या सै, कै यो सुसमाचार ज्यातै लिखा गया के इसके पढ़णियें विश्वास करै, के यीशु ए वादा करया होया, मुक्ति देणिया अर परमेसवर का बेट्टा सै, अर वे सारे यीशु मसीह म्ह विश्वास के जरिये जिन्दगी पा सकै (20:31) सै। भूमिका म्ह यीशु ताहीं परमेसवर के अनन्त वचन के रूप म्ह दिखाया गया सै, उसके बाद सुसमाचार के पैहले भाग म्ह सात चमत्कारां या अदभुत काम्मां का जिक्र सै, उनतै यो जाहिर होवै सै, के यीशु वादा करया होया उद्धारकर्ता अर परमेसवर का बेट्टा सै। दुसरा भाग उपदेश सै। उन म्ह यो समझाया गया सै, के इन चमत्कारां का मतलब के सै। इस भाग म्ह यो बताया गया सै, के किस तरियां कुछ माणसां नै यीशु पै विश्वास करया अर उसके चेल्लें बणगे, जिव के दुसरे माणसां नै उसका विरोध करया अर विश्वास करण तै नाटगे थे। 13-17 पाठ म्ह यीशु ताहीं पकड़वाये जाण आळी रात नै, यीशु की उसके चेल्यां के गैल गहरी संगति, अर सूळी पै चढ़ाये जाण तै पैहले साँझ नै चेल्यां ताहीं तैयार करणा अर उननै होसला देण आळे यीशु के वचनां का विस्तारपूर्वक वर्णन सै। आखरी के पाठां म्ह यीशु का पकड़वाया जाणा अर मुकदमे, उसका क्रूस पै चढ़ाया जाणा, जिन्दा हो जाणा, अर जिन्दा होण के बाद चेल्यां पै जाहिर होण का वर्णन सै। यूहन्ना मसीह के जरिये अनन्त जीवन के दान पै जोर देवे सै। यो एक इसा दान सै जो इव शुरु होवै सै, अर उन ताहीं मिले सै जो यीशु नै राह, सच्चाई अर जिन्दगी के रूप म्ह पावै सै। आत्मिक वात्तां नै दिखाण खात्तर रोज की साधारण चिज्जां नै निशान्नी के तौर तै इस्तमाल करणा, यूहन्ना की एक खास बात सै, जिस तरियां-पाणी, रोटी, चाँदणा, पाळी अर उसकी भेड़, अर अंगूर की बेल अर उसके फळ।

### रूप-रेखा

जानकारी 1:1-18

यूहन्ना बपतिस्मा देण आळा अर यीशु के पैहले चेल्लें 1:19-51

यीशु के जरिये माणसां की सेवा 2:1-12:50

यरुशलेम नगर म्ह आखर के थोड़े दिन 13:1-19:42

प्रभु यीशु का जिन्दा हो जाणा अर उसका दिखाई देणा 20:1-31

समापन गलील परदेस म्ह दुबारा दिखाई देणा 21:1-25

### ??? ???? ? ? ???? ???? ???

1 दुनिया बणण तै पैहल्या वचन था, अर वचन परमेसवर कै गेल्या था, अर वचन परमेसवर था। 2 यो वचन ए शुरुआत तै परमेसवर कै गेल्या था। 3 दुनिया की हरेक चीज उससे कै जरिये बणी सै, अर उसके बिना किसे भी चीज की रचना न्ही होई। 4 वो जीवन का जरिया था, अर वो जीवन मानव जाति कै खात्तर चाँदणा था। 5 चाँदणा अन्धेरै म्ह चमकै सै, अर अन्धेरा उस ताहीं बुझा न्ही सक्या।

6 परमेसवर कै ओड़ तै भेज्जा होया एक माणस आया, जिसका नाम यूहन्ना था। 7 वो गवाही देण खात्तर आया के माणसां नै चाँदणे की गवाही देवे, के सारे माणस उसके जरिये चाँदणे पै विश्वास करै। 8 वो खुद तै वो चाँदणा कोनी था, पर माणसां नै उससे चाँदणे की गवाही देण खात्तर आया था।

9 जो साच्चा चाँदणा था, हरेक माणस नै ज्ञान का चाँदणा देवे सै, वो धरती पै आण आळा था। 10 वो दुनिया म्ह था, अर दुनिया उसके जरिये बणी, अर दुनिया के माणसां नै उस ताहीं न्ही पिच्छाणया। 11 वो अपने यहूदी माणसां कै धौरे आया अर उसके अपने लोगगां नै उस ताहीं कोन्या अपणया। 12 पर जितन्या नै उस ताहीं अपणया, उसनै उन ताहीं परमेसवर के ऊलाद होण कि हक दिया। 13 वे



कुदरती तौर पे ना तो पूर्वजां तै, ना देह की मर्जी तै, ना माणसां की मर्जी तै, पर परमेसवर की मर्जी तै पैदा होए सै।

14 अर वचन देह धारण करके आया, अर अनुग्रह अर सच्चाई तै भरके म्हारै बिचाळै रहण लागया, अर हमनै उसकी इसी महिमा देखी, जिसे पिता कै इकलौते बेटे की महिमा।

15 यूहन्ना नै उसके बारे म्ह गवाही दी, अर रुक्का मारके बोल्या, “यो वोए सै, जिसका मन्ने जिक्र करया के जो मेरै पाच्छे, आण लागरया सै, वो मेरतै घना महान सै क्यूँके वो मेरतै पैहल्या था।” 16 क्यूँके उसकी करुणा अर सच्चाई की भरपूरी म्ह तै हम सारया नै आशीष पै आशीष पाई।

17 इस खात्तर के नियम-कायदे तो मूसा नबी तै मिले, पर अनुग्रह अर सच्चाई यीशु मसीह कै जरिये पोहची। 18 परमेसवर ताहीं किसे नै कदे कोन्या देख्या, पर परमेसवर के इकलौते बेटे नै, जो सदा परमपिता कै गैल सै, उससे नै म्हारे ताहीं दिखाया।

~~~~~  
 (~~~~~ 3:1-12; ~~~~ 1:1-8; ~~~~~ 3:1-18)

19 यूहन्ना की गवाही या सै, के जिब यहूदी अगुवां नै यरुशलेम तै याजकां अर लेवियां नै उसतै यो बुद्धरण नै भेज्या, के “तू कौण सै?” 20 फेर उसनै नाटचा कोनी, पर मान लिया के “मै मसीह कोनी।”

21 फेर उननै यूहन्ना तै बुद्धया, “तो फेर तू कौण सै? के तू एलिय्याह नबी सै?” उसनै साफ-साफ कह दिया के, “मै मसीह कोनी।” “तो के तू वो नबी सै?” उसनै जवाब दिया, “ना।”

22 फेर उननै यूहन्ना तै बुद्धया, “फेर तू सै कौण? ताके हम अपणे भेजण आळा ताहीं जवाब देवां। तू अपणे बारे म्ह के कहवै सै?” 23 वो बोल्या, “जिसा यशायाह नबी नै बोल्या सै: ‘मै जंगल-बियाबान म्ह एक रुक्का देवण आळे का वचन सुं, के थम प्रभु का रास्ता सीध्धा करो।’”

24 वे फरीसियों के कान्ही तै भेज्जै होइ थे।

25 उननै उसतै यो सवाल बुद्धया, “जै तू ना मसीह सै, अर ना एलिय्याह, अर ना वो नबी सै, तै फेर बपतिस्मा क्यातै देवै सै?”

26 यूहन्ना नै उन ताहीं जवाब दिया, “मै तो थमनै पाणी तै बपतिस्मा देऊं सुं, पर धारे बीच म्ह एक माणस खडचा सै जिसनै थम कोनी जाणदे। 27 यानी मेरै पाच्छे, आण आळा सै, जिसके जूत्यां के फित्ते भी मै खोल्लण जोगगा कोनी।”

28 ये बात थरदन नदी तै परली ओइ बैतनिय्याह गाम म्ह होई, जडै यूहन्ना माणसां ताहीं बपतिस्मा दिया करता।

~~~~~

29 दुसरे दिन यूहन्ना नै यीशु ताहीं अपनी ओइ आन्दे देखके बोल्या, “देक्खो, यो परमेसवर का मेम्ना सै जो दुनिया का पाप ठावै सै। 30 यो वोए सै जिसके बारे म्ह मन्ने कह्या था, एक माणस मेरै बाद आवै सै जो मेरतै महान सै, ज्यातै वो मेरतै पैहल्या था। 31 मै खुद तो उसनै कोनी पिच्छाणु था, पर इस्से खात्तर मै पाणी तै बपतिस्मा देन्दा होया आया, ताके इस्राएल के माणस उसनै जान ले।”

32 अर यूहन्ना नै या गवाही दी: “मन्ने सुर्ग तै पवित्तर आत्मा ताहीं कबूतर की तरियां अकास तै उतरदे अर उस ताहीं मसीह यीशु पै ठहरते देख्या सै।” 33 मै तो उसनै पिच्छाणु कोनी था, पर जिसनै मेरै ताहीं पाणी तै बपतिस्मा देण कै खात्तर भेज्या, उससे नै मेरै ताहीं कह्या, “जिसपै तू आत्मा नै उतरदे अर ठहरदे देख्खै, वोए पवित्तर आत्मा तै बपतिस्मा देणिया सै।” 34 “अर मन्ने देख्या, अर गवाही दी सै, के योए परमेसवर का बेटा सै।”

~~~~~

35 आगले दिन यूहन्ना अपणे दो चेल्यां के गैल फेर ओडै खडे थे, 36 अर उसनै यीशु ताहीं जो उसके धारे तै जाण लागरया था, उसकी ओइ लखाके बोल्या, “देक्खो, यो परमेसवर का मेम्ना सै।”

37 जिब्बे वे दोन्नु चेल्ले उसकी या बात सुणके यीशु के गैल हो लिए। 38 यीशु नै मुडके उन ताहीं गैल आन्दे देख्या अर उनतै बोल्या, “थम के चाह्को सो?” वे उसतै बोल्ते, “हे गुरु, तू कित रहवै सै?”

39 यीशु उनतै बोल्या, “चाल्लों, तो देख लियो।” फेर उननै उसके रहण की जगहां देखी, अर उस दिन उसके गेल्या रहे। क्यूँके साँझ के करीब चार बजगे थे।

40 उन दोनुआ म्ह तै, जो यूहन्ना की बात सुणकै यीशु कै गेल्या हो लिए थे, एक तो शमौन पतरस का भाई अन्दरयास था। 41 उसनै पैहल्या अपणे सगे भाई शमौन तै मिलकै उसतै बोल्या, “हमनै खिरस्त यानी मसीह (परमेसवर का अभिषिक्त) मिलग्या।”

42 फेर अन्दरयास शमौन नै यीशु के धौरै ल्याया। यीशु नै उसकी ओड़ लखाके कह्या, “तू यूहन्ना का बेट्टा शमौन सै: तू कैफा यानिके पतरस कुआवैगा।”

~~~~~

43 आगले दिन यीशु नै गलील परदेस जाण का इरादा करया। वो फिलिप्पुस तै मिल्या अर बोल्या, “मेरै पाच्छै हो ले।”

44 फिलिप्पुस, अन्दरयास अर पतरस के नगर बैतसैदा का रहणीया था। 45 फिलिप्पुस नतनएल तै मिल्या अर उसतै बोल्या, “जिसका जिक्र मूसा नबी नै नियम-कायदा म्ह अर नबियाँ नै करया सै, वो हमनै मिलग्या सै! वो यूसुफ का बेट्टा, यीशु नासरी\* सै।”

46 नतनएल नै उसतै बुझ्झया, “के कोए उत्तम चीज भी नासरत तै लिकड़ सकै सै?” फिलिप्पुस उसतै बोल्या, “चालकै देख ले।”

47 यीशु नै नतनएल ताहीं अपणी ओड़ आन्दे देखकै उसके बारे म्ह कह्या, “देखो, यो साच्चए इस्राएली सै: इस म्ह कपट कोनी।”

48 नतनएल नै उसतै बुझ्झया, “तू मन्नै किस तरियां जाणै सै?” यीशु नै उस ताहीं जवाब दिया, “इसतै पैहल्या के फिलिप्पुस नै तेरे ताहीं बुलाया, तो मन्नै तेरे ताहीं देख्या था जिव तू अंजीर के दरखत तळै था।”

49 नतनएल नै उस ताहीं जवाब दिया, “हे गुरु, तू परमेसवर का बेट्टा सै, तू इस्राएल का राजा सै।”

50 यीशु नै उस ताहीं जवाब दिया, “मन्नै जो तेरे तै कह्या के मन्नै तेरे ताहीं अंजीर के दरखत तळै देख्या, के तू इससे बात पै विश्वास करै सै? तू इसतै भी बड़े-बड़े काम देखैगा।” 51 फेर उसनै कह्या, “मै तेरे तै सच-सच कहूँ सूँ, के थम सुर्ग नै खुल्या होइ अर परमेसवर के सुर्गदूत्तां ताहीं मुझ माणस के बेट्टे के खात्तर नीचवै उतरदे अर उप्पर जान्दे होए देखोगे।”

## 2

~~~~~

1 फेर तीसर दिन गलील परदेस के काना नगर म्ह किस का ब्याह था, अर यीशु की माँ भी ओड़ै थी। 2 यीशु अर उसके चेल्लें भी उस ब्याह म्ह न्योद राक्खे थे। 3 जिव अंगूर का रस खतम होगया, फेर यीशु की माँ उसतै बोल्ली, “उनकै धारे अंगूर का रस कोनी रहया।”

4 यीशु नै उसतै कह्या, “हे नारी, या बात तू मेरे तै क्यूँ कहवै सै? इब्बे मेरा बखत कोनी आया।”

5 पर उसकी माँ नै नौकरां तै कह्या, “जो कुछ यो थारे ताहीं कहवै, न्युए करियो।”

6 यहूदी परम्परा के मुताबिक शुद्ध\* करणं के खात्तर ओड़ै छः पत्थर के पैण्डे धरे थे, जिन म्ह दो-दो, तीन-तीन मण‡ पाणी आवै था।

7 यीशु नै उनतै कह्या, “पैढा म्ह पाणी भर द्यो।” अर उननै वे मुँह तक भर दिए।

8 फेर यीशु नै नौकरां ताहीं कह्या, “इब काढकै भोज कै प्रधान धौरै ले जाओ।” अर वे लेगे। 9 जिव भोज कै प्रधान नै वो पाणी चाख्या, जो अंगूर का रस बणग्या था अर वे न्ही जाणै था के वो कड़ै तै आया सै पर जिन नौकरां नै पाणी काढचा था वे जाणै थे फेर भोज कै प्रधान नै बन्दे ताहीं बुलाके उसतै कह्या,

\* 1:45 1:45 नासरत नगर का रहण आळा    † 2:6 2:6 शुद्ध सुच्चा    ‡ 2:6 2:6 शुद्ध करण यहूदी परम्परा के मुताबिक हाथ-पेर धोणा    § 2:6 2:6 मण सो सवा सो लिटर

10 “हरेक माणस पैहल्या बढिया अंगूर का रस देवै सै, अर जिब माणस पीकै छिक्क जावै सै, फेर हल्का देवै सै, पर तन्नै बढिया अंगूर का रस इब ताहीं राख राख्या सै।”

11 यीशु नै गलील परदेस के काना नगर म्ह अपणा यो पैहला चिन्ह-चमत्कार दिखाकै अपणी महिमा जाहिर कर दी अर जिसकी बजह तै उसके चेल्यां नै उसपै विश्वास करया।

12 इसके बाद वो अर उसकी माँ अर उसके भाई अर उसके चेल्लें कफरनहूम नगर म्ह गए अर ओड़ै कुछ दिन रहे।

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ  
(ⓂⓂⓂⓂ 21:12-13; ⓂⓂ 11:15-17; ⓂⓂⓂⓂ 19:45-46)

13 यहूदियाँ का फसह का त्योहार लोवै था, अर यीशु यरुशलेम नगर म्ह गया। 14 उसने मन्दर म्ह बळध, भेड़ अर कबूतर बेचण आळे अर सर्राफां (पईसा का लेण देण करण आळे) ताहीं बेटूटे होए पाया। 15 फेर उसने जेवड़ियां का कोरड़ा बणाकै, सारी भेड़डां अर बळधां ताहीं मन्दर तै काढ दिया, अर सर्राफां के पईसे खिन्डा दिए अर उनके पीढ़े पलट दिए, 16 अर कबूतर बेचण आळा ताहीं बोल्या, “इन्हनै उरै तै ले जाओ। मैरे पिता कै घर नै व्यापर का घर ना बणाओ।” 17 फेर उसके चेल्यां नै याद आया के पवित्र ग्रन्थ म्ह लिख्या होड़ सै, “तेरे घर की धुन मन्नै खा ज्यागी।”

18 इसपै यहूदी अगुवां नै यीशु तै कह्या, “तू म्हारै ताहीं कौण सा अदभुत निशान दिखा सकै सै?” जो इस तरियां के काम तू करै सै, यो साबित हो सकै, के तू उसका हक राखै सै।

19 यीशु नै उन ताहीं जवाब दिया, “इस मन्दर नै ढा दो, मै इसनै तीन दिन म्ह बणा दियुंगा।”

20 यहूदी अगुवां नै कह्या, “इस मन्दर कै बणाण म्ह छियालिस साल लाग्गे सै, अर के तू इसनै तीन दिन म्ह बणा देवैगा?” 21 पर यीशु नै उनतै अपणी देह रूपी मन्दर कै बारे म्ह कह्या था। 22 आखर म्ह जिब वो मरे होया म्ह तै जिन्दा होया, जिब उसके चेल्यां नै याद आई, के उसनै यो कह्या था, अर उननै पवित्र ग्रन्थ के वचन जो यीशु के जिन्दा होण के बारे म्ह बतावै सै, अर उननै यीशु के जरिये कहे होए वचनां पै विश्वास करया।

ⓂⓂⓂⓂ ⓂⓂⓂⓂ ⓂⓂ ⓂⓂ ⓂⓂⓂⓂⓂⓂ

23 फसह के त्योहार के दिन्नां म्ह जिब यीशु यरुशलेम नगर म्ह था, तो उसके जरिये करे गये चिन्ह-चमत्कार के काम्मां नै देखके घणे माणसां नै उसपै विश्वास करया। 24 पर यीशु नै अपणे-आप ताहीं उनकै भरोसे पै कोनी छोडचा, ज्याते वो सारया नै जाणै था, 25 अर उसनै इस बात की जरूरत कोनी थी के कोए आके उसने माणसां के बारे म्ह बतावे, क्यूँके वो खुदे जाणै था के माणस के मन म्ह के सै?

### 3

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ

1 फरीसियां म्ह तै नीकुदेमुस नाम का एक माणस था, जो यहूदियाँ का प्रधान था। 2 उसने रात नै यीशु के धोरै आकै उस ताहीं कह्या, “हे गुरु, हमनै बेरा सै के तू परमेसवर की ओड़ तै म्हारे ताहीं सिखाण खात्तर आया सै, ज्यातैए कोए इन चिन्ह-चमत्कारां नै जिननै तू दिखावै सै, जै परमेसवर उसके गेल्या ना हो, तो दिखा कोन्या सकदा।”

3 यीशु नै उस ताहीं जवाब दिया, “मै थारे ताहीं सच कहूँ सूँ, जै कोए नए सिरे तै ना जन्म ले तो परमेसवर का राज्य देख नही सकदा।”

4 नीकुदेमुस नै उस ताहीं कह्या, “माणस जिब बूढ़ा होज्या, तो किस ढाळ जन्म ले सकै सै? के वो अपणी माँ के गर्भ म्ह दुसरी बर भीत्तर बड़कै जन्म ले सकै सै।”

5 यीशु नै जवाब दिया, “मै तेरे तै सच कहूँ सूँ, जिब ताहीं कोए माणस पाणी\* अर आत्मा तै ना जन्मे तो वो परमेसवर के राज्य म्ह बड़ नही सकदा। 6 क्यूँके मानव देह म्ह जन्म सिर्फ देह का जन्म

\* 3:5 3:5पाणी अर आत्मा वपतिस्मा नै दिखावै सै

सै, जिब के आत्मा तै जन्म नया जन्म सै।<sup>7</sup> हेरान ना होवै, के मन्ने तेरे तै कह्या, के थारे ताहीं नए सिरे तै जन्म लेणा जरूरी सै।<sup>8</sup> हवा जितोड़ चाहवै सै उतोड़ चाल्लै सै, अर तू उसकी आवाज सुणै सै, पर जाण्दा कोनी, के वा कड़ै तै आवै सै अर कितोड़ नै जावै सै? जो कोए पवित्र आत्मा तै जन्मा सै वो इसाए सै।”

<sup>9</sup> नीकुदेमुस नै उस ताहीं जवाब दिया, के या बात किस ढाळ हो सकै सै?

<sup>10</sup> या सुणकै यीशु नै उस ताहीं जवाब दिया, “तू इस्राएलियाँ का गुरु होकै भी के इन बातों नै कोनी समझदा?”<sup>11</sup> मै तेरे तै साच्ची-साच कहूँ सूँ के हम जो जाणां सां, वो कह्दां सां, अर जिस ताहीं हमनै देख्या सै उसकी गवाही देवां सां, अर जो हम कह्दां सां, उसका थम बिश्वास कोनी करदे।

<sup>12</sup> जिब मन्ने थारैतै दुनिया की बात कही, अर थम बिश्वास न्ही करदे, तो जै मै थमनै सुर्ग की बात कहूँ, तो फेर किस ढाळ बिश्वास करोगे? <sup>13</sup> अर कोए सुर्ग पै कोनी चढा, सिर्फ वोए एक सै जो सुर्ग तै उतरा यानिके मै माणस का बेट्टा। <sup>14</sup> अर जिस ढाळ तै मूसा नबी नै जंगल-बियावान म्ह कांस्सी का साँप बणाकै उस ताहीं ऊँच्चे पै चढाया, उस्से ढाळ तै जरूरी सै के मै माणस का बेट्टा भी ऊँच्चे पै चढाया जाऊँ। <sup>15</sup> ताके जो कोए मेरे पै बिश्वास करै वो अनन्त जीवन पावै।

<sup>16</sup> क्यूँके परमेसवर नै दुनिया के माणसां तै इसा प्यार राख्या के उसनै अपना इकलौता बेट्टा दे दिया, ताके जो कोए उसपै बिश्वास करै, वो नाश कोनी होवै, पर अनन्त जीवन पावै। <sup>17</sup> क्यूँके परमेसवर नै अपना बेट्टा दुनिया म्ह इस खात्तर न्ही भेज्या, के दुनिया पै दण्ड का हुकम देवै, पर इस खात्तर भेज्या के दुनिया उसकै जरिये उद्धार पावै। <sup>18</sup> जो परमेसवर के बेट्टे पै बिश्वास करै सै, उसपै दण्ड का हुकम कोन्या होन्दा, पर जो उसपै बिश्वास न्ही करदा, वो कसूरवार बणैगा, ज्यातै के उसनै परमेसवर के इकलौते बेट्टे के नाम पै बिश्वास कोनी करया। <sup>19</sup> अर दण्ड के हुकम का कारण यो सै के चान्दणा दुनिया म्ह आया सै, अर माणसां नै अन्धैरे ताहीं चाँदणे तै घणा प्यारा जाणया क्यूँके उनके काम बुरे थे। <sup>20</sup> क्यूँके जो कोए पाप करै सै, वो चाँदणे तै बैर राक्खै सै, अर चाँदणे धोरै कोनी आन्दा, क्यूँके उसके पाप उजागर हो जावैगे। <sup>21</sup> पर जो सच्चाई पै चाल्लै सै वो चाँदणे धोरै आवै सै, ताके ये साबित हो जावै के उसके काम परमेसवर की ओड़ तै कराये गये सै।

~~~~~

<sup>22</sup> फेर यीशु अर उसके चल्ले यहूदिया परदेस म्ह पोहचे, अर वो ओड़ै उनकै गेल्या रहकै माणसां ताहीं बपतिस्मा देण लागया। <sup>23</sup> यूहन्ना भी शालेम नगर के धोरै ऐनोन नामक गाम म्ह बपतिस्मा देवै था, क्यूँके ओड़ै घणाए पाणी था, अर माणस आकै बपतिस्मा लेवै थे। <sup>24</sup> यूहन्ना उस बखत ताहीं जेळखान्ने म्ह केद न्ही करया था। <sup>25</sup> ओड़ै यूहन्ना के कुछ चेल्यां का किसे यहूदी गेल्या पाणी तै शुद्धिकरण के बारे म्ह बहस होगी। <sup>26</sup> अर यूहन्ना के चेल्यां नै आकै उस ताहीं कह्या, “हे गुरु, जो माणस यरदन नदी के परली ओड़ तेरी गेल्या था, अर जिसके बारे म्ह तन्नै कह्या सै, देख, वो यीशु बपतिस्मा देवै सै, अर सारे उसके धोरै आवै सै।”

<sup>27</sup> यूहन्ना नै जवाब दिया, “माणस नै तब तक कुछ न्ही मिल सकता, जिब तक वो सुर्ग तै ना दिया जावै।” <sup>28</sup> थारे ताहीं तो पैहले मन्ने बताया था के “मै मसीह कोनी, पर उसतै पैहले भेज्या गया सूँ।” <sup>29</sup> बन्दड़ा बन्दड़ी तै ब्याह करै सै, पर बन्दड़े का साथी जो खड्या होया उसकी आवाज सुणै सै, बन्दड़े के वचन तै घणा खुश होवै सै, अर मै भी खुश सूँ। <sup>30</sup> जरूरी सै के वो बधै अर मै घटूँ।

<sup>31</sup> जो सुर्ग तै आवै सै, वो सारया म्ह सबतै महान् सै, जो धरती कान्ही तै आवै सै वो धरती का सै, अर धरतीए की बात कहवै सै: जो सुर्ग कान्ही तै आवै सै, वो सारया तै उप्पर सै। <sup>32</sup> उसनै जो कुछ देख्या अर सुणया सै, वो उस्से की बात करै सै, पर उसकी गवाही कोए न्ही मानता। <sup>33</sup> जिसनै उसकी गवाही अपनाई उसनै इस बात पै छाप लगा दी के परमेसवर साच्चा सै। <sup>34</sup> क्यूँके जिस ताहीं परमेसवर नै भेज्या सै, वो परमेसवर की बात कहवै सै, क्यूँके परमेसवर उननै बिना किसे माप के



25 विरबान्नी नै उस ताहीं कह्या, “मै जाणु सू के मसीह” जो खिरस्त कुहावै सै, “आण आळा सै, जिब वो आवैगा, फेर म्हारै ताहीं सारी बात बता देवैगा।”

26 यीशु नै उस ताहीं कह्या, “मै जो तेरे तै बोल्लण लागरया सू, मै वोए सू।”

~~~~~

27 इतनै म्ह उसके चेल्लें आण पोहचे, अर हैरान होण लागगे के वो विरबान्नी तै बतळावै था, फेर भी किसे नै कोनी बुझया, “तू के चाहवै सै? या क्यातै उसतै बतळावै सै?”

28 फेर विरबान्नी अपणा पैदा छोड़के नगर म्ह चली गई, अर माणसां तै कहण लागगी, 29 “आओ एक माणस नै देखो, जिसनै सारा किमे जो मन्नै करया मेरे तै बता दिया। कदे योए तो मसीह न्ही सै?” 30 तब वे नगर के बासिन्दे गाम तै लिकड़के यीशु के धारे आण लागगे।

31 इस बिचाळै उसके चेल्यां नै यीशु तै या बिनती करी, “हे गुरु, किमे खा ले।”

32 पर उसनै उन ताहीं कह्या, “मेरे धारे खाण खात्तर इसा खाणा सै जिसनै थम कोनी जाणदे।”

33 फेर चेल्यां नै आप्स म्ह कह्या, “के कोए उसके खात्तर खाणा लेके आया सै?”

34 यीशु नै उनतै कह्या, “मेरा खाणा यो सै के अपणे भेजण आळे की मर्जी के मुताबिक चाल्तुं अर उसके काम नै पूरा करूँ जो उसनै कह्या सै। 35 के थम कोनी कहन्दे, ‘लामणीयां के इच्चै चार महिन्ने रहरे सै?’ अपणी आँखां तै देख्खों जितने माणस आण लागरे सै, वो उस खेत की तरियां सै जो काट्टण खात्तर तैयार सै। 36 पैहले तै मजदूर काम करण लागरया सै अर अपणी मजदूरी पाण लागरया सै, इसका मतलब यो सै के वो माणसां नै कट्टा करण लागरया सै जो अनन्त जीवन पागे। 37 क्यूँके याडै या कहावत ठीक बेट्टै सै: बोणआळा और सै, अर काट्टण आळा और। 38 मन्नै थारे ताहीं वो खेत काट्टण खात्तर भेज्या जिसम्ह थमनै मेहनत कोन्या करी दुसरयां नै मेहनत करी अर थम उनकी मेहनत कै फळ म्ह हिस्सेदार होए।”

~~~~~

39 उस नगर के घणखरे सामरियां नै उस विरबान्नी के कहण तै यीशु पै विश्वास करया, क्यूँके उसनै कह्या था, के “उसनै सारा किमे जो मन्नै करया सै, मेरे तै बता दिया।” 40 ज्यांतै जिब सामरी उसके धारे आए, तो उसतै बिनती करण लागगे के म्हारै याडै रह। आखर म्ह वो ओड़ै दो दिन ताहीं रहया। 41 उसके वचन के कारण और भी घणखरे माणसां नै विश्वास करया

42 अर उस विरबान्नी तै कह्या, “इब हम तेरे कहण तैए विश्वास कोनी करदे, क्यूँके हमनै खुदे सुण लिया, अर जाणगे सा के योए साच्चए म्ह दुनिया का उद्धार करणीया सै।”

43 फेर दो दिनां के पाच्छै वो ओड़ै तै लिकड़के गलील परदेस म्ह गया। 44 क्यूँके यीशु नै खुदे गवाही दी के नवी अपणे गाम म्ह आदर मान कोनी पान्दा। 45 जिब वो गलील परदेस म्ह आया, तो गलील परदेस के माणस राज्जी होके उसतै मिले, क्यूँके जितने काम उसनै यरुशलम म्ह त्यौहार कै बखत करे थे, उननै उन सारया ताहीं देख्या था, क्यूँके वे भी त्यौहार म्ह जारे थे।

~~~~~

46 फेर वो दुबारे गलील परदेस के काना नगर म्ह आया, जडै उसनै पाणी ताहीं अंगूर का रस बणाया था। ओड़ै राजा का एक कर्मचारी था जिसका बेट्टा कफरनहूम नगर म्ह बीमार था। 47 वो या सुणके के यीशु यहूदिया परदेस तै गलील परदेस म्ह आ रहया सै, उसके धारे गया अर उसतै बिनती करण लागगया के चालके मेरे बेट्टे नै ठीक कर दे: क्यूँके वो मरण आळा था।

48 यीशु नै उस ताहीं कह्या, “जिब ताहीं थम चमत्कार अर अचम्भे के काम कोनी देखदे जद ताहीं कदे भी विश्वास कोनी करोगे।”

49 राजा के कर्मचारी नै उसतै कह्या, “हे प्रभु, मेरे बाळक की मौत होण तै पैहल्या चाल।”

50 यीशु नै उस ताहीं कह्या, “जा, तेरा बेट्टा जिन्दा सै।” उस माणस नै यीशु की कही होई बात का विश्वास करया अर चल्या गया। 51 वो रास्ते म्ह था के उसके नौकर उसतै आ मिले अर कहण

लागो, “तेरा छोरा जिन्दा सै।”<sup>52</sup> उसनै उसतै बुझ्झया, “किस बखत वो ठीक होण लागगया?” उननै उस ताहीं कह्या, “काल दोफहरै एक बजे उसका बुखार उतर गया।”

53 फेर बाप जाण गया के यो उससे बखत होया जिस बखत यीशु नै उस ताहीं कह्या, “तेरा बेट्टा जिन्दा रहवैगा,” अर उसनै अर उसके सारे कुणबे नै विश्वास करया।

54 यो दुसरा अचम्भे का काम था जो यीशु नै यहूदिया परदेस तै गलील परदेस म्ह आकै दिखाया।

## 5

~~~~~

1 इन बाततां के पाच्छै, यहूदियां का एक त्योहार आया, अर यीशु यरुशलेम नगर म्ह गया।

2 यरुशलेम म्ह भेड़-फाटक के धोरै एक कुण्ड सै जो इब्रानी भाषा म्ह बैतहसदा कुह्वावै सै, उसके पाँच घाट सै।<sup>3</sup> इन म्ह घणखरे बीमार, आन्धे, लंगड़े अर सूखे अंगआळे (पाणी के हाल्लण के आस म्ह) पड़े रहवै थे।<sup>4</sup> (क्यूँके खास बखत पै परमेसवर के सुर्गदूत कुण्ड म्ह उतरकै पाणी नै हलाया करै थे। पाणी हाल्दे जो कोए पैहल्या उतरदा वोए ठीक हो जान्दा चाहे उसके कोए बीमारी क्यूँ ना हो।)

5 उड़ै एक माणस था, जो अइतीस साल तै बीमारी म्ह पड्या था।<sup>6</sup> यीशु नै उस ताहीं पड्या होया देखकै अर न्यु जाणकै के वो घणे दिनां तै इसी हाल्लत म्ह पड्या सै, उसतै बुझ्झया, “के तू ठीक होणा चाहवै सै?”

7 उस बीमार नै उस ताहीं जवाब दिया, “हे प्रभु, मेरै धोरै कोए माणस कोनी के जिब पाणी हलाया जावै, तो मन्ने कुण्ड म्ह उतरै, पर मेरे पोंहोचदे-पोंहोचदे दुसरा मेरतै पैहल्या पाणी म्ह उतर जावै सै।”

8 यीशु नै उस ताहीं कह्या, “उठ, अपणे विस्तर ठाकै, हाँड-फिर।”<sup>9</sup> वो माणस जिब्बे ठीक होगया, अर अपणे विस्तर ठाकै हाँडण-फिरण लागगया।

10 वो आराम का दिन था। ज्यातै यहूदी उस ताहीं जो ठीक होया था, कहण लागगे, “आज तो आराम का दिन सै, तेरा विस्तर ठाणा नियम-कायदा के मुताबिक ठीक कोनी।”

11 उसनै उन ताहीं जवाब दिया, “जिसनै मेरै ताहीं ठीक करया, उससे ने मेरै ताहीं कह्या, ‘अपणा विस्तर ठा अर हाँड-फिर।’”

12 उननै उसतै बुझ्झया, “वो कौण माणस सै जिसनै तेरे तै कह्या, ‘विस्तर ठा, अर हाँड-फिर?’”

13 पर जो ठीक होया था वो कोनी जाणै था के वो कौण सै, क्यूँके उस जगहां पै भीड़ होण के कारण यीशु ओड़ै तै चला गया था।

14 इन बाततां के पाच्छै, वो यीशु नै मन्दर म्ह मिल्या। यीशु नै उस ताहीं कह्या, “देख, तू ठीक होगया सै: दुबारा पाप ना करिये, इसा ना हो के इसतै कोए भारी संकट तेरे पै आण पड़े।”<sup>15</sup> उस माणस नै जाकै यहूदियाँ तै कह दिया के जिसनै मेरै ताहीं ठीक करया वो यीशु सै।

16 इस कारण यहूदी अगुवें यीशु नै तंग करण लागगे, क्यूँके वो इसे काम आराम के दिन करया करदा।<sup>17</sup> इसपै यीशु नै उन ताहीं कह्या, “मेरा पिता सारी हाण काम करै सै, अर मेरे ताहीं भी करते रहणा सै।”<sup>18</sup> यीशु की बात के कारण यहूदी अगुवें और भी घणे उस ताहीं मारण खात्तर कोशिश करण लागगे, क्यूँके वो ना सिर्फ आराम के दिन का नियम तोड्या करदा, पर परमेसवर नै अपणा पिता कहकै खुद ताहीं परमेसवर के बरोबर भी ठैहरावै था।

~~~~~

19 इसपै यीशु नै उस ताहीं कह्या, “मै थारैताहीं साच्ची-साच कहूँ सूँ, बेट्टा\* खुद तै किमे न्ही कर सकदा, सिर्फ वो जो पिता नै करदे देखै सै, क्यूँके जिन-जिन काम्मां नै वो करै सै उननै बेट्टा भी इस्से ढाळ करै सै।<sup>20</sup> क्यूँके पिता बेट्टे तै प्यार करै सै अर जो-जो काम वो खुद करै सै, वो सारे उसतै दिखावै सै: अर वो इसतै भी बड़े काम उस ताहीं दिखावैगा, ताके थम हैरान होओ।<sup>21</sup> जिसा पिता

\* 5:19 5:19 बेट्टा यीशु खुद नै बेट्टा कहकै सम्बोधित करै से

मरे होया नै ठावै अर जिवांवै सै उस्से ढाळ बेट्टा भी जिननै चाहवै सै उननै जिवांवै सै। <sup>22</sup> पिता किसे का न्याय कोनी करदा, पर न्याय करण का सारा काम बेट्टै ताहीं सौंप राख्या सै, <sup>23</sup> ताके सारे माणस जिस ढाळ पिता की इज्जत करै सै उस्से ढाळ बेट्टै की भी इज्जत करै। जो बेट्टै की इज्जत कोनी करदा, वो पिता की भी इज्जत कोनी करदा, जिसनै उस ताहीं भेज्या सै।”

<sup>24</sup> मै थारैतै साच्ची-साच कहूँ सूँ, जो मेरा वचन सुणके उसपै विश्वास करै सै, जिसनै मेरै ताहीं भेज्या सै, वो अनन्त जीवन पावै सै, अर उसपै दण्ड का हुकम कोनी होन्दा, पर वो मौत नै पार करके जीवन म्ह दाखल हो लिया सै। <sup>25</sup> “मै थारैतै साच्ची-साच कहूँ सूँ, वो बखत आवै सै, अर इब सै, जिसम्ह मरे होइ परमेसवर के बेट्टै का वचन सुणैगें, अर जो सुणैगें वे जिवेंगे। <sup>26</sup> क्यूँके जिस ढाळ तै पिता खुद म्ह जीवन राक्खै सै, उस्से ढाळ तै उसनै बेट्टै ताहीं भी यो अधिकार दिया सै के खुद जीवन राक्खै। <sup>27</sup> बल्के मेरे ताहीं माणसां के न्याय करण का भी अधिकार दिया सै, ज्यातै के मै माणस का बेट्टा सूँ।”

<sup>28</sup> इसतै हैरान मतना होओ: क्यूँके वो बखत आवै सै के जितने मरे होए लोग कबरां म्ह सै वे मेरा वचन सुणके लिक्क आवैगें। <sup>29</sup> जिन नै भले काम करे सै वे जीवन के पुनरुत्थान खात्तर जी जावेंगे अर जिन नै बुरे काम करे सै वे दण्ड के पुनरुत्थान खात्तर जी जावेंगे।

~~~~~

<sup>30</sup> “मै खुद तो कुछ कोनी कर सकदा, जिसा सुणु सूँ, उस्से तरियां न्याय करूँ सूँ, अर मेरा न्याय साच्चा सै, क्यूँके मै अपणी मर्जी कोनी पर अपणे भेजण आळे की मर्जी चाहूँ सूँ।”

<sup>31</sup> जै मै खुद अपणी गवाही दूँ, तो मेरी गवाही साच्ची कोनी। <sup>32</sup> एक ओर सै जो मेरा पिता सै, वो मेरी गवाही देवै सै, अर मै जाणु सूँ, के मेरी जो गवाही वो देवै सै, वा साच्ची सै।

<sup>33</sup> थमनै यूहन्ना तै बुझवाया अर उसनै सच्चाई की गवाही दी सै। <sup>34</sup> पर मै अपणे बारे म्ह माणसां की गवाही कोनी चाहन्दा, फेर भी मै ये बात ज्यातै कहूँ सूँ के थारा उद्धार हो। <sup>35</sup> यूहन्ना तो बळदे अर चमकदे होए दीवै के समान था, अर थमनै किमे वार ताहीं उसके चाँदणे म्ह मगन होणा भाया।

<sup>36</sup> पर मेरे धारे जो गवाही सै वा यूहन्ना की गवाही तै बड्डी सै, क्यूँके जो काम पिता नै मेरे ताहीं निपटाना नै सौंप्या सै यानिके योए काम जो मै करूँ सूँ, वे मेरे गवाह सै के पिता नै मेरे ताहीं भेज्या सै। <sup>37</sup> अर पिता जिसनै मेरै ताहीं भेज्या सै, उस्से नै मेरी गवाही दी सै। थमनै ना कदे उसका वचन सुणया, अर ना उसकी शकल देखी सै, <sup>38</sup> अर उसके वचन ताहीं मन म्ह बणाए कोनी राखदे, क्यूँके जिस ताहीं उसनै भेज्या थम उसका विश्वास कोनी करदे। <sup>39</sup> थम पवित्र ग्रन्थ म्ह टोव्हो सो, क्यूँके समझों सो के उस म्ह अनन्त जीवन थारे ताहीं मिलै सै, अर यो वोए सै जो मेरी गवाही देवै सै, <sup>40</sup> फेर भी थम अनन्त जीवन पाण खात्तर मेरै धारे आणा कोनी चाहन्दे।

<sup>41</sup> मै माणसां तै आदर कोनी चाहन्दा। <sup>42</sup> पर मै थमनै जाणु सूँ, के थारे म्ह परमेसवर खात्तर प्यार कोनी। <sup>43</sup> थम मेरे ताहीं पसन्द न्ही करते जब के मै अपणे पिता के नाम तै आया सूँ, जै दुसरा कोए खुद के नाम तै आवै, तो उसनै थम अपणा लोगे। <sup>44</sup> थम मेरै पै किस तरियां विश्वास कर सको सो? क्यूँके थम तो आप्स म्ह एक-दुसरे तै तारीफ सुणणा चाहो सो, अर उस तारीफ की ओइ देखते भी कोनी जो एकमात्र परमेसवर तै आवै सै।

<sup>45</sup> न्यू ना समझियों के मै पिता के स्याम्ही थारे म्ह खोट काढूँ सूँ, थारे म्ह खोट काढणिया तो मूसा नबी सै, जिसपै थमनै भरोस्सा करया सै। <sup>46</sup> क्यूँके जै थम मूसा नबी पै विश्वास करदे, तो मेरा भी विश्वास करदे, ज्यातै के उसनै मेरै बारे म्ह लिख्या सै। <sup>47</sup> पर जै थम उसके पवित्र ग्रन्थ म्ह लिक्खी होई बात्तां पै विश्वास कोनी करदे, तो मेरी बात्तां पै किस तरियां विश्वास करोगे?

## 6

~~~~~

(~~~~~ 14:13-21; ~~~~ 6:30-44; ~~~~~ 9:10-17)



1 इन बातों के पाच्छे यीशु गलील समुन्दर यानिके तिबिरियास की झील के धौरै गया। 2 अर एक बड़डी भीड़ उसके गेल्या हो ली क्यूँके जो अचम्भे के काम वो बिमारां पै दिखावै था वे उनै देख्या करै थे। 3 फेर यीशु पहाड़ पै चढ़कै अपणे चेल्यां के गेल्या बैठग्या। 4 यहूदियाँ के फसह का त्यौहार लोवै था।

5 जब यीशु नै अपणी आँख ठाके एक बड़डी भीड़ ताहीं अपणे कान्ही आन्दे देख्या, फेर फिलिप्पुस ताहीं कह्या, “हम इनकै खाणे के खात्तर कड़ै तै रोट्टी मोल ल्यावां?” 6 उसनै या बात उस ताहीं आजमाण ताहीं बोल्ली, क्यूँके वो खुदे जाणे था के वो के करेगा।

7 फिलिप्पुस नै उस ताहीं जवाब दिया, “दो सौ दीनार (200 दिन की मजदूरी) की रोट्टी भी उन खात्तर पूरी कोनी पड़े के उन म्ह तै हरेक नै माड़ी-माड़ी मिल जा।”

8 उसके चेल्यां म्ह तै शमौन पतरस का भाई अन्दरयास नै उस ताहीं कह्या, 9 “याड़े एक छोरा सै जिसकै धौरै जौ की पाँच रोट्टी अर दो मच्छी सै, पर इतने माणसां खात्तर वे के सै?”

10 यीशु बोल्या, “माणसां नै बिठा द्यो।” उस जगहां घणी घास थी: फेर माणस जिन म्ह आदमियाँ की गिणती करीबन पाँच हजार की थी, बैठगे। 11 फेर यीशु नै रोट्टी ली अर परमेसवर का धन्यवाद करके बैठण आळा ताहीं बांड दी: अर उससे ढाळ मच्छियाँ म्ह तै जितनी वे चाहवै थे, बांड दी।

12 जब वे खाके छिकगे फेर वो चेल्यां तै बोल्या, “बचे होइ टुकड़े कट्टे कर ल्यो के किमे बगाया न्ही जावै।” 13 आखर म्ह उनै कट्टा करया, अर जौ की पाँच रोट्टियाँ के टुकडया तै जो खाण आळा तै बची होइ थी, बारहा टोकरी भरी।

14 फेर जो अचम्भे के काम उसनै कर दिखाये उसनै वे माणस देखकै कहण लागगे, “वो नबी जो दुनिया म्ह आण आळा था, पक्का योए सै।” 15 यीशु न्यू जाणके के वे मननै राजा बणाण खात्तर पकड़णा चाहवै सै, फेर पहाड़ पै एकला चल्या गया।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂ  
(ⓂⓂⓂⓂⓂ 14:22-33; ⓂⓂ 6:45-52)

16 जब साँझ होई, तो उसके चेल्ले झील के किनारे गए, 17 अर किस्ती पै चढ़कै झील के परली ओड़ कफरनहूम नगर म्ह जाण लागगे। उस बखत अन्धेरा होग्या था, अर यीशु इब ताहीं उनकै धौरै कोनी आया था। 18 अर आँधी के कारण समुन्दर म्ह झाल उठठण लागगी। 19 जब वे खेत-खेत ते तीन-चार कोस के करीबन लिकड़गे, फेर उननै यीशु ताहीं समुन्दर पै चाल्दे अर किस्ती के धौरै आन्दे देख्या, अर डरगे। 20 पर उसनै उनतै कह्या, “मै सूँ, डरो मतना।” 21 आखर म्ह वे उसनै किस्ती पै चढ़ाण नै राज्जी होए अर जिब्बे वा किस्ती उस जगहां पै जा पोहची जड़ै वे जाण लागरे थे।

ⓂⓂⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂⓂⓂ

22 जो लोग गलील समुन्दर के उस पार रहगे थे, उननै दुसरे दिन देख्या के याड़े सिर्फ एक ए किस्ती थी, अर यीशु अपणे चेल्यां गेल्या उस किस्ती पै कोनी चढ़या था, पर सिर्फ उसके चेल्ले एक्ले ए चले गए थे। 23 तिबिरियास नगर की कुछ किस्ती उस जगहां के धौरै आके रुकी, जड़ै प्रभु नै परमेसवर का धन्यवाद करके भीड़ ताहीं रोट्टी खुआई थी। 24 जब भीड़ नै देख्या के याड़े ना यीशु सै अर ना उसके चेल्ले, फेर वे भी छोट्टी-छोट्टी किस्तियाँ पै चढ़कै यीशु नै टोन्दे होए कफरनहूम नगर पोहचे।

ⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂⓂ

25 गलील समुन्दर के परली ओड़ जब वे उसतै मिले तो बोल्ले, “हे गुरु, तू याड़े कद आया?”

26 यीशु नै उन ताहीं जवाब दिया, “मै थारैताहीं साच्ची-साच कहूँ सूँ, थम मननै ज्यातै कोनी टोव्हो सो के थमनै अचम्भे के काम देखे, पर ज्यातै के थमनै पेट भरकै रोट्टी खाई थी।” 27 उस खाणे खात्तर मेहनत ना करो जो सड़ जावे सै, पर उस खाणे खात्तर जतन करो जो कदे खराब न्ही होंदा अर अनन्त जीवन देवे सै, मै माणस का बेट्टा यो खाणा थारै ताहीं देऊंगा, क्यूँके पिता परमेसवर नै मेरे ताहीं इसा करण का हक दिया सै।

28 वे उसतै बोल्ले, “परमेसवर के काम करण खात्तर हम के करा?”

29 यीशु नै उन ताहीं जवाब दिया, “परमेसवर चाहवै सै, के थम उसपै विश्वास करो, जिस ताहीं उसनै भेज्या सै।”

30 फेर वे उसतै बोल्ले, “फेर तू कौण सा निशान दिखावै सै के हम उसनै देखके तेरा विश्वास करा? तू कौण सा काम दिखावै सै? 31 म्हारै पूर्वजां नै जंगल-बियाबान म्ह मन्ना खाया, जिसा पवित्र शास्त्र म्ह लिख्या सै, ‘परमेसवर नै उन ताहीं खाण खात्तर सुगं तै रोट्टी देई।’”

32 यीशु नै उनतै कह्या, “मै थारे ताहीं साच्ची-साच कहूँ सूँ, के मूसा नबी नै थारे ताहीं वा रोट्टी सुगं तै कोनी दी, पर मेरा पिता थमनै सुगं तै असली रोट्टी देवै सै। 33 क्यूँके परमेसवर की रोट्टी वाए सै, जो सुगं तै उतरकै दुनिया के माणसां ताहीं जिन्दगी देवै सै।”

34 फेर यो सुणकै यीशु तै बिनती करी, “के हे परभु, वा रोट्टी हमनै सदा दिया कर।”

35 यीशु नै उनतै कह्या, “जीवन की रोट्टी मै सूँ: जो मेरे धौरै आवैगा, वो कदे भूखा कोनी रहवैगा, अर जो कोए मेरे पे विश्वास करैगा, वो कदे तिसाया कोनी होवैगा। 36 पर मन्नै थारे ताहीं पैहले तै कह्या था, के थमनै मेरैताहीं देख भी लिया सै, फेर भी विश्वास कोनी करदे। 37 वे सारे जो पिता नै मेरे ताहीं दिये सै, वे मेरे धौरै आवैगें, अर हर एक जो कोए मेरे धौरै आवैगा उसनै मै कदे भी कोनी छोड़ूँगा। 38 पर मै अपणी मर्जी कोनी पर अपणे भेजण आळे पिता की मर्जी पूरी करण खात्तर सुगं तै उतरया सूँ। 39 अर मेरे भेजण आळे की मर्जी या सै के जो किमे उसनै मेरे ताहीं दिया सै, उस म्ह तै मै किसे नै ना खोऊँ, पर उसनै आखर के दिनां म्ह दुबारे जिन्दा कर दूँ। 40 क्यूँके मेरे पिता की मर्जी या सै के जो कोए बेट्टे नै अपणा कै उसपै विश्वास करै, वो अनन्त जीवन पावे, अर मै उसनै आखरी के दिनां म्ह दुबारे जिन्दा करूँगा।”

41 इसपै यहूदी उसपै विरुद्धण लागगे, क्यूँके उसनै कह्या था, “जो रोट्टी सुगं तै उतरी, वा मै सूँ।”

42 अर वे बोल्ले, “के यो यीशु सै, यूसुफ का बेट्टा, जिसके माँ-बाप नै हम जाणां सां? फेर वो किस ढाळ कह सकै सै के मै सुगं तै उतरया सूँ?”

43 यीशु नै उन ताहीं जवाब दिया, “आप्स म्ह मतना विरुद्धाओ।” 44 कोए मेरे धौरै कोनी आ सकदा जिब ताहीं पिता, जिसनै मेरैताहीं भेज्या सै, उसनै खीच न्ही लेवै, अर मै उसनै आखर के दिनां म्ह फेर जिन्दा करूँगा। 45 नबियाँ के लेखां म्ह यो लिख्या सै: ‘वे सारे परमेसवर की ओड़ तै सिखाए होए होवेंगें।’ जिस किसे नै पिता तै सुण्या अर सिख्या सै, वो मेरे धौरै आवै सै। 46 किसे नै पिता ताहीं कोनी देख्या, सिवाए उसके, जो परमेसवर की ओड़ै तै सै, सिर्फ उससे नै पिता ताहीं देख्या सै। 47 मै थारेताहीं साच्ची-साच कहूँ सूँ, के जो कोए विश्वास करै सै, अनन्त जीवन उससे का सै। 48 जीवन की रोट्टी मै सूँ। 49 थारे पूर्वजां नै जंगल-बियाबान म्ह मन्ना खाया अर मरगे। 50 या वा रोट्टी सै जो सुगं तै उतरी सै, ताके माणस उस म्ह तै खावे अर ना मरे। 51 जीवन की रोट्टी जो सुगं तै उतरी सै, मै सूँ। जै कोए इस रोट्टी म्ह तै खावे, तो सारी हाण जिन्दा रहवैगा, अर जो रोट्टी मै दुनिया के जीवन खात्तर दियुँगा, वो मेरा माँस सै।

52 इसपै यहूदी न्यू कहके आप्स म्ह बहस करण लागगे, “यो माणस किस ढाळ हमनै अपणा माँस खाण नै दे सकै सै?”

53 यीशु नै उन ताहीं कह्या, “मै थारेताहीं साच्ची-साच कहूँ सूँ, के जिब ताहीं थम मुझ माणस के बेट्टे का माँस ना खाओ, अर मेरा लहू ना पियो, थारे म्ह जीवन कोनी। 54 जो मेरा माँस खावे अर मेरा लहू पीवे सै, अनन्त जीवन उससे का सै, अर आखरी के दिनां म्ह मै उसनै दुबारे जिन्दा कर दियुँगा। 55 क्यूँके मेरा माँस सच म्ह खाण की चीज सै, अर मेरा लहू सच म्ह पीण की चीज सै। 56 जो मेरा माँस खावे अर मेरा लहू पीवे सै वो मेरे म्ह डटया रहवै सै, अर मै उस म्ह। 57 जिसा जिन्दे पिता नै मेरैताहीं भेज्या सै, अर मै पिता के कारण जिन्दा सूँ, उससे ढाळ वो भी जो मन्नै खावैगा मेरे कारण जिन्दा रहवैगा। 58 जो रोट्टी सुगं तै उतरी सै याए सै, उस रोट्टी बरगी कोनी जो पूर्वजां नै खाई

अर मरगे, जो कोए या रोट्टी खावैगा, वो सदा ताहीं जिन्दा रहवैगा।” 59 ये बात उसनै कफरनहूम नगर कै एक आराधनालय म्ह उपदेश देन्दे बखत कही।

~~~~~

60 उसके चेल्यां म्ह तै घणखरा नै या सुणकै कह्या, “या सख्त शिक्षा सै, इसनै कौण सुण सकै सै?”

61 यीशु नै अपणे मन म्ह न्यू जाणकै के मेरे चेल्लें आप्स म्ह इस बात पै बिरडावै सै, उन ताहीं बुझया, “के इस बात तै थारे ताहीं ठेस लाग्गै सै?” 62 जै थम मुझ माणस कै बेट्टै नै जड़ै मै पैहल्या था, ओड़ैए उप्पर जान्दे देखोगे, तो के होगा? 63 आत्मा ए सै जो देह नै जीवन देवै सै, देह का कोए महत्व कोनी, जो वचन मन्नै थारैतै कह्ये सै, वे आत्मा सै, अर जीवन भी। 64 पर थारे म्ह तै किमे इसे सै जो विश्वास कोनी करदे। क्यूँके यीशु पैहल्या तै ए जाणै था के जो विश्वास न्ही करदे, वे कौण सै, अर कौण मेरै ताहीं पकड़वावैगा। 65 अर वो बोल्या, “ज्यांतै मन्नै थारे ताहीं कह्या था के जिव ताहीं किसे नै पिता की ओड़ तै यो वरदान ना मिलै तब ताहीं वो मेरै धोरै कोनी आ सकदा।”

~~~~~

66 इसपै उसके चेल्यां म्ह तै घणखरे उल्टे हटगे अर उसके बाद उसके गेल्या कोनी चाल्ले।

67 फेर यीशु नै उन बारहां चेल्यां तै कह्या, “के थम भी चले जाणां चाहो सो?”

68 शमौन पतरस नै उस ताहीं जवाब दिया, “हे प्रभु, हम किसकै धोरै जावां? अनन्त जीवन की बात तो तैरैए धोरै सै, 69 अर हमनै विश्वास करया अर जाणगे सै के परमेसवर का पवित्तर जन तूए सै।”

70 यीशु नै उन ताहीं जवाब दिया, “के मन्नै थम बारहां चेल्यां ताहीं कोन्या छाटचा? फेरभी थारे म्ह तै एक जन शैतान सै।” 71 यो उसने शमौन इस्करियोती के बेट्टे यहूदा कै बारै म्ह कह्या था, क्यूँके वोए जो बारहां चेल्यां म्ह तै एक था, उस ताहीं पकड़वाण म्ह था।

## 7

~~~~~

1 इन बात्तां के हो लेण के पाच्छै यीशु गलील परदेस म्ह सफर करण लागया, वो यहूदिया परदेस म्ह जाणा कोनी चाहवै था, क्यूँके यहूदी लोग उस ताहीं मारण की ताक म्ह थे। 2 यहूदियां का झोपड़ियां का त्यौहार लोवै था। 3 ज्यांतै उसके भाईयां नै उस ताहीं कह्या, “थाड़ै तै यहूदिया परदेस नै जा, ताके जो काम तू करै सै उननै तेरे चेल्लें ओड़ै भी देखै। 4 क्यूँके इसा कोए न्ही होगा जो मशहुर होणा चाहवै, अर लुहक के काम करै। जै तू यो काम करै सै, तो खुद नै दुनिया म्ह साबित कर।” 5 क्यूँके उसके भाई भी उसपै विश्वास कोनी करै थे। 6 फेर यीशु नै उनतै कह्या, “मेरे खात्तर इब्बै सही बखत कोनी आया, पर थारे खात्तर सारा बखत सही सै। 7 दुनिया थारे तै बैर कोनी कर सकदी, पर वा मेरै तै बैर करै सै क्यूँके मै उसके बिरोध म्ह या गवाही दियुं सूं के उसके काम भुन्डै सै। 8 थम त्यौहार म्ह जाओ, मै इब्बै इस त्यौहार म्ह कोनी जान्दा, क्यूँके इब्बै मेरा सही बखत कोनी आया।” 9 वो उनतै ये बात कहकै गलील परदेस म्ह रहग्या।

~~~~~

10 पर जिव उसके भाई त्यौहार म्ह जा लिए तो वो खुद भी, जाहिर म्ह न्ही पर मान्नो गुप्ती तै गया। 11 त्यौहार म्ह कुछ यहूदी लोग यीशु ताहीं टोहन्दे होए पूछताछ करण लागरे थे, “के वो कड़ै सै?” 12 फेर भी यीशु के वोरें म्ह बड़ी बहस होण लागरी थी, कई माणस कहवै थे, “के वो भला माणस सै।” अर कईयां का कहणा था, “के ना, वो माणसां नै बहकावै सै।” 13 फेर भी यहूदियां के डरकै मारे कोए भी माणस यीशु के बारै म्ह खुलकै कोनी बोल्तै था।

~~~~~

14 जिव त्यौहार के आब्धे दिन बीतगे, फेर यीशु मन्दर म्ह जाके उपदेश देण लागग्या। 15 फेर यहूदियां नै हैरान होके कह्या, “इसनै बिना पढ़े ज्ञान किस तरियां आ गया?” 16 यीशु नै उन ताहीं

जवाब दिया, “जो उपदेश मैं देऊँ सું, मेरा अपना कोनी, पर उसतै आवै सै जिसनै मेरे ताहीं भेज्या सै। 17 जै कोए माणस उसकी मर्जी पै चाल्लण का पूरण करै, तो उस ताहीं यो बेरा लाग ज्यागा, के यो उपदेश परमेश्वर की ओड़ तै सै, या मैं अपना ओड़ तै देऊँ सું। 18 जो अपना ओड़ तै कुछ कहवै सै, वो खुद की बड़ाई चाहवै सै, पर जो अपना भेजण आळे की बड़ाई चाहवै सै वोए साच्चा सै, अर उस म्ह अधर्म कोनी। 19 के मूसा नबी नै थारैताहीं नियम-कायदे कोनी दिये? फेरभी थारैम्ह तै कोए नियम-कायदा पै कोनी चाल्दा। थम मन्नै क्यातै मारणा चाहो सो?” 20 माणसां नै जवाब दिया, “तेरे म्ह ओपरी आत्मा सै! कौण तन्नै मारणा चाहवै सै?” 21 यीशु नै उन ताहीं जवाब दिया, “मन्नै आराम कै दिन एक चमत्कार करया, अर थम सारे छो म्ह होगे। 22 इस्से खात्तर मूसा नबी नै थारैताहीं खतने का नियम दिया था (यो नियम मूसा नबी का न्ही था बल्के या थारे पूर्वजां तै ए लाग लागरी सै) अर थम आराम कै दिन माणस का खतना करो सो। 23 जब आराम कै दिन माणस का खतना करया जावै सै ताके मूसा नबी कै नियम-कायदा का हुकम न्ही टळे। फेर थम मेरे पै क्यातै छो करो सो के मन्नै आराम कै दिन एक माणस ताहीं पूरी तरियां ठीक करया। 24 मुँह देख्या न्याय मतना करो, पर सही-सही न्याय करो।”

२२ २२२२ २ २२२२ २२

25 फेर यरुशलम म्ह रहण आळे माणसां म्ह तै कईयां नै कह्या, “के यो वोए कोनी जिस ताहीं यहूदी अगुवें मार देणा चाहवै सै?” 26 पर लखाओ, “वो तो सरैआम बात करै सै अर कोए उसतै किमे कोनी कहन्दा। के यो न्ही हो सकता के यहूदी अगुवां नै साच्ये बेरा पाटग्या सै, के योए मसीह सै? 27 इसके बारे म्ह हमनै बेरा सै यो कितका सै, पर मसीह जब आवैगा तो कोए कोनी जाणै के वो कितका सै।” 28 फेर यीशु नै मन्दर म्ह उपदेश देन्दे होए रुक्का मारकै कह्या, “थम मन्नै जाणो सो, अर न्यू भी जाणो सो के मैं कित तै आया सूं। मैं तो खुद कोनी आया, पर मेरा भेजण आळा साच्चा सै, उसनै थम कोनी जाणदे। 29 पर मैं उसनै जाणु सूं, क्यूँके मैं उसके कान्ही तै आया सूं, अर उससे नै मेरे ताहीं भेज्या सै।” 30 यो सुणके यहूदी अगुवां नै यीशु ताहीं पकड़णा चाह्या, फेरभी किसे नै उसके हाथ कोनी लाया, क्यूँके उसके मरण का सही बखत इब्बे कोनी आया था। 31 फेर भी भीड़ म्ह तै घणखरे माणसां नै उसपै बिश्वास करया, अर बोल्ले, “मसीह जब आवैगा तो के इसतै घणे अचम्भे के काम दिखावैगा जो इसनै दिखाए?”

२२२२ २२२२ २२२२ २२ २२२२ २२

32 फरीसियां नै भीड़ म्ह माणस ताहीं यीशु के बारे म्ह चुपके-चुपके बात करते सुण्या, तो प्रधान याजक अर फरीसियां नै यीशु ताहीं पकड़ण खात्तर मन्दर के सिपाहियां ताहीं भेज्या। 33 मसीह यीशु बोल्या, “मैं थोड़ी बार ताहीं थारे गेल्या सूं, फेर अपना भेजण आळे धारै उल्टा चल्या जाऊंगा। 34 थम मन्नै टोहओगे, पर कोनी पाओगे, अर जड़ै मैं सूं, ओड़ै थम कोनी आ सकदे।” 35 इसपै यहूदी अगुवां नै आप्स म्ह कह्या, “यो कित जावैगा, के हम इसनै कोनी टोह सकदे? के यो जो यूनानी परदेशियां म्ह तो बसणा न्ही चाहन्दा, ताके यूनानियां ताहीं भी उपदेश दे? 36 इसकी इस बात का के मतलब सै? जो उसनै बोल्ली सै, के थम मन्नै टोहओगे, पर कोनी पाओगे, अर जड़ै मैं सूं, ओड़ै थम न्ही आ सकदे।”

२२२२-२२ २२ २२२२२२

37 त्योहार के आखरी दिन, जो खास दिन सै, यीशु खड्या होया अर रुक्का मारकै कह्या, “जै कोए तिसाया हो तो मेरे धारै आवै अर पीवै। 38 जो कोए मेरे पै बिश्वास करैगा, जिसा पवित्र ग्रन्थ म्ह लिख्या सै, उसकी अंतरआत्मा म्ह तै जीवन के जल की नदियां बह लिकड़ैगी, जो अनन्त जिन्दगी देवै सै।” 39 यीशु नै यो वचन पवित्र आत्मा के बारे म्ह कह्या, जो बिश्वास करण आळा नै मिलण आळी थी, क्यूँके इब ताहीं पवित्र आत्मा कोनी उतरया था, क्यूँके यीशु इब ताहीं अपना महिमा म्ह कोनी पोहचया था। 40 फेर भीड़ म्ह तै कईयां नै या बात सुणके कह्या, “साच्ये योए वो नबी सै, जिसके आण की हम आस देक्वां थे।” 41 अर कईयां नै कह्या, “यो मसीह सै” पर कई बोल्ले, “मसीह

गलील परदेस तै तो न्ही आवैगा?" 42 पवित्र ग्रन्थ यो कहवै सै, के मसीह दाऊद की पीढ़ी तै अर बैतलहम नगर तै आवैगा, जइँ दाऊद रहवै था? 43 आखर म्ह उसके कारण माणसां म्ह फूट पड़ी। 44 उन म्ह तै कई उस ताहीं पकड़णा चाहवै थे, पर किसे नै उसके हाथ कोनी लाया।

~~~~~

45 फेर सिपाही, प्रधान याजकां अर फरीसियाँ के धोरै बोहड़ आए, उननै उन ताहीं कह्या, "थम उसनै क्यातै न्ही ल्याए?" 46 सिपाहियाँ नै जवाब दिया, "इसी बात बताण आळा माणस हमनै आज ताहीं कदे भी कोनी मिल्या।" 47 फरीसियाँ नै उन ताहीं जवाब दिया, "के थम भी भळोई म्ह आगै? 48 के सरदारां या फरीसियाँ म्ह तै किसे नै भी उसपै विश्वास करया सै? 49 पर ये माणस जो मूसा नबी के नियम-कायदे कोनी जाणदे, परमेसवर की ओड़ तै सरापित सै।" 50 नीकुदेमुस जो उन म्ह तै एक था, वो मसीह यीशु तै पैहल्या मिल चुका था, उन ताहीं बोल्या, 51 "के म्हारे नियम-कायदे किसे माणस नै, जिब ताहीं पैहल्या उसकी सुणकै जाण ना लेवै, के वो के करै सै, कसरवार मान्नै सै?" 52 उननै नीकुदेमुस ताहीं जवाब दिया, "तू भी गलील परदेस का सै? पवित्र ग्रन्थ म्ह ढूँढ़ अर देख के गलील परदेस तै कोए नबी कोनी आवै।" 53 फेर सारे अपणे-अपणे घरां चले गए।

## 8

~~~~~

1 यीशु अपणे चेल्यां के गैल जैतून के पहाड़ पै गया।

2 तइँकेए आगले दिन यीशु फेर मन्दर म्ह आया। भोत सारे माणस उसके धोरै आए अर वो बैठके उननै उपदेश देण लागया। 3 जिब वो बोलण लागरया था, तो जिब्बे शास्त्री अर फरीसी एक बिरबान्नी नै ल्याए, जो जारी करते होए रंगे हाथ पकड़ी गयी थी, अर उस ताहीं माणसां के स्याम्ही खड्या कर दिया, अर यीशु ताहीं कह्या, 4 "हे गुरु, या बिरबान्नी जारी कर दी रंगे हाथ पकड़ी गयी सै। 5 मूसा नबी के नियम-कायदा म्ह उसनै म्हारे ताहीं हुकम दिया सै, के इसी बिरबान्नी नै पत्थर बरसा के मार द्यो। पर तू इस बिरबान्नी के बारे म्ह के कहवै सै?" 6 उननै यीशु ताहीं परखण खात्तर या बात कही, ताके उस म्ह खोट लिकाड़ण का कोए सुराग मिले जावै। पर यीशु कोड्डा होके आन्वाळी तै धरती पै लिखण लागया। 7 जिब वे बार-बार उसतै सवाल करते रहे, तो फेर उसनै सीध्था होके उन ताहीं कह्या, "थारे म्ह जिसनै भी कोए पाप न्ही करया हो, वोए उसके सबतै पैहला पत्थर मारै।" 8 फेर यीशु कोड्डा होके आन्वाळी तै धरती पै लिखण लागया।

9 जिब माणसां नै यो सुण्या तो सबतै पैहले बूढ़े माणस अर फेर एक-एक करके ओड़ै तै खिसकण लागगे, क्यूँके वे सब जाणे थे, के हम सब पापी सां, अर सिर्फ यीशु अर वा बिरबान्नी ओड़ै रहगे। 10 यीशु खड्या होया अर उस बिरबान्नी ताहीं कह्या, "हे नारी, वे कित्त गए? के किस्से नै तेरे ताहीं दण्ड न्ही दिया?"

11 वा बोल्ली, "हे परभु, किसे नै न्ही।" यीशु बोल्या, "मै भी तेरे ताहीं दण्ड न्ही देऊंगा, जा, अर दुबारा कदे पाप ना करिए।"

~~~~~

12 मन्दर म्ह अपणे उपदेश नै दुबारे शरु करदे होए यीशु नै माणसां तै कह्या, "दुनिया का चाँदणा मै सूं, जो कोए मेरे पाच्छे, चाल्लैगा, वो अन्धेरे म्ह कदे कोनी चाल्लैगा, पर वो चाँदणा पावैगा जो अनन्त जीवन देवै सै।" 13 फरीसियाँ नै उस ताहीं कह्या, "तू अपणी गवाही खुद देवै सै, इस खात्तर तेरी गवाही साच्ची कोनी।"

14 यीशु नै उन ताहीं जवाब दिया, "भलाए मै अपणी गवाही खुद देऊँ सूं, फेर भी मेरी गवाही मान्नी जावैगी, क्यूँके मै जाणु सूं, के मै कित्त तै आया सूं, अर कितोड़ जाऊँ सूं? पर थम कोनी जाणदे के मै कित्त तै आऊँ सूं, या कितोड़ जाऊँ सूं। 15 थम मानवीय सोच तै, न्याय करो सो, मै किसे का न्याय कोनी करदा। 16 जै मै न्याय करूँ भी तो वो सही ए होगा, क्यूँके मै एकला कोनी, पर

परम पिता, जिसने मेरे ताहीं भेज्या सै, वो अर मै दोन्नु मिलके न्याय करा सां।<sup>17</sup> थारे मूसा नबी के नियम-कायदा म्ह भी लिख्या सै, के दो जण्यां की गवाही सच के रूप म्ह मानी जा सकै सै।<sup>18</sup> एक तो मै खुद अपनी गवाही दियुं सूं, अर दुसरा मेरा पिता मेरी गवाही देवै सै, जिसने मेरै ताहीं भेज्या।”

<sup>19</sup> उननै उस ताहीं कह्या, “तेरा पिता कित्त सै?” यीशु नै जवाब दिया, “ना थम मन्ने जाणो सो, ना मेरै पिता नै, जै मन्ने जाणदे तै मेरै पिता नै भी जाणदे।”<sup>20</sup> यीशु नै ये वचन मन्दर म्ह उपदेश देन्दे होए भण्डार घर म्ह बोल्ली, अर किसे नै उस ताहीं कोनी पकड्या, क्यूँके उसके दुख टाण का अर मरण का बखत इब ताहीं कोनी आया था।

**२०२० २०२० २०२० २०२० २० २०२**

<sup>21</sup> यीशु नै फेर उन ताहीं कह्या, “मै जाऊं सूं, अर थम मन्ने टोहओगे, अर अपने पाप म्ह मरोगे। जडै मै जाऊं सूं, ओडै थम न्ही आ सकदे।”

<sup>22</sup> इसपै यहूदी अगुवां नै कह्या, “के वो खुद नै मार देवैगा, जो कहवै सै, ‘जडै मै जाऊं सूं, ओडै थम न्ही आ सकदे?’”

<sup>23</sup> यीशु नै उन ताहीं कह्या, “थम इस दुनिया म्ह पैदा होए सों, अर मै सुर्ग तै आया सूं। थम इस दुनिया के सो, मै इस दुनिया का कोनी।<sup>24</sup> ज्यांतै मन्ने थारे ताहीं कह्या के थम अपने पापां म्ह मरोगे, जै थारा मेरे म्ह विश्वास कोनी के मै कौण सूं, तो थम मरोगे, अर थारे पाप माफ कोनी होंगे।”

<sup>25</sup> यहूदी अगुवां नै यीशु ताहीं कह्या, “के तू कौण सै?” वो उनतै बोल्या, जिब तै मन्ने प्रचार करणा शुरु करया सै, तब तै मै थमने कहन्दा आया सूं, “के मै कौण सूं?”<sup>26</sup> “थारे बारे म्ह कहण खात्तर अर फैसला करण खात्तर मेरे धोरै भोत कुछ सै, पर सच्चाई याए सै के जिसने मेरे ताहीं भेज्या सै, मै वोए कहूँ सूं, जो मन्ने उसतै सुण्या सै, वोए दुनिया के माणसां तै कहूँ सूं।”

<sup>27</sup> वे न्यू न्ही समझै के म्हारै तै, पिता कै बारे म्ह कहवै सै।<sup>28</sup> फेर यीशु बोल्या, “जिब थम मुझ माणस कै बेट्टे नै ऊँच पै चढाओगे, जिब जाणोगे के मै वोए सूं। मै खुद तै किमे कोनी करदा, पर जिस तरियां मेरै पिता नै, मेरै ताहीं सिखाया सै, उससे ढाळ ये बात कहूँ सूं।<sup>29</sup> मेरा भेजण आळा मेरै गेल्या सै, उसने मेरै ताहीं एक्ला कोनी छोड्या क्यूँके मै सारी हाण वैए काम करूँ सूं, जिसतै वो राज्जी होवै सै।”<sup>30</sup> वो ये बात कहणे लागरया था, के घणखरयां नै उसपै विश्वास करया।

**२० २०२० २०२० २०२० २०२०**


<sup>31</sup> फेर यीशु नै उन यहूदियां तै जिन नै उसपै विश्वास करया था, बोल्या, “जै थम मेरै वचन म्ह बणे रहोगे, तो साच-ए मेरे चल्ले ठहरोगे।”<sup>32</sup> थम सच नै जाणोगे अर सच थमनै आजाद करैगा।

<sup>33</sup> उननै उस ताहीं जवाब दिया, “हम तो अब्राहम के वंशज सा, कदे किसे के गुलाम कोनी बणे। फेर तू किस तरियां कहवै सै, के थम आजाद हो जाओगे?”

<sup>34</sup> यीशु नै उन ताहीं जवाब दिया, “मै थारै तै साच्ची-साच कहूँ सूं, के जो कोए पाप करै सै, वो पाप का गुलाम सै।<sup>35</sup> गुलाम सारी हाण घर म्ह कोनी रहन्दा, बेट्टा सारी हाण घरां रहवै सै।<sup>36</sup> ज्यांतै जै बेट्टा थमनै आजाद करैगा, तो साच्चे थम आजाद हो जाओगे।<sup>37</sup> मै जाणु सूं, के थम अब्राहम के वंश के सो, फेर भी थम मेरे वचनां नै कोनी मानते, ज्यांतै थम मन्ने मारणा चाहो सो।<sup>38</sup> मै वोए कहूँ सूं, जो मेरे पिता नै मेरे ताहीं सिखाया सै, अर थम वोए करो सों, जो थमनै अपने पिता तै सुण्या सै।”

<sup>39</sup> उननै उस ताहीं जवाब दिया, “म्हारा पूर्वज तो अब्राहम सै।” यीशु उनतै बोल्या, “जै थम अब्राहम के वंशज होन्दे, तो अब्राहम जिसे काम करदे।<sup>40</sup> पर इब थम मेरै ताहीं मारणा चाहो सो, जिसने थारे ताहीं वो साच्चा वचन बताया जो परमेसवर तै सुण्या, इस तरियां तो अब्राहम नै कोनी करया था।<sup>41</sup> थम अपने पिता के जिसे काम करो सो।” उननै यीशु ताहीं कह्या, “हम जारी तै कोनी जणे, म्हारा एक ए पिता सै यानिके परमेसवर।”

42 यीशु उनतै बोल्या, “जै परमेसवर थारा पिता होन्दा, तो थम मेरै तै प्यार करदे, क्यूँके मै परमेसवर की ओड़ तै आया सूँ। मै खुद कोनी आया, पर उस्से नै मेरै ताहीं भेज्या। 43 थम मेरी बात क्यातै न्ही समझदे? ज्यातै के थम मेरे वचनां नै अपणादे कोनी। 44 थम अपणे पिता शैतान की ओड़ तै सो, अर अपणे पिता की मर्जी पूरी करणा चाहो सो। वो तो शरू तै ए खुन्नी सै, अर सच पै टिक्या ए कोनी रह्या, क्यूँके सच उस म्ह सै ए कोनी। जिब वो झूठ बोल्लै सै, तो अपणे सुभाव तै ए बोल्लै सै, क्यूँके वो झूठठा सै बल्के झूठ का बाप सै। 45 पर मै जो सच बोल्लू सूँ, इस्से करके थम मेरा बिश्वास कोनी करदे। 46 थारे म्ह तै कौण मन्नै पापी ठैहरावै सै? जै मै सच बोल्लू सूँ, तो थम मेरा बिश्वास क्यातै न्ही करदे? 47 जो परमेसवर कान्ही तै होवै सै, वो परमेसवर की बात सुणै सै, अर थम ज्यातै कोनी सुणदे के परमेसवर की ओड़ तै कोनी सो।”



48 न्यू सुण यहूदियाँ ने उस ताहीं कह्या, “के हम ठीक कोनी कहन्दे के तू सामरी सै, अर तेरे म्ह भुन्डी ओपरी आत्मा सै?”

49 यीशु नै जवाब दिया, “मेरै म्ह भुन्डी ओपरी आत्मा कोनी,” पर मै अपणे बाप की इज्जत करूँ सूँ, अर थम मेरी बेजती करो सो। 50 पर मै अपणा मान-सम्मान कोनी चाहन्दा, हाँ, एक सै जो चाहवै सै, अर न्याय करण आळा सै। 51 मै थमनै साच्ची-साच कहूँ सूँ, “के जै कोए माणस मेरे वचनां नै मान्नागा, तो वो अनन्त काल ताहीं कोनी मरै।”

52 यहूदियाँ नै उस ताहीं कह्या, “इब हम जाणगे के तेरे म्ह भुन्डी ओपरी आत्मा सै। अब्राहम मरग्या अर नबी भी मरग्ये सै, अर तू कहवै सै, ‘जै कोए मेरे वचनां नै मान्नागा, तो वो अनन्त काल ताहीं कोनी मरै।’ 53 म्हारा पूर्वज अब्राहम तो मरग्या। के तू उसतै भी बड्डा सै? अर नबी भी मरग्ये। तू अपणे-आपनै के मान्ना सै?”

54 यीशु नै जवाब दिया, “जै मै खुद अपणी महिमा करूँ, तो मेरी महिमा किमे कोनी। पर मेरी महिमा करण आळा मेरा पिता सै, जिसने थम कहाँ सो के वो थारा परमेसवर सै। 55 थमनै तो उस ताहीं कोनी जाण्वा, पर मै उस ताहीं जाणु सूँ। जै मै कहुँ के मै उस ताहीं कोनी जाण्वा, तो मै थारी ढाळ झूठठा ठहरेगा, पर मै उस ताहीं जाणु अर उसके वचनां नै मान्नु सूँ। 56 थारा पूर्वज अब्राहम मेरा दिन देखखण की आस म्ह घणा मगन था, अर उसनै देख्या अर आनन्द करया।”

57 यहूदियाँ नै उस ताहीं कह्या, “इब ताहीं तू पचास साल का कोनी, फेरभी तन्नै अब्राहम ताहीं देख्या सै?”

58 यीशु उनतै बोल्या, “मै थमनै साच्ची-साच कहूँ सूँ, के पैहल्या इसके के अब्राहम पैदा होया, मै सूँ।” 59 या बात सुणके माणसां नै यीशु ताहीं मारण खात्तर पत्थर टाए, पर यीशु लुहकके मन्दर तै लिकड़ गया।

## 9



1 ओड़ तै जान्दे होए राह म्ह एक यीशु ताहीं जन्म तै आन्धा एक माणस मिला। 2 उसके चेल्यां नै उसतै बुद्धिया, “हे गुरु, किसनै पाप करया था के यो आन्धा पैदा होया, इस माणस नै या इसके माँ-बाप नै?”

3 यीशु नै जवाब दिया, “ना तो इसनै पाप करया था, ना इसके माँ-बाप नै पाप करया, पर यो ज्यातै आन्धा पैदा होया ताके परमेसवर की शक्ति दिखाई जा सकै। 4 जिसनै मेरै ताहीं भेज्या सै, हमनै उसके काम दिन-ए-दिन म्ह करणा जरूरी सै। वा रात आण आळी सै, जिस म्ह कोए माणस काम न्ही कर पावैगा। 5 जिब ताहीं मै दुनिया म्ह सूँ, जद ताहीं दुनिया का चान्दणा सूँ।”





28 फेर वे उसतै आच्छा-भुन्डा कहकै बोल्ले, “तूए उसका चेल्ला सै, हम तो मूसा नबी के चेल्लें सां। 29 हम जाणा सां, के परमेशवर नै मूसा नबी तै बात करी, पर इस माणस नै कोनी जाणदे के कड़े तै आया सै।”

30 उसनै उन ताहीं जवाब दिया, “या तो अचम्भे की बात सै, के थम न्ही जाणदे के वो कित्त का सै, फेर भी उसनै मेरी आँखां की रोशनी दे दी। 31 हम जाणां सां, के परमेशवर पापियाँ की कोनी सुणदा, पर जै कोए परमेशवर का भगत हो अर उसकी मर्जी पै चाल्दा हो, तो वो उसकी जरूर सुणै सै। 32 दुनिया के शरुआत तै यो कदे सुणने म्ह कोनी आया, के किसे नै जन्म तै आन्धे की आँखां की रोशनी दी हो। 33 जै यो माणस परमेशवर के कान्ही तै न्ही होन्दा, तो किमे भी कोनी कर सकदा।”

34 उननै उस ताहीं जवाब दिया, “तू तो जमाए पापां म्ह जन्मा सै, तू हमनै के सिखावै सै?” अर उननै उस ताहीं आराधनालय तै बाहरणै लिकाइ दिया।

### ??????

35 यीशु नै सुण्या के उननै उस ताहीं बाहरणै लिकाइ दिया सै, अर जिब उसतै मिल्या तो बोल्या, “के तू परमेशवर के बेट्टे पै विश्वास करै सै?”

36 उसनै जवाब दिया, “हे जनाब, परमेशवर का बेट्टा कौण सै, के मै उसपै विश्वास करूँ?”

37 यीशु नै उस ताहीं कह्या, “तन्नै उस ताहीं देख्या भी सै, अर जो तेरे गेल्या बात करण लाग रह्या सै, वो मै ए सूं।”

38 उसनै कह्या, “हे प्रभु, मै तेरे पै विश्वास करूँ सूं।” अर उस ताहीं मोध्या पड़कै प्रणाम करया।

39 फेर यीशु बोल्या, “मै इस दुनिया म्ह न्याय खात्तर आया सूं, ताके जो आन्धे सै, वे देखवै, अर जो देखवै सै, वे आन्धे हो जावै।”

40 जो फरीसी उसके गेल्या थे, उननै या बात सुणके उस ताहीं कह्या, “के हम भी आन्धे सां?”

41 यीशु नै उन ताहीं कह्या, “जै थम आन्धे होन्दे तो पापी कोनी होते, पर इब जिसा के थम कहो सो, के थम देखवों सो, तो सच म्ह थारा पाप माफ न्ही हो सकदा।”

## 10

### ??????

1 यीशु नै कह्या, “मै थारै ताहीं साच्ची-साच कहूँ सूं, के जो कोए भेड्या के बाड़े म्ह दरबाजे तै न्ही आन्दा, बल्के बाड़ा कूदके बड़े सै, वो चोर अर डाकू सै। 2 पर जो दरबाजे तै भीत्तर बड़े सै वो भेड्डां का पाळी सै। 3 उस खात्तर द्वारपाल दरबाजा खोल देवै सै, अर भेड्डां उसका बोल सुणै सै, अर वो अपनी उन भेड्डां नै नाम ले-लेके बुलावै सै, अर बाड़े तै बाहरणै ले जावै सै। 4 जिब वो अपनी सारी भेड्डां नै बाहरणै काढ लेवै सै, तो उनके आगै-आगै चाल्लै सै, अर भेड्डां उसके गैल-गैल हो ले सै, क्यूँके वे उसका बोल पिच्छाणै सै। 5 पर भेड्डां बिगान्ने के गेल्या कोनी चाल्लै, पर उसतै भाज्जैगी, क्यूँके वे बिगान्ने का बोल कोनी पिच्छाणदी।” 6 यीशु नै उन ताहीं यो उदाहरण देके कह्या, पर वे कोनी समझे के वो उनतै के समझणा चाहवै।

### ????

7 फेर यीशु नै उन ताहीं दुबारै कह्या, “मै थारै ताहीं साच्ची-साच कहूँ सूं, भेड्डां का दरबाजा मै सूं। 8 जितने मेरै तै पैहल्या आए वे सारे चोर अर डाकू सै, पर मेरी भेड्डां नै उनकी एक न्ही सुणी। 9 दरबाजा मै सूं, जै कोए मेरै जरिये भीत्तर बड़े सै, तो वो उद्धार पावैगा, अर भीत्तर बाहर आण-जाण लाग ज्यागा अर खाण खात्तर खाणा पावैगा।” 10 चोर किसे और काम खात्तर कोनी पर सिर्फ चोरी करण अर घात करण अर नुकसान करण नै आवै सै, मै ज्याते आया के वे जिन्दगी पावे अर भोत-ए घणी पावै।

11 आच्छा पाळी मै सूं, आच्छा पाळी भेड्डां के खात्तर अपनी मर्जी तै जान देवै सै। 12 मजदूर जो ना पाळी सै अर ना भेड्डां का मालिक सै, भेड्डे नै आन्दे देखके भेड्डां नै छोड़के भाज जावै

सै, अर भेड़िया उननै पकड़े सै, अर उनपै हमला करै देवै सै। 13 वो ज्यातै भाज जावै सै क्यूके वो मजदूर सै, उसनै भेड़ों की फिक्र कोनी।

14 “काम्मल चरवाहा मै सूं, मै अपनी भेड़ों नै जाणुं सूं, अर मेरी भेड़ मन्नै जाणै सै। 15 जिस ढाळ पिता मन्नै जाणै सै, अर मै पिता नै जाणुं सूं, अर मै अपनी भेड़ों खात्तर अपनी जान दियुं सूं। 16 मेरी और भी भेड़ सै, जो इस बाड़े की कोनी। मन्नै उन ताहीं भी ल्याणा जरूरी सै। वे मेरा बोल पिच्छाणैगी, फेर एकैए रेवड़ अर एकैए पाळी होगा। 17 पिता ज्यातै मेरै तै प्यार करै सै, क्यूके मै अपनी जान अपनी मर्जी तै दियुं सूं, के उसनै दुबारे ले लूं। 18 कोए मेरी जान मेरै तै खोसदा कोनी, बल्के मै उसनै खुदे उसनै अपनी मर्जी तै दियुं सूं। मन्नै उसके देण का भी हक सै, अर उस ताहीं दुबारा लेण का भी हक सै, यो हुकम मेरै पिता नै मेरै ताहीं दिया सै।”

19 इन बातों के कारण यहूदियाँ म्ह दुबारे फूट पड़ी। 20 उन म्ह तै घणखरे माणस कहण लागगे, “उस म्ह ओपरी आत्मा सै, अर वो बावळा सै, उसकी क्यातै सुणो सो?”

21 दुसरे माणसां नै कह्या, “ये वचन इसे माणस की न्ही हो सकदे, जिसम्ह ओपरी आत्मा हो। के ओपरी आत्मा आन्धयां नै आँखां की रोशनी दे सके सै?”

### \*\*\*\*\*

22 यरुशलेम नगर म्ह स्थापन का त्यौहार मनाया जा रया था, अर जाडचां का मौसम था। 23 यीशु मन्दर म्ह सुलैमान के बराम्दा म्ह हान्डण लागरया था। 24 फेर यहूदियाँ नै उस ताहीं आ घेरया अर बुझ्झया, “तू म्हारै मन नै कद ताहीं दुबिध्या म्ह गेरे राक्खैगा? जै तू मसीह सै, तो म्हारै तै साफ-साफ बता दे।”

25 यीशु नै उन ताहीं जवाब दिया, “मन्नै थारैतै कह दिया पर थम विश्वास करदेए कोनी। जो काम मै अपणे पिता के नाम तै करूं सूं, वैए मेरे गवाह सै, 26 पर थम ज्यातै विश्वास कोनी करदे क्यूके थम मेरी भेड़ों म्ह तै कोनी सो। 27 मेरी भेड़ मेरा बोल पिच्छाणै सै, मै उननै जाणुं सूं, अर वे मेरे पाच्छे-पाच्छे चाल्लै सै 28 अर मै उन ताहीं अनन्त जीवन दियुं सूं। वे कदे नाश कोनी होवैगी, अर कोए उननै मेरै हाथ तै खोस न्ही सकदा। 29 मेरा पिता, जिसनै उन ताहीं मेरै तै दिया सै, सारया तै बड़डा सै, अर कोए उननै पिता के हाथ्यां तै खोस कोनी सकदा। 30 मै अर पिता एक सां।”

31 यहूदियाँ नै यीशु पै मारण खात्तर दुबारा पत्थर टा लिये। 32 इसपै यीशु नै उन ताहीं कह्या, “मन्नै थारै तै अपणे पिता की ओड़ तै घणे भले काम दिखाए सै, उन म्ह तै कौण सै काम खात्तर थम मेरै पै पत्थर मारणा चाहो सो?”

33 यहूदियाँ नै उस ताहीं जवाब दिया, “भले काम खात्तर हम तेरे पै पत्थर कोनी मारदे, पर परमेसवर की बुराई करण के कारण, अर ज्यातै के तू माणस होके खुद नै परमेसवर कहवै सै।”

34 यीशु नै उन ताहीं जवाब दिया, “के थारे मूसा नबी के नियम-कायदा म्ह कोनी लिख्या सै, ‘मन्नै कह्या, थम ईश्वर सो?’ 35 जै उसनै उन ताहीं ईश्वर कह्या, जिनके धोरै परमेसवर का वचन पाँहच्या (अर पवित्र ग्रन्थ की बात झूठ न्ही हो सकदी), 36 तो जिस ताहीं पिता नै पवित्र ठहराके दुनिया म्ह भेज्या सै, थम मेरे ताहीं कहो सो, ‘तू बुराई करै सै, ज्यातै के मन्नै यो कह्या,’ ‘मै परमेसवर का बेटा सू?’ 37 जै मै अपणे पिता के काम कोनी करदा, तो मेरा विश्वास ना करो। 38 पर जै मै करूं सूं, तो चाहे मेरा विश्वास ना भी करो, पर उन काम्मां का तो विश्वास करो, ताके थम जाणो अर समझो के पिता मेरै म्ह सै अर मै पिता म्ह सूं।” 39 फेर यहूदियाँ नै दुबारे उस ताहीं पकड़ण की कोशिश करी पर वो उनके हाथ्यां तै लिंकड गया।

40 यीशु दुबारे यरदन नदी के परली ओड़ै उस जगहां पै चल्या गया, जडै यूहन्ना पैहल्या बपतिस्मा दिया करै था, अर वो ओड़ैए रहया। 41 घणखरे माणस उसके धोरै आके कहवै थे, “यूहन्ना नै तो कोए चमत्कार कोनी दिखाया, पर जो किमे यूहन्ना नै इसके बारे म्ह कह्या था, वो सारा कुछ साच्ची था।”

42 अर ओड़ै भोत-से माणसां नै यीशु पै विश्वास करया।

## 11



1 लाजर नामका एक माणस बीमार था, जो बैतनिय्याह गाम का था, अर उसकी दो भाण थी मरियम अर मार्था। 2 या वाए मरियम थी जिसनै बाद म्ह प्रभु पै खसबूदार तेल गेर कै उसके पायां ताहीं बाळां तै पुन्जयां था\*, लाजर इस्से का भाई था जो बीमार था। 3 इस करके उसकी भाणां नै यीशु ताहीं कुहवां भेज्या, “हे प्रभु, लखा, जिसतै तू प्यार करै सै, वो बीमार सै।”

4 न्यू सुणकै यीशु न्यू बोल्या, “या बीमारी मरण का कारण कोनी, पर परमेसवर की महिमा खात्तर सै, ताके उसके जरिये परमेसवर कै बेट्टै की महिमा होवै।” 5 मार्था उसकी बेब्बे अर लाजर तै यीशु प्यार करै था। 6 पर जिब उसनै सुण्या के लाजर बीमार सै, तो जिस जगहां पै वो था, ओडै दो दिन और रुक गया। 7 दो दिन बाद फेर उसनै चेल्यां ताहीं कह्या, “आओ, हम फेर यहूदिया परदेस म्ह चाल्लां।”

8 चेल्यां नै उस ताहीं कह्या, “हे गुरु, कुछ दिन पैहल्या तो यहूदी तेरे पै पत्थर बरसा कै तन्नै मारणा चाहवै थे, अर के तू फेर भी उडैए जाणा चाहवै सै?” 9 यीशु नै जवाब दिया, “के दिन के बारहा घन्टे कोनी होन्दे? जै कोए दिन म्ह चाल्लै तो ठोक्कर कोनी खान्दा, क्यूँके वे इस दुनिया के उजाळै नै देखै सै। 10 पर जै कोए रात म्ह चाल्लै तो ठोक्कर खावै सै, क्यूँके उस म्ह उजाळा कोनी।”

11 उसनै ये बात कही, अर इसके बाद उन ताहीं कहण लाग्या, “के म्हारा साथी लाजर सो गया सै, पर मै उसनै जगाण जाऊँ सूं।”

12 फेर चेल्यां नै उस ताहीं कह्या, “हे प्रभु, जै वो सो गया सै तो वो ठीक हो ज्यागा।” 13 यीशु नै तो उसकी मौत कै बाबत कह्या था, पर उननै सोच्या के उसनै नींद तै सोण कै बाबत कह्या सै।

14 फेर यीशु नै उन ताहीं साफ-साफ कह दिया, “लाजर मर लिया सै, 15यो थारे ए हित म्ह सै, के मै उडै कोनी था, क्यूँके इब थम मेरे पै बिश्वास कर सकोगे, आओ, हम उसके धोरै चाल्लां।”

16 फेर थोमा नै जो दिदुमुस कुह्वावै सै, अपने गेल्या के चेल्यां ताहीं कह्या, “आओ, हम भी प्रभु के गेल्या मरण नै चाल्लां।”



17 बैतनिय्याह गाम पोहचे पाच्छे, यीशु नै न्यू बेरया पाट्या के लाजर नै कबर म्ह धरे चार दिन हो लिए सै। 18 बैतनिय्याह गाम यरुशलेम कै धोरै कोए दो कोस† की दूरी पै था, 19 घणखरे यहूदी माणस मार्था अर मरियम कै धोरै उसके भाई की मौत कै बाबत दीलास्सा देण नै आरे थे। 20 जिब मार्था नै यीशु कै आण की खबर सुणी, तो मार्था उसतै मिलण खात्तर गई, पर मरियम घरा ए बेट्टी रही।


21 मार्था नै यीशु ताहीं कह्या, “हे प्रभु, जै तू आडै होंदा, तो मेरा भाई कदे नही मरदा। 22 अर इब भी मन्नै बेरा सै, जो कुछ तू परमेसवर तै माँगैगा, परमेसवर तन्नै देवैगा।”

23 यीशु नै उस ताहीं कह्या, “तेरा भाई जी ज्यागा।”

24 मार्था नै उस ताहीं कह्या, “मन्नै बेरा सै, के आखर के दिन म्ह पुनरुत्थान के बखत वो जी ज्यागा।”

25 यीशु नै मार्था तै कह्या, “पुनरुत्थान अर जीवन मै ए सूं, जो कोए मेरै पै बिश्वास करैगा, वो जै मर भी जावै फेर भी जिवैगा, 26 अर जो कोए जीवै सै, अर वो मेरै पै बिश्वास करै सै, वो अनन्त काल ताहीं कोनी मरैगा। के तू इस बात पै बिश्वास करै सै।”

27 मार्था नै यीशु तै कह्या, “हाँ, हे प्रभु, मै बिश्वास करूँ सूं, के परमेसवर का बेट्टा मसीह जो दुनिया म्ह आण आळा था, वो तूए सै।”



\* 11:2 11:2 12:1-8 † 11:18 11:18 तीन किलो. मी.

28 न्यू कहकै मार्था चली गयी, अर अपणी बेब्बे मरियम ताहीं एक्ले म्ह बुलाकै चुपके तै कह्या, “गुरु याडैए सै अर तन्नै बुलावै सै।” 29 न्यू सुण लिए मरियम जिब्बे उठकै उसके धोरे आई 30 यीशु इब्बे गाम तै बाहरे था, पर उससे जगहां था जडै मार्था उसतै मिली थी। 31 फेर जो यहूदी माणस उसके गेल्या घर म्ह थे अर उस ताहीं दीलास्सा देवै थे, न्यू देखकै के मरियम जिब्बे उठकै बारणै चली गयी सै, न्यू समझे के वा कबर पै रोण नै जावै सै, तो उसके पाच्छै हो लिये।

32 जब मरियम उडै गई जडै यीशु था, तो उसनै देखदे उसके पायां म्ह पडकै कह्या, “हे प्रभु, जै तू आडै होन्दा फेर मेरा भाई कोनी मरदा।”

33 जब यीशु नै जो यहूदी माणस उसके गेल्या आये थे, रोन्दे होए देख्या, तो आत्मा म्ह घणाए दुखी अर उदास होग्या,

34 अर कह्या, “थमनै उसकी लाश कित्त धर राक्खी सै?” उननै उस ताहीं कह्या, “हे प्रभु, चालकै देख ले।”

35 यीशु रोण लाग्या।

36 फेर यहूदी माणस कहण लागगे, “लखाओ, वो लाजर तै कितना प्यार करै था।”

37 पर उन म्ह तै कईयाँ नै कह्या, “के यो जिसनै आंथ्याँ ताहीं रोशनी दे दी, के यो लाजर ताहीं मरण तै न्ही बचा सकै था?”

**=====**

38 यीशु मन म्हए फेर घणाए दुखी होकै कबर पै आया। वा एक गुफा थी अर एक पत्थर उसपै धरया था। 39 यीशु नै कह्या, “पत्थर हटादो।” लाजर की बेब्बे मार्था उसतै कहण लागगी, “हे प्रभु, उस म्ह तै इब तो बदवू आवै सै, क्यूँके उसनै मरे चार दिन हो लिए सै।”

40 यीशु नै उन ताहीं कह्या, “के मन्नै तेरे तै कोनी कह्या था के जै तू बिश्वास करैगी, तो परमेसवर की महिमा नै देखैगी।” 41 फेर उननै पत्थर ताहीं हटाया। यीशु नै सुर्ग कान्ही निगांह ठाकै कह्या, “हे पिता, मै तेरा धन्यवाद करूँ सँ, के तन्नै मेरी सुण ली सै।” 42 अर मन्नै बेरा था के तू सारी हाण मेरी सुणै सै, पर जो भीड़ आसै-पासै खड़ी सै, उनकै बाबत मन्नै कह्या, ताके वे बिश्वास करै, के तन्नै मरैताहीं भेज्या सै।”

43 न्यू कहकै टाड्डू आवाज म्ह रुक्का मारया, “हे लाजर, लिंकड आ।” 44 जो मर लिया था उसके हाथ पैर पट्टियाँ तै बंधे हुए थे, अर उसके मुँह पै अंगोच्छा लिपटरया था। यीशु नै उन ताहीं कह्या, “उसनै खोलदो अर जाण द्यो।”

**=====**

(**=====** 26:1-5; **=====** 14:1-2; **=====** 22:1-2)

45 फेर जो यहूदी मरियम धोरे मिलण आरे थे, अर उसका यो चमत्कार देख्या था, उन म्ह तै घणखरयाँ नै उसपै बिश्वास करया। 46 पर उन म्ह तै कईयाँ नै फरीसियाँ धोरे जाके यीशु के काम्मां की खबर दी। 47 ज्यांतै प्रधान याजकां अर फरीसियाँ नै यहूदी अगुवां की सभा करी, अर कह्या, “हमनै के करणा चाहिये? यो माणस तो घणे चमत्कार दिखावै सै।” 48 जै हम उसनै न्यूए करण द्या, तो फेर सारे उसपै बिश्वास करैगें, अर रोमी सैनिक आकै म्हारे देश अर मन्दर दोनुवां पै कब्जा कर लैवैगें।”

49 फेर उन म्ह तै काइफा नामका एक माणस नै जो उस साल का महायाजक था, उन ताहीं कह्या, “थम किमे न्ही जाणदे! 50 अर ना ए थमनै इस बात की समझ सै, के इस्से म्ह धारा फायदा सै, के बजाये इसके के सारे माणस ए नाश हो जावै, सब खात्तर एक आदमी नै मरणा होगा।”

51 पर या बात उसनै अपणी ओड़ तै कोन्या कही, पर उस साल का महायाजक होण के नाते या भविष्यवाणी करी, के यीशु उस जात खात्तर मरैगा। 52 अर ना सिर्फ यहूदी जात खात्तर बल्के ज्यांतै के परमेसवर की खिंड-मिंड ऊलादां नै एक करदे। 53 इस तरियां उससे दिन तै यहूदी अगुवें उस ताहीं मरण खात्तर साजिस रचाण लागगे।

54 ज्यातै यीशु उस बखत तै यहूदी लोग्गं म्ह घाट दिक्खण लागग्या, अर यरुशलेम नगर नै छोड़के वो जंगल-बियाबान कै धौरै इफ्राईम नामक एक नगर कान्ही चल्या गया, अर अपणे चेल्यां गैल उड़ैए रहण लाग्या ।

55 यहूदियाँ का फसह का त्यौहार लोवै था, अर घणेए माणस फसह तै पैहल्या अपणे गाम्मां म्ह तै यरुशलेम नगर म्ह गए, के खुद नै पवित्र करै । 56 वे यीशु नै टोह्ल लागगे अर मन्दर म्ह खड़े होके आप्स म्ह बतलाण लागगे, “थम के सोचो सो? के वो त्यौहार म्ह कोनी आवैगा?” 57 अर प्रधान याजकां अर फरीसियाँ नै हुकम दे राख्या था, के जै कोए न्यू जाणै सै, के यीशु कित्त सै तो बतावै, ताके वे उसनै पकड़ ले ।

## 12

~~~~~

(~~~~~ 26:6-13; ~~~~ 14:3-9)

1 फेर यीशु फसह का त्यौहार तै छः दिन पैहल्या बैतनिय्याह गाम म्ह आया जित्त लाजर था, जिस ताहीं यीशु नै मरया होइ म्ह तै जिन्दा करया था । 2 उड़ै उननै यीशु कै खात्तर भोज तैयार करया, अर मार्था सेवा करण लागरी थी, अर लाजर भी उन म्ह तै एक था जो उसके गेल्या खाणा खाण बेटठे थे । 3 फेर मरियम नै जटामांसी फूल का आध्वा सेर घणा म्हँगा खसबूदार तेल लेके यीशु के पायां पै गेरया, अर अपणे बाळां तै उसके पैर पुन्झे, अर खसबूदार तेल की खस्बू तै घर खसबूदार होग्या ।

4 पर उसके चेल्यां म्ह तै यहूदा इस्करियोती नामका एक चेल्ला जो उस ताहीं पकड़वाणा चाहवै था, कहण लाग्या, 5 “थो म्हँगा खसबूदार तेल तीन सौ दीनार (तीन सौ दिन की मजदूरी) म्ह बेचके कंगालां ताहीं क्यातै कोनी दिया गया?” 6 उसनै या बात ज्यातै कोनी कही के उसनै कंगालां की फिक्र थी बल्के ज्यातै के वो चोर था, अर उसके धौरै पिस्या की थैल्ली रह्या करै थी अर उस म्ह जो कुछ गेरया जान्दा, वो काढ लेवै था ।

7 यीशु नै कह्या, “उस ताहीं यो करण द्यो, यो मेरे गाड्डे जाण की तैयारी कै खात्तर सै ।” 8 क्यूँके कंगाल तो धारे गेल्या सारी हाण रहवैगे, पर मै धारे गेल्या सारी हाण कोनी रहँगा ।”

~~~~~

9 फसह का त्यौहार म्ह आई यहूदियाँ की एक बड़ीए भीड़ नै जिब बेरा लागग्या के वो बैतनिय्याह गाम म्ह सै, तो वे ना सिर्फ यीशु कै बाबत आये पर ज्यातै भी के लाजर नै देक्खै, जिस ताहीं यीशु मसीह नै मरया होइ म्ह तै जिन्दा करया था । 10 फेर प्रधान याजकां नै लाजर ताहीं भी मारण की सलाह करी । 11 क्यूँके उसके बाबत घणखरे यहूदी चले गये अर यीशु पै बिश्वास करया ।

~~~~~

(~~~~~ 21:1-11; ~~~~ 11:1-11; ~~~~~ 19:28-40)

12 दुसरे दिन घणखरे माणसां नै जो फसह के त्यौहार म्ह आरे थे न्यू सुण्या, के यीशु यरुशलेम नगर म्ह आरया सै । 13 ज्यातै उननै खजूर की डाळी ली, अर उसतै फेटण नै लिक्के, अर रुक्के मारण लागगे,

“होशाना! (मतलब जै-जै कार हो) धन्य इस्राएल का राजा, जो प्रभु के नाम तै आवै सै ।”

14 जिब यीशु यरुशलेम नगर कै धौरै आया, तो उसनै एक गधे का बच्चा मिल्या, फेर वो उसपै बैठग्या,

15 जिसा पवित्र शास्त्र म्ह लिख्या सै,

“हे सिध्दोन की बेट्टी, मतना डरै, लखा, तेरा राजा गधी के बच्चे पै चढा होइ चाल्या आवै सै ।”

16 यीशु के चेल्लें ये बात पैहल्या कोनी समझे थे, पर जिब यीशु की महिमा दिक्खी फेर उनके याद आया के ये बात उसके बाबत लिक्खी होइ थी, अर माणसां नै उसके गेल्या न्यूए बरताव करया था ।

17 फेर उसकै गैल जो भीड़ थी उननै या गवाही दी, जो उस बखत उसकै गेल्या थे, जिव उसनै लाजर ताहीं कबर म्ह तै बुलाकै मरया होया म्ह तै जिन्दा करया था।

18 ज्यांतै माणस यीशु तै फेटण नै आरे थे क्यूँके उननै सुणया था के उसनै यो अचम्भे का काम करया था।

19 फेर फरीसियाँ नै आप्पस म्ह कह्या, “सोचकै तो देखो, के थारे तै कुछ भी कोनी बणदा। लखाओ, दुनिया उसकै गैल हो ली सै।”

?????????? ?? ???? ???? ???? ???? ?

20 जो माणस उस फसह के त्यौहार म्ह भगति करण नै आये थे उन म्ह तै कुछ यूनानी थे। 21 उननै गलील परदेस के बैतसैदा नगर के बासिन्दे फिलिप्पुस के धोरै आकै उसतै बिनती करी, “श्रीमान, हम यीशु तै फेटणा चाहवां सां।” 22 फिलिप्पुस नै आकै अन्दरयास तै कह्या, फेर अन्दरयास अर फिलिप्पुस नै जाकै यीशु ताहीं कह्या।

23 इसपै यीशु नै उन ताहीं कह्या, “वो बखत आ गया सै के मुझ माणस के बेट्टे की महिमा हो। 24 मै थारे तै साच्ची-साच कहूँ सू, के जिव ताहीं गेहूँ का दाणा धरती म्ह पड़के मर न्ही जान्दा, वो एकला रहवै सै, पर जिव मर जावै सै, तो वो अनगणित दाण्या नै जन्म देवै सै। 25 जो अपणे जीवन नै प्यारा जाणे सै, वो उसनै खो देवै सै, अर जो इस दुनिया म्ह अपणे जीवन नै प्यारा कोनी जाणदा, वो अनन्त जीवन के खात्तर उसकी रुखाळी करैगा। 26 जै कोए मेरी सेवा करै, तो वो मेरा चेल्ला बण जावै, अर जिव जड़े मै सू, उड़े मेरा सेवक भी होवैगा। जै कोए मेरी सेवा करै, तो पिता उसका आदर करैगा।

?????? ?? ??? ?? ???? ?

27 “इब मेरा जी भोत दुखी सै। ज्यांतै इब मै के कहूँ? हे पिता, मन्ने इस दुख की घड़ी तै बचा?” पर मै इस्से खात्तर इस दुनिया म्ह आया सू, ताके मै दुख सहू। 28 हे पिता अपणे नाम की महिमा कर।” फेर या अकास वाणी होई, “मन्ने इसकी महिमा करी सै, अर फेर भी करूंगा।” 29 फेर जो माणस खड़े होए सुणरे थे, उननै कह्या के बाढ़ळ गरजा। दुसरयां नै कह्या, “कोए सुगंदूत उसतै बोल्या।”

30 इसपै यीशु नै कह्या, “या आवाज मेरै खात्तर न्ही, पर थारे खात्तर आई सै। 31 इब इस दुनिया का न्याय होवै सै, इब इस दुनिया का अधिकारी काढ्या जावैगा। 32 अर मै जै धरती पै तै ऊँचे पै चढ़ाया जाऊँगा, तो सारया नै अपणे कान्ही खिचुगाँ।” 33 न्यू कहकै उसनै यो बता दिया के वो किस ढाळ की मौत तै मरेगा।

34 इसपै माणसां नै यीशु ताहीं कह्या, “हमनै मूसा नबी के नियम-कायदा की या बात सुणी सै के मसीह सदा जिन्दा रहवैगा, फेर तू क्यातै कहवै सै के माणस का बेट्टा ऊँचे पै चढ़ाया जाणा जरूरी सै? यो माणस का बेट्टा कौण सै?”

35 यीशु नै उन ताहीं कह्या, “चाँदणा (यीशु नै अपणे-आप तै कह्या सै) इब थोड़ी देर ताहीं थारे बिचाळै सै। जिव ताहीं चाँदणा थारे गेल्या सै जद ताहीं चाल्दे रहो, इसा ना हो के अँधेरा थारे ताहीं घेर लेवै, जो अँधेरे म्ह चाल्लै सै वो कोनी जाणदा के कड़े जावै सै। 36 जिव ताहीं चाँदणा थारे गेल्या सै, चाँदणे पै विश्वास राखो ताके थम चाँदणे की ऊलाद बणो।” ये बात कहकै यीशु चल्या गया अर उनतै दूर रह्या।

?????????? ?? ???? ???? ???? ???? ?

37 यीशु मसीह नै उनके स्याम्ही इतने चमत्कार दिखाए, फेर भी उननै उसपै विश्वास कोनी करया, 38 ताके यशायाह नबी का वचन पूरा हो जो उसनै कह्या “हे प्रभु, म्हारे संदेश का किसनै विश्वास करया सै? अर प्रभु की शक्ति किसपै जाहिर होई सै?”

39 इस बाबत वे विश्वास कोनी कर सके, क्यूँके यशायाह नै न्यू भी कह्या सै:

40 “उसनै उनकी आँख आँधी, अर उनके मन कठोर कर दिए सै, कदे इसा ना हो के वे आँखां तै देखवै, अर मन तै समझे, अर पलटै, अर मै उननै ठीक करूँ।”

41 यशायाह नै ये बात ज्यांतै कही, के उसने यीशु मसीह की महिमा देखी, अर उसने उसकै बारे म्ह बताया।

42 फेरभी यहूदी सरदारां म्ह तै घणाए नै उसपै बिश्वास करया, पर फरीसियाँ के कारण खुलकै कोनी मान्ने थे, क्यूँके उनने डर था कदे वे आराधनालय म्ह तै लिकाड़े ना जावै 43 क्यूँके माणसां की ओड़ तै करी जाण आळी बड़ाई उनने परमेसवर की ओड़ तै बड़ाई की बरावरी म्ह घणी प्यारी लागगै थी।

???? ?

44 यीशु नै रुक्का मारकै कह्या, “जो मेरे पै बिश्वास करै सै, वो मेरे पै न्ही बल्के मेरे खन्दानआळै पै बिश्वास करै सै। 45 अर जो मन्ने देखै सै, वो मेरे खन्दानआळै नै देखै सै। 46 मै दुनिया म्ह चाँदणा बणकै आया सूं, ताके जो कोए मेरे पै बिश्वास करै वो अँधेरे म्ह कोनी रहवै।”

47 “जै कोए मेरे वचन सुणकै भी उनने न्ही मानता, तोभी मै उसने कसूरवार कोनी ठहरान्दा, क्यूँके मै दुनिया के माणसां ताहीं कसूरवार ठहराण खात्तर कोनी, पर दुनिया के माणसां का उद्धार करण खात्तर आया सूं। 48 जो कोए मन्ने नकारै सै, अर मेरे सुसमाचार नै कोनी अपणावै, उस ताहीं कसूरवार ठहराण आळा तो एके सै, यानिके जो वचन मन्ने कह्या सै, वोए पाच्छले दिन म्ह उस ताहीं कसूरवार ठहरावैगा। 49 क्यूँके मै अपनी ओर तै बात न्ही कहन्दा, पर पिता जिसने मेरे ताहीं भेज्या सै, उसने मेरे ताहीं हुकम दिया सै के, के मै कहूँ अर किस तरियां बोलूँ? 50 अर मन्ने बेरा सै के उसका हुकम अनन्त जीवन देवै सै। ज्यांतै मै जो कुछ कहूँ सूं, ठीक उसाए कहूँ सूं, जिसा पिता नै मेरे ताहीं कहण का हुकम दिया सै।”

## 13

???? ?

1 फसह के त्यौहार तै पैहल्या, जिब यीशु नै बेरा लागगया, के मेरा वो बखत आ लिया सै, के दुनिया छोड़कै पिता के धौरे उल्टा जाऊँ, तो अपने मानण आळा तै, जो दुनिया म्ह थे, जिसा प्यार वो करया करदा, आखर ताहीं उसाए प्यार करदा रह्या।

2 यीशु अर उसके चेल्ले साँझ नै खाणा खाण लागरे थे। शमौन के बेटटे यहूदा इस्करियोती के मन म्ह शैतान नै यो विचार घाल दिया था, के वो यीशु के गेल्या धोक्सा करै। 3 यीशु यो जाणै था, के पिता नै सब कुछ उसके हाथ म्ह सौप दिया सै, अर यो भी के वो परमेसवर की ओड़ तै आया सै, परमेसवर के धौरे ए उल्टा जाण लागरया सै। 4 इस खात्तर वो खाणा छोड़कै खडचा होगया, उसने अपने उप्परले लत्ते उतार दिये, अंगोच्छा लैके अपनी कमर म्ह बाँध लिया। 5 फेर बास्सण म्ह पाणी भरके चेल्यां के पैर धोये, अर जो अंगोच्छा कमर पै बाँध राख्या था, उससे तै पूँझण लागगया।

6 जिब वो शमौन पतरस के धौरे आया, फेर पतरस नै उस ताहीं कह्या, “हे प्रभु, के तू मेरे पैर धोवैगा?”

7 यीशु नै उस ताहीं जवाब दिया, “जो मै करूँ सूं, तू उसका मतलब इब्बे न्ही समझ पावैगा, पर इसकै बाद समझैगा।”

8 पतरस नै उस ताहीं कह्या, “मै अपने पैर तेरे ताहीं कदे न्ही धोण दियुँगा।” न्यू सुणकै यीशु नै उस ताहीं कह्या, “जै मै तेरे पैर ना धोऊँ, तो तू मेरा चेल्ला न्ही कुह्णवैगा।”

9 शमौन पतरस नै उस ताहीं कह्या, “हे प्रभु, फेर मेरे पैर ए न्ही बल्के मेरे हाथ अर सिर भी धोदे।”

10 यीशु नै उस ताहीं कह्या, “जो माणस न्हा लिया हो उस ताहीं पैर के सिवाय और कुछ धोण की जरूरत कोनी, पर वो पूरी तरियां साफ हो चुका सै, थम सारे साफ सो, पर एक नै छोड़के।” 11 यीशु तो अपने पकड़वाण आळै नै जाणै था, ज्यांतै उसने कह्या, “थम सारे साफ सो, पर एक नै छोड़के।”

12 जिब यीशु नै पैर धो लिये, अर अपने लत्ते दुबारा पहरेके फेर बैठगया, तो उन ताहीं कहण लागगया, “के थम समझे के मन्ने थारे गेल्या के करया?” 13 थम मन्ने गुरु अर प्रभु कही सो, अर

सही कहो सो, क्यूँके मै वोए सू। 14 जिब मन्ने गुरु अर प्रभु होकै थारे पैर धोए, तो थमनै भी मेरी तरियां एक-दुसरे के पैर धोणे चाहिये। 15 क्यूँके मन्ने थारे ताहीं नमूना दिखाया सै, के जिसा मन्ने थारे गेल्या करया सै, थम भी उसाए करया करो। 16 मै थारे तै साच्ची-साच कहूँ सू, नौक्कर अपणे माल्लिक तै बड़ड़ा कोनी, अर ना प्रेरित अपणे भेजण आळे तै। 17 इब थम ये बात जाणगे सों, जै उनपै चाल्लों तो थम सुखी रहोगे।

18 मै थम सारया के बारे म्ह कोनी कहन्दा, मै उननै जाणु सू, जिनताहीं मन्ने छाँट लिया सै, (अर यो भी के यहूदा बिश्वासघाती सै) क्यूँके मन्ने उस ताहीं इस खात्तर छाटद्या सै, ताके पवित्र ग्रन्थ का यो वचन पूरा हो, “जो मेरी रोटी खावै सै, उसनै मेरै पै लात ठाई।”

19 “ये सब कुछ मन्ने थारे ताहीं पैहले ए बता दिया था, के जब न्यू हो जावै तो थम बिश्वास करियो के मै वोए सू। 20 मै थारे ताहीं साच्ची-साच कहूँ सू, के जो मेरे भेज्जे होया नै अपणावै सै, वो मन्ने अपणावै सै, अर जो मन्ने अपणावै सै, वो मेरे भेजण आळे नै अपणावै सै।”

XXXXXXXXXX XX XXXXXX XXXXXX

(XXXXXXXX 26:20-25; XX 14:17-21; XXXXX 22:21-23)

21 ये बात कहके यीशु आत्मा म्ह दुखी होया अर या गवाही दी, “मै थारे ताहीं साच्ची-साच कहूँ सू, के थारे म्ह तै एक मन्ने धोक्खा देकै पकड़वावैगा।”

22 चेल्लें यो शक करते होए के वो किसके बाबत कहवै सै, एक-दुसरे के कान्ही लखाण लागगे।

23 उसके चेल्यां म्ह तै यूहन्ना जिस ताहीं यीशु प्यार राक्खै था, यीशु के धोरै बेटद्या था। 24 शमौन पतरस नै यूहन्ना कान्ही इशारा करके उस ताहीं बुझझया, “बता तो, वो किसके बाबत कहवै सै?”

25 फेर उसनै उससे दाळ यीशु की छात्ती के कान्ही झुककै उस ताहीं बुझझया, “हे प्रभु, वो कौण सै?”

26 यीशु नै जवाब दिया, “जिस ताहीं मै यो रोटी का टुकड़ा डुबोकै द्युगां वोए सै।” अर उसनै टुकड़ा डुबोकै शमौन के बेटे यहूदा इस्करियोती ताहीं दिया।

27 टुकड़ा खान्दे शैतान यहूदा इस्करियोती म्ह बड़ग्या। फेर यीशु नै उस ताहीं कह्या, “जो तू करै सै, तोळा कर।” 28 भोज पै बैठण आळे चेल्यां म्ह तै किसे नै भी यो कोनी बेरा लागगण पाया के उसनै या बात उसतै किस मतलब तै कही। 29 कईयाँ नै सोच्या के रपियाँ की थैल्ली यहूदा के धोरै रहवै सै, ज्यातै यीशु उस ताहीं कहवै सै के त्यौहार के खात्तर जरूरी समान मोल ले आओ या गरीबां नै कुछ देवै, इस खात्तर यहूदा नै रोटी का टुकड़ा लिया। 30 आखर म्ह वो टुकड़ा खाके जिब्बे बाहरणै लिकड़ग्या, अर रात का बखत था।

XX XXXXXX

31 जिब यहूदा बाहरणै लिकड़ग्या तो यीशु नै कह्या, “इब मुझ माणस के बेटे की महिमा होई सै, अर परमेसवर की महिमा मेरे म्ह होई सै, 32 परमेसवर भी अपणे बेटे की महिमा करैगा, अर वो जिब्बे करैगा।”

33 हे बाळकों, मै थोड़ी सी वार और थारे धोरै सू, फेर थम मन्ने टोहओगे, अर जिसा मन्ने यहूदियाँ ताहीं कह्या, “जड़ै मै जाऊँ सू, उड़ै थम कोनी आ सकदे, न्यू इब मै थारे ताहीं भी कहूँ सू।”

34 “मै थमनै नया हुकम द्यु सू, के एक-दुसरे तै प्यार करो, जिसा मन्ने थारैतै प्यार करया सै, उससे तरियां थम भी एक-दुसरे तै प्यार करो। 35 जै आप्स म्ह प्यार राक्खोगे, तो इसतै सारया नै बेरा पाट्टेगा के थम मेरे चेल्लें सो।”

XXXXXXXXXX XX XXXXXX XX XXXXXX

(XXXXXXXX 26:31-35; XX 14:27-31; XXXXX 22:31-34)

36 शमौन पतरस नै उस ताहीं कह्या, “हे प्रभु, तू कित्त जा सै?” यीशु नै जवाब दिया, “जड़ै मै जाऊँ सू, उड़ै तू इब्बे मेरै पाच्छै, न्ही आ सकदा, पर इसके बाद मेरै गेल्या आवैगा।”



37 पतरस नै उसतै कह्या, “हे प्रभु, इब्बे मै तेरे पाचछै, क्यातै न्ही आ सकदा? मै तो तेरी खात्तर अपनी जान भी देण नै तैयार सूँ।”

38 यीशु नै जवाब दिया, “के तू मेरी खात्तर अपनी जान दे देवैगा? मै तेरे तै सच कहूँ सूँ, के मुर्गे के बाँग देण तै पैहल्या तू तीन बार मेरे बाँरे म्ह मुकरैगा।

## 14

???????? ?? ??????? ?? ???????

1 “अपणे मन नै दुखी ना होण द्यो, थम परमेसवर पै विश्वास राक्खो सो, अर मेरै पै भी विश्वास राक्खो। 2 मेरे पिता के घर म्ह घणीए रहण की जगहां सै, जै न्ही होदी तो मै थारे ताहीं कह देदा, क्यूँके मै थारे खात्तर जगहां त्यार करण नै जाऊँ सूँ। 3 अर जै मै जाके थारे खात्तर जगहां त्यार करूँ, तो फेर दुबारे आके थमनै अपणे उरै ले जाऊँगा के जडै मै रहूँ उडै थम भी रहो। 4 अर जित्त म्ह जाऊँ सूँ, थम ओडै की राह जाणो सों।”

5 थोमा नै उसतै सवाल करया, “हे प्रभु, हमने तेरे ठिकाणै का ए कोनी बेरा तो उसका राह किस तरियां जाण सका सों?”

6 यीशु नै उस ताहीं जवाब दिया, “मै ए वो राह अर सच अर अनन्त जीवन सूँ, बिना मेरै जरिये कोए पिता धारे कोनी पोहच सकदा। 7 जै थम सच म्ह ए मन्नै जाणदे होन्दे, तो मेरै पिता नै भी जाणदे, इसके बाद थमनै उस ताहीं जाण लिया सै, अर उस ताहीं देख भी लिया सै।”

8 फिलिप्पुस नै उस ताहीं कह्या, “हे प्रभु, तू म्हारै ताहीं पिता के दर्शन ए करा दे, योए म्हारै खात्तर भतेरा होगा।” 9 यीशु नै उस ताहीं कह्या, “हे फिलिप्पुस, मै इतने दिन तै थारे गेल्या सूँ, के तू मन्नै कोनी जाणदा? जिसने मेरैताहीं देख्या सै उसने पिता ताहीं देख्या सै। फेर क्यातै कहवै सै के पिता नै म्हारैताहीं दिखा?” 10 के तन्नै विश्वास कोनी के मै पिता म्ह सूँ, अर पिता मेरै म्ह सै? ये वचन जो मै थारे ताहीं बताऊँ सूँ, अपनी ओड तै कोनी बतान्दा, पर मेरे भित्तर बसा पिता ए सै, जो मेरे म्ह होके अपणे काम पूरा करण लागरया सै। 11 मेरा-ए विश्वास करो के मै पिता म्ह सूँ, अर पिता मेरै म्ह सै, ना तो काम्मां के कारण मेरा विश्वास करो। 12 मै थारैतै साचची-साच कहूँ सूँ, के जो मेरै पै विश्वास राक्खै सै, ये काम जो मै करूँ सूँ, वो भी करैगा, बल्के इनतै भी बड़े-बड़े काम करैगा, क्यूँके मै इब पिता के धारे जाऊँ सूँ। 13 मेरै नाम तै थम जो कुछ माँगोगे, वोए मै करूँगा, जिसतै बेट्टे के जरिये पिता की महिमा हो। 14 जै थम मेरै तै मेरै नाम तै कुछ माँगोगे, तो मै उस ताहीं पूरा करूँगा।

???????? ??????? ?? ?????????????

15 “जै थम मेरै तै प्यार करा सों, तो मेरै हुकमां नै मान्णोगे। 16 मै पिता तै बिनती करूँगा, अर वो थारे ताहीं एक और मददगार देवैगा के वो सारीहाण थारे गेल्या रहवै। 17 यानिके सच का आत्मा, जिस ताहीं दुनिया कोनी अपना सकदी, क्यूँके वो ना उसने देखवै सै, अर ना उस ताहीं जाणै सै, थम उसने जाणो सो, क्यूँके आज वो थारे गेल्या सै, अर आण आळे बखत म्ह भी वो थारे म्ह बणा रहवैगा।” 18 “मै थारे ताहीं अनाथ कोनी छोड़ूँगा, मै थारे धारै बोहड़ के आऊँगा। 19 थोड़ा ए बखत बाकी सै, जिब दुनिया मेरै ताहीं कोनी देखेगी, पर थम मन्नै देखेगो, ज्यातै के मै जिन्दा सूँ, थम भी जिन्दा रहूँगे। 20 जिब मै बोहड़ के आऊँगा, उस दिन थमने बेरा लागूँगा, के मै अपणे पिता म्ह सूँ, अर थम मेरै म्ह, मै थारे म्ह। 21 वो, जो मेरे हुकम नै मान्णै सै अर उननै निभावै सै, वोए मेरतै प्यार करै सै, अर जो मेरतै प्यार करै सै, वोए मेरे पिता का पियजण होगा, मै उसतै प्यार करूँगा, अर अपणे-आप ताहीं उसपै जाहिर करूँगा।”

22 उस यहूदा नै (जो इस्करियोती कोनी था) यीशु ताहीं कह्या, “हे प्रभु, इसा के होया के तू अपणे-आप ताहीं म्हारै पै जाहिर करणा चाहवै सै, अर दुनिया के माणसां पै न्ही?” 23 यीशु नै उस ताहीं जवाब दिया, “जै कोए मेरै तै प्यार करै सै, तो वो मेरी शिक्षा का पालन करैगा, वो मेरे पिता का

पिरयजन बणैगा, अर हम उसकै धोरै आकै उसकै गेल्या वास करागें।” 24 वो, जो मेरैतै प्यार कोनी करदा, वो मेरै वचन नै कोनी मानता, अर जो वचन थम सुणो सो वो मेरे कोनी बल्के पिता के सै, जो मेरा भेजण आळा सै।

25 “ये बात मन्नै थारे गेल्या रहंदे होए थारैतै कही। 26 पर मददगार यानिके पवित्तर आत्मा जिस ताहीं पिता मेरै नाम तै भेज्जैगा, वो थारे ताहीं इन सारी बाततां की शिक्षा देवेगा, अर जो कुछ मन्नै थारे तै कह्या सै, वो सारा कुछ थारे ताहीं याद दुआवैगा।” 27 मै थारे ताहीं शान्ति देकै जाऊँ सूँ, अपणी शान्ति थारे ताहीं दियुँ सूँ, जिसी दुनिया थारे ताहीं शान्ति देवे सै, मै थमनै उसी शान्ति कोनी देदा अपणे मन नै दुखी ना होण द्यो अर ना डरियो।

28 थमनै सुण्या के मन्नै थारे ताहीं के कह्या, “मै जाऊँ सूँ, अर थारे धोरै फेर आऊँगा।” जै थम मेरै तै प्यार करदे, तो यो जाणकै राज्जी होन्दे, के मै पिता के धोरै जाऊँ सूँ, जो मेरै तै घणा महानू सै। 29 यो सब होण तै पैहल्या मन्नै थारे ताहीं इसके बारे म्ह बता दिया सै, के जब यो हो जावै, तो थम बिश्वास करो। 30 मै इब थारे तै घणा कुछ न्ही कहूँगा, क्यूँके इस दुनिया का शासक (शैतान) आवै सै। मेरै पै उसका कोए हक कोनी, 31 दुनिया यो समझ ले के मै पिता तै प्यार करूँ सूँ, योए कारण सै के मै उसके सारे हुकमां का पालन करूँ सूँ। उठो, हम याडै ते चाल्तां।

## 15

### ????????????

1 यीशु नै कह्या, “मै सच्ची अंगूर की बेल की तरियां सूँ, अर मेरा पिता किसान की तरियां सै। 2 मेरे मै लागी हरेक डाळी जो फळ न्ही देन्दी, उस ताहीं वो काट देवै सै, पर हरेक एक फळ देण आळी डाळी ताहीं छांगै सै ताके वा और घणा फळ ल्यावै। 3 थम तो उस वचन के कारण जो मन्नै थारैताहीं कह्या सै, शुद्ध होगे सो। 4 थम मेरै म्ह बणे रहो, अर मै थारे म्ह, जिस तरियां डाळी जै अंगूर की बेल म्ह बणी न्ही रहवै तो खुद तै कोनी फळ सकदी, उस्से तरियां थम भी जै मेरै म्ह बणे न्ही रहो तो कोनी फळ सकदे।”

5 मै अंगूर की बेल की ढाळ सूँ अर थम डाळी सो। जो मेरै म्ह बण्या रहवै सै अर मै उस म्ह, वो घणाए फळ फळे सै, क्यूँके मेरै तै न्यारे पाटके थम कुछ न्ही कर सकदे। 6 जै कोए मेरै म्ह न्ही बण्या रहंदा, तो वो डाळी की तरियां बगा दिया जावैगा, अर सूख जावै सै, अर माणस उन ताहीं कट्टे करके आग म्ह झोक देवै सै, अर वे बळ जावै सै। 7 जै थम मेरै म्ह बणे रहो अर मेरे वचन थारे म्ह बणे रहवै, तो थारे माँगण पै थारी इच्छा पूरी करी जावैगी। 8 थारे फळ की भरपूरी म्ह मेरे पिता की महिमा अर थारा मेरे चेल्ले होण का सबूत सै।

9 जिसा पिता नै मेरे तै प्यार करया, उसाए मन्नै थारैतै प्यार करया, मेरै प्यार म्ह बणे रहो। 10 जै थम मेरे हुकमां नै मान्नेगे, तो मेरे प्यार म्ह बणे रहोगे, जिस ढाळ के मन्नै अपणे पिता का हुकम मान्या सै, अर उसके प्यार म्ह बणा रहूँ सूँ। 11 मन्नै ये बात थारे तै ज्यांतै कही, के जो आनन्द मेरे म्ह सै, वो थारे म्ह भी हो अर बढ़ता जावै।

12 “मै थमनै नया हुकम द्यु सूँ, के एक-दुसरे तै प्यार करियो, जिसा मन्नै थारैतै प्यार करया सै, उसाए थम भी एक-दुसरे तै प्यार करियो। 13 इसतै बड़ड़ा प्यार किसे का कोनी के कोए अपणे दोस्तां के खात्तर अपणी जान दे। 14 जो हुकम मै थारे ताहीं दियुँ सूँ, जै थम उसपै चाल्तां सो तो थम मेरे साथी सो।” 15 मन्नै थारे ताहीं नौक्कर न्ही, पर साथी मान्या सै, क्यूँके नौक्कर मालिक के काम्मां तै अनजाण रहवै सै, मन्नै थारे ताहीं वे सारी बात बता दी सै, जो मन्नै पिता तै मिली सै। 16 थमनै मेरै ताहीं कोनी चुण्या पर मन्नै थारे ताहीं चुण्या सै अर थारैताहीं काम पै लाया सै, के थम जाके फळ ल्याओ अर थारा फळ बणा रहवै, के थम मेरै नाम तै जो कुछ पिता तै माँगो, वो थारे ताहीं दे दे। 17 मेरा हुकम यो सै के थम एक-दुसरे तै प्यार करो।

### ?????? ?? ????

18 “जै दुनिया के माणस थारैतै बैर राक्खै सै, तो जाण ल्यो के उसनै थारैतै पैहल्या मेरै तै बैर राख्या सै। 19 जै थम दुनिया के माणसां जिसे होन्दे, तो दुनिया थारे तै आपण्यां जिसा प्यार करदी, पर थम दुनिया के कोनी, बल्के मन्नै थारैताहीं दुनिया म्ह तै छोट लिया सै, इस करके दुनिया के माणस थारे तै बैर राक्खै सै। 20 याद राक्खों मन्नै थारे तै के कह्या था, ‘नौक्कर अपणे माल्लिक तै बड़्हा कोनी होंदा,’ जिब उननै मेरै ताहीं सताया, तो थारैताहीं भी सतावेंगे। जै उननै मेरी शिक्षा मानी, तो थारी भी माँनैगे। 21 पर यो सब कुछ माणस मेरै नाम के कारण थारे गेल्या करेंगे, क्यूँके माणस मेरै भेजण आळे नै कोनी जाणदे। 22 जै मै न्ही आन्दा, अर उनतै बात न्ही करदा, फेर वे पापी कोनी ठहरदे, पर इब उननै उनके पाप खात्तर कोए बहान्ना कोनी। 23 जो मेरै तै बैर राक्खै सै, वो मेरै पिता तै भी बैर राक्खै सै। 24 जै मै उनके बीच म्ह वे काम न्ही करदा, जो और किसै नै कोनी करे, तो वे पापी कोनी ठहरदे, पर इब तो जो कुछ मन्नै करया सै उननै मेरै ताहीं देख लिया सै, उननै मेरै ताहीं अर मेरै पिता दोनुआ तै बैर करया। 25 पर यो इस करके होया के जो उनकै नियम-कायदा म्ह लिख्या सै वो सच हो सके, ‘उननै मेरै तै खामखां बैर करया।’”

26 पर जिब वो मददगार (सच का आत्मा जो पिता की ओड़ तै आवै सै) धारे आवैगा, जिसनै मै थारे धारे पिता की ओड़ तै भेज्जूंगा, तो वो मेरी गवाही देवैगा, 27 अर थम भी मेरे गवाह सो, क्यूँके थम शरु तै मेरै गेल्या रहे सो।

## 16

1 “ये बात मन्नै थारैतै ज्यातै बताई सै के थारा विश्वास डगमगा न्ही जावै।” 2 वे थमनै आराधनालयां म्ह तै काढ देवैगें, बल्के वो बखत आवै सै, के जो कोए थमनै मार देवैगा, वो न्यू समझैगा के मै परमेसवर की सेवा करूँ सूँ। 3 इसा वे ज्यातै करेंगे के उननै ना पिता ताहीं जाणया सै, अर ना मन्नै जाणै सै। 4 पर ये बात मन्नै ज्यातै थारैतै कही, के जिब इनका बखत आवै तो थमनै याद रहवै के मन्नै थारैतै पैहल्याए उसकै बारे म्ह बता दिया था। “मन्नै शरु म्ह थारैतै ये बात ज्यातै कोनी कही क्यूँके मै थारे गेल्या था।”



5 पर इब मै अपणे भेजण आळे के धारे जाऊँ सूँ, अर थारे म्ह तै कोए मेरै तै कोनी बुझता, “तू कित्त जावै सै?” 6 पर मन्नै जो ये बात थारैतै कही सै, ज्यातै थारा मन दुख तै भरगया सै। 7 फेरभी मै थारैतै साच्ची कहूँ सूँ, के मेरा जाणा थारे खात्तर ठीक सै, क्यूँके जै मै ना जाऊँ तो वो मददगार थारे धारे कोनी आवैगा, पर जै मै जाऊँगा, तो उस ताहीं थारे धारे भेज्जूंगा। 8 वो आकै दुनिया के माणसां ताहीं पाप अर धार्मिकता अर न्याय के बाबत बतावैगा। 9 पाप के बारे म्ह ज्यातै के वे मेरै पै विश्वास कोनी करदे। 10 अर धार्मिकता के बारे म्ह ज्यातै के मै पिता के धारे जाऊँ सूँ, अर थम मन्नै दुबारे कोनी देखवोगे, 11 न्याय के बारे म्ह ज्यातै के दुनिया का शासक कसूरवार ठहराया जा चुक्या सै।

12 मन्नै थारे तै और भी घणीए बात कहणी सै, पर इब्बे थम उननै सह न्ही सकदे। 13 पर जिब वो यानिके सच का आत्मा आवैगा, तो थम सारया नै सच का रास्ता बतावैगा, क्यूँके वो अपणी ओड़ तै कोनी कहवैगा पर जो कुछ सुणैगा वोए कहवैगा, अर होण आळी बात थारे ताहीं बतावैगा। 14 वो मेरी महिमा करैगा, क्यूँके उस ताहीं मेरी ओड़ तै जो मिला सै, वो थारे ताहीं मेरी बातों म्ह तै लेकै बतावैगा। 15 वो सब कुछ, जो पिता का सै, वो सारा मेरा सै, ज्यातै मन्नै कह्या के वो मेरी बातों म्ह तै लेकै थारे ताहीं बतावैगा।



16 “थोड़ी देर म्ह थम मन्नै कोनी देखवोगे, अर फेर थोड़ी देर म्ह मन्नै दुबारा देखवोगे।”

17 फेर उसके कुछ चेल्यां नै आप्स म्ह कह्या, “उसका इस बात तै के मतलब सै जो वो म्हारे ताहीं कहवै सै, थोड़ी देर म्ह थम मन्नै कोनी देखवोगे, अर फेर थोड़ी देर म्ह मन्नै दुबारा देखवोगे?”

अर यो 'ज्यातै के मै पिता के धारे जाऊँ सू?' " 18 फेर उननै कह्या, "यो 'थोड़ी देर' जो वो कहवै सै, या के बात सै? हम कोनी जाणदे के वो के कहवै सै।"

19 यीशु नै न्यू जाणके के वे मेरतै बुझणा चाहवै सै, उन ताहीं कह्या, "के थम आप्पस म्ह मेरी इस बात बाबत जाँच-पड़ताळ करो सो, 'थोड़ी देर म्ह थम मन्नै कोनी देखोगे, अर फेर थोड़ी देर म्ह मन्नै दुबारा देखोगे?' 20 मै थारे तै साच्ची-साच कहूँ सू, के जिब मै मरूंगा तो थम रोओगे अर बिलाप करोगे, पर दुनिया राज्जी होवैगी। थमनै दुख होगा, पर थारा दुख आनन्द म्ह बदल जावैगा। 21 जापूँ के बखत बिरबान्नी नै दुख होवै सै, क्यूँके उसके दुख का बखत आरया सै, पर जिब वा बाळक नै जन्म दे सै, तो इस खुशी तै, के दुनिया म्ह एक माणस पैदा होया, उस दुख नै फेर याद कोनी कर दी। 22 उससे तरियां थारे म्ह भी इब तो दुख सै, पर मै थारे तै दुबारा मिलूंगा अर थारे मन आनन्द तै भर जावैगे, थारा आनन्द कोए थारे तै खोस न्ही सकदा। 23 उस बखत थम मेरतै कुछ न्ही बुझ्दोगे। मै थारेतै सच कहूँ सू, जै थम पिता तै कुछ माँगोगे, तो वो मेरै नाम तै थमनै देवैगा। 24 इब ताहीं थमनै मेरै नाम तै पिता तै कुछ न्ही माँग्या, माँग्यो, तो पा ल्योगे ताके थारा आनन्द पूरा हो जावै।

~~~~~

25 "मन्नै ये बात थारेताहीं उदाहरणां म्ह कही सै, पर वो बखत आवै सै, जिब पिता के बारे म्ह मै उदाहरणां म्ह न्ही कहूँगा, पर साफ शब्दां म्ह थारे ताहीं बताऊँगा। 26 उस दिन थम मेरै नाम तै माँगोगे, अर मै थारेतै न्यू कोनी कहन्दा के मन्नै ए थारे खात्तर पिता तै बिनती करणी पड़ैगी, 27 क्यूँके मेरा पिता तो खुदे थारेतै प्यार करै सै, ज्यातै के थमनै मेरतै प्यार करया सै अर यो विश्वास करया सै के मै पिता की ओड़ तै भेज्या होइ सू। 28 मै पिता की ओड़ तै दुनिया म्ह आया सू, अर इब दुनिया नै छोड़के पिता के धारे जाऊँ सू।"

29 उसके चेल्यां नै कह्या, "हाँ, इब तू उदाहरणां म्ह न्ही, बल्के साफ शब्दां म्ह समझाण लागरया सै। 30 इब हम समझगे सां, के तू सब कुछ जाणे सै, अर इब किसे नै तेरे तै कोए सवाल पूच्छण जुरत कोनी, इस खात्तर हम विश्वास करा सां के तू परमेसवर की ओड़ तै आया सै।"

31 न्यू सुणके यीशु नै उन ताहीं कह्या, "के थमनै इब विश्वास होया सै?" 32 लखाओ, वो बखत आवै सै बल्के आण पहोंच्या सै के थम सारे खिंड-मिन्ड होके अपणे-अपणे घर बोहइ जाओगे, अर मन्नै एक्ला छोड़ दोगे, फेरभी मै एक्ला कोनी क्यूँके पिता मेरै गेल्या सै।

33 "मन्नै ये बात थारेतै ज्यातै कही सै, के थम मेरै म्ह शान्ति पाओ। दुनिया म्ह थारे पै कळेश होवै सै, पर हिम्मत राखियो, मन्नै दुनिया ताहीं जीत लिया सै।"

## 17

~~~~~

1 यीशु नै ये बात कही अर अपणी नजर अकास कान्ही ठाके कह्या, "हे पिता, वो बखत आण पहोंच्या सै, अपणे बेट्टे की महिमा कर, के बेट्टा भी तेरी महिमा कर सके, 2 क्यूँके तन्नै उस ताहीं सारी मानवजाति पै हक दिया, के वो सब नै अनन्त जीवन देवै जो तन्नै उस ताहीं सौप्या सै। 3 अर अनन्त जीवन यो सै के वे तुझ, जो के एकमात्र सच्चे परमेसवर अर यीशु मसीह नै जिस ताहीं तन्नै भेज्या सै, जाणै। 4 जो काम तन्नै मेरै ताहीं सौप्या था, उस ताहीं पूरा करके मन्नै धरती पै तेरी महिमा करी सै। 5 जो महिमा मेरी तेरे गैल दुनिया की सृष्टि तै पैहल्या थी, इब हे पिता, तू अपणे गेल्या मन्नै भी महिमावान कर।"

~~~~~

6 "मन्नै तेरा नाम उन माणसां पै जाहिर करया सै दुनिया म्ह तै जिनताहीं तन्नै छाटकै मेरै ताहीं सौप्या था, वे तेरे थे पर तन्नै उन ताहीं मेरै ताहीं सौप्या सै, अर उननै तेरे वचन का पालन करया सै।" 7 इब जाणगे सै के जो कुछ तन्नै मेरै ताहीं दिया सै, वो सारा तेरी ओड़ तै सै, 8 क्यूँके जो बात तन्नै मेरै ताहीं बताई, मन्नै उन ताहीं उनके धारे पहोंच्या दी सै, अर उननै उन ताहीं अपणालिया,

अर सच म्ह ए जाण लिया सै के मै तेरी ओड़ तै आया सू, अर उननै बिश्वास भी कर लिया सै के तू ए मेरा भेजण आळा सै।<sup>9</sup> मै उन खात्तर बिनती करूँ सू, दुनिया के माणसां के खात्तर बिनती कोनी करदा पर उन्नैए कै खात्तर करूँ सू जिन ताहीं तन्नै मेरै ताहीं दिया सै, क्यूँके वे तेरे सै, <sup>10</sup> अर जो कुछ मेरा सै वो सारा तेरा सै, अर जो तेरा सै वो मेरा सै, अर मन्नै उनके जरिये महिमा पाई सै। <sup>11</sup> इब मै इस दुनिया म्ह कोनी रहूँगा, अर मै तेरे धोरै आऊँ सू, पर ये दुनिया म्ह रहवेंगे, हे पवित्तर पिता, अपणे नाम की शक्ति तै उनकी रुखाळ कर, जो तन्नै मेरै ताहीं दिया सै, ताके जिस तरियां मै अर तू एक सां, वे भी एक हो सकै। <sup>12</sup> जिब मै उनकै गेल्या था, तो मन्नै उन ताहीं तेरे नाम म्ह, जो तन्नै मेरै ताहीं दिया था, उनकी रुखाळ करी, अर उन म्ह तै किसे का नाश कोनी होया, सिवाए उसके जिस ताहीं खोणा जरूरी था, वो भी ज्यांतै के पवित्तर गरन्थ म्ह जो लिख्या होइ सच हो।

<sup>13</sup> पर इब मै तेरे धोरै आऊँ सू, अर ये बात दुनिया म्ह रहते होए कहुँ सू, ताके वे अपणे मनां म्ह मेरे भरपूर आनन्द नै पा सकै। <sup>14</sup> मन्नै तेरा वचन उन ताहीं पोहोचा दिया सै, अर दुनिया के माणसां नै उनतै बैर करया, क्यूँके जिस तरियां मै इस दुनिया का कोनी, उस्से तरियां वे भी इस दुनिया के कोनी। <sup>15</sup> मै या बिनती कोनी करदा के उननै तू दुनिया तै लिकाड़ ले, बल्के तू उननै उस शैतान तै बचाए राख। <sup>16</sup> जिस तरियां मै दुनिया का कोनी, उस्से तरियां वे भी दुनिया के कोनी। <sup>17</sup> तेरा वचन साच्चा सै, सच कै जरिये तू उननै अलग करण खात्तर समर्पित\* कर। <sup>18</sup> जिस तरियां तन्नै मेरै ताहीं दुनिया म्ह भेज्या, उस्से तरियां मन्नै भी उन ताहीं दुनिया म्ह भेज्या, <sup>19</sup> मै उनकै खात्तर खुद नै तेरी सेवा म्ह समर्पित करूँ सू, ताके वे भी सच कै खात्तर समर्पित हो जावै।

~~~~~

<sup>20</sup> "मै केवल इन्हें खात्तर बिनती कोनी करदा, पर उन माणसां खात्तर भी जो इनकै वचन कै जरिये मेर पै बिश्वास करैगें, <sup>21</sup> ताके वे सब एक हों, जिस तरियां हे पिता तू मेरै म्ह सै, अर मै तेरे म्ह सू, उस्से तरियां वे भी म्हारै म्ह एक हो, जिसतै दुनिया के माणस बिश्वास करै के तन्नै ए मेरै ताहीं भेज्या सै। <sup>22</sup> वा महिमा जो तन्नै मेरै ताहीं दी, मन्नै उन ताहीं दी सै, ताके वे उस्से तरियां ए एक होवै जिस तरियां हम एक सा, <sup>23</sup> मै उन म्ह अर तू मेरे म्ह ताके वे सिध्द होकै एक हो जावै, अर दुनिया नै बेरा पाट्टे के तन्नै ए मेरै ताहीं भेज्या, अर जिस तरियां तन्नै मेरै तै प्यार करया उस्से तरियां उनतै प्यार करया।"

<sup>24</sup> हे पिता, मै चाहूँ सू, के जिन ताहीं तन्नै मेरैताहीं सौप्या सै, जड़े मै सू उड़ै वे भी मेरै गेल्या हो, के वे मेरी उस महिमा नै देखवै जो तन्नै मेरैताहीं दी सै, क्यूँके तन्नै दुनिया नै बणाण तै पैहल्या मेरतै प्यार करया सै।

<sup>25</sup> "हे धार्मिक पिता, दुनिया के माणसां नै तो तेरे ताहीं कोनी जाणया, पर मन्नै तेरे ताहीं जाण लिया सै, अर मेरे चेल्यां नै भी बेरा पाटग्या के तन्नै ए मेरैताहीं भेज्या सै। <sup>26</sup> मन्नै तेरे ताहीं उनपै जाहिर करया सै, अर जाहिर होन्दा रहूँगा, के जो प्यार तन्नै मेरतै करया था वोए प्यार उन म्ह बस जावै, अर मै उन म्ह रहूँ।"

## 18

~~~~~

(~~~~~ 26:47-56; ~~~~ 14:43-50; ~~~~~ 22:47-53)

<sup>1</sup> जिब यीशु नै प्रार्थना खतम कर ली, तो वो अपणे चेल्यां के गेल्या किद्रोन नाळे कि परली ओड़ गया। उड़ै एक फूल्लां का बाग था, जिस म्ह वो अर उसके चेल्लें गए।

<sup>2</sup> यीशु का पकड़ाण आळा यहूदा भी उस जगहां नै जाणै था, क्यूँके यीशु अपणे चेल्यां कै गैल उड़ै जाया करै था। <sup>3</sup> फेर यहूदा, सिपाहियाँ कै एक टोळ नै अर प्रधान याजकां अर फरीसियाँ की ओड़ तै मन्दर के पैहरेदारां नै लेकै, दीवे अर मशाल अर हथियारां नै लेकै उड़ै आया।

\* 17:17 17:17 समर्पित पवित्तर कर

4 फेर यीशु, उन सारी बात्तां नै जो उसपै बीत्तण आळी थी जाणकै, लिक्कडकै उन ताहीं पूछा, “किसनै टोह्लो सो?”

5 उननै उस ताहीं जवाब दिया, “यीशु नासरी\* नै ।” यीशु नै उन ताहीं कहुआ, “मैए सूं ।” यीशु नै पकड़वाण आळा यहूदा भी उनके गेल्या खड्या था । 6 जिब यीशु नै उनतै कहुआ, “मै सूं,” वे पाच्छे हटकै धरती पै पड़गे ।

7 फेर उसनै दुवारै उन ताहीं बुझ्झया, “थम किसनै टोह्लो सो?” वे बोल्ले, “यीशु नासरी† नै ।”

8 यीशु नै जवाब दिया, “मन्नै तो थारे ताहीं कह दिया सै के वो मै सूं, जै थम मन्नै टोह्लो सो तो इन माणसां नै जाण दो ।” 9 यो इस करकै के खुद उसके जरिये कहुआ गया यो वचन पूरा हो, “मन्नै उन म्ह तै एक भी न्ही खोया, जिन ताहीं तन्नै मरतै सौप्या था ।”

10 फेर शमौन पतरस नै तलवार, जो उसकै धारै थी, खीचची अर महायाजक के नौक्कर पै चलाकै उसका सोळा कान उड़ा दिया, उस नौक्कर का नाम मलखुस था ।

11 फेर यीशु नै पतरस तै कहुआ, “अपणी तलवार म्यान म्ह धर । जो दुख का कटोरा पिता नै मेरै ताहीं दिया सै, के मै उसनै न्ही पीऊँ?”

~~~~~

12 फेर रोमी सिपाहियाँ अर उनके सूबदार अर यहूदिया परदेस के मन्दर के पैहरेदारां नै यीशु ताहीं पकड़कै बाँध लिया, 13 अर पैहल्या उस ताहीं हन्ना के धारै ले गए, क्यूँके वो उस साल के महायाजक काइफा का सुसरा था । 14 यो बोए काइफा था, जिसनै यहूदियाँ ताहीं सलाह दी थी के म्हारे माणसां खात्तर एक आदमी का मरण ठीक सै ।

~~~~~

15 शमौन पतरस अर एक और दुसरा चेल्ला भी यीशु के पाच्छे हो लिए । यो चेल्ला महायाजक का जाण-पिच्छाण का था, ज्यांतै वो यीशु के गेल्या महायाजक के आँगण म्ह गया, 16 पर पतरस बाहरणै दरवाजे पै खड्या रह्या । फेर दुसरा चेल्ला जो महायाजक की जाण-पिच्छाण का था, वो बाहरणै लिक्कड्या अर पहरेदारी तै कहकै पतरस ताहीं भीत्तर लियाया ।

17 उस नौकराणी नै, जो पहरेदारी भी थी, पतरस तै कहुआ, “कदे तू भी इस माणस के चेल्यां म्ह तै तो न्ही सै?” उसनै कहुआ, “मे कोनी ।”

18 नौक्कर अर मन्दर के पहरेदारां नै जाइडे के कारण आग जळा राक्खी थी, अर खडे होकै सेक्के थे, अर पतरस भी उनके गेल्या खड्या आग सेक्के था ।

~~~~~

19 फेर महायाजक नै यीशु तै उसके चेल्यां के बाबत अर उसके उपदेशां के बाबत जाँच-पड़ताळ करी ।

20 यीशु नै उस ताहीं जवाब दिया, “मन्नै हरेक माणस तै खुलकै बात करी, मन्नै सभायां अर आराधनालयाँ म्ह, जइ सारे यहूदी कट्टे होया करै सै, सारी हाण उपदेश दिया अर लुहक कै कुछ कोनी कहुआ । 21 तू क्यूँ मेरै तै सवाल बुझ्झै सै? सवाल उनतै कर जिननै मेरै वचन सुणे सै, वे जाणे सै, के मन्नै उन ताहीं के-के कहुआ ।”

22 जिब उसनै न्यू कहुआ, तो मन्दर के पैहरेदारां म्ह तै एक नै जो धारै खड्या था, यीशु कै थप्पड़ मारकै कहुआ, “के तन्नै महायाजक ताहीं इस तरियां जवाब देण की हिम्मत किसी करी?”

23 यीशु नै उसतै जवाब दिया, “जै मेरा कहणा गलत सै तो साबित करो पर मन्नै जो कहुआ सै वो सही सै तो फेर थम मेरै क्यूँ मारण लागरे सों?” 24 इस खात्तर यीशु ताहीं जो इब भी बाँधे होए थे, हन्ना नै काइफा महायाजक के धारै भेज दिया ।

~~~~~

\* 18:5 18:5 नासरत नगर का रहण आळा † 18:7 18:7 नासरत नगर का रहण आळा

25 शमौन पतरस खडचा होया आग सेक्कै था, फेर उननै उसतै कह्या, “कदे तू भी उसकै चेल्यां म्ह तै तो न्ही सै?” उसनै नाट-कै कह्या, “मै कोनी।”

26 महायाजक के नौकरां म्ह तै एक, जो उसकै कुणबे म्ह तै था, जिसका कान पतरस नै काट दिया था, बोल्या, “के मन्नै तेरे ताहीं यीशु कै गेल्या फूल्लां के बाग म्ह कोनी देख्या था?” 27 पतरस फेर नाटग्या, अर जिब्बे मुर्गे नै बाँग देई।

~~~~~

28 फेर वे यीशु ताहीं काडफा के धारे तै किले‡ म्ह लगे, अर तडकैए का बखत था, पर वे खुद किले के भीत्तर कोनी गए ताके वे फसह का भोज खाण तै पैहल्या अशुद्ध ना हों जावै। 29 फेर राज्यपाल पिलातुस उनके धारे बाहरणै लिकड़के आया अर कह्या, “थम इस माणस पै किस बात का दोष लाओ सो?”

30 उननै उस ताहीं जवाब दिया, “जै वो बुरे काम करणीया न्ही होंदा तो हम इसनै तेरे धारै कोनी ल्यान्दे।”

31 पिलातुस नै उनतै कह्या, “थमे इसनै ले जाके अपणे नियम-कायदा कै मुताबिक इसका न्याय करो।” यहूदी अगुवां नै उसतै कह्या, “हमनै हक कोनी के किसे की जानलेवा।” 32 “यो इस करके होया, ताके यीशु की वा बात पूरी हो जो उसनै यो इशारा देंदे होइ कही थी के उसकी मौत किस ढाळ होगी।”

33 फेर पिलातुस दुबारै किले के भीत्तर गया, यीशु ताहीं बुलाके उसनै बुझ्झया, “के तू यहूदियाँ का राजा सै?”

34 यीशु नै जवाब दिया, “के तू या बात अपनी ओइ तै कहवै सै या दुसरयां नै मेरै बाबत तेरे तै न्यू कह्या सै?” 35 पिलातुस नै जवाब दिया, “के मै यहूदी न्ही सूं, तेरी-ए कोम अर प्रधान याजकां नै तेरे ताहीं मेरै हाथ म्ह सौंप्या सै। तन्नै के करया सै?”

36 यीशु नै जवाब दिया, “मेरा राज्य इस दुनिया का कोनी, जै मेरा राज्य इस दुनिया का होंदा, तो मेरे सेवादार लइदे के मै यहूदी अगुवां कै हाथ्यां सौंप्या कोनी जान्दा पर सच्चाई तो या सै के मेरा राज्य आइँ का सै ए कोनी।”

37 पिलातुस नै उसतै कह्या, “के तू राजा सै?” यीशु नै जवाब दिया, “तू कहवै सै के मै राजा सूं। मन्नै ज्यांतै जन्म लिया अर ज्यांतै दुनिया म्ह आया सूं, के सच की गवाही दियुँ। जो कोए सच का सै, वो मेरा वचन सुणै सै।”

~~~~~

38 पिलातुस नै उसतै कह्या, “सच के सै?” न्यू कहके वो फेर यहूदी अगुवां कै धारै लिकड़ आया अर उन ताहीं कह्या, “मै तो उस म्ह कुछ खोट कोनी पांदा।”

39 पर धारे यो रिवाज सै के मै फसह पे धारे खात्तर एक माणस नै छोड़ दियुँ। आखर के थम चाह्को सो, “के मै धारे खात्तर यहूदियाँ के राजा नै छोड़ दियुँ?”

40 फेर उननै रुक्के मारके कह्या, “इसनै न्ही, पर म्हारै खात्तर बरअब्बा नै छोड़दे।” जिब के बरअब्बा बिद्रोही था।

## 19

1 फेर पिलातुस राज्यपाल नै यीशु कै कोड़े लगवाण खात्तर सिपाहियाँ के हाथ सौप दिया।

2 सिपाहियाँ नै काण्डयाँ का मुकुट गूँथके उसकै सिर पे धरया, अर उस ताहीं बैजनी लत्ते पिहराये,

3 अर उसकै धारै आ-आके कहण लाग्गे, “हे यहूदियाँ के राजा, प्रणाम!” अर उसकै थप्पड़ भी मारे।

4 फेर पिलातुस नै दुबारै बाहरणै लिकड़के माणसां ताहीं कह्या, “लखाओ, मै उसनै धारे धारै फेर ल्याया सूं, ताके थमनै बेरा लाग्गे के मै उस म्ह कुछ भी खोट कोनी पान्दा।” 5 फेर यीशु ताहीं

‡ 18:28 18:28 जो पिरटोरियम कुह्वावे सै

काण्डयाँ का मुकुट अर बैजनी लत्ते पहेर होइ बाहरणै लेग्या, अर पिलातुस नै उन ताहीं कह्या, “देक्खों, इस माणस नै!”

6 जिव प्रधान याजकां अर मन्दर के पैहरेदारां नै उस ताहीं देख्या, तो रुक्के मारकै कह्या, “उस ताहीं करूस पै चढ़ा, करूस पै!” पिलातुस नै उनतै कह्या, “थमे उसनै ले जाकै करूस पै चढ़ाओ, क्यूँके मै उस म्ह कोए खोट कोनी पान्दा।”

7 यहूदी अगुवां नै उस ताहीं जवाब दिया, “म्हारे नियम-कायदे सै अर उस नियम-कायदा के मुताबिक इस माणस नै मौत की सजा मिलणी चाहिये, क्यूँके इसनै खुद ताहीं परमेसवर का बेट्टा होण का दावा करया सै।”

8 जिव पिलातुस नै या बात सुणी तो और भी घणा डरग्या, 9 अर दुबारै किले\* के भीत्तर गया अर यीशु तै कह्या, “तू कितका सै?” पर यीशु नै उसतै कुछ भी जवाब कोनी दिया। 10 इसपै पिलातुस नै उसतै कह्या, “मेरतै क्यातै न्ही बोल्दा? के तन्नै कोनी बेरा के तेरे ताहीं छोड़ देण का हक मेरै ताहीं सै, अर तेरे ताहीं करूस पै चढ़ाण का भी मेरै ताहीं हक सै।”

11 यीशु नै जवाब दिया, “जै तेरे ताहीं परमेसवर की ओड़ तै हक न्ही दिया जान्दा, तो तेरा मेरै पै कोए हक कोनी होंदा, ज्यातै जिसनै मेरै ताहीं तेरे हाथ पकड़ाया सै उसका पाप घणा सै।”

12 इस बात नै सुणकै पिलातुस नै उस ताहीं छोड़ देणा चाह्या, पर यहूदी माणसां की भीड़ नै रुक्के मार-मारकै कह्या, “जै तू इसनै छोड़ देवैगा, तो तू कैसर का बिरोध्दी बण जावैगा। जो कोए खुद नै राजा होण का दावा करै सै, वो कैसर का बिरोध्द करै सै।”

13 ये बात सुणकै पिलातुस यीशु नै बाहरणै ल्याया अर उड़ै न्याय की गद्दी पै बैठग्या, जो इब्रानी भाषा म्ह “गब्बता” कुह्वावै सै, जिसका मतलब चोतरा हो सै। 14 यो फसह की त्यारी का दिन था, अर दोफाहरा का बखत था। फेर उसनै यहूदी माणसां ताहीं कह्या, “यो रह्या थारा राजा!”

15 पर उननै और ऊँच्ची आवाज म्ह कह्या, “उस ताहीं मार द्यो! उस ताहीं मार द्यो! उस ताहीं करूस पै चढ़ा!” पिलातुस नै उनतै कह्या, “के मै थारे राजा नै करूस पै चढ़ाऊँ?” प्रधान याजकां नै जवाब दिया, “कैसर नै छोड़ म्हारा और कोए राजा कोनी।” 16 फेर पिलातुस नै यीशु ताहीं करूस पै चढ़ाण खात्तर उनकै हवालै कर दिया।

### \*\*\*\*\*

17 फेर सिपाही यीशु नै ले गए, अर यीशु अपना करूस टाए होए उस जगहां तक बाहर गया, जो “खोपड़ी” यानी इब्रानी भाषा म्ह “गुलगुता” कुह्वावै सै। 18 उड़ै उननै उस ताहीं अर उसके गेल्या और दो माणसां ताहीं करूस पै चढ़ाया, एक इस ओड़ अर एक दुसरी ओड़, अर बिचाळै यीशु ताहीं।

19 पिलातुस नै एक दोषपत्र लिखकै करूस पै लगवा दिया, अर उसपै लिख्या होया था, “यीशु नासरी†, यहूदियाँ का राजा।”

20 यो दोषपत्र घणखरे यहूदियाँ नै पढ़या, क्यूँके यरुशलेम नगर जड़ै यीशु करूस पै चढ़ाया गया था नगर कै धौरे थी, अर दोषपत्र इब्रानी अर लतीनी अर यूनानी म्ह लिख्या होया था। 21 फेर यहूदियाँ के प्रधान याजकां नै पिलातुस तै कह्या, “यहूदियाँ का राजा” मतना लिखै पर यो के उसनै कह्या, “मै यहूदियाँ का राजा सूँ।” 22 पिलातुस नै जवाब दिया, “मन्नै जो लिखणा था, लिख दिया।”

23 जिव सिपाहियाँ नै यीशु ताहीं करूस पै चढ़ा दिया, तो उसके लत्ते लेकै चार हिस्सां म्ह बांड लिए, हरेक सिपाही खात्तर एक हिस्सा, अर कुड़ता भी लिया, पर कुड़ता बिन सिलाई उप्पर तै तळै ताहीं सिम्या होया था।

24 इस करकै सिपाहियाँ नै आप्स म्ह कह्या, “हम इस ताहीं पाड़ा कोनी, पर इसपै पर्ची गेर कै, के यो किसका होवैगा।” न्यू इस करकै होया के पवित्र ग्रन्थ म्ह जो लिख्या होया वो पूरा हो, “उननै मेरे लत्ते आप्स म्ह बांड लिए अर मेरे लत्ते पै पर्ची गेरी।”

\* 19:9 19:9 जो पिरटोरियम कुह्वावै सै † 19:19 19:19 नासरत नगर का रहण आळा



25 आखर म्ह सिपाहियाँ नै इसाए करया । यीशु कै क्रूस कै धोरै यीशु की माँ, अर उसकी मौस्सी, क्लोपास की घरआळी मरियम, अर मगदल गाम की मरियम खड़ी थी । 26 जिव यीशु नै अपनी माँ, अर उस चेल्लें ताहीं जिसतै वो प्यार करै था, धोरै खड़े देख्या तो अपनी माँ तै कह्या, “हे नारी, लखा, यो तेरा बेट्टा सै ।” 27 फेर उस चेल्लें तै कह्या, “या तेरी माँ सै ।” अर उससे बखत वो चेल्ला उस ताहीं अपने घरां लेग्या ।

???? ??

28 इसकै पाच्छे, यीशु नै बेरा लागग्या के इब उसनै सारा काम पूरा कर लिया सै, ज्यांतै के पवित्तर ग्रन्थ म्ह जो कह्या गया वो पूरा हो, कह्या, “मै तिसाया सूं ।” 29 उड़े सिरके तै भरया होइ एक बास्सण धरया था, आखर म्ह सिपाहियाँ नै सिरके म्ह भेकै स्पंज (फोम) ताहीं जुफे की लाट्टी पै धरकै उसके मुँह कै लगाया 30 जिव यीशु नै वो सिरका चख्या, तो कह्या, “पूरा होया,” अर सिर झुकाकै जी दे दिया ।

???? ?? ????? ???? ?

31 इब यो त्यारी का दिन था, अर आगला दिन आराम का दिन अर फसह का दिन था, यो यहूदी माणसां खात्तर एक खास दिन था, अर वे न्ही चाहवै थे, के इस दिन देह क्रूस पै टंगी रहवै, इस करकै यहूदियाँ नै पिलातुस तै विनती करी के उन माणसां की टाँग तोड़ दी जावै, जो क्रूस पै चढ़ाये गये थे । 32 आखर म्ह सिपाहियाँ नै आकै उन माणसां म्ह तै पैहले की टाँग तोड़ी फेर दुसरे की भी, जो उसके गेल्या क्रूस पै चढ़ाए गए थे, 33 पर जिव यीशु कै धोरै आकै देख्या के वो मर लिया सै, तो उसकी टाँग कोनी तोड़ी । 34 पर सिपाहियाँ म्ह तै एक नै बरछी तै उसका पंजर चीर दिया, अर उस म्ह तै जिब्बे लहू अर पाणी लिकइया । 35 जिस माणस नै यो देख्या, उसनै गवाही दी सै, अर उसकी गवाही साच्ची सै, अर उननै बेरा सै के वो साच्ची कह सै के थम भी बिश्वास करो । 36 ये बात ज्यांतै होई के पवित्तर ग्रन्थ म्ह जो कह्या गया वो पूरा हो, “उसकी कोए हाड्डी कोनी तोड़ी जावैगी ।” 37 फेर एक और जगहां पै पवित्तर ग्रन्थ म्ह न्यू लिख्या सै, “जिस ताहीं उननै बेधा सै, उसनै वे देखवेंगे ।”

???? ?? ??????? ???? ?

38 इन बाततां पाच्छे अरिमलिया गाम के यूसुफ नै जो यीशु का चेल्ला था, पर यहूदी अगुवां के डर के मारे इस बात नै लकोए राक्खे था, पिलातुस तै विनती करी, के वो यीशु की लाश ले जा सकै सै । पिलातुस नै उसकी विनती सुणी, अर वो आके उसकी लाश लेग्या । 39 नीकुदेमुस भी, जो पैहले यीशु के धोरै रात नै गया था, पचास सेर के करीबन रळा होइ गन्धरस अर एलवा (काण्डयाँ आळा पोधा) लियाया । 40 फेर उननै यीशु की लाश ली, अर यहूदियाँ के गाड्डण के रिवाज के मुताबिक उस ताहीं खुशबुदार द्रव्य के गेल्या कफन म्ह लपेट्या । 41 उस जगहां पै जड़े यीशु क्रूस पै चढ़ाया गया था, एक फूल्लां का बगीचा था, अर उस फूल्लां की क्यारी म्ह एक नई कबर थी जिसम्ह कदे कोए कोनी राख्या ग्या था । 42 ज्यांतै उननै यीशु की लाश ताहीं उससे कबर म्ह धर दिया, क्यूँके वा लोवै ए थी, अर वो यहूदियाँ के आराम की त्यारी का दिन भी था ।

## 20

?????? ???? ?

1 हफ्ते के पैहलडे दिन तड़केए सूरज लिकइण तै पैहल्या अन्धेरै रहदे ए मगदल गाम की मरियम कबर पै गई, अर पत्थर ताहीं कबर पै तै हटया होइ देख्या । 2 फेर वा भाज्जी अर शमौन पतरस अर उस दुसरे चेल्ले के धोरै जिसतै यीशु प्यार राक्खे था, आके कह्या, “वे प्रभु की लाश नै कबर म्ह तै काढ लेगे सै, अर हमनै न्ही बेरा के उस ताहीं कित्त धर दिया सै ।”

3 फेर पतरस अर वो दुसरा चेल्ला\* लिकड़के कबर के कान्ही चाल्ले। 4 वे दोन्नु गैल-गैल भाजरे थे, पर दुसरा चेल्ला पतरस तै तेज भाजके कबर पै पैहल्या पोंहच्या, 5 अर झुकके लते पड़े देखे, तोभी वो भीत्तर कोनी गया। 6 फेर शमौन पतरस उसके पाच्छै-पाच्छै पोंहच्या, अर कबर के भीत्तर गया अर उसनै भी लते पड़े देखे, 7 अर वो अंगोच्छा जो उसके सिर पै बन्ध्या होड़ था, लत्यां के गेल्या कोनी पड्या था, पर न्यारा एक जगहां लपेटके धरया होया देख्या। 8 फेर दुसरा चेल्ला भी जो कबर पै पैहल्या पोंहच्या था, भीत्तर गया अर देखके विश्वास करया के यीशु मुदां म्ह तै जिन्दा होग्या। 9 पतरस अर दुसरा चेल्ला इब ताहीं पवित्तर ग्रन्थ की वा बात कोनी समझे थे के उसनै मरे होया म्ह तै जी उठणा होगा। 10 फेर चेल्ले अपणे घरां बोहड़गे।

\*\*\*\*\*

11 पर मरियम† रोदी होई कबर के धोरे ए बाहरणै खड़ी रही, अर रोन्दे-रोन्दे कबर के कान्ही कोडडी होके, 12 दो सुगंदतां ताहीं धोळे-चमकदे लते पहेरे होड़ एक सिरहाणै अर दुसरे ताहीं पांयां की ओड़ बेटठे देख्या, जड़े यीशु की लाश धरी गई थी।

13 उननै उस ताहीं कह्या, “हे नारी, तू क्यातै रोवै सै?” उसनै उन ताहीं कह्या, “वे मेरै प्रभु की लाश नै टा लेगे अर मन्नै कोनी बेरा के उसनै कित्त धर राख्या सै।” 14 न्यू कहके वा पाच्छै मुड़ी अर यीशु ताहीं खड़े देख्या, पर पिच्छाणया कोनी के यो यीशु सै।

15 यीशु नै उसतै कह्या, “हे नारी, तू क्यातै रोवै सै? किसनै टोहवै सै?” उसनै माळी समझके उस ताहीं कह्या, “हे शरीमान, जै तन्नै उस लाश ताहीं टा लिया सै, तो मन्नै बता के उस ताहीं कित्त धर राख्या सै, अर मै उसनै ले जाऊँगी।”

16 यीशु नै उस ताहीं कह्या, “मरियम!” उसनै बोहड़के उस ताहीं इब्रानी म्ह कह्या, “रखुनी!” यानिके “हे गुरु”।

17 यीशु नै उस ताहीं कह्या, “पैरां म्ह लिपटके मन्नै मतना छुओ, क्यूँके मै इब ताहीं पिता के धोरे उप्पर कोनी गया, पर मेरे भाईयां के धोरे जाके उनतै कह दे, के मै अपणे पिता अर थारे पिता, अर अपणे परमेसवर अर थारे परमेसवर के धोरे उप्पर जाके आऊँ सूँ।”

18 मरियम मगदलीनी नै जाके चेल्यां ताहीं बताया, “मन्नै प्रभु ताहीं देख्या, अर उसनै मेरै तै ये बात कही।”

\*\*\*\*\*

19 उससे दिन जो हफ्ते का पैहलड़ा दिन था, साँझ के बखत यहूदियां के डर के मारे चेल्ले जिब किवाड़ मुंदे होड़ एक कमरे म्ह थे, तो यीशु उनके बिचाळे आ खड्या होया अर उनतै बोल्या, “थमनै शान्ति मिलै।” 20 अर न्यू कहके उसनै अपणे हाथ्यां के घा अर अपणा पंजर उनतै दिखाए। फेर चेल्ले यीशु नै देखके राज्जी होए।

21 यीशु नै फेर उनतै कह्या, “थमनै शान्ति मिलै: जिस तरियां पिता नै मेरै ताहीं दुनिया म्ह भेज्या सै, उससे तरियां ए मै थमनै दुनिया म्ह भेज्जू सूँ।” 22 न्यू कहके उसनै उनपै फूँक मारी अर उसनै कह्या, “पवित्तर आत्मा ल्यो। 23 जिनके पाप थम माफ करो, वे उनके खात्तर माफ करे गए सै, जिनके थम राखो, वे राखे गए सै।”

\*\*\*\*\*

24 पर बारहा चेल्यां म्ह तै एक, यानिके थोमा जो दिदुमुस कुह्लावै सै, जिब यीशु आया तो उनके गेल्या कोनी था। 25 जिब दुसरे चेल्ले उसतै कहण लागगे, “हमनै प्रभु ताहीं देख्या सै,” फेर उसनै उनतै कह्या, “जिब ताहीं मै उसके हाथ्यां म्ह कील्लां के छेद न्ही देख ल्युँ, अर कील्लां के छेदां म्ह अपणी आंगळी न्ही घाल ल्युँ, अर उसके पंजर म्ह अपणा हाथ ना घाल ल्युँ, जद ताहीं विश्वास कोनी करूंगा।”

\* 20:3 20:3 दुसरा चेल्ला यूहन्ना † 20:11 20:11 मरियम मगदला गाम की



16 उसने दुसरी बर उसतै कहा, “हे शमीन, यूहन्ना के बेटे, के तू मेरे तै प्यार राख्खे सै?” उसने उसतै कहा, “हाँ प्रभु, तन्ने तो बेरा सै के मै तेरे तै प्यार राख्खूँ सूँ।” उसने उसतै कहा, “मेरी भेड़ों की रखाळी कर।”

17 उसने तीसरी बर उस ताहीं कहा, “हे शमीन, यूहन्ना के बेटे, के तू मेरतै प्यार राख्खे सै?” पतरस काल होया के उसने उसतै तीसरी बर इसा कहा, “हे शमीन, यूहन्ना के बेटे, के तू मेरतै प्यार राख्खे सै?” अर उसतै कहा, “हे प्रभु, तन्ने तो सारा कुछ बेरा सै, तन्ने न्यू बेरा से के मै तेरे तै प्यार राख्खूँ सूँ।” यीशु ने उसतै कहा, “मेरी भेड़ों नै चरा।” 18 मै तेरे तै साच्ची-साच कहूँ सूँ, “जिब तू जवान था तो अपणी कड़ बाँधकै जड़ै चाहवै था उड़ै हाँडै था, पर जिब तू बूढ़ा होगा तो अपने हाथ पसरैगा, अर दुसरा तेरी कड़ बाँधकै जड़ै तू ना चाहवैगा उड़ै तन्ने ले जावैगा।” 19 यीशु नै इन बातों तै इशारा करया के पतरस किसी मौत तै परमेसवर की महिमा करैगा, अर फेर उसने उसतै कहा, “मेरे पाच्छे हो ले।”

⚠️⚠️⚠️⚠️⚠️⚠️⚠️⚠️⚠️

20 पतरस नै बाहड़के उस चेल्ले ताहीं पाच्छे आन्दे देख्या, जिसतै यीशु प्यार राख्खे था, जो खाणे के बखत उसके साथ बेटया था, उसतै बुझया, “हे प्रभु, तेरा पकड़वाण आळा कौण सै?” 21 उस ताहीं देखके पतरस नै यीशु तै कहा, “हे प्रभु, इसका के हाल होगा?”

22 यीशु नै उसतै कहा, “जै मै चाहूँ के वो मेरे आण ताहीं रुक्या रहवै, तो तन्ने इसतै के? तू मेरे पाच्छे हो ले।” 23 ज्यातै भाईयाँ म्ह या बात फैलगी के वो चेल्ला कोनी मरैगा, फेर भी यीशु नै उसतै न्यू कोनी कहा के वो कोनी मरैगा, पर यो के, “जै मै चाहूँ के वो मेरे आण ताहीं रुक्या रहवै, तो तन्ने इसतै के?”

⚠️⚠️⚠️⚠️

24 यो वोए चेल्ला सै जो इन बातों की गवाही देवै सै अर जिसने इन बातों ताहीं लिख्या सै, अर हमने बेरा सै के उसकी गवाही साच्ची सै।

25 और भी घणेए काम सै, जो यीशु नै करे, जै वे एक-एक करके लिखे जान्दे, तो मै समझूँ सूँ के किताब जो लिखी जान्दी वा दुनिया म्ह भी कोनी समान्दी।

## प्रेरितां के काम का वर्णन



प्रेरितां के काम का वर्णन लूका के जरिये लिखे गये सुसमाचार के आगू का जिक्र है। इसका खास मकसद यो बताणा है, के यीशु के शरुआती चेल्यां नै पवित्र आत्मा के अगुवाई म्ह, यीशु के बारे म्ह सुसमाचार ताहीं यरुशलेम नगर अर सारे यहूदिया अर सामरिया परदेस म्ह, अर धरती के छोर ताहीं (1:8) किस तरियां फैलाया। यो मसीह आन्दोलन का ब्यौरा है, जो यहूदी माणसां के बीच म्ह शरु होया, अर बढ़ के सारे दुनिया के माणसां का विश्वास बणगया। लेखक इस बात का ध्यान राखै है, के उसके पाठकां नै यो पक्का यकिन हो जावै के मसीह माणस रोमी साम्राज्य के खात्तर एक बिद्रोही राजनैतिक शक्ति न्ही थे, अर मसीह विश्वास यहूदी धर्म की पूर्ति था। प्रेरितां के काम की किताब ताहीं तीन भागां म्ह बाटया जा सकै है, जो लगातार बढ़ते क्षेत्र नै दिखावै है, जिस म्ह यीशु मसीह का सुसमाचार प्रचार करया गया अर कलीसियां बणाई गईं (: 1) यीशु के सुर्ग जाण के बाद यरुशलेम म्ह मसीह आन्दोलन की शरुआत; 2) पलस्तीन के दुसरे हिस्सां म्ह इसका बढ़ाणा, अर 3) भूमध्य सागर के देशां म्ह रोम ताहीं इसका विस्तार। प्रेरितां के काम की एक भोत बड़ी खासियत है, पवित्र आत्मा का काम करणा। पवित्र आत्मा पिन्तेकुस्त के दिन यरुशलेम म्ह कट्टे होए विश्वासियां पै बड़ी शक्ति के गैल उतरे है, अर इस किताब म्ह बिची घटनाओं के दौराण कलीसिया अर उसके अगुवां ताहीं राह दिखाणा अर उननै शक्ति देणा है। प्रेरितां के काम म्ह दिए गये कई उपदेशां म्ह शरुआती मसीह सन्देश का सार पेश करया गया है, अर इस म्ह लिखी घटनाएं विश्वासियां के जिन्दगी म्ह अर कलीसिया की संगति म्ह इस सन्देश की शक्ति नै दिखावै है।

### रूप-रेखा

गवाही खात्तर तैयारी 1:1-26

क-यीशु का आखरी हुकम अर करार 1:1-14

ख-यहूदा का उत्तराधिकारी 1: 15-26

यरुशलेम नगर म्ह गवाही 2:1-8:3

यहूदिया अर सामरिया परदेस म्ह गवाही 8:4-12:25

पौलुस की सेवकाई 13:1-28:31

क-पैहली प्रचार-यात्रा 13:1-14:28

ख-यरुशलेम म्ह सम्मेलन 15:1-35

ग-दुसरी प्रचार-यात्रा 15:36-18:22

घ-तीसरी प्रचार-यात्रा 18:23-21:16

च-यरुशलेम, कैसरिया नगर अर रोम देश म्ह बन्दी पौलुस 21:17-28:31



1 हे थियुफिलुस, मन्ने पैहलड़ी किताब उन सारी बाततां के बारे म्ह लिक्खी, जो यीशु शरु तै लेकै सुर्ग म्ह टाए जाण तक करदा अर सिखान्दा रहया, 2 पर यीशु ताहीं परमेसवर के जरिये सुर्ग म्ह उटाए जाण तै पैहले उसनै अपने चुणे होए प्रेरितां ताहीं पवित्र आत्मा के जरिये हुकम दिया। 3 यीशु के दुख ठाण के पाच्छे, उन प्रेरितां के स्याम्ही भोत-से पक्के सबूत दिखाए के वो जिन्दा है, अर वो चाळीस दिन तक उननै दिखदा रहया, अर परमेसवर के राज्य की बात करदा रहया। 4 अर एक दिन मसीह यीशु नै उनतै कट्टे करके उन ताहीं हुकम दिया, “यरुशलेम नगर नै ना छोड़ो, पर पिता की उस प्रतिज्ञा की पूरे होण की बाट देखदे रहो, जिसका जिक्र थम मेरे तै सुण चुके

सो। <sup>5</sup>क्यूँके यूहन्ना नै तो पाणी तै बपतिस्मा दिया सै पर थोड़े दिनां पाच्छै थम पवित्र आत्मा तै बपतिस्मा पाओगे।”

~~~~~

<sup>6</sup>चेल्ले जिब यीशु तै दुबारा मिले तो उननै उसतै बुझ्झया, “हे प्रभु, के वो बखत आ गया सै, के तू इस्राएल ताहीं छुड़वा के उसनै दुबारा बसाके राजा के रूप म्ह सब पै शासन करैगा।”

<sup>7</sup>उसनै उनतै कहा, “उस बखत या युगा ताहीं, जिन ताहीं पिता नै अपणे अधिकार म्ह कर राख्या सै, उननै जाणणा थारा काम कोनी। <sup>8</sup>पर जिब पवित्र आत्मा थारे पै आवैगा फेर थम सामर्थ पाओगे, अर यरुशलेम नगर अर सारे यहूदिया और सामरिया परदेसां म्ह, अर धरती के सिरे ताहीं मेरे बाँरे म्ह गवाही द्योगे।”

<sup>9</sup>न्यू कहके यीशु उनके देखदे-देखदे परमेसवर के जरिये उप्पर ठा लिया गया, अर बाहळ नै उस ताहीं उनकी आँखां तै लहको लिया।

<sup>10</sup>उसके जान्दे बखत जिब वे अकास की ओड़ देखै थे, तो देखवो, चाणचक दो माणस धोळे लत्ते पहेरे ओड़ उनके लोवै आण खड़े होए, <sup>11</sup>अर उनतै कहा, “हे गलील परदेस के माणसां, थम खड़े अकास कान्ही क्यातै लखाओ सो? योए यीशु, जो परमेसवर के जरिये थारे धौरै तै सुर्ग पै ठा लिया गया सै, जिस तरियां तै थमनै उस ताहीं सुर्ग नै जान्दे देख्या उससे तरियां तै वो दुबारा आवैगा।”

~~~~~

<sup>12</sup>जिब सुर्गदूत चले गये, तो चेल्ले जैतून नाम के पहाड़ तै जो यरुशलेम नगर तै करीब आधे कोस\* की दूरी पै सै, यरुशलेम नगर म्ह बोहड़े। <sup>13</sup>जिब वे नगर पोहचे तो उस चुबारे पै गये, जित्त पतरस अर यूहन्ना अर याकूब अर अन्दरियास अर फिलिप्पुस अर थोमा अर बरतुल्मै अर मत्ती अर हलफई का बेट्टा याकूब अर शमौन, जेलोतेस† अर याकूब का बेट्टा यहूदा ये सारे माणस ओड़ै थे।

<sup>14</sup>ये सारे कई विरबानियाँ अर यीशु की माँ मरियम अर उसके भाईयाँ के गेल्या कट्टे होके एक मन तै प्रार्थना म्ह लागगे रहे।

<sup>15</sup>उन्हे दिनां म्ह पतरस विश्वासियाँ के बिचाळै म्ह जो एक सौ बीस आदमियाँ के करीबन थे, खड्या होके कहण लाग्या, <sup>16</sup>हे भाईयो, जरूरी था के पवित्र ग्रन्थ का वो लेख पूरा हो जो पवित्र आत्मा नै दाऊद के मुँह तै यहूदा के बाबत, जो यीशु के पकड़वाण आळा का अगुवां था, पैहल्याए तै कहा था। <sup>17</sup>क्यूँके वो तो म्हारै म्ह गिण्या गया, अर इस सेविकाई म्ह साइझी होया।

<sup>18</sup>“जिसा थम जाणो सों (उसनै पाप की कमाई तै एक खेत मोल लिया, अर सिर के बळ गिरया अर उसका पेट पाटग्या अर उसकी सारी आन्दड़ी लिकड़गी। <sup>19</sup>इस बात ताहीं यरुशलेम नगर के सारे रहणीये जाणगे, उरै ताहीं के उस खेत का नाम उनकी भाषा म्ह ‘हक्कलदमा’ यानिके ‘लहू का खेत’ पड़ग्या।)”

<sup>20</sup>“दाऊद नै भजन संहिता म्ह लिख्या सै, ‘उसका घर उजड़ जावै, अर यो भी लिख्या सै, के उस म्ह कोए न्ही बसै,’ अर ‘उसका पद कोए और ले लेवै।’”

<sup>21</sup>“इस करके यो जरूरी सै के एक इसा माणस छाट्या जावै, जो प्रभु यीशु के सारे काम्मां के हरेक बखत का गवाह हो, प्रभु यीशु ताहीं यूहन्ना के जरिये बपतिस्मा दिये जाण तै लेके, सुर्ग म्ह स्वीकार किये जाण तक, <sup>22</sup>वो माणस म्हारे गैल प्रभु यीशु के जिन्दा होण का गवाह बणै।”

<sup>23</sup>फेर उननै दो नाम सुझाए, एक यूसुफ जो बरसब्बा कुह्हावै था, जिसका उपनाम यूसतुम सै, दुसरा मत्तियाह ताहीं, <sup>24</sup>अर या प्रार्थना करी, “हे प्रभु, तू जो सारया के मनां नै जाणै सै, न्यू बता के इन दोनुआ म्ह तै तन्नै किस ताहीं चुण्या सै, <sup>25</sup>के वो इस सेवा के काम अर प्रेरितों की वा खाल्ली जगहां ले, जिसनै यहूदा छोड़के अपनी जगहां चल्या गया, जित्त उसनै जाणा चाहिए था।” <sup>26</sup>फेर

\* 1:12 1:12 एक किलो. मी. † 1:13 1:13 एक कटर पंथी राजनैतिक दल का नाम था जिसका वो सदस्य था

उनने उनके बाबत पर्ची भेरी, अर पर्ची मत्तियाह के नाम लिक्डी। आखर वो उन ग्यारहां प्रेरितां के गेल्या गिण्या गया।

## 2

### PEREIRA PEREIRA DE PEREIRA

1 यहूदिया के पित्तुकुस्त त्योहार के दिन, यीशु के चेल्लें एक जगहां कट्टे थे। 2 चाणचक अकास तै तेज आँधी जिसी आवाज आई, अर उसतै सारा घर जित्त वे बेट्टे थे, गूँजग्या। 3 अर उनने एक आग की लपट दिक्खी, जो जीभ के समान थी, वा आग की लपट अलग-अलग होके उन सब के उप्पर आ उतरी। 4 वे सारे पवित्र आत्मा तै भरगे, अर जो वरदान पवित्र आत्मा नै उन ताहीं दिया, उसके मुताबिक वो अन्य-अन्य भाषा बोल्लण लागगे।

5 उस बखत पूरी दुनिया की हरेक जात म्ह तै यहूदी-भगत यरुशलेम नगर म्ह रहण लागरे थे। 6 जिव आँधी जिसा शब्द गरजा, तो भीड़ लागी अर आदमी घबरागे, क्यूँके हर एक अपनी-अपनी भाषा म्ह चेल्यां ताहीं बोलदे सुणण लागरे थे। 7 वे सारे हैरान अर अचम्भा करके कहण लागगे, “देक्खो, जो वे बोल्लण लागरे सै के सारे गलीलवासी कोनी? 8 तो यो के होण लागरया सै, के जो म्हारे म्ह तै हर एक इन ताहीं अपनी-अपनी जन्म-भूमि की भाषा म्ह बात करते सुणै सै! 9 हम जो पारथी अर मेदी अर एलामी अर मेसोपोटामिया अर यहूदिया अर कप्पदूकिया अर पुन्तुस अर आसिया परदेस, 10 कुछ फरुगिया, पंफूलिया परदेस अर कुछ मिस्र देश अर लीबिया देश जो कुरेने नगर के लोवै-धेरै सै, इन सारे देशों के रहण आळे अर रोमी प्रवासी, 11 यानिके यहूदी माणस अर यहूदी पंथ धारण करण आळे, करेतो दीप अर अरब देश के माणस भी सै, पर अपनी-अपनी भाषा म्ह उनतै परमेसवर के बड़े-बड़े काम्मां का जिक्र सुणै सै।” 12 अर वे सारे हैरान होए अर घबराके एक-दुसरे तै कहण लागगे, “यो के होण लागरया सै?”

13 पर औरां नै मखौल करके कह्या, “वे तो नई मदिरा के नशै म्ह चूर सै।”

### PEREIRA DE PEREIRA

14 जिव पतरस उन ग्यारहां प्रेरितां के गेल्या खड्या होया, अर ठाड़ू आवाज म्ह बोल्या, “हे यहूदियासियों अर हे यरुशलेमवासियों, न्यू जाण ल्यो, अर कान लाके मेरी बात सुणो।” 15 जिसा थम समझरे सो, ये आदमी नशै म्ह कोनी, क्यूँके इब्बे दिन के नौ बजे सै। 16 जो थम म्हारे साथ होते होए देखण लागरे सों, यो योएल नबी के जरिये कही गई भविष्यवाणी का पूरा होणा सै।

17 “परमेसवर कहवै सै, के अन्त के दिनां म्ह इसा होवैगा के मै अपना आत्मा सारे माणसां ताहीं दियुंगा, अर थारे बेट्टे अर थारी बेट्टी भविष्यवाणी करेगी, अर थारे जवान दर्शन देखेंगे, अर थारे बुजुर्ग सपना देखेंगे।”

18 उन दिनां म्ह, मै अपने दास्तां, अर दासियां ताहीं अपनी आत्मा दियुंगा, अर वे भविष्यवाणी करेंगे।

19 अर मै उप्पर अकास म्ह अनोक्खे काम अर तळै धरती पै निशान, यानिके लहू अर आग अर धुमै का बाहळ दिखाऊंगा।

20 प्रभु के महान् अर तेजस्वी दिन के आण तै पैहल्या सूरज अंधेरा अर चाँद लहू-सा हो जावैगा।

21 अर जो कोए प्रभु का नाम लेवैगा, उसका उद्धार होवैगा।

22 “हे इस्राएलियों, इन बातों नै सुणो यीशु नासरी एक माणस था जिसका परमेसवर की ओड़ तै होण का सबूत उन सामर्थ के काम्मां अर हैरानी के काम्मां अर चमत्कारों तै जाहिर सै, जो परमेसवर नै थारे बिचाळे उसके जरिये कर दिखाए जिसके बारे म्ह थमने खुदे बेरा सै। 23 उससे यीशु ताहीं, जो परमेसवर की ठहराई होई योजना अर पूर्व ज्ञान के मुताबिक पकड़वाया गया, थमने अर्धमियाँ के हाथ्यां तै क्रूस पे चढ़ाके उस ताहीं मार दिया। 24 पर उससे ताहीं परमेसवर नै मौत के बन्धनां तै छुड़ाके जिन्दा करया, क्यूँके यीशु ताहीं अपने बस म्ह राखणा मौत खात्तर असम्भव था।” 25 राजा

दाऊद यीशु के बारे में कहते हैं, “मैं प्रभु ने सारी हाण अपने धोरे देखा रह्या क्यूँके वो मेरी सोळी ओड़ से, मैं उनतै नही डरूंगा जो लोग मेरा नुकसान करना चाहते हैं।”

26 इस्से कारण मेरा मन आनन्दित होया, अर मैं खुशी तै गाऊंगा, बल्के मेरी आस भी उस्से में बणी रहवैगी।

27 क्यूँके तू मेरे प्राणां ने अधोलोक में कोनी छोड़डैगा, अर ना अपने पवित्र माणस ने सड़ण देवैगा। 28 “तन्नै मेरे ताहीं जीण का राह बताया है, तू मन्नै दर्शन के जरिये आनन्द तै भर देवैगा।”

29 “हे भाईयो, मैं कुलपति राजा दाऊद के बारे में धारे तै हिम्मत करके कहूँ सूँके वो तो मरग्या अर गाड्या भी गया अर उसकी कब्र आज ताहीं म्हारे उरै न्यू-की-न्यू से। 30 वो नबी था अर उसने बेरा था के परमेसवर ने मेरे तै वादा करया है के मैं तेरी पीढी में तै एक माणस ने तेरे सिंहासन पे बिठाऊंगा, 31 उसने होण आळी बात ताहीं पैहल्याए तै देखके मसीह के जिन्दा उठण के बारे में भविष्यवाणी करी के ना तो उसका प्राण अधोलोक में छोड़्या गया अर ना उसकी देह सड़ण पाई। 32 इस्से यीशु ताहीं परमेसवर ने जिन्दा करया, जिसके हम सारे गवाह सां। 33 इस तरियां परमेसवर के सोळे हाथ पे सबतै ऊँचा पद पाके, अर पिता तै वो पवित्र आत्मा पाके जिसका वादा लिया गया था, उसने यो उण्डेल दिया है जो थम देखो अर सुणो सो। 34 क्यूँके दाऊद तो सुर्ग पे कोनी चढ्या, पर वो खुद कहते हैं, ‘प्रभु परमेसवर ने मेरे प्रभु तै कहा, मेरे सोळी ओड़ ने बैठ,

35 “जब ताहीं के मैं तेरे बैरियां ने तेरे कदमां तलै ना झुका दियुं।”

36 “आखर इस्राएल का सारा खानदान पक्की तरियां तै जाण लेवे के परमेसवर ने उस्से यीशु ताहीं जिस ताहीं थमने कूस पे चढ्या, प्रभु भी ठहराया अर मसीह भी।”

37 जब माणसां ने यो सुणया, तो विश्वास होग्या था के उनने गलत काम करया है, अर वे पतरस अर बाकी प्रेरितां तै बुद्धिण लागे, “हे भाईयो, हम के करा?”

38 पतरस ने उनतै कहा, “पाप करना छोड़ दो, अर धारे में तै हरेक अपने-अपने पापां की माफी के खातर यीशु मसीह के नाम तै बपतिस्मा लेवे, जब थम पवित्र आत्मा का दान पाओगे। 39 क्यूँके या प्रतिज्ञा थम, अर थारी ऊलादां, अर उन सारे दूर-दूर के आदमियां खातर भी है जिन ताहीं प्रभु म्हारा परमेसवर अपने धोरे बुलावैगा।”

40 पतरस ने कई और बाततां तै, भी गवाही दे-देके समझाया के अपने-अपने इस टेढी जात तै बचाओ। 41 आखर जिनने उसके वचन पे विश्वास करके बपतिस्मा लिया, अर उस्से दिन तीन हजार माणसां के करीबन उन में मिले।

42 जिनने पतरस के वचन पे विश्वास करया, वे प्रेरितां तै शिक्षा लेन्दे, अर संगति राखे, अर रोटी तोड़ण, अर प्रार्थना करण में मग्न रहे।

~~~~~

43 अर सारे के यरुशलम माणस डरगे, अर घणे अनोखे काम अर चमत्कार प्रेरितां के जरिये जाहिर होवै थे। 44 अर सारे विश्वास करणीये कट्टे रहवै थे, अर उनकी सारी चीज साझे में थी। 45 वे अपनी-अपनी जायदाद अर सामान बेच-बेचके जिसकी जरूरत होवै थी बांड दिया करे थे। 46 वे हरेक दिन एक मन होके मन्दर में कट्टे होवै थे, घर-घर रोटी तोड़दे होए खुशी अर मन की सीधई तै खाणा खावै थे, 47 अर परमेसवर की जय-जयकार करे थे, अर सारे माणस उनतै राज्जी थे जो उद्धार पावै थे, उन ताहीं प्रभु हरेक दिन उन में मिला देवै था।

### 3

~~~~~

1 पतरस अर यूहन्ना दोफाहरे के तीन बजे पाछै, प्रार्थना के बखत मन्दर में जाण लागे थे। 2 अर माणस एक जन्म तै लंगड़े ने ल्यावै थे, जिस ताहीं वे हरेक दिन मन्दर के बाहरण पे जो सुन्दर नामक फाटक कुह्लावै है, बिठा देवै थे, के वो मन्दर में जाण आळा तै भीख माँगै। 3 जब उसने पतरस अर यूहन्ना ताहीं मन्दर में जान्दे देख्या, तो उनतै भीख माँगै। 4 पतरस ने यूहन्ना के गेल्या



उसकी ओड़ गौर तै देखकै कद्दा, “म्हारी ओड़ लखा!” 5 आखर वो उनतै कुछ पाण की आस राखते होए उनकी ओड़ लखाण लाग्या ।

6 फेर पतरस नै कद्दा, “चाँदी अर सोन्ना तो मेरै धोरै सै न्ही, पर जो मेरै धोरै सै वो तन्नै दियुँ सुं, यीशु मसीह नासरी के नाम तै उठ अर चाल-फिर ।” 7 पतरस नै उसका सोळा हाथ पकड़कै उस ताहीं ठाया, अर जिब्बे उसके पायां अर टाखणयां म्ह ताकत आगी । 8 वो उछळते-कूदते खड्या होग्या अर चाल्लण-फिरण लाग्या, अर चाल्दा, अर कुद्दा, अर परमेसवर की जय-जयकार करदा होया उनकै गेल्या मन्दर म्ह गया । 9 सारे आदमियाँ नै उस ताहीं चाल्दे-फिरदे अर परमेसवर की जय-जयकार करदे होए देखकै, 10 उस ताहीं पिच्छाण लिया के यो वोए सै जो मन्दर के “सुन्दर” नामक फाटक पै बैठकै भीख मांग्या करै था, अर उस घटना तै जो उसकै गेल्या होई थी वे घणे अचम्भित अर हैरान होए ।

~~~~~

11 जब वो पतरस अर यूहन्ना ताहीं पकड़े होए था, तो सारे माणस घणे हैरान होन्दे होए उस बराम्दा म्ह जो सुलैमान का कुद्दावै सै, उनकै धोरै भाज्जे आये । 12 न्यु देखकै पतरस नै माणसां तै कद्दा, “हे इस्राएलियों, थम इस माणस पै क्यातै हैरान होवो सो, म्हारी ओड़ क्यातै इस ढाळ लखाओ सो, के मान्नो हमनै-ए अपणी सामर्थ या भगति तै इस ताहीं चाल्लण-फिरण जोग्गा बणा दिया । 13 अब्राहम अर इसहाक अर याकूब के परमेसवर, म्हारे पूर्वजां के परमेसवर नै अपने सेवक यीशु मसीह की महिमा करी, जिस ताहीं थमनै पकड़वा दिया, अर जब राज्यपाल पिलातुस नै उस ताहीं छोड़ देण का विचार करया, फेर थमनै उसकै स्याम्ही उसका इन्कार करया । 14 थमनै उस धर्मी अर पवित्र का इन्कार करया, अर बिनती करी के एक खून्नी ताहीं थारे खात्तर छोड़ दिया जावै, 15 अर थमनै अनन्त जीवन के कर्ता ताहीं मार दिया, जिस ताहीं परमेसवर नै मरे होया म्ह तै जिन्दा करया, अर इस बात के हम गवाह सां । 16 मसीह यीशु के नाम म्ह विश्वास के कारण इस माणस नै जिसनै थम जाणो सां, जिसनै थम इस बखत देखण लागरे सां, उस ताहीं ताकत दी सै, यो माणस यीशु के नाम म्ह अर मसीह यीशु पै विश्वास के जरिये कती भला चंगा होया सै, जिसा के थम खुद देख सको सां ।”

17 “इब हे भाईयो, मन्नै बेरा सै के थमनै अर थारे अगुवां नै यो काम अज्ञानता म्ह करया, क्यूँके थम न्ही जाणो थे के वो मसीह सै । 18 पर जिन बात्तां ताहीं परमेसवर नै सारे नबियाँ के मुँह तै पैहल्याए तै बता दिया था, के उसका मसीह दुख ठावैगा, उन ताहीं उसनै इस्से ढाळ पूरा करया । 19 इस करकै, पाप करणा छोड़ दो अर बोहड़ आओ के थारे पाप मिटाए जावै, जिसतै प्रभु के स्याम्ही तै सुख-चैन के दिन आवै, 20 अर वो यीशु ताहीं भेज्जै, जो थारे खात्तर पैहल्या तै ए मसीह ठहराया गया सै । 21 जरूरी सै के वो सुर्ग म्ह उस बखत ताहीं रहवै जब ताहीं के वो सारी बात्तां का सुधार ना कर लेवै जिसका जिक्र पुराणे बखत तै परमेसवर नै अपने पवित्र नबियाँ के मुँह तै करया सै । 22 जिस ढाळ के मूसा नबी नै कद्दा, ‘परमेसवर थारे भाईयाँ म्ह तै थारे खात्तर मेरै जिसा एक नबी भेज्जैगा, जो किमे वो थारे तै कहवै उसकी सुणीयो ।’ 23 पर हरेक माणस जो उस नबी की न्ही सुणै, आदमियाँ म्ह तै नाश करया जावैगा ।”

24 “अर शमूएल तै लेकै उसकै पाच्छै आळा ताहीं जितने नबी बोल्ले उन सारया नै इन दिनां का सन्देशा दिया सै । 25 थम सारे नबियाँ की ऊलाद अर उस करार के हिस्सेदार सो, जो परमेसवर नै थारे बाप-दादां तै करया, जब उसनै अब्राहम तै कद्दा, ‘तेरी पीढ़ी के जरिये धरती के सारे खानदान आशीष पावैगें ।’ 26 परमेसवर नै अपने सेवक ताहीं मरे होया म्ह तै ठाके सब तै पैहल्या थारे धोरै भेज्या, के थारे म्ह तै हरेक ताहीं उसकी बुराईयाँ तै पलटा के आशीष देवै ।”

## 4

~~~~~



27 “क्यूँके साच्चए तेरे सेवक यीशु के बिरोध म्ह, जिसका तन्नै अभिषेक करया, हेरोदेस अर पुन्तियुस पिलातुस भी गैर यहूदियाँ अर इस्राएलियाँ के गेल्या इस नगर म्ह कट्ठे होए, 28 के जो किमे पैहल्ल्या तै तेरी सामर्थ अर बुद्धि तै ठहरा था वोए करै। 29 इब हे प्रभु, उनकी धमकियाँ नै सुण, अर अपने दासां ताहीं यो वरदान दे के तेरा वचन बड़ी हिम्मत तै सुणावै। 30 ठीक करण के खात्तर तू अपना हाथ बढ़ा के चमत्कार अर अनोखे काम तेरे पवित्र सेवक यीशु के नाम तै करे जावै।”

31 जब उननै प्रार्थना कर ली, तो वा जगहां जित्त वे कट्ठे थे काम्बगी, अर वे सारे पवित्र आत्मा तै भरगे, अर परमेसवर का वचन हिम्मत तै सुणान्दे रहे।

### XXXXXXXXXX XX XXXXXXXX XXXX

32 विश्वास करण आळा का टोळ एक चित्त अर एक मन का था, जै ताहीं के कोए भी अपनी सम्पत्ति अपनी न्ही कहवै था, पर सारा किमे साइझै म्ह था। 33 प्रेरित बड़ी सामर्थ तै प्रभु यीशु के जिन्दा होण की गवाही देन्दे रहे, अर उन सारया पै घणा अनुग्रह था। 34 अर उन विश्वासियाँ म्ह कोए भी गरीब कोनी था, क्यूँके जिनके धौरै धरती या घर थे, वे उननै बेच-बेचके, बिकी होई विज्जा का दाम ल्यावै थे, अर उस ताहीं प्रेरितां के पायां म्ह धरे थे। 35 अर जिसी जिसकी जरूरत होवै थी, उसके मुताबिक हरेक ताहीं बांड दिया करे थे।

36 यूसुफ नाम का साइप्रस टापू का एक लेवी था जिसका नाम प्रेरितां नै बरनबास (यानिके उत्साहित करण आळा) धरया था। 37 उसकी किमे धरती थी, जिस ताहीं उसने बेच्या, अर दाम के रुपिये प्रेरितां के पायां म्ह धर दिए।

## 5

### XXXXXXXXXX XX XXXX

1 हनन्याह नाम का एक माणस अर उसकी घरआळी सफीरा नै अपनी कुछ जमीन बेच्ची। 2 अर उसके दाम म्ह तै कुछ अपने खात्तर राख लिया, अर या बात उसकी घरआळी भी जाणै थी, उसका एक हिस्सा ल्याके प्रेरितां के पायां म्ह धर दिया। 3 पतरस बोल्या, “हे हनन्याह! शैतान नै तेरे मन म्ह या बात क्यातै घाल्ली के तू पवित्र आत्मा तै झूठ बोल्लै, अर जमीन के दाम म्ह तै किमे राख लेवै? 4 के बेचण तै पैहल्ल्या वा जमीन तेरी कोनी थी? अर जब बिकगी तो उस धन पै तेरा हक कोनी था? तन्नै या बात अपने मन म्ह क्यातै सोच्ची? तन्नै माणसां तै न्ही, पर परमेसवर तै झूठ बोल्या सै।”

5 या बात सुणदे हनन्याह जमीन पै गिर पड्या अर जी लिकड़ग्या, सारे सुणण आळे घणे डरगे।

6 फेर जवानां नै उठके उसकी लाश ताहीं कपड़े म्ह लपेटा अर बाहरणै ले जाके गाड़ दिया।

7 करीबन तीन घंटा के पाच्छै उसकी घरआळी, जिसनै बेराए कोनी था जो किमे होया था, भीत्तर आई। 8 फेर पतरस नै उसतै कह्या, “मन्नै बता के थम दोनुआं नै वा जमीन इतनै म्ह बेच्ची थी?” वा बोल्ली, “हाँ, इतनै ए म्ह।”

9 पतरस नै उसतै कह्या, “या के बात सै के थम दोनुआं नै प्रभु की आत्मा ताहीं परखण खात्तर एक्का करया? लखा, तेरे धणी नै गाड़ण आळे बाहरणै ए खड़े सै, अर तन्नै भी बाहरणै ले जावैगे।”

10 फेर वा जिन्वे उसके पायां म्ह गिर पड़ी, अर जी लिकड़ग्या, अर जवानां नै भीत्तर आके उस ताहीं मरया पाया, अर बाहरणै ले जाके उसके धणी के धौरै ए उस ताहीं भी गाड़ दिया। 11 यरुशलेम की सारी कलीसिया अर इन बात्तां के सारे सुणनिये भोत घणे डरगे।

### XXXXXXXXXX XX XXXXXXXX XXXX

12 प्रेरितां के जरिये घणे चमत्कार अर अनोखे काम आदमियाँ के बिचाळे दिखाए जावै थे, अर वे सारे एक चित्त होके सुलेमान के बरामदे म्ह कट्ठे होया करे थे। 13 पर औरां म्ह तै किसे और की या हिम्मत कोनी होवै थी के उन म्ह जा मिले, फेर भी आदमी उनकी बड़ाई करे थे। 14 प्रभु म्ह विश्वास करण आळा की गिणती बढ़ती गई भोत घणे विश्वासी प्रभु म्ह आ मिले, लोग-लुगाईयां

का एक भोत बड़ा टोळ बणग्या।<sup>15</sup> जो प्रेरित करण लागरे थे, उसकी बजह तै माणस, बिमारां ताहीं सडकां पै ल्या-ल्याकै, खाट-खटोल्यां पै लिटा देवै थे, के जिब पतरस आवै, तो उसकी छाया-ए उन म्ह तै किसे पै पड जावै।<sup>16</sup> यरुशलेम नगर के लोवै-धोवै के नगरां तै भी घणे माणस बिमारां अर भुंडी ओपरी आत्म्यायां के सताए होया ताहीं चेल्यां के धोरै ल्या-ल्याकै, कटटे होवै थे, अर सारे ठीक कर दिए जावै थे।

?????????? ?? ???????????

<sup>17</sup> फेर महायाजक अर उसके सारे मित्तर जो सद्कियाँ के पंथ के थे, प्रेरितां तै जळण लागगे।<sup>18</sup> अर प्रेरितां ताहीं पकड़कै जेळ म्ह बन्द कर दिया।<sup>19</sup> पर रात नै प्रभु के एक सुगंदूत नै जेळ के किवाड़ खोल के उन ताहीं बाहरणै ल्याकै कहा, <sup>20</sup> “जाओ, मन्दर म्ह खड़े होके अनन्त जीवन की सारी बात आदमियाँ ताहीं सुणाओ।”

<sup>21</sup> वे न्यु सुणके सबेरा होन्दे मन्दर म्ह जाके उपदेश देण लागगे। फेर महायाजक अर उसके मित्तरां नै आके यहूदी अगुवां की सभा अर इस्राएलियाँ के सारे बुजुगां ताहीं कटटे करया, अर जेळ म्ह कहवां भेज्या के उन ताहीं ल्याओ।<sup>22</sup> पर मन्दर के पैहरेदारां नै उडै पोहचके उन ताहीं जेळ म्ह कोन्या पाया, अर बोहड़के संदेशां दिया, <sup>23</sup> “हमनै जेळ ताहीं घणी चौकसी तै बन्द कर राख्या था, अर पैहरेदारां ताहीं बाहरणै दरवाज्यां पै खड़े पायां, पर जिब खोल्या, तो भीत्तर कोए ना मिल्या।”<sup>24</sup> जिब मन्दर के सरदार अर प्रधान याजकां नै या खबर सुणी, तो वे घबरागे थे, अर वे यो विचार करण लागगे के इन बाततां का नतिज्जा के होगा!

<sup>25</sup> इतने म्ह किसे नै आके उन ताहीं बताया, “देखो, जिन ताहीं थमनै जेळ म्ह बन्द कर राख्या था, वे माणस मन्दर म्ह खड़े होके आदमियाँ नै उपदेश देण लागरे सै।”<sup>26-27</sup> फेर सरदार, पैहरेदारां के गेल्या ओड़ै जाके, प्रेरितां ताहीं यहूदी अगुवां की सभा के स्याम्ही लीआया, पर हंगे तै न्ही, क्यूँके वे आदमियाँ तै डरे थे के कदे म्हारै पै पत्थर ना बरसा देवै। फेर महायाजक नै उनतै बुझया,

<sup>28</sup> “के हमनै थारे ताहीं चिताकै हुकम न्ही दिया था के थम इस नाम तै उपदेश ना दियो? फेरभी, थमनै सारे यरुशलेम नगर ताहीं अपने उपदेश तै भर दिया सै अर उस माणस की हत्या का कसूर थम म्हारै पै लगाणा चाहो सो।”

<sup>29</sup> फेर पतरस अर दुसरे प्रेरितां नै जवाब दिया, “माणसां के हुकम तै बढ़के परमेसवर के हुकम का पालन करणा ए म्हारा फर्ज सै।<sup>30</sup> म्हारै पूर्वजां के परमेसवर नै यीशु ताहीं मुर्दा म्ह तै जिन्दा करया, जिस ताहीं थमनै कुरूस पै लटकाके मार दिया था।<sup>31</sup> उससे ताहीं परमेसवर नै प्रभु अर उद्धारकर्ता टैहराया अर परमेसवर नै मसीह यीशु ताहीं अपने सोळे हाथ कान्ही बैठाया, ताके इस्राएल के माणस पाप करणा छोड़ दे, अर अपने पापां खात्तर उन ताहीं माफी मिल सकै।<sup>32</sup> हम इन बाततां के गवाह सां अर उससे तरियां पवित्तर आत्मा भी, जिस ताहीं परमेसवर नै उन ताहीं दिया सै जो उनका हुकम मान्ने सै।”

<sup>33</sup> यहूदी अगुवां की सभा के सारे माणस या बात सुणके जळगे, अर प्रेरितां ताहीं मारणा चाह्या।<sup>34</sup> पर गमलीएल नामक एक फरीसी नै जो शास्त्री अर सारे आदमियाँ म्ह आदर-मान राखै था, यहूदी अगुवां की सभा म्ह खड़े होके प्रेरितां ताहीं थोड़ी देर खात्तर बाहरणै ले जाण का हुकम दिया।<sup>35</sup> फेर वो बोल्या, “हे इस्राएलियाँ, थम जो किमे इन माणसां गैल करणा चाहवो सो, सोच-समझके करियो।<sup>36</sup> इन दिनां तै पैहल्या थियूदास भी दावा करै था के मै भी किमे सूँ, अर तकरीबन चार सौ माणस उसके चेल्ले बणगे, पर वो मारया गया, अर उस ताहीं मानण आळे सब लोग बिखरगे अर उनका नामो-निशान भी कौनी रह्या।<sup>37</sup> उसके पाच्छै नाम लिखाई के दिनां म्ह गलीलवासी यहूदा आया, अर कई आदमी अपनी ओड़ कर लिये, वो भी मर गया, अर जितने आदमी उसने मान्ने थे, सारे तित्तर-बितर होगये।<sup>38</sup> ज्यातै मै थारे तै कहूँ सूँ, इन माणसां तै दूर ए रहो अर इनते किमे काम ना राखो, क्यूँके जै यो धर्म या काम माणसां की ओड़ तै हो फेर तो मिट जावैगा।<sup>39</sup> पर जै परमेसवर

की ओड़ तै सै, तो थम उन ताहीं कदे भी न्ही मिटा सकदे। कदे इसा ना हो के थम परमेसवर तै भी लड़णआळे ठहरो।” फेर उननै उसकी बात मान ली।

40 अर प्रेरितां ताहीं बुलाकै छितवाया, अर यो हुकम देकै छोड़ दिया के यीशु के नाम तै दुबारा कोए बात ना करणा।

41 वे इस बात तै राज्जी होकै यहूदी अगुवां की सभा के स्याम्ही तै चले गये, के हम यीशु के नाम के खात्तर बेईज्जत होण के जोगगे तो ठहरे। 42 वे हरेक दिन मन्दर म्ह अर घर-घर म्ह उपदेश करण तै, अर इस बात का सुसमाचार सुणाण तै के यीशु ए मसीह सै न्ही रुके।

## 6

~~~~~

1 उन दिनां म्ह जिब चेल्यां की गिणती घणी बधण लाग्गी, फेर यूनानी भाषा बोल्लण आळे यहूदी चेल्ले इब्रानी भाषा बोल्लण आळे यहूदी चेल्यां पै बिरड़ण लाग्गे, के हरेक दिन पईसा अर खाणे के मामलै म्ह म्हारी विधवायां की सुध कोनी ली जान्दी। 2 फेर उन बारहां चेल्यां नै उन विश्वासियां ताहीं जो यरुशलेम म्ह थे, अपणे धौरे बुलाकै कह्या, “यो ठीक कोनी के हम परमेसवर का वचन छोड़कै खिलाण-पिलाण की सेवा म्ह रह्हां। 3 इस करकै, हे विश्वासी भाईयो, अपणे म्ह तै सात बढ़िया नाम्मी माणसां ताहीं जो पवित्र आत्मा अर बुदधि तै भरे हो, जिनके बारें म्ह सब नै बेरा हो, छाँट ल्यो, के हम उननै इस काम पै ला देवां। 4 पर हम तो प्रार्थना म्ह अर वचन के प्रचार अर शिक्षा देण की सेवा म्ह लाग्गे रहवांगें।”

5 या बात सारे टोळ नै आच्छी लाग्गी, अर उननै स्तिफनुस नामक एक माणस ताहीं जो विश्वास अर पवित्र आत्मा तै भरया था, अर फिलिप्पुस, अर परुखरुस, अर नीकानोर, अर तीमोन, अर परमिनास, अर अन्ताकियावासी नीकुलाउस ताहीं जो यहूदी पंथ म्ह आ ग्या था, छाँट लिया। 6 इन ताहीं प्रेरितां के स्याम्ही ल्याए अर उननै प्रार्थना करकै उनपै हाथ धरे, ताके वे उस काम नै करै।

7 परमेसवर का वचन फैलदा गया अर यरुशलेम नगर म्ह चेल्यां की गिणती घणी बढ़दी गई, अर भोत सारे यहूदी याजक भी प्रभु यीशु के सुसमाचार पै विश्वास करके मानणआळे होगे।

~~~~~

8 स्तिफनुस अनुग्रह अर सामर्थ तै भरया-पूरा होकै आदमियां म्ह बड़े-बड़े अनोक्खे काम अर चमत्कार दिखाया करै था। 9 फेर वो आराधनालय म्ह तै जो लिविरतिनों की कुह्वावै थी, अर कुरेनी अर सिकन्दरिया अर किलिकिया अर आसिया परदेस के आदमियां म्ह तै कई माणस उठके स्तिफनुस तै बहसण लाग्गे। 10 पर उस ज्ञान अर उस पवित्र आत्मा का जिसते वो बात करै था, वे सामना न्ही कर सके।

11 इसपै उननै कई आदमियां ताहीं उकसाया जो कहण लाग्गे, “हमनै इस ताहीं मूसा नबी अर परमेसवर के विरोध म्ह बुराई की बात कहन्दे होए सुण्या सै।”

12 उननै स्तिफनुस के विरुध्द माणसां, यहूदी अगुवां अर शास्त्रियां ताहीं उकसाया अर आकै उस ताहीं पकड़के यहूदी अगुवां की सभा के स्याम्ही ले गये। 13 अर उननै झूट्टे गवाह खड़े करे, जिननै स्तिफनुस पै यो इलजाम लगाकै, कह्या, “यो माणस इस पवित्र जगहां अर मूसा के नियम-कायदे के विरोध म्ह बुराई करणा न्ही छोड़दा। 14 क्यूँके हमनै उस ताहीं न्यू कहन्दे सुण्या सै के योए यीशु नासरी\* इस मन्दर नै गेर देवैगा, अर उन रिवाज्जां नै बदल देवैगा जो मूसा नबी नै म्हारै ताहीं सौंपी सै।”

15 फेर सारे आदमियां नै जो यहूदी अगुवां की सभा म्ह बेट्टे थे, उसपै निगांह गड़ाई तो उसका मुँह सुर्गदूत जिसा दिख्वा।

\* 6:14 6:14 नासरेत का यीशु



23 “जिब मूसा नबी चाळीस साल का होया, तो उसकै मन म्ह आया के मै अपणे इस्राएली भाईयाँ तै मिलूं। 24 उसनै एक इस्राएली माणस पै जुल्म होन्दे देखकै उस ताहीं बचाया, अर उस मिस्री आदमी ताहीं मारकै सताए होए का बदला लिया। 25 मूसा नै सोच्या के उसके भाई-बन्धु जाण जावेंगे के उन ताहीं गुलामी तै छुटकारा दुआण खात्तर परमेसवर उसका इस्तमाल करण लाग रह्या सै, पर वे इस ताहीं समझ न्ही पाये। 26 दुसरे दिन जिब वे आप्स म्ह लडै थे, तो वो उडै तै आण लिकडया, अर न्यू कहकै उननै मेल करण कै खात्तर समझाया, हे भले माणसाँ, थम तो भाई-भाई सो, एक-दुसरे पै क्यातै जुल्म करो सो?”

27 “पर जो अपणे पड़ोसी पै जुल्म करै था, उसनै उस ताहीं न्यू कहकै धक्का दिया, तेरे ताहीं किसनै म्हारै पै हाकिम अर न्यायाधीश ठहराया सै? 28 के जिस ढाळ तै तन्नै काल उस मिस्री आदमी ताहीं मार दिया मन्ने भी मार देणा चाहवै सै? 29 या बात सुणके मूसा नबी डरके भाज्या अर मिधान देश म्ह परदेशी होकै रहण लाग्या, अर ओडै उसके दो बेटटे पैदा होए।”

30 “जिब मूसा ताहीं ओडै रहन्दे पूरे चाळीस साल बीतगे, तो परमेसवर नै एक सुगंदत के रूप म्ह सीनै पहाड़ के बण म्ह उस ताहीं बळदी होई झाड़ी की ज्वाला म्ह दर्शन दिया। 31 मूसा नबी नै यो बळदी होई झाड़ी का दर्शन देखकै हैरानी होई, अर जिब देखण खात्तर लोवै गया, तो परभु की या वाणी सुणाई दी, 32 मै तेरे पूर्वज, अब्राहम, इसहाक, याकूब का परमेसवर सूं, फेर मूसा नबी डर के मारे काम्बग्या, उरै ताहीं के उसकी देखण की हिम्मत भी कोनी होई।”

33 “फेर परभु नै मूसा नबी तै कह्या, ‘अपणे पायां तै जूती उत्तार ले, क्यूँके जिस जगहां तू खड्या सै, वा पवित्तर धरती सै। 34 मन्ने साच्ये अपणे आदमियाँ की जो मिस्र देश म्ह सै, भुन्डी हालत देख्की सै, अर उनकी आह अर उनका रोणा सुण्या सै, ज्यातै उन ताहीं छुड़ाण के खात्तर उतरया सूं। इब आ, मै तन्नै मिस्र देश भेज्जूंगा।’”

35 “जिस मूसा नबी ताहीं उननै न्यू कहकै नकारा दिया था, तेरे ताहीं किसनै म्हारै पै हाकिम अर न्यायाधीश ठहराया सै? उस्से ताहीं परमेसवर नै हाकिम अर छुड़ाण आळा ठहराकै उस सुगंदत के जरिये जिसनै उस ताहीं झाड़ी म्ह दर्शन दिया था, भेज्या। 36 योए माणस मिस्र देश अर लाल समुन्दर अर जंगळ म्ह चाळीस साल ताहीं अनोक्खे काम अर चमत्कार दिखा-दिखाकै उन ताहीं लिकाड़ ल्याया।”

37 यो वोए मूसा नबी सै, जिसनै इस्राएल के माणसां तै कह्या, “परमेसवर थारे भाईयाँ म्ह तै थारे खात्तर मेरै जिसा एक नबी ठावैगा। 38 यो वोए सै, जिसनै जंगळ म्ह इस्राएली मण्डळी कै बिचाळे उस सुगंदत के साथ सीनै पहाड़ पै उसतै बात करी, अर म्हारे पूर्वजां के गेल्या था, उस्से ताहीं जिन्दा वचन मिल्या ताके म्हारै तक पोहोचावै।”

39 पर म्हारे पूर्वजां नै उसकी मानणी कोनी चाह्यी, बल्के उस ताहीं हटाकै अपणे मन मिस्र देश की ओड़ पलटे, 40 अर मूसा नबी कै भाई हारुन तै, कह्या, म्हारै खात्तर इसा देवता बणा, जो म्हारै आगै-आगै चाल्लै, क्यूँके यो मूसा नबी जो हमनै मिस्र देश तै लिकाड़ ल्याया, हमनै न्ही बेरा के उसके के होया? 41 उन दिनां म्ह उननै एक बाछड़े की मूर्ति बणाकै उसके आगै बलि चढ़ाई, अर अपणे हाथ्यां तै बणाई होई मूर्ति तै मग्न होण लागगे। 42 इस खात्तर परमेसवर नै मुँह मोड़कै उन ताहीं छोड़ दिया, के अकास के सूरज चाँद सितारां ताहीं परमेसवर मानकै पुजै, जिसा नबियाँ की किताब म्ह लिख्या सै, “हे इस्राएल के घराने, के थम जंगळ म्ह चाळीस साल ताहीं पशुबलि अर अन्नबलि मेरै ताहीं ए चढ़ान्दे रहे?”

43 “थम उस तम्बू ताहीं जिस म्ह मोलेक देवता की मूर्ति अर अपणे रिफान देवता, के तारे नै लिये फिरे, यानिके उन मूरतां ताहीं जिन ताहीं थमनै आराधना करण कै खात्तर बणाया था। इस करके मै थारे ताहीं बेबीलोन देश तै परली ओड़ ले जाकै बसाऊंगा।”

44 “मिलापआळे तम्बू की जंगल-बियावान म्ह म्हारे पूर्वजां के बिचाळै था, जिसा उसने ठहराया जिसने मूसा नबी तै कह्या, ‘जो रूप तन्नै देख्या सै, उसके मुताबिक इसने बणा ।’ 45 उस्से तम्बू नै म्हारे पूर्वज पाच्छले बखत तै पाकै यहोशू के गेल्या उरै लियाये, जिस बखत के उननै उन दुसरी जात्तां पै हक पाया, जिन ताहीं परमेसवर नै म्हारे पूर्वजां के स्याम्ही तै लिकाड दिया, अर वो तम्बू राजा दाऊद के बखत ताहीं रहया । 46 दाऊद पै परमेसवर नै अनुग्रह करया, राजा दाऊद नै याकूब के परमेसवर के खात्तर रहण की जगहां बणाण की बिनती करी । 47 पर उसके बेट्टे राजा सुलैमान नै उसकै खात्तर घर बणाया ।”

48 पर परमप्रधान हाथ के बणाए होए घरां म्ह कोनी रहन्दा, जिसा के यशायाह नबी की किताब म्ह कह्या,

49 “परमेसवर कहवै सै, सुर्ग मेरा सिंहासन अर धरती मेरी पायां तळै की पीढ़ी सै, मेरै खात्तर थम किस ढाळ का घर बणाओगे? अर मेरै आराम कि कौण-सी जगहां होवैगी?”

50 के ये सारी चीज मेरे जरिये न्ही बणाई गई सै?

51 “हे जिद्दी, अर मन अर कान के खतनारहित आदमियो, थम सारी हाण पवित्तर आत्मा का बिरोध करो सो । जिसा थारे पूर्वज करै थे, उस्से तरियां ए थम भी करो सो । 52 के कोए इसा भी नबी था, जिस ताहीं थारे पूर्वजां नै न्ही सताया हो? उननै तो उस ताहीं भी मार दिया, जिननै भोत पैहले ए तै उस मसीहा के आण की मुनादी कर दी थी, जिस ताहीं इब थमनै धोक्खे तै पकड़वा दिया अर मार दिया । 53 थमनै सुर्गदत्तां के जरिये ठहराये होए नियम-कायदे तो पाए, पर उसका पालन कोनी करया ।”

\*\*\*\*\*

54 ये बात सुणकै यहूदी अगुवें छो म्ह भरगे अर स्तिफनुस पै दाँत पिस्सण लागगे । 55 पर उसने पवित्तर आत्मा तै पूरी तरियां भरकै सुर्ग की ओड़ देख्या अर परमेसवर की महिमा अर यीशु ताहीं परमेसवर के सोळी ओड़ खडचा देखकै 56 कह्या, “देक्खो, मै सुर्ग नै खुल्या होया, अर माणस के बेट्टे ताहीं परमेसवर के सोळी ओड़ खडचा देखु सूं ।”

57 फेर ये बात सुणते ए सुणण आळा नै चीखते होए अपणे कान्ना पै हाथ रख लिये, अर वे छो म्ह एक साथ उसपै टूट पड़े, 58 अर स्तिफनुस ताहीं यरुशलेम नगर के बाहरणै लिकाडकै उसपै पत्थर बरसाण लागगे । गवाहां नै अपणे लत्ते शाऊल नामक एक जवान के पायां के धोरै उतारकै धर दिए ।

59 वे स्तिफनुस पै पत्थर बरसान्दे रहे, अर वो न्यू कहकै प्रार्थना करदा रह्या, “हे प्रभु यीशु, मेरी आत्मा ताहीं अपणाले ।” 60 फेर गोड्डे टेककै टाड्डू आवाज म्ह रुक्का मारया, “हे प्रभु, यो पाप उनपै मतना ला ।” अर न्यू कह कैं उसनै अपणे प्राण दे दिए ।

## 8

\*\*\*\*\*

1 शाऊल उसके मारण म्ह सहमत था । उस्से दिन यरुशलेम नगर की कलीसिया म्ह घणा दंगा शरु होगया अर प्रेरितां नै छोड़कै सारे के सारे यहूदिया अर सामरिया परदेस म्ह खिंड-मिंड होगये । 2 कुछ परमेसवर भगतां नै स्तिफनुस ताहीं कबूर म्ह धरया अर उसकै खात्तर घणा विलाप करया । 3 शाऊल कलीसिया नै सताण लागरया था, अर घर-घर म्ह बड़कै माणसां अर लुगाईयां ताहीं घिसड़ा-घिसड़ा के जेळ म्ह गेरै था ।

\*\*\*\*\*

4 जो विश्वासी खिंड-मिन्ड होए थे, वे सुसमाचार सुणान्दे होए हान्डे, 5 अर फिलिप्पुस सामरिया परदेस के एक नगर म्ह जाकै माणसां म्ह मसीह का प्रचार करण लागया । 6 जो बात फिलिप्पुस नै कही उन ताहीं आदमियां नै सुणकै अर जो चमत्कार वो दिखावे था उन ताहीं देख देखके, एक चित्त होके मन लगाया । 7 क्यूँके घणखरयां म्ह तै भुंडी ओपरी आत्मा टाड्डू आवाज म्ह किल्की मारदी



होई लिकड़गयी, अर घणखरे लकवे के बीमार अर लंगड़े भी ठीक करे गये, <sup>8</sup> अर उस नगर म्ह घणी खुशी मनाई गई।

XXXXXXXXXX

<sup>9</sup> उस नगर म्ह शमोन नाम का एक माणस था, जो जादू-टोणा करके सामरिया परदेस के आदमियाँ नै हैरान करदा अर खुद ताहीं एक बड़ड़ा माणस बतावै था। <sup>10</sup> छोटोचा तै लेके बड़डयाँ ताहीं सारे उसका आदर करके कहवै थे, “यो माणस परमेसवर की वा शक्ति सै, जो महान कुह्वावै सै।” <sup>11</sup> उसनै घणे दिनां तै उन ताहीं अपने जादू के काम्मां तै हैरान कर राख्या था, ज्यांतै वे उसकी घणी मान्नै थे। <sup>12</sup> पर जिव माणसां नै परमेसवर के राज्य अर यीशु मसीह के नाम का सुसमाचार, फिलिप्पुस के संदेश म्ह सुण्या, तो सारे माणसां अर लुगाईयाँ नै विश्वास करया अर सब नै बपतिस्मा ले लिया। <sup>13</sup> फेर शमोन नै खुद भी फिलिप्पुस के संदेश का विश्वास करया अर बपतिस्मा लेके उसके गेल्या रहण लागया। वो चमत्कार अर बड़े-बड़े सामर्थ के काम होन्दे देखके हैरान होवै था।

XXXXXXXXXX XXXXX XXX XXXX XX XXXXXXX

<sup>14</sup> जिव प्रेरितां नै जो यरुशलेम नगर म्ह थे, सुण्या के सामरिया परदेस के माणसां नै परमेसवर का वचन मान लिया सै तो पतरस अर यूहन्ना ताहीं उनके धारे भेज्या। <sup>15</sup> उननै ओड़े जाके उनके खात्तर प्रार्थना करी के पवित्तर आत्मा पावे। <sup>16</sup> क्यूंके वो इब ताहीं इन म्ह तै किसे पै भी कोनी उतरया था, उननै तो सिर्फ प्रभु यीशु के नाम तै बपतिस्मा लिया था। <sup>17</sup> फेर प्रेरितां नै उनपै हाथ धरे अर उननै पवित्तर आत्मा पाया।

<sup>18</sup> जिव शमोन नै देख्या के प्रेरितां कै हाथ धरण तै पवित्तर आत्मा दिया जावै सै, तो उनके धारे रपिये ल्याके कहा, <sup>19</sup> “या शक्ति मन्नै भी द्यो, के जिस किसे पै हाथ धरूँ वो पवित्तर आत्मा पावै।”

<sup>20</sup> पतरस नै उसतै कहा, “तेरे रपिये तेरे गेल्या नाश होज्या, क्यूंके तन्नै परमेसवर का दान रपियाँ तै मोल लेण का विचार करया। <sup>21</sup> इस बात म्ह ना तेरा हिस्सा सै, ना हक, क्यूंके तेरा मन परमेसवर के आगवै सच्चा कोनी। <sup>22</sup> इस करके अपनी इस बुरी सोच नै छोड़के प्रभु तै प्रार्थना कर, हो सके सै वो तेरे मन का यो बुरा विचार माफ करदे। <sup>23</sup> क्यूंके मै देखूँ सूँ के तू कड़वाहट तै भरया सै अर पाप के चुंगल म्ह फँसा सै।”

<sup>24</sup> शमोन नै जवाब दिया, “थम मेरे खात्तर प्रभु तै प्रार्थना करो के जो बात थमनै कही, उन म्ह तै कोए भी मेरे पै न्ही आवै।”

<sup>25</sup> आखर म्ह वे गवाही देके प्रभु यीशु का वचन सुणाके यरुशलेम नगर नै बोहड़गे, अर सामरिया के घणखरे गाम्मां म्ह सुसमाचार सुणान्दे गये।

XXXXXXXXXX XX XXX XXX XX XXXXXXX

<sup>26</sup> फेर प्रभु के एक सुगंदत नै फिलिप्पुस तै कहा, “उठ अर दक्षिण की ओड़ उस राह पै जा, जो यरुशलेम नगर तै गाज़ा नगर म्ह जावै सै।” यो बियाबान राह सै। <sup>27</sup> वो उठके चल दिया, अर देखो, कूश देश का एक माणस आण लागरया था जो खोजा (किन्नर) अर कूशियाँ की राणी कन्दाके का मंत्री अर खजांची था। वो आराधना करण खात्तर यरुशलेम नगर म्ह आया था। <sup>28</sup> वो अपने रथ पै बैठचा होया था, अर यशायाह नबी की किताब पढ़दा होया बोहड़ण लागरया था। <sup>29</sup> फेर पवित्तर आत्मा नै फिलिप्पुस ताहीं कहा, “लोवै जाके इस रथ के गेल्या हो ले।”

<sup>30</sup> फिलिप्पुस दौड़ के रथ के धारे पोहचा अर उस ताहीं यशायाह नबी की किताब पढ़ते होए सुण्या, अर बुझया, “तू जो पढ़े सै, के उसनै समझे भी सै?”

<sup>31</sup> वो बोल्या, “जिव ताहीं कोए मेरे ताहीं न्ही समझावै तो मै किस ढाळ समझूँ।” अर फिलिप्पुस तै बिनती करी के वो रथ पै चढ़के उसके धारे बैठे।

<sup>32</sup> पवित्तर ग्रन्थ का जो पाठ वो पढ़े था, वो यो था: “वो भेड़ की ढाळ मारण खात्तर पोहचाया गया, अर जिस तरियां मेम्ना अपने ऊन काट्टण आळा के स्याम्ही बोल-बाल्ला रहवै सै, उससे तरियां ए उसनै भी अपना मुँह कोनी खोल्या।”

33 “उस ताहीं अपमानित करया गया अर उस ताहीं कोए न्याय न्ही मिल्या। उसकै बखत के माणसां का ब्यौरा कौण देवैगा? क्यूँके धरती तै उसका प्राण ठा लिया जावै सै।”

34 इसपै खोजे (किन्नर) नै फिलिप्पुस तै बुद्धिया, “मै तेरे तै बिनती करूँ सूँ, न्यू बता के नबी यो किसकै बारे म्ह कहवै सै, अपणे या किसे दुसरे के बारे म्ह?” 35 फेर फिलिप्पुस नै बताणा शरु करया, अर इस्से पवित्तर ग्रन्थ तै शरु करके उस ताहीं यीशु का सुसमाचार सुणाया।

36 राह म्ह चाल्दे-चाल्दे वे किसे तालाब के धोरे पोहचे। फेर खोजे नै कह्या, “लखा उरै पाणी सै, इब मन्नै बपतिस्मा लेण म्ह के रोक सै।” 37 फिलिप्पुस बोल्या, “जे तू पूरे मन तै विश्वास करै सै तो ले सकै सै।” उसनै जवाब दिया, “मै विश्वास करूँ सूँ के यीशु मसीह परमेसवर का बेट्टा सै।” 38 फेर उसनै रथ खडचा करण का हुकम दिया, अर फिलिप्पुस अर खोजा (किन्नर) दोन्नु तालाब म्ह बडगे, अर उसनै खोजा (किन्नर) ताहीं बपतिस्मा दिया। 39 जिब वे पाणी म्ह तै लिकड़के ऊपरान आये, तो प्रभु का आत्मा फिलिप्पुस ताहीं ठा लेग्या, अर खोजे नै उस ताहीं दुबारा न्ही देख्या, अर वो खुश था क्यूँके परमेसवर नै उस ताहीं बचा लिया सै। 40 फिलिप्पुस अशदोद नगर म्ह आ लिकड़या, अर जिब ताहीं कैसरिया नगर म्ह न्ही पोहच्य़ा, तब तक नगर-नगर सुसमाचार सुणान्दा गया।

## 9

### शाऊल जो इब ताहीं प्रभु यीशु के चेल्यां ताहीं धमकाण अर मारण की धुन म्ह था, महायाजक के धोरे गया

1 शाऊल जो इब ताहीं प्रभु यीशु के चेल्यां ताहीं धमकाण अर मारण की धुन म्ह था, महायाजक के धोरे गया 2 अर उसतै दमिश्क नगर के आराधनालयों के नाम पै इस बाबत म्ह चिट्ठियाँ माँगी के, के चाहे माणस हो, चाहे लुगाई हो, जिन नै वो इस पंथ म्ह पावै उन ताहीं बाँधके यरुशलेम नगर लियावै। 3 पर चाल्दे-चाल्दे जिब शाऊल अर उसके साथी दमिश्क नगर के लोवै पोहच्य़े, तो चाणचक अकास तै उसके चौगरदे नै चाँदणा चमक्या, 4 अर वो धरती पै पड़ग्या अर परमेसवर का यो शब्द सुण्या, “हे शाऊल, हे शाऊल, तू मन्नै क्यातै सतावै सै?”

5 उसनै बुद्धिया, “हे प्रभु, तू कौण सै?” उसनै कह्या, “मै यीशु सूँ, जिस ताहीं तू सतावै सै। 6 पर इब उठके नगर म्ह जा, अर जो तन्नै करणा सै वो तेरे तै कह्या जावैगा।”

7 जो माणस उसके गेल्या थे, वे हैरान रहग्ये, क्यूँके बोल तो सुणे थे पर किसे ताहीं देखवै कोनी थे। 8 फेर शाऊल धरती पै तै उठया, पर जिब आँख खोल्ली तो उस ताहीं किमे कोनी दिख्या, अर वे उसका हाथ पकड़के दमिश्क नगर म्ह ले गये। 9 वो तीन दिन ताहीं कोनी देख सक्या, अर ना खाया अर ना पिया।

10 दमिश्क नगर म्ह हनन्याह नामक एक चेल्ला था, उसतै प्रभु यीशु नै दर्शन म्ह कह्या, “हे हनन्याह!” वो बोल्या, “हाँ, प्रभु!”

11 फेर प्रभु नै उसतै कह्या, “उठके उस गळी म्ह चल्या जा जो ‘सीध्धी’ कुह्वावै सै, अर यहूदा के घर म्ह शाऊल नामक एक तरसुसवासी नै बुझ, क्यूँके देख, वो प्रार्थना करण लागया सै, 12 अर उसनै दर्शन म्ह हनन्याह नामक एक माणस ताहीं भीत्तर आन्दे अर अपणे उप्पर हाथ धरदे देख्या सै, ताके दुबारा आँखां की रोशनी पावै।”

13 हनन्याह नै जवाब दिया, “हे प्रभु, मन्नै इस माणस के बारे म्ह घणाए तै सुण्या सै के इसनै यरुशलेम नगर म्ह तेरे आदमियाँ गेल्या बड़डी-बड़डी बुराई करी सै, 14 अर उरै भी इस ताहीं प्रधान याजकां की ओड़ तै हक मिल्या सै के जो माणस तेरे म्ह विश्वास राक्खै सै, उन सारया नै बाँधके यरुशलेम ले जा।”

15 पर प्रभु नै उसतै कह्या, “तू चल्या जा, क्यूँके वो तो गैर यहूदी अर राजयां अर इस्राएलियों के स्याम्ही मेरा नाम का प्रचार करण के खात्तर चुण्या होया पात्तर सै। 16 अर मै उसनै बताऊँगा, के मेरै बारे बताण के खात्तर उसनै किसा-किसा दुख ठाणा पड़ेगा।”

17 फेर हनन्याह उठके उस घर म्ह गया जडै शाऊल रुक्या था, अर उसपै अपना हाथ धरके कह्या, “हे भाई शाऊल, प्रभु, यानिके यीशु, जो उस राह म्ह, जिसतै तू आया तेरे ताहीं दिखया था, उससे नै

मेरे ताहीं भेज्या सै के तू दुबारा आँखां की रोशनी पावै अर पवित्र आत्मा तै भरया-पूरा हो जावै।”  
18 अर जिब्बे उसकी आँखां तै छिल्कै-से पड़े अर वो देखण लाग्या, अर उठकै बपतिस्मा लिया,

~~~~~

19 फेर खाणा खाके हिम्मत पाई। शाऊल कई दिन उन चेल्यां कै गेल्या रह्या जो दमिश्क नगर म्ह थे। 20 अर वो जिब्बे दमिश्क नगर के आराधनालयां म्ह यीशु का प्रचार करण लाग्या, के वो परमेसवर का बेट्टा सै। 21 सारे सुणण आळे हैरान होकै कहण लागगे, “के यो वोए माणस न्ही सै जो यरुशलेम नगर म्ह उन ताहीं जो यीशु मसीह के विश्वासी थे, उनका नाश करया करै था, अर उरै भी इस्से खात्तर आया था, के उननै बाँधकै प्रधान याजकां कै धोरै ले जावै?” 22 पर शाऊल और भी सामर्थी होंदा गया, अर इस बात का सबूत दे-देकै, के मसीह यीशु-ए सै, दमिश्क नगर के रहणीये यहूदियाँ का मुँह बन्द करदा रह्या।

23 जिब शाऊल नै ओड़ै रहन्दे होए भोत दिन बीतगे, तो यहूदियाँ नै मिलकै उस ताहीं मारण की साजस रची। 24 पर उनकी साजिस का शाऊल नै बेरा पाटग्या। वे तो उसनै मारण खात्तर रात-दिन फाटकां पै घात म्ह लागगे रहवै थे। 25 पर रात नै उसके चेल्यां नै उस ताहीं टोकरे म्ह बिठाया, अर दमिश्क नगर की चारदीवारी पै तै लटकाकै उतार दिया।

~~~~~

26 यरुशलेम नगर म्ह पोहचके शाऊल नै चेल्यां कै गेल्या मिल जाण की कोशिश करी, पर सारे उसतै डरे थे, क्यूँके उननै विश्वास कोनी होवै था, के वो भी चेल्ला सै। 27 पर बरनबास नै उस ताहीं अपणे गेल्या प्रेरितां कै धोरै ले जाके उन ताहीं बताया के इसनै किस ढाळ तै राह म्ह प्रभु यीशु ताहीं देख्या, अर यीशु नै इसतै बात करी, फेर दमिश्क नगर म्ह इसने किस तरियां हिम्मत दिखाके यीशु कै नाम का प्रचार करया। 28 वो उनके गेल्या यरुशलेम नगर म्ह आन्दा-जान्दा रह्या 29 अर बेधड़क होके प्रभु का नाम तै प्रचार करै था, अर यूनानी भाषा बोल्लण आळे यहूदियाँ कै गेल्या बोलचाल अर बहस करै था, पर वे उसनै मारण की कोशिश करण लागगे। 30 न्यू जाणकै भाई उस ताहीं कैसरिया नगर लिआये, अर तरसुस नै भेज दिया।

31 इस तरियां सारे यहूदिया परदेस, अर गलील परदेस, अर सामरिया परदेस की कलीसिया नै चैन मिल्या, अर उसकी बढ़ोतरी होन्दी गई, अर वा प्रभु कै भय अर पवित्र आत्मा की शान्ति म्ह चाल्दी अर बढ़दी गई।

~~~~~

32 फेर इसा होया के पतरस हरेक जगहाँ हांडदा होया, उन पवित्र आदमियाँ कै धोरै भी पोंहच्या जो लुद्दा नगर म्ह रहवै थे। 33 ओड़ै उसनै एनियास नामक लकवे का रोगगी एक माणस मिल्या, जो आठ साल तै खाट पै पड्या था। 34 पतरस नै उसतै कह्या, “हे एनियास! यीशु मसीह तन्नै ठीक करै सै। उठ, अपना बिच्छाणा ठा।” फेर वो जिब्बे उठ खड्या होया। 35 फेर लुद्दा नगर अर शारोन के सारे रहणीये उस ताहीं देखकै प्रभु की ओड़ फिरे।

36 याफा नगर म्ह तबीता यानिके दोरकास नाम की एक विश्वासण रहवै थी। वा घणे भले-भले काम अर दान करया करै थी। 37 उन्हे दिनां म्ह जिब पतरस लुद्दा नगर म्ह था, तो वा बीमार होकै मरग्यी, अर उननै उस ताहीं नुह्वाकै चुवारै पै धर लिया। 38 लुद्दा नगर याफा नगर कै धोरै था, चेल्यां नै न्यू सुणकै पतरस ओड़ै सै, दो माणस भेजकै उसतै बिनती करी, “म्हारै धोरै आण म्ह वार ना लावै।”

39 फेर पतरस उठकै उसके गेल्या हो लिया, अर जिब वो पोंहच्या तो वे उसनै उस चौवारे म्ह ले गये। सारी बिधवां रोँदी होई उसके धोरै आण खड़ी होई, अर जो कुड़ते अर लत्ते दोरकास नै उनकै गेल्या रहंदे होए बणाए थे, दिखाण लागगी।

40 फेर पतरस नै सारया ताहीं बाहरणै कर दिया, अर गोड्डे टेक के प्रार्थना करी अर लाश की ओड़ लखाके कह्या, “हे तबीता, उठ!” फेर उसने अपनी आँख खोल दी, अर पतरस ताहीं देखकै उठ बेट्ठी। 41 उसने हाथ बढ़ाके उस ताहीं ठाया, अर पवित्र आदमी अर बिधवायाँ ताहीं बुलाके उस

ताहीं जिन्दा दिखा दिया।<sup>42</sup> या बात साब्त याफा नगर म्ह फैलगयी, अर घणखरयां नै परभु यीशु पै विश्वास करया।<sup>43</sup> अर पतरस याफा नगर म्ह शमौन नामक किसे चमड़े का धन्धा करणीये कै उरै घणे दिनां ताहीं रहया।

## 10

XXXXXXXXXX XX XXXX XXXXX XXXXXXXX

1 केशरिया नगर म्ह कुरनेलियुस नाम का एक माणस था, जो इतालियानी नामक पलटन का सूबेदार था।<sup>2</sup> वो भगत था, अर अपने साबते कुणवे सुधा परमेसवर तै डरै था, अर गरीब यहूदी आदमियाँ ताहीं घणा दान देवै था, अर बराबर परमेसवर की प्रार्थना करै था।<sup>3</sup> उसनै दिन कै बजे कै लोवै दर्शन म्ह साफ तौर तै देख्या के परमेसवर का एक सुगंदूत उसके धोरै भीत्तर आके कहवै सै, “हे कुरनेलियुस!”

4 कुरनेलियुस नै उस ताहीं गौर तै देख्या अर डरके कह्या, “हे परभु, के हुकम सै?” उसनै उसतै कह्या, “तेरी प्रार्थनाएँ अर तेरे दान याद कै खात्तर परमेसवर कै स्याम्ही पोहचे सै,<sup>5</sup> अर याफा नगर म्ह माणस भेजके शमौन नै, जो पतरस कुह्वावै सै, बुलवा ले।<sup>6</sup> वो शमौन, चमड़े का धन्धा करण आळे कै उरै मेहमान सै, जिसका घर समुन्दर कै किनारे सै।”

7 जिब वो सुगंदूत जिसनै उसतै बात करी थी चल्या गया, तो कुरनेलियुस नै दो नौक्कर, अर जो उसके लोवै हाजिर रहया करै थे उन म्ह तै एक भगत सिपाही ताहीं बुलाया,<sup>8</sup> अर उन ताहीं सारी बात बताके याफा नगर की ओड़ भेज्या, ताके पतरस ताहीं ले आवै।

XXXXXXXX XX XXXXXXX

9 दूसरे दिन जिब वे तीन आदमी जो कुरनेलियुस जरिये भेज्जे गये थे, चाल्दे-चाल्दे नगर कै धोरै पोहचे, तो दोफारी कै लोवै पतरस छात पै प्रार्थना करण चढया।<sup>10</sup> उसनै भूख लागी अर कुछ खाणा चाहवै था, पर जिब वे खाणा तयार करै थे तो वो बेसुध होगया,<sup>11</sup> अर उसनै देख्या, के अकास खुलगया, अर एक बड़्डी चादर च्यार कुणयां तै लटकदी होई, धरती की ओड़ उतरै सै।<sup>12</sup> जिस म्ह धरती के सारे ढाळ के चार पैरां आळे अर रेंगणेआळे जिनोर अर अकास के पंछी थे।<sup>13</sup> उसनै एक इसा बोल सुण्या, “हे पतरस उठ, मार अर खा।”

14 पर पतरस नै कह्या, “ना परभु, कती भी न्ही, क्यूँके मन्नै कदे कोए अशुद्ध चीज न्ही खाई सै।”

15 फिर दुसरी बर उस ताहीं बोल सुणाई दिया “जो किमे परमेसवर नै शुद्ध कर दिया सै, उस ताहीं अशुद्ध मतना कहवै।”

16 तीन बर इस तरियां ए होया, फेर जिब्वे वा चादर अकास म्ह टा ली गई।

17 जिब पतरस अपने मन म्ह दुबिध्या म्ह था, के यो दर्शन जो मन्नै देख्या इसका के मतलब हो सके सै, तो देखो, वे माणस जिन ताहीं कुरनेलियुस नै भेज्या था, शमौन कै घर का पता लगाके दरबाजे पै आण खड़े होए,<sup>18</sup> अर रुक्का मारके बुझ्झण लागगे, “के शमौन जो पतरस कुह्वावै सै, याडैए सै के?”

19 पतरस तो उस दर्शन पै सोचण ए लागरया था, के पवित्तर आत्मा नै उसतै कह्या, “देख, तीन माणस तेरी टोह म्ह सै।<sup>20</sup> आखर उठके तळै जा, अर बेझिझक उनके गेल्या हो ले, क्यूँके मन्नै ए उन ताहीं भेज्या सै।”

21 फेर पतरस नै उतरके उन माणसां ताहीं कह्या, “देखो, जिसकी टोह म्ह थम सो, वो मै सूं। थारे आण का के कारण सै?”

22 वे बोल्ले, “कुरनेलियुस सूबेदार जो धर्मी अर परमेसवर तै डरणआळा अर सारी यहूदी जात म्ह नाम्मी माणस सै, उसनै एक पवित्तर सुगंदूत तै यो निर्देश पाया सै के तेरे ताहीं अपने घरां बुलाके तेरे तै वचन सुणै।”<sup>23</sup> फेर उसनै उन ताहीं भीत्तर बुलाके उनकी मेहमान-नवाजी करी।

XXXXXXXXXXXXXXXXXX XX XX XXXX XXXXXXX

दूसरे दिन वो उनके गेल्या गया, अर याफा नगर के विश्वासी भाईयाँ म्ह तै कुछ उसके गेल्या हो लिए।

24 आगले दिन वे कैसरिया नगर पोहचे, अर कुरनेलियुस अपने कुणबे आळा अर प्यारे साथियाँ ताहीं कट्टा करके उनकी बाट देखै था। 25 जब पतरस भीत्तर आवै था, तो कुरनेलियुस उसतै मिल्या, अर उसके पायाँ म्ह पड़के उस ताहीं प्रणाम करया, 26 पर पतरस नै उस ताहीं टाके कह्या, “खड्या हो, मै भी तो माणस सूं।”

27 अर उसके गेल्या बतळान्दा भीत्तर गया, अर घणे आदमियाँ ताहीं कट्टे देखके 28 पतरस नै उनतै कह्या, “थमनै बेरा सै के हम यहूदियाँ कै खात्तर गैर यहूदियाँ तै संगति करणा या उसके उरै जाणा कानून के खिलाफ सै, पर परमेसवर नै मेरै तै बताया सै के किसे माणस ताहीं अपवित्तर या अशुद्ध ना कहूँ। 29 ज्याँतै मै जब बुलाया गया तो बिना कुछ कहे चल्या आया। इब मै बुद्धु सूं के मेरै ताहीं किस काम कै खात्तर बुलाया गया?”

30 कुरनेलियुस बोल्या, “इस्से घड़ी, पूरे चार दिन होए, मै अपने घर म्ह दोफाहरे पाच्छै तीन बजे प्रार्थना करण लागरया था, तो एक माणस चमकीला बाणा पहरै होए, मेरै स्याम्ही आण खड्या होया 31 अर कहण लागया, हे कुरनेलियुस, तेरी प्रार्थनाएँ अर तेरे दान याद कै खात्तर परमेसवर कै स्याम्ही पोहचे सै। 32 इस करके किसे नै याफा नगर भेजके शमोन जो पतरस कुह्वावै सै, बुलवा ले। वो शमोन, चमड़े का धन्धा करण आळे के उरै मेहमान सै, जिसका घर समुन्दर के किनारे सै। 33 फेर मन्नै जिब्बे तेरे धोरे आदमी भेज्जै, अर तन्नै भला करया जो आ गया। इब हम सारे उरै परमेसवर कै स्याम्ही सां, ताके जो किमे परमेसवर नै तेरे तै कह्या उस ताहीं सुणां।”

### ~~~~~

34 फेर पतरस बोल्या, “इब मेरै पक्का यकिन होगया के परमेसवर किसे का पक्षपात कोनी करदा, 35 बल्के हरेक जात म्ह जो परमेसवर तै डरै अर धर्म के काम करै सै, वो उसनै भावै सै। 36 धम जाणो साँ के परमेसवर नै इस्राएल के माणसां ताहीं अपना संदेश भेज्जा, उसनै शान्ति के बारे म्ह सुसमाचार सुणाया जो माणसां ताहीं यीशु मसीह पै विश्वास करण कै जरिये मिलै सै। 37 वो वचन थमनै बेरा सै, जो यहून्ना के बपतिस्मा के प्रचार कै पाच्छै गलील परदेस तै शरु होके साब्तै यहूदिया परदेस म्ह फैलगया। 38 परमेसवर नै किस तरियाँ तै यीशु नासरी ताहीं पवित्तर आत्मा अर सामर्थ तै अभिषेक करया, वो भलाई करदा अर सारया ताहीं जो शैतान के सताए होइ थे, आच्छा करदा फिरया, क्यूँके परमेसवर उसके गेल्या था।”

39 “हम उन सारे काम्मां के गवाह सां, जो उसनै यहूदिया परदेस अर यरुशलेम नगर म्ह भी करे, अर उननै उस ताहीं क्रूस पै लटकाके मार दिया। 40 उस ताहीं परमेसवर नै तीसरे दिन जिन्दा करया, अर जाहिर भी कर दिया सै, 41 सारे आदमियाँ पै न्ही बल्के उन गवाह पै जिन ताहीं परमेसवर नै पैहल्या तै छाँट लिया था, यानिके म्हारै पै जिन नै उसके मेरे होया म्ह तै जिन्दा उठण कै पाच्छै उसके गेल्या खाया-पिया, 42 अर उसनै म्हारै ताहीं हुकम दिया के आदमियाँ म्ह प्रचार करो अर गवाही द्यो, के यो वोए सै जिस ताहीं परमेसवर नै जिन्दा अर मरया होया का न्यायी ठहराया सै। 43 उसकी सारे नबी गवाही देवै सै के जो कोए उसपै विश्वास करैगा, उस ताहीं उसके नाम तै पापां की माफी मिलैगी।”

### ~~~~~

44 पतरस ये बात कहण ए लागरया था के पवित्तर आत्मा वचन के सारे सुणण आळा पै उतर आया। 45 अर जितने खतना करे होए विश्वासी पतरस कै गेल्या आये थे, वे सारे हैरान होए के गैर यहूदियाँ पै भी पवित्तर आत्मा का दान ढाळा गया सै।


46 क्यूँके उननै उन ताहीं कई ढाळ की भाषा बोलदे अर परमेसवर की बड़ाई करदे सुण्या। इसपै पतरस नै कह्या, 47 “के कोए पाणी नै रोक सके सै के ये बपतिस्मा ना पावे, जिननै म्हारै की ढाळ



25 फेर वो शाऊल नै टोळ्ळु कै खात्तर तरसुस नगर म्ह चल्या गया। 26 जिब वो उसतै मिल्या तो उस ताहीं अन्ताकिया नगर ल्याया, अर इसा होया के वे एक साल ताहीं कलीसिया कै गेल्या मिलदे अर प्रभु यीशु मसीह का घणे आदमियाँ ताहीं उपदेश देन्दे रहे, अर चेल्ले सारया तै पैहल्या अन्ताकिया नगर ए म्ह मसीह कुहाए।

27 उननै दिनां म्ह कई नबी यरुशलेम नगर तै अन्ताकिया नगर आए। 28 उन म्ह तै अगबुस नामक एक नबी नै खडे होकै आत्मा की पुरेरणा तै न्यू बताया के सारी दुनिया म्ह बड्डा अकाळ पडैगा, वो अकाळ (रोम के सम्राट) क्लौदियुस के बखत म्ह पड्या। 29 फेर चेल्यां नै फैसला लिया के हरेक अपणी-अपणी पूंजी कै मुताबिक यहूदिया परदेस म्ह रहण आळे भाईयाँ की मदद कै खात्तर किमे भेज्जै। 30 उननै इस तरियां ए करया, अर बरनवास अर शाऊल कै हाथ कलीसिया के अगुवां कै धौरे कुछ भेज दिया।

## 12



1 उस बखत हेरोदेस राजा नै कलीसिया के कई माणसां ताहीं सताण कै मकसद तै बन्दी बणा लिया। 2 उसनै पुरेरित यूहन्ना के भाई याकूब ताहीं तलवार तै मरवा दिया। 3 जिब उसनै देख्या के यहूदी माणस इसतै राज्जी होवै सै, तो उसनै पतरस ताहीं भी पकड़ लिया। वे अखमीरी रोट्टी के त्यौहार के दिन थे। 4 हेरोदेस नै उस ताहीं पकड़कै जेळ म्ह गेरया, अर चार-चार सिपाहियाँ के चार पहरया म्ह राख्या, इस विचार तै के फसह कै बाद उसनै आदमियाँ कै स्याम्ही ल्यावै।

5 जेळ म्ह पतरस बन्द था, पर कलीसिया उसके खात्तर लौ लाकै परमेसवर तै प्रार्थना करण लागरी थी।

6 जिब हेरोदेस राजा उसनै आदमियाँ कै स्याम्ही ल्याण आळा था, उससे रात पतरस दो जंजीरां तै बंध्या होइ दो सिपाहियाँ कै बिचाळै सोण लागरया था, अर पहेरदार दरबाजे पै जेळ की रुखाळी करे थे। 7 तो देख्को, प्रभु का एक सुगंदूत आण खड्या होया अर उस कोटडी म्ह चाँदणा चमक्या, अर उसनै पतरस की पासळी पै हाथ मारकै उस ताहीं जगाया अर बोल्या, “उठ, तावळ कर।” अर उसके हाथ्यां तै बेड़ी खुलकै गिरगी।

8 फेर सुगंदूत नै उसतै कह्या, “कमर बाँध, अर अपणे जूत्ते पहर ले।” उसनै उससे ढाळ करया। फेर उसनै उसतै कह्या, “अपणे लत्ते पहरकै मेरे पाच्छै हो ले।” 9 वो लिकड़कै उसके पाच्छै हो लिया, पर उसनै न्यू न्ही बेरा था के जो किमे सुगंदूत कर रह्या सै वो साच्ची सै, बल्के न्यू समझे था के जणु मै दर्शन देखण लागरया सूं। 10 फेर वे पैहल्या अर दुसरे पहेरे तै लिकड़कै उस लोहे के फाटक पै पोहचे, जो नगर की ओइ सै। वो उनकै खात्तर अपणे-आपे खुलगया, अर वे लिकड़कै एक गळी म्ह गए, अर जिब्वे ए सुगंदूत उसनै छोड़कै चल्या गया।

11 फेर पतरस नै चेत म्ह होकै कह्या, “इब मननै सच का बेरा पटया सै के प्रभु नै अपना सुगंदूत भेजकै मेरे ताहीं हेरोदेस राजा के हाथ्यां तै छुड़ा लिया, अर यहूदी अगुवां की सारी मनसा पै पाणी फेर दिया सै।”

12 न्यू जाणकै वो उस यूहन्ना की माँ मरियम कै घरां आया, जो मरकुस कुह्लावै सै। ओइ घणे आदमी कट्टे होकै प्रार्थना करण लागरे थे। 13 जिब उननै दरबाजा खटखटाया, तो रूदे नामक एक नौकराणी देखण नै आई। 14 पतरस का बोल पिच्छाणकै उसनै खुशी के मारे दरबाजा न्ही खोल्या, पर भाजकै भीत्तर गई अर बताया के पतरस दरबाजे पै खड्या सै।

15 उननै उसतै कह्या, “तू बावळी सै।” पर वा पूरे बिश्वास तै बोल्ली के पतरस ए सै। फेर उननै कह्या, “उसका सुगंदूत होगा।”

16 पर पतरस खटखटान्दा ए रहया आखर म्ह उननै दरबाजा खोल्या, अर उस ताहीं देखकै हैरान होग्ये। 17 फेर उसनै उन ताहीं हाथ तै इशारा करया के बोल-बाल्ले रहवै, अर उन ताहीं बताया के

प्रभु किस ढाळ उस ताहीं जेळ तै लिकाड ल्याया सै। फेर बोल्या, “याकूब अर दुसरे भाईयाँ नै या बात बता दियो।” फेर लिकडकै दुसरी जगहां चल्या गया।

18 तड़कैए जेळ के सिपाहियाँ म्ह घणी भगदड़ माचगी के पतरस कित्त गया। 19 जिब हेरोदेस राजा नै उसकी टोहया-टाही करवाई अर न्ही मिल्या, तो पैहरेदारां की जाँच करकै हुकम दिया के वे मार दिये जावै, अर वो यहूदिया परदेस नै छोड़कै कैसरिया नगर म्ह जाकै रहण लाग्या।

XXXXXXXXXXXXXXXXXXXX

20 हेरोदेस राजा सूर अर सैदा नगर के लोगगां तै घणा नाराज था। वे एक टोळ बणाकै उसतै मिलण आये, राजा का एक खास कर्मचारी बलास्तुस ताहीं मनाकै राजा तै मेल करणा चाह्या, क्यूँके राजा के देश म्ह उनकै देश का पालन-पोषण होवै था।

21 खास दिन पै हेरोदेस राजा राजमी-बाणा पहरकै सिंहासन पै बेटचा, अर उन ताहीं खुलास्सा करण लाग्या। 22 फेर आदमियाँ नै रुक्का मारया, “यो तो माणस का न्ही ईश्वर का बोल सै।” 23 उससे घड़ी प्रभु के एक सुगंदूत नै जिब्बे आकै हेरोदेस राजा ताहीं झिडका, अर वो की डे पड़कै मरग्या। क्यूँके उसनै परमेसवर की महिमा कोनी करी,

24 पर परमेसवर का वचन बढदा अर फैलदा गया।

25 जिब बरनबास अर शाऊल नै अपणी सेवा पूरी कर ली तो यूहन्ना जो मरकुस कुह्वा वै था, गेल्या लेकै यरुशलेम नगर तै बोहूडे।

## 13

XXXXXXXXXXXXXXXXXXXX

1 अन्ताकिया नगर की कलीसिया म्ह कई नबी अर उपदेशक थे, यानी बरनबास, शमौन जो नीगर (काळा आदमी) कुह्वा वै सै, अर शाऊल अर कुरेनी लूकियुस, मनाहेम जिसका पालन-पोषण चौथाई देश के राजा हेरोदेस कै गैल होया था। 2 जिब ये लोग प्रभु की आराधना अर बरत करण लागरे थे, तो पवित्तर आत्मा नै उनतै कह्या, “भैरै खात्तर बरनबास अर शाऊल नै उस काम कै खात्तर न्यारा करो जिसकै खात्तर मन्ने उन ताहीं बुलाया सै।” 3 फेर उननै बरत अर प्रार्थना करकै अर उनपै हाथ धरकै उन ताहीं परमेसवर के काम खात्तर बिदा करया।

XXXXXXXXXXXXXXXXXXXX

4 शाऊल अर बरनबास पवित्तर आत्मा के भेज्जै होए सिलूकिया बन्दरगाह गये, अर ओड़ै तै जहाज पै चढकै साइप्रस टापू कान्ही चाल्ले, 5 अर सलमीस नगर म्ह पोहचके, परमेसवर का वचन यहूदियाँ के आराधनालायाँ म्ह सुणाया। यूहन्ना उनका सेवक था।

6 वे उस सारे टापू म्ह होन्दे होए पाफुस परदेस ताहीं पोहचे। ओड़ै उननै बारयीशु नामक एक यहूदी जादूगर अर झूट्टा नबी मिल्या। 7 वो राज्यपाल सिरगियुस पौलुस कै गेल्या था, जो अकलमंद माणस था। उसनै बरनबास अर शाऊल ताहीं अपणे धोरे बुलाकै परमेसवर का वचन सुणणा चाह्या।

8 पर इलीमास जादूगर नै (क्यूँके योए उसकै नाम का मतलब सै) उनका बिरोध करकै हाकिम ताहीं यीशु पै बिश्वास करण तै रोकणा चाह्या। 9 फेर शाऊल नै जिसका नाम पौलुस भी सै, पवित्तर आत्मा तै पूरी तरियाँ भरकै उसकी ओड़ टकटकी लाकै देख्या अर बोल्या, 10 “हे सारे कपट अर सारी ढाळ कि चतुराई तै भरे होड शैतान की ऊलाद, सारे धर्माँ के बैरी, के तू प्रभु के सीध्धी राही नै टेढ़ी करणा न्ही छोड़ैगा?”

11 इब लखा, “प्रभु का हाथ तेरे बिरोध म्ह उठचा सै, अर तू कुछ बखत ताहीं आन्धा रहवैगा अर सूरज नै कोनी देक्खैगा।” फेर जिब्बे धुँधळापण अर अन्धेरा उसपै छा गया, वो आस्सै-पास्सै टटोळण लाग्या ताके कोए उसका हाथ पकड़कै ले चाल्लै। 12 फेर हाकिम नै जो होया था उस ताहीं देखकै अर प्रभु के उपदेश तै हैरान होकै यीशु पै बिश्वास करया।

XXXXXXXXXXXXXXXXXXXX



13 पौलुस अर उसके मित्र पाफुस परदेस तै पाणी का जहाज खोल कै पंफूलिया परदेस के पिरगा नगर म्ह आये, अर यूहन्ना उननै छोड़के यरुशलेम नगर बोहड़ गया। 14 पिरगा नगर तै आगू बैढके वे पिसिदिया परदेस के अन्ताकिया नगर म्ह पोहचे, अर आराम कै दिन आराधनालय म्ह जाके बैठगये। 15 मूसा के नियम-कायदे अर नबियाँ की किताब नै पढ़ण के पाच्छे आराधनालय के सरदारों नै उनके धोरे कहवां भेज्या, “हे भाईयो, जै आदमियाँ के उपदेश के खात्तर थारे मन म्ह कोए बात हो तो कहो।”

16 फेर पौलुस नै खड़े होके अर हाथ तै इशारा करके कहा, “हे इस्राएलियों, अर गैर यहूदी जो परमेसवर तै डरण आळो, सुणो!”

17 इस्राएल के परमेसवर नै म्हारे पूर्वजां ताहीं छाँट लिया, अर जब वे मिस्र देश म्ह परदेशी होके रहवै थे, तो उनकी बढ़ोतरी करी, अर अपनी शक्ति के दम पै उननै लिकाड़ ल्याया।

18 वो कोए चाळीस साल ताहीं जंगल-बियाबान म्ह उनकी सहण करदा रहया, 19 अर कनान देश की सात जात्तां का नाश करके उनका देश कोए साढ़े चार सौ साल म्ह इनकी वसियत म्ह कर दिया।

20 “इसके बाद परमेसवर नै शमूएल नबी ताहीं उन म्ह न्यायाधीश ठहराया। 21 इसके पाच्छे उननै शमूएल तै उनपै एक राजा ठहराण की माँग करी, फेर परमेसवर नै चाळीस साल के खात्तर विन्यामीन के गोत्र म्ह तै एक माणस, यानिके कीश के बेटे शाऊल ताहीं उनपै राजा ठहराया। 22 फेर परमेसवर नै शाऊल ताहीं पद तै हटाके दाऊद ताहीं उनका राजा बनाया, जिसके बारे म्ह उसनै गवाही दी, भन्नै एक माणस यिशै का बेटा दाऊद, जो मेरी इच्छा कै मुताबिक मिलगया सै, वोए मेरी सारी इच्छा पूरी करेगा।”

23 इस्से पीढ़ी म्ह तै परमेसवर नै अपने वादा कै मुताबिक इस्राएल कै धोरे एक उद्धारकर्ता, यानिके यीशु भेज्या। 24 यीशु कै आण तै पैहल्या यूहन्ना नै सारे इस्राएलियाँ नै अपने पाप मान के परमेसवर की ओड़ मुड़ण का अर बपतिस्मा का प्रचार करया। 25 जब यूहन्ना अपनी सेवा पूरी करण पै था, तो उसनै कहा, “थम मन्नै के समझो सो? मै मसीह कोनी! बल्के देखो, मैरे पाच्छे एक आण आळा सै, जो भोत महान सै, जिसके जूत्याँ के फित्ते भी मै खोल्लण जोगगा कोनी।”

26 “हे भाईयो, थम जो अब्राहम की ऊलाद सो, अर थम गैर यहूदी जो परमेसवर तै डरो सो, थारे धोरे इस उद्धार का वचन भेज्या गया सै। 27 यरुशलेम नगर के रहण आळो अर उनके सरदारों नै, ना मसीह यीशु ताहीं पिच्छाणा अर ना नबियाँ की बात समझी, जो हरेक आराम कै दिन पढ़ी जावै सै, ज्यांतै उस ताहीं कसूरवार ठहराके उन बातों नै पूरा करया। 28 उननै मारण कै जोगगा कोए कसूर उस म्ह कोनी पाया, फेरभी राज्यपाल पिलातुस तै बिनती करी, के वो मार दिया जावै। 29 जब उननै उसके बारे म्ह पवित्तर ग्रन्थ लिक्खी होई सारी बात पूरी करी, तो उस ताहीं कसूर पै तै उतारके कबर म्ह धरया। 30 पर परमेसवर नै उस ताहीं मरे होया म्ह तै जिन्दा करया, 31 अर वो उन ताहीं जो उसके गेल्या गलील परदेस तै यरुशलेम नगर आये थे, घणे दिनां ताहीं अपने चेल्यां नै दिख्दा रहया, आदमियाँ कै स्याम्ही इब वैए उसके गवाह सै।”

32 हम थमनै उस वादा कै बारे म्ह जो बाप-दादा तै करया गया था, यो सुसमाचार सुणावां सां, 33 के परमेसवर नै यीशु ताहीं जिन्दा करके, वोए वादा म्हारी ऊलाद कै खात्तर पूरा करया, जिसा के भजन संहिता दो म्ह लिख्या सै, “तू मेरा बेटा सै, आज तै ए मै तेरा पिता बणगया सूं।”

34 अर उसके इस तरियां तै मरे होया म्ह तै जिन्दा होण कै बारे म्ह भी के वो कदे न्ही सड़े, परमेसवर नै यो कहा सै, “मै दाऊद पै की पवित्तर अर अटल दया तेरे पै करेगा।”

35 दाऊद नै और जगहां भी भजन संहिता म्ह भी लिख्या सै, “तू अपने पवित्तर माणस नै सड़ण न्ही देवेगा।”

36 दाऊद तो परमेसवर की मर्जी कै मुताबिक अपने बखत म्ह सेवा करके मर गया, अर अपने बाप-दादा म्ह जा मिल्या, अर सड़ भी गया। 37 पर जिस ताहीं परमेसवर नै जिन्दा करया, वो सड़ण कोनी पाया।

38 ज्यांतै, हे भाईयो, थम जाण ल्यो के इस्से के जरिये पापां की माफी का सुसमाचार थारे ताहीं दिया जावै सै, 39 अर पापां तै मुक्त करण म्ह मूसा नबी के नियम-कायदे हमेशा नाकामयाब रहे सै, हरेक जो बिश्वास करै सै, वो यीशु के जरिये सारे पापां तै मुक्त करया जावै सै।

40 ज्यांतै चौकन्ने रहो, इसा ना हो के जो नबियाँ की किताब म्ह आया सै, थारे पै भी आण पड़े 41 “हे बुराई करण आळो, देखो, अर हैरान होवो, अर मिट जाओ, क्यूँके मै थारे दिनां म्ह एक काम करूँ मुं, इसा काम के जै कोए थारे तै उसका जिक्कर करै, तो थम भी बिश्वास कोनी करोगे।”

42 जब पौलुस अर बरनबास यहूदी सभाघर तै बाहरणै लिकड़ण लागरे थे, तो माणस उनतै बिनती करण लागगे के आगले आराम कै दिन म्हारै ताहीं ये बात फेर सुणाई जावै। 43 जब सभा उठ ली फेर भोत-से यहूदी अर यहूदी पंथ म्ह आये होए भगतां म्ह तै घणखरे पौलुस अर बरनबास कै पाच्छे हो लिये, अर उननै उन ताहीं बात करकै समझाया के परमेसवर कै अनुग्रह म्ह बणे रहा।

XXXXXXXXXX XXX XXXXX XX XXXXX

44 आगले आराम के दिन नगर के तकरीबन सारे लोग परमेसवर का वचन सुणण नै कट्टे हो गये।

45 पर यहूदी भीड़ नै देखकै मन ए मन म्ह जळण लागगे, अर बुराई करदे होए पौलुस की बातों के विरोध म्ह बोल्लण लागगे।

46 फेर पौलुस अर बरनबास हिम्मत करकै कहण लागगे, “जरूरी था के परमेसवर का वचन पैहल्या थारे तै सुणाया जान्दा, इब जब के थमनै इस ताहीं नकार दिया सै, अर यो करते होए अपणे-आप ताहीं अनन्त जीवन के खात्तर अयोग्य घोषित कर दिया सै, तो देखो, हम गैर यहूदियाँ के कान्ही फिरां सां। 47 क्यूँके प्रभु नै म्हारै ताहीं यो हुकम दिया सै, मन्ने तेरे ताहीं गैर यहूदियाँ के खात्तर चाँदणा ठहराया, ताके तू धरती कै छोर ताहीं उद्धार का दरबाजा हो।”

48 न्यू सुणकै गैर यहूदी राज्जी होए, अर परमेसवर कै वचन की बड़ाई करण लागगे, अर जितने अनन्त जीवन के खात्तर ठहराए गये थे, उननै बिश्वास करया।

49 फेर प्रभु का वचन उस सारे देश म्ह फैलाण लागया। 50 पर यहूदी अगुवां नै भगत अर आच्छे खानदान की लुगाईयां ताहीं अर नगर के खास आदमियाँ ताहीं उकसाया, अर पौलुस अर बरनबास कै खिलाफ दंगा करा कै उन ताहीं अपणी सीमा तै लिकाड़ दिया। 51 फेर पौलुस अर बरनबास उनकै स्याम्ही पायां की धूळ झाड़के इकुनियुम नगर म्ह चले गये। 52 अर चेल्ले आनन्द अर पवित्र आत्मा तै भरदे चले गये।

## 14

XXXXXXXXXX XXX XXXXX XX XXXXX

1 इकुनियुम नगर म्ह इसा होया के वे यहूदियाँ के आराधनालय म्ह गैल-गैल गये, अर इस ढाळ बात करी के यहूदियाँ अर यूनानियाँ म्ह घणखरयां नै बिश्वास करया। 2 पर बिश्वास ना करण आळे गैर यहूदियाँ के मन बिश्वासी भाईयाँ कै विरोध म्ह उकसाये अर कड़ुवापण पैदा करया। 3 पौलुस अर बरनबास घणे दिन ताहीं उड़े रहे, अर प्रभु कै भरोसै पै हिम्मत तै बात करै थे, अर वो उनकै हाथ्यां तै चमत्कार अर अनोक्खे काम करवा कै अपणे अनुग्रह के वचन ताहीं साबित करदा रह्या। 4 पर नगर के लोगगां म्ह फूट पड़गी थी, इसतै घणेए तो यहूदियाँ कान्ही अर घणेए प्रेरितां कान्ही होगये। 5 जब गैर यहूदी अर यहूदी उनकी बेजती करण नै अर उनकै पत्थर मारण कै खात्तर अपणे सरदारों सुधा उन कान्ही भाज्जे, 6 फेर वे इस बात नै जाणगे अर लुकाउनिया परदेस के लुस्त्रा अर दिखे नगरां म्ह, अर लोवै-धोरै के परदेसां म्ह भाजगे 7 अर ओड़े सुसमाचार सुणाण लागगे।

XXXXXXXXXX XX XXXXX XXX

8 लुस्त्रा नगर म्ह एक माणस बेट्या था, जो पायां तै लाचार था। वो जन्म तै ए लंगड़ा था, अर कदे न्ही चाल्या था। 9 वो पौलुस नै बात करदे सुणे था। पौलुस नै उसकी ओड़ टकटकी लाकै देख्या

के उसने ठीक होण का विश्वास सै, <sup>10</sup> अर टाड्डू आवाज म्ह बोल्य्या, “अपणे पायां कै बळ सीध्धा खड्या हो।” फेर वो उच्छळकै चाल्लण-फिरण लाग्या।

<sup>11</sup> लोग्गां नै पौलुस का यो काम देखकै लुकाउनिया की भाषा म्ह टाड्डू आवाज म्ह कह्या, “देवता माणस कै रूप म्ह हाकै म्हारे धोरे उतर आयै सै।” <sup>12</sup> उननै बरनबास ताहीं ज्यूस देवता, अर पौलुस ताहीं हिरमेस कह्या क्यूँके वो खास संदेश देण आळा था। <sup>13</sup> ज्यूस देवता के उस मन्दर का पुजारी जो उनकै नगर कै स्याम्ही था, बळध अर फूल्लां के हार फाटकां पै ल्याकै लोग्गां कै गेल्या बलिदान करणा चाहवै था।

<sup>14</sup> पर बरनबास अर पौलुस प्रेरितां नै जिब यो सुण्या, तो अपणे लत्ते पाड़े अर भीड़ म्ह लपके, अर रुक्का मारकै कहण लागगे, <sup>15</sup> “हे भले माणसां, थम के करो सो? हम भी तो थारे तरियां दुख-सुख भोग्गण आळे माणस सां, अर थमनै सुसमाचार सुणावां सां के थम इन बेकार चिज्जां तै न्यारे हाकै जिन्दे परमेसवर कै कान्ही फिरो, जिसनै सुर्ग अर धरती अर समुन्दर अर जो किमे उन म्ह सै बणाया सै। <sup>16</sup> उसनै बीत्ते होए बखत म्ह सारी जात्तां ताहीं अपणे-अपणे रास्तयां पै चाल्लण दिया। <sup>17</sup> फेर भी वो अपणे भले काम करण के जरिये अपणे बांरे म्ह गवाही देंदा रह्या, अर अकास तै मिह अर फळआळी ऋतु देकै थारे मन नै खाणे अर खुशी तै भरदा रह्या।” <sup>18</sup> न्यू कहकै भी उननै लोग्गां ताहीं बड्डी मुश्किलां तै रोक्क्या के उनकै खात्तर बलिदान ना करै।

<sup>19</sup> पर कुछ यहूदियां नै अन्ताकिया नगर अर इकुनियुम नगर तै आकै लोग्गां ताहीं अपणी ओड़ कर लिया, अर पौलुस पै पत्थर बरसाए, अर मरया होड़ सोचकै उस ताहीं नगर कै बाहरणै घसीट लेगे। <sup>20</sup> पर चेल्लें जिब उसकै चौगरदेकै आण खड़े होए, तो वो उठकै नगर म्ह गया अर दुसरे दिन बरनबास कै गेल्या दिरबे नगर कान्ही चल्या गया।

### XXXXXXXX XX XXXXXXXXXXX XXX XX XXXXXXX

<sup>21</sup> वे उस नगर के लोग्गां ताहीं सुसमाचार सुणाकै अर घणे चेल्लें बणाकै, लुस्त्रा अर इकुनियुम अर अन्ताकिया नगर नै बोहड़ आयै, <sup>22</sup> अर चेल्यां के मनां नै स्थिर करदे अर उत्साहित करते होए या शिक्षा देते रह्ये के विश्वास म्ह बणे रहो, अर न्यू कहवै थे, “हमनै घणे दुख ठाकै परमेसवर के राज्य म्ह बड़णा होगा।” <sup>23</sup> अर उननै हरेक कलीसिया म्ह उनके खात्तर अगुवें ठहराए, अर बरत सुधा प्रार्थना करकै उन ताहीं प्रभु कै हाथ्यां म्ह सौप्या जिसपै उननै विश्वास करया था। <sup>24</sup> फेर पिसिदिया परदेस तै होन्दे होए वे पंफूलिया परदेस पोहचे, <sup>25</sup> फेर पिरगा नगर म्ह वचन सुणाकै अत्तलिया नगर म्ह आयै,

<sup>26</sup> अर ओड़ै तै वे पाणी के जहाज तै अन्ताकिया नगर गये, जित्त वे उस काम कै खात्तर जो उननै पूरा करया था परमेसवर के अनुग्रह म्ह सौपे गये थे। <sup>27</sup> अन्ताकिया नगर पोहचकै उननै कलीसिया कट्टी करी अर बताया के परमेसवर नै उनके गेल्या हाकै किसे बड़े-बड़े काम करे, अर गैर यहूदियां कै खात्तर विश्वास का कारण खोल दिया। <sup>28</sup> अर वे चेल्यां कै गेल्या घणे दिन ताहीं रहे।

## 15

### XXXXXXXX XX XX XX

<sup>1</sup> फेर कुछ यहूदी विश्वासी यहूदिया परदेस तै आकै भाईयां नै सिखाण लागगे “जै मूसा नबी की रीत पै थारा खतना न्ही हो तो थम उद्धार कोनी पा सकदे।” <sup>2</sup> जिब पौलुस अर बरनबास का उनतै घणा वाद-विवाद अर बहस होई तो यो फैसला लिया गया के पौलुस अर बरनबास अर उन म्ह तै कुछ माणस इस बात कै बाँरे म्ह प्रेरितां अर कलीसिया के अगुवां कै धोरै यरुशलेम नगर म्ह जावे। <sup>3</sup> कलीसिया नै उन ताहीं विदा करया, अर वे फीनीके अर सामरिया परदेसां तै होन्दे होए गैर यहूदियां के जरिये यीशु मसीह पै विश्वास करण का जिकूर करते गये, जिसतै सारे विश्वासी भाई घणे राज्जी होए। <sup>4</sup> जिब वे यरुशलेम नगर पोहचे, तो कलीसिया अर प्रेरित अर कलीसिया के अगुवें उनतै

सुशी के गैल मिले, अर पौलुस अर बरनबास नै बताया के परमेसवर नै उनके गेल्या होकै किसे-किसे काम करे थे।

5 पर फरीसियाँ के पंथ म्ह तै जिन नै विश्वास करया था, उन म्ह तै कितन्याँ नै उठके कह्या, “गैर यहूदियाँ ताहीं खतना कारण अर मूसा नबी के नियम-कायदे नै मानण का हुकम देणा चाहिए।”

6 फेर प्रेरित अर कलीसिया के अगुवें इस बात के बारे म्ह विचार करण के खात्तर कटठे होए।

7 फेर पतरस नै घणी बहस हो जाणके पाच्छे खड़े होके उनतै कह्या, “हे भाईयो, थमनै बेरा सै के घणे दिन होए परमेसवर नै थारे म्ह तै मेरै ताहीं छोट लिया के मेरै मुँह तै गैर यहूदी सुसमाचार का वचन सुणके विश्वास करै। 8 मन के जाँचण आळे परमेसवर नै उन ताहीं भी म्हारै की तरियाँ पवित्र आत्मा देके यो बताया सै के वे सब भी उसके माणस सै, 9 अर विश्वास के जरिये उनके मन शुद्ध करके म्हारै म्ह अर उन म्ह किमे फर्क कोनी राख्या। 10 तो इब थम क्यातै परमेसवर नै परखो सों, ताके गैर यहूदी चेल्याँ के कंध्या पै इसा ज़आ धरो, जिसनै ना म्हारे वाप-दाद्रे ठा सकै थे अर ना हम ठा सकाँ सां? 11 हाँ, म्हारा यो यकिन सै के जिस तरियाँ तै वे प्रभु यीशु के अनुग्रह तै उद्धार पावेंगें, उस्से तरियाँ तै हम भी पावागें।”

12 फेर सारी सभा चुपचाप बरनबास अर पौलुस की सुणण लागगी, के परमेसवर नै उनके जरिये गैर यहूदियाँ म्ह किसे बड़े-बड़े चमत्कार, अर अनोक्खे काम दिखाए। 13 उनके भाषण के खतम होण पै याकूब सभा ताहीं कहण लागया, “हे भाईयो, मेरी सुणो।” 14 शमौन पतरस नै बताया के परमेसवर नै पैहले-पहल गैर यहूदियाँ पै किसी दया की निगाह करी के उन म्ह तै अपणे नाम के खात्तर एक प्रजा बणा ले। 15 नबियाँ लेख भी इस बात का समर्थन करै सै, जिसा के पवित्र ग्रन्थ म्ह लिख्या सै

16 “इसके पाच्छे मै फेर आँके दाऊद का पडचा होड़ डेरा उठाऊंगा, अर उसके खण्डराँ नै दुबारा बणाऊंगा, अर उस ताहीं खडचा करूंगा,”

17 जिसके कारण बाकी की बची होड़ मानवजाति परमेसवर नै पा सकै, अर वे सारी गैर यहूदी भी, जिनपै मेरै नाम की छाप लागगी सै, प्रभु नै टोहवें,

18 यो वोए प्रभु कहवै सै जो दुनिया की शरूआत तै इन बातताँ की खबर देंदा आया सै।

19 “ज्यातै मेरा विचार यो सै के हम उन गैर यहूदियाँ खात्तर कोए मुसीबत पैदा ना करा, जो परमेसवर के कान्ही फिरै सै, हम उन ताहीं दुख ना देवाँ, 20 पर आच्छा तो यो होगा के हम उन ताहीं यो हुकम लिख भेज्जा, के वे मूर्तियाँ नै चढ़ाण आळी चिज्जाँ अर जारी अर गळा घोट्टे होया के माँस तै अर लहू तै दूर रहवै। 21 क्यूँके गुजरे बखत तै नगर-नगर मूसा नबी के नियम-कायदे का प्रचार करण आळे होन्दे चले आये सै, अर वा हरेक आराम के दिन आराधनालय म्ह पढ़ी जावै सै।”

### XXXXXXXXXXXXXXXXXXXXXXXXXXXX

22 फेर सारी कलीसिया सुधा प्रेरिताँ अर कलीसिया के अगुवाँ नै आच्छा लागया के अपणे म्ह तै कुछ माणसाँ नै चुणे, यानिके यहूदा जो बरसब्बा कुह्हावै सै, अर सीलास ताहीं जो भाईयाँ म्ह मुखिया थे, अर उन ताहीं पौलुस अर बरनबास के गेल्या अन्ताकिया नगर खन्दावै। 23 उननै उनके हाथ या चिट्ठी लिख भेजी “अन्ताकिया नगर, सीरिया अर किलिकिया परदेस के रहण आळे भाईयाँ नै जो गैर यहूदियाँ म्ह तै सै, प्रेरिताँ अर कलीसिया के अगुवें भाईयाँ का नमस्कार। 24 हमनै सुण्या सै के म्हारै म्ह तै कुछाँ नै ओड़ै जाके, थारे ताहीं अपनी बातताँ तै डरा दिया, अर थारे मन उल्ट दिये सै पर हमनै उन ताहीं हुकम कोनी दिया था। 25 इस करके हमनै एक चित्त होके ठीक जाण्या के छोट्टे होड़ माणसाँ ताहीं अपणे प्यारे बरनबास अर पौलुस के गेल्या थारे धरै भेज्जा। 26 ये इसे माणस सै जिन नै अपनी ज्यान म्हारै प्रभु यीशु मसीह के नाम के खात्तर जोखम म्ह गेरी सै। 27 ज्यातै हमनै यहूदा अर सीलास ताहीं भेज्या सै, के थम खुद उनके ए मुँह तै इस बारे म्ह सुण सको। 28 पवित्र आत्मा नै अर हमनै ठीक जाण पाट्टी के इन जरूरी बातताँ नै छोड़, थारे पै और बोझ ना गेरै, 29 के

धम मूर्तियाँ पै बलि करे होया तै अर लहू तै, अर गळा घोटटे होए पशुआं के माँस तै, अर जारी तै दूर रहो। इनतै दूर रहो तो थारा भला होगा। बाकी सब ठीक-ठाक सै।”

30 फेर वे बिदा होके अन्ताकिया नगर पोहचे, अर सभा नै कट्टी करके वा चिट्ठी उन ताहीं दे दी। 31 वे चिट्ठी पढ़के उस उपदेश की बात तै घणे राज्जी होए। 32 यहूदा अर सीलास नै जो आप भी नबी थे, घणी बातनां तै विश्वासी भाईयाँ ताहीं उपदेश देके पक्का करया। 33 वे कुछे दिन रहके, विश्वासी भाईयाँ तै शान्ति के गेल्या बिदा होए के अपणे खन्दाण आळा के धोरे जावे। 34 (पर सीलास नै ओड़ै रहणा आच्छा लाग्या।) 35 पर पौलुस अर बरनबास अन्ताकिया नगर म्ह रह गये अर और घणखरे आदमियाँ के गेल्या प्रभु यीशु के वचन का उपदेश करदे अर सुसमाचार सुणान्दे रहे।

~~~~~

36 कुछे दिनां पाच्छे, पौलुस नै बरनबास तै कह्या, “जिन-जिन नगरां म्ह हमने प्रभु का वचन सुणाया था, आओ, फेर उन म्ह चालके अपणे विश्वासी भाईयाँ ताहीं देखके के वे किस तरियां सै।” 37 फेर बरनबास नै यूहन्ना ताहीं जो मरकुस कुह्वावे सै, गेल्या लेण का विचार करया। 38 पर पौलुस नै उस ताहीं जो पंफूलिया परदेस म्ह उनतै न्यारा होगया था, अर काम पै उनके गेल्या कोनी गया, गेल्या ले जाणा ठीक कोनी समझया। 39 आखर म्ह इसा वाद-विवाद होया के वे एक-दुसरे तै न्यारे पाटगे, अर बरनबास, मरकुस नै लेके जहाज पै साइप्रस टापू चल्या गया। 40 पर पौलुस नै सीलास ताहीं छाँट लिया, अर विश्वासी भाईयाँ तै परमेसवर के अनुग्रह म्ह सौंप्या जाके ओड़ै तै चल्या गया, 41 अर वो कलीसियाओं ताहीं स्थिर करदा होया सीरिया अर किलिकिया परदेस तै होन्दे होए लिकइया।

## 16

~~~~~

1 फेर वो दिखे अर लुस्तुरा नगर म्ह भी गया। ओड़ै तीमुथियुस नाम का एक चेल्ला था, उसकी माँ एक यहूदी विश्वासी थी, पर उसका बाप यूनानी था। 2 वो लुस्तुरा अर इकुनियुम नगर के भाईयाँ म्ह उसका आच्छा नाम था। 3 पौलुस की मर्जी या थी के वो उसके गेल्या जावे, अर जो यहूदी माणस उन जगहां म्ह थे उनके कारण उननै उनका खतना करया, क्यूँके वे सारे जाणै थे, के उनका बाप यूनानी था। 4 पौलुस अर उसका साथी नगर-नगर जान्दे होइ चेल्यां ताहीं वे सारे हुकम सौंपते जावे थे, जो यरुशलेम नगर के प्रेरितां अर कलीसिया के अगुवां नै तय करी थी। 5 इस तरियां कलीसिया विश्वास म्ह पक्की होंदी गई अर गिणती दिन-ब-दिन बधती गई।

~~~~~

6 वे फेरुगिया अर गलातिया परदेसां म्ह तै होके गये, क्यूँके पवित्त्र आत्मा नै उननै आसिया परदेस म्ह वचन सुणाण तै मना करया। 7 उननै मूसिया परदेस के लोवे पोहचके, बिथुनिया परदेस म्ह जाणा चाह्या, पर पवित्त्र आत्मा नै उन ताहीं जाण कोनी दिया। 8 आखर म्ह वे मूसिया परदेस तै होके त्रोआस म्ह आये। 9 ओड़ै पौलुस नै रात नै दर्शन देख्या के एक मकिदुनिया परदेस का माणस खडचा होया उनतै विनती करके कहण लागरया सै, “पार उतरके मकिदुनिया परदेस म्ह आ, अर म्हारी मदद कर।” 10 उसके यो दर्शन देखदे हमने जिब्बे मकिदुनिया परदेस जाणा चाह्या, न्यू सोचके के परमेसवर नै म्हारै ताहीं उनतै सुसमाचार सुणाण के खात्तर बुलाया सै।

~~~~~

11 इस करके त्रोआस नगर तै जहाज खोल के हम सीधे सुमात्राके टापू अर दुसरे दिन नियापुलिस नगर म्ह आये। 12 ओड़ै तै हम फिलिप्पी नगर पोहचे, जो मकिदुनिया परदेस का खास नगर अर रोमियों का मोहल्ला सै, अर हम उस नगर कुछे दिन रहे।

13 आराम के दिन हम नगर के फाटक के बाहरणै नदी के किनारे न्यू सोचके गये के ओड़ै प्रार्थना करण की जगहां होगी, अर बैठके उन लुगाईयाँ तै जो कट्टी होई थी, बतळाण लागगे। 14 धुआतीरा



37 पर पौलुस नै उनतै कह्या, “उननै म्हारै ताहीं जो रोमी माणस सै, कसूरवार ठहराए बिना माणसां के स्याम्ही मारया अर जेठ म्ह गेरया। इब के हमनै बोल-बाल्ले लिकाइण लागरे सै? इसा कोनी, पर वे खुद आकै हमनै बाहरणै लिकाइै।”

38 सिपाहियाँ नै ये बात हाकिमां तै कही, अर वे न्यू सुणकै के वे रोम के वासिन्दे सै, डरगे, 39 अर आकै उन ताहीं मनाया, अर बाहरणै ले जाकै विनती करी के नगर चले जाओ। 40 वे जेठ तै लिकइके लुदिया कै उरै गये, अर विश्वासी भाईयाँ तै भेंट करके उन ताहीं शान्ति देई, अर चले गये।

## 17

~~~~~

1 पौलुस अर सीलास अम्फिपुलिस अर अपुल्लोनिया नगरां तै होकै थिस्सलुनीके नगर म्ह आये, जित्त यहूदियाँ का एक आराधनालय था। 2 पौलुस अपनी रीत कै मुताबिक उनकै धरै गया, अर तीन्नु आराम कै दिनां म्ह पवित्र ग्रन्थ म्ह तै उनकै गेल्या बहस करी, 3 अर वो उनका मतलब खोल-खोल के समझावै था के मसीह नै दुख टाणा, अर मरे होया म्ह तै जिन्दा उठणा, जरूरी था, अर “योए यीशु जिसकी मै थमनै कथा सुणाऊँ सूँ, मसीह सै।” 4 कितने यहूदी अर परमेसवर के भगत यूनानियाँ म्ह तै घणखरयां नै, अर घणी आच्छे खानदान की लुगाईयाँ नै मान लिया, अर पौलुस अर सीलास कै गेल्या मिलगे।

5 पर यहूदियाँ नै जळण तै भरकै बाजारू माणसां म्ह तै कुछ दुष्ट माणसां ताहीं अपने गेल्या लिया, अर भीड़ कट्टी करके नगर म्ह दंगा मचाण लागगे, अर यासोन कै घर पै चढ़ाई करके उन ताहीं आदमियाँ कै स्याम्ही ल्याणा चाह्या। 6 उननै जब वे ओड़ै न्ही मिले तो वे किल्की मारदे होए यासोन अर कुछ विश्वासी भाईयाँ ताहीं नगर के हाकिमां कै स्याम्ही खींच ल्याए, “ये माणस जिन नै दुनिया ताहीं उल्टा-पुल्टा कर दिया सै, उरै भी आ लिए सै।” 7 यासोन नै उन ताहीं अपने घरां रहण की इजाजत दी सै। ये सारे के सारे न्यू कहवै सै के यीशु राजा सै, अर कैसर के हुकमां का बिरोध करै सै।” 8 उननै आदमियाँ ताहीं अर नगर के हाकिमां ताहीं न्यू सुणाकै डरा दिया। 9 ज्यांतै उननै यासोन अर बाकी माणसां तै जमानत पै उन ताहीं छोड़ दिया।

~~~~~

10 विश्वासी भाईयाँ नै जिब्बे राते-रात पौलुस अर सीलास ताहीं बिरीया नगर भेज दिया, अर वे ओड़ै पोहचके यहूदियाँ के आराधनालय म्ह गये। 11 ये माणस तो थिस्सलुनीके नगर के यहूदियाँ तै आच्छे थे, अर उननै घणे चाहू तै वचन अपनाया, अर हर-रोज पवित्र ग्रन्थां म्ह टोहन्दे रहे के ये बात न्यू सै के न्ही। 12 ज्यांतै उन म्ह तै घणखरयां नै, अर यूनानी आच्छे खानदान की विरबानियाँ म्ह तै अर माणसां म्ह तै भी घणखरयां नै विश्वास करया।

13 पर जब थिस्सलुनीके नगर के यहूदी जाणगे के पौलुस बिरीया नगर म्ह भी परमेसवर का वचन सुणावै सै, तो ओड़ै भी माणसां ताहीं उकसाण अर गड़बड़ मचाण लागगे। 14 फेर विश्वासी भाईयाँ नै जिब्बे पौलुस ताहीं बिदा करया के समुन्दर कै किनारे चल्या जावै, पर सीलास अर तीमुथियुस बिरीया रहगे। 15 पौलुस के मददगार उस ताहीं एथेंस नगर तक लेगे, अर सीलास अर तीमुथियुस कै खात्तर या आज्ञा पाके बिदा होए के उसके धरै घणी तगाजै तै आवै।

~~~~~

16 जब पौलुस एथेंस नगर म्ह उसकी बाट देखवै था, तो नगर नै मूर्तियाँ तै भरया होइ देखके भोत परेशान होगया। 17 इस करके वो आराधनालय म्ह यहूदियाँ तै अर भगतां तै, अर चौक म्ह जो माणस उसतै फेटै थे उनतै हरेक दिन बहस करया करै था। 18 फेर इपिकूरी अर स्तोईकी उपदेशकां म्ह तै कुछे उसतै तर्क करण लागगे, अर कुछां नै कह्या, “यो बकवादी के कहणा चाहवै सै?” पर दुसरयां नै कह्या, “वो दुसरे देवत्यां का प्रचारक दिक्खे सै” क्यूंके वो यीशु का अर पुनरुत्थान का सुसमाचार सुणावै था। 19 फेर वे उसनै अपने गेल्या अरियुपगुस नामक आराधनालय म्ह लेगे अर बुद्धया,





7 पौलुस यहूदी आराधनालय तै लिकड़कै वो तीतुस यूस्तुस नामक परमेसवर के एक भगत कै घरां आया, जिसका घर आराधनालय तै लाग्या होइ था।<sup>8</sup> फेर आराधनालय के सरदार किरस्पुस नै अपने सारे कुण्बे सुधा प्रभु पै विश्वास करया, अर घणखरे कुरिन्थवासी सुणकै विश्वास लाये, अर बपतिस्मा लिया।

9 प्रभु नै एक रात दर्शन कै जरिये पौलुस तै कह्या, “मतना डरै, बल्के कहे जा अर बोल-बाल्ला मतना रहवै, <sup>10</sup> क्यूँके मै तेरे गैल सूँ, अर कोए तेरे पै चढ़ाई करकै तेरा नुकसान कोनी करैगा, क्यूँके इस नगर म्ह मेरे घणे माणस सै।” <sup>11</sup> ज्यांतै पौलुस उन म्ह परमेसवर का वचन सिखान्दे होए डेढ़ साल ताहीं रहया।

12 जिव गल्लियो अखाया परदेस का राज्यपाल था, तो यहूदी माणस एक्का करकै पौलुस पै चढ़ आये, अर उस ताहीं न्याय गद्दी कै स्याम्ही ल्याकै कहण लाग्गे, <sup>13</sup> “यो माणसां नै समझावै सै, के परमेसवर की आराधना इस ढाळ तै करो, जो नियम-कायदे कै उल्ट सै।”

14 जिव पौलुस बोल्लण पैए था, तो गल्लियो नै यहूदियां ताहीं कह्या, “हे यहूदियों, जै या किमे अन्याय या दुष्टता की बात होन्दी, तो सही था के मै थारी सुणदा। <sup>15</sup> पर जै या बहस शब्दां, अर नाम्मां, अर थारे उरै के नियम-कायदे कै बारे म्ह सै, तो थमे जाणो, क्यूँके मै इन बाततां का न्यायाधीश कोनी बणणा चाहन्दा।” <sup>16</sup> अर उसनै उन ताहीं न्याय गद्दी कै स्याम्ही तै लिकाड़ दिया। <sup>17</sup> जद सारे माणसां नै आराधनालय के सरदार सोस्थिनेस ताहीं पकड़कै न्याय गद्दी कै स्याम्ही मारया। पर गल्लियो नै इन बाततां की भी किमे चिन्ता कोनी करी।

### XXXXXXXXXX XXX XXXXXXXXXXXXX

18 पौलुस घणे दिन ताहीं कुरिन्थुस नगर रहया। फेर विश्वासी भाईयां तै बिदा होकै किखिरया बन्दरगाह म्ह ज्यांतै सिर मुण्डाया, क्यूँके उसनै मन्नत मान्नी थी, अर जहाज पै सीरिया परदेस नै चल्या गया अर उसके गेल्या पिरसकिल्ला अर अक्विला थे। <sup>19</sup> उसनै इफिसुस नगर पोहचकै उन ताहीं ओड़े छोड्या, अर खुद आराधनालय म्ह जाकै यहूदियां तै बहस करण लाग्या। <sup>20</sup> जिव माणसां नै उसतै बिनती करी, “म्हारे गेल्या कुछ और दिन रह।” तो उसनै कोनी मान्नी, <sup>21</sup> पर न्यू कहकै उसतै बिदा होया, “जै परमेसवर नै चाह्या तो मै थारे धोरे फेर आऊंगा।” फेर वो इफिसुस नगर तै जहाज खोल के चाल दिया, <sup>22</sup> अर कैसरिया नगर म्ह उतरकै (यरुशलेम नगर नै) गया अर कलीसिया ताहीं नमस्कार करकै अन्ताकिया नगर म्ह आया।

### XXXXX XXX XXXXX XXXXXXX-XXXXXX

23 फेर किमे दिन रहकै वो ओड़े तै लिकड़या, अर एक और तै गलातिया अर फुरगिया परदेसां म्ह सारे चेल्यां ताहीं स्थिर करदा हांडया।

### XXXXXXXX XXX XXX XXXXXXX

24 अपुल्लोस नामक एक यहूदी, जिसका जन्म सिकन्दरिया नगर म्ह होया था, जो ज्ञान्नी माणस था अर पवित्र ग्रन्थ ताहीं आच्छी तरियां तै जाणै था, इफिसुस नगर म्ह आया। <sup>25</sup> उसनै प्रभु कै राह की शिक्षा पाई थी, अर मन लाकै यीशु कै बारे म्ह सही-सही सुणावे अर सिखावै था, पर वो सिर्फ यहून्ना के बपतिस्मा की बात जाणै था। <sup>26</sup> वो आराधनालय म्ह बिना डरे बोल्लण लाग्या, पर पिरसकिल्ला अर अक्विला उसकी बात सुणकै उस ताहीं अपने उरै लेगे अर परमेसवर की राह उस ताहीं और भी सही-सही बताई।

27 जिव उसनै फैसला करया के पार उतरकै अखाया परदेस म्ह जावै तो विश्वासी भाईयां नै उस ताहीं धीरज बन्धाके चेल्यां ताहीं लिख्या के वे उसतै आच्छी ढाळ फेटे, अर उसनै ओड़े पोहचकै उन माणसां की घणी मदद करी जिन नै अनुग्रह के कारण विश्वास करया था। <sup>28</sup> क्यूँके वो पवित्र ग्रन्थ तै सबूत दे-देकै के यीशु ए मसीह सै, घणे तावळेपण तै यहूदियां ताहीं सारया कै स्याम्ही निरुतर (बोलती बन्द) करदा रहया।

## 19

XXXXXXXXXX

1 जिव अपुल्लोस कुरिन्थुस नगर म्ह था, तो पौलुस उप्पर के सारे परदेस तै होकै इफिसुस नगर म्ह आया। ओड़ै कई चेल्यां ताहीं मिल्या। 2 उनतै बोल्या, “के थमनै विश्वास करदे बखत पवित्त्र आत्मा पाया था?” उननै उसतै कह्या, “हमनै तो पवित्त्र आत्मा का जिक्र भी कोनी सुण्या।”

3 पौलुस नै उनतै कह्या, “तो फेर थमनै किसका बपतिस्मा लिया?” वे बोल्ले, “यूहन्ना का बपतिस्मा।”

4 पौलुस बोल्या, “यूहन्ना नै न्यू कह्या, के पाप करणा छोड़ दो, अर बपतिस्मा ल्यो, परमेसवर थारे पाप माफ कर देगा, अर जो मेरे पाच्छे आण आळा सै, उसपै विश्वास करियो, यानिके यीशु पै।” 5 न्यू सुणकै उननै प्रभु यीशु के नाम म्ह बपतिस्मा लिया। 6 जिव पौलुस नै उनपै हाथ धरे, तो पवित्त्र आत्मा उनपै उतरया, अर वे अन्य-अन्य भाषा बोल्लण अर भविष्यवाणी करण लागगे। 7 ये सारे करीबन बारहा माणस थे।

8 पौलुस आराधनालय म्ह जाकै तीन महिन्ने ताहीं बिना डरे होकै बोल्दा रहया, अर परमेसवर के राज्य कै बारे म्ह बहस करदा अर समझान्दा रहया। 9 पर जो माणसां कठोर थे उननै उसका विश्वास कोनी करया, बल्के माणसां कै स्याम्ही इस पंथ नै बुरा कहण लागगे, तो उसनै उन ताहीं छोड़ दिया अर चेल्यां ताहीं साथ लेकै तुरन्नुस की पाठशाला म्ह गये, जित वे रोज भीड़ तै परमेसवर के बारे म्ह बहस करया करै थे। 10 दो साल ताहीं न्यूए होन्दा रहया, उरै ताहीं के आसिया परदेस के रहणीये के यहूदी के यूनानी सारया नै प्रभु का वचन सुण लिया।

11 परमेसवर नै पौलुस ताहीं अदभुत चमत्कार करण की सामर्थ दी। 12 उरै ताहीं के रूमाल अर अन्गोछे उसके गात तै छुआ कै बिमारां पै गेरे थे, अर उनकी बीमारी जान्दी रहवै थी, अर भुंडी ओपरी आत्मा उन म्ह तै लिकड़ जाया करै थी।

13 पर कुछ यहूदी लोग जो झाड़ा-फूँक करदे हान्डै थे, न्यू करण लागगे के जिन म्ह भुंडी ओपरी आत्मा हो उनपै प्रभु यीशु का नाम न्यू कहकै फूँके, “जिस यीशु का प्रचार पौलुस करै सै, मै थारे ताहीं उससे आदमी की कसम दियुँ सूँ।” 14 अर स्क्कवा नाम का एक यहूदी प्रधान याजक के सात बेटे थे, जो इस्से तरियां ए करै थे। 15 पर भुंडी ओपरी आत्मा नै उन ताहीं जवाब दिया, “यीशु ताहीं मै जाणु सूँ, अर पौलुस ताहीं भी पिच्छाणु सूँ, पर थम कौण सो?” 16 अर उस माणस नै जिसम्ह भुंडी ओपरी आत्मा थी उनपै लपककै अर उन ताहीं बस म्ह करकै, उनपै इसा दुर्गति मचाया के वे उघाड़े अर घायल होकै उस घर तै लिकड़ भाज्जे।

17 या बात इफिसुस नगर के रहण आळे सारे यहूदी अर यूनानी भी जाणगे, अर वे सारे डरगे, अर प्रभु यीशु के नाम की बड़ाई होई। 18 जिन नै विश्वास करया था, उन म्ह तै घणखरयां नै आकै अपणे-अपणे काम्मां ताहीं मान लिया अर दिखा दिया। 19 जादू करण आळा म्ह तै घणाए नै अपणी-अपणी सारी पोथी कट्ठी करकै सारया के स्याम्ही जळा दी, अर जिव उसका दाम जोड़या गया, तो पचास हजार चाँदी के सिक्के कै बराबर लिकड़या। 20 इस तरियां प्रभु का वचन सामर्थी तरिकके तै फैलदा अर हावी होँदा गया।

21 जिव ये बात हो ली तो पौलुस नै आत्मा म्ह ठाण लिया के मकिदुनिया अर अखाया परदेस तै होकै यरुशलेम नगर जाऊँ, अर बोल्या, “यरुशलेम जाणके बाद मन्ने रोम ताहीं भी देखणा जरूरी सै।” 22 इस करकै अपणी सेवा करणीया म्ह तै तीमुथियुस अर इरास्तुस ताहीं मकिदुनिया परदेस भेजकै खुद किमे दिन आसिया परदेस म्ह रहग्या।

XXXXXXXXXX

23 उस बखत उस पन्थ के बारे म्ह घणा दंगा माच्या। 24 क्यूँके देमेत्रियुस नाम का एक सुनार अरतिमिस के चाँदी के मन्दर बणवाकै कारिगरां ताहीं घणा काम दुवाया करै था। 25 उसनै उन ताहीं अर इस्से तरियां की चिज्जां के कारिगरां ताहीं कट्ठा करकै कह्या, “हे भाईयो, थमनै बेरा सै के इस

काम तै हमनै कितना धन मिलै सै।<sup>26</sup> थम देखो अर सुणो सो के सिर्फ इफिसुस नगर म्ह ए कोनी, बल्के कई बर सारे आसिया परदेस म्ह न्यू कह-कहके इस पौलुस नै घणे माणसां ताहीं समझाया अर भकाया भी सै, के जो हाथ की कारीगरी सै, वे ईश्वर कोनी।<sup>27</sup> इसतै इब सिर्फ इस्से बात का ए भय न्ही सै के म्हारै इस धन्धे की इज्जत-मान जान्दी रहवैगी, बल्के न्यू भी के महान् देवी अरतिमिस का मन्दर तुच्छ समझया जावैगा, अर जिस ताहीं सारा आसिया परदेस अर दुनिया पूज्जै सै उसका महत्व भी जान्दा रहवैगा।”

<sup>28</sup> कारीगर न्यू सुणके खुन्दक तै भरगे अर किल्की मार-मारकै कहण लागगे, “इफिसियाँ की अरतिमिस देवी, महान् सै!”<sup>29</sup> अर सारे नगर म्ह घणा दंगा माचगया, अर माणसां नै मकिदुनियावासी गयुस अर अरिस्तर्खुस ताहीं जो पौलुस के संगी मुसाफर थे, पकड़ लिया, अर एक सेती रंगशाला म्ह भाजगे।<sup>30</sup> जिब पौलुस नै माणसां कै धौरै भीत्तर जाणा चाह्या तो चेल्यां नै उस ताहीं जाण न्ही दिया।<sup>31</sup> आसिया परदेस के हाकिमां म्ह तै भी उसके कई साथियाँ नै उसके धौरै कहवां भेज्या अर विनती करी के रंगशाला म्ह जाके जोखम ना टाईयो।

<sup>32</sup> भीड़ म्ह तै कोए कुछ चिल्लावे था अर कोए कुछ, सारी भीड़ पूरी तरियां घवराई होई थी, अर घणखरे माणसां नै तो न्यूए कोनी बेरा था के वे क्यां खात्तर कट्टे होए सै।<sup>33</sup> फेर उननै सिकन्दर ताहीं, जिस ताहीं यहूदियां नै खड्या करया था, भीड़ म्ह आगै बढ़ाया। सिकन्दर हाथ तै इशारा करके माणसां कै स्याम्ही जवाब देणा चाहवै था।<sup>34</sup> पर जिब उननै बेरा लागगया के वो यहूदी सै, तो सारे के सारे एक बोल म्ह कोए दो घंटे ताहीं चिल्लान्दे रहे, “इफिसियाँ की अरतिमिस देवी, महान् सै।”

<sup>35</sup> फेर नगर के मन्त्री नै माणसां ताहीं शान्त करके कहा, “हे इफिसुस नगर के माणसां, किसनै न्ही बेरा के इफिसियाँ का नगर महान् अरतिमिस देवी के मन्दर, अर ज्यूस की ओड़ तै गिरी होड़ मूर्ति का टहलुआ सै।”

<sup>36</sup> आखर म्ह जिब के इन बातों का खण्डन ए कोनी हो सकदा, तो सही सै के थम शान्त रहो अर बिना सोच्चे-समझे किमे ना करो।<sup>37</sup> क्यूँके थम इन माणसां नै ल्याए सो जो ना मन्दर के लुट्टण आळे सै अर ना म्हारी देवी के बुराई करणीये सै।<sup>38</sup> इस करके देमेतिरियुस अर उसके मित्तर-कारिगरों ताहीं किसे तै एतराज हो तो कच्ड़े जा सकै सै अर हाकिम भी सै, वे एक-दुसरे पे दोष लावे।<sup>39</sup> पर जै थम किसे और बात के बारे म्ह किमे बुझणा चाहो सो, तो बखत पे सभा म्ह फैसला करया जावैगा।

<sup>40</sup> आज की इस घटना के कारण म्हारै पे उपद्रव का इल्जाम लागगण का खतरा सै, क्यूँके इसकै खात्तर कोए भी टोस कारण दिखाई कोनी देदा, “हम इस भीड़ के कट्टा होण का कोए जवाब कोनी दे सकांगे।”<sup>41</sup> न्यू कहके उसनै सभा ताहीं बिदा करया।

## 20

XXXXXXXXXX, XXXXX XX XXXXXX XX XXXXX

<sup>1</sup> जिब दंगा थम गया तो पौलुस नै चेल्यां ताहीं बुलाके उत्साहित करया, अर उनतै बिदा होके मकिदुनिया परदेस की ओड़ चाल दिया।<sup>2</sup> उस सारे परदेस म्ह तै होके अर चेल्यां ताहीं घणा समझाके वो यूनान देश म्ह आया।<sup>3</sup> जिब तीन महिन्ने रहके वो ओड़ै तै जहाज पे सीरिया परदेस की ओड़ जाण पे था, तो यहूदी अगुवें उसकी टाह म्ह लागगे, ज्यांतै उसनै निश्चय करया के मकिदुनिया परदेस होके बोहड़ जावै।<sup>4</sup> बिरियावासी पुरुस का बेट्टा सोपत्तुरुस अर थिस्सलुनीकियों नगर म्ह तै अरिस्तर्खुस अर सिकुन्दस, अर दिरबे नगर का गयुस, अर तीमुथियुस, अर आसिया परदेस का तुखिकुस अर तुरुफिमुस आसिया परदेस ताहीं उसके गैल हो लिये।<sup>5</sup> ये म्हारे मुसाफिर साथी म्हारे तै पैहले चले गये।<sup>6</sup> अर हम अखमीरी रोट्टी के त्यौहार के दिनां के पाच्छै, फिलिप्पी तै जहाज पे चढ़के पाँच दिन म्ह त्रोआस म्ह उसके धौरै पोहचे, अर सात दिन ताहीं रहे।

XXXXXXXXXX XX XXXXXX XXXXXX XXXXXX XXXXX

7 हफ्ते के पैहलड़े दिन जब हम प्रभुभोज के खात्तर कट्टे होए, तो पौलुस जो दुसरे दिन चले जाण पै था, उनतै बात करी, आध्धी रात ताहीं बात करदा रहया। 8 जिस चौबारे पै हम कट्टे थे, उस म्ह घणे दीवे जळण लागरे थे। 9 अर यूतुखुस नाम का एक जवान खिड़की पै बेटछा होया नींद की झपकियाँ लेण लागरया था। जब पौलुस वारी ताहीं बात करदा रहया तो यूतुखुस नींद के झोक्के म्ह तीसरी अटारी पै तै पड़ग्या, अर उसकी मौत होगी। 10 पौलुस नीचै गया, उसके धारे जाके उसतै लिपटग्या, अर गळे लाके कह्या, “घबराओ ना, वो जीवै सै।” 11 अर उसनै दुबारा उप्पर जाके रोट्टी तोड़ी\* अर खाके दिन लिकड़ण ताहीं उनतै बात करदा रहया, सबेरा होग्या। फेर वो चल्या गया। 12 अर वे उस जवान ताहीं जिन्दा लियाए अर माणस भोत खुश होए।

### \*\*\*\*\*

13 हम पाणी के जहाज पै सवार होके अस्सुस नगर की ओड़ बदे, जड़े हमनै पौलुस ताहीं साथ लेके आगै बढणा था, पर पौलुस ओड़ै पैदल राह तै पोहोचा था, क्यूँके या उसकी पैहले तै बणाई तरकीब थी। 14 अस्सुस नगर उन ताहीं मिल्या तो हमनै उस ताहीं पाणी के जहाज म्ह अपणे साथ लिया अर मितुलेने नगर म्ह जा पोहचे। 15 ओड़ै तै जहाज खोल के हम दुसरे दिन खियुस टापू के स्याम्ही पोहचे, अर आगले दिन सामुस टापू म्ह जाण लागगे, पर उसके आगले एक दिन के बाद मीलेतुस बन्दरगाह म्ह आये। 16 पौलुस नै इफिसुस नगर म्ह ना उतरके आगै बढ जाण का इरादा करया क्यूँके वो चाहवै था के आसिया परदेस म्ह टैहरण की बजाए जै हो सक्या तो तगाजै तै पिन्तेकुस्त के त्यौहार के मौकैके पै यरुशलेम नगर म्ह पोहच जावै।

### \*\*\*\*\*

17 मीलेतुस नगर तै पौलुस नै इफिसुस नगर म्ह समाचार भेजके कलीसिया के अगुवां ताहीं बुलवाया। 18 जब वे उसके लोवै आये, तो उनतै कह्या “थमनै बेरा सै के पैहलड़े ए दिन तै जब मै आसिया परदेस म्ह पोंहच्या, मै हर-बखत थारे गेल्या किस ढाळ रहया, 19 यानिके घणी दीनता तै, अर आँसू बहा-बहाके, अर उन मुसीबतां म्ह जो यहूदियाँ की साजिस के कारण मेरै पै आण पड़ी, मै प्रभु की सेवा करदा ए रहया। 20 अर जो-जो बात थारे फायदे की थी, उन ताहीं बताण अर माणसां के स्याम्ही अर घर-घर सिखाण तै कदे न्ही झिझक्या, 21 बल्के यहूदियाँ अर यूनानियाँ के स्याम्ही गवाही देंदा रहया के परमेसवर की ओड़ मन फिराणा अर म्हारै प्रभु यीशु पै विश्वास करणा चाहिये।”

22 इब देक्खो, मै पवित्तर आत्मा म्ह बन्धया होया यरुशलेम नगर नै जाऊँ सूँ, अर मन्नै न्ही बेरा के ओड़ै मेरै पै के-के बीतैगी। 23 सिर्फ यो के पवित्तर आत्मा हरेक नगर म्ह गवाही दे-देके मेरै तै कहवै सै के बन्धन अर क्लेश तेरे खात्तर त्यार सै।

24 पर मै अपना जान नै किमे न्ही समझदा के उसतै प्यार राक्खूँ, बल्के यो के मै अपनी दौड़ ताहीं अर उस सेवा नै पूरी करूँ, जो मन्नै परमेसवर के अनुग्रह के सुसमाचार पै गवाही देण के खात्तर प्रभु यीशु तै पाई सै।

25 इब देक्खो, मन्नै बेरा सै के थम सारे जिन म्ह मै परमेसवर के राज्य का प्रचार करया सै, मेरा मुँह दुबारा कोनी देक्खोगे।

26 ज्यांतै मै आज के दिन थारे तै गवाही देके कहूँ सूँ, के मै किसे की भी मौत का कसूरवार न्ही सूँ।

27 क्यूँके मै परमेसवर की सारी इच्छा नै थारे ताहीं बताण म्ह कदे कोनी हिचकिचाया। 28 इस करके थम अपना ध्यान राक्खो अर उस टोळ का भी, जिसका रुखाळा थारे ताहीं पवित्तर आत्मा ठहराया सै, के थम परमेसवर की कलीसिया की रुखाळी करो, जिस ताहीं उसनै खुद अपने लहू तै मोल लिया सै। 29 मन्नै बेरा सै के मेरै जाणके बाद पाड़ण आळे भेड़िये थारे म्ह आवैगें जो टोळ नै कोनी छोड़ैगें।

\* 20:11 20:11 रोट्टी तोड़णा-प्रभु भोज

30 धारे ए बिचाळै तै भी इसे-इसे माणस उटैगें, जो चेल्यां ताहीं अपणे पाच्छै खींच लेण ताहीं टेढ़ी-मेढ़ी बात कहवैगें। 31 इस करके जागदे रहो, अर याद राक्खो के मन्नै तीन साल्लां ताहीं रात-दिन आँसू बहा-बहाकै हरेक ताहीं चेतावनी देणा न्ही छोड्या।

32 “अर इब मै धमनै परमेसवर अर उनके अनुग्रह के वचन की देखभाळ म्ह सौपण लागरया सं, जिस म्ह थारी बढोतरी करण अर उन सब के साथ मीरास देण की ताकत सै, जो प्रभु खात्तर न्यारे करे गये सै। 33 मन्नै किसे के चाँदी, सोन्ने या लत्ते का लोभ कोनी करया। 34 धमनै खुदे बेरा सै के इन्हे हाथ्यां नै मेरी अर मेरे साथियाँ की जरूरत पूरी करी सै। 35 मन्नै धारे ताहीं सारया किमे करके दिखाया के इस तरियां तै मेहनत करदे होए कमजोरां ताहीं सम्भालणा अर प्रभु यीशु के वचन याद राखणा जरूरी सै, जो उसनै खुदे कह्या सै: ‘लेण तै देणा धन्य सै।’”

36 न्यू कहकै उसनै गोड्डे टेक्के अर उन सारया के गेल्या प्रार्थना करी। 37 फेर वे सारे घणे रोये अर पौलुस के गळे लिपटके उस ताहीं चुम्पण लागगे।

38 वे खासकर इस बात तै दुखी थे जो उसनै कही थी के थम मेरा मुँह दुबारा कोनी देखवोगे। इसके बाद वे पौलुस के साथ पाणी के जहाज तक गये।

## 21

### CHAPTER 21

1 जिव हमनै उनतै न्यारे होके जहाज खोल्या, तो सीध्नी राही तै कोस टापू म्ह आये, अर दुसरे दिन रुदुस टापू म्ह अर ओडै तै पतरा टापू म्ह। 2 ओडै एक जहाज फीनीके परदेस नै जान्दा होया मिल्या, अर हमनै उसपै चढ़कै अपणा सफर शुरु करया। 3 हमनै ओळै हाथ कान्ही साइपरस टापू दिखया, तो हम उसनै छोडकै सीरिया परदेस की ओड बढते गये अर सूर नगर म्ह जा पोहचे, क्यूँके ओडै जहाज तै समान उतारया जाणा था। 4 चेल्यां नै पाकै हम ओडै सात दिन ताहीं रहे। उननै पवित्तर आत्मा के सिखाए पौलुस तै कह्या के ओडै (यरुशलेम नगर म्ह) पाँ ना धरिये। 5 सात दिन के बाद जिव ओडै तै म्हारे जाण का बखत आया, तो वे पूरे परिवार के साथ म्हारे ताहीं बिदा करण खात्तर नगर की सीमा तक आये, अर समन्दर के किनारे हमनै घुटने टेकके प्रार्थना करी, 6 फेर एक-दुसरे तै बिदा होके, हम तो जहाज पै चढ़गे अर वे अपणे-अपणे घरां बोहङगे।

7 जिव हम सूर नगर तै जहाज पै सफर करके पतुलिमयिस नगर म्ह पोहचे, अर विश्वासी भाईयाँ नै नमस्कार करके उनकै गेल्या एक दिन रहे। 8 दुसरे दिन हम ओडै तै चालकै कैसरिया नगर म्ह आये, अर फिलिप्पुस सुसमाचार प्रचारक के घर म्ह जो उन सात आदमियाँ म्ह तै एक था, जिन ताहीं प्रेरितां नै बिधवा जनानियाँ की सेवा करण खात्तर यरुशलेम म्ह छाट्या था, हम उससे के घर म्ह ठहरे। 9 उसकी चार कुंवारी बेट्टी थी, जो भविष्यवाणी करया करै थी।

10 जिव हम ओडै घणे दिन ताहीं रह लिये, तो अगबुस नाम का एक नबी यहूदिया परदेस म्ह आया। 11 उसनै म्हारे धौरे आँके पौलुस का कमरबन्द लिया, अर अपणे हाथ-पाँ बाँधकै कह्या, “पवित्तर आत्मा न्यू कहवै सै के जिस माणस का यो कमरबन्द सै, उस ताहीं यरुशलेम नगर म्ह यहूदी इस्से तरियां तै बाँधेगें, अर गैर यहूदियाँ के हाथ्यां म्ह सौपैगें।”

12 जिव हमनै ये बात सुणी, तो हमनै अर ओडै के माणसां नै पौलुस तै बिनती करी के यरुशलेम नगर नै ना जाइए। 13 पर पौलुस नै जवाब दिया, “थम के करो सो के रो-रोके मेरा मन तोडो सो? मै तो प्रभु यीशु के नाम के खात्तर यरुशलेम नगर म्ह ना सिर्फ बाँधे जाण ए के खात्तर बल्के मरण के खात्तर भी त्यार सं।” 14 जिव उसनै न्ही मान्नी तो हम न्यू कहकै बोल-बाल्ले रहगे, “प्रभु की मर्जी पूरी हो।”

15 कई दिनां पाच्छै हमनै त्यारी करी अर यरुशलेम नगर नै चाल दिए। 16 कैसरिया नगर तै भी कुछ चेल्ले म्हारे गेल्या हो लिए, अर म्हारे ताहीं टैहराण खात्तर साइपरसवासी मनासोन के घर ले गये, वो सब तै पैहले के चेल्यां म्ह तै एक था।

### \*\*\*\*\*

17 जब हम यरुशलम नगर में पोहंचे, तो विश्वासी भाई घणी खुशी के गेल्या हम तै मिले ।

18 दुसरे दिन पौलुस म्हारे ताहीं लेके याकूब के धोरै गया, जित्त सारे कलीसिया के अगुवें कट्टे थे ।

19 जद उसनै उन ताहीं नमस्कार करके, जो-जो काम परमेसवर नै उसकी सेवा के जरिये गैर यहूदियाँ म्ह करे थे, एक-एक करके सारे बताए ।

20 उननै न्यू सुणके परमेसवर की महिमा करी, फेर उसतै बोल्या, “हे भाई, तू देखै सै के यहूदियाँ म्ह तै कई हजारों नै विश्वास करया सै, अर सारे नियम-कायदे के खात्तर मानण म्ह पक्के सै । 21 उननै यो सुण राख्या सै के तू गैर यहूदी माणसां के बीच म्ह रहन्दे होए यहूदियाँ ताहीं या शिक्षा देण लागरया सै के मूसा नबी के नियम-कायदा नै छोड़ द्यो, ना तो अपने बाळकां का खतना करो अर ना रीति-रिवाज्जां पै चाल्लों । 22 तो फेर के करया जावै? माणस जरूर सुणैगें के तू आया सै । 23 इस करके जो हम तेरे तै कह्वां सां, वो कर । म्हारा सुझाव मान उरै इसे चार माणस सै, जिन नै कसम खाई सै ।”

24 तू उनके गैल जा, शुद्ध होण की विधि पूरी कर, अर उसके मुण्डन का खर्चा ठा, फेर सारया नै यो बेरा लाग ज्यागा के जो कुछ भी बात तेरे बारे म्ह कह्या गया सै, उस म्ह कोए सच्चाई न्ही सै पर तू खुद भी नियम-कायदे का पालन करै सै । 25 पर उन गैर यहूदियाँ के बारे म्ह जिन नै विश्वास करया सै, हमनै यो फैसला करके लिख भेज्या सै “के वे मूर्तियाँ के स्याम्ही बलि करे हाड़ माँस तै, अर लहू तै अर घेट्टी घोट्टे होयां के माँस तै अर जारी तै बचे रहवें ।”

26 फेर पौलुस उन माणसां नै लेके, अर दुसरे दिन उनके गेल्या शुद्ध होके मन्दर म्ह गया, अर ओड़ै बता दिया के शुद्ध होण के दिन, यानिके उन म्ह तै हरेक के खात्तर चढ़ावा चढ़ाए जाण तक के दिन कद पूरे होवैगें ।

### \*\*\*\*\*

27 जब वे सात दिन पूरे होण पै थे, तो आसिया परदेस के यहूदियाँ नै पौलुस ताहीं मन्दर म्ह देखके सारे माणसां ताहीं उकसाया, अर न्यू रुक्का मारके उस ताहीं पकड़ लिया, 28 “हे इस्राएलियों, मदद करो, यो वोए माणस सै, जो माणसां के, अर नियम-कायदे के, अर इस जगहां के विरोध म्ह हरेक जगहां सारे माणसां नै सिखावै सै, उरै ताहीं के यूनानियाँ ताहीं भी मन्दर म्ह ल्याके उसनै इस पवित्र जगहां ताहीं अपवित्र करया सै ।” 29 उननै इसतै पैहल्या इफिसुसवासी त्रुफिमस ताहीं पौलुस के गेल्या नगर म्ह देख्या था, अर सोचै थे के पौलुस उसनै मन्दर म्ह लियाया सै ।

30 फेर सारे नगर म्ह दंगा माचगया, अर माणस भाजके कट्टे होए, अर पौलुस नै पकड़के मन्दर के बाहरणै घसीट ल्याए, अर जिब्बे किवाड बन्द करे गये । 31 जब वे उसनै मार देणा चाहवै थे, तो पलटन के सरदार नै सन्देशा पोंहच्या के सारे यरुशलम नगर म्ह दंगा माचरया सै । 32 फेर वो जिब्बे सिपाहियाँ अर सूबेदारां नै लेके उनके धोरै तळै भाज आया, अर उननै पलटन के सरदार अर सिपाहियाँ ताहीं देखके पौलुस ताहीं मारणा-छेतणा छोड़ दिया ।

33 फेर पलटन के सरदार नै धोरै आके पौलुस ताहीं पकड़ लिया, अर दो साँकळां तै बाँधण का हुकम देके बुड्झण लागया, “यो कौण सै अर इसनै के करया सै?” 34 पर भीड़ म्ह तै कोए किमे अर कोए किमे चिल्लान्दा रहया । जब रोले के कारण वो सही सच्चाई न्ही जाण सक्या, तो उस ताहीं गढ़ म्ह ले जाण का हुकम दिया । 35 जब वो सीढ़ी पै पोंहच्या, तो इसा होया के भीड़ की दाब के मारे सिपाहियाँ नै उस ताहीं ठाके ले जाणा पड्या । 36 क्यूँके माणसां की भीड़ न्यू चिल्लान्दी होई उसके पाच्छे पड़री थी, “उसनै खतम कर द्यो ।”

37 जब वे पौलुस नै गढ़ म्ह ले जावण आळे थे, तो उसनै पलटन के सरदार तै कह्या, “जै मन्ने इजाजत हो तो मै थारे तै किमे कहूँ?” वो बोल्या, “के तू यूनानी भाषा जाणै सै?”

38 “के तू मिस्र देश का कोनी, जो इन दिनां तै पैहल्या बिद्रोही बणकै, चार हजार हथियार सुधा माणसां नै जंगळ म्ह लेग्या?”

39 पौलुस नै कह्या, “मै तो तरसुस का यहूदी माणस सू! मै किलिकिया परदेस के तरसुस नगर का बासिन्दा सू। मै तेरे तै बिनती करूँ सू के मन्ने माणसां तै बात करण दे।”

40 जिव उसनै हुकम दिया, तो पौलुस नै सीढ़ी पै खड़े होकै माणसां ताहीं हाथ तै इशारा करया। जिव वे चुप होए तो वो इब्रानी भाषा म्ह बोल्लण लाग्या:

## 22

???? ? ? ? ? ? ? ? ? ? ? ? ? ? ? ? ? ? ? ? ? ? ?

1 “हे भाईयो अर बुजुर्गां, मेरा बदले म्ह जवाब सुणो, जो मै इब थारे स्याम्ही ल्याऊँ सू।”

2 वे न्यू सुणके के वो हम तै इब्रानी भाषा म्ह बोल्ले सै, और भी बोल-बाल्ले होंगे। फेर उसनै कह्या 3 “मै तो यहूदी माणस सू, जो किलिकिया के तरसुस नगर म्ह जन्मा, पर इस नगर म्ह गमलीएल के पायां के धारे बैठके पढ़ाया गया, अर पूर्वजां के नियम-कायदा नै ठीक रीति तै सिखाया गया अर परमेसवर के खात्तर इसी धुन लारया था, जिस तरियां थम सारे आज लारे सो। 4 मन्ने माणस अर लुगाई दोनुआ ताहीं जुड़-जुड़के अर जेळ म्ह गेर-गेर कै, इस पंथ नै उरै ताहीं सताया के उन ताहीं मरवा भी दिया। 5 इस बात के खात्तर महायाजक अर सारे यहूदी अगुवें गवाह सै, के उनतै मै भाईयाँ के नाम पै चिट्ठियाँ लेके दमिश्क नगर नै चाल्या जाऊँ था, के जो ओड़ै हों उन ताहीं भी सजा दुवाण के खात्तर बाँधके यरुशलेम नगर लाऊँ।

???? ? ? ? ? ? ? ? ? ? ? ? ? ? ? ? ? ? ? ? ? ? ?

6 “जिव मै चाल्दे-चाल्दे दमिश्क नगर के लावै पोंहच्या, तो इसा होया के दोपहर के करीबन चाणचक एक घणा चाँदणा अकास तै मेरै चौगरदे नै चमक्या। 7 अर मै धरती पै गिर गया अर यो शब्द सुण्या, हे शाऊल, हे शाऊल, तू मन्ने क्यातै सतावै सै?”

8 मन्ने जवाब दिया, “हे प्रभु, तू कौण सै?” उसनै मेरै तै कह्या, “मै यीशु नासरी सू,” जिस ताहीं तू सतावै सै। 9 मेरे साथियाँ नै चाँदणा तो देख्या, पर मेरै तै जो बोल्ले था उसनै समझ कोनी पाए।

10 फेर मन्ने कह्या, “हे प्रभु, मै के करूँ?” प्रभु नै मेरै तै कह्या, “उठके दमिश्क नगर म्ह जा, अर जो किमे तेरे तै करण के खात्तर ठहराया गया सै ओड़ै तेरे तै सब बता दिया जावेगा।” 11 जिव उस चाँदणे के तेज के मारे मन्ने किमे कोनी दिख्या, तो मै अपणे साथियाँ का हाथ पकड़े होए दमिश्क नगर म्ह आया।

12 “फेर हनन्याह नामक नियम-कायदे के मुताबिक एक भगत माणस, जो ओड़ै के रहणीये सारे यहूदियाँ म्ह सुनाम्मी था, मेरै धारे आया,” 13 अर खड़े होके मेरै तै कह्या, “हे भाई शाऊल, फेर देखण लाग।” उससे बखत मेरी आँख खुलगी अर मन्ने उस ताहीं देख्या।

14 फेर उसनै कह्या, “म्हारै बाप-दादा के परमेसवर नै तेरे ताहीं ज्यातै ठहराया के तू उसकी मर्जी नै जाणै, अर उस धर्मी नै देवसै अर उसके मुँह की बात सुणै। 15 क्यूँके तू उसकी ओड़ तै सारे माणसां के स्याम्ही उन बाततां का गवाह होगा जो तन्ने देखी अर सुणी सै। 16 इब क्यातै वार करै सै? उठ, बपतिस्मा ले, अर उसका नाम लेके अपणे पापां की माफी पा ले।”

???? ? ? ? ? ? ? ? ? ? ? ? ? ? ? ? ? ? ? ? ? ? ?

17 “जिव मै दुबारा यरुशलेम नगर म्ह आके मन्दर म्ह प्रार्थना करण लागरया था, तो बेसुध होग्या, 18 अर उस ताहीं देख्या के वो मेरै तै कहवै सै, ‘तावळ करके यरुशलेम नगर तै झट दे-सी लिंकड़्या,’ क्यूँके वे मेरै बारे म्ह तेरी गवाही कोनी मानैगे।”

19 मन्ने कह्या, “हे प्रभु, उननै तो खुदे बेरा सै के मै तेरे पै विश्वास करण आळा नै जेळ म्ह गेरू अर जगहां-जगहां आराधनालय म्ह छित्वाऊँ था। 20 जिव तेरे गवाह स्तिफनुस का लहू बहाया

जाण लागरया था जद मै भी ओड़ै खडचा था अर इस बात म्ह सहमत था, अर उसके मारणीयां के लत्यां की रुखाळी करूँ था।”

21 अर प्रभु नै मेरै तै कह्या, “चल्या जा क्यूँके मै तेरे ताहीं गैर यहूदियाँ कै धोरै दूर-दूर भेज्जूंगा।”

22 माणस इस बात तक उसकी सुणदे रहे, फेर जोर तै चिल्लाए, “इसे माणस का नाश करो, उसका जिन्दा रहणा ठीक कोनी!”

23 जिव वे चिल्लान्दे अर लत्ते बगान्दे अर अकास म्ह धूळ उड़ावे थे, 24 तो पलटन के सरदार नै कह्या, “इस ताहीं गढ़ म्ह ले जाओ, अर कोड़े मारकै जाँचो, के मन्नै बेरा लागगै के माणस किस कारण उसके विरोध म्ह इस ढाळ चिल्लावे सै।” 25 जिव उननै उस ताहीं फिलत्यां तै बाँधया तो पौलुस नै उस सूबेदार तै जो धोरै खडचा था, कह्या, “के यो सही सै के थम एक रोमी माणस ताहीं, अर वो भी बिना कसूरवार ठहराए होए, कोड़े मारो?”

26 सूबेदार नै न्यू सुणके पलटन के सरदार कै धोरै जाकै कह्या, “तू यो के करै सै? यो तो रोमी माणस सै।”

27 फेर पलटन के सरदार नै उसके धोरै आकै कह्या, “मन्नै बता, के तू रोमी सै?” उसनै कह्या, “हाँ।”

28 न्यू सुणके पलटन के सरदार नै कह्या, “मन्नै रोमी होण का पद घणे रपिये देकै मिल्या सै।” पौलुस नै कह्या, “मै तो जन्म तै रोमी सू?”

29 फेर जो माणस उस ताहीं जाँचण पै थे, वे जिब्बे उसके धोरै तै हटगे, अर पलटन का सरदार भी न्यू जाणकै के यो रोमी सै अर मन्नै उस ताहीं बाँधया सै, डरग्या।

????? ??????? ?? ??? ?? ?????????? ??????

30 दुसरें दिन उसनै सही-सही जाणण की मर्जी तै के यहूदी उसपै क्यातै दोष लावे सै, उसके बन्धन खोल दिए, अर प्रधान याजकां अर यहूदी अगुवां की सभा ताहीं कट्टा होण का हुकम दिया, अर पौलुस नै तळै ले जाकै उनके स्याम्ही खडचा कर दिया।

## 23

1 पौलुस नै यहूदी अगुवां की सभा की ओड़ गौर तै देख्या अर कह्या, “हे भाईयो, मन्नै आज ताहीं परमेसवर कै खात्तर जमा-कती सच्चे मन तै जीवन बिताया सै।” 2 इसपै हनन्याह महायाजक नै उन ताहीं जो उसके धोरै खड़े थे, उसके मुँह पै थप्पड़ मारण का हुकम दिया। 3 फेर पौलुस नै उसतै कह्या, “हे चुन्ना फिरी होड़ भीत, परमेसवर तेरे ताहीं मारैगा। तू नियम-कायदे कै मुताबिक मेरा न्याय करण नै बेटचा सै, अर फेर के नियम-कायदे कै खिलाफ मेरै ताहीं मारण का हुकम देवै सै?”

4 जो धोरै खड़े थे उननै कह्या, “के तू परमेसवर कै महायाजक नै आच्छा-भुंडा बोल्लै सै?”

5 पौलुस नै कह्या, “हे भाईयो, मन्नै न्ही बेरा था के यो महायाजक सै, क्यूँके वचन म्ह लिख्या सै: ‘अपणे माणसां के प्रधान नै भुंडा ना बोलिए।’”

6 फेर पौलुस नै न्यू जाणकै के एक टोळ सदूकी अर दुसरा फरीसी लोगगां का सै, यहूदी अगुवां की सभा म्ह रुक्का मारकै कह्या, “हे भाईयो, मै फरीसी अर फरीसी लोगगां के वंश का सूँ, मरे होया की आस अर पुनरुत्थान कै बारे म्ह मेरा मुकद्दमा होरया सै।” 7 जिव उसने या बात कही तो फरीसियाँ अर सदूकियाँ म्ह दंगा होण लागया, अर सभा म्ह फूट पड़गी। 8 क्यूँके सदूकियाँ का विश्वास तो न्यू कहवै सै, के ना पुनरुत्थान सै, ना सुगंदूत अर ना आत्मा सै, पर फरीसी इन सारया नै मान्नै सै।

9 फेर घणा दंगा माच्या अर कुछ श्वास्त्री जो फरीसियाँ के टोळ के थे, उठ लिए अर न्यू कहकै दंगा करण लागगे, “हम इस माणस म्ह कोए बुराई कोनी पांदि, अर जै कोए आत्मा या सुगंदूत उसतै बोल्ल्या सै तो फेर के होग्या?” 10 जिव घणा दंगा होया, तो पलटन के सरदार नै इस भय तै के वे पौलुस के टुकड़े-टुकड़े ना कर देवै, पलटन ताहीं हुकम दिया के उतरकै उस ताहीं उनके बिचाळै तै हाँगे तै लिकाड़े, अर गढ़ म्ह ले जावै।



11 उससे रात भर भू यीशु ने उसके धोरे खड़े होके कहा, “हे पौलुस, धीरज राख, क्योंकि जिसी तन्नै यरुशलेम नगर म्ह मेरी गवाही देई, उसीए तन्नै रोम म्ह भी गवाही देणी होगी।”

~~~~~

12 जिव दिन लिकइया तो यहूदियाँ ने साजिस रची अर कसम खाई के जिव ताहीं हम पौलुस नै मार न्ही देवा, जै हम खावां या पीवां तो म्हारै पै धिक्कार सै। 13 जिन नै आप्स म्ह या कसम खाई थी, वे चाळीस जण्वां तै घणे थे। 14 उननै प्रधान याजकां अर यहूदी अगुवां के धोरे जाके कहा, “हमनै न्यू ठान लिया सै के जिव ताहीं हम पौलुस नै मार न्ही देदे, जद ताहीं जै किमे चाक्खां तो म्हारै पै धिक्कार सै। 15 इस करके इब यहूदी अगुवां की सभा सुभा पलटन के सरदार नै समझाओ के उसने थारे धोरे लियावे, मान ल्यो के थम उसके बारे म्ह और भी सही तै जाँच करणा चाहवो सो, अर हम उसके पोहोचण तै पैहल्याए उस ताहीं मार देण के खात्तर त्यार रहवांगे।”

16 पौलुस कै भाणजै नै सुण्या के वे उसकी टाह म्ह सै, तो गढ़ म्ह जाके पौलुस ताहीं संदेशां दिया।

17 पौलुस नै सूबेदारां म्ह तै एक ताहीं अपणे धोरै बुलाके कहा, “इस जवान नै पलटन के सरदार कै धोरै ले जाओ, यो उसतै किमे कहणा चाहवै सै।”

18 इस करके उसने उस ताहीं पलटन के सरदार कै धोरै ले जाके कहा, “कैदी पौलुस नै मेरै ताहीं बुलाके बिनती करी के यो जवान पलटन के सरदार तै किमे कहणा चाहवै सै, उस ताहीं उसके धोरै ले जा।”

19 पलटन के सरदार नै उसका हाथ पकड़के अर न्यारा जाके बुझया, “तू मेरै तै के कहणा चाहवै सै?”

20 वो बोल्या, “यहूदियाँ नै साजिस रची सै के तेरे तै बिनती करे के काल पौलुस नै यहूदी अगुवां की सभा म्ह ल्यावै, मान्नो वे और सही ढाळ तै उसकी जाँच करणा चाहवै सै। 21 पर उनकी मानियो मतना, क्योंकि उन म्ह तै चाळीस कै उप्पर माणस उसने मारण की टाह म्ह सै, जिन नै न्यू ठान लिया सै के जिव ताहीं वे पौलुस नै मार न्ही देवै, जद ताहीं ना खावैंगे अर ना पीवैंगे, अर इब वे त्यार सै अर तेरे वचन की वाट देखण लागरे सै।”

22 फेर पलटन के सरदार नै जवान ताहीं यो हुकम देके बिदा करया, “किसे तै ना कहिये के तन्नै मेरै तै ये बात बताई सै।”

~~~~~

23 फेर उसने दो सूबेदारां ताहीं बुलाके कहा, “दो सौ सिपाही, सत्तर सवार, अर दो सौ भालैत, रात के नौ बजे कैसरिया नगर नै जाणके खात्तर त्यार कर करो। 24 अर पौलुस की सवारी कै खात्तर घोड़े त्यार राक्खो, के उस ताहीं फेलिक्स राज्यपाल कै धोरै राज्जी-खुशी तै पोहोचा दे।”

25 उसने इस तरियां की चिट्ठी भी लिक्खी

26 महामहिम फेलिक्स राज्यपाल ताहीं क्लौकियुस लूसियास का नमस्कार।

27 इस माणस ताहीं यहूदियाँ नै पकड़के मार देणा चाह्या, पर जिव मन्नै जाणया के रोमी सै, तो पलटन लेके छुड़ा ल्याया। 28 मै जाणणा चाहूँ था के वे उसपै किस कारण दोष लावै सै, ज्यांतै उस ताहीं यहूदी अगुवां की सभा म्ह ले गया। 29 फेर मन्नै जाण लिया के वे अपणे नियम-कायदे कै रोळे कै बारे म्ह उसपै इल्जाम लगावै सै, पर मार देण जोगगा या बाँधे जाणके जोगगा उस म्ह कोए कसूर कोनी। 30 जिव मेरै ताहीं बताया गया के वे इस माणस की टाह म्ह लागरे सै तो मन्नै जिब्बे उस ताहीं तेरे धोरै भेज दिया, अर बैरियां ताहीं भी हुकम दिया के तेरे स्याम्ही उसपै नालिश करै।

31 आखर म्ह जिसा सिपाहियाँ नै हुकम मिल्या था, उससे तरियां ए वे पौलुस नै लेके रातो-रात अन्तिपत्रिस म्ह आये।

32 दुसरे दिन वे सवारा नै उसके गेल्या जाणके खात्तर छोड़के खुद यरुशलेम म्ह बोहड़े। 33 उननै कैसरिया पोहचके राज्यपाल ताहीं चिट्ठी दी, अर पौलुस ताहीं भी उसके स्याम्ही खड्या करया।

34 राज्यपाल नै चिट्ठी पढ़के बुझया, “यो किस प्रान्त का सै?” 35 अर जिव जाण लिया के

किल्किया परदेस का सै तो उसतै कह्या, “जिब तेरे बैरी भी आवैगें, तो मै तेरा मुकद्दमा करूंगा।” अर उसनै उस ताहीं हेरोदेस के किले म्ह पहेरे म्ह राक्खण का हुकम दिया।

## 24

\*\*\*\*\*

1 पाँच दिन के पाच्छे हनन्याह महायाजक कई यहूदी अगुवें अर तिरतुल्लुस नामक किसे वकील नै गेल्या लेकै कैसरिया नगर आ पोहचे। उननै राज्यपाल के स्याम्ही पौलुस कि बुराई करी। 2 जिब पौलुस बुलाया गया तो तिरतुल्लुस उसपै इल्जाम लाकै कहण लागया: “हे महामहिम फेलिक्स, तेरे जरिये हम राज्जी-खुशी सां, अर तेरे इन्तजाम तै इस जात के खात्तर घणीए बुराईयाँ सुधरदी जावै सै। 3 इस ताहीं हम हरेक जगहां अर हरेक तरियां तै धन्यवाद के गैल मान्नां सां। 4 मै तेरा और ज्यादा बखत कोनी लेऊँ, मै तेरे तै बिनती करूँ सूँ के दया करकै दो-एक बात सुण ले।”

5 “बात या सै के इस माणस ताहीं हमनै एक उत्पाती के रूप म्ह पाया सै, सारी दुनिया के यहूदिया परदेस म्ह इसनै दंगे भड़काए सै, यो नासरियाँ के पंथ का नेता सै। 6 उसनै मन्दर ताहीं अशुद्ध करणा चाह्या, पर हमनै उस ताहीं पकड़ लिया। (हमनै उस ताहीं अपणे नियम-कायदे के मुताबिक सजा दे दी होन्दी, 7 पर पलटन के सरदार लूसियास नै उस ताहीं हाँगे तै म्हारे हाथ तै खोस लिया, 8 अर बैरियाँ ताहीं तेरे स्याम्ही आण का हुकम दिया।) इन सारी बाततां नै जिनकै बारे म्ह हम उसपै इल्जाम लावां सां, तू खुदे ए उसनै जाँच करके जाण लेवैगा।”

9 यहूदियां नै भी उसका साथ देकै कह्या, ये बात इस्से ढाळ तै करी सै।

\*\*\*\*\*

10 जिब राज्यपाल नै पौलुस ताहीं बोल्लण का इशारा करया, तो उसनै जवाब दिया: “मै न्यू जाणकै के तू घणे साल्लां तै इस जात का न्याय करण लागरया सै, खुशी तै अपणा बदले का जवाब देऊँ सूँ। 11 तू आप्पे ए जाण सकै सै जिब तै मै यरुशलेम नगर के मन्दर म्ह आराधना करण नै आया, मन्नै बारहा दिनां तै बाध कोनी होए, 12 उननै मेरै ताहीं ना मन्दर म्ह, ना आराधनालयों म्ह, ना किसे नगर म्ह किसे तै बहस करदे या भीड़ लगादे पाया, 13 अर ना तो वे उन बाततां ताहीं, जिनका वे इब मेरै पै दोष लावै सै, तेरे स्याम्ही साच्ची साबित कर सकै सै। 14 पर मै तेरे स्याम्ही यो मान ल्यु सूँ के जिस पन्थ नै वे बुरा पन्थ कहवै सै, उससे की रीत पै मै अपणे बाप-दादा के परमेसवर की सेवा करूँ सूँ, अर जो बात नियम-कायदे अर नबियाँ की किताबां म्ह लिक्खी सै, उन सारया पै विश्वास करूँ सूँ। 15 अर परमेसवर तै आस राक्खूँ सूँ जो वे खुद भी राक्खै सै, के धर्मी अर अधर्मी दोनुआ का जिन्दा उठणा होवैगा। 16 इसतै मै खुद भी कोशिश करूँ सूँ के परमेसवर की, अर माणसां की ओड़ तै मेरा मन सारी-हाण बेकसूर रहवै।”

17 “घणे साल्लां पाच्छे, मै गरीबां नै दान पोहोचाण, अर भेंट चढ़ाण आया था। 18 उससे बखत इननै मेरै ताहीं मन्दर म्ह, शुद्ध होण की रीति पूरी करते देख्या, ओड़ै ना कोए भीड़ थी, अर ना ए किसे ढाळ का शोर, पर ओड़ै आसिया परदेस के कई यहूदी थे 19 जे मेरै बिरोध म्ह उनके धोरे कोए बात कहण की हो तो उरै तेरे स्याम्ही आके मेरै पै इल्जाम लांदे। 20 या ये खुद ए बतावै के जिब मै यहूदी अगुवां की सभा के स्याम्ही खड्या था, तो उननै मेरै म्ह कौण सा कसूर पाया? 21 इस एक बात नै छोड़ जो मन्नै उनके बिचाळै खड्या होकै कही थी: ‘भरे होया के जिन्दा उठण के बारे म्ह आज मेरा थारे स्याम्ही मुकद्दमा होण लागरया सै।’”

22 फेलिक्स नै, जो इस पन्थ की बात सही-सही जाणै था, उन ताहीं न्यू कहकै टाळ दिया, “जिब पलटन का सरदार लूसियास आवैगा, तो थारी बात का फैसला करूंगा।” 23 उसनै सूबेदार ताहीं हुकम दिया के पौलुस ताहीं जेळ म्ह तो राख्या जावै पर उस ताहीं इतनी छूट जरूर दी जावै के उसके खास साथी आके उसकी सेवा कर सकै।

?????? ?? ??????????? ?? ?????????? ?????

24 कुछ दिनां पाच्छे फेलिक्स हाकिम अपणी घरआळी दुसिल्ला ताहीं, जो यहूदी थी, गेल्या लेकै आया अर पौलुस ताहीं बुलवाकै उस विश्वास कै बारे म्ह जो मसीह यीशु पै सै, उसतै सुण्या। 25 जिब पौलुस धर्म, अर संयम, अर आण आळे न्याय का जिक्र करण लागरया था, तो फेलिक्स नै भयभीत होकै जवाब दिया, “इब तो जा, मौक्का मिल लिए मै तन्ने दुबारा बुलवाऊंगा।” 26 फेलिक्स ताहीं पौलुस तै कुछे रपिये मिलण की भी आस थी, ज्यांतै और भी बुला-बुलाकै उसतै बात करया करै था।

27 पर जिब दो साल बीतगे तो पुरकियुस फेस्तुस, फेलिक्स की जगहां पै आया, अर फेलिक्स यहूदियाँ ताहीं राज्जी करण की मर्जी तै पौलुस ताहीं कैदी ए छोड़ गया।

## 25

?????? ?? ??????????? ?? ?????????? ?????

1 राज्यपाल पद का काम सम्भाळण के तीन दिन बाद फेस्तुस कैसरिया नगर तै यरुशलेम नगर म्ह गया। 2 फेर प्रधान याजकां अर यहूदियाँ के खास माणसां नै उसके स्याम्ही पौलुस की बुराई करी, 3 के वो खियास करकै पौलुस ताहीं यरुशलेम नगर भेजदे, असल म्ह उसकी तरकीब राह म्ह मौक्का देखकै पौलुस ताहीं मारण की थी। 4 फेस्तुस नै जवाब दिया, “पौलुस कैसरिया म्ह पहर म्ह सै, अर मै आप्पे ए तावळ तै ओड़ै जाऊंगा।” 5 फेर बोल्या, “थारे म्ह जो अधिकार राखै सै वे गैल चाल्लै, अर जै इस माणस नै किमे गलत काम करया सै तो उसपै इल्जाम लावै।”

6 उनके बिचाळै कोए आठ-दस दिन रहकै फेस्तुस कैसरिया चल्या गया, अर दुसरे दिन न्याय-गद्दी पै बैठकै पौलुस ताहीं ल्याण का हुकम दिया। 7 जिब वो आया तो जो यहूदी अगुवें यरुशलेम नगर तै आये थे, उननै लोवै-धोवै खड़े होकै उसपै घणे भारया दोष लगाये, जिनका सबूत वे कोनी दे सकै थे।

8 पर पौलुस नै जवाब दिया, “मन्ने ना तो यहूदियाँ के नियम-कायदे कै अर ना मन्दर कै, अर ना ए कैसर कै विरुध्द कोए अपराध करया सै।”

9 फेर फेस्तुस नै यहूदी अगुवां ताहीं राज्जी करण के मकसद तै पौलुस तै कह्या, “के तू चाहवै सै के यरुशलेम नगर नै जावै, अर ओड़ै मेरै स्याम्ही तेरा यो मुकद्दमा तय करया जावै?”

10 पौलुस नै कह्या, “मै कैसर कै न्याय-गद्दी कै स्याम्ही खड्या सूं, मेरै मुकद्दमे फैसला उरैए होणा चाहिये। जिसा तन्ने आच्छी ढाळ बेरा सै, यहूदियाँ का मन्ने किमे अपराध कोनी करया। 11 जै मै अपराधी सूं अर मारण कै जोग्गा कोए काम करया सै, तो मरण तै कोनी नाटदा, पर जिन बाततां की ये मेरै पै इल्जाम लावै सै, जै उन म्ह तै कोए भी बात साच्ची न्ही लिक्डी, तो कोए मेरै ताहीं उनके हाथ्यां न्ही सौंप सकदा। मै कैसर की दुहाई द्यु सूं।”

12 फेर फेस्तुस नै मन्त्रियों की सभा के गेल्या बात करकै जवाब दिया, “तन्ने कैसर की दुहाई दी सै, तू कैसर कै ए धोरे जावेगा।”

????? ??????????? ?? ?????????? ?????

13 कुछे दिन बीतण कै पाच्छे अग्रिप्पा राजा अर बिरनीके नै कैसरिया म्ह आकै फेस्तुस तै भेंट करी। 14 उनके घणे दिन ओड़ै रहण कै पाच्छे फेस्तुस नै पौलुस कै बारे म्ह राजा ताहीं बताया “एक माणस सै, जिस ताहीं फेलिक्स कैदी छोड़ गया सै।” 15 जिब मै यरुशलेम नगर म्ह था, तो प्रधान याजक अर यहूदिया परदेस के यहूदी अगुवां नै उसकी बुराई करी अर चाह्या के उसपै दण्ड का हुकम होवै।

16 पर मन्ने उन ताहीं जवाब दिया के रोमियों की या रीत कोनी के किसे माणस ताहीं सजा कै खात्तर सौंप देवै, जिब ताहीं मुजरिम ताहीं अपने बैरियाँ कै स्याम्ही खड़े होकै दोष का जवाब देण का मौक्का ना मिलै। 17 आखर जिब वे कट्टे होए, तो मन्ने किमे वार कोनी करी, पर दुसरे ए दिन न्याय-गद्दी पै बैठकै उस माणस ताहीं ल्याण का हुकम दिया। 18 जिब उसके बैरी खड़े होए, तो उननै

इसी गलत बातों की इल्जाम कोनी लाई, जिसा मैं समझूँ था। 19 पर वे अपने पंथ के अर यीशु नाम किसे माणस के बारे में, जो मर गया था अर पौलुस उस ताहीं जिन्दा बतावै था, बहस करै थे। 20 मैं उलझन में था के इन बातों का बेरा किस ढाळ लाऊँ? ज्यांतै मन्नै उसतै बुझिया, के तू यरुशलेम नगर जावैगा के ओड़ै इन बातों का फैसला होवै? 21 पर जब पौलुस नै दुहाई देई के “उसके मुकदमे का फैसला सम्राट के उरै हो, तो मन्नै हुकम दिया के जब तक उस ताहीं कैसर के धारे न्ही भेज्जू, उस ताहीं हिरासत में राख्या जावै।”

22 फेर अगिरप्पा नै फेस्तुस तै कह्या, “मै भी उस माणस की सुणणा चाहूँ सू।” उसनै कह्या, “तू काल सुण लेवैगा।”

23 आखर में दुसरे दिन जब अगिरप्पा अर बिरनीके बड्डी धूम-धड़ाके तै आये अर पलटन के सरदारों अर नगर के खास आदमियों के गेल्या दरबार में पोहचे। फेर फेस्तुस नै हुकम दिया के वे पौलुस ताहीं ली यावै। 24 फेस्तुस नै कह्या, “हे राजा अगिरप्पा, अर हे सारे माणसों जो उरै म्हारै गेल्या सो, थम इस माणस नै देखो सो, जिसके बारे में सारे यहूदियों नै यरुशलेम नगर में अर उरै भी रुके मार-मारके मेरै तै बिनती करी के इसका जिन्दा रहणा सही कोनी। 25 पर मन्नै बेरा पाट लिया के उसनै इसा किमे कोनी करया के मार दिया जा, अर जब के उसनै आप्पे ए सम्राट की दुहाई दी, तो मन्नै उस ताहीं खन्दाण का फैसला करया। 26 मन्नै उसके बारे में कोए पक्की बात कोनी पाई के अपने मालिक के धारे लिखूँ। ज्यांतै मैं उस ताहीं धारे स्याम्ही अर खासकर हे राजा अगिरप्पा तेरे स्याम्ही ल्याया सू के जाँचे पाच्छै मन्नै किमे लिखण का मौक्का मिलै। 27 क्यूँके कीदी ताहीं खन्दाणा अर जो दोष उसपे लगाये सै, उन ताहीं न्ही बताणा, मन्नै खामखां लाग्या सै।”

## 26

XXXXXXXXXX XX XXXXXXXXXXX XXXXX XX XXXXXXXXXXXXXXX

1 अगिरप्पा नै पौलुस तै कह्या, “तेरे ताहीं अपने बाबत बोल्लण की आज्ञा सै।” फेर पौलुस हाथ तै इशारा करके जवाब देण लाग्या, 2 “हे राजा अगिरप्पा, जितनी बातों का यहूदी अगुवें मेरै पै इल्जाम लावै सै, आज तेरे स्याम्ही उनका जवाब देण में अपने ताहीं धन्य समझूँ सू, 3 खास करके ज्यांतै के तू सारी यहूदी प्रथा अर परेशानियाँ नै भली-भाँति जानै सै। इस करके मैं बिनती करूँ सू, धीरज तै मेरी सुण।”

4 “मेरा चाल-चलण शुरुआत तै अपनी जात के बिचाळे अर यरुशलेम नगर में जिसा था, उसका सारे यहूदियों नै बेरा सै। 5 जै वे गवाही देणा चाहवें, तो तू मेरे ताहीं तब तै पिच्छाणै सै जब मैं जवान था, के मैं फरीसी होके अपने धर्म के सबतै खरे पन्थ के मुताबिक चाल्या। 6 अर आज मैं परमेसवर के जरिये म्हारे पूर्वजां नै दिए गये उस वादे की आस के कारण उरै दोषी के रूप में खड्या सू। 7 जो वोए वादा सै, जिसके पूरे होण की आस म्हारे बारहां कुल दिन-रात सच्चाई में परमेसवर की भगति-आराधना करदे होए आये सै। हे राजा, आज मेरे पै यहूदियों के जरिये मुकदमा इस्से आस के कारण चलाया जाण लागरया सै। 8 जब के परमेसवर मरे होया नै जिन्दा करै सै, तो धारे उरै या बात क्यातै विश्वास के जोगी कोनी समझी जान्दी?”

9 “मन्नै भी समझया था के यीशु नासरी के नाम के बिरोध में मन्नै भोत कुछ करणा चाहिये। 10 अर मन्नै यरुशलेम नगर में न्यूए करया, अर प्रधान याजकां तै हक पाके घणखरे पवित्र माणसों ताहीं जेळ में गेरया, अर जब वे मार दिये जावै थे तो मैं भी उनके बिरोध में अपनी राय दू था। 11 हरेक आराधनालय में मैं उन ताहीं काल कर-करके यीशु की बुराई करवाऊँ था, उरै ताहीं के छो के मारे इसा बावळा होग्या के दुसरे नगरों में भी जाके उन ताहीं काल करूँ था।”

XXXX XXXX-XXXXXXXXXX XX XXXXX  
(XXXXXXXX 9:1-19; 22:6-16)

12 “इससे धुन म्हा जिब मै प्रधान याजकां तै अधिकार अर हुकम-चिट्ठी लेके दमिश्क नगर नै जाण लागरया था, 13 तो हे राजा, राह म्हा दोफारी के बखत मन्नै अकास तै सूरज के तेज तै भी बढ़के एक चाँदणा, अपने अर अपने गेल्या चाल्लण आळा के चौगरदे नै चमकदा होइ देख्या। 14 जिब हम सारे धरती पै पड़गे, तो मन्नै इब्रानी भाषा म्हा, मेरे तै न्यू कहन्दे होए एक बोल सुण्या, हे शाऊल, हे शाऊल, तू मन्नै क्यातै सतावै सै? पैने पै लात मारणा तेरे खात्तर ओक्खा सै। (जै तू मन्नै सतावैगा तो तू खुद नै सतावैगा) ”

15 फेर मै बोल्या, “हे प्रभु, तू कौण सै?” प्रभु नै कह्या, “मै यीशु सू, जिस ताहीं तू सतावै सै। 16 पर तू उठ, अपने पायां पै खड्या हो, क्यूँके मन्नै तेरे ताहीं ज्यांतै दर्शन दिया सै के तन्नै उन बात्तां का भी सेवक अर गवाह ठहराऊँ, जो तन्नै देखी सै, अर उनका भी जिनके खात्तर मै तन्नै दर्शन दियुंगा। 17 अर मै तन्नै तेरे माणसां तै अर गैर यहूदियाँ तै बचान्दा रहूंगा, जिनके धरे मै इब तन्नै इस करके भेज्जू सू 18 के तू उनकी आँख खोल्लै के वे अन्धेरे तै चाँदणे कान्ही, अर शैतान के अधिकार तै परमेसवर के कान्ही पलटै, इस करके के पापां की माफी अर उन माणसां के गेल्या जो मेरे पै बिश्वास करण तै पवित्र करे गये सै, वसियत पावै। ”

~~~~~

19 “इस करके हे राजा अगिरप्पा, मन्नै उस सुर्गीय दर्शन की बात कोनी टाळी, 20 मन्नै सबतै पैहल्या दमिश्क नगर के, फेर यरुशलैम नगर के, अर फेर यहूदिया परदेस के बासिन्दा ताहीं, अर गैर यहूदियाँ म्हा भी यो प्रचार करदा रहया के पाप करणा छोड़के परमेसवर कान्ही बोहड़ आओ, अर अपने सुभाव के जरिये यो साबित करो के धमनै पाप करणा छोड़ दिया सै। 21 इन बात्तां के कारण यहूदी मन्नै मन्दर म्हा पकड़के मार देण की कोशिश करे थे। 22 पर परमेसवर की मदद तै मै आज ताहीं बण्या सू छोटेचा-बड़या सारया के स्याम्ही गवाही दूँ सू, अर उन बात्तां नै छोड़ किमे कोनी कहन्दा जो नबियाँ अर मूसा नबी नै भी कह्या के होण आळी सै, 23 के मसीह नै दुख टाणा होगा, अर वोए सब तै पैहल्या मरे होया म्हा तै जी उठके, म्हारै माणसां म्हा गैर यहूदियाँ म्हा चाँदणे का प्रचार करैगा। ”

24 जिब वो इस तरियां तै जवाब देण लागरया था, तो फेस्तुस नै ऊँची आवाज म्हा कह्या, “हे पौलुस, तू बावळा सै। घणे ज्ञान नै तेरे ताहीं बावळा कर दिया सै। ”

25 पर पौलुस नै कह्या, “हे महामहिम फेस्तुस, मै बावळा कोनी, पर सच्चाई अर बुद्धि की बात कहूँ सू। 26 राजा नै भी जिसके स्याम्ही मै बिना डेर बोल्लण लागरया सू, इन बात्तां का बेरा सै, अर मन्नै बिश्वास सै के इन बात्तां म्हा तै कोए उसतै लुक्ही कोनी, क्यूँके यो वाक्या गुप्त म्हा कोनी होया। 27 हे राजा अगिरप्पा, के तू नबियाँ का बिश्वास करै सै? हाँ, मन्नै बेरा सै के तू बिश्वास करै सै। ”

28 फेर अगिरप्पा नै पौलुस तै कह्या, “तू माड़े-से समझाण तै मन्नै मसीह बणाणा चाहवै सै?”

29 पौलुस बोल्या, “परमेसवर तै मेरी प्रार्थना सै के, देर या सबेर तै, पर ये सारे सुणण आळे, जो आज मेरी बात सुणै सै, वे मेरै समान हो जावै। ”

30 फेर राजा अर अधिकारी अर बिरनीके अर उनके गेल्या बैठणीये उठ खड़े होए, 31 न्यायालय तै बाहर लिकाड़के आप्स म्हा कहण लागगे, “यो माणस इसा तो किमे कोनी करदा, जो मौत की सजा या जेळ, म्हा गेरण जोगगा हो। ”

32 अगिरप्पा नै फेस्तुस तै कह्या, “जै यो माणस कैसर की दुहाई न्ही देदा, तो छूट सकै था। ”

## 27

~~~~~

1 जिब फेस्तुस राज्यपाल के जरिये यो पक्का हांग्या के हम जहाज के जरिये इटली देश जावां, तो उननै पौलुस अर कुछ दुसरे कैदियाँ ताहीं भी यूलियुस नामक औगुस्तुस सम्राट की पलटन के एक सबेदार के हाथ्यां सौंप दिया। 2 अद्रमुत्तियुम नगर के एक जहाज पै जो आसिया परदेस के किनारे

की जगहों पे जाण पै था, पाणी रास्ते हमनै अपना सफर शरु करया, अर अरिस्तर्खुस नामक जो मकिदुनिया परदेस के थिस्सलुनीके नगर का एक बसिन्दा था।


<sup>3</sup>दुसरे दिन हम सैदा नगर पोहूचाये गये, अर यूलियुस नै पौलुस पै दया करके उस ताहीं साथियाँ के उरै जाण दिया के उनतै जरूरी चीज ले आवां। <sup>4</sup>ओड़ै तै हमनै सफर दुबारा शरु करया, हवा कै पलट होण कै कारण हम साइपरस टापू की ओट म्ह होकै चाल्ले, <sup>5</sup>अर किलिकिया परदेस अर पंफूलिया किनारे कै लोवै कै समुन्दर म्ह होकै लूसिया के मूरा नगर म्ह उतरे। <sup>6</sup>ओड़ै सूबेदार नै सिकन्दरिया नगर का एक जहाज इटली देश जान्दा होइ मिल्या, अर उसनै म्हारै ताहीं उस जहाज पै चढ़ा दिया। <sup>7</sup>जिब हम घणे दिनां ताहीं होळे-होळे चालकै मुश्किल तै कनिदुस कस्बे कै स्याम्ही पोहचे, तो इस करके के हवा म्हारै ताहीं आगै बढ़ण कोनी देवै थी, हम सलमोने कै स्याम्ही तै होकै क्रेते टापू की आइ म्ह चाल्ले, <sup>8</sup>अर उसके किनारे-किनारे मुश्किल तै चालकै “शुभलंगरबारी” नामक एक जगहों पोहचे, जित्त तै लसया नगर लोवै था।

<sup>9</sup>जिब घणे दिन बीत लिये अर पाणी कै सफर म्ह जोख्वम ज्यातै होवै थी बरत के दिन इब बीत लिये थे। आखर म्ह पौलुस नै उन सारया ताहीं कहकै चेतावनी दी, <sup>10</sup>“हे सज्जनों, मन्नै इसा लागू सै के इस सफर म्ह मुश्किल अर घणा नुकसान, ना सिर्फ माळ अर जहाज की बल्के म्हारी जान का भी, होणआळा सै।” <sup>11</sup>पर सूबेदार नै पौलुस की बात्तां तै कप्तान अर जहाज कै माल्लिक की बात्तां तै बाध मान्या। <sup>12</sup>शुभ लंगरबारी नाम का बंदरगाह जाइडा काटण कै खातर सही कोनी था, ज्यातै घणाए का विचार होया के ओड़ै तै आगै बढ़ जावां जै किसे तरियां तै हो सके तो फीनिक्स पोहचकै जाइडा काटै। यो तो क्रेते टापू का एक बंदरगाह सै जो दक्षिण-पश्चिम अर उत्तर-पश्चिम कान्ही खुलै सै।



<sup>13</sup>जिब दक्षिणी हवा होळे-होळे चाल्लण लागगी, तो न्यू सोच्या के उनकी तरकीब पूरी करण खातर बढ़िया बखत था, लंगर उठाया अर किनारे धारै होन्दे होए क्रेते टापू कै किनारे जाण लागगे। <sup>14</sup>पर माड़ी वार म्ह धरती कै कान्ही तै बड़डी ए आँधी उठी, जो “यूरकुलिन” कुह्वावै सै। <sup>15</sup>जिब आँधी जहाज पै लागगी तो जहाज उसके स्याम्ही ठैहर कोनी सक्या, इस करके हमनै जहाज ताहीं हवा के बाहाव छोड़ दिया, अर इस्से तरियां बहन्दे होए चाल्ले गये। <sup>16</sup>फेर कौदा नामक एक छोट्टे-से टापू की आइ म्ह बहन्दे-बहन्दे हम मुश्किल तै डोंगी नै बस म्ह कर सके। <sup>17</sup>फेर जहाज के मल्लाहां नै उस ताहीं ठाके सही उपाय करके जहाज ताहीं तळै तै रस्यां तै कसके बाँधया, अर सुरतिस खाड़ी के चोरवालू पै फंस जाणके डर तै उननै लंगर ताहीं थोड़े नीचै उतारके जहाज ताहीं हवा के बाहाव के गैल-गैल बहण के खातर छोड़ दिया। <sup>18</sup>जिब हमनै आँधी तै घणे हिचकोले अर धक्के खाए, तो दुसरे दिन वे जहाज का माळ बगाण लागगे, <sup>19</sup>अर तीसरे दिन उननै अपने अणणे हाथ्यां तै जहाज का साज-सामान भी बगा दिया। <sup>20</sup>जिब घणे दिन ताहीं ना सूरज, ना तारे दिक्खे अर बड़डी आँधी चाल्दी रही, तो आखर म्ह म्हारै बचण की सारी उम्मीद जान्दी रही।

<sup>21</sup>जिब वे घणे दिन ताहीं भूखे रह लिये, तो पौलुस नै उनके विचाळै खडे होकै कहा, “हे भाईयो, चाहिये था के थम मेरी बात मानके क्रेते टापू तै आगै ए ना बढ़ते तो या मुसीबत न्ही आन्दी अर ना यो नुकसान ठान्दे।” <sup>22</sup>पर इब मै थमनै समझाऊँ सूँ के धीरज राखो, क्यूँके थारै म्ह तै किसे की जान का नुकसान कोनी होवेगा, पर सिर्फ जहाज का। <sup>23</sup>क्यूँके परमेसवर जिसका मै सूँ, अर जिसकी भगति करूँ सूँ, उसके सुगंदूत नै आखरी रात मेरै धारै आके कहा, <sup>24</sup>हे पौलुस, डरै मतना! तन्ने कैसर के स्याम्ही खड्या होणा जरूरी सै। परमेसवर नै सारया ताहीं जो तरे गेल्या सफर करै सै, जीवन दान दिया सै। <sup>25</sup>ज्यातै, हे भले माणसों, सब्र करो, क्यूँके मै परमेसवर का विश्वास करूँ सूँ, के जिसा मेरै तै कहा गया सै, उसाए होगा। <sup>26</sup>पर म्हारै ताहीं किसे टापू पे जा टिकणा होगा।”



27 जब चौदहवीं रात आई, अर हम अदिरया समुन्दर म्ह भटकदे होए हाँ डरे थे, तो आध्धी रात के लोवै मल्लाहां नै अंदाजे तै जाण्या के हम किसे देश के लोवै पोहच रहे सां। 28 पाणी की गहराई नाप्पण पै उननै एक सौ बीस फुट डून्चा पाया, अर थोड़ा आगै बढके दुबारा थाह लेई तो नब्बै फुट पाया। 29 फेर पथरीली जगहां तै टकराण के डर तै उननै जहाज की पिच्छली ओड़ चार लंगर गेर, अर सबेरै होण की चाह करदे रहे। 30 पर जब मल्लाह जहाज पै तै भाजणा चाहवै थे, अर गलही तै लंगर गेरण के बहाणे डोंगी समुन्दर म्ह उतार दी, 31 तो पौलुस नै सूबेदार अर सिपाहियाँ तै कह्या, “जै ये जहाज पै न्ही रहे, तो थम भी कोनी बच सकदे।” 32 फेर सिपाहियाँ नै जोड़े काटके डोंगी गेर दी।

33 जब सबेरै होण पै था, फेर पौलुस नै न्यू कहकै, सारया ताहीं खाणा खाण के खात्तर बिनती करी, “आज चौदहा दिन होगे सै के थम चिन्ता करते-करते भूखे रहे, अर किमे न्ही खाया। 34 ज्यांतै थारे तै समझाऊँ सूँ के किमे खा ल्यो, जिसतै थारा बचाव होवै, क्यूँके थारे म्ह तै किसे का सिर का एक बाल भी कोनी गिरैगा।” 35 न्यू कहकै उसनै रोट्टी लेके सारया के स्याम्ही परमेसवर का धन्यवाद करया अर तोड़के खाण लागया। 36 इस बात तै वे सारे उत्साहित होके खाणा खुवाण लागगे। 37 हम सारे मिलके जहाज पै दो सौ छिहत्तर जणे थे। 38 जब वे खाणा खाके छिक्क लिये, तो गेहूँ ताहीं समुन्दर म्ह बगाके जहाज हल्का करण लागगे।

39 जब दिन लिकइया तो उननै उस देश ताहीं कोनी पिच्छाणा, पर एक खाड़ी देक्खी जिसका किनारा चौरस था, अर विचार करया के जै हो सकै तो इस्से पै जहाज नै टिकावै। 40 फेर उननै लंगरा ताहीं खोल के समुन्दर म्ह छोड़ दिया अर उस्से बखत पाल के रस्से ढील्ले कर दिये, अर हवा के स्याम्ही आगला पाल चढ़ाके किनारे के कान्ही चाल्ले। 41 पर दो समुन्दर के संगम की जगहां पड़के उननै जहाज ताहीं टिकाया, अर आगला भाग तो टिक गया, पर पिच्छली ओड़ लहरा तै टूटण लागगी।

42 फेर सिपाहियाँ का यो विचार होया के कैदियाँ ताहीं मार देवें, इसा ना हो के कोए तैर के लिकइ भाज्जै। 43 पर सूबेदार नै पौलुस ताहीं बचाण की मर्जी तै उन ताहीं इस विचार तै रोक्या अर न्यू कह्या, के जो तैर सकै सै, पैहल्या छलाँग मारके किनारे पै लिकइ जावै। 44 अर बाकी कोए फट्टा पै, अर कोए जहाज की दुसरी चीज के सहारै लिकइ जावै। इस तरियाँ तै सारे धरती पै बच लिकड़े।

## 28

### PEREYER PEREYER PEREYER PEREYER

1 जब हम बच लिकड़े, तो बेरा लागया के यो माल्टा टापू कुह्हावै सै। 2 ओड़े के बासिन्दयां नै म्हारै पै अनोकखी दया करी, क्यूँके मिह बरसण के कारण ठण्ड थी, ज्यांतै आग सुलगाके हम सारया ताहीं ठहराया। 3 जब पौलुस नै लाकड़ियाँ का भरोटा कट्टा करके आग पै धरया, तो एक साँप आँच पाके लिकइया अर उसके हाथ तै लिपट गया। 4 जब उन बासिन्दयां नै साँप ताहीं उसके हाथ तै लिपटे होइ देख्या, तो आप्पस म्ह कह्या, “साच्चए यो माणस खून्नी सै के फेर भी समुन्दर तै बच गया, तोभी न्याय नै जिन्दा कोनी रहण दिया।” 5 फेर उसनै साँप ताहीं आग म्ह झटक दिया, अर उस ताहीं किमे नुकसान कोनी होया। 6 पर वे लोग बाट देखे थे के वो सूज जावैगा या चाणचक पड़के मर जावैगा, पर जब वे घणी वार ताहीं देखदे रहे अर देख्या के उसका किमे भी कोनी बिगइया, तो अपना विचार बदलके कह्या, “यो तो कोए देवता सै।”

7 उस जगहां के लोवै-धोवै उस टापू के प्रधान पुबलियुस की धरती थी। उसनै म्हारै ताहीं अपणे घरां ले जाके तीन दिन मित्तर की ढाळ सेवा-पाणी करी। 8 पुबलियुस का बाप बुखार अर बवासीर तै बीमार पड्या था। आखर म्ह पौलुस नै उसके धरै कमरे म्ह जाके प्रार्थना करी अर उसपै हाथ धरके उस ताहीं ठीक करया। 9 जब इसा होया तो उस टापू के बाकी बीमार पौलुस के धरै आये अर वे चंगे करे गये। 10 उननै म्हारा घणा आदर-मान करया, अर जब हम चाल्लण लागगे तो जो किमे म्हारै खात्तर जरूरी था, उननै जहाज पै धर दिया।

### PEREYER PEREYER PEREYER PEREYER PEREYER PEREYER PEREYER

11 तीन महिन्ने के पाच्छै, हमनै सिकन्दरिया जावण आठे जहाज पै सफर शुरु करया, यो जहाज टण्ड के कारण इस टापू म्ह ठैहरा होया था, इस जहाज के आगले भाग पै एक जोड़ी देवत्यां का एक निशान था। (दियुसकूरी गद्दी होई थी) 12 सुरकूसा नगर म्ह लंगर गेर के हम तीन दिन टिके रहे। 13 ओड़ै तै आगू बढ्के हम रेगियुम नगर म्ह आये, अर एक दिन के पाच्छै, दक्षिणी हवा चाल्ली, फेर हम दुसरे दिन पुतियुली नगर म्ह आये। 14 ओड़ै हमनै विश्वासी भाई मिले, उनके कहणे तै हम उनके उरै सात दिन ताहीं रहे, अर इस तरियां तै हम रोम देश कान्ही चाल्ले। 15 कुछ विश्वासी भाई रोम देश तै म्हारी खबर सुणके अप्पियुस के चौक अर तीन-सराए ताहीं म्हारै तै फेटण नै लिकड़ आये, जिन नै देखके पौलुस नै परमेसवर का धन्यवाद करया अर बड़ा उत्साहित होया। 16 जिव हम रोम नगर म्ह पोहचे, तो पौलुस ताहीं एक सिपाही के गेल्या जो उसकी रुखाळी करै था, एकले रहण का हुकम मिलगया।

### २२२ २२२ २२२२

17 तीन दिन के पाच्छै, उसनै यहूदियाँ के खास माणसां ताहीं बुलाया, अर जिव वे कट्टे होए तो उनतै कह्या, “हे भाईयो, मन्नै अपणे माणसां के या बाप-दाद्या के बीवारां के बिरोध म्ह किमे भी कोनी करया, तोभी कैदी बणाके यरुशलम नगर तै रोमी सरकार के हाथ्यां सौंप्या गया। 18 उननै मेरै ताहीं जाँचके छोड़ देणा चाह्या, क्यूँके मेरै म्ह मौत के जोगगा कोए कसूर कोनी था। 19 पर जिव यहूदी अगुवें इसके बिरोध म्ह बोल्लण लागे, तो मन्नै कैसर की दुहाई देणी पड़ी यो न्ही के मन्नै अपणे माणसां पै कोए दोष लाणा था। 20 ज्यांतै मन्नै थारे ताहीं बुलाया सै के थारे तै मिलूं अर बतळाऊं, क्यूँके इस्राएल की आस के खात्तर वो मसीह इस बेल तै जकड़े होए सै।”

21 उननै उसतै कह्या, “ना हमनै तेरे बारै म्ह यहूदिया परदेस तै चिट्ठी पाई, अर ना विश्वासी भाईयां म्ह तै किसे नै आके तेरे बारै म्ह किमे बताया अर ना बुरा कह्या। 22 पर तेरा विचार के सै? वोए हम तेरे तै सुणणा चाहवां सां, क्यूँके हमनै बेरा सै के हरेक जगहां इस पंथ के बिरोध म्ह माणस बात करै सै।”

23 फेर जो यहूदी पौलुस के गैल थे, उननै उसके खात्तर एक दिन ठहराया, अर घणे माणस उसके उरै कट्टे होए, अर वो परमेसवर के राज्य की गवाही देदा होया, अर मूसा नबी के नियम-कायदे अर नबियां की किताबां तै यीशु के बारै म्ह समझा-समझाके सबरै तै साँझ ताहीं वर्णन करदा रहया। 24 फेर कुछां नै उन बाततां ताहीं मान लिया, अर कुछां नै बिश्वास कोनी करया। 25 जिव वे आप्पस म्ह एक पंथ कोनी होए, तो पौलुस की इस बात के कहण पै चाल्ले गये “पवित्र आत्मा नै यशायाह नबी के जरिये थारे बाप-दाद्या तै सही ए कह्या था,”

26 “जाके इन माणसां तै कह,  
के सुणदे तो रहोगे, पर ना समझोगे,  
देखदे तो रहोगे, पर ना बुझोगे!

27 क्यूँके इन माणसां का मन मोट्टा  
अर उनके कान भारया हो गये सै,  
अर उननै अपणी आँख मूंद ली सै,  
इसा ना हो के वे कदे आँखां तै देखै  
अर कान्ना तै सुणै अर मन तै समझै  
अर पलटै, अर मै उन ताहीं ठीक करूं।”

28 “इस करके थम जाणो सो के परमेसवर के इस उद्धार की कथा गैर यहूदियाँ के धोरै भेज्जी गयी सै, अर वे स्वीकार करैगें।” 29 जिव उसनै न्यू कह्या तो यहूदी आप्पस म्ह घणे बहस करण लागे अर ओड़ै तै चले गये।



30 वो पूरे दो साल अपने किराए के घर में रहया, 31 अर जो उसके धोरे आवै थे, उन सारया तै मिलदा रहया अर बिना रोक-टोक घणा निडर होके परमेशवर के राज्य का प्रचार करदा अर प्रभु यीशु मसीह की बात सिखान्दा रहया ।

## रोम नगर के माणसां ताहीं पौलुस की चिट्ठी



रोम नगर के माणसां ताहीं पौलुस की चिट्ठी लिखन का मकसद था रोम म्ह कलीसिया की यात्रा के खात्तर राह तैयार करणा, जिसकी योजना पौलुस नै बनाई थी। उसकी योजना थी के थोड़े बखत ताहीं वो ओड़ै के विश्वासियाँ के बीच काम करै, फेर उनकी मदद तै स्पेन देश ताहीं जावै। इस किताब म्ह म्हारे ताहीं पौलुस के सन्देश का सारा विवरण मिल्या सै। रोम की कलीसिया के माणसां ताहीं नमस्कार अर उनके खात्तर अपनी प्रार्थनाओं के बारे म्ह बताण बाद, पौलुस इस चिट्ठी की खास बात का जिक्र कर सै, क्यूँके इस सुसमाचार म्ह परमेसवर की धार्मिकता विश्वास तै, अर विश्वास खात्तर जाहिर होवै सै, (1:17)। पौलुस आगै इस खास बात नै खुलकै समझावै सै। सारी माणस जात, यहूदी अर गैर यहूदी दोनुआ नै, परमेसवर के गैल मेलजोल करण की जरूरत सै, क्यूँके सारे समान रूप तै पाप के बस म्ह सै। यीशु मसीह म्ह विश्वास के जरिये माणसां का परमेसवर के गैल मेलजोल होवै सै। फेर पौलुस मसीह के गैल नए जीवन का जिक्र करै सै, जो परमेसवर के गैल इस नए सम्बन्ध होण के कारण होवै सै। विश्वासी का परमेसवर के गैल जो मेळ-मिलाप होवै सै, अर परमेसवर का आत्मा पाप अर मृत्यु के अधिकार तै उननै आजाद कर देवै सै। पाठ 5-8 म्ह पौलुस विश्वासी के जीवन म्ह, परमेसवर के नियम-कायदा का मकसद, अर परमेसवर के आत्मा की शक्ति पै भी जिक्र करै सै। फेर प्रेरित इस सवाल तै जूझै सै, के सारी मानव जाति के खात्तर परमेसवर की योजना म्ह यहूदी अर गैर यहूदी किस तरियां आ सके सै। वो इस नतिज्जें पै पोहंचै सै, के यहूदी माणसां के जरिये यीशु का ठुकराया जाणा भी परमेसवर की उस योजना का एक भाग सै, जो पूरी मानव जाति नै यीशु मसीह म्ह परमेसवर के अनुग्रह म्ह ल्याण खात्तर बनाई गयी सै, अर उसका विश्वास सै के यहूदी लोग सदा यीशु तै मुकरते न्ही रहवेंगे। आखिर म्ह पौलुस लिखै सै, के मसीह जीवन किस तरियां जीणा चाहिए, खासकर दुसरयां के गैल प्यार राखणा। वो इन बाततां नै जिसा के परमेसवर की सेवा, राज्य अर एक दुसरा के खात्तर विश्वासियाँ का फर्ज, अर अन्तरात्मा के सवालां के रूप म्ह लेवै सै। वो चिट्ठी का समापन निजी सन्देशां अर परमेसवर की बड़ाई के गैल करै सै।

### रूप-रेखा

भूमिका अर खास बात 1:1-17

माणस नै उद्धार की जरूरत 1:18-3:20

उद्धार परमेसवर का रास्ता सै 3:21-4:25

मसीह म्ह नया जीवन 5:1-8:39

परमेसवर की योजना म्ह इस्राएल 9:1-11:36

मसीह चाल-चलण 12:1-15:13

समापन अर व्यक्तिगत अभिवादन 15:14-16:27



1 या चिट्ठी पौलुस की ओड़ तै सै, जो यीशु मसीह का दास सै अर परमेसवर के जरिये प्रेरित होण के खात्तर चुपया गया अर उसका सुसमाचार सुणाण खात्तर न्यारा करया गया सै। 2 यीशु के इस दुनिया म्ह आण तै भोत पैहले परमेसवर नै वादा करया था, के वो नबियाँ के जरिये इस सुसमाचार ताहीं जाहिर करै, जिननै इसके बारे म्ह पवित्र ग्रन्थ म्ह लिख्या सै। 3 यो सुसमाचार परमेसवर के बेटे के बारे म्ह सै, जो म्हारा प्रभु यीशु मसीह सै। वो शारीरिक तौर पै तो राजा दाऊद की पीढ़ी तै पैदा होया, 4 पर पवित्र आत्मा की शक्ति तै मरे होया म्ह तै जिन्दा होण के कारण परमेसवर का बेटा कुहाया। 5 मसीह के जरिये हमनै अनुग्रह अर प्रेरिताई परमेसवर तै मिली, ताके उसके नाम के कारण गैर यहूदी माणस मसीह म्ह विश्वास करके उसकी मान्ने, 6 थम गैर यहूदी विश्वासी जो

रोम नगर म्ह सों, उन माणसां म्ह शामिल सों, जिन ताहीं परमेश्वर नै यीशु मसीह के माणस होण खात्तर बुलाया सै।

7 या चिट्ठी रोम नगर के उन सारे माणसां के नाम सै, जो परमेश्वर के प्यारे सै, अर उसके पवित्र जन होण के खात्तर बुलाए गये सै। मै प्रार्थना करूँ सूँ, के म्हारै पिता परमेश्वर अर प्रभु यीशु मसीह की ओड़ तै थारे ताहीं अनुग्रह अर शान्ति मिलदी रहवै।

~~~~~

8 सब तै पेहल्या मै थम सारया के खात्तर यीशु मसीह के जरिये अपणे परमेश्वर का धन्यवाद करूँ सूँ, क्यूँके यीशु मसीह म्ह थारे विश्वास का जिक्र साबती दुनिया म्ह होरया सै। 9 परमेश्वर, जिसकी सेवा मै पूरे मन तै करूँ सूँ, अर उसके बेटे के सुसमाचार के बारे म्ह माणसां ताहीं बताऊँ सूँ, वोए मेरा गवाह सै, के मै अपनी प्रार्थना म्ह थमनै किस तरियां सारी हाण याद करूँ सूँ। 10 अर बिनती करूँ सूँ, के जै हो सक्या तो परमेश्वर की इच्छा के मुताबिक मै थारे तै मिलण भी आऊँ। 11 क्यूँके मै थारे तै मिलण की लालसा करूँ सूँ, ताके मै थमनै कोए आत्मिक आशीष दियुँ जिसतै थम विश्वास म्ह मजबूत हो जाओ। 12 मेरे कहण का मतलब यो सै, के जिव मै थारे तै मिलु, तो मै थारे ताहीं अर थम मन्नै उत्साहित कर सको, थम मेरे विश्वास नै जाणकै मजबूत हो जाओ, अर मै थारे विश्वास नै जाणकै मजबूत हो जाऊँ। 13 हे विश्वासी भाईयो, मै चाहूँ सूँ के थम इस बात नै जाणो, के मन्नै कई बार थारे धरै आण की योजना बणाई, के मै थारे बीच म्ह उसीए आत्मिक बढ़ोतरी देख सकूँ, जिसी मन्नै बाक्की गैर यहूदियाँ म्ह देखी सै, पर इब तक मेरे आण म्ह रुकावट ए होन्दी रही सै। 14 मै उन संस्कारी माणसां का जो यूनानी भाषा अर सभ्यता नै जाणै सै, अर जो माणस उनकी भाषा अर सभ्यता नै न्ही जाणते, अर अकलमंद अर बेअक्ल माणसां ताहीं वचन सुणाण का मन म्ह बोझ राखूँ सूँ। 15 इस करकै म्ह मै थमनै भी जो रोम नगर म्ह रहो सो, सुसमाचार सुणाण खात्तर जमा उत्सुक सूँ।

~~~~~

16 क्यूँके मै मसीह के सुसमाचार के बारे म्ह कोनी सरमान्दा, परमेश्वर अपनी शक्ति के जरिये सब नै बचावै सै जो सुसमाचार पै विश्वास करै सै, पैहल्या यहूदियाँ ताहीं अर फेर गैर यहूदी ताहीं। 17 क्यूँके सुसमाचार हमनै बतावै सै, के परमेश्वर अपनी नजर म्ह हमनै किस तरियां धर्मी बणावै सै। जो शुरु तै लेकै अंत तक मसीह पै विश्वास करण तै हो सै, जिसा पवित्र ग्रन्थ म्ह लिख्या भी सै, के परमेश्वर अपनी नजर म्ह धर्मी जन बणावै सै, वो विश्वास तै जिन्दा रहवैगा।

~~~~~


18 परमेश्वर का छोा तो उन माणसां की सारी अभगति अर अधर्म के काम्मां के कारण जो माणस करै सै, सुर्ग तै जाहिर हो सै, वो अपणे सब अधर्म के काम्मां तै माणस ताहीं, परमेश्वर की सच्चाई के बारे म्ह जाणण तै रोक्के सै। 19 वे परमेश्वर के बारे म्ह इस करकै सही अर आसान्नी तै जाण सकै सै, क्यूँके परमेश्वर नै उन ताहीं इन बात्तां के बारे म्ह बताया सै। 20 सच यो सै के दुनिया की शुरुआत तै ए परमेश्वर के अनदेखे गुण, उसकी अनन्त सामर्थ्य अर उनका परमेश्वरत्व, दुनिया म्ह सै, अर दिक्खे भी सै, इस करकै माणस के धरै कोए बहाना कोनी, के वो परमेश्वर नै न्ही जाणता। 21 परमेश्वर का ज्ञान होण पै, भी उननै ना तो उस ताहीं परमेश्वर होण के लायक सम्मान दिया, अर ना ए उसका धन्यवाद करया। इसके उल्ट वो उसके बारे म्ह बेकार की बात सोचचण लागगे, अर जिसा उन ताहीं सोचणा चाहिए था उसा न्ही सोच्या, पर बुरा ए सोच्या। 22 वे अपणे-आप ताहीं अकलमंद मानकै बेअक्ले बणगे, 23 अर अविनाशी परमेश्वर की महिमा न्ही करी, बल्के नाशवान माणस, अर पछियाँ, रेंगण आळे अर चार पैरां आळे जानवरां की मूर्ति की आराधना करण लागगे।

24 इस करकै परमेश्वर नै उन ताहीं उनकै मन की बुरी इच्छा के मुताबिक गलत काम करण खात्तर छोड़ दिया ताके वे आपस म्ह अपणे शरीरां तै गन्दे काम करै। 25 क्यूँके उननै परमेश्वर के बारे म्ह सच्ची बात्तां ताहीं जाणण की बजाये झूठ पै विश्वास करया, अर सृष्टि की चिज्जां की आराधना

अर सेवा करी, ना के उस सृजनहार परमेसवर की जो सदा खात्तर महिमा के लायक सै! आमीन। 26 ज्यातै परमेसवर नै उन ताहीं उनकी नीच कामनाओं के बस म्ह छोड़ दिया, जिस कारण उनकी लुगाईयाँ नै भी प्राकृतिक संभोग की जगहां अप्राकृतिक संभोग अपना लिया। 27 उस्से तरियां ए लुगाईयाँ के गेल्या प्राकृतिक संभोग नै छोड़के माणस दुसरे माणस के खात्तर आप्पस म्ह कामुकता म्ह जळण लागे, अर माणस का माणस के गेल्या वेशर्मी के काम करणा उनके उप्पर दण्ड लेके आये।

28 अर जिब उननै परमेसवर ताहीं जाणणा बेवकूफी लाग्या, तो परमेसवर नै भी उन ताहीं उनके निकम्मे मन के बस म्ह छोड़ दिया, ताके वे बुरे काम करै। 29 ज्यातै वे सारे ढाळ के अधर्म, दुष्टता, लालच, अर बैर-भाव तै भरगे, अर जळण, हत्या, झगड़े, छळ, ईर्ष्या तै भरगे, अर चुगलखोर, 30 बदनाम करण आळे, परमेसवर तै नफरत करण आळे, बुराई करण आळे, दुसरयां की बेजती करण आळे, डिंगमार, घमण्डी, भुंड़ी-भुंड़ी बातों के बणाण आळे, माँ-बाप का हुकम ना मानण आळे, 31 बेअक्ले, विश्वासघाती, प्यार अर दया की कमी अर निर्दयी होगये। 32 वे तो परमेसवर की या धार्मिक विधि नै जाणै सै, के इसे-इसे काम करण आळे मौत के दण्ड के जोगगे सै, फेरभी ना सिर्फ आप ए इसे काम करै सै, बल्के इसे काम करण आळा तै राज्जी भी होवै सै।

## 2



1 इस करके हे मेरे विश्वासी भाईयो, थम जो कोए भी क्यूँ ना हो, थारे धौरे इस बात का कोए जवाब कोनी, के थम जो दुसरयां पै दोष लगाओ सों, तो उस बात के कारण खुद अपने-आप पै दण्ड लेके आओ सों, क्यूँके जिस बात के बारे म्ह थम उसनै दोषी बणाओ हो, थम खुद भी वोए काम करो सों। 2 हमनै यो बेरा सै, के परमेसवर उसका न्याय धार्मिकता के साथ जरूर करेगा, जो इसे बुरे काम करै सै। 3 जिब के थम जो इसे-इसे काम करणीया पै दोष लगाओ सों, अर खुद वैए काम करो सों, के न्यू समझों सों के थम परमेसवर के दण्ड तै बच जाओगे? 4 के थम परमेसवर की भलाई, सहनशीलता, अर धीरजरूपी धन ताहीं तुच्छ जाणो सों? के थम न्ही समझते के परमेसवर की भलाई ए थारे ताहीं पाप छोड़णा सिखावै सै? 5 पर थम हठिल्ले सों, अर पाप करणा न्ही छोड़दे, अर ना ए अपने-आपनै बदलना चाहन्दे। इस करके जिस दिन परमेसवर अपना छोो दिखावैगा, उस दिन धार्मिकता के साथ उसका न्याय जाहिर होवैगा, अर वो थारे ताहीं भारी दण्ड देवैगा। 6 परमेसवर हरेक नै उसके काम के मुताबिक फळ देवैगा। 7 जो माणस भले काम करते रहवै सै, अर परमेसवर की महिमा, आदर अर अनन्त जीवन की खोज म्ह लागगे रहवै सै, परमेसवर उन सारया ताहीं अनन्त जीवन देवैगा। 8 पर जो मतलबी सै अर सच नै कोनी मान्दे, बल्के अधर्म नै मान्ने सै, उनपै परमेसवर का छोो अर प्रकोप पड़ेगा। 9 क्लेश अर संकट हरेक माणस पै आवैगा। परमेसवर सबतै पैहल्या यहूदियाँ का अर बाद म्ह उन माणसां का न्याय करेगा जो गैर यहूदी सै। 10 पर महिमा, आदर अर शान्ति हरेक नै मिलैगी, जो भले काम करै सै, पैहल्या यहूदी ताहीं फेर उन माणसां ताहीं जो गैर यहूदी सै। 11 क्यूँके परमेसवर किसे का पक्षपात कोनी करदा।

12 वे सारे गैर यहूदी माणस जिननै परमेसवर के नियम-कायदे जो मूसा नबी ताहीं मिले थे, उन ताहीं जाणे बिना जिसनै पाप करया सै, वे नियम-कायदा नै बिना जाणे नाश भी होवैगें, पर जिन नै नियम-कायदे नै जाणके भी पाप करया सै, उनका न्याय भी नियम-कायदे के मुताबिक करया जावैगा। 13 क्यूँके परमेसवर की निगांह म्ह नियम-कायदे के सुणण आळे धर्मी माणस कोनी, पर नियम-कायदे पै चाल्लण आळा नै धर्मी बणावैगा। 14 फेर जिब गैर यहूदी लोग जिनके धौरे मूसा नबी के नियम-कायदे कोनी, कुदरती तौर पैए नियम-कायदे की बातों पै चाल्लै सै, तो नियम-कायदे उनके धौरे ना होण पै भी, उन ताहीं बेरा सै, के उननै के करणा सै, अर के न्ही करणा। 15 वे नियम-कायदे की बात अपने-अपने दिलां म्ह लिखी होई दिखावै सै अर उनकी अन्तरात्मा भी इसकी गवाही देवै सै, के ये बात सच सै, क्यूँके उनके विचार उनपै दोष लगावै सै, या फेर यो बतावै सै के वो ठीक करै सै।

16 यो सब उस दिन स्पष्ट हो जावैगा, जब परमेसवर मैरे जरिये सुणाये गये सुसमाचार के मुताबिक, माणसां की लुकही होई बात्तां का न्याय, यीशु मसीह कै जरिये करैगा।



17 थम खुद नै यहूदी कुह्वावे सों, अर मूसा नबी के नियम-कायदे पै भरोस्सा राक्खों सों, परमेसवर धारे पै दया करै से, इस कारण थम घमण्ड करण लागरे सों। 18 अर थमनै परमेसवर की मर्जी का बेरा से, थम आच्छी-आच्छी बात्तां नै तो चाहो सों, क्यूँके धारे ताहीं ये बात मूसा नबी के नियम-कायदे म्ह तै सिखाई गई सै। 19 अर थमने इस बात का पूरा भरोस्सा सै, के थम आंध्याँ नै राह दिखाण आळे अर अन्धकार म्ह भटके होए माणसां खात्तर परमेसवर का चाँदणा सों। 20 अर बेअक्लां नै सिखाण आळे अर बाळकां के उपदेशक सों। थमनै बेरा सै के परमेसवर के नियम-कायदे थमने पूरी तरियां तै ज्ञान अर सच्चाई देवे सै। 21 इस करके थम जो दुसरयां नै शिक्षा देओ सों, तो अपणे-आपने शिक्षा क्यूँ न्ही देन्दे? थम उपदेश देओ सों, के “चोरी ना करियो,” के थम खुद चोरी कोनी करते! 22 थम जो कहवै सों, के “जारी ना करियो,” के खुद जारी कोनी करते? थम जो मूर्तियाँ तै नफरत करो सों, के खुद ए मन्दरां नै कोनी लूटते? 23 थम जो नियम-कायदे नै जाणण का घमण्ड करो सों, के नियम-कायदे नै ना मानकै परमेसवर का अनादर कोनी करते? 24 “थम यहूदियाँ के कारण गैर यहूदियाँ म्ह परमेसवर के बारे म्ह बुरा भला कह्या जावै सै, जिंसा पवित्र ग्रन्थ म्ह लिख्या भी सै।”

25 मै थमनै कुछ बताऊँ सूं, थारा खतना करया जाणा जिब्बे फायदेमन्द सै, जिब थम नियम-कायदा नै मान्नों, जै थम इसा न्ही करते तो थम उन माणसां की ढाळ सों जिनका खतना न्ही होया। 26 जै बिना खतना करे होए माणस नियम-कायदे की विधियाँ नै मान्ने, तो परमेसवर उन ताहीं अपणे माणस क्यूँ न्ही कहवैगा। 27 बिना खतना होए माणस जो परमेसवर के हुकमां नै मान्ने सै, वे थारी बुराई करैगें जिनके धारे परमेसवर के नियम-कायदे सै जिन ताहीं थम मानते न्ही। 28 असली यहूदी वो कोनी जो सिर्फ यहूदी माँ-बाप तै पैदा होया सै, अर ना ए वो असली खतना सै, जो दिखाण खात्तर देह म्ह करया गया सै। 29 यहूदी वो सै, जो अपणे मन म्ह यहूदी सै, अर खतना वो सै, जो पवित्र आत्मा के जरिये मन का करया जावै सै, ना के वो जो नियम-कायदा के मुताबिक करया जावै सै, इस ढाळ के माणसां की तारीफ माणसां की ओड़ तै न्ही, पर परमेसवर की ओड़ तै करी जावै सै।

### 3

1 कोए कह सकै सै, के भला यहूदी होण का के फायदा, या खतना करण का के फायदा? 2 यहूदी होण के भोत फायदे सै, क्यूँके परमेसवर के वचन यहूदियाँ ताहीं ए सौंपे गये सै। 3 अगर कुछ यहूदी माणस विश्वासघाती लिकड़े भी तो उसतै के फर्क पड़े सै? परमेसवर अपणे वादे पूरा करण म्ह विश्वास जोगगा सै, तो इसका यो मतलब कोनी के परमेसवर भी विश्वासघाती सै। 4 न्ही! बिल्कुल न्ही! बल्के परमेसवर सच्चा सै, अर दुनिया का हरेक माणस झूट्टा ठेहरै, जिंसा पवित्र ग्रन्थ म्ह परमेसवर के बारे म्ह लिख्या सै, “जिसतै तू अपणी बात्तां म्ह धर्मी साबित हो अर न्याय करदे बखत तू जीत पावै।” 5 इस करके जै म्हारे बुरे काम परमेसवर की धार्मिकता साबित कर देवै सै, तो हम के कहां के न्यू कहां के परमेसवर जो छो करै सै, तो के वो अन्यायी सै? (यो तो मै दुनियावी नजरिये तै कहूँ सूं)। 6 न्ही! बिल्कुल न्ही! जै परमेसवर यहूदी माणसां का न्याय सही तरिकेँ तै न्ही कर सकता, तो वो दुनिया के माणसां का भी न्याय सही तरिकेँ तै न्ही कर सकता? 7 के कोए कह सकै सै, जै मेरा झूट परमेसवर की सच्चाई नै दिखावै अर उसकी महिमा नै बढ़ावै, तो परमेसवर किस तरियां मन्ने परख के पापी साबित कर सकै सै? 8 कई माणस यो कह के मेरे पै दोष लगावै सै, के “आओ, हम बुरे काम करा के इसतै ए कुछ भलाई हो जा।” जो मेरे बिरुद्ध इसी बात कहवै सै वो दण्ड के लायक सै।



9 तो फेर हम के कह सका सां? के हम यहूदी गैर यहूदियाँ तै आच्छे सां? कदे भी न्ही! क्यूँके हम यहूदी अर गैर यहूदी दोनुवां पै यो दोष ला चुके सां के वे सारे के सारे पाप की शक्ति के बस म्ह सै। 10 जिसा के पवित्र ग्रन्थ म्ह लिख्या सै: “कोए भी माणस परमेसवर की नजर म्ह धर्मी कोनी, एक भी कोनी। 11 कोए भी माणस समझदार कोनी, कोए परमेसवर का टोहू आळा कोनी। 12 सारे माणस परमेसवर की राह तै भटक ग्ये सै, सबके सब परमेसवर की नजर म्ह निकम्मे बणगे सै, कोए भी भलाई करण आळा कोनी, एक भी कोनी। 13 उनका मुँह खुली होई कबर की ढाळ सै, जिस म्ह तै बदबू आवै सै। क्यूँके अपणे मुँह तै वे भुंडा बोल्लै सै, अर वे जो भी बोल बोल्लै सै वो साँप के जहर की तरियां जहरीले सै। 14 उनका बोल श्राप अर कड़वाहट तै भरया सै। 15 वो लहू बहाण खात्तर फुर्तीले सै, 16 वे जित्त भी किते जावै सै ओड़ै नाश अर क्लेश लेके जावै सै, 17 वे न्ही जाणते के माणसां के गैल खुशी अर शान्ति तै किस तरियां जीणा सै। 18 उन म्ह परमेसवर का डर सै ए कोनी।” 19 हमनै बेरा सै के मूसा नबी के नियम-कायदे जो कुछ कहवै सै, उन्हे तै कहवै सै, जो नियम-कायदे के अधीन सै, ताके कोए भी माणस भान्ना न्ही बणा सकै, अर दुनिया के सारे माणस परमेसवर के स्याम्ही दोषी ठेहराये जावै। 20 क्यूँके मूसा नबी के नियम-कायदे के पुगाण तै कोए माणस उसके स्याम्ही धर्मी कोनी बणैगा, क्यूँके नियम-कायदा के जरिये हमनै बेरा लागै सै के हम पापी सां।

### XXXXXXXXXX XXXXXXXXXXXXXXXXXXXXXXX

21 पर इब नियम-कायदा नै मान्ने बिना धार्मिकता जो परमेसवर तै मिलै सै, अर जिसके बारे म्ह मूसा नबी के नियम-कायदा अर नबियाँ की किताब्यां म्ह भोत पैहले लिख्या सै, के परमेसवर हमनै धर्मी किस तरियां बणावै सै। 22 मतलब यो के हम प्रभु यीशु मसीह पै बिश्वास करण तै धर्मी बणा सां, जो यीशु मसीह पै बिश्वास करण तै सब माणसां खात्तर सै। क्यूँके परमेसवर की नजर म्ह सब माणस एक समान सै। 23 क्यूँके सारया नै पाप करया सै, अर सब परमेसवर की महिमा तै दूर होगे सै, 24 परमेसवर नै म्हारे पै अनुग्रह करया, के उसनै यीशु मसीह के जरिये म्हारे ताहीं म्हारे पापां के दण्ड तै छुड़ा लिया, अर म्हारे ताहीं बिना कुछ करे धर्मी बणाया। 25-26 परमेसवर नै यीशु मसीह ताहीं म्हारे पाप की कीमत चुकाण खात्तर इस दुनिया म्ह भेज्जा, यीशु मसीह नै म्हारे खात्तर अपना लहू बहा के अपना जान दे दी। ताके हम उसपै बिश्वास करण के जरिये परमेसवर के धारे आ सकां, अर उसनै इसा यो दिखाण खात्तर करया, के वो पैहले जमाने म्ह भी पापी माणसां गैल सबर तै रहण म्ह अर उनके पाप माफ करण म्ह धर्मी था, बल्के इब भी उसकी धार्मिकता जाहिर हो जावै, जिसते वे खुद धर्मी बणै अर जो प्रभु यीशु म्ह बिश्वास राक्खै सै, वो परमेसवर की नजर म्ह भी धर्मी बण जावै। 27 तो के हम किसे बात पै घमण्ड कर सकां सां? उसके खात्तर कोए जगहां न्ही। के नियम-कायदा के जरिये या उननै मानण कै जरिये सां? न्ही! पर यीशु मसीह पै बिश्वास करण तै घमण्ड करां सां। 28 इस करकै हम इस नतीजै पै पोहचे सा, के परमेसवर म्हारे ताहीं यीशु मसीह पै बिश्वास करण कै जरिये धर्मी बणावै सै, ना के मूसा नबी के नियम-कायदा ताहीं मानण तै। 29 परमेसवर सिर्फ यहूदियाँ ए का परमेसवर कोनी, पर वो गैर यहूदियाँ का भी परमेसवर सै। 30 क्यूँके एक ए परमेसवर सै, जो खतना आळा नै यीशु मसीह पै बिश्वास करण तै अर बिन-खतना आळा ताहीं भी, बिश्वास कै जरिये धर्मी बणावै सै। 31 तो के म्हारा बिश्वास नियम-कायदे नै बेकार बतावै सै? न्ही! बिल्कुल न्ही! बल्के इसके उल्ट ज़िब हम बिश्वास करा सां तो हम समझ जावां सां, के परमेसवर नै म्हारे ताहीं नियम-कायदा क्यूँ दिये।

## 4

### XXXXXXXXXX XXXXXXXXXXXXXXX

1 तो हम यहूदी होण के नाते म्हारे पूर्वज अब्राहम के बारे म्ह के कहवा। 2 जै अब्राहम आच्छे, काम्मां तै धर्मी बणाया जान्दा, तो वो इसका घमण्ड कर सकै था, पर वो परमेसवर के स्याम्ही आच्छे, काम्मां के जरिये घमण्ड न्ही कर सकदा। 3 पवित्र ग्रन्थ के कहवै सै? न्यू के “अब्राहम नै परमेसवर


के वादे पै विश्वास करया, अर परमेसवर नै उसके विश्वास के कारण उस ताहीं धर्मी बना दिया।<sup>4</sup> जो मेहनत करै सै उसकी मजदूरी नै ईनाम न्ही कहन्दे, बल्के वो तो उसका हक सै।<sup>5</sup> पर माणस काम्मा के जरिये धर्मी कोनी बनता, पर भगतिहीन माणस जो परमेसवर पै विश्वास करै सै उसके विश्वास के कारण वो धर्मी बणै सै।<sup>6</sup> जिसनै परमेसवर बिना काम्मा के धर्मी बनावै सै, पवित्र ग्रन्थ म्ह राजा दाऊद भी धन्य उस ताहीं कहवै सै।<sup>7</sup> “धन्य सै, वे जिनके अधर्म माफ होए, अर पाप भूला दिये गये।<sup>8</sup> धन्य सै वो माणस जिसके पापां का हिसाब परमेसवर न्ही राखदा।”<sup>9</sup> के या आशीष जिन माणसां का खतना हो लिया, उनके ए खात्तर सै, या जिनका खतना न्ही होया उन खात्तर भी सै? हम न्यू कह्वां सां, “अब्राहम नै परमेसवर पै विश्वास करया, अर परमेसवर नै उसके विश्वास के कारण उस ताहीं धर्मी बना दिया।”<sup>10</sup> तो यो कद होया? खतने की हालत म्ह या बिना खतने की हालत म्ह? खतने की हालत म्ह कोनी पर बिना खतने की हालत म्ह।<sup>11</sup> जिव अब्राहम का खतना न्ही होया था, जिव भी परमेसवर नै उस ताहीं स्वीकार करया, अर उस ताहीं धर्मी बनाया, खतने का निशान अब्राहम ताहीं अपनाण की छाप सै, इस करके अब्राहम उन माणसां का आत्मिक पूर्वज सै, जो विश्वास करै सै पर जिनका खतना न्ही होया, वो विश्वास के जरिये धर्मी बणे।<sup>12</sup> अर वो उन खतना करे होए माणसां का आत्मिक पूर्वज सै, जो ना सिर्फ खतना करे होए सै, पर उनका विश्वास उसाए हो जिसा उनके पूर्वज अब्राहम का तब था, जिव उसका खतना न्ही होया था।

### परमेसवर नै अब्राहम ताहीं अर उसके वंश ताहीं पूरी दुनिया देण का वादा करया, यो इस करके कोनी होया के अब्राहम नै नियम-कायदा ताहीं मान्या, क्यूँके उसनै परमेसवर पै विश्वास करया, इस बजह तै उसनै उस ताहीं धर्मी बना दिया।<sup>14</sup> अब्राहम अर उसके वंश ताहीं यो वादा इस खात्तर दिया गया, क्यूँके उननै नियम-कायदा ताहीं मान्या, तो विश्वास बेकार अर वादा झूट्टा लिकड़या।<sup>15</sup> परमेसवर का छो नियम-कायदा नै ना मानण आळा पै पड़े सै, अर जित्त नियम-कायदे कोनी ओड़े उसका उल्लंघन भी कोनी।

<sup>13</sup> परमेसवर नै अब्राहम ताहीं अर उसके वंश ताहीं पूरी दुनिया देण का वादा करया, यो इस करके कोनी होया के अब्राहम नै नियम-कायदा ताहीं मान्या, क्यूँके उसनै परमेसवर पै विश्वास करया, इस बजह तै उसनै उस ताहीं धर्मी बना दिया।<sup>14</sup> अब्राहम अर उसके वंश ताहीं यो वादा इस खात्तर दिया गया, क्यूँके उननै नियम-कायदा ताहीं मान्या, तो विश्वास बेकार अर वादा झूट्टा लिकड़या।<sup>15</sup> परमेसवर का छो नियम-कायदा नै ना मानण आळा पै पड़े सै, अर जित्त नियम-कायदे कोनी ओड़े उसका उल्लंघन भी कोनी।

<sup>16</sup> इस बजह तै वादा परमेसवर पै विश्वास करण तै मिलै सै, जो अनुग्रह के मुताबिक से, यो वादा अब्राहम के सारे वंशा ताहीं मिल्या सै, ना के सिर्फ उन ताहीं जो माणस मूसा नबी के नियम-कायदा नै मान्ने सै, पर उन माणसां के खात्तर भी जो अब्राहम की ढाळ परमेसवर पै विश्वास करै सै, क्यूँके अब्राहम ए म्हारे सारया का पूर्वज सै।<sup>17</sup> जिसा पवित्र ग्रन्थ म्ह लिख्या सै, “मन्ने तेरे ताहीं घणीए जात्तां का पूर्वज बनाया सै” परमेसवर की नजर म्ह अब्राहम म्हारा पूर्वज सै। उननै उस परमेसवर पै विश्वास करया, जो मरे होया नै जिन्दा करै सै, अर जो बात सै ए न्ही उनका नाम इसा लेवै सै के मान्ने वे सै।<sup>18-19</sup> परमेसवर नै अब्राहम तै कह्या, तेरे भोत-से वंश होवेंगे। पर अब्राहम नै सोच्या के बुढापे म्ह, मेरै किस तरियां ऊलाद पैदा होगी? क्यूँके वो तकरीबन सौ साल का हो लिया था, अर सारा भी बूढ़ी होण के कारण बच्चे पैदा कोनी कर सके थी। इन सारी वात्तां तै साफ जाहिर था, के उसके भोत-से वंशज न्ही हो सकदे, तोभी अब्राहम का विश्वास कमजोर न्ही होया, वो परमेसवर के वादे पै विश्वास करदा रह्या, अर उसनै आस न्ही तोड़ी।<sup>20</sup> अर ना ए अविश्वासी होकै परमेसवर के वादा पै शक करया, पर विश्वास म्ह पक्का होकै उसकी महिमा करी।<sup>21</sup> अर पक्के तौर पै जाणया के जिस बात का परमेसवर नै वादा करया सै, वो उसनै पूरा करण म्ह भी सामर्थी सै।<sup>22</sup> अर परमेसवर नै उसके विश्वास के कारण उस ताहीं धर्मी बना दिया।<sup>23</sup> अर पवित्र ग्रन्थ के इस वचन नै, “विश्वास के कारण उस ताहीं धर्मी बना दिया।,” ना सिर्फ यो वचन अब्राहम के खात्तर लिख्या गया,<sup>24</sup> बल्के म्हारै खात्तर भी जिनके खात्तर लिख्या गया, जो विश्वास के जरिये धर्मी बण जावैगा, यानिके के म्हारै खात्तर, जो उसपे विश्वास करा सां, जिसनै म्हारै प्रभु यीशु ताहीं मरे होया म्ह तै जिन्दा करया।<sup>25</sup> यीशु मसीह म्हारै अपराध्या के खात्तर पकड़वाया अर मारा भी गया, अर म्हारै ताहीं धर्मी बनाण के खात्तर परमेसवर नै उस ताहीं जिन्दा कर दिया।

## 5



1 इस करके जिव हम मसीह पै विश्वास करण तै धर्मी बणा दिए गये सां, तो परमेसवर तै म्हारा मेळ-मिलाप अपणे प्रभु यीशु मसीह के जरिये हो लिया। 2 विश्वास के जरिये मसीह नै म्हारी पोहच पिता के उस अनुग्रह तक कर दी सै। उस अनुग्रह म्ह हम बणे होए सां, अर परमेसवर की महिमा की आस म्ह खुश सां। 3 सिर्फ योए न्ही, बल्के हम मुसीबतां म्ह भी खुश रहवां, न्यू जाणके के मुसीबतां तै धीरज, 4 धीरज तै खरयां लिकड़णा, अर खरे लिकड़ण तै आस होवै सै। 5 अर आस तै निराशा न्ही होन्दी, क्यूके पवित्र आत्मा जो परमेसवर नै म्हारे ताहीं दिया सै, उसके जरिये परमेसवर का प्यार म्हारे मन म्ह भरया गया सै। 6 क्यूके जिव हम कमजोर थे, तो मसीह परमेसवर के बताये गये सही बखत पै बुरे माणसां के खात्तर मरया। 7 किसे धर्मी माणस के खात्तर कोए जान देवै यो तो मुश्किल सै, पर शायद कोए भले माणस खात्तर जान देण खात्तर तैयार हो सके सै। 8 पर परमेसवर म्हारे पै अपणे प्यार की भलाई इस तरियां तै साबित करै सै, के जिव हम पापी ए थे, जिब्बे मसीह यीशु म्हारे खात्तर मरया। 9 जिव के इब यीशु के लहू बहाण के कारण परमेसवर नै म्हारे ताहीं अपणी नजर म्ह धर्मी बणाया सै, तो उसके जरिये परमेसवर के छो तै क्याते न्ही बचांगे? 10 क्यूके जिव हम परमेसवर के बैरी थे, तो उसके बेटटे की मौत के जरिये म्हारा मेळ-मिलाप परमेसवर के गेल्या होया, अर सब तै आच्छी बात या सै, के मेळ-मिलाप हो जाण के कारण उसके बेटटे यीशु मसीह के जरिये दिए गये जीवन के कारण म्हारा उद्धार पक्का सै। 11 इब तो म्हारे प्रभु यीशु मसीह के जरिये, परमेसवर म्ह म्हारा मेळ-मिलाप होगया सै, इस खात्तर हम उस म्ह खुश सां।



12 परमेसवर नै एक माणस आदम बणाया, जिसके कारण दुनिया म्ह पाप आया, अर उस पाप के कारण मौत आई, अर इस तरियां तै मौत सारे माणसां म्ह फैलगी, क्यूके आदम के वंश होण के कारण सब पापी बणगे। 13 मूसा नबी के नियम-कायदा के दिए जाण तै पैहले भी, दुनिया म्ह माणस पाप करै थे, पर वो पाप गिण्या कोनी जावै था, क्यूके ओडै नियम-कायदे कोनी थे, जिन ताहीं तोड्या जा सके। 14 तोभी आदम तै लेके मूसा नबी तक सब नै मौत आई। जिस तरियां आदम नै परमेसवर के हुकम ताहीं तोड्या उसकी तरियां हमनै उसके हुकम ताहीं न्ही तोड़ा, अर आदम यीशु मसीह का नमूना था जो आण आळा था। 15 पर आदम के अपराध अर परमेसवर के अनुग्रह के वरदान के बीच म्ह एक भोत बड़ा अन्तर सै, क्यूके जब एक माणस आदम, के अपराध करण के कारण, भोत-से माणसां की मौत होई, पर दुसरे माणस यीशु मसीह के जरिये, परमेसवर का अनुग्रह भोत-से माणसां पै होया सै। 16 तो परमेसवर के वरदान का नतिज्जा आदम के पाप तै भोत अलग सै। उसका पाप दण्ड लेके आवै सै, पर परमेसवर का वरदान म्हारे ताहीं धर्मी बणावै सै, भलाए हम कई पापां के दोषी क्यू ना हो। 17 क्यूके एक माणस के अपराध के कारण सब नै मौत आई। पर इसतै ज्यादा परमेसवर का अनुग्रह अर धार्मिकता का वरदान सै, जो उस ताहीं पावै सै, वो पाप अर मौत पै यीशु मसीह के जरिये जयवन्त होवै सै, अर वे उसके गैल अनन्त जीवन म्ह राज करैंगे।

18 जिस तरियां आदम का अपराध, सारे माणसां के खात्तर दण्ड लेके आया, ठीक उससे तरियां ए मसीह यीशु के धार्मिकता के काम करण तै, सारे माणसां नै जिन्दगी मिली, अर वे परमेसवर की नजर म्ह धर्मी बणै। 19 क्यूके जिसा एक माणस के हुकम ना मानण तै भोत-से माणस पापी बणे, उससे तरियां ए एक माणस के हुकम मानण तै भोत-से माणस धर्मी बणैंगे। 20 मूसा के नियम-कायदे म्हारे ताहीं इस खात्तर दिए गये, ताके माणस देख सके के वे कितने पापी सै पर जिव माणस पाप पै पाप करै सै, तो ओडै परमेसवर का अनुग्रह उसतै भी घणा होया करै। 21 सारे माणसां नै पाप पै पाप करया, अर वे मरगे, पर म्हारे प्रभु यीशु मसीह के जरिये परमेसवर का अनुग्रह हमनै धर्मी बणावै सै, अर म्हारे ताहीं अनन्त जीवन देवै सै।





## 7

~~~~~

1 हे विश्वासी भाईयो, थमने बेरा से, (मै नियम-कायदे के जाणण आळा तै कहूँ सूँ) के जिब ताहीं माणस जिन्दा रहवै सै, तब तक उसने नियम-कायदे मानने पड़ैगे। 2 उदाहरण के तौर पै एक ब्याता लुगाई नै मरते दम तक नियम-कायदे के मुताबिक अपणे धणी के साथ रहणा चाहिये, पर जै धणी मर जा, तो वा धणी के नियम-कायदे तै आजाद हो जा सै। 3 ज्यातै जै धणी के जिन्दे जी वा किसे दुसरे माणस की हो जावै, तो जार कुह्वावैगी, पर जै धणी मर ज्या, तो वा उस नियम-कायदे तै आजाद हो जा सै, उरै ताहीं के जै किसे दुसरे माणस की हो जावै तोभी जार कोनी ठैहरैगी। 4 उससे तरियां ए हे मेरे विश्वासी भाईयो, जिब थम मसीह के साथ मरगे, तो थम नियम-कायदा खात्तर मरगे, इब थम मसीह के हो, जो मेरे होया म्ह तै जिन्दा उठ्या, ताके हम परमेसवर के खात्तर धार्मिक जीवन जी सका। 5 क्यूँके जिब हम अपणे देह की इच्छा के मुताबिक जिवां सां, तो पाप की लालसा म्हारै अंगा म्ह काम करै सै, अर नियम-कायदे ए उन लालसा नै उजागर करके मौत नै लेके आवै सै। 6 हम नियम-कायदा खात्तर मरगे जिसके बन्धन म्ह हम पैहले थे। इब हम पवित्तर आत्मा की मानके, नये सिरे तै परमेसवर की सेवा कर सकां सां।

~~~~~

7 तो हम के कहुँ? के मूसा नबी के नियम-कायदे पाप सै? न्ही! बिलकुल न्ही! बल्के नियम-कायदा ए सै, जो मेरे ताहीं बतावै सै, के पाप के सै! जै नियम-कायदे न्ही कहन्दे, के लालच मतना करै तो मै लालच नै जाण ए न्ही पान्दा। 8 पर पाप नै मौक्का पाके, हुकम के जरिये मेरे म्ह सारी तरियां का लालच पैदा करया, क्यूँके बिना नियम-कायदे पाप मुर्दा सै। 9 एक बखत था जिब मै मूसा नबी के नियम-कायदे बिना जीऊँ था, पर जिब मन्नै मूसा नबी के नियम-कायदा ताहीं जाणया, तो मेरे म्ह पाप करण की इच्छा होण लागगी, अर मै मेरे होया जिसा होगया। 10 अर वो हुकम जिसतै मन्नै जिन्दगी मिलणी थी वो मेरी आत्मिक मौत का कारण बणया। 11 क्यूँके पाप नै मौक्का पाके हुकम के जरिये मेरे ताहीं भकाया, अर उससे के जरिये मेरी आत्मिक मौत भी हो गई। 12 ज्यातै हम यो नतिज्जा लिकाड़ा सां, के नियम-कायदे पवित्तर सै, अर हुकम पवित्तर, धर्मी अर खरया सै। 13 तो के मूसा नबी के नियम-कायदे जो खरे थे, मेरे खात्तर मौत लेके आये? न्ही! बिलकुल न्ही! यो पाप ए था जिसने इसा करया। पर नियम-कायदे जो खरे थे, मेरे खात्तर मौत लेके आये, ताके पाप की असलियत जाहिर हो जा, अर हुकम दिखावै सै के पाप घणाए बुरा सै।

~~~~~

14 क्यूँके हमने बेरा से, के मूसा नबी के नियम-कायदे तो आत्मिक सै, पर मै शारीरिक सूँ, अर पाप का गुलाम सूँ। 15 अर जो मै करूँ सूँ, उस ताहीं कोनी जाण्दा, क्यूँके जो मै चाहूँ सूँ, वो न्ही करया करदा, पर जिसतै मन्नै घृणा आवै सै वोए करै सूँ। 16 जै जो मै न्ही चाहन्दा वोए बुरे काम करूँ सूँ, तो मै मान ल्यूँ सूँ, के मूसा नबी के नियम-कायदे खरे सै। 17 तो इसी हालत म्ह जो मेरे म्ह बुरे काम करै सै, वो मै न्ही, बल्के पाप सै, जो मेरे म्ह बस्या होया सै। 18 क्यूँके मन्नै बेरा सै के मेरे म्ह यानिके मेरे पापी सुभाव म्ह कोए आच्छी चीज वास कोनी कर दी। मेरा जी तो भले काम करण की इच्छा तो करै सै, पर भले काम मेरे तै बणदे कोनी। 19 क्यूँके जिस आच्छे काम करण नै मेरा जी करै सै, वो तो कोनी करदा, पर जो बुरे काम करणा न्ही चाहन्दा, वोए करूँ सूँ। 20 इस करके जै मै वोए करूँ सूँ जो न्ही चाहन्दा, तो उसका करण आळा मै कोनी रहया, पर पाप सै जो मेरे भित्तर म्ह बस रहया सै। 21 इस तरियां तै मन्नै सच का बेरा पटै सै, के जिब मै भलाई करण की इच्छा करूँ सूँ, तो बुराई ए करूँ सूँ। 22 क्यूँके मै भीतरी माणस-पण तै तो परमेसवर के नियम-कायदे तै घणा खुश रहूँ सूँ। 23 पर मेरे भित्तर एक नियम-कायदा की शक्ति काम करण लागरी सै, जो मेरी पापी अन्तरात्मा तै युध्द करै सै। या नियम-कायदा की शक्ति मेरी अन्तरात्मा नै पाप का गुलाम बणावै सै जो इब भी मेरी

देह म्ह सै। <sup>24</sup>मै किसा निरभागा माणस सूं! मन्नै इस पापी सुभाव तै जो मौत लेके आवै सै, कौण छुड़ावैगा? <sup>25</sup>म्हारे प्रभु यीशु मसीह के जरिये परमेसवर का धन्यवाद होवै। ज्यांतै मै अपनी समझ तै तो परमेसवर के नियम-कायदे नै मानना चाहूँ सूं, पर पापी सुभाव के कारण मै पाप का गुलाम सूं।

## 8

XXXXXXXXXX XX XXXXXXXX XXXX

<sup>1</sup> इस करके इब जो मसीह यीशु पै विश्वास करै सै, उनपै दण्ड का हुकम कोनी। <sup>2</sup>क्यूँके पवित्र आत्मा थमनै वा जिन्दगी देवैगा, जो मसीह यीशु की ओड़ तै आवै सै, अर वो थारे ताहीं पाप अर मौत तै आजाद करै सै। <sup>3</sup>क्यूँके जो काम मूसा नबी के नियम-कायदे पापी सुभाव के कारण देह म्ह न्ही कर सके, उस ताहीं परमेसवर नै करया, यानिके अपणे ए बेटे ताहीं इन्सान के रूप म्ह पापबलि होण के खात्तर भेज दिया, परमेसवर नै पाप की शक्ति ताहीं अपणे बेटे की देह के बलिदान के जरिये तोड़ दिया। <sup>4</sup>ज्यांतै के मूसा नबी के नियम-कायदे की विधि म्हारे म्ह पूरी करी जावै, जो पापी सुभाव के मुताबिक न्ही, बल्के पवित्र आत्मा के मुताबिक चाल्लै सै, <sup>5</sup>क्यूँके जो अपणे पापी सुभाव के कारण चाल्लै सै, वो बुरी चिज्जां के बारे म्ह सोचै सै, पर जो-जो पवित्र आत्मा के जरिये चाल्लै सै, वो उन चिज्जां के बारे म्ह सोचै सै, जो पवित्र आत्मा ताहीं खुश करै सै। <sup>6</sup>जै थम अपनी पापमय लालसा के मुताबिक चाल्लोंगे तो मरोगे, पर पवित्र आत्मा के कहे मुताबिक चाल्लोंगे तो जिन्दगी अर शान्ति पाओगे। <sup>7</sup>क्यूँके पापमय लालसा के मुताबिक चालणा तो परमेसवर तै बैर राखणा सै, क्यूँके ना तो वो परमेसवर के नियम-कायदे के अधीन सै अर ना कदे हो सके सै। <sup>8</sup>अर जो पापमय लालसा के मुताबिक चाल्लै सै, वे परमेसवर नै खुश न्ही कर सकदे।

<sup>9</sup>पर जब के परमेसवर का पवित्र आत्मा थारे म्ह बसै सै, तो थम पापमय लालसा के मुताबिक न्ही पर पवित्र आत्मा के कहे मुताबिक चाल्लों। जै किसे म्ह मसीह का आत्मा कोनी चाल्दा तो वो परमेसवर का माणस कोनी। <sup>10</sup>जै मसीह थारे म्ह वास करै सै, तो पाप के कारण देह मरी होई सै, पर धार्मिकता के कारण थारी आत्मा जिन्दा सै। <sup>11</sup>जै परमेसवर का आत्मा जिसनै मसीह यीशु ताहीं मरे होया म्ह तै जिन्दा करया, थारे म्ह बस्या होया सै, तो जिसनै मसीह ताहीं मरे होया म्ह तै जिन्दा करया, वो थारी नाश होण आळी देह नै भी अपणे पवित्र आत्मा के जरिये जिन्दा करैगा, जो थारे म्ह बस्या होया सै।

<sup>12</sup>इस करके हे विश्वासी भाईयो, हम पापी सुभाव के कर्जदार कोनी के हम इसके मुताबिक बरताव करां। <sup>13</sup>क्यूँके जै थम पापी सुभाव के मुताबिक जीओगे, तो मरोगे जै पवित्र आत्मा तै पापमय लालसा के काम्मां नै मारोगे तो जिन्दे रहोगे। <sup>14</sup>ज्यांतै के जितने माणस परमेसवर के आत्मा के चलाए चाल्लै सै, वैए परमेसवर की ऊलाद सै। <sup>15</sup>क्यूँके थारे ताहीं गुलामी की आत्मा कोनी दी गई, के थम डरो, पर पवित्र आत्मा हमनै परमेसवर की ऊलाद बणावे सै, जिसतै हम हे अब्बा, हे पिता कहके बोल्लां सां। <sup>16</sup>पवित्र आत्मा आप ए म्हारी आत्मा के गेल्या गवाही देवे सै, के हम परमेसवर की ऊलाद सां, <sup>17</sup>अर जै ऊलाद सां तो वारिस भी, बल्के परमेसवर के वारिस अर मसीह के संगी वारिस सां, अगर हम मसीह के ढाळ दुख ठावांगे, तो हम उसकी महिमा म्ह भी शामिल हो पावांगे।

XX XX XX XX XXXXXXXX XX XXXXXXX

<sup>18</sup>मन्नै पक्का यकिन सै, के इस बखत के दुख अर क्लेश उस महिमा के स्याम्ही, उस महिमा के समान जो प्रभु म्हारे ताहीं देवैगा, किमे भी कोनी सै। <sup>19</sup>क्यूँके सृष्टि की सारी चिज्जे घणी उम्मीद भरी निगांह तै परमेसवर की ऊलाद की बाट देखण लागरी सै। <sup>20</sup>परमेसवर की बणाई गई हर एक चीज नै अपणे मकसद ताहीं खो दिया सै, यो इस करके न्ही के सृष्टि खुद चाहवै थी, पर परमेसवर नै इसा करया, पर फेर भी आस सै। <sup>21</sup>सृष्टि भी खुद उस दिन की बाट देखै सै, जब वो मौत अर विनाश की गुलामी तै छुटकारा पाके, परमेसवर की महिमा म्ह उसकी ऊलाद के साथ शामिल होवैगे। <sup>22</sup>क्यूँके हमनै बेरा सै के सारी सृष्टि इब ताहीं मिलके कराहती अर दर्दा म्ह पड़ी, उस जनानी

की तरियां सै, जिसा बच्चा होण तै पैहले दर्दां म्ह तड़फै सै। 23 अर सिर्फ परमेसवर की बणाई सृष्टि ए न्ही, पर हम भी जिस म्ह होण आळी महिमा के पैहले तै स्वाद चखण के रूप म्ह पवित्र आत्मा का वास सै, हम खुद भी अपने-आप म्ह कराहवा सां। यो जिब्वे होगा जिब हम देह तै आजाद होवांगे, अर परमेसवर हमनै अपनी ऊलाद बणाण के खात्तर अपनावै। 24 आण आळी महिमा की आस के जरिये ए थारा उद्धार होया सै, जै थम उन चिज्जां की आस राक्खों सों जो थारे धारे पैहले तै सै, तो थारी आस धरणा बेकार सै, कोए भी उस चीज की आस कोनी राखदा, जो उसके धारे पैहले तै सै। 25 हम उन चिज्जां की आस करां सां, जो म्हारे धारे इब ताहीं सै कोनी, तो हम धीरज तै बाट देक्खां सां, जिब तक वो चीज हमने मिल ना जावै।

26 प्रार्थना करण खात्तर म्हारे धारे बुद्धि कोनी, पर पवित्र आत्मा म्हारी मदद करै सै, क्यूँके हमनै न्ही बेरा के किन बातों के खात्तर प्रार्थना करणी चाहिये, पर पवित्र आत्मा आप्पे इसी आह भर-भरके, जो बयान तै बाहरणे सै, म्हारे खात्तर बिनती करै सै। 27 परमेसवर जो मनां का जाँचण आळा सै उसने बेरा सै, के पवित्र आत्मा का मकसद के सै? क्यूँके वो पवित्र माणसां के खात्तर परमेसवर की मर्जी के मुताबिक बिनती करै सै।

28 हमनै बेरा सै के जो माणस परमेसवर तै प्यार राक्खै सै, उनके खात्तर सारी बात मिलके भलाई ए नै पैदा करै सै, यानिके उनके खात्तर जो उसकी मर्जी के मुताबिक चुणे होए सै। 29 क्यूँके जिन ताहीं परमेसवर नै पैहल्या तै चुण्या होया सै, उन ताहीं उसके बेटटे यीशु मसीह जिसे बणण खात्तर ठहराया भी सै, ताके वो घणे भाईयां म्ह पैहलड़ा यानी जेटटा बणै। 30 फेर जिन माणसां ताहीं उसने पैहल्या तै ठहराया, उन ताहीं चुण्या भी, अर जिन ताहीं चुण्या, उन ताहीं धर्मी भी बणाया सै, अर जिन ताहीं धर्मी बणाया, उन ताहीं अपनी महिमा म्ह भागीदारी भी बणाया सै।

### XXXXXXXX XX XXXX XXXXXX XXX XXXXX

31 तो इन बातों तै हम यो नतिज्जां लिकाड़ा सां, जै परमेसवर म्हारी कान्ही सै, हमनै कौण हरा सके सै? 32 परमेसवर वो सै जिसने अपने खुद के बेटटे ताहीं भी म्हारे खात्तर बलिदान करण म्ह कोए संकोच कोनी करया, तो जो उसने म्हारे तै वादा करया सै, वो सारा कुछ म्हारे ताहीं क्यूँ न्ही देवैगा? 33 कोए भी हमने परमेसवर के स्याम्ही दोषी न्ही ठैहरा सकता? परमेसवर ए सै जो म्हारे ताहीं धर्मी बणावै सै। 34 कोए भी हमने दोषी न्ही ठैहरा सकता? क्यूँके यीशु मसीह ए सै, जो मरया बल्के मुदां म्ह तै जिन्दा भी उठया, अर परमेसवर के सोळी ओड़ सै, अर म्हारे खात्तर बिनती भी करै सै। 35 कौण हमने मसीह के प्यार तै न्यारा करैगा? के कळेण, संकट, उपद्रव, अकाळ, नंगाई, जोखम, या तलवार? 36 जिसा पवित्र ग्रन्थ म्ह लिख्या सै, “तेरे खात्तर लोग हमने रोज माणस की धमकी देवै सै, हम मरण आळी भेड़ों की तरियां समझे गये सां।” 37 पर इन सारी बातों म्ह हम उसके जरिये जिसने म्हारे तै प्यार करया सै, जयवन्त तै भी बाध सै। 38-39 क्यूँके मै जाणुं सूं, के कोए भी चीज मसीह नै म्हारे तै प्यार करण तै न्ही रोक सकदी। इसतै कोए फर्क न्ही पड़ता के चाहे हम जिवां या मरा, सुगंदूत, प्रधानताएँ, शक्तियाँ जो सुगं म्ह सै इन म्ह तै कोए भी हमने मसीह के प्यार तै अलग न्ही कर सकदी, अर इब जो होण लागरया सै, जो भविष्य म्ह होण आळा सै, गहराई, ऊँचाई हमने परमेसवर के प्यार तै, जो म्हारे प्रभु यीशु मसीह म्ह सै अलग न्ही कर सकदी।

## 9

### XXXXXXXX XX XXXX XXXXXX XXX XXXXX

1-3 जै कोए भी चीज हमने परमेसवर के प्यार तै अलग न्ही कर सकदी, तो क्यूँ इस्राएली, मेरे यहूदी भाई परमेसवर तै दूर सै? मेरा मन उन खात्तर भोत दुखी सै, जै उन माणसां के छुटकारे खात्तर मेरे उप्पर चाहे दोष भी लगाये जावै या मसीह तै अलग करया जावै, तो भी मै इसके खात्तर तैयार सूं, अर मै मसीह नै गवाह मानते होए सच बोल्नु सूं, पवित्र आत्मा अर मेरी अन्तरात्मा भी या गवाही देवै सै के मै झूठ कोनी बोल्दा। 4 वे इस्राएल देश के माणस सै, अर वे परमेसवर के गोद लिये होड़ माणस सै, अर महिमा, करार, नियम-कायदे अर परमेसवर की आराधना करण का हक अर वादे

उन्हे के सै। 5 अब्राहम, इसहाक, याकूब ये सारे पूर्वज भी उन्हे के सै, अर मसीह भी देह के भाव तै उन्हे म्ह तै इस्राएली सै। जो सारया के उप्पर परम परमेश्वर सै, युगानयुग धन्य हो। आमीन।

6 पर इसा कोनी के परमेश्वर अपणे वादे तै मुकर गया, ज्यातै के जो इस्राएल के वंशज सै, वे सारे सच्चे इस्राएली कोनी। 7 अर ना अब्राहम का वंश होण के कारण सारे उसकी सच्ची ऊलाद होगी, पर पवित्र ग्रन्थ म्ह लिख्या सै, “इसहाक के वंश म्ह जन्म लेण तै ए सारे उसकी सच्ची ऊलाद न्ही हो जान्दी।” 8 यानिके जो दुनियावी तौर पै शारीरिक रूप तै जन्मे होए परमेश्वर की ऊलाद कोनी, पर वायदे की ऊलाद सै। 9 क्यूँके वादे का वचन यो सै: “आगले साल मै इस्से बखत दुबारा आऊँगा, अर तब सारा के एक बेटा पैदा होवैगा।” 10 अर सिर्फ योए न्ही, पर जिब रिबका के गर्भ म्ह एक ए आदमी यानिके म्हारै पूर्वज इसहाक तै जुड़वां बाळक पैदा होए। 11-12 इब तै पैहले के वो पैदा होते अर कुछ बुरा या भला काम जाणते, परमेश्वर नै रिबका तै कह दिया था के “जेट्टा बेटा छोट्टे का गुलाम होवैगा,” परमेश्वर नै यो दिक्खण के खात्तर कह्या था, वो अपणे मन की इच्छा तै खुद चुनाव करै सै, ना के उनके भले या बुरे काम्मां तै। 13 जिसा पवित्र ग्रन्थ म्ह लिख्या सै, “मन्नै एसाव तै बढकै याकूब ताहीं घणा प्यार करया।”

14 ज्यातै हम के कह्वां? के परमेश्वर की अपणी इच्छा तै चुनाव करणा अन्याय सै? न्ही! बिलकुल न्ही! 15 क्यूँके परमेश्वर मूसा नबी तै कहवै सै, “मै जिस किस पै दया करणा चाहूँ, उसपै दया करूँगा, अर जिस किस पै तरस खाणा चाहूँ उससे पै तरस खाऊँगा।” 16 इस करके परमेश्वर उस ताहीं चुणै सै, जिसके उप्पर वो दया दिखाणा चाहवै सै, उसका चुनाव इस बात पै आधारित कोनी, के लोग के चाहवै सै, अर वे के करण की कोशिश करै सै। 17 क्यूँके पवित्र ग्रन्थ म्ह परमेश्वर नै फिरौन (मिस्र के राजा) तै कह्या, “मन्नै तेरे ताहीं ज्या ए तै राजा बणाया सै, के तेरे म्ह अपणी सामर्थ दिखाऊँ, अर मेरै नाम का प्रचार सारी धरती पै होवै।” 18 इस करके वो जिसपै चाहवै सै उसपै दया करै सै, अर जिस ताहीं चाहवै सै उस ताहीं हठील्ला बणा देवै सै।

?????? ? ? ? ? ? ? ? ? ? ?


19 तब घणखरे माणस मेरै तै कहवैगें, “जै इसा सै, तो परमेश्वर किस तरियां कह सके सै, के हम गलत सां? क्यूँके परमेश्वर जो करणा चाहवै सै उसनै करण तै कौण रोक सके सै?” 20 हे भले माणस, भला तू कौण सै जो परमेश्वर तै वाद-विवाद करै? के बणाई होई चीज बणाण आळे तै कह सके सै, “तन्नै मेरै ताहीं इसा क्यातै बणाया सै?” 21 के कुम्हार ताहीं माट्टी पै हक कोनी के एक ए लोदे म्ह तै एक बासण आदर के खात्तर, अर दुसरे ताहीं अनादर के खात्तर बणावै? 22-23 परमेश्वर अपणा छो अर अपणी सामर्थ उनके विरुध्द दिखाणा चाहवै सै, जो नाश ए होण लायक सै, पर वो धीरज धरे सै क्यूँके वो दिखाणा चाहवै सै के वो कितना महान् सै, वो उन माणसां पै दया करै सै, जिन ताहीं उसनै अपणी महिमा म्ह साँझा करण खात्तर चुण्या सै। 24 यानिके म्हारै पै जिन ताहीं उसनै ना सिर्फ यहूदी माणसां म्ह तै, बल्के गैर यहूदियाँ म्ह तै भी चुण्या। 25 जिसा के वो होशे नबी की किताब म्ह भी गैर यहूदियाँ के बारे म्ह कहवै सै, “जो मेरी प्रजा कोनी थी, उन ताहीं मै अपणी प्रजा कहूँगा, अर जिनतै मै प्यार न्ही करूँ था, उन ताहीं प्यार करूँगा।” 26 अर जिस जगहां पै परमेश्वर नै इसा कह्या था, के थम मेरी प्रजा कोनी सो, उससे जगहां पै परमेश्वर उन ताहीं अपणी ऊलाद कहवैगा।” 27 अर यशायाह नबी इस्राएल के माणसां के बारे म्ह रुक्का मारके कहवै सै, “चाहे इस्राएल की ऊलादां की गिणती समुन्दर के बालू के बराबर हो, तोभी उन म्ह तै थोड़े ए बचैगें।” 28 क्यूँके परमेश्वर धरती पै तावळा-ए आवैगा, अर एक बार म्ह ए सबका न्याय करैगा।” 29 जिसा यशायाह नबी नै पैहल्या भी कह्या था, “जै सेनाओं का प्रभु म्हारै खात्तर कुछ वंश न्ही छोड़दा, तो म्हारी हालत सदोम अर अमोरा नगर के जिसी हो जान्दी, जिस ताहीं परमेश्वर नै पूरी तरियां तै नाश कर दिया।”

?????? ? ? ? ? ? ? ? ? ? ?

30 ज्योंतै हम के कहां? गैर यहूदियाँ नै अपने-आप ताहीं धर्मी बणाण की कोशिश न्ही करी, पर परमेसवर नै मसीह यीशु पै विश्वास करण के कारण उन ताहीं धर्मी बणा दिया। 31 जो इस्राएली मूसा नबी के नियम-कायदा नै मानके धर्मी बणाणा चाहवै थे वे धर्मी न्ही बण पाये। 32 यो किस तरियां हो सकै सै? इस करके के वे विश्वास तै न्ही, पर मान्नों आच्छे काम्मां तै धर्मी बणाणा चाहवै थे। उननै उस ठोक्कर के पत्थर पै ठोक्कर खाई, 33 जिसा पवित्र ग्रन्थ यीशु मसीह के बारे कहवै सै, “देक्खो, मै यरुशलैम नगर म्ह एक टेस लाग्गण का पत्थर, अर ठोक्कर खाण की चट्टान राक्खूं सूं, अर जो कोए उसपै विश्वास करैगा वो शर्मिन्दा कोनी होवैगा।”

## 10

1 हे विश्वासी भाईयो, मेरै मन की इच्छा अर मेरै यहूदी माणसां खात्तर, परमेसवर तै मेरी याए प्रार्थना सै के वे बचाए जावै। 2 क्यूँके मै उनकी गवाही दूं सूं, के उन ताहीं परमेसवर के खात्तर उत्साह रहवै सै, पर सही समझके गेल्या न्ही। 3 क्यूँके वा धार्मिकता जो परमेसवर की ओइ तै आवै सै, उस ताहीं वे समझण म्ह नाकामयाब रहे अर अपने तरिकके तै धर्मी बणाण की कोशिश करी, वे परमेसवर की धार्मिकता के अधीन न्ही होए। 4 क्यूँके मसीह नै पैहले तै ए उस मकसद ताहीं पूरा कर लिया सै। जिस खात्तर नियम-कायदे दिए गये थे, उसका नतिज्जां यो होया के जो यीशु मसीह पै विश्वास करै सै वो धर्मी बणाए जावेंगे।



5 क्यूँके मूसा नबी ने नियम-कायदा तै धर्मी बणाण के बारे म्ह पवित्र ग्रन्थ म्ह यो लिख्या सै, के जो माणस उननै मान्ने सै, वो इस्से कारण तै जिन्दा रहवैगा। 6 पर विश्वास के जरिये धर्मी बणाये जाण के बारे म्ह पवित्र ग्रन्थ या कहवै सै, के “तू अपने मन म्ह न्यू ना कहिये, के मसीह ताहीं नीच्चे ल्याण खात्तर सुर्ग पै कौण चढ़ेगा?” 7 या “अधोलोक म्ह कौण उतरेगा?” (यानिके मसीह ताहीं मरे होया म्ह तै जिन्दा उप्पर लाण के खात्तर!) 8 पर के कहवै सै, योए के “परमेसवर का वचन तेरे धारे सै, ताके तू उसनै अपने मुँह तै अंगीकार कर सकै अर अपने मन म्ह राक्ख सकै,” यो वोए विश्वास का वचन सै, जो हम प्रचार करा सां। 9 जै तू माणसां के स्याम्ही यीशु नै प्रभु मान ले, अर अपने मन तै विश्वास करै के परमेसवर नै उस ताहीं मरे होया म्ह तै जिन्दा करया, तो परमेसवर तन्ने बचावैगा। 10 क्यूँके हम अपने मन तै विश्वास करां सां, तो हम परमेसवर के जरिये धर्मी बणाए जावै सै, अर हम मुँह तै अंगीकार करां सां, के हम मसीह पै विश्वास करां सां, तो इस करके हम बच जावांगे। 11 क्यूँके यशायाह नै पवित्र ग्रन्थ म्ह मसीह के बारे म्ह यो लिख्या सै, “जो कोए उसपै विश्वास करैगा वो शर्मिन्दा कोनी होवैगा।” 12 यहूदियाँ अर यूनानियाँ म्ह किमे फर्क कोनी, ज्योंतै के परमेसवर सारया का प्रभु सै, जो उसका नाम लेवै सै उस ताहीं वो बचावै सै। 13 क्यूँके पवित्र ग्रन्थ म्ह लिख्या सै के “जो कोए प्रभु का नाम लेवैगा, वो बचाया जावैगा।”

14 पर जिन माणसां नै मसीह पै विश्वास न्ही करया, तो वे उसनै मदद खात्तर किस तरियां पुकारेंगे? अर जिसके बारे म्ह सुण्या न्ही उसपै किस तरियां विश्वास करेंगे? अर वे किस तरियां सुणेंगे जब तक कोए प्रचारक ना जावै। 15 जै प्रचारक भेज्जे ना जावै, तो किस तरियां प्रचार करै? जिसा पवित्र ग्रन्थ म्ह लिख्या सै, “जो आच्छी बाततां का सुसमाचार लेके आवै सै, उनके पाँव कितने सुहावने सै।” 16 पर सारया नै उस सुसमाचार पै विश्वास कोनी करया जिसा यशायाह नबी कहवै सै, “हे प्रभु, किस्से नै भी म्हारै सन्देश पै विश्वास न्ही करया?” 17 पर मसीह के बारे म्ह वचन सुणण तै विश्वास होवै सै। 18 पर मै पूच्छु सूं, के यहूदियाँ नै, मसीह के बारे म्ह न्ही सुण्या? सुण्या तो जरूर सै, क्यूँके पवित्र ग्रन्थ म्ह लिख्या सै, “उनके बोल साबती धरती पै, अर उनके वचन दुनिया के कुणे ताहीं पोहोचगे सै।” 19 फेर मै पूच्छु सूं, के इस्राएली लोग मसीह के बारे म्ह सन्देश ताहीं समझै सै? पैहल्या तो प्रभु नै मूसा नबी के जरिये यो कह्या, “मै उन गैर यहूदियाँ के जरिये धारे मन म्ह जळण पैदा करुंगा, मै थमनै यहूदियाँ के जरिये मूखं समझण आठे माणसां तै गुस्सा दिलाऊंगा।”

20 फेर जो बात प्रभु नै कही वा बात यशायाह नबी बड़ी हिम्मत करके कहवै सै, “जो मन्ने न्ही टोहवै थे, उननै मेरै ताहीं पा लिया, अर जो मन्ने बुद्धझै भी कोनी थे, उनपै मै जाहिर होया ।” 21 पर इस्राएल देश के माणसां के बारे म्ह, परमेसवर यशायाह नबी के जरिये न्यु भी कहवै सै, “मै सारा दिन अपणे हाथ, एक हुकम ना मानण आळी अर विवाद करण आळी प्रजा के कान्ही पसारे रहया ।”

## 11

?????? ? ? ? ? ? ? ? ? ? ? ? ? ? ? ? ? ? ?

1 ज्यांते मै पूच्छु सू, के परमेसवर नै अपणी प्रजा ताहीं छोड़ दिया? न्ही! बिलकुल न्ही! मै भी तो इस्राएली सू, मै अब्राहम की पीढ़ी अर बिन्यामीन कै गोत्र म्ह तै सू । 2 परमेसवर नै अपणी उस प्रजा ताहीं कोनी छोड़्या, जिस ताहीं उसनै पैहल्याए तै चुण्या सै । के थमनै न्ही बेरा के पवित्र ग्रन्थ एलियाह नबी कै बारे म्ह के कहवै सै, वो इस्राएल के माणसां कै बिरोध म्ह परमेसवर तै शिकायत करै सै । 3 “हे प्रभु, उननै तेरे नबियां ताहीं मार दिया, अर तेरी वेदियां\* ताहीं नाश कर दिया सै, अर मै ए एकला बचा सू, जो तेरे पै बिश्वास करूँ सू अर जिन्दा सू, अर वे मेरी जान भी लेणा चाहवै सै ।” 4 तब परमेसवर नै एलियाह नबी तै कह्या, “मन्ने अपणे खात्तर सात हजार माणसां ताहीं राख राख्या सै, जिन नै बाल देवता की मूर्ति की आराधना करण खात्तर गोड़्डे कोनी टेक्के सै ।” 5 ठीक इस्से तरियां तै इस बखत भी, परमेसवर के अनुग्रह तै अलग करे होए कुछ यहूदी माणस बचरे सै, जिन ताहीं उसनै अपणे खात्तर चुण्या सै । 6 जै उन ताहीं परमेसवर नै अपणे अनुग्रह तै चुण्या सै, तो यो आच्छे काम्मां तै न्ही होया, न्ही तो अनुग्रह फेर अनुग्रह न्ही रहया ।

7 फेर इसका नतिज्जा के लिकइया? हालाकि इस्राएली माणस जो परमेसवर की नजर म्ह धर्मी बणणा चाहवै थे, पर वो बण न्ही पाए, पर परमेसवर नै जिन ताहीं चुण्या वे उसके गैल धर्मी बण ग्ये, अर बचे होइ माणस हठीले करे गये अर उननै उसकी सुणण तै इन्कार कर दिया । 8 जिसा पवित्र ग्रन्थ म्ह यशायाह नबी नै लिख्या सै, “परमेसवर नै उन ताहीं आज कै दिन तक सुस्त दिमाग दे राख्या सै, अर इसी आँख दी जो ना देखे, अर इसे कान दिये जो ना सुणे ।” 9 अर राजा दाऊद कहवै सै, “के जिसा एक पंछी खाणा खाण खात्तर जाळ म्ह फँस जावै सै अर जानवर खड्डे म्ह गिर जावै सै, उसी तरियां ये माणस भी परमेसवर की ओड़ तै दण्ड पावेंगे । 10 उनकी आँख आँधी हो जावै ताके वो देख न्ही पावै, अर वे सारी हाण मुसीबतां म्ह फसे रहवै ।” 11 तो मै पूच्छु सू, के यहूदी लोग ठोक्कर खाण के कारण सदा के खात्तर नाश होगे? न्ही! बिलकुल न्ही! पर उनके अविश्वास के कारण गैर यहूदियाँ ताहीं उद्धार मिल्या, ताके इस्राएल के माणसां के जळण होवे । 12 ज्यांते जै उनका अविश्वास दुनिया की गैर यहूदियाँ के खात्तर भलाई का कारण बणे, तो इस्राएल के माणसां का परमेसवर के धारे बोहड़ के आणा और भी आच्छा क्यूँ न्ही होगा ।

?????? ? ? ? ? ? ? ? ? ? ? ? ? ? ? ? ? ? ?

13 मै थम दुसरी जात्तां तै ये बात कहूँ सू । जिव के मै गैर यहूदियाँ के खात्तर प्रेरित सू, तो मै अपणी सेवा की बड़ाई करूँ सू, 14 ताके किसे तरियां तै मै अपणे कुणवे आळे माणसां म्ह जळण पैदा करवा के उन म्ह तै एक-आधे का उद्धार कराऊँ । 15 क्यूँके जिव इस्राएली माणसां का छोड़ दिया जाणा, गैर यहूदियाँ का परमेसवर के साथ मेळ-मिलाप का कारण होया । तो उनका मसीह ताहीं अपणया जाणा, इसा होगा, जिसा किसे माणस का मुर्दा म्ह तै जिन्दा जाणा । 16 मै थमनै एक उदाहरण देऊँ सू, यो यहूदी माणसां का रिवाज सै, जिव हम चून गुंधा सां, तो उस म्ह तै पैहले रोट्टी का एक पेड़ा परमेसवर के खात्तर लिकाड़ा सां, तो पूरा गुन्ध्या होया चून भी परमेसवर के खात्तर सै, उस्से तरियां जिस तरियां जड़ परमेसवर की सै, तो डाळी भी उस्से की सै ।

\* 11:3 11:3 वेदी-परमेसवर ताहीं भेट चढ़ाण खात्तर एक जगहा

17 इस्राएल के माणस जैतून की डाळी की तरियां सै अर पिता अब्राहम, इसहाक अर याकूब पेड़ की जड़ की तरियां सै, पर जै कुछ डाळी तोड़ दी गई, अर तू जंगली जैतून होके उन म्ह कलम करया गया, अर यहूदी माणसां ताहीं मिलण आळी आशीष का फायदा थारे ताहीं भी होया, जिसा जैतून के पेड़ की डाळी पेड़ की जड़ तै रस हासिल करै सै। 18 तो थम यो घमण्ड ना करियो, के थम उन कटी होई डाळियाँ तै बढ़िया सों, यो याद राख्कों के थम जड़ नै कोनी पर, जड़ थमनै सम्भाळै सै। 19 फेर थम बोल सकों सों के “परमेसवर पेड़ तै टूट्टी होए डाळियाँ की तरियां थमनै छोड़ देगा।” ताके गैर यहूदियाँ ताहीं अपणाले, जो के उन डाळियाँ की तरियां सै जो कलम करके लगाई गई सै। 20 यो सच सै के वे तो अबिश्वास के कारण तोड़ी गई, पर तू बिश्वास तै बण्या रहवै सै ज्यातै घमण्डी ना होवै, पर भय मान, 21 क्यूँके जिब परमेसवर नै खुद की डाळियाँ पै दया न्ही करी तो वो थारे पै भी दया न्ही करैगा। 22 ज्यातै परमेसवर की दया अर कठोरता नै देख! जो अबिश्वासी माणसां खात्तर कठोरता अर थारे खात्तर दया सै, जै थम असलियत म्ह उसकी दया की हद म्ह न्ही बणे रहवोंगे, तो थारे ताहीं भी काट के अलग कर दिया जावैगा। 23 यहूदी लोग भी जै बिश्वास करणा शरू करदे, तो दुबारा तै लगा दिए जावेंगे, क्यूँके परमेसवर उन ताहीं फेर छांग सकै सै। 24 एक जंगली डाळी खात्तर एक आच्छे पेड़ का हिस्सा बणणा कुदरती न्ही सै, अर जो यहूदी कोनी जंगली जैतून के पेड़ की डाळी की तरियां सै, जो के एक आच्छे जैतून के पेड़ म्ह लगाई गई सै, पर यहूदी एक डाळी की तरियां सै जो आच्छे पेड़ तै उगै सै, पक्के तौर पै वे अपने पेड़ म्ह शामिल हो सकै सै।

XXXXXXXXXXXXXXXXXXXX

25 हे बिश्वासी भाईयो, मे न्ही चाहन्दा के थम इस भेद तै अनजाण रहों, इसा ना हो के थम अपने-आप पै घमण्ड करण लागगों, जिब तक गैर यहूदी परमेसवर के धरै ना आवै सै, तब तक इस्राएल के कुछ माणस सख्त बणे रहवेंगे। 26 अर इसके बाद सारे इस्राएल के माणस उद्धार पावेंगे। जिसा पवित्र ग्रन्थ म्ह लिख्या सै, “छुटाण आळा यरुशलेम तै आवैगा, अर अभगति नै याकूब के वंश तै दूर करैगा। 27 अर उनकै गेल्या मेरा यो करार होगा, जिब मै उनके पापां नै माफ कर दियुंगा।” 28 यहूदी लोग परमेसवर के दुश्मन बणगे थे, क्यूँके वे उस सुसमाचार पै बिश्वास करणा न्ही चाहन्दे, यो थारे खात्तर फायदेमन्द होया, पर परमेसवर उनतै प्यार करै सै, क्यूँके उसनै अपने खात्तर उन ताहीं चुण्या सै, योए वो वादा सै जो उसनै म्हारे पूर्वजां तै करया था। 29 क्यूँके परमेसवर अपने वरदानां तै, अर बुलाहट तै कदे भी पाच्छै कोनी हटदा। 30 एक बखत था जिब थम गैर यहूदियाँ नै परमेसवर ताहीं ठुकरा दिया था, पर इब इस्राएल के माणसां नै परमेसवर ताहीं ठुकरा दिया, इस कारण थारे पै दया दिखाई गई। 31 थारे पै दया दिखाण के कारण उनपै भी दया दिखाई जावैगी। 32 क्यूँके सारे माणसां नै परमेसवर के हुकम का उलंघन करया सै, योए कारण सै के परमेसवर उनके गैल कैदियाँ की ढाळ बरताव करै सै, वो इस करके इसा करै सै के सब माणसां पै दया हो सकै।

XXXXXXXXXXXXXXXXXXXX

33 ओह! किसा अपार सै परमेसवर की बुद्धि अर ज्ञान का भण्डार! कितने महान सै उसके फैसले! अर किसा रहस्यमयी सै उसके काम करण का तरिककां! 34 “भला कौण जाण सकै सै परमेसवर के मन नै? या कौण उसका सलाहकार होया सै? 35 या किसनै परमेसवर ताहीं कुछ दिया सै, जिसका बदला उस ताहीं दिया जावै?” इसा कोए कोनी। 36 क्यूँके सब कुछ उस्से कै कान्ही तै आवै सै, अर उस्से नै सब कुछ बणाया सै अर सब कुछ उस्से का सै। उसकी महिमा युगानुयुग होन्दी रहवै आमीन।

## 12

XXXXXXXXXXXXXXXXXXXX

1 ज्यातै हे बिश्वासी भाईयो, मे थारे तै परमेसवर की दया याद दुवाके बिनती करुं सुं, के अपनी जिन्दगी ताहीं जिन्दा, पवित्र अर परमेसवर ताहीं भान्दा होया बलिदान करके चढ़ाओ। योए परमेसवर की सेवा करण का सही तरिककां सै। 2 इस दुनिया के माणसां बरगे ना बणो, पर परमेसवर



थारी सोच नै बदलै, अर थारा चाल-चलण भी बदलता जावै, जिसतै थम परमेसवर की भली, अर आच्छी लागण आळी, अर सिध्द इच्छा अनुभव तै बेरा पाड़ सको।

3 क्यूँके मै उस अनुग्रह के कारण जो मेरै ताहीं मिल्या सै, थारे म्ह तै हरेक तै कहूँ सूं, के जिसा समझणा चाहिये, उसतै बढ़कै कोए भी अपने-आपनै ना समझै। पर इसकी बजाए सदबुध्दी राखकै, जिसा परमेसवर नै जितना विश्वास थारे ताहीं दिया सै उसके मुताबिक अपने-आपनै समझो। 4 क्यूँके जिसा म्हारी एक देह म्ह घण-ए अंग सै, अर सारे अंगा का एके काम कोनी। 5 इस्से तरियां हम जो मसीह म्ह विश्वास करा सां, हम उसके देह के कुछ अंग बणगे सां, अर हम दुसरे तै जुड़े होए सां। 6 जब के उस अनुग्रह के मुताबिक जो परमेसवर नै म्हारै ताहीं दिया सै, हमनै न्यारे-न्यारे वरदान मिले सै। तो जिस ताहीं परमेसवर नै भविष्यवाणी का दान दिया सै, वो उन ए बातों नै बोल्लै जो उसनै विश्वास दिलाते हो के ये परमेसवर की ओड़ तै सै। 7 जे दुसरयां की सेवा करण का दान मिल्या हो, तो सेवा म्ह लाग्या रहवै, जे कोए सिखाण आळा हो, तो सिखाण म्ह लाग्या रहवै। 8 जो उत्साहित करण आळा हो, वो उत्साहित करण म्ह लाग्या रहवै, दान देण आळा हो उदारता तै देवै, जो अगुवाई करै, वो जोश तै करै, जो दया करै, वो खुशी तै करै।

9 प्यार करण का दिखावा ना करो, बुराई तै नफरत करो, भलाई म्ह उत्सुक रहो। 10 एक-दुसरे तै इस तरियां प्यार करो, जणु एक ए परिवार के हो, आपस म्ह एक-दुसरे का बढ़-चढ़कै आदर करो। 11 कड़ी मेहनत करो अर आलसी ना बणो, आत्मिक जोश तै भरे रहो। प्रभु की सेवा पूरे मन तै करदे रहो। 12 आस म्ह खुश रहो, क्लेश म्ह धीरज धरो, प्रार्थना म्ह सारी हाण लागगे रहो। 13 पवित्र माणसां ताहीं जो किमे जरूरी हो, उस म्ह उनकी मदद करो, अर अजनबी\* माणसां की सदा सेवा-पाणी म्ह लागगे रहो।

14 अपने सताण आळा ताहीं आशीष द्यो, आशीष दो श्राप ना द्यो। 15 आनन्द करण आळा कै गेल्या आनन्द करो, अर रोण आळा कै गेल्या रोओ। 16 जिस तरियां थम अपनी परवाह करो सों, उससे तरियां दुसरयां की परवाह करो, खुद पै घमण्ड ना करो, पर दीन-दुखियाँ कै गेल्या संगति राखो, अपनी नजर म्ह अकलमंद ना होवो। 17 बुराई कै बदले किसे तै बुराई ना करो, जो बात सारे माणसां कै लोवै आच्छी सै, उनकी फिकूर करया करो। 18 जित्त ताहीं हाँ सकै, थम पूरे मन तै सारे माणसां कै गेल्या मेळ-मिलाप राखो। 19 हे प्यारे विश्वासी भाईयो, बदला ना लियो, पर परमेसवर ताहीं बदला लेण का मौक्का द्यो, क्यूँके पवित्र ग्रन्थ म्ह लिख्या सै, “बदला लेणा मेरा काम सै, प्रभु कहवै सै मै ए बदला ल्यूँगा।” 20 पर वचन यो भी कहवै “जे तेरा बैरी भूक्खा हो तो उस ताहीं खाणा खुवा, जै तिसाया हो तो उस ताहीं पाणी पिला, क्यूँके तेरे इसा करण तै वो खुद शर्मिन्दा हो जावैगा।” 21 बुराई तै ना जीत हासिल करो, पर भलाई तै बुराई नै जीत ल्यो।

## 13



1 हरेक माणस शासन करण आळे अधिकारियां कै अधीन रहवै, क्यूँके सारे अधिकार परमेसवर की ओड़ तै आवै सै, अर जो अधिकार सै, वे परमेसवर नै बणाये सै। 2 ज्यांतै जो कोए भी माणस उन माणसां का पालन करण तै इन्कार करै सै, जिनके धारै शासन करण की शक्ति सै, तो वो परमेसवर की विधि का विरोध करै सै, अर विरोध करण आळे दण्ड पावेंगे। 3 क्यूँके हाकिम आच्छे काम के न्ही, पर भुन्डे काम कै खात्तर डर का कारण सै। जे तू हाकिम तै बिना डरे रहणा चाहवै सै, तो आच्छा काम कर, ताके उसकी ओड़ तै तेरी बड़ाई हो। 4 क्यूँके वो तेरी भलाई कै खात्तर परमेसवर का सेवक सै। परन्तु जे तू बुराई करै, तो डर, क्यूँके उसनै दण्ड देण का हक सै, अर वो परमेसवर का सेवक सै ताके उसके छोटो कै मुताबिक भुन्डे काम करण आळे ताहीं सजा देवै। 5 ज्यांतै थम उनके अधीन रहों ना सिर्फ उसके दण्ड तै बचण खात्तर बल्के साफ अन्तरात्मा राखण खात्तर भी। 6 ज्यांतै चुंगी भी

\* 12:13 12:13 अजनबी माणस जो मसीह की सेवकाई कै खात्तर जगहां-जगहां घूमते हो

दो क्यूँके शासन करण आळे परमेसवर के सेवक सै अर सारी हाण उस फर्ज नै पूरा करण म्ह लाग्गे रहवै सै।<sup>7</sup> ज्यातै हरेक का हक चुकाया करो, जिस ताहीं चुंगी देणी चाहिये, उस ताहीं चुंगी देओ, कर देण आळे ताहीं कर\* देओ, जिसतै डरणा चाहिये, उसतै डरो, जिसका आदर-मान करणा चाहिये, उसका आदर-मान करो।

**११-१११११ ११ १११११ १११११११**

८ एक ए चीज सै जिसके थमने कर्जदार होणा चाहिए, वो सै थारा आप्स म्ह प्यार, क्यूँके जो एक-दुसरे तै प्यार करै सै, उससे नै परमेसवर के नियम-कायदा ताहीं पूरा करया सै।<sup>9</sup> क्यूँके, मूसा नबी के नियम-कायदा म्ह भोत-से हुकम सै, “जारी ना करणा, खून ना करणा, चोरी ना करणा, लालच ना करणा,” अर इन्नै छोड़ और कोए भी हुकम हो, तो सारया का निचोड़ इस एक हुकम म्ह पाया जावै सै, “अपणे पड़ोसी तै अपणे जिसा प्यार करो।”<sup>10</sup> प्यार पड़ोसी की कुछ बुराई कोनी करदा, जो प्यार करै सै, वो परमेसवर के नियम-कायदा नै पूरा करै सै।

११ आप्स म्ह हरेक नै एक-दुसरे तै प्यार करते रहणा चाहिए, क्यूँके वो बखत आवै सै, के जिव परमेसवर हमनै इस बुरी दुनिया तै छुड़ावैगा, जिव हमनै पैहली बार मसीह म्ह विश्वास करया था, तब तै इब वो बखत धोरै आ लिया सै, तो थारे ताहीं नींद तै जागणा चाहिए अर सावधान रहणा चाहिए।<sup>12</sup> दुनिया म्ह रहण का म्हारा बखत लगभग एक रात की ढाळ सै, जो खतम होण आळी सै, अर मसीह के बोहड़ण आळा बखत भोत लवै सै, ज्यातै हमनै अन्धकार के काम्मां नै छोड़के, चाँदणे की ढाळ आच्छे काम करणे चाहिए, जो बुराई का बिरोध करण म्ह म्हारे हथियार बणै सकै।<sup>13</sup> आओ! हम खुद नै सही तरिके तै चलाणा शरु करा, जो उन माणसां की तरियां सै जो चाँदणे म्ह रहवै सै, पर अँधेरे म्ह रहण आळे माणसां की ढाळ ना बणो जो भोग-विलास, दारूबाजी, जारी, लुचपण, रोळे अर जळण करण जिसा काम करै सै।<sup>14</sup> बल्के प्रभु यीशु मसीह ताहीं कवच बणा के पैहर ल्यो, अर देह की पापी अभिलाषायां नै पूरा करण का उपाय ना करो।

## 14

**११११ १११ ११ १११ १११ १११**

१ जो माणस विश्वास म्ह कमजोर सै, उस ताहीं अपणी संगति म्ह ले ल्यो, पर उस ताहीं के करणा चाहिए के न्ही करणा चाहिए इस बारे म्ह बहस ना करो।<sup>2</sup> एक नै विश्वास सै, के सारा कुछ खाणा सही सै, पर जो विश्वास म्ह कमजोर सै वो साग-पात ए खावै सै।<sup>3</sup> अर माँस-मच्छी खाण आळे साग-पात खाण आळे ताहीं तुच्छ ना जाणै, अर ना साग-पात खाणआळा, माँस-मच्छी खाणआळे पै दोष लावै, क्यूँके परमेसवर नै दोनुआ ताहीं अपणाया सै।<sup>4</sup> तू कौण सै जो दुसरे के नौक्कर पै दोष लावै सै? पर उसकी कामयाबी या नाकामयाबी उसके माल्लिक के ए हाथ्यां म्ह सै, बल्के वो कामयाब ए कर दिया जावैगा, क्यूँके प्रभु उस ताहीं कामयाब कर सकै सै।

५ इस तरियां कई माणस तो एक दिन नै दुसरे तै बाध मान्ने सै, अर कई माणस सारे दिनां नै एक जिसा जाणै सै, इस तरियां तै हरेक अपणे ए मन म्ह, इस बात नै पक्का कर लेवै जो वो सोचवै सै वोए सही सै।<sup>6</sup> जो कोए किसे दिन नै बाध मान्ने सै, वो प्रभु नै आदर मान देण खात्तर मान्ने सै। जो कोए माँस-मच्छी खावै सै, वो प्रभु नै आदर मान देण खात्तर खावै सै, क्यूँके वो परमेसवर का धन्यवाद करै सै, अर जो साग-पात खावै सै, क्यूँके वो प्रभु नै आदर मान देण खात्तर खावै अर परमेसवर का धन्यवाद करै सै।<sup>7</sup> क्यूँके हम सारे प्रभु के सां। म्हारे म्ह तै ना तो कोए अपणे खात्तर जिन्दा सै, अर ना कोए अपणे खात्तर मरै सै, पर परमेसवर ताहीं खुश करण खात्तर करै सै।<sup>8</sup> जै हम जिवां सां, तो प्रभु के खात्तर जिवां सां, अर जै मरा सां, तो प्रभु के खात्तर ए मरा सां, हम जिवां या मरा, हम प्रभु ए के सां।<sup>9</sup> क्यूँके मसीह यीशु इस्से खात्तर मरा अर मुर्दा म्ह तै जिन्दा भी हो गया के वो मरे होया अर जिन्दयां का, दोनुआं का प्रभु होवै।

\* 13:7 13:7 कर-हरेक ढाळ का टेक्स

10 तू अपने विश्वासी भाई पै क्यातै दोष लावै सै? या फेर क्यातै अपने विश्वासी भाई नै तूच्छ जाणै सै? परमेसवर हम सारा का न्याय करैगा। 11 क्यूँके पवित्र ग्रन्थ म्ह लिख्या सै, “प्रभु कहवै सै,

मेरे जीवन की कसम, के हरेक घुटना मेरै स्याम्ही टिकैगा, अर हरेक कोए अपनी जुबान तै मनै परमेसवर मान लेवैगा।”

12 ज्यातै म्हारै म्ह तै हरेक नै अपने-अपने काम का लेक्खा परमेसवर ताहीं देणा पड़ैगा।

~~~~~

13 इस खात्तर आगे तै हम एक-दुसरे पै दोष न्ही लावांगे, पर थम या ठान ल्यो के कोए अपने विश्वासी भाई कै स्याम्ही पाप करण की बजह ना बणै। 14 मनै बेरा सै अर प्रभु यीशु म्ह मनै पक्का यकिन होया सै, के कोए खाण-पीण की चीज अपने-आप तै अशुद्ध कोनी, पर जो उस ताहीं अशुद्ध समझै सै, उसके खात्तर अशुद्ध सै। 15 जै तेरा विश्वासी भाई तेरे खाणे के कारण दुखी होवै सै, तो फेर तू मसीह की प्यार की रीत पै न्ही चाल्दा, जिसके खात्तर मसीह मरा, तेरे खाणे की बजह तै तेरा विश्वासी भाई मसीह तै पाच्छै ना हटै। 16 इस करके जै तू अपनी नजर म्ह बढ़िया काम करै सै, पर दुसरा उसनै बुरा मानै सै तो उसनै ना करै। 17 क्यूँके परमेसवर का राज्य खाणा-पीणा कोनी, पर धार्मिकता अर मेळ-मिलाप म्ह ए खुशी सै, जो पवित्र आत्मा तै मिलै सै। 18 जो कोए इस तरियां तै मसीह की सेवा करै सै, इसतै परमेसवर खुश होवै सै, अर माणसां म्ह भी उसकी तारीफ होवै सै। 19 ज्यातै हम उन काम्मां म्ह लाग्गे रद्दां जिनतै मेळ-मिलाप अर शान्ति होवै, अर एक-दुसरे का विश्वास मजबूत होवै। 20 खाणे के खात्तर परमेसवर का काम ना बिगाड़ै। सारी ढाळ का खाणा शुद्ध सै, पर उस माणस के खात्तर पाप करण की बजह ना बणो, जिस ताहीं उसके खाणे तै ठेस लाग्गे सै। 21 भला तो यो सै के तू ना माँस-मच्छी खा अर ना अंगूर का रस पी, ना और किमे इसा करै जिसतै तेरे विश्वासी भाई के विश्वास नै ठेस लाग्गे। 22 जै तू विश्वास करै के तू सही करै सै, तो इन बातं नै अपने ए अर परमेसवर के बीच म्ह राख। धन्य सै वो जो उस बात म्ह, जिस ताहीं वो सही समझै सै, अपने-आपनै कसूरवार न्ही समझदे। 23 पर इव थारे मन म्ह शक सै, के खाणा सै अर के न्ही खाणा अर फेर भी खा ल्यो सो, तो पाप करो सों। क्यूँके थम अपने विश्वास के मुताबिक न्ही करते अर जै थम इसा काम करो सों, जिसपै थमनै विश्वास सै, वो काम गलत सै, तो वो पाप सै।

## 15

~~~~~

1 हो सके सै के हम जो विश्वास म्ह मजबूत सां, हम जाणा सां के इन बातं तै कोए फर्क न्ही पड़ता, हम इस खात्तर यो काम न्ही करते के हम अपने-आपनै खुश कर सका, हमनै उन माणसां का डर अर शंका का भी ध्यान करणा सै, के जो यो सोचवै सै के हम गलत सां। 2 म्हारै म्ह तै हरेक नै अपने विश्वासी भाई कै साथ भले काम करणे चाहिए, जो उसनै खुश करै अर उस ताहीं विश्वास म्ह मजबूत बणाए राखवै। 3 क्यूँके मसीह नै अपने-आप ताहीं खुश कोनी करया, पर जिसा पवित्र ग्रन्थ म्ह लिख्या सै, “तेरी बुराई करण आळा नै मेरी बुराई करी सै।” 4 जितनी बात पैहल्या तै पवित्र ग्रन्थ म्ह लिक्खी गई, वे म्हारी ए सिखाण के खात्तर लिक्खी गई सै, ताके हम धीरज अर उत्साह जो म्हारे ताहीं पवित्र ग्रन्थ देवै सै, उसके जरिये हमनै आस मिलै। 5 मै प्रार्थना करूँ सूँ के धीरज अर उत्साह का दात्ता परमेसवर, थमनै यीशु मसीह की तरियां जीवन बिताण अर एक-दुसरयां के साथ शान्ति तै रहण म्ह मदद करै। 6 ताके थम सब कट्ठे होके म्हारै परमेसवर प्रभु यीशु मसीह के पिता की महिमा करो।

~~~~~

7 इस करके एक-दुसरे नै अपनाओ जिसा मसीह नै थारे ताहीं अपनाया सै, यो इस खात्तर करो के माणस परमेसवर की जै-जै कार करै। 8 ज्यातै मै कहूँ सूँ के जो वादे म्हारे पूर्वजां ताहीं दिए गये थे,

उन वादा नै मजबूत करण खात्तर मसीह, परमेसवर की सच्चाई साबित करण खात्तर मसीह, यहूदी माणसां का सेवक बणया । 9 अर गैर यहूदी भी परमेसवर की दया कै कारण उसकी महिमा करै, जिसा पवित्र ग्रन्थ म्ह लिख्या सै, “ज्यातै मै गैर यहूदी माणसां म्ह तेरा धन्यवाद करूंगा, अर तेरे नाम के भजन गाऊंगा ।” 10 फेर कह्या सै, “हे गैर यहूदी माणसां, परमेसवर की प्रजा कै गैल आनन्द करो ।” 11 अर फेर पवित्र ग्रन्थ कहवै सै, “हे गैर यहूदी माणसां, प्रभु की जय-जयकार करो, अर हे राज्य-राज्य के सारे माणसां, उसकी बड़ाई करो ।” 12 अर यशायाह नबी पवित्र ग्रन्थ म्ह कहवै सै, “यिश्\* के वंश तै एक बेट्टा पैदा होगा, अर सारी जात्तां पै राज करैगा, वो गैर यहूदी माणसां नै बचावैगा ।” 13 मै प्रार्थना करूँ सूँ, के परमेसवर जो आस का दात्ता सै, थारे ताहीं विश्वास करण म्ह सारी तरियां के आनन्द अर शान्ति तै भरपूर करै, के पवित्र आत्मा की सामर्थ तै थारी आस बधती जावै ।

### परमेसवर के सेवक बणवै

14 हे मेरे विश्वासी भाईयो, मै अपने-आप थारे बारे म्ह पक्का जाणूँ सूँ, के थम भी आप ए भलाई तै भरे होए सों, अर थमनै बेरा होणा चाहिए के थमनै के करणा चाहिए, अर एक-दूसरे नै सीखा भी सको सों । 15 तोभी मन्नै कई बाततां के बारे म्ह थारे ताहीं जो हिम्मत करकै लिख्या । यो उस अनुग्रह कै कारण होया जो परमेसवर नै मेरे ताहीं दिया सै, 16 के मै गैर यहूदियाँ कै खात्तर मसीह यीशु का सेवक होकै परमेसवर कै सुसमाचार की सेवा याजक कै ढाळ करूँ, ताके गैर यहूदियाँ ताहीं परमेसवर खात्तर भेट के रूप म्ह दे सकूँ, जिसके साथ वो खुश होवै सै, जिन ताहीं पवित्र आत्मा नै पवित्र माणस बणा दिया । 17 ज्यातै मै यीशु मसीह के कारण ए परमेसवर की सेवा पै गर्व कर सकूँ सूँ । 18 क्यूँके मै हिम्मत कै गैल सिर्फ उन बाततां बारे म्ह जिकर करणा चाहूँ सूँ, जो मसीह नै मेरे ताहीं करण के काबिल बणाया, ताके जो मन्नै कह्या अर करया सै उसके जरिये गैर यहूदी माणस परमेसवर का हुकम मन्नै । 19 पवित्र आत्मा के जरिये दी गई शक्ति तै मै अदभुत चिन्ह-चमत्कार करूँ सूँ, इस कारण जित भी मै यरुशलेम नगर तै लेके चौगरदेकै इल्लुरिकुम परदेस तक गया, ओड़े मन्नै सारया ताहीं यीशु मसीह का सुसमाचार सुणाया । 20 पर मेरे मन की इच्छा या सै के जित-जित मसीह यीशु का नाम न्ही लिया गया, ओड़े सुसमाचार सुणाऊँ, अर उस मकान बणाण आळे मिस्त्री की ढाळ ना होऊँ जो दुसरे की नीम पै घर बणावै सै । 21 पर जिसा पवित्र ग्रन्थ म्ह लिख्या सै मै उस ताहीं पूरा करणा चाहूँ सूँ, “जिनके धारे यीशु मसीह का सुसमाचार न्ही पोहच्यो, वैए देखेंगे, अर जिन नै न्ही सुणा वैए समझेंगे ।”

### परमेसवर के सेवक बणवै

22 ज्यातै मै थारे धारे आण तै बार-बार रुक्या रहया । 23 पर इब यरुशलेम नगर अर इल्लुरिकुम परदेस म्ह मन्नै माणसां ताहीं परमेसवर का वचन सुणा दिया सै, जिननै यीशु मसीह के बारे म्ह सुणया ए न्ही था, अर इब मै थारे तै आकै मिलूंगा, जिसकी लालसा मन्नै घणे साल्लां तै थी । 24 ज्यातै जब मै स्पेन देश म्ह जाऊंगा, तो थारे धारे होंदा होया जाऊंगा, क्यूँके मन्नै उम्मीद सै के उस सफर म्ह थारे तै भेट होवैगी, अर जब थारी संगति तै मेरा जी खुश हो जावै, तो थम मेरी स्पेन देश जाण म्ह मदद कर दिओ । 25 पर इब तो मै यरुशलेम नगर म्ह जाऊँ सूँ ताके ओड़े परमेसवर के पवित्र माणसां नै दान दे सकूँ । 26 क्यूँके मकिदुनिया अर अखाया परदेस के माणसां नै यो आच्छा लागया के यरुशलेम नगर के गरीब माणसां कै खात्तर कुछ दान कट्टा करै । 27 उननै आच्छा तो लागया, पर वे यरुशलेमवासियों कै कर्जदार भी सै, क्यूँके यहूदियाँ नै गैर यहूदियाँ के साथ परमेसवर की आत्मिक बाततां का साँझा करया सै, यो सही सै गैर यहूदियाँ की दुनियावी चिज्जां नै यहूदियाँ कै गैल साँझा करै । 28 ज्यातै मै यरुशलेम नगर म्ह जाण लागरया सूँ, ताके वो दान दे सकूँ, जो मन्नै कट्टा करया

\* 15:12 15:12 यिश्-राजा दाऊद का पिता था

सै, उसके बाद थारे तै रोम देश म्ह मिलके स्पेन देश म्ह जाऊंगा।<sup>29</sup> अर मननै बेरा सै के जिव मै थारे धारे आऊंगा, तो मै मसीह की आशीष नै थारे साथ साँझा करूंगा।

<sup>30</sup> हे विश्वासी भाईयो, म्हारे प्रभु यीशु मसीह म्ह विश्वास के कारण अर जो पवित्र आत्मा नै म्हारे ताहीं जो प्यार दिया सै मै थारे तै बिनती करूँ सूँ, के मेरै खात्तर अर मेरे साथ मन तै परमेसवर तै प्रार्थना करो <sup>31</sup> ताके मै यहूदिया परदेस के अविश्वासियाँ तै बचा रहूँ, अर जो दान मै यरुशलेम नगर म्ह लेके जाण लागरया सूँ, वो परमेसवर के पवित्र माणसां खात्तर खुशी का कारण बणै। <sup>32</sup> अर मै परमेसवर की मर्जी तै थारे धारे आनन्द कै गैल आके थारे गेल्या आराम पाऊँ। <sup>33</sup> मै प्रार्थना करूँ सूँ, शान्ति का दात्ता परमेसवर थारे सारया कै गेल्या रहवै। आमीन।

## 16



<sup>1</sup> मै थारे तै फिबे के खात्तर जो म्हारी विश्वासी भाण अर किखरिया नगर की कलीसिया की सेविका सै, मै चाहूँ सूँ के थम उसका आदर करो। <sup>2</sup> थम यो जाणके उसका इसा स्वागत करो जिसा थम परमेसवर के पवित्र माणसां का करो सों, अर जिस किसे बात म्ह उस ताहीं थारी जरूरत होवै, उसकी मदद करो, क्यूँके वा भी घणखरया की बल्के मेरी भी उपकार करण आळी रही सै।

<sup>3</sup> पिरसकिल्ला विश्वासी भाण अर उसके धणी अक्विला नै जो मसीह यीशु म्ह मेरै गैल काम करणीये सै, उन ताहीं मेरा नमस्कार। <sup>4</sup> उननै मेरै प्राण के खात्तर अपना ए जीवन जोखम म्ह गेर दिया था, अर सिर्फ मै ए न्ही, बल्के गैर यहूदियाँ की सारी कलीसिया भी उनका धन्यवाद करै सै। <sup>5</sup> अर उस कलीसिया नै भी नमस्कार जो उनके घर म्ह कट्टा होवै सै। मेरे प्यारे भाई इपैनितुस नै, जिसने आसिया म्ह सब तै पैहले मसीह पै विश्वास करया, उस ताहीं भी मेरा नमस्कार। <sup>6</sup> विश्वासी भाण मरियम ताहीं, जिसने थारे खात्तर घणी मेहनत करी, नमस्कार। <sup>7</sup> विश्वासी भाई अन्दरूनीकुस अर उसकी भाण यूनियास नै जो मेरे यहूदी साथी सै, जो मेरै गेल्या कैद होए थे अर पररितां म्ह बड़ा नाम्मी सै, अर मेरै तै पैहल्या मसीह म्ह आए थे, नमस्कार। <sup>8</sup> विश्वासी भाई अम्पलियातुस नै, जो प्रभु मसीह म्ह मेरा प्यारा सै, नमस्कार। <sup>9</sup> विश्वासी भाई उरबानुस नै, जो मसीह म्ह म्हारा गैल काम करणीया सै, अर मेरे प्यारे विश्वासी भाई इस्तखुस नै नमस्कार। <sup>10</sup> विश्वासी भाई अपिल्लेस नै जो मसीह म्ह खरयां लिकड़या, नमस्कार। विश्वासी भाई अरिस्तुबुलुस के कुणवे नै नमस्कार। <sup>11</sup> मेरे विश्वासी साथी हेरोदियोन नै नमस्कार। विश्वासी भाई नरकीस्तुस का कुणवे के जो माणस परमेसवर पै विश्वास करै सै, उन ताहीं नमस्कार। <sup>12</sup> त्रुफेना अर त्रुफोसा विश्वासी भाणां नै जो प्रभु म्ह मेहनत करै सै, नमस्कार। प्यारी विश्वासी भाण पिरसिस नै, जिसने प्रभु म्ह घणी मेहनत करी, नमस्कार। <sup>13</sup> विश्वासी भाई रूफुस नै जो प्रभु नै अपना होण खात्तर चुण्या सै, अर उसकी माँ नै, जो मेरी भी माँ के समान सै, दोनुआ नै, नमस्कार। <sup>14</sup> विश्वासी भाई अनुक्लिरतुस, फिलगोन, हिमैस, पत्रुबास, हर्मास अर उनके साथ के सारे विश्वासी भाईयाँ नै, नमस्कार। <sup>15</sup> विश्वासी भाई फिलुलुगुस, यूलिया अर नेर्युस अर उसकी बेब्बे, अर विश्वासी भाई उलुम्पास अर उनके साथ के सारे पवित्र माणसां नै नमस्कार। <sup>16</sup> आप्स म्ह एक-दुसरे ताहीं गळे मिलके प्यार तै नमस्कार करो। थारे ताहीं मसीह की सारी कलीसियाओं की ओड़ तै नमस्कार।




<sup>17</sup> इब हे विश्वासी भाईयो, मै थारे तै बिनती करूँ सूँ, के जो माणस उस सच्ची शिक्षा कै उल्ट जो थमनै मिली सै, अर उन माणसां नै जो फूट गेरण अर टेस लागगण का कारण बणै सै, उननै ताड़ लिया करो अर उनतै दूर रहो। <sup>18</sup> क्यूँके इसे माणस म्हारे प्रभु मसीह के न्ही, पर अपना ए इच्छा पूरी करै सै, अर चिकणी-चुपड़ी बात्ता तै सीधे-सादे माणसां नै भका देवै सै। <sup>19</sup> थारा, परमेसवर के हुकम मानण का जिक्र सारे माणसां म्ह फैल गया सै, ज्यातै म्ह थारे बारे म्ह आनन्द करूँ सूँ, पर मै न्यू चाहूँ सूँ के थम भलाई के खात्तर अकलमंद, पर बुराई के खात्तर भोळे बणे रहो। <sup>20</sup> शान्ति का

परमेश्वर शैतान की शक्तियाँ नै खतम करके, थारे अधीन कर देवैगा। म्हारै प्रभु यीशु मसीह का अनुग्रह थारे पै होंदा रहवै। <sup>21</sup> मेरे गैल काम करणीया विश्वासी भाई तीमुथियुस का, अर मेरे कुण्वे आळे भाई लूकियुस, यासोन अर सोसिपतुरुस का थारे ताहीं नमस्कार। <sup>22</sup> मै तिरतियुस जो पौलुस की चिट्ठी लिखण म्ह मदद करण लागरया सूं, मेरा प्रभु म्ह थारे ताहीं नमस्कार। <sup>23</sup> विश्वासी भाई गयुस भी थारे ताहीं नमस्कार करै सै मै इब उसके घर म्ह रहण लागरया सूं, जित्त कलीसिया कट्ठी हो सै। विश्वासी भाई इरास्तुस जो नगर का भण्डारी सै, अर भाई क्वारतुस का भी थारे ताहीं नमस्कार। <sup>24</sup> मै प्रार्थना करूं सूं के म्हारै प्रभु मसीह का अनुग्रह थारे पै होंदा रहवै।

~~XXXXXXXX XX XX-XX XXX~~

<sup>25</sup> इब जो मन्ने थारे ताहीं सुसमाचार सुणाया सै, यानिके यीशु मसीह कै संदेश कै प्रचार कै मुताबिक जो थमनै विश्वास म्ह मजबूत कर सकै सै, उस भेद कै प्रकाशन कै मुताबिक जो पुराणे बखत तै लुहक्या रहया। <sup>26</sup> पर इब जाहिर होके, सनातन परमेश्वर कै हुकम तै, अर नबियाँ की किताबां कै जरिये गैर यहदियाँ ताहीं बताया गया सै, ताके वे भी विश्वास करके हुकम मानण आळे हो जावै, <sup>27</sup> यीशु मसीह कै जरिये उस एकमात्र बुद्धिमान परमेश्वर की युगानुयुग महिमा होन्दी रहवै। आमीन।

## कुरिन्थिस नगर के माणसां ताहीं प्रेरित पौलुस की पैहली चिट्ठी



पौलुस ने कुरिन्थुस नगर म्ह कलीसिया बणाई थी। उस म्ह मसीह जीवन अर बिश्वास तै जुड़ी भोत सी समस्या पैदा होगी थी। उन समस्याओं के समाधान के खात्तर कुरिन्थियों के नाम पौलुस प्रेरित की पैहली चिट्ठी लिखी गयी सै। उस बखत कुरिन्थुस यूनान का एक अंतराष्ट्रीय नगर था। जो रोमी साम्राज्य के अखाया प्रान्त की राजधानी था। वो अपने भोत सारे व्यापार, शानों-शोकत, संस्कृति अर कई तरियों के धर्मा खात्तर मशहूर था। पर वो अपनी हद तै ज्यादा बुराई के कारण बदनाम था। प्रेरित की घणी चिन्ता की बात कलीसिया म्ह बटवारा, बुराई, नाजायज रिश्ते, अर अंतरआत्मा तै जुड़े सवाल, कलीसिया का प्रबन्ध, पवित्र आत्मा के दान अर दुबारा जी उठणा था। पौलुस अपने गहरे आत्मिक ज्ञान तै यो बतावै सै, कै सुसमाचार के जरिये इन सवालां का समाधान किस तरियां हो सकै सै। पाठ 13 म्ह पौलुस बतावै सै के परमेसवर के माणसां नै मिले वरदानां म्ह तै सब तै बढ़िया वरदान प्रेम सै। यो इस किताब का सब तै खास पाठ सै।

### रूप-रेखा

भूमिका 1:1-9

कलीसिया म्ह दलबन्दी 1:10-4:21

नैतिकता अर पारिवारिक जीवन 5:1-7:40

मसीह अर मूर्तिपूजा 8:1-11:1

कलीसिया के माणसां का जीवन अर आराधना 11:2-14:40

मसीह यीशु अर बिश्वासियां का पुनरुत्थान 15:1-58

यहूदिया परदेस के बिश्वासियां खात्तर दान 16:1-4

व्यक्तिगत बात अर समापन 16:5-24



1 या चिट्ठी पौलुस की ओड़ तै सै, जो परमेसवर की इच्छा तै प्रभु यीशु मसीह का प्रेरित होण के खात्तर बुलाया गया अर बिश्वासी भाई सोस्थिनेस भी मेरे गैल सै। 2 मै या चिट्ठी परमेसवर की उस कलीसिया के माणसां ताहीं लिखूँ सँ, जो कुरिन्थुस नगर म्ह सै, अर जिन ताहीं परमेसवर नै मसीह यीशु म्ह अपने खात्तर अलग तै छाँट कै राक्खे सै, अर उसनै म्हारे ताहीं अपने पवित्र माणस होण के खात्तर बुलाया सै, अर उन सारया के नाम भी जो हरेक जगहां म्हारे अर अपने प्रभु यीशु मसीह की सेवकाई करै सै। 3 हम प्रार्थना करां सां, के म्हारै पिता परमेसवर अर प्रभु यीशु मसीह की ओड़ तै धमनै अनुग्रह अर शान्ति मिल्दी रहवै।



4 मै थारे बारे म्ह अपने परमेसवर का सारी हाण धन्यवाद करूँ सँ, क्यूँके मसीह यीशु म्ह परमेसवर का अनुग्रह जो थारे पै होया सै, उसके कारण उसनै थारे ताहीं भोत सी आशीष दी सै। 5 थम मसीह यीशु म्ह सारी \*ढाळ तै सम्पन्न करे गये सों, उसनै थारे ताहीं हरेक ढाळ के आत्मिक वरदान दिए सै, ताके थम दुसरयां नै वचन का ज्ञान अर सुसमाचार सुणा सको। 6 जो खास काबलियत थारे ताहीं मिली सै, वा साबित करै सै, के मसीह यीशु के बारे जो सन्देस सै, वो सच्चा सै। 7 इस कारण जिब थम म्हारै प्रभु यीशु मसीह के बोहड़ण की बाट देखण लागे सों, तो पवित्र आत्मा नै थारे ताहीं हरेक ढाळ के आत्मिक वरदान दिये सै। 8 परमेसवर धमनै आखिर ताहीं बिश्वास म्ह मजबूत करैगा, ताके थम म्हारै प्रभु यीशु मसीह के बोहड़ण के दिन म्ह बेकसूर ठहरो। 9 परमेसवर इसाए करैगा,

\* 1:5 1:5 सम्पन्न-धनी, माळदार

क्योंके जो वो कहवै सै, उसनै वो करण म्ह विश्वास लायक सै, अर उसनै थारे ताहीं अपणे बेट्टे, अर म्हारै प्रभु यीशु मसीह की संगति म्ह बुलाया सै।

~~~~~

10 हे विश्वासी भाईयो, जो प्रभु यीशु मसीह नै मेरे ताहीं हक दिया सै, उसकै कारण मै थारे तै बिनती करूं सू, के थम सारे एक-दुसरे तै सहमत रहो, थम एकता बनाए राख्खों ताके थारे म्ह फूट ना होवै, अर थम एक मत हो के आप्स म्ह मिले रहो। 11 क्यूँके हे मेरे विश्वासी भाईयो, खलोए के कुण्वे के माणसां नै मेरै ताहीं थारे बारै म्ह बताया सै, के थारे म्ह झगड़ें होवै सै। 12 मेरे कहण का मतलब यो सै के, थारे म्ह तै कोए अपणे-आपनै पौलुस का, कोए अपुल्लोस का, कोए कैफा का, कोए मसीह का चेल्ला कहवै सै। 13 जो थम करो सां वो ठीक कोनी, के मसीह बट गया? के मै पौलुस थारे खात्तर करूस पै चढ़ाया गया? के थमनै मेरे नाम तै बपतिस्मा मिल्या? 14 मै परमेसवर का धन्यवाद करूं सू, विश्वासी भाई किरस्पुस अर गयुस नै छोड़, मन्नै थारे म्ह तै किसे ताहीं भी बपतिस्मा कोनी दिया। 15 कदे इसा ना हो के कोए थारे म्ह तै कहवै के थमनै मेरै नाम पै बपतिस्मा मिल्या सै। 16 अर हाँ, मन्नै स्तिफनास के कुण्वे ताहीं भी बपतिस्मा दिया, इन्नै छोड़ मै न्ही जाण्दा के मन्नै और किसे ताहीं भी बपतिस्मा दिया। 17 क्यूँके मसीह नै मेरै ताहीं बपतिस्मा देण ताहीं न्ही, बल्के सुसमाचार सुणाण ताहीं भेज्या सै, अर मन्नै माणसां ताहीं सुसमाचार चतुर विचार के मुताबिक कोनी सुणाया, इसा ना हो के मसीह के करूस पै मरण की कथा बेकार ठहरै।

~~~~~

18 क्यूँके करूस पै मसीह यीशु के मरण की कथा, नाश होण आळे माणसां के खात्तर बेकूफी सै, पर हम उद्धार पाण आळा के खात्तर परमेसवर की सामर्थ सै। 19 क्यूँके पवित्र ग्रन्थ म्ह परमेसवर नै कह्या सै, के “जो अपणे-आपनै ज्ञानवान समझ सै, मै उननै दिखा दियुंगा के असलियत म्ह उनका ज्ञान बेकूफी तै भरया सै, अर वे बेकूफ सै।” 20 कित्त रहया ज्ञान्नी? कित्त रहया शास्त्री? कित्त रहया इस दुनिया का विवाद करण आळा? के परमेसवर नै दुनिया के ज्ञान ताहीं बेकूफी न्ही ठहराया? 21 क्यूँके परमेसवर नै यो आच्छा लाग्या के दुनिया के माणस अपणे ज्ञान के मुताबिक परमेसवर ताहीं न्ही जाण सकै, तो उसनै म्हारे जरिये सुसमाचार के प्रचार ताहीं इस्तमाल करया, ताके उन माणसां नै बचा सकै जिननै उसपै विश्वास करया सै, पर कुछ लोग्गां नै इस ताहीं बेकूफी समझा। 22 यहूदी लोग ए इस ताहीं बेकूफी समझै सै, क्यूँके वे सुर्ग तै चिन्ह-चमत्कार की बातों नै ए सच मान्ने सै, अर यूनानी लोग ज्ञान की टोह म्ह रहवै सै। 23 पर हम तो उस करूस पै चढ़ाए होड़ मसीह का प्रचार करा सां, जो यहूदी लोग्गां के खात्तर ठोक्करा का कारण अर गैर यहूदियाँ के खात्तर बेकूफी सै। 24 पर जिन ताहीं परमेसवर नै बुलाया सै, के यहूदी लोग, के यूनानी लोग, योए मसीह यीशु परमेसवर का सामर्थ अर परमेसवर का ज्ञान सै। 25 क्यूँके जो परमेसवर की बेकूफी लाग्गै सै, वो माणसां के ज्ञान तै ज्ञानवान सै, अर जो परमेसवर की कमजोरी लाग्गै सै, वो माणसां की ताकत तै धणी ताकतवर सै।

26 हे विश्वासी भाईयो, याद करो के थम किसे थे जब परमेसवर नै थारे ताहीं बुलाया था, ना तो दुनिया के मुताबिक घणे ज्ञानवान, अर ना घणे सामर्थी, अर ना घणे आच्छे खानदान आळे थे। 27 बल्के परमेसवर नै दुनिया के बेकुफां ताहीं छाँट लिया सै के ज्ञानवानां ताहीं शर्मिन्दा करै, अर परमेसवर नै दुनिया के कमजोरां ताहीं छाँट लिया सै के टाडचां नै शर्मिन्दा करै। 28 अर परमेसवर नै उन माणसां ताहीं चुणया, जो दुनिया की निर्गाह म्ह नीच अर तुच्छ सै। इनके जरिये परमेसवर नै, जो घणे खास समझे जावै सै, उन ताहीं बेकार टैहरा दिया। 29 परमेसवर नै यो इस करके करया, ताके कोए प्राणी उसकै स्याम्ही घमण्ड न्ही करण पावै। 30 परमेसवर के जरिये करे गये काम के नतिज्जें तै थम मसीह यीशु म्ह सो, जो परमेसवर की ओड़ तै म्हारै खात्तर ज्ञान, धार्मिकता, पवित्रता, अर

† 1:23 1:23 यहूदी लोग्गां के खात्तर ठोक्कर यहूदी लोग सोचै थे के मसीहा सदा खात्तर जिवैगा, इस खात्तर वे विश्वास कोनी करै थे के यीशु ए मसीह सै



छुटकारा बणगे।<sup>31</sup> ताके जिसा पवित्र ग्रन्थ म्ह लिख्या सै, उस्से तरियां ए होवै, “जो घमण्ड करै वो प्रभु नै जो करया उसपै घमण्ड करै।”

## 2

~~~~~

1 हे विश्वासी भाईयो, मै थारे धारे बात्ता की चतुराई अर ना ए उत्तम ज्ञान का प्रदर्शन करण आया, बल्के मै थारे धारे परमेसवर का सन्देश सुणाण आया था।<sup>2</sup> क्यूँके मन्नै यो टान लिया था, के मै मसीह यीशु अर उसकी क्रूस की मृत्यु के अलावा, किसे और चीज के बारे म्ह थारे तै ना सुणु।<sup>3</sup> मै कमजोरी अर डरकै गेल्या, घणा थरथराता\* होया थारे गेल्या रहया।<sup>4</sup> अर मेरी शिक्षा, अर प्रचार म्ह ज्ञान की लुभाण आळी बात कोनी, पर पवित्र आत्मा नै सामर्थी रूप तै जाहिर करया सै, के जो सन्देश मन्नै थारे ताहीं सुणाया सै, वो सच्चा सै।<sup>5</sup> ज्यांतै के थारा विश्वास माणसां के ज्ञान पै न्ही, पर परमेसवर की सामर्थ के आसै हो।

~~~~~

6 फेर भी मै, जो विश्वास म्ह मजबूत सै उन ताहीं, ज्ञान भरया सन्देश सुणाऊँ सुं, पर यो इस दुनिया का अर इस दुनिया के नाश होण आळे हाकिमां का ज्ञान कोनी।<sup>7</sup> पर जो ज्ञान हम सुणावां सां, वो परमेसवर का ज्ञान सै, जो छिप्या होया था, कोए भी उस ताहीं इब ताहीं न्ही समझ पाया था, परमेसवर नै दुनिया बणाण तै पैहले ए यो फैसला कर लिया था, के उसका ज्ञान म्हारे खात्तर महिमा लेके आवेगा।<sup>8</sup> परमेसवर की योजना ताहीं इस दुनिया के हाकिमां म्ह तै कोए न्ही जाण पाया, क्यूँके जे वे जाणदे तो तेजोमय प्रभु ताहीं क्रूस पे कोनी चढ़ान्दे।<sup>9</sup> जिसा पवित्र ग्रन्थ म्ह लिख्या सै, “जो कदे आँखां तै देख्या कोनी गया, अर कान तै सुण्या कोन्या गया, अर जो बात माणसां के चित्त म्ह कोनी चढ़ी, वे सारी बात परमेसवर नै उन खात्तर तैयार करी जो उसते प्यार करै सै।”

10 पर परमेसवर नै उन बात्तां ताहीं अपणे पवित्र आत्मा के जरिये म्हारे पै जाहिर करया, क्यूँके पवित्र आत्मा सारी बात, बल्के परमेसवर की गहरी बात्तां नै भी जाँचै सै।<sup>11</sup> माणसां म्ह तै कोण किसे माणस की बात्तां नै जाणै सै, सिर्फ माणस की आत्मा जो उस म्ह सै? उस्से तरियां ए परमेसवर की बात्तां नै भी कोए न्ही जाणदा, सिर्फ परमेसवर की आत्मा।<sup>12</sup> पर परमेसवर नै म्हारे ताहीं अपना आत्मा दिया सै, अर हम इसा न्ही सोचते जो दुनिया के लोग सोचै सै, इस करके हम उन आशीषां नै पिच्छाण सका सां जो परमेसवर नै म्हारे ताहीं मुफ्त म्ह दी सै।<sup>13</sup> अर हम ये बात थारे ताहीं बतावां सां, हम माणसां के ज्ञान की सिखाई होइ बात्तां नै न्ही, पर पवित्र आत्मा की सिखाई होइ बात्तां नै आत्मिक माणसां ताहीं सिखावा सां।<sup>14</sup> पर शारीरिक माणस परमेसवर के आत्मा की बात अपनांदा कोनी, क्यूँके वे उसकी निगांह म्ह बेकूफी की बात सै, अर ना वो उन ताहीं जाण सकै सै क्यूँके उनकी जाँच आत्मिक तरियां तै होवै सै।<sup>15</sup> आत्मिक माणस सारा किमे जाँचै सै, पर वो दुसरयां के जरिये जाँचया न्ही जान्दा।<sup>16</sup> यो सच सै, क्यूँके पवित्र ग्रन्थ म्ह लिख्या सै, के कोए भी न्ही जाणता के प्रभु के मन म्ह के सै? पर हम विश्वासी माणस जाणा सां के मसीह के मन म्ह के सै।

## 3

~~~~~

1 हे विश्वासी भाईयो, जब मै थारे साथ था तो थारे ताहीं आत्मिक बात न्ही सीखा पाया, जिस तरियां मै आत्मिक माणसां नै सिखाऊँ सुं, पर मन्नै थारे तै दुनियावी माणसां की तरियां बात करी, क्यूँके थम मसीह म्ह इब भी बाळक के समान सां।<sup>2</sup> मन्नै थारे ताहीं परमेसवर के सुसमाचार की शुरुआती शिक्षा ए सिखाई, जिस तरियां कोए इन्सान छोटे बाळक नै दूध पियावै सै, अर मन्नै थारे ताहीं वचन की गहरी बात न्ही सिखाई जो की रोटी की तरियां सै, क्यूँके थम इब्ने उस ताहीं अपना न्ही सकदे।<sup>3</sup> क्यूँके इब ताहीं थम दुनियावी माणसां के पापी सुभाव के मुताबिक जीवन जिओ सां।

\* 2:3 2:3 थरथराता काम्बदा होया

ज्यांतै के इब भी थारे म्ह जळण अर झगड़े सै, तो के थम दुनियावी माणसां की तरियां कोनी? थम उन माणसां की तरियां सां जो परमेसवर के कोनी। 4 क्यूँके जब एक माणस कहवै सै, “मै पौलुस का चेल्ला सूं,” अर दुसरा कहवै सै, “मै अपुल्लोस का चेल्ला सूं,” तो के थम दुनियावी माणस की तरियां कोनी?

5 अपुल्लोस कौण सै? अर पौलुस कौण सै? सिर्फ सेवक, जिनके जरिये थमनै मसीह म्ह विश्वास करया। हम सब नै वोए काम करया जो म्हारे ताहीं प्रभु नै दिया। 6 यो उस पौधे की ढाळ सै, जो मन्नै लगाया, अपुल्लोस नै सींचा, अर परमेसवर नै बढ़ाया। 7 ज्यांतै ना तो लाणआळा किमे सै अर ना सींचण आळा, पर परमेसवर ए सारा किमे सै जो बढ़ाण आळा सै। 8 पौधा लगाण आळा अर उस ताहीं सींचण आळा दोनुआ का एक्के मकसद सै, पर हरेक माणस अपनी ए मेहनत के मुताबिक अपनी ए मजदूरी पावैगा। 9 क्यूँके हम परमेसवर के गैल काम करणीये सां, अर थम परमेसवर की खेती अर उस घर की ढाळ सां जिस ताहीं परमेसवर बणाण लाग रह्या सै।

10 परमेसवर नै जो वरदान मेरे ताहीं दिए सै, तो मन्नै एक अकलमंद चिणाई आळे मिस्त्री की तरियां घर की नीम धरी, अर दुसरा उसपै रद्दा\* धरै सै। पर हरेक माणस चौक्कस रहवै के वो उसपै किसा रद्दा धरै सै। 11 क्यूँके जो नीम धरी सै, वा यीशु मसीह सै, कोए दुसरी नीम कोनी धर सकदा। 12 जै सेवक परमेसवर की सच्ची शिक्षा सिखावै सै, जो परमेसवर नै उस ताहीं दी सै, तो वो उस राज मिस्त्री की ढाळ सै, जो उस नीम पै आच्छे समान तै, जुकर सोन्ना, चाँदी, बेसकिमती पत्थर के जरिये, नीम पै घर बणावै सै, अर जै वो झूट्टी शिक्षा नै सिखावै सै, तो वो उसकी ढाळ सै, जो लाकड़ी, घास-फूस तै नीम पै घर बणावै सै। 13 तो हरेक माणस अपने काम नै देक्खैगा के उसनै किसा काम करया सै, क्यूँके यीशु मसीह जाहिर कर देवैगा जब वो बोहड़ के आवैगा, यो उस दिन की तरियां होगा जब वो समान आग म्ह डाला जावैगा तो वो देक्खैगा के किसनै किसा काम करया सै, फेर वो फैसला करैगा के किसनै आच्छा अर किसनै बुरा काम करया सै। 14 जिस किसे का बणाया गया घर उस नीम पै डटया रहवैगा, तो वोए उसकी मजदूरी पावैगा। 15 जै मसीह तय करै के जो काम करया सै वो सही कोनी तो मसीह उस काम करण आळे नै मजदूरी न्ही देवैगा, पर वो अनन्त जिन्दगी नै न्ही खोवैगा जो परमेसवर नै उस ताहीं दी सै। 16 के थमनै न्ही बेरा के थम परमेसवर के मन्दर सो, अर परमेसवर की आत्मा थारे म्ह वास करै सै? 17 जै कोए परमेसवर के मन्दर नै नाश करैगा, तो परमेसवर उसनै नाश करैगा, क्यूँके परमेसवर का मन्दर पवित्र सै, अर वो थम सो।

18 धोक्खे म्ह ना रहों, जै थारे म्ह तै कोए यो सोच बेट्टै के वो दुनियावी बात्तां के मुताबिक अकलमंद सै, तो ठीक तो यो होगा के वो खुद नै बेकूफ बणाले ताके अकलमंद बण जावै। 19 क्यूँके इस दुनिया का ज्ञान परमेसवर की नजर म्ह बेकूफी सै, जिसा पवित्र ग्रन्थ म्ह लिख्या सै, “वो ज्ञानियाँ ताहीं उनकी श्याणपत म्ह फँसा देवै सै।” 20 अर यो भी लिख्या सै, के “प्रभु ज्ञानियाँ के विचारां नै जाणै सै, के वो बेकार सै।” 21 ज्यांतै माणसां पै कोए घमण्ड ना करै, क्यूँके सारा किमे धारा सै। 22 के पौलुस, के अपुल्लोस, के कैफा, के दुनिया, के जीवन, के मरण, के वर्तमान, के भविष्य, सारा किमे धारा सै, 23 अर थम मसीह के सो, अर मसीह परमेसवर का सै।

## 4



1 माणस हमने मसीह के सेवक अर परमेसवर के भेदां के भण्डारी समझै, जो माणसां नै परमेसवर का भेद समझावै सै। 2 फेर उरै भण्डारी म्ह या बात देखी जावै सै, के वो विश्वास के जोगगा हो। 3 पर मेरी निगाह म्ह या घणी छोट्टी बात सै, के थम या माणसां का कोए न्यायाधीश मन्नै परखै, बल्के मै खुद अपने-आप ताहीं कोनी परखदा। 4 क्यूँके मेरा मन मेरै ताहीं किसे बात म्ह कसूरवार कोनी ठहरान्दा, इस म्ह मै बेकसूर कोनी ठहरदा, पर मेरा परखण आळा प्रभु सै। 5 ज्यांतै जब ताहीं

\* 3:10 3:10 रद्दा ईंट का पाळा

प्रभु का आणा ना हो, कोए किसे नै परखै ना, वो माणसां के विचारां नै साफ-साफ जाहिर कर देगा, अर वो माणसां के मनां के मकसद नै दिखावैगा, फेर परमेसवर की ओड़ तै हरेक की बड़ाई होवैगी।

6 हे विश्वासी भाईयो, मन्नै अपना अर अपुल्लोस का जिक्र उदाहरण के तौर पै करया सै, यो बताण खात्तर के मै थारे ताहीं के कहणा चाहूँ सूँ, जै थम उसपै ध्यान करो, जो पवित्तर ग्रन्थ म्ह लिख्या सै, अर उसतै आगौ ना बढो, इसा ना हो के थम एक माणस का पक्ष ल्यो, अर दुसरे का अपमान करो। 7 थारे ताहीं कौण कहवै सै, के थम दुसरयां तै उत्तम हो? हर काबलियत थमनै परमेसवर की ओड़ तै मिली सै, अर सब कुछ परमेसवर के जरिये दिया गया सै, तो थमनै घमण्ड करण का कोए हक कोनी?

8 थम सोच्चो सों के थारे धौरै पवित्तर आत्मा के सारे वरदान सै, जो माणसां ताहीं दिए जावै सै, थम यो सोच्चों सों के म्हारे बिना सहयोग के थम राजा बणगे सो, अर थम साहूकार भी बण लिए सो, पर आच्छा तो यो होंदा के थम असलियत म्ह ए राजा बणे होन्दे, अर हम भी थारे गेल्या राज करदे। 9 परमेसवर नै हम प्रेरितां ताहीं सारया तै आखरी जगहां पै राख्या सै। हम उन माणसां की तरियां सां, जिनकी मौत का हुकम हो लिया सै, क्यूँके हम सुगंदतां अर दुनिया के माणसां के खात्तर एक तमाशा बणे सां। 10 माणस हमनै बेकूफ समझै सै, क्यूँके हम मसीह का प्रचार करया सां। थम या सोच्चों सों के थम अकलमंद सों, क्यूँके मसीह कै गैल थारा रिश्ता सै। भोत सारे माणस या सोच्चै सै के प्रेरित होण का म्हारे धौरै अधिकार कोनी, पर थम घमण्ड तै कहो सों, के थारे धौरै परमेसवर की शक्ति सै। माणस म्हारा न्ही थारा आदर करै सै। 11 हम आज तक भूक्खे-प्यास्से मार खावां सां, अर पाट्टे-पुराणे लत्यां म्ह रहवां सां, अर ना ए म्हारे घर-बार सै। 12 अर अपणे ए हाथ्यां तै काम करके मेहनत करा सां। माणस म्हारै ताहीं बुरा कहवै सै, हम आशीष देवां सां, वे सतावै सै, हम सहण करा सां। 13 वे बदनाम करै सै, हम प्यार तै बोल्ला सां। आज भी दुनिया के माणस म्हारा आदर कोनी करते, क्यूँके वे न्यू समझै सै के हम बेकार के माणस सां।



14 मै थमने शर्मिन्दा करण कै खात्तर ये बात कोनी लिखदा, मेरा मकसद यो सै के मै थमनै सुधार क्यूँके थम मेरे उन प्यारे बाळकां की ढाळ सों, जिनतै मै प्यार करूँ सूँ। 15 जै मसीह म्ह थारे सिखाण आळे दस हजार भी होन्दे, तोभी थारे पिता घणे कोनी, क्यूँके मसीह यीशु म्ह थारे ताहीं सुसमाचार सुणाण कै कारण मै थारा पिता बणगया। 16 मै थारे तै बिनती करूँ सूँ के मेरे जिसा जीवन जिओ। 17 इस करके मन्नै तीमुथियुस ताहीं जो प्रभु म्ह मेरा प्यारा अर विश्वास कै जोगगा बेट्टा सै, थारे धौरै भेज्या सै। वो थमनै मसीह यीशु म्ह मेरा चाल-चलण याद करवावैगा, जिस तरियां के हरेक जगहां मै हरेक कलीसिया म्ह उपदेश देऊँ सूँ। 18 थारे म्ह तै घणखरे तो यो सोच्चै सै, के मै थमनै दुबारा मिलण कोनी आऊँगा, इस करके वे घमण्डी होगे सै। 19 पर प्रभु नै चाह्या तो मै थारे धौरै तावळा-ए आऊँगा, अर देखूँगा के ये घमण्डी माणस सिर्फ बणावटी बात करै सै, या इनकै धौरै परमेसवर की सामर्थ सै। 20 क्यूँके परमेसवर का राज्य बात्तां म्ह न्ही पर परमेसवर की सामर्थ के साथ जीण म्ह सै। 21 थम के चाहो सों, जो मै थारे गैल करूँ? जै थम अपना बुरा सुभाव न्ही छोड़ोगे तो मै सखताई तै थारे गैल पेश आऊँ, अर जै बुरा सुभाव छोड़ दोगे तो मै प्यार अर नरमाई तै थारे धौरै आऊँगा।

## 5




1 कई माणसां नै थारे बारे म्ह बताया सै, के कलीसिया म्ह कई माणस सै जो जारी करै सै, बल्के इसी जारी जो अविश्वासी माणसां म्ह भी कोनी होन्दी, के एक माणस अपनी सौतेल्ली माँ गैल गलत सम्बन्ध राखे सै। 2 कलीसिया के माणसां नै इस बात तै दुखी अर उदास होणा चाहिए, जिनने इसा काम करया सै, उनने कलीसिया तै काढ देणा चाहिए, पर थम तो इसी बात्तां पै घमण्ड करो सों। 3 भलाए मै थारे तै दूर था, पर इसा मान्ना, जणु मै आत्मा म्ह थारे धौरै था, अर इसा पाप

करण आळे माणस के बारे म्ह मेरा योए हुकम सै। 4 थमनै यो करणा चाहिए, के जिब थम विश्वासी भाई कदठे होओ सों, तो यो याद राख्खो के यीशु मसीह का अधिकार थारे धोरै सै, अर इसा मान्नो जणु मै आत्मा म्ह थारे साथ सू। जिब परमेसवर का सामर्थ थारे साथ हो, 5 तब वो माणस जो पाप करण लागरया सै, उस ताहीं कलीसिया तै लिकाइ द्यो, अर उस ताहीं शैतान के हाथ म्ह सौप द्यो। ताके वो अपने पापां खात्तर माफी माँग ले, अर वो आदमी माफी माँग ले सै, तो वो उस दिन बच जावैगा, जिस दिन परभु यीशु मसीह बोहड़के आवैगा।

6 थारा घमण्ड करणा अच्छा कोनी, के थमनै न्ही बेरा के माड़ा-सा खमीर पूरे गुन्दे होए आटे ताहीं खमीर बणा देवै सै। उस्से तरियां जै एक माणस पाप करदा रहवै तो उस ताहीं देखके और माणस भी पाप करणा शुरु कर देंगे। 7 जिस तरियां यहूदी माणस फसह का त्यौहार मनाण तै पैहले, अपने घर तै खमीर काढ देवै सै, उस्से तरियां थम उस जाण माणस नै अपने टोळ म्ह तै लिकाइ द्यो, तो थम वो विश्वासियाँ का टोळ बण जाओगे, जिन म्ह कोए भी जाण-बुझ के पाप करण आळा न्ही होगा, अर परमेसवर थारे मन नै भित्तर तै साफ करैगा, जै थम मसीह पै विश्वास करोंगे, क्यूँके मसीह म्हारे खात्तर मरया ताके हमनै पापां तै आजाद करदे, वो उस भेड़ की ढाळ सै, जिस ताहीं यहूदी लोग फसह के त्यौहार पै बलिदान करै सै। 8 तो आओ, हम फसह का त्यौहार मनावां, ना तो पुराणे खमीर तै, ना बुराई अर दुष्टता के खमीर तै, बल्के खराई अर सच्चाई की अखमीरी रोट्टी तै। जिसका मतलब यो सै, के जिस तरियां थम विश्वासी बणण तै पैहले जिओ थे, उस तरियां जीणा छोड़के मसीह के पाच्छे चालणा शुरु कर द्यो, ताके थारे मनां म्ह कोए बुराई ना रह पावै।

9 मन्ने अपनी पैहले की चिट्ठी म्ह यो लिख्या था, के जारी करणीया की संगति ना करियो। 10 मेरा मतलब यो कोनी, के थम जमाए इस दुनिया के जारी, लालची, अन्धेर या मूर्तिपूजा करण आळे माणसां तै कोए सम्बन्ध ना राखियों, क्यूँके इस तरियां के माणसां तै बचण खात्तर तो थमनै दुनिया ए छोड़णी पड़ैगी। 11 पर मेरा कहणा यो सै के जै कोए भाई विश्वासी कुह्हाके, जार, लालची, मूर्तिपूजा करणीये, गाळी देण आळा, दारूबाज, या अन्धेर करणीया हो, तो उसकी संगति मतना करियो, बल्के इसे माणस के गेल्या खाणा भी ना खाईयों। 12 अविश्वासी माणसां का न्याय भला मै क्यूँ करूँ? मन्ने दुसरयां तै के काम? पर या जिम्मेदारी थारी सै के थम उनकी वारीकी तै जाँच करो, जो कलीसिया म्ह सै। 13 जिसा के पवित्तर ग्रन्थ कहवै सै, के अविश्वासी माणसां का न्याय परमेसवर करै सै। ज्यांतै उस बुरे काम करणीये ताहीं अपने विचाळे तै लिकाइ द्यो।

## 6



1 जै थारे म्ह किसे का दुसरे विश्वासी गैल झगड़ा हो जावै, तो अपना फैसला परमेसवर के पवित्तर माणसां के धोरै ले जाओ, ना के उस न्यायाधीश के धोरै जो के अविश्वासी सै। 2 के थमनै बेरा कोनी के दुनिया का न्याय पवित्तर माणस करैगें? ज्यांतै जिब थमनै दुनिया के माणसां का न्याय करणा सै, तो के थम छोट्या तै छोट्टे झगड्या का भी फैसला करण जोग्गे कोनी? 3 के थमनै न्ही बेरा के हम सुगंदतां का न्याय करगें? तो उसकी बराबरी म्ह ये दुनियावी झगड़े के सै? 4 जै थारे बीच दुनियावी झगड़े सै, तो फैसला करण खात्तर उननै ए बिठाओगे, जो कलीसिया म्ह किमे कोनी समझे जावै सै? 5 मै थमनै शर्मिन्दा करण के खात्तर न्यु कहूँ सू। के साच्चए थारे म्ह एक भी अकलमंद न्ही मिलदा, जो अपने विश्वासी भाईयां के बीच होए झगड़ नै सुलझा सकै? 6 पर याइ तो एक विश्वासी भाई दुसरे विश्वासी भाई नै कचेहड़ी म्ह घसीटे सै, अर वो भी अविश्वासी माणसां के स्याम्ही।

7 पर सच म्ह ए थारे म्ह मुकदमे चाल्लण लागरे सै, तो थम मसीह के माणस कोनी, इसकी बजाए थम खुद ए अन्याय अर अपना नुकसान क्यांतै न्ही सहन्दे? 8 पर थम तो खुदे अन्याय करो सों, अर नुकसान पोहोचाओ सों, अर वो भी दुसरे विश्वासी भाईयां ताहीं। 9 के थमनै न्ही बेरा के जुल्मी माणस परमेसवर के राज्य के वारिस न्ही होवैगें? धोक्खा ना खाओ, बेश्या के धोरै जाणीए, मूर्ति

पूजणीये, बिगान्नी लुगाई के धोरै जाणीए, लुच्चे, माणसां के गेल्या कुकर्म करणीये, <sup>10</sup> चोर, लालची, दास्बाज, गाळी देणीये अर अन्धेर करणीये परमेसवर के राज्य के वारिस न्ही होवैगें। <sup>11</sup> अर थारे म्ह तै कई इसेए थे, पर प्रभु यीशु मसीह के नाम तै अर म्हारै परमेसवर के आत्मा तै थारे पाप धोए गये, अर पवित्तर अर धर्मी बणे।

**THE BIBLE IN BRIEF**

<sup>12</sup> थम कह सका सों, के मै कुछ भी करण खात्तर आजाद सूं, पर मै कहूँ सूं, के सारी चीज मेरे फायदे की कोनी, जब के मै सब कुछ कर सकूँ सूं, पर मै किसे चीज का गुलाम कोनी। <sup>13</sup> थम कह सका सों, के “खाणा पेट के खात्तर, अर पेट खाणे के खात्तर सै,” यो सच सै, पर परमेसवर पेट अर खाणे नै दोनुआ ताहीं नाश करैगा। उस्से तरियां देह जारी के खात्तर कोनी, बल्के प्रभु की महिमा खात्तर सै, अर प्रभु देह का रुखाळिया सै। <sup>14</sup> इस्से तरियां म्हारी देह भी महत्वपूर्ण सै, क्यूँके जिस तरियां परमेसवर नै अपणी सामर्थ तै प्रभु यीशु ताहीं जिन्दा करया, अर वो म्हारै ताहीं भी जिन्दा करैगा। <sup>15</sup> के थमने बेरा सै के थारी देह मसीह का अंग सै? तो के मै मसीह के अंग लेके उन ताहीं बेश्या के संग जोड़ दूँ? कदे भी न्ही। <sup>16</sup> के थमने न्ही बेरा के जो कोए बेश्या तै संगति करे सै, वो उसकै गेल्या एक तन हो जावै सै, क्यूँके पवित्तर ग्रन्थ म्ह लिख्या सै, “वे दोन्नु एक तन होवैगें।” <sup>17</sup> अर जो प्रभु की संगति म्ह रहवै सै, उसकी अर परमेसवर की आत्मा एक हो जावै सै। <sup>18</sup> जारी तै बचे रहो। और दुसरा कोए पाप म्हारै देह पै असर कोनी गैरे जितना के जारी, पर जारी करणीया अपणी ए देह के खिलाफ पाप करे सै। <sup>19</sup> के थमने न्ही बेरा के थारी देह पवित्तर आत्मा का मन्दर सै, जो थारे म्ह बस्या होया सै, अर थारे ताहीं परमेसवर की ओड़ तै मिल्या सै, अर थम परमेसवर के सो। <sup>20</sup> क्यूँके थम दाम देकै मोल लिये गये सो, ज्यातै अपणी देह के जरिये परमेसवर की महिमा करो।

## 7

**THE BIBLE IN BRIEF**

<sup>1</sup> उन बाततां के बारे म्ह जो थमने मेरे ताहीं चिट्ठी म्ह पूच्छी थी, के यो ठीक सै, के माणस ब्याह ना करै। <sup>2</sup> क्यूँके भोत सारे माणस जारी करै सै, इस करके हरेक माणस जारी तै बचण खात्तर ब्याह करले, अर धणी-बीर\* एक-दुसरे के परति वफादार हो। <sup>3</sup> पति अपणी पत्नी की शारीरिक इच्छा पूरी करै, अर उस्से तरियां ए पत्नी भी अपणे पति की शारीरिक इच्छा पूरी करै। <sup>4</sup> पत्नी का अपणी देह पै हक कोन्या पर उसके पति का हक सै, उस्से तरियां ए पति नै भी अपणी देह पै हक कोनी, पर पत्नी का सै। <sup>5</sup> थम एक-दुसरे तै न्यारे ना रहो, पर सिर्फ कुछ बखत खात्तर आप्स म्ह सलाह करके प्रार्थना के खात्तर बखत लिकाड़ो, अर फेर एक साथ रहो, इसा ना हो के थारे असंयम के कारण शैतान थमने इम्तिहान म्ह फँसा ले। <sup>6</sup> पर मेरा यो सुझाव सै, ना के आज्ञा। <sup>7</sup> मेरा तो यो सुझाव सै, के जिसा मै अकेल्ला सूं, उस्से तरियां ए सारे माणस भी अकेल्ले रहै। हरेक माणस ताहीं परमेसवर की ओड़ तै एक तरियां का उपहार मिला सै, किसे ताहीं ब्याह का, अर किसे ताहीं एकला रहण का। <sup>8</sup> अविवाहितां अर बिधवायां के बारे म्ह मेरी या सलाह सै, के उनकै खात्तर एकला रहणा ठीक सै, जिसा मै सूं। <sup>9</sup> पर जै वे खुद पै काबू ना राख सकै, तो ब्याह करै, क्यूँके ब्याह करणा वासना म्ह जळण तै भला सै।

<sup>10</sup> जिनका ब्याह होगया सै, उन ताहीं मै न्ही, बल्के प्रभु यीशु हुकम देवै सै, के पत्नी अपणे पति तै तलाक ना देवै <sup>11</sup> जै तलाक हो भी जावै, तो पत्नी बिना दुसरा ब्याह करे रहवै, या पत्नी अपणे पति तै दुबारा मेल कर लेवै, अर पति अपणी पत्नी नै तलाक ना दे।

<sup>12</sup> दुसरयां तै, प्रभु यीशु मसीह न्ही पर मै ए कहूँ सूं, जै किसे भाई की पत्नी विश्वास ना राखदी हो अर उसकै गेल्या रहण म्ह राज्जी हो, तो वो उस ताहीं तलाक ना देवै। <sup>13</sup> जिस बिरबान्नी का धणी विश्वास ना राखदा हो, अर उसकै गेल्या रहण म्ह राज्जी हो, तो वा धणी नै तलाक ना देवै।

\* 7:2 7:2 धणी-बीर पति-पत्नी

14 विश्वासी पत्नी होण के कारण अविश्वासी पति ताहीं भी परमेसवर अपणे ए लोग मान्ने सै, क्यूँके उसकी पत्नी विश्वासी सै, इस्से तरियां जै विश्वासी पति हो तो उसके कारण अविश्वासी पत्नी ताहीं भी परमेसवर अपणे ए लोग मान्ने सै, क्यूँके उसका पति विश्वासी सै, जै यो सच न्ही होन्दा तो थारा अविश्वासी पति या पत्नी परमेसवर के न्ही कुहान्दे, अर थारे बाळ-बच्चे भी परमेसवर के न्ही कुहान्दे, पर इब वे परमेसवर के कुह्वावै सै। 15 पर जो माणस विश्वास कोनी राखदा, अर जै वो तलाक देणा चाहवै, तो उस ताहीं तलाक देण द्यो, इसी दशा म्ह विश्वासी भाई या भाण ब्याह के बन्धन तै आजाद हो जावै सै। क्यूँके परमेसवर नै म्हारै ताहीं मेळ-मिलाप कै खात्तर बुलाया सै। 16 क्यूँके हे विरबान्नी, तू के जाणै सै के तू अपणे धणी का उद्धार करा लेवैगी? अर हे भले माणस, तू के जाणै सै के तू अपणी पत्नी का उद्धार करा लेवैगा?

### परमेसवर नै जिस ताहीं जिस दशा म्ह राख्या सै, अर जिस रूप म्ह मसीह पै विश्वास करण खात्तर बुलाया सै, वो उस्से म्ह बणया रहवै। मै सारी कलीसियां ताहीं योए सुझाव देऊँ सूं।

17 परमेसवर नै जिस ताहीं जिस दशा म्ह राख्या सै, अर जिस रूप म्ह मसीह पै विश्वास करण खात्तर बुलाया सै, वो उस्से म्ह बणया रहवै। मै सारी कलीसियां ताहीं योए सुझाव देऊँ सूं। 18 जो यहूदी माणस परमेसवर पै विश्वास करै सै, उस ताहीं खतने के निशान नै हटाण की जरूरत कोनी, अर जो गैर यहूदी माणस परमेसवर पै विश्वास करै सै, उस ताहीं खतना करवाण की जरूरत कोनी। 19 इस बात तै कोए फर्क न्ही पड़ता के किसे माणस का खतना होया सै या कोनी होया, पर सब तै जरूरी बात या सै, के वो परमेसवर के हुकमां नै मान्ने। 20 हरेक माणस मसीह बणण तै पैहले जिस हालत म्ह बुलाया गया हो, उस्से हालत म्ह रहवै। 21 जै तू गुलाम की हालत म्ह बुलाया गया सै, तो फिक्र ना करै, पर जै तू आजाद हो सकै, तो तू आजाद होण की कोशिश कर। 22 क्यूँके जो दास की हालत म्ह मसीह पै विश्वास करण खात्तर बुलाया गया सै, वो मसीह का आजाद करया होया सै। उस्से तरियां ए जो आजादी की हालत म्ह बुलाया गया सै, वो मसीह का दास सै। 23 परमेसवर नै थम दाम देकै मोल लिये हो, इस करकै थम माणसां के दास न्ही, पर परमेसवर के दास बणो। 24 मै दुबारा तै कहूँ सूं, हे विश्वासी भाईयो, मसीह पै विश्वास करण तै पैहले थम जिस हालत म्ह बुलाये गये थे, विवाहित या अविवाहित उस्से हालत म्ह परमेसवर कै गेल्या रहों।

### परमेसवर नै जिस ताहीं जिस दशा म्ह राख्या सै, अर जिस रूप म्ह मसीह पै विश्वास करण खात्तर बुलाया सै, वो उस्से म्ह बणया रहवै। मै सारी कलीसियां ताहीं योए सुझाव देऊँ सूं।

25 अविवाहितां के बारे म्ह प्रभु का कोए हुकम मान्ने कोनी मिल्या, पर प्रभु नै दया करकै मेरे ताहीं बुद्धि दी सै, जिसपै भरोस्सा करया जा सकै सै, अर मै थमनै सलाह देऊँ सूं। 26 मेरी समझ म्ह यो ठीक सै के आजकाल के क्लेश के कारण, जै माणस कुवारा सै, तो वो कुवारा ए रहवै। 27 जै तेरी पत्नी सै, तो उसनै तलाक देण की कोशिश ना करै, अर जै तेरे पत्नी कोन्या, तो अपणे खात्तर उसनै टोहवै ना। 28 पर जै तू ब्याह भी करै, तो पाप कोनी, अर जै कोए कुंवारी छोरी ब्याह करै सै, तो यो कोए पाप कोनी। हालाकि शादीशुदा माणस इस दुनिया म्ह भोत सी परेशानियां का सामना करैंगे, अर मै चाहूँ सूं के थम इन परेशानियां म्ह ना पड़ो। 29 हे विश्वासी भाईयो, मेरा मतलब यो सै के मसीह के आण का बखत थोड़ा ए बाक्की रह गया सै, इस करकै आज तै या चिन्ता ना करो के धारी पत्नी सै या न्ही, पर परमेसवर की सेवा म्ह लागे रहों। 30 रोण आळे, आनन्द करण आळे, अर चिज्जां नै मोल लेण आळे इन चिज्जां के बारे म्ह घणा ना सोचवै, क्यूँके इन सारी बात्तां की फिक्र थमनै परमेसवर की सेवा तै भटका देवैगी। 31 जो भी इस दुनिया म्ह सै, उननै अपणे खात्तर ज्यादा कीमती ना समझों, क्यूँके दुनिया की सारी चीज नाश हो जावैगी। 32 मेरी इच्छा या सै के थम संसारिक जिन्दगी की अभिलाषा तै मुक्त रहों। कुंवारे माणस प्रभु की सेवा करण की फिक्र म्ह रहवै सै के प्रभु ताहीं किस तरियां खुश करै। 33 पर ब्याहता माणस दुनिया की चिज्जां की फिक्र म्ह रहवै सै, के अपणी पत्नी नै किस तरियां तै खुश करै। 34 कुंवारी अर ब्याहता विरबान्नी म्ह भी फर्क सै, कुंवारी विरबान्नी प्रभु की सेवा की फिक्र म्ह रहवै सै, अर वा देह अर आत्मा म्ह पवित्तर रहण की कोशिश कर दी रहवै सै, पर ब्याहता विरबान्नी दो बात्तां की फिक्र म्ह रहवै सै, के अपणे पति नै किस तरियां खुश राखवै, अर परमेसवर नै किस तरियां खुश राखवै। 35 मै या बात धारी ए

भलाई खात्तर कहूँ सूँ, ना के थमनै फसाण के मारे, बल्के ज्यांतै के जिसा शोभा देवै सै, उसाए करया जावै, के थम एक चित्त होकै परभु की सेवा म्ह लागगे रहो ।

36 जै किसे पिता नै यो लागगै के मै अपनी कुंवारी बेट्टी के ब्याह म्ह देर करके उसके गैल अन्याय कहूँ सूँ, क्यूँके उसकी उमर ढळण लागरी सै, तो वो वोए करै जो उसने ठीक लागगै सै, वो उसने ब्याह करण दे, यो कोए पाप कोनी । 37 पर जिस पिता नै मन म्ह यो ठान लिया सै, के वो अपनी छोरी का ब्याह कोनी करै, तो उस ताहीं कोए उसका ब्याह करण खात्तर मजबूर ना करै, यो उसका हक सै जो वो चाहवै वोए करै, अर वो अपनी छोरी नै कुवारी ए राख सके सै । 38 ज्यांतै जो अपनी कुवारी छोरी का ब्याह कर देवै सै, तो वो सही करै सै, अर जो ब्याह न्ही करदा, वो और भी सही करै सै ।

39 बिरबान्नी जिब ताहीं धणी के गैल बंधी रहवै सै, जिब ताहीं के उसका धणी जिन्दा सै, पर जै उसका धणी मर जावै तो जिसतै चाहवै वा ब्याह कर सके सै, पर वो परमेसवर पै विश्वास करण आळा हो । 40 पर जै वा दुबारा ब्याह ना करै, तो मेरै विचार म्ह और भी ज्यादा सुखी सै, अर मै समझूँ सूँ, के परमेसवर का आत्मा मेरी अगुवाई करै सै ।

## 8

~~~~~

1 थारी चिट्ठियाँ म्ह मूर्तियाँ के आगे चढ़ाई होइ चिज्जाँ के खाण के बारे म्ह थमनै पूछा था । हम सारया नै इस बात के बारे म्ह कुछ ज्ञान सै । ज्ञान म्हारे म्ह घमण्ड पैदा करै सै, पर प्यार तै बढ़ोतरी होवै सै, अर प्यार म्हारे ताहीं दुसरयाँ की मदद करणा सिखावै सै । 2 जै कोए समझे सै के वो सब कुछ जाणै सै, तो वो इब ताहीं यो कोनी जाणता के किस तरियाँ जाणणा चाहिये । 3 पर जै कोए परमेसवर तै प्यार करै सै, तो परमेसवर भी उस ताहीं जाणै सै ।

4 मूर्तियाँ के स्याम्ही बलि करी होई चिज्जाँ के खाण के बारे म्ह हम जाणा सां, के दुनिया म्ह कोए भी मूर्ति सच्चा परमेसवर कोनी, क्यूँके एकैए सच्चा परमेसवर सै । 5-6 फेर भी धरती अर अकास पै भोत सै, जिन ताहीं लोग ईश्वर अर देवता कहवै सै, पर म्हारे खात्तर तो एकैए परमेसवर सै । यानिके पिता जिसकी ओइ तै सारी चीज सै, अर हम उससे के खात्तर सां । एकैए परभु सै, यानिके यीशु मसीह जिसके जरिये सारी चीज बणाई गई, अर हम भी उससे के जरिये जिन्दे सां ।

7 पर म्हारे कुछ विश्वासी भाईयाँ नै इब ताहीं बेरा कोनी के मूर्तियाँ म्ह कोए शक्ति कोनी । क्यूँके वे पैहले मूर्तियाँ की पूजा करै थे, जिब वे मूर्तियाँ ताहीं दी गई बलि म्ह तै खावै सै, तो गलती तै इब भी मूर्तियाँ की पूजा करण म्ह शामिल सै, अर गलती तै सोचवे सै के उननै पाप कर दिया जिब वे मूर्ति के स्याम्ही चढ़ाई चीज खा लेवै सै । 8 खाणा हमनै परमेसवर के लोवै कोनी पोहोचान्दा । खाण तै इन्कार करण तै परमेसवर म्हारे तै खुश न्ही होन्दा, अर ना ए खाणा म्हारे ताहीं परमेसवर की निगाह म्ह आच्छा बणादा । 9 पर सावधान! इसा ना होवै के थारी या आज्ञादी कदे विश्वास म्ह कमजोर लोगगां खात्तर ठोक्कर का कारण हो जावै । 10 थम जाणो साँ के मूर्त असली देवता कोनी, अर थम मूर्तां के मन्दर म्ह खाओ साँ, पर जो विश्वास म्ह कमजोर आदमी थारे ताहीं ओइ खान्दे देखे सै तो वो उत्साहित होवैगा, ताके मूर्ति के स्याम्ही बलि करया गया माँस वो खावै, जिब के उस ताहीं बेरा सै के यो पाप सै, जै वो इसा काम करै सै । 11 इस तरियाँ तै तेरे ज्ञान के कारण वो विश्वास म्ह कमजोर भाई जिसके खात्तर मसीह मरया, मसीह म्ह विश्वास करणा छोड़ देवैगा । 12 इस तरियाँ तै विश्वासी भाईयाँ के खिलाफ अपराध करण तै अर उनकी कमजोर अन्तरात्मा ताहीं चोट पोहोचान तै, थम मसीह के खिलाफ अपराध करो सो । 13 इस कारण जै मूर्तियाँ ताहीं दिया गया खाणा खाण तै दुसरे विश्वासियाँ खात्तर विश्वास छोड़ण का कारण बणै सै, तो मै उस तरियाँ का खाणा कदे न्ही खाऊँगा ताके दुसरे विश्वासी भाई विश्वास करणा ना छोड़ दे ।

## 9

~~~~~

1 जो मैं चाहूँ सूँ, वो सब कुछ करण खात्तर मैं आजाद सूँ, मैं प्रेरित सूँ। मन्ने म्हारे प्रभु यीशु ताहीं देख्या सै, थम प्रभु म्ह मेरी मेहनत का ईनाम सों। 2 जै दुसरे माणस या न्ही मानते के मैं प्रभु यीशु का प्रेरित सूँ, तो भाईयो थमनै बिश्वास करणा होगा, क्यूँके मैं वो सूँ, जो थारे धोरे सुसमाचार लेकै आया। थारा प्रभु यीशु मसीह म्ह बिश्वास यो बतावै सै के मैं प्रेरित सूँ।

3 जो माणस मेरे प्रेरित होण पै शक करै सै, उनकै खात्तर योए मेरा जवाब सै। 4 बरनबास अर मेरे खात्तर, प्रेरित होण के कारण म्हारे ताहीं यो हक सै, के हम अपने काम के खात्तर थारे तै आर्थिक मदद ले सका सां। 5 के हमनै यो हक कोनी, के किसे मसीह भाण के गेल्या ब्याह करकै उस ताहीं अपने गैल सफर म्ह लेके जावां, जिसा दुसरे प्रेरित अर प्रभु का भाई याकूब, यहूदा अर पतरस करै सै। 6 मेरै अर बरनबास के धोरे भी यो हक सै, के हम और प्रेरितां के स्याम्ही आर्थिक मदद हासिल करां अर म्हारे ताहीं जीण खात्तर कोए काम करण की जरूरत कोनी। 7 कौण सा फौज्जी अपने खर्च तै जंग लड़ै सै? कौण अंगूर का बाग लगाके उसका फळ न्ही खान्दा? कौण भेड़ों की रुखाळी करके उनका दूध कोनी पीन्दा?

8-9 मैं इन बातों नै सिर्फ माणस होण के नाते कोनी कहन्दा। मूसा नबी के नियम-कायदे भी योए कहवै सै, क्यूँके मूसा नबी के नियम-कायदे म्ह लिख्या सै, “नाज लिकाडते बखत चाल्दे होए बळथ का मुँह ना बाँधियो।” के परमेसवर बळथां की ए फिकर करै सै? 10 यो खास करके म्हारे खात्तर कहा गया सै, हाँ, म्हारे खात्तर ए लिख्या गया सै, क्यूँके यो जरूरी सै, के खेत बाहण आळा अर खलिहाण म्ह, भूसी तै नाज अलग करण आळा फसल का कुछ हिस्सा पाण खात्तर तो आस राखवै ए गा। 11 हमनै परमेसवर के सुसमाचार का प्रचार थारे बीच म्ह करया। उस माणस की ढळ जो पौधे लगावै सै, हमनै थारे भित्त परमेसवर के सन्देश ताहीं लगाया सै। इस करके यो म्हारा हक सै, के म्हारी आर्थिक जरूरतां के खात्तर हम थारी मदद हासिल करां। 12 थमनै दुसरे माणसां की भी आर्थिक मदद करी, जिननै थारे ताहीं सुसमाचार सुणाया था, बरनबास अर मैं उनतै भी ज्यादा आर्थिक मदद पाण का हक राख्वां सां, हालाकि, म्हारे म्ह तै किसे नै भी जोर कोनी दिया के थम उन चिज्जां नै द्यो जिनकी हमनै जरूरत सै। बल्के हम सब कुछ सहण खात्तर तैयार सां, ताके हम किसे ताहीं भी मसीह के बारे म्ह सुसमाचार पै बिश्वास करण म्ह अडचन पैदा ना करा। 13 के थमनै न्ही बेरा के जो मन्दर म्ह काम करण आळे सै, वे मन्दर म्ह तै खाणा खावै सै? पर जो वेदी\* पै बलि चढ़ावै सै वे बलिदानां का हिस्सा लेवै सै? 14 इस्से तरियां तै प्रभु नै भी ठहराया के जो माणस सुसमाचार सुणावै सै, उनकी जिन्दगी का गुजारा उन माणसां तै होणा चाहिए जो सुसमाचार सुणै सै।

15 पर मन्ने इन म्ह तै किसे भी अधिकार का इस्तमाल कोनी करया, अर ना ए मैं इस मकसद तै लिखूँ सूँ, के मेरै खात्तर इसा कुछ करया जावै। बजाये इसके, के कोए मन्ने, मेरी इस बात के गर्व तै अलग करै। इसतै आच्छा मैं मर जाणा समझ्गाँ। 16 जै मैं सुसमाचार सुणाऊँ, तो इस म्ह मन्ने गर्व करण का कोए हक कोनी। या तो मेरै ताहीं सौप्पी गई जिम्मेदारी सै। जै मैं सुसमाचार न्ही सुणाऊँ, तो मेरै पै धिक्कार सै! 17 जै मैं यो काम करूँ सूँ, जो मन्ने अपनी मर्जी तै चुण्या सै, तो मेरे ताहीं एक ईनाम मिलैगा, अर जै या मेरी अपनी मर्जी कोनी, पर एक जिम्मेदारी सै, जो मेरे ताहीं परमेसवर की ओड़ तै मिली सै, तो मैं किसे भी ईनाम की उम्मीद न्ही कर सकता। 18 तो मेरी कौण सी मजदूरी सै? या मेरी खुशी सै, के बिना भुगतान के मैं सुसमाचार का प्रचार करण लागरया सूँ, मेरै धोरे खर्चा मांगण का भी हक सै।

19 इसका मतलब यो कोनी के मैं माणसां का कहणा मान्नु, भलाए वे लोग मेरी आर्थिक मदद करै सै, पर मैं इसके खात्तर मजबूर कोनी, फेर भी मैं हरेक किसे का दास बण गया सूँ, ताके उन ताहीं मसीह के धोरे ल्या सकूँ। 20 जब मैं यहूदी नियम-कायदा नै मानण आळा था, तो मैं भी उन नियम-कायदा के अधीन था, मैं यहूदी माणसां के खात्तर यहूदी बण्या, ताके यहूदी माणसां नै परमेसवर के धोरे ले

\* 9:13 9:13 वेदी-परमेसवर ताहीं भेट चढ़ाण खात्तर एक जगहां





इम्तिहान म्ह कोनी गैरेगा, जो माणस कै सहण तै बाहरणै सै, बल्के वो थमनै शक्ति देवैगा के थम पाप ना करो।

~~~~~

14 इस कारण, हे मेरे प्यारे दोस्तों, मूर्तिपूजा तै बचे रहो। 15 मै अकलमंद जाणकै थारे तै कहूँ सूँ, जो मै कहूँ सूँ, उसके बारे म्ह सोच्यों के वो सही सै या गलत। 16 जब हम उसके कटोरे म्ह तै (अंगूर का रस) पीवां सां, जिस ताहीं हम प्रभु भोज म्ह इस्तमाल करां सां, जिसके खात्तर हम परमेसवर का धन्यवाद करा सां, हम असलियत म्ह मसीह के लहू म्ह साझी होण लागरे सां, अर जब हम रोट्टी तोड़ा सां अर इस ताहीं खावां सां, तो हम असलियत म्ह मसीह के देह म्ह साझा करण लागरे सां। 17 जब के सिर्फ एकैए रोट्टी सै, जो मसीह सै, भलाए हम घणे सां, फेर भी हम एक देह बण जावां सां, क्यूँके हम सब एक रोट्टी म्ह तै ए खावां सां। 18 इस्राएल के माणसां के बारे म्ह सोच्यों, जब वे सारे माणस खावे सै, जो परमेसवर ताहीं चढ़ाया जावे सै, उसतै वे परमेसवर की आराधना म्ह शामिल हो जावे सै, इस्से तरियां जो वो खाणा खावे सै, जो मूर्ति के आगै चढ़ाया जावे सै, तो वो भी मूर्ति की आराधना म्ह शामिल होवे सै, 19 मेरे कहण का मतलब के सै? यो सै के मूर्ति असलियत म्ह देवता सै, जिनके खात्तर बलिदान करे जावे सै अर के इस बलिदान की कोए अहमियत सै? 20 न्ही, बल्के जो माणस मूर्तियाँ नै बलिदान करै सै, वे परमेसवर के खात्तर न्ही पर ओपरी आत्मायाँ के खात्तर बलिदान करै सै, अर मै न्ही चाहन्दा के थम ओपरी आत्मायाँ के गैल-साइड्री होवो। 21 यो थारे खात्तर ठीक कोनी के, थम वो खाओ अर पीओ सां, जो ओपरी आत्मायाँ ताहीं चढ़ाया जावे सै, अर वो भी खाओ अर पीओ सां, जो हमनै प्रभु की मौत की याद दुवावे सै। 22 जै हम इसा करां सां, तो हम परमेसवर नै घणा गुस्सा दुवावां सां, अर हम परमेसवर तै घणे ताकतवर कोनी।

~~~~~

23 हम सब कुछ करण खात्तर आजाद सां, हम कहां सां, हाँ, पर सब कुछ म्हारे खात्तर आच्छा कोनी, हम सब कुछ करण खात्तर आजाद सां, पर सब कुछ म्हारे विश्वास नै कोनी बढ़ाते। 24 कोए अपनी ए भलाई नै न्ही, बल्के औरां की भलाई के बारे म्ह सोच्यों। 25 हालाकि जब थम कस्साइयाँ धोरे माँस लेण खात्तर बजारां म्ह जाओ सां, तो उनतै या ना पूछ्यो, के यो मूर्तियाँ के आगै चढ़ाया गया सै या न्ही, अर इसतै थारी अन्तरात्मा भी दुखी न्ही होगी। 26 थम इस करके खा सको सां क्यूँके पवित्र ग्रन्थ कहवे सै, “क्यूँके धरती अर धरती पै जो कुछ भी सै सब कुछ प्रभु का सै।” 27 जै अविश्वासियाँ म्ह तै कोए थमनै न्योँदा देवै, अर थम खाण खात्तर जाणा चाहो, तो जो किमे थारे स्याम्ही धरया जावे वोए खा ल्यो, अर थमनै यो न्ही पूछणा चाहिए, के यो चढ़ावा सै या न्ही, ताके चढ़ावा हो तो थम खुद नै दोषी महसूस कोनी करोगे। 28 पर जै कोए थारे तै कहवे, “यो खाणा तो मूर्ति ताहीं बलि करया गया था,” तो इस ताहीं अपनी अन्तरात्मा के कारण न्ही, बल्के थमनै बताण आळे माणस की अन्तरात्मा के कारण इसनै ना खाओ। 29 मै थारी अन्तरात्मा के बारे म्ह न्ही, पर उस बताण आळे माणस की अन्तरात्मा बारे म्ह कहूँ सूँ। जै थम खाण की आजादी पै जोर देओ सां, अर दुसरे माणस नै लागै सै के यो पाप सै, तो उसका के फायदा सै? कुछ भी तो कोनी। 30 जै मै मूर्तियाँ के आगै चढ़ाई होए चीज ताहीं धन्यवाद करके खाणे म्ह शामिल होऊँ सूँ, तो उसके खात्तर मेरे पै दोष क्यूँ लगाया जावे सै, जिसके खाणे खात्तर मन्नै परमेसवर के प्रति धन्यवाद जाहिर करया?

31 सारी बात्तां का निचोड़ यो सै के थम चाहे खाओ, चाहे पीओ, चाहे जो किमे करो, सारा किमे परमेसवर की महिमा कै खात्तर करो। 32-33 मै जो कुछ भी करूँ सूँ, हरक ताहीं खुश करण की कोशिश करूँ सूँ, अपने-आप का भला कोनी सोचदा, बल्के सबके भले कै खात्तर सोच्युँ सूँ, ताके वो बचाए जा सकै। उस्से तरियां थम भी इस्से तरियां जिओ, ताके यहूदी, गैर यहूदी अर परमेसवर की कलीसिया के माणसां के खात्तर उद्धार पाण म्ह रुकावट ना बणो।

## 11

1 जिस तरियां मैं मसीह के ज़िस्ती चाल चाल्लुं सूं, थम भी मेरी सी चाल चाल्लुं।

~~~~~

2 हे विश्वासी भाईयो, मैं थारी तारीफ करूं सूं। क्यूँके थम मेरे ताहीं हर बखत याद करो सों, अर जितनी शिक्षा मन्नै थारे ताहीं दी सै, उनका सावधानी तै पालन करते रहों। 3 पर एक बात सै जो मैं चाहूं सूं के थम उसनै जाण ल्यो, वा या सै के हरेक माणस का सिर मसीह सै, अर बिरबान्नी का सिर उसका धणी सै, अर मसीह का सिर परमेसवर सै। 4 जब थम कलीसिया म्ह कट्टे होओ सों, तो जो माणस सिर ढके होए प्रार्थना या भविष्यवाणी करै सै, वो मसीह का अपमान करै सै। 5 पर जो बिरबान्नी उघाड़े सिर प्रार्थना या भविष्यवाणी करै सै, इसका मतलब सै के वा अपणे धणी का अपमान करै सै, क्यूँके वा गन्जी होण के बरोब्बर सै। 6 जै बिरबान्नी ओढ़णी ना ओढ़े तो बाळ भी कटवा लेवै, जै बिरबान्नी के खात्तर बाळ कटवाणा या गन्जी होणा बड़े शर्म की बात सै, तो ओढ़णी ओढ़े। 7 हों, एक माणस नै सिर ढक्कन की जरूरत कोनी, क्यूँके परमेसवर नै उस ताहीं खुद के समान बना दिया सै, अर उस ताहीं अपणे ज़िस्ता सुभाव अर महिमा दी सै, पर बिरबान्नी मर्द की शोभा सै। 8 क्यूँके पैहला माणस बिरबान्नी तै न्ही होया, पर पैहली बिरबान्नी हव्वा, माणस तै होई। 9 परमेसवर नै पैहले माणस ताहीं बिरबान्नी की मदद करण खात्तर न्ही बणाया था, बल्के उसनै बिरबान्नी ताहीं बणाया ताके माणस की मदद करै। 10 अर इस बजह तै सुगंदूत्ता की मौजूदगी के कारण बिरबान्नी खात्तर जरूरी सै, के अधिकार के रूप म्ह उसनै अपणे सिर पै कुछ ओढ़णा चाहिए। 11 फेर भी प्रभु म्ह ना तो बिरबान्नी माणस तै, अर ना माणस बिना बिरबान्नी तै आजाद सै। 12 भलाए परमेसवर नै पैहले इन्सान तै पैहली जनानी बणाई, अर या जनानी ए सै जो इन्सान नै जन्म देवै सै, पर सारी चीज परमेसवर तै सै। 13 थम आप ए विचार करो, के कलीसिया म्ह बिरबान्नी नै उघाड़े सिर परमेसवर तै प्रार्थना करणा शोभा देवै सै? 14 के सुभाव कै तौर पै भी थमनै न्ही बेरा के जै माणस लाम्बे बाळ राखै, तो उसकै खात्तर अपमान सै। 15 पर जै लुगाई लाम्बे बाळ राखै तो उसकै खात्तर शोभा सै, क्यूँके बाळ उसकी ओढ़णी के खात्तर दिए गये सै। 16 पर जै कोए मेरे तै सहमत कोनी, तो म्हारे धौरे अर परमेसवर की कलीसिया के धौरे आराधना करण का इसकै अलावा कोए और रिवाज कोनी।

~~~~~


17 इब जो बात मैं थारे ताहीं बताऊं सूं, उसकै खात्तर मैं थारी बड़ाई कोनी करदा, ज्यातै के थारे कट्टे होण तै भलाई न्ही, पर नुकसान होवै सै। 18 क्यूँके मेरे सुणण म्ह आया सै, के जब थम कलीसिया म्ह आराधना के खात्तर कट्टे होवो सों, तो थारे म्ह फूट होवै सै, अर मैं मान्नु सूं के यो सच सै। 19 पर यकीनन थारे बीच बटवारा होणा चाहिए, ताके जिनकै धौरे परमेसवर की मंजूरी सै, उन ताहीं पिच्छड़ाणा जावै। 20 आखर म्ह थम जो एक जगहां म्ह कट्टे होवो सों, म्हारे प्रभु यीशु मसीह की मौत नै याद करण के खात्तर होओ सों, यो प्रभु-भोज खाण के खात्तर न्ही। 21 क्यूँके खाण के बखत एक-दुसरे तै पैहल्या अपणा खाणा खा लेवै सै, इस ढाळ कोए तो भूक्खा रहवै सै अर कोए मतवाला हो जावै सै। 22 के खाण-पीण के खात्तर थारे घर कोनी? या थम परमेसवर की कलीसिया का तिरस्कार अर गरीबां नै शर्मिन्दा करण पै तुले होए सों? इब मैं थारे तै के कहुँ? के इस बात म्ह थारी बड़ाई करूं? ना! बिलकुल न्ही।

23 मन्नै थारे ताहीं जितनी शिक्षा दी सै वोए शिक्षा सै, जो मन्नै परमेसवर की ओड़ तै मिली थी, के प्रभु यीशु जिस रात पकड़ाया गया, रोटी लेई, 24 अर परमेसवर का धन्यवाद करके उसनै तोड़ी अर कहा, “या मेरी देह सै, जो थारे खात्तर सै: मेरी यादगारी खात्तर न्यूए करया करो।” 25 इसे तरियां उसनै खाणे के बाद अंगूर के रस का कटोरा भी लिया अर कहा, “यो कटोरा मेरे लहू म्ह नया करार सै: जब कदे पीओ, तो मेरी यादगारी के खात्तर न्यूए करया करो।” 26 क्यूँके जब कदे थम या रोटी खाओ अर इस कटोरे म्ह तै पीओ सो, तो प्रभु की मौत नै जब ताहीं वो न्ही आवै, प्रचार करदे रहे।

27 ज्यांतै जो कोए इस तरिके तै प्रभु की रोटी खावे या उसके कटोरे म्ह तै पीवे, जिसतै मसीह का आनंद हो, तो वो प्रभु की देह अर लहू के बिरुध पाप करै सै। 28 ज्यांतै माणस अपणे-आप ताहीं जाँच लेवे अर इस्से तरियां तै इस रोटी म्ह तै खावे, अर इस कटोरे म्ह तै पीवे। 29 क्यूँके जो खादे-पिंदे बखत प्रभु की देह\* के साथ अपणे रिशते नै न्ही पिच्छाणता, वो इस खाणे अर पीणे तै अपणे उप्पर दण्ड ल्यावे सै। 30 अर दण्ड की शुरुआत थारे बीच हो ली सै, इस्से कारण थारे म्ह तै घणखरे कमजोर अर बीमार सै, अर घणखरे मर भी गये। 31 जै हम अपणे-आपनै जाँचदे तो दण्ड न्ही पांदि। 32 पर प्रभु म्हारे ताहीं दण्ड देके म्हारी ताड़ना करै सै, ज्यांतै के हम न्याय के दिन दुसरे माणसां के साथ दंडित ना करे जावां।

33 इस करके, हे विश्वासी भाईयो, जिब थम प्रभु भोज खाण खात्तर कट्टे होओ सो, तो एक-दुसरे के खात्तर ठहरे रहो, ताके थम मिलके प्रभु भोज खा सको। 34 जै कोए भूखा हो तो अपणे घर म्ह खा लेवे, ताके जिब थम एक साथ आओगे, तो थम सही तरियां तै बरताव करोगे, अर परमेसवर थारा न्याय कोनी करैगा। दुसरी बातानै नै मै जिब्बे सुलझाऊंगा जिब आऊंगा।

## 12



1 हे विश्वासी भाईयो, इब पवित्र आत्मा के जरिये दी गई उन खुबियाँ तै तालुकात राखती उन बाताने के बारे म्ह मै न्ही चाहन्दा के थम अनजाण रहो। 2 थम जाणो सो, के प्रभु म्ह विश्वास करण तै पैहले थम किसे थे, कोए थमनै राह दिखावे था ताके थम मूर्तियाँ की पूजा कर सको जो बोल न्ही सकदी। 3 ज्यांतै मै थमनै बताणा चाहूँ सूँ, के जो कोए परमेसवर की आत्मा की अगुवाई तै बोल्लै सै, वो न्ही कहन्दा के यीशु श्रापित सै, अर ना कोए पवित्र आत्मा के बिना कह सकै सै के यीशु प्रभु सै।

4 आत्मिक वरदान तो कई ढाळ के सै, पर या पवित्र आत्मा ए सै जो इन सबका भण्डार सै। 5 अर काम भी कई ढाळ के सै, जो हम परमेसवर खात्तर करा सां, पर हम सब एकेए परमेसवर की सेवा करा सां। 6 परमेसवर म्हारी जिन्दगी म्ह कई ढाळ के तरिकानां तै काम करै सै, पर यो वोए परमेसवर सै, जो हमनै उसके काम करण की काबलियत देवे सै। 7 एक इसी काबलियत सै जो म्हारे म्ह तै हरेक ताहीं दी जावे सै, जो पवित्र आत्मा की मौजूदगी नै दिखावे सै ताके हम अपणे संगी बिश्वासियाँ की मदद कर सका। 8 परमेसवर की आत्मा एक माणस ताहीं बुद्धि तै भरा सन्देश बोल्लण की काबलियत देवे सै, अर वाए आत्मा किसे दुसरे माणस नै ज्ञान तै भरा सन्देश बोल्लण की काबलियत देवे सै। 9 वो एक माणस ताहीं मसीह म्ह मजबुती तै विश्वास करण की काबलियत देवे सै, अर दुसरे माणस ताहीं आत्मा, बीमार लोगानां नै ठीक करण की काबलियत देवे सै। 10 किसे ताहीं सामर्थ के काम करण की ताकत, अर किसे ताहीं भविष्यवाणी की, अर किसे ताहीं आत्मायाँ की परख, अर किसे ताहीं घणी ढाळ की भाषा, अर किसे ताहीं भाषायां का मतलब बताणा की काबलियत दी। 11 पर ये परमेसवर की आत्मा सै, जो सारी काबलियत का भण्डार सै, अर वो हर किसे नै बाट देवे सै, जिसा वो चाहवे सै।



12 जिस तरियां देह के भोत सारे अंग होवे सै, पर भोत सारे अंग मिलके एक देह नै बणावे सै, उस्से ढाळ मसीह देह सै, अर सब विश्वासी उसके देह के अंग सै। 13 क्यूँके हम सब यहूदी, यूनानी, गुलाम अर आजाद, एके देह की तरियां सां, अर परमेसवर हम सब नै पवित्र आत्मा का बपतिस्मा देवे सै, अर हम सारया नै एके तरियां का पवित्र आत्मा पाया सै।

14 देह म्ह एके अंग न्ही, पर भोत-से सै। 15 जै पैर कहवै के मै हाथ कोनी, इस करके देह का अंग कोनी, तो के उसके इसा कहण तै वो देह का अंग कोनी? 16 अर जै कान कहवै, के मै आँख कोनी, इस करके देह का अंग कोनी, तो के वो इस कारण देह का अंग कोनी? 17 जै साब्ती देह आँख होन्दी

\* 11:29 11:29 प्रभु की देह कलीसिया नै बोल्लै सै

तो सुणणा कित्त तै होंदा? जै साबती देह कान ए होंदी तो सूँघणा कित्त तै होंदा? 18 पर सचमुच परमेसवर नै देह के सारे अंगा ताहीं अपणी मर्जी के मुताबिक एक-एक करके देह म्ह सही जगहां पै राख्या सै। 19 जै सारे अंग एके अंग होन्दे, तो देह कित्त तै होंदी? 20 बल्के अंग तो भतेरे सै, पर देह एके सै। 21 आँख हाथ तै कोनी कह सकदी, “मन्नै तेरी जरूरत कोनी,” अर ना सिर पैर तै कह सकै सै, के “मन्नै तेरी जरूरत कोनी।” 22 पर देह के कुछ अंग जो दुसरे अंगा तै कमजोर लागै सै, भोत-ए जरूरी सै। 23-24 अर देह के जिन अंगा नै हम कम आदर देवां सां, वे सै जिन ताहीं हम बड़ी सावधानी तै ढका सां, इस करके उन अंगा की हम सावधानी तै हिफाजत करा सां, जिन ताहीं देख्या न्ही जा सकता, जिन के आदर के लायक अंगा नै इस खास देखभाळ की जरूरत कोनी। इस करके परमेसवर नै देह ताहीं एक साथ राख्या सै, ताके उन अंगां ताहीं खास आदर अर देखभाळ दी जावै, जिनका महत्व कम सै। 25 ताके देह म्ह फूट ना पड़े पर देह के सारे हिस्से दुसरे अंगा की देखभाळ करै। 26 जै देह का कोए अंग दुख पावै सै, तो उसके गैल देह के सारे अंग दुख पावै सै, अर जै एक अंग की बड़ाई होवै सै, तो उसके गेल्या सारे अंग आनन्द मनावै सै।

27 इस्से ढाळ थम सारे मिलके मसीह की देह सो, अर थारे म्ह तै हरेक उसके देह के कुछ हिस्सां के रूप म्ह उसके अंग सां 28 मसीह की इस देह म्ह जो के कलीसिया सै, परमेसवर नै म्हारे ताहीं न्यारे-न्यारे ढाळ के काम करण के खात्तर दिया, सब तै पैहल्या प्रेरितां, फेर नबी, तीसरे शिक्षक, फेर सामर्थ के काम करण आळे, फेर चंगाई देण आळे, भलाई करण आळे, अर अगुवें, अर अन्य भाषा बोल्लण की काबलियत दी। 29 के सारे प्रेरित सै? न्ही! के सारे नबी सै? न्ही! के सारे उपदेशक सै? न्ही! के सारे सामर्थ के काम करण आळे सै? न्ही! 30 के सारया नै चंगा करण का वरदान मिल्या सै? न्ही! के सारे अन्य भाषा बोल्लै सै? न्ही! 31 के सारे अन्य भाषा का मतलब बताणीय सै? न्ही! थम सबतै उपयोगी वरदानां की धुन म्ह रहो, पर मै थमनै सारया तै बढ़िया राह बताऊँ सूं।

## 13

### ????-???? ? ? ???? ???? ?

1 जै मै माणसां अर सुगंदतां की बोल्ली बोल्लूँ अर दुसरयां तै प्यार ना करूँ, तो मै ठनठनादा होया पीत्तळ, अर झंझनाती होई झाँझ सूं। 2 अर जै मै भविष्यवाणी कर सकूँ, अर सारे भेद अर सारी ढाळ के ज्ञान ताहीं समझूँ, अर मन्नै उरै ताहीं इतणा बिश्वास हो के मै पहाड़ां ताहीं हटा दियूँ, पर दुसरयां तै प्यार ना करूँ, तो मै कुछ भी कोनी। 3 जै अपणा सारा धन कंगालां नै खुवा दियूँ, या अपणी देह जळण के खात्तर दे दियूँ, अर दुसरयां तै प्यार ना करूँ, तो मन्नै किमे भी फायदा कोनी।

4 जो लोग दुसरयां तै प्यार करै सै, वे पूरे धीरज अर दयालु तरिकेंके तै काम करै सै, वे नफरत न्ही करते, अर वे खुद की बड़ाई न्ही करते। 5 वे दुसरयां का अनादर कोनी करते, वे स्वार्थी कोनी अर ना ए तावळे नाराज होवै सै, पर आसान्नी तै उन माणसां ताहीं माफ करदे सै जो उनके खिलाफ बुरा बरताव करै सै। 6 जिन लोग बुरे काम करै सै तो वे खुश कोनी होन्दे, पर जिन लोग सही काम करै सै तो वे खुश होवै सै। 7 प्यार सारी बाततां नै सह लेवै सै, अर हमेशा म्हारे हरेक हालात्तां म्ह बिश्वास करण म्ह, परमेसवर पै भरोस्सा राक्खण म्ह, अर दुख अर मुसीबतां नै धीरज तै सहण करण म्ह म्हारी मदद करै सै।

8 प्यार सदा तक रहण आळा सै। जड़ै ताहीं भविष्यवाणीयां का सवाल सै, वे थोड़े ए बखत खात्तर सै, भाषाएँ बिना शब्द की हो जावैगी अर ज्ञान मिट जावैगा। 9 क्यूँके म्हारा ज्ञान अर म्हारी भविष्यवाणी का वरदान अधूरा सै। 10 पर जिन हम सिद्धता तक पोहच जावांगे तो, वो सब, जो अधूरा सै, मिट जावैगा। 11 जिन मै बाळक था, तो मै बाळकां की ढाळ बोल्लू था, बाळकां जिसी मेरी सोच थी, बाळकां जिसी समझ थी, पर जिन श्याणा हो गया तो बाळकां के जिसी बात छोड़ दी। 12 इब जो हम परमेसवर के बारे म्ह जाणा सां, वो सब शीशे म्ह धुँधळा दिखाई देण की ढाळ सै, पर बाद म्ह हम उस ताहीं आम्ही-स्याम्ही देखवांगे, इब्बे हम सब कुछ न्ही जाणते, पर बाद म्ह हम

सब किमे जाण जावांगे जिस तरियां परमेसवर म्हारे ताहीं जाणै सै। 13 ये तीन्नु चीज सदा खात्तर सै, विश्वास, आस, अर प्यार पर इन म्ह सारया तै बड़्झा प्यार सै।

## 14

### XXXXXXXXXX XX XXXX-XXXX XXXX

1 एक-दुसर तै प्यार करण की कोशिश करो, अर आत्मिक वरदानां की भी धुन म्ह रहो, खास करके यो के भविष्यवाणी करो। 2 क्यूँके जो अन्य भाषा म्ह बात करै सै वो माणसां तै न्ही पर परमेसवर तै बात करै सै, ज्यांतै के उसकी बात कोए न्ही समझदा, क्यूँके वो भेद की बात पवित्तर आत्मा की शक्ति तै बोल्लै सै। 3 पर जो भविष्यवाणी करै सै, वो विश्वासियाँ नै मजबूत करण की, उत्साहित करण की, अर शान्ति की बात कहवै सै। 4 जो अन्य भाषा म्ह बात करै सै, वो अपना ए विश्वास मजबूत करै सै, पर जो भविष्यवाणी करै सै, वो कलीसिया के विश्वासियाँ के विश्वास नै मजबूत करै सै। 5 मै चाहूँ सूँ के थारे म्ह तै हरेक नै अन्य भाषायां म्ह बात करण की काबलियत मिले, पर इसकी बजाए आच्छा तो यो सै के थमनै भविष्यवाणी की काबलियत मिले, क्यूँके जो भविष्यवाणी करै सै, वो उस अन्य भाषा बोल्लण आळा तै, जो उसका मतलब खोल कै बताए बिना अन्य भाषा म्ह बात करै सै, उसतै आच्छा सै, क्यूँके उसका मतलब खोल कै बताये जाण पैए कलीसिया के विश्वासियाँ के विश्वास की बढ़ोतरी हो सके सै।

6 ज्यांतै, हे विश्वासी भाईयो, जै मै थारे तै अन्य भाषा म्ह बात करूँ, तो उसतै थमनै के फायदा होगा, जै इस म्ह थारे खात्तर कोए प्रकाशन, ज्ञान, भविष्यवाणी या शिक्षा की बात ना हो, तो मै इस म्ह थारा के भला करूँगा? 7 इस्से ढाळ बेजान चीज म्ह तै भी आवाज लिकड़ै सै, चाहे बाँसुरी हो या संगीत के साज, जै उनतै लिकड़ै सुरां म्ह फर्क ना हो तो यो किस तरियां बेरा लाग्गैगा के यो कौण सा साज बजाया जाण लाग रह्या सै। 8 अर जै तुरही का शब्द साफ ना हो, तो कौण लड़ाई कै खात्तर त्यारी करैगा? 9 इस्से तरियां जै थम अन्य भाषा म्ह बोल्लोँ सों, अर थारे शब्दां नै कोए समझ न्ही पावै, के थम के बोल्लण लागरे सों? तो यो तो हवा तै बात करण जिसा होगा। 10 भलाए दुनिया म्ह कितनी ए ढाळ की भाषा क्यूँ ना हों, पर हरेक भाषा का मतलब सै। 11 पर जै मै किसे भाषा का मतलब ना समझूँ, तो बोल्लण आळे की निगांह म्ह परदेशी ठहरूँगा, अर बोल्लण आळा भी मेरी निगांह म्ह परदेशी ठहरैगा। 12 ज्यांतै थम भी जिव आत्मिक वरदानां की खोज म्ह हो, तो इसे वरदानां की लालसा राक्खों, जिसतै कलीसिया के विश्वासी माणसां का विश्वास भी मजबूत हो सके।

13 इस कारण जो अन्य भाषा बोल्लै, वो प्रार्थना करै के उसका खोल कै मतलब भी बता सके।

14 ज्यांतै जै मै अन्य भाषा म्ह प्रार्थना करूँ, तो मेरी आत्मा प्रार्थना करै सै, पर मेरी बुद्धि काम न्ही देदी। 15 इस बजह तै मै आत्मा तै भी प्रार्थना करूँगा, अर बुद्धि तै भी प्रार्थना करूँगा, मै आत्मा तै भी गाऊँगा, अर बुद्धि तै भी गाऊँगा। 16 मान ल्यो के कई आम आदमी थारे गैल परमेसवर की आराधना म्ह शामिल होवै सै, अर जिव थम अपनी आत्मा के साथ परमेसवर की आराधना करण लागरे सों, अर जो थम बोल्लो सों वो उननै समझ कोनी आन्दा, तो परमेसवर का धन्यवाद करण कै बाद, उननै किस तरियां बेरा लाग्गैगा के कद “आमीन” कहणा सै, जो थम कहण लागरे सों? 17 परमेसवर का धन्यवाद करणा थारे खात्तर अदभुत हो सके सै, पर यो दुसरयां ताहीं उनके विश्वास म्ह मजबूत न्ही बणा सकदा। 18 मै अपने परमेसवर का धन्यवाद करूँ सूँ, के मै थम सारया तै घणा अन्य भाषायां म्ह बोल्लू सूँ। 19 पर कलीसिया म्ह अन्य भाषा म्ह दस हजार बात कहण तै यो मन्ने और भी सही लाग्गै सै, के दुसरयां नै सिखाण कै खात्तर मै बुद्धि तै पाँच ए बात कह सकू।

20 हे विश्वासी भाईयो, इन बाततां नै समझण म्ह बाळक ना बणों, बुराई करण म्ह तो बाळक बणे रहो, पर इस तरियां के मामलां नै समझण म्ह श्याणे बणो। 21 पवित्तर ग्रन्थ म्ह लिख्या सै, के प्रभु कहवै सै, “के मै अजनबियाँ के जरिये बात करूँगा, जो अन्य भाषा बोल्लैगें, तो भी वे मेरी न्ही सुणेगें।” 22 ज्यांतै अन्य भाषा विश्वासियाँ कै खात्तर न्ही, पर अविश्वासियाँ कै खात्तर निशान्नी

सै, जो ये भाषा न्ही समझते, पर भविष्यवाणी अबिश्वासियाँ के खात्तर न्ही, पर विश्वासियाँ के खात्तर निशान्नी सै। <sup>23</sup> इस करकै जै कलीसिया एक जगहां कट्टी हो, अर सारे के सारे अन्य भाषा बोल्लै, जो ये भाषा न्ही समझते, या अबिश्वासी माणस भीत्तर आ जावै, तो के वे थमनै बावळे न्ही कहवैगें? <sup>24</sup> पर जै सारे भविष्यवाणी करण लागगे, अर कोए अबिश्वासी माणस या जो भविष्यवाणी नै न्ही समझते हो, भीत्तर आ जावै, तो उननै अपणे पापां का अहसास होगा अर जो थम बोल्लण लागरे सों उसकी बजह तै अपणे-आप ताहीं कसूरवार महसूस करैगें। <sup>25</sup> अर परमेसवर का संदेश उस ताहीं उसकी बुराई या उसकी गुप्त सोच का अहसास करां देवैगा। वो महसूस करैगा के वो पापी सै, अर वो पाप करणा छोड़ देगा अर वो झुकके प्रभु की आराधना करैगा, अर मान लेवैगा के सच म्ह ए परमेसवर थारे बिचाळै सै।

~~~~~

<sup>26</sup> हे विश्वासी भाईयो, सुणा के ये बात किस तरियां होणी चाहिये? जिब थम आराधना खात्तर कट्टे होवो सो, तो थारे म्ह तै कोए तो भजन गावै सै, कोए उपदेश देवै सै, कोए प्रभु के जरिये दिए गये प्रकाशन सै, कोए अन्य भाषा म्ह बात करै सै, कोए उसका मतलब बतावै सै। इन सारी बातों का मकसद योए सै, के कलीसिया विश्वास म्ह मजबूत हो सकै। <sup>27</sup> जै अन्य भाषा म्ह बात करै तो ज्यादा तै ज्यादा दो या तीन माणस बारी-बारी तै बोल्लै, अर एक माणस उन बातों का खोल के मतलब भी बतावै। <sup>28</sup> पर जै खोल के मतलब बताणीया ना हो, तो अन्य भाषा बोल्लण आळा कलीसिया म्ह शान्त रहवै, अर अपणे मन म्ह परमेसवर तै बात करै। <sup>29</sup> नबियाँ म्ह तै दो या तीन बोल्लै, अर बाकी माणस उनकै वचन नै परखै। <sup>30</sup> जै उस बखत ओड़ै कोए बेट्या हो जिस ताहीं ईश्वरीय प्रकाशन मिलै, तो पैहले आळा माणस चुप हो जावै अर दुसरे माणस नै बोल्लण दे। <sup>31</sup> थम सारे एक-एक करकै भविष्यवाणी कर सको हो, ताके सारे सीखै अर सारे उत्साहित भी हो जावै। <sup>32</sup> अर नबियाँ की आत्मा नबियाँ के बस म्ह सै, उसकै भितर इतनी काबलियत सै, के वो अपनी इच्छा के मुताबिक बोल सकै सै, अर चुप भी रह सकै सै। <sup>33</sup> क्यूँके परमेसवर गड़बड़ी का न्ही, पर शान्त का परमेसवर सै।

यो वो नियम सै जिसका पालन परमेसवर के माणसां के सारी कलीसियाओं म्ह करया जाणा चाहिए। <sup>34</sup> बिरबान्नी कलीसिया की सभा म्ह चुपचाप रहवै, क्यूँके उन ताहीं बात करण का हुकम कोनी, पर अधीन रहण का हुकम सै, जिसा नियम-कायदे म्ह लिख्या भी सै। <sup>35</sup> जै वे किमे सिखणा चाहवै, तो घर म्ह अपणे-अपणे धणी तै बुझै, क्यूँके बिरबान्नी का कलीसिया म्ह घणा बोलणा शर्म की बात सै। <sup>36</sup> इसा क्यूँ सै के थारे म्ह तै कुछ पैहले उप्पर लिखे होए नियमां का पालन न्ही करणा चाहन्दे? के थमनै लागै सै, के थम परमेसवर का वचन देण आळे पैहले आदमी सों?

<sup>37</sup> जै कोए माणस खुद नै नबी या आत्मिक माणस समझै, तो न्यू जाण ले के जो बात मै थमनै लिखूँ सूं, वे प्रभु के हुकम सै। <sup>38</sup> जै कोए माणस इन बातों पै विश्वास न्ही करदा, तो थम भी उसकी बातों पै विश्वास ना करो, जो वो बोल्लण लागरया सै।

<sup>39</sup> इस करकै हे विश्वासी भाईयो, भविष्यवाणी करण की धुन म्ह रहो, अर अन्य भाषा बोल्लण तै मना ना करो। <sup>40</sup> कलीसिया म्ह जो कुछ भी करो सों, आच्छी तरियां अर सही ढंग तै करया जावै।

## 15

~~~~~

<sup>1</sup> हे विश्वासी भाईयो, इब मै थमनै वोए सुसमाचार याद दिवाऊँ सूं, जो पैहल्या सुण्या जा चुक्या सै, जिस सुसमाचार का थमनै विश्वास भी करया था, अर थम उस विश्वास म्ह बणे भी रहो। <sup>2</sup> जै थम सुसमाचार म्ह विश्वास करणा जारी राखों सों, जो मन्ने थारे ताहीं सुणाया था तो परमेसवर थमनै सुसमाचार के जरिये बचावैगा, जै थम उस सुसमाचार पै विश्वास करणा छोड़ द्यो, तो थारा मसीह पै विश्वास करणा बेकार सै।

3 इससे कारण मन्ने थारे ताहीं सब तै खास सन्देश बताया सै, जो मेरे ताहीं प्रभु यीशु तै मिल्या सै, वो सन्देश यो सै, के पवित्र ग्रन्थ के वचन कै मुताबिक यीशु मसीह म्हारे पापां के खात्तर मारया गया, 4 गाडचा गया, अर पवित्र ग्रन्थ कै मुताबिक तीसरे दिन जिन्दा भी होग्या, 5 अर उसके बाद वो पतरस ताहीं अर फेर बारहां चेल्यां नै दिख्या। 6 फेर वो पाँच सौ तै ज्यादा चेल्यां नै एक साथ दिख्या, जिन म्ह तै घणखरे तो इब ताहीं जिन्दे सै पर कई मर लिये सै। 7 इसके बाद वो याकूब नै अर फेर सारे प्रेरितां नै भी दिख्या। 8 सब तै आखर म्ह मन्ने भी दिख्या, मेरे ताहीं प्रभु नै अदभुत तरिकेके तै प्रेरित बणाया। 9 क्यूँके मै प्रेरितां म्ह सारया तै कम महत्वपूर्ण सूं, बल्के प्रेरित बणण कै जोगगा भी कोनी था, क्यूँके मन्ने परमेसवर की कलीसिया के बिश्वासियाँ ताहीं सताया था। 10 पर मै जो कुछ भी सूं, परमेसवर के अनुग्रह तै प्रेरित सूं। उसका अनुग्रह जो मेरे पै होया, वो बेकार न्ही होया, पर मन्ने उन और प्रेरितां तै बाध मेहनत भी करी, तोभी या मेरी ओड तै न्ही होई, पर परमेसवर का अनुग्रह तै होई जो मेरे पै था। 11 ज्यांतै चाहे मै हूँ, चाहे दुसरे प्रेरित हों, हम सब नै मसीह के बारे म्ह एक जिसा प्रचार करा, अर इस्से पै थमनै बिश्वास भी करया।

### ????? ?????????

12 मै थारे तै एक बात पूच्छु सूं, जिब तै हम सारया नै यो प्रचार करया सै, के परमेसवर नै मसीह ताहीं मुदां म्ह तै जिन्दा करया, तो थारे म्ह तै कई क्यूँ न्ही मानते के बिश्वासी भी मरके जिवेंगे? 13 जै मेरे होया का जी उठणा सै ए कोनी, तो मसीह भी मेरे होया म्ह तै जिन्दा कोनी होया, 14 अर जै मसीह मेरे होया म्ह तै न्ही जी उठचा, तो म्हारा प्रचार करणा बेकार सै अर थारा बिश्वास करणा भी बेकार सै। 15 इसते भी बढ़के यो सै के हम परमेसवर के झूठे गवाह साबित होण लागरे सां, क्यूँके हमने उनके बारे म्ह या गवाही दी सै के उननै मसीह ताहीं मेरे होया म्ह तै जिन्दा करया सै, पर जै मेरे होए वास्तव म्ह जिन्दे न्ही करे गये होन्दे तो परमेसवर नै मसीह ताहीं भी जिन्दा न्ही करया। 16 अर जै मेरे होए माणस जिन्दा न्ही होन्दे, तो मसीह भी मेरे होया म्ह तै जिन्दा कोनी होया। 17 अर जै मसीह मरया होया म्ह तै जिन्दा कोनी होया, तो थारा बिश्वास करणा बेकार सै, अर थम इब ताहीं अपणे पापां म्ह जीण लागरे सो। 18 बल्के जो मसीह पै बिश्वास करण आळे मर लिये सै, वे भी नाश होए। 19 जै हम सिर्फ इस्से जीवन म्ह मसीह तै आस राक्खां सां, ना के आण आळी दुनिया कै खात्तर, तो हम सारे माणसां तै घणे अभागो सां।

20 पर सच म्ह-ए परमेसवर नै मसीह ताहीं मुर्दयां म्ह तै जिन्दा करया सै, अर वो पैहला माणस सै, जो मेरे होया म्ह तै जिन्दा करया गया। 21 क्यूँके जिब एक माणस आदम कै जरिये दुनिया म्ह मौत आई, तो दुसरा माणस मसीह कै जरिये मेरे होया का दोबारा जिन्दा हो जाणा भी होया। 22 अर जिस तरियां आदम के पाप के जरिये सारे माणस मरे सै, उस्से तरियां ए मसीह नै जो करया, उसके जरिये सारे माणस मेरे होया म्ह तै जिन्दा भी करे जावेंगे। 23 पर हरेक माणस इस तरियां जिन्दा होवैगा, परमेसवर नै पैहल्या मसीह ताहीं मेरे होया म्ह तै जिन्दा करया, फेर मसीह कै आण पै परमेसवर उन लोग्गां नै भी जिन्दा करैगा जो मसीह के सै। 24 इसके बाद दुनिया का अन्त होगा। उस बखत मसीह सारी प्रधानता, अर सारा हक अर सामर्थ का अन्त करके राज्य नै परमेसवर पिता कै हाथ म्ह सौंप देवैगा। 25 क्यूँके जिब तक परमेसवर अपणे वैरियां नै पूरी तरियां तै हरा ना देवै, तब तक मसीह का राज्य करणा जरूरी सै। 26 सारया तै आखरी वैरी जो नाश करया जावैगा, वो मौत सै। 27 पवित्र ग्रन्थ म्ह भजनकार नै लिख्या सै, के परमेसवर सब कुछ मसीह के अधीन कर देवैगा, तो यो तय सै, के परमेसवर शामिल कोनी, क्यूँके वोए सै जिसनै मसीह ताहीं अधिकार दिया सै। 28 जिब सब कुछ मसीह कै अधीन हो जावैगा यानी बेट्टे के अधीन, तो बेट्टा आप भी परमेसवर के अधीन हो जावैगा, जिसनै उस ताहीं यो अधिकार दिया था। परमेसवर ए प्रभु सै, जो सब कुछ अर हर किसे म्ह काम करै सै।

29 जै मेरे होया का पुनरुत्थान कोनी, तो उस परम्परा का के मतलब सै, जिस म्ह माणस मेरे होया की जगहां पे बपतिस्मा लेण लागरे सै? जै परमेसवर मेरे होए माणस ताहीं जिन्दा न्ही करदा, तो



माणस इस परम्परा नै क्यूँ मानण लागरे सै? 30 म्हारे खातर जै मुदाँ का जी उठणा सै, तो खुद ताहीं खतराँ म्ह गेरणा बेकूफी सै। 31 हे विश्वासी भाईयो, मै हर दिन मौत का सामना करूँ सूँ, यो भी सच सै, के प्रभु यीशु मसीह म्ह मननै थारे पै गर्व सै। 32 मै इफिसुस नगर म्ह बड़ी तै बड़ी मुसीबताँ म्ह तै गुजरा सूँ, जो जंगली-जानवरों की तरियाँ मेरा बिरोध करै सै, तो मननै के फायदा होया? जै मुदँ जिन्दे न्ही करे जावैंगे, तो हम कह सका सां, के “आओ, खावां-पीवां, क्यूँके काल तो मरणा ए सै।” 33 धोक्खा ना खाओ, “भुंडी संगति आच्छे, चाल-चलण नै बिगाड़ देवै सै।” 34 अपणे सोच्चण के तरिकेँ नै ठीक कर ल्यो, अर पाप करणा छोड़ दो, क्यूँके कुछ इसे सै जो परमेसवर नै न्ही जाणदे। मै थमनै शर्मिन्दा करण के खातर न्यू कहूँ सूँ।

~~~~~

35 उदाहरण के तौर पे जै कोए न्यू कहवैगा, “के परमेसवर मुदाँ नै किस तरियाँ तै जिवाँवै सै, अर उनकी देह किसी होवै सै?” 36 हे निरे बेअक्लो! जिब तू बीज नै माट्टी म्ह बोवै सै, तो वो अंकुरित कोनी होवै सै, अर जिब वो अंकुरित होवै सै तो वो बीज कोनी रहन्दा। 37 जै तू गेहूँ या कोए दुसरा बीज बोवै सै, तो तू शरू म्ह ए पौधा न्ही लगान्दा, बल्के बीज नै ए लगवावै सै, जो बाद म्ह पौधा बणै सै। 38 परमेसवर जिसा चाहवै उसा आकार पौधे नै देवै सै, हरेक ढाळ के बीज का उगण का अपणा अलग ए तरिककाँ होवै सै। 39 दुनिया के सब प्राणियाँ की देह एक जिसी कोनी होन्दी, माणसाँ की देह न्यारी सै, डांगराँ की न्यारी सै, पंछियाँ की देह न्यारी सै, मच्छियाँ की देह न्यारी सै। 40 अर जिस तरियाँ धरती पै अलग-अलग तरियाँ की देह सै, उस्से तरियाँ अकास म्ह भी सूरज, चाँद अर तारे सै। अकास म्ह चिज्जाँ की एक अलग तरियाँ की खबसूरती हो सै, अर धरती पै, की चिज्जाँ की खबसूरती अलग ढाळ की हो सै। 41 सूरज का तेज न्यारा सै, चाँद का तेज न्यारा सै, अर तारा के ढाळ का तेज न्यारा सै, (क्यूँके एक तारे तै दुसरे तारे के तेज म्ह फर्क सै)।

42 तो यो मरे होए माणसाँ का जी उठणा भी इसाए होगा। देह जिस ताहीं वे दफणावै सै वो गळ जा सै, पर जिब यो फेर तै जी उठै सै, तो या एक इसी देह होगी जो गळे कोनी। 43 जिब म्हारी देह दफणाई जावै सै, तो वा बदसूरत अर कमजोर हो सै, पर जिब दुबारातै जीवन मिलै सै, तो वा सुथरी अर मजबूत हो सै। 44 जिस तरियाँ म्हारी देह माँस अर लहू तै बणी सै, इस्से तरियाँ इसी देह भी सै जिस ताहीं जीवन परमेसवर के आत्मा के जरिये मिलै सै, अर जो म्हारी देह माँस अर लहू तै बणी सै, उस देह म्ह बदल जावैगा, जिस ताहीं जीवन परमेसवर की आत्मा तै मिलै सै। 45 पवित्र ग्रन्थ म्ह भी लिख्या सै, के “पैहलड़ा माणस, यानिके आदम जिन्दा प्राणी बण्या” अर आखरी आदम जो मसीह सै, वोए सै जो हमनै अनन्त जीवन देवै सै। 46 माँस अर लहू तै बणी देह पैहल्या बजूद\* म्ह आई, फेर उस देह ताहीं परमेसवर की आत्मा के जरिये जीवन मिलै सै। 47 पैहलड़ा माणस धरती तै, यानिके माट्टी तै बण्या होया था, दुसरा माणस जो मसीह था सुर्ग तै आया। 48 धरती पै रहण आळे लोग, धरती के पैहले माणस आदम की ढाळ माट्टी तै बणे सै, पर सुर्ग म्ह रहण आळे लोग, सुर्ग के माणस मसीह यीशु की तरियाँ सै। 49 हम सबका रूप आदम की ढाळ सै, जो माट्टी तै बण्या सै, उस्से तरियाँ एक दिन हमनै मसीह का रूप भी मिलैगा, जो सुर्गीय सै।

50 हे विश्वासी भाईयो, मै चाहूँ सूँ के थम जाण ल्यो, के म्हारी देह जो लहू अर माँस तै बणी सै, इस देह के साथ हम परमेसवर के सुर्गीय राज्य म्ह न्ही रह सकदे। हम सुर्ग म्ह उस देह के साथ न्ही रह सकदे जो नाश हो जावै सै, क्यूँके ओड़ै कोए मौत कोनी। 51 देखो, मै थारे तै एक भेद की बात बताऊँ सूँ, म्हारे म्ह तै कुछ विश्वासी मरे कोनी, पर उनकी देह बदल जावैगी। 52 अर यो पलभर म्ह, पलक झपकदे ए जिब आखरी तुरही फूक्की जावैगी तो मुदँ सदा रहण खातर जिन्दा हो जावैंगे, अर जो जिन्दा सै उनकी देह सुर्गीय देह म्ह बदल जावैगी। 53 क्यूँके यो जरूरी सै, ताके म्हारी या नाशवान देह अविनाशी देह म्ह बदल जावै, अर या मरणहार देह कदे ना मरण आळी देह म्ह बदल

\* 15:46 15:46 बजूद अस्तित्व

जावै। <sup>54</sup>जिब इसा होवै सै, तो जो परमेसवर नै पवित्र गरन्ध म्ह लिख्या सै, वो पूरा हो जावैगा, “मौत पूरी तरियां तै हार जावैगी अर वजूद म्ह कोनी रहवैगी। <sup>55</sup>हे मौत, तेरी जीत कित्त रही? हे मौत, तेरा डंक कित्त रह्या?” <sup>56</sup>पाप वो डंक सै जो मौत नै लेके आवै सै, अर नियम-कायदे पाप नै शक्ति देवै सै। <sup>57</sup>पर परमेसवर का धन्यवाद हो, जो म्हारै प्रभु यीशु मसीह के जरिये हमनै पाप अर मौत पै जयवन्त करै सै। <sup>58</sup>ज्यातै हे मेरे प्यारे भाईयो, मजबूत अर पक्के रहो, अर प्रभु के काम म्ह सारी हाण बढ़ते जाओ, क्यूँके थम जाणो सो के थारी मेहनत प्रभु म्ह बेकार न्ही सै।

## 16

XXXXXXXXXX XX XXXXXX XXX

<sup>1</sup>इब यरुशलेम नगर म्ह परमेसवर के पवित्र माणसां के खात्तर कट्टे करे गये उस चन्दे के बारे म्ह, जिसा हुकम मन्ने गलातिया परदेस की सारी कलीसियां ताहीं दिया, उसाए थम भी करो। <sup>2</sup>हफ्ते के पैहल्ले दिन थारे म्ह तै हरेक, अपणी आमदणी के मुताबिक कुछ धन अपणे धारे अलग धरो, ताके मेरे आण पै थमनै चन्दा कट्टा करणा न्ही पड़े। <sup>3</sup>अर जिब मै ओड़ै होऊंगा, तो उन माणसां ताहीं दान लेण खात्तर यरुशलेम भेजूंगा जिन ताहीं थमनै भरोस्सेमंद समझा सै, मै उन विश्वासियां के हाथ एक चिट्ठी भी भेजूंगा ताके ओड़ै के विश्वासी भी उन ताहीं जाण सकै। <sup>4</sup>जै मेरा भी जाणा जरूरी होया, तो वे मेरे गेल्या जावेंगे।

XXXXX XX XXXXXX XX XXXXXXXXXXX

<sup>5</sup>पर मन्ने पैहले मकिदोनिया परदेस जाणा सै, फेर मै मकिदोनिया परदेस तै होके थारे धारे आऊंगा। <sup>6</sup>पर हो सकै सै, के थारे धारे ए लम्बे बखत ताहीं ठैहर जाऊँ, अर पूरा जाड्डा थारे धारे रहूँ, फेर जिस सफर पै मन्ने जाणा हो उसपै थम मन्ने भेज दियो। <sup>7</sup>जै या परमेसवर की इच्छा सै, तो मै थारे धारे बाद म्ह, घणे दिनां खात्तर आऊंगा, बजाए इसके के इब मै थोड़े दिनां खात्तर, थारे धारे आऊँ। <sup>8</sup>पर मै पिन्तेकुस्त त्यौहार तक इफिसुस नगर म्ह रहूंगा, <sup>9</sup>क्यूँके याड़े भोत सारे लोग सै, जो परमेसवर के वचन के बारे म्ह सुणाणा चाहवै सै, अर मेरा याड़े रहणा जरूरी सै, हालाकि याड़े मसीह के भोत बिरोधी सै।

<sup>10</sup>जिब तीमुथियुस कुरिनथुस नगर म्ह आ जावै सै, तो उसके गैल सम्मानपूर्वक बरताव करियो, क्यूँके वो मेरी तरियां प्रभु का काम करै सै। <sup>11</sup>ज्यातै कोए उसने तुच्छ न्ही जाणे, पर जो सफर खात्तर जरूरी चीज सै उसने दे दिओ, ताके वो मेरे धारे आ जावै, क्यूँके मै उसकी वाट देखूँ सूँ, के वो विश्वासी भाईयां के गैल आवै। <sup>12</sup>विश्वासी भाई अपुल्लोस तै मन्ने घणी बिनती करी सै, ताके वो थारे धारे और दुसरे विश्वासी भाईयां के गेल्या आ जावै, पर वो इस सफर के खात्तर तैयार कोनी, पर जिब सही बखत होगा तो वो थारे धारे आ जावैगा।

XXXX XXXX XX XXXXXXXX

<sup>13</sup>चौक्कस रहो, विश्वास म्ह डट रहो, निडर बणे रहो, विश्वास म्ह मजबूत बणो। <sup>14</sup>जो किमे करो सो प्यार तै करो। <sup>15</sup>हे विश्वासी भाईयो, थम स्तिफनास के कुण्वे नै जाणो सो के वे अखाया परदेस के पैहले विश्वासी सै, अर पवित्र माणसां की सेवा के खात्तर त्यार रहवें सै। <sup>16</sup>ज्यातै मै थारे तै बिनती करूँ सूँ, के इस्यां के अधीन रहो, बल्के हरेक के जो इस काम म्ह कड़ी मेहनती करै सै, अर जो सच्ची भगति के साथ सेवा करै सै। <sup>17</sup>मै स्तिफनास अर फूरतूनातुस अर अखडकुस के आण तै राज्जी सूँ, क्यूँके वो मेरी मदद करण लागरे सै, जो थम न्ही कर पाए। <sup>18</sup>उननै मेरी अर थारी आत्मा ताहीं चैन दिया सै, इस करके इसे माणसां का आदर करो।

<sup>19</sup>आसिया की कलीसियाओं की ओड़ तै थारे ताहीं नमस्कार, अक्विला अर उसकी घरआळी, पिरसकिल्ला का अर उनके घर की कलीसिया का भी, थारे ताहीं प्रभु म्ह दिल तै नमस्कार। <sup>20</sup>सारे विश्वासी भाईयां का थारे ताहीं नमस्कार। आप्स म्ह एक-दुसरे ताहीं गळे मिलके प्यार तै नमस्कार करो। <sup>21</sup>मुझ पौलुस का थारे ताहीं अपणे हाथ तै यो नमस्कार लिखूँ सूँ। <sup>22</sup>जै कोए प्रभु तै प्यार

न्ही राक्खै तो वो श्रापित होवै । हे म्हारे परभु आ! <sup>23</sup> परभु यीशु का अनुग्रह थारे पै होन्दा रहवै ।  
<sup>24</sup> मै उन सारया तै प्यार करूँ सूँ, जिनका मसीह यीशु के साथ रिश्ता सै । आमीन ।

## कुरिन्थिस नगर के माणसां ताहीं प्रेरित पौलुस की दुसरी चिट्ठी

???????

कुरिन्थिस नगर के नाम पौलुस प्रेरित की दुसरी चिट्ठी पौलुस अर कुरिन्थुस की कलीसिया के बीच बिगड़ते सम्बन्धां के बखत लिखी गयी थी। कलीसिया के माणसां नै पौलुस के विरुध्द गम्भीर दोष लगाये थे, पर वो मेळ-मिलाप की अपणी गहरी लालसा नै दिखावै सै। इस चिट्ठी के पैहले भाग म्ह पौलुस कुरिन्थुस नगर की कलीसिया के गैल अपणे सम्बन्धां पै विचार करै सै, अर उननै समझावै सै, के उसनै क्यूँ कलीसिया म्ह अपमान अर विरोध करण जिसा कठोर बरताव करया, अर फेर अपणी खुशी नै जाहिर करै सै, के उसकी कठोरता का नतिज्जा पछतावा अर मेळ-मिलाप होया। इब वो कलीसिया तै, यहूदिया के गरीब विश्वासियाँ खात्तर खुल्ले दिल तै दान देण की बिनती करै सै। आखरी पाठां म्ह पौलुस कुरिन्थुस नगर के कई माणसां कै खिलाफ अपणी प्रेरिताई का समर्थन करै सै, जिननै खुद अपणे-आप ताहीं साच्चा प्रेरित होण का दर्जा दे दिया था, जिव कै वे पौलुस पै झूठठा प्रेरित होण का दोष लगाया करदे।

रूप-रेखा

जानकारी 1:1-11

पौलुस अर कुरिन्थुस नगर की कलीसिया 1:12-7:16

यहूदिया के विश्वासियाँ खात्तर दान 8:1-9:15

पौलुस के जरिये प्रेरित के तौर पै अपणे हक का समर्थन 10:1-13:10

समापन 13:11-14

???????

1 या चिट्ठी पौलुस अर म्हारे विश्वासी भाई तीमुथियुस की ओड़ तै सै, मै पौलुस परमेसवर की इच्छा तै मसीह यीशु का प्रेरित सं, उस कलीसिया कै नाम जो कुरिन्थुस नगर म्ह सै; अर साब्ले अखाया परदेस के सारे पवित्र माणसां के नाम। 2 हम प्रार्थना करा सां, के पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै।

?????????? ?? ?????????? ?????

3 म्हारे प्रभु यीशु मसीह के पिता अर परमेसवर का धन्यवाद होवै, जो दया का पिता, अर जो हमेशा तसल्ली देवै सै। 4 परमेसवर म्हारे सारे दुखां म्ह तसल्ली देवै सै, ताके हम उस तसल्ली के कारण जो परमेसवर म्हारे ताहीं देवै सै, उन ताहीं भी तसल्ली दे सका, जो इस तरियां के दुखां म्ह हो। 5 क्यूँके जिस तरियां मसीह म्ह हमनै घणे दुख होवै सै, उससे तरियां ए मसीह कै जरिये हमनै घणी तसल्ली भी होवै सै। 6 जै हम दुख पावां सां, तो या थारी तसल्ली अर उद्धार कै खात्तर, क्यूँके परमेसवर म्हारे ताहीं तसल्ली देवै सै, तो वो थमनै भी तसल्ली देगा ताके थम धीरज के गेल्या उन दुखां ताहीं सह लेओ सो, जिन नै हम भी सहवां सां। 7 अर म्हारी आस थारे बारे म्ह पक्की सै, क्यूँके हमनै बेरा सै, के थम जिस तरियां तै म्हारे दुखां म्ह साइझी सां, उससे तरियां तै थम म्हारी तसल्ली म्ह भी साइझी सां।

8 हे विश्वासी भाईयो, हम चाहवां सां, के थम म्हारे उन दुखां नै जाणो, जो आसिया परदेस म्ह म्हारे पै पड्या, हम इसे भारया बोझ तै दबगे थे, वो बोझ म्हारे सहण तै बाहर था, उरै ताहीं के हमनै जिन्दा रहण की आस छोड़ दी थी। 9 बल्के हमनै अपणे मन म्ह समझ लिया था, के म्हारे ताहीं मार दिया जावैगा, अर हम अपणे-आप पै भरोस्सा ना राक्खां, बल्के परमेसवर पै भरोस्सा राक्खां, जो मरे होया नै जिन्दा करे सै। 10 उससे नै म्हारे ताहीं इसी बड्डी मुसीबत तै बचाया, अर बचावैगा, अर उसपै हमनै भरोस्सा सै, अर वो आगै भी म्हारे ताहीं बचान्दा रहवैगा। 11 जिस तरियां थम प्रार्थना

के जरिये म्हाारी मदद करो सों, उन आशीषां के खात्तर जो भोत सारे माणसां की प्रार्थना की बजह तै हमनै मिली सै, उसके कारण भोत-से माणस म्हाारी ओड़ तै परमेसवर का धन्यवाद करै सै।

~~~~~

12 क्यूँके म्हाारी अन्तरात्मा शुद्ध होण के कारण हम घमण्ड करा सां, अर दुनिया म्ह अर खास करके थारे बिच्चाळै, म्हाारा चाल-चलण जो परमेसवर की ओड़ तै सै, वो पवित्तरता अर सच्चाई सुधा था, ना के दुनियावी ज्ञान तै, पर परमेसवर के अनुग्रह के साथ था। 13-14 क्यूँके मन्ने अपणी चिट्ठियाँ म्ह हमेशा साफ-साफ लिख्या सै, ताके जिब थम उन चिट्ठियाँ नै पढ़ों तो आसान्नी तै समझ सकों, पर इब भी थम उन ताहीं ठीक तै न्ही समझ पाते, मन्ने आस सै के एक दिन जिब पूरभु यीशु बोहड़ के आवैगा, तो थम इन ताहीं पूरी तरियां समझ ल्योगे। तब हम थारे गर्व का कारण बणागे, अर थम भी म्हाारे खात्तर गर्व का कारण बणागे।

15 मन्ने भरोस्सा सै, के थम मेरी बातों नै पूरी तरियां तै समझगे सों, इस करके मै पैहलया थारे धारे आणा चाहूँ था, ताके मेरे दुबारा आण तै थमनै दुगणी आशीष मिलै। 16 मेरी योजना या थी, के मै थारे धारे तै हाँके मकिदुनिया परदेस म्ह जाऊँ, अर दुबारा मकिदुनिया परदेस तै थारे धारे आऊँ; अर मै उम्मीद करूँ सूँ, के थम मन्ने यहूदिया परदेस के सफर खात्तर जरूरत की चीज देके मेरी मदद करोगे। 17 थम मेरे तै पूछ सकों सों, के मन्ने अपणी योजना क्यूँ बदली। थम के सोच्चों सों, के मन्ने या योजना लापरवाही तै बणाई, या फेर मै दुनिया के माणसां की तरियां सूँ? जिनके जुबान पै तो हाँ हो सै, अर मन म्ह ना हो सै। 18 जिसा परमेसवर विश्वास जोगगा सै, उस्से तरियां म्हाारी बात भी विश्वास जोगगी सै। 19 क्यूँके परमेसवर का बेट्टा यीशु मसीह जिसका म्हाारे जरिये यानिके म्हाारे अर सिलवानुस अर तीमुथियुस के जरिये थारे बिच्चाळै प्रचार होया, उस मसीह यीशु म्ह “हाँ” अर “ना” दोन्नु न्ही हो सकदे। पर उस म्ह “हाँ” ए “हाँ” होई। 20 क्यूँके परमेसवर के सारे वादे मसीह यीशु म्ह पूरे होए सै। ज्यांतै हम आमीन बोल्ला सां यानी “हाँ”, ताके म्हाारे जरिये परमेसवर की महिमा होवै। 21-22 परमेसवर ए सै, जो हमनै थारे गेल्या मसीह म्ह मजबूत करै सै, परमेसवर नै म्हाारे पै अपणी मोहर लगाके बयान्ने के रूप म्ह अपणा पवित्तर आत्मा म्हाारे मन म्ह बसाके म्हाारे ताहीं चुण्या सै।

23 परमेसवर मेरी इस सच्चाई का गवाह सै के मै दुबारा कुरिन्थुस नगर म्ह ज्यांतै कोनी आया, के मै थमनै दुख देणा कोनी चाहूँ था। 24 इसका मतलब यो कोनी के हम विश्वास के बारे म्ह थारे पै हक जताणा चाहवां सां; पर थारे आनन्द म्ह साइझी सां, क्यूँके थम विश्वास ए तै डटे रहो सो।

## 2

1 मन्ने अपणे मन म्ह न्यू ठान लिया था, के दुबारा थारे धारे ओड़े आके थमनै दुख ना देऊँ। 2 क्यूँके जै मै थमनै उदास करूँ, तो थारे अलावा मन्ने आनन्द देण आळा कोए कोनी रह्या, सिर्फ थमे सों, जिस ताहीं मन्ने उदास करया। 3 अर मन्ने याए बात थारे तै ज्यांतै लिक्खी के कदे इसा ना हो के मेरे आण पै, जिनतै मन्ने आनन्द मिलणा चाहिये, मै उनतै उदास होऊँ; क्यूँके थम सारया पै मन्ने इस बात का भरोस्सा सै, के जो मेरा आनन्द सै, वोए थम सारया का भी सै। 4 बड़े कळेश अर दुखी मन तै मन्ने घणेए आँसू बहा-बहाके थारे ताहीं चिट्ठी लिखी, ज्यांतै न्ही के थम उदास होवो पर ज्यांतै के थम उस घणे प्यार नै जाण ल्यो, जो मन्ने थारे तै सै।

~~~~~

5 अर जै किसे नै उदास करया सै, तो मेरे ताहीं ए न्ही बल्के थोड़ा-थोड़ा थारे सारया ताहीं उदास करया सै, अर मै उसकी गलतियाँ के बारे म्ह इसतै ज्यादा कुछ और न्ही कहणा चाहन्दा। 6 इसे माणस के खात्तर या सजा जो सारे विश्वासी भाईयाँ नै उस ताहीं देई सै, वा भतेरी सै। 7 ज्यांतै इसतै भला यो सै, के उसका अपराध माफ करो अर उस ताहीं उत्साहित करो, इसा ना हो के वो माणस घणी उदासी म्ह डूब जावै। 8 इस कारण मै थारे तै बिनती करूँ सूँ के उस ताहीं अपणे प्यार का सबूत द्यो। 9 क्यूँके मन्ने यो ज्यांतै भी लिख्या था के थमनै परख ल्यूँ, के थम मेरी सारी बातों नै मानण

नै त्यार सो के न्ही। <sup>10</sup> जिस ताहीं थम किसे बाबत माफ करो सो, उस ताहीं मै भी माफ करूँ सुँ, क्यूँके जिस बात के बारे मन्ने उस ताहीं माफ करया सै, जै वो सच म्ह माफी लायक था, तो मन्ने मसीह ताहीं हाजिर जाणकै उस ताहीं थारे खात्तर माफ करया सै। <sup>11</sup> ताके शैतान का म्हारे पै दाँव ना चाल्लै। क्यूँके हम उसके बुरे इराद्यां तै अनजाण कोनी।

~~~~~

<sup>12</sup> जब मे मसीह का सुसमाचार सुणाण नै त्रोआस नगर म्ह आया, अर प्रभु नै मेरे ताहीं वचन सुणाण खात्तर एक राह खोल दिया। <sup>13</sup> अपणे विश्वासी भाई तीतुस ताहीं ओडै ना पाकै, मेरे मन नै चैन कोनी मिल्या, ज्यांतै विश्वासी भाईयाँ तै बिदा होकै मै मकिदुनिया परदेस म्ह बोहड़ गया।

~~~~~

<sup>14</sup> परमेसवर का धन्यवाद हो, जो मसीह कै साथ म्हारी संगति होण के कारण हमनै जीत कै उत्सव म्ह लिये फिरे सै, इब परमेसवर म्हारे ताहीं खसबूदार इत्तर की ढाळ मसीह का ज्ञान फैलाण खात्तर हरेक जगहां इस्तमाल करै सै। <sup>15</sup> हम परमेसवर कै खात्तर मसीह के जरिये, जळाई गई उस धूप की खस्वू की ढाळ सां, जो उद्धार पाण आळे अर नाश होण आळे दोनुआ कै खात्तर सै, यो परमेसवर का सुसमाचार सै, अर सारे माणसां धोरे फैल्लण लागरया सै। <sup>16</sup> कितन्याँ के खात्तर तो मरण के कारण मौत की गन्ध, अर कितन्याँ के खात्तर जिन्दगी के कारण जिन्दगी की खस्वू सां। कोए भी माणस इस काम नै न्ही कर सकता। <sup>17</sup> हम उन बरगे कोनी जो परमेसवर के वचन नै पईसा खात्तर प्रचार करै सै; पर यो जाण सां के परमेसवर नै म्हारे ताहीं भेज्या सै अर मन की सच्चाई तै हम उसका वचन आज्ञाकारिता अर मसीह अधिकार तै सुणावां सां, यो जाणकै के परमेसवर म्हारे ताहीं देख्ले सै।

### 3

~~~~~

<sup>1</sup> के हम दुबारा अपनी बड़ाई करण लागगे? या हमने और माणसां की ढाळ सिफारिश की चिट्ठियाँ थारे धोरे ल्याण की या थारे तै लेण की जरूरत सै? <sup>2</sup> थम म्हारे खात्तर एक चिट्ठी की ढाळ सां, जो म्हारे खात्तर सिफारिश करै सै, अर म्हारे दिलां पै लिक्खी होई सै, उस ताहीं सारे माणस पढ़ सकै, अर म्हारे भले काम्मां नै पिच्छाण सकै। <sup>3</sup> यो तो साफ दिक्खे सै के थम मसीह की चिट्ठी के समान सां, जो मसीह की ओड़ तै सै, जो म्हारी सेवकाई का फळ सै, अर जो स्याही तै पत्थर की पटियाँ पै न्ही, पर जिन्दे परमेसवर की आत्मा तै दिल की माँस रूपी पटियाँ पै लिक्खी सै। <sup>4</sup> हम इस करकै कहवां सां, के हम मसीह के जरिये परमेसवर पै भरोस्सा करा सां। <sup>5</sup> हम यो न्ही कहन्दे के म्हारी कुछ करण की काबलियत खुद तै सै, पर वो काबलियत परमेसवर की ओड़ तै सै। <sup>6</sup> जिसनै म्हारे ताहीं नये करार के सेवक होण कै लायक भी बनाया, मूसा के नियम-कायदा के सेवक न्ही, बल्के पवित्र आत्मा के सेवक सां; क्यूँके मूसा के नियम-कायदे ना मानण तै मौत आवै सै, पर पवित्र आत्मा जिन्दगी देवै सै।

<sup>7-8</sup> मूसा नबी के नियम-कायदे जो पत्थर की पटियाँ पै लिखे गये थे, तब परमेसवर की महिमा ओड़ै जाहिर होई थी, उस कारण भोत बखत ताहीं इस्राएल के माणस मूसा नबी का चेहरा भी कोनी देखण पाए थे, क्यूँके उसका चेहरा तेजोमय था, उसके चेहरे का तेज ज्यादा बखत ताहीं कोनी रह सका, इस करके मूसा नबी ताहीं जो नियम-कायदे दिए गये थे, वे मौत नै लेकै आवै थे। तो पवित्र आत्मा का काम जो नये करार के मुताबिक सै, वो और भी तेजोमय होवैगा। <sup>9</sup> क्यूँके जब माणसां नै कसूरवार बनाण आळा पुराणा करार तेजोमय था, तो जो माणसां नै धर्मी बनाण आळा नया करार सै और भी तेजोमय होवैगा। <sup>10</sup> अर जो तेज पुराणे करार तै आवै था, उसका तेज जो इब नये करार तै आवै सै, उसके आगै कुछ भी कोनी। <sup>11</sup> क्यूँके जो तेज मूसा नबी के नियम-कायदा म्ह था, जब वो जो घटदा जावै था, तोभी वो तेजोमय था, तो उस नये करार का तेज जो स्थिर सै, वो और भी तेजोमय होवैगा।

12 ज्यांतै इसी आस राखके हम हिम्मत कै गेल्या बोल्लां सां। 13 हम मूसा नबी की ढाळ न्ही, जिसनै अपणे मुँह पै पड़दा गेरया था। ताके इस्राएली माणस उस घटणआळे तेज कै अन्त नै ना देख पावै। 14 पर इस्राएल के माणसां की अकल खराब होगी, क्यूँके आज ताहीं पुराणा नियम पढ़ते बखत उनके दिलां पै वोए पड़दा पड़या रहवै सै, पर वो पड़दा मसीह पै विश्वास करण तै ए उठ जावै सै। 15 आज ताहीं जिब कदे भी मूसा नबी की किताब पढ़ी जावै सै, तो उन ताहीं पूरी तरियां समझ म्ह कोनी आन्दी। 16 पर जिब कदे वो यीशु मसीह पै विश्वास करैंगे, तो वो पड़दा उठ जावैगा। 17 परभु तो आत्मा सै: अर जित्त किते परमेसवर का आत्मा सै, ओइ नियम-कायदे तै आजादी सै। 18 हम परमेसवर की महिमा इस तरियां देख्वां सां, जिस तरियां शीशे म्ह अपना मुँह, उस मुँह के आगै पड़दा कोनी, परमेसवर आत्मा सै। अर वो हमनै अपणे तेजस्वी स्वरूप म्ह थोड़ा-थोड़ा करके बदलता जावां सै।

## 4

~~~~~

1 ज्यांतै जिब म्हारे पै इसी दया होई के हमनै या परमेसवर के वचन प्रचार करण की सेवा मिली, तो हम हिम्मत न्ही हारते। 2 हमनै शर्मनाक अर गुप्त काम्मां ताहीं छोड़ दिया, अर ना चतुराई करते, अर ना परमेसवर के वचन नै तोड़-मरोड़ के पेश करा सां। पर परमेसवर के वचन की सच्चाई नै माणसां के स्याम्ही जाहिर करां सां, ताके हरेक माणस परमेसवर के स्याम्ही या गवाही दे सके सै, के यो सच सै। 3 पर जै म्हारै सुसमाचार नै कोए समझ न्ही पावै, तो यो नाश होण आळा ए के खात्तर गुप्त सै। 4 इस दुनिया के ईश्वर शैतान नै उन अविश्वासियाँ की अकल ताहीं, आँधी कर दिया सै, ताके उस चाँदणे नै जो मसीह के तेजोमय सुसमाचार तै आवै सै, उस ताहीं देख ना सके। जो दिखावै सै के परमेसवर किसा सै। 5 क्यूँके हम खुद नै न्ही, पर मसीह यीशु नै प्रचार करा सां, के मसीह यीशु ए परभु सै। अर अपणे बारे म्ह न्यू कहवां सां, के हम यीशु के कारण थारे सेवक सां। 6 ज्यांतै के परमेसवर नै कह्या, “अन्धकार म्ह तै चाँदणा चमकै,” अर परमेसवर म्हारे दिलां म्ह चाँदणा की तरियां समझ दे, ताके हम परमेसवर की महिमा नै समझ सका, जो यीशु मसीह म्ह सै।

7 हम माट्टी के बासणा की तरियां सां, जिस म्ह धन भरया सै, या घणी सामर्थ म्हारी न्ही, बल्के परमेसवर की सै। 8 हम चौगरदे तै क्लेश तो भोग्गां सां, पर संकट म्ह न्ही पड़दे, म्हारे धारे उपाय तो कोनी, पर निराश न्ही होन्दे। 9 सताए तो जावां सां, पर छोड़डे न्ही जान्दे; गिराए तो जावां सां, पर नाश न्ही होन्दे। 10 हम हर बखत मौत के खतरे म्ह रहवां सां, जिस तरियां यीशु म्हारे खात्तर मरया गया, ताके हम दुसरे माणसां नै म्हारे उन काम्मां के जरिये दिखा सका के यीशु म्हारे म्ह बसै सै। 11 क्यूँके हम जिन्दे जी सारी हाण यीशु के कारण मौत खतरे म्ह रहवां सां, ताके मसीह यीशु का जीवन म्हारी मरण आळी देह म्ह जाहिर होवै। 12 इस करके हम मौत के खतरे म्ह रहवां सां, इसका नतिज्जा यो होगा के थमनै अनन्त जीवन मिलेगा। 13 पर हम तो प्रचार करते रहवांगे क्यूँके म्हारा विश्वास उस भजनकार की ढाळ सै, जिसनै भजन संहिता म्ह कह्या, “मै परमेसवर पै विश्वास करूँ सूँ,” इस खात्तर बोल्लू सूँ। 14 इस करके हमनै बेरा सै के जिसनै परभु यीशु ताहीं मुदां म्ह तै जिन्दा करया, वोए परमेसवर हमनै भी यीशु म्ह जिन्दा करैगा, अर थारे गेल्या हमनै भी अपनी मौजूदगी म्ह ले जावैगा। 15 क्यूँके सारे दुख हमनै सहे, ताके भोत सारे लोग जाण सके के परमेसवर कितना करुणामय सै, अर परमेसवर की महिमा के खात्तर ज्यादा तै ज्यादा लोग उसका धन्यवाद करै।

16 ज्यांतै हम हिम्मत न्ही हारते; हालाके म्हारी देह नाश होन्दी जावै सै, तो भी म्हारी अन्तरात्मा हर रोज नई होन्दी जावै सै। 17 क्यूँके म्हारी मौजूदा परेशानियाँ भोत छोट्टी सै, अर वो लम्बे बखत ताहीं कोनी रहवैगी। क्यूँके ये अनन्त महिमा का कारण बणैगी, जो म्हारे सोचण तै भी बड़ी सै। 18 अर हम तो देखी होई चिज्जां ताहीं न्ही पर अनदेखी चिज्जां नै देखे रहवां सां; क्यूँके देखी होई चीज माड़े-से दिन की सै, पर अनदेखी चीज सारी हाण बणी रहवै सै।

## 5

**222222 22222222 22**

1 क्यूँके हमनै बेरा सै के पलभर का शारीरिक देह सरीखा घर जो हमनै मिल्या सै, जो नाश करया जावैगा, तो हमनै परमेसवर कै कान्ही तै सुर्ग पै एक इसा घर मिलैगा, जो हाथ्यां तै बणया होया न्ही, पर सारी हाण खात्तर टिकाऊ सै। 2 इस देह म्ह तो हम कराहवा अर बड़डी लालसा राक्खां सां, ताके अपणे सुर्गीय देह नै पैहर ल्या। 3 क्यूँके सुर्गीय देह पैहरण तै हम उचाड़े न्ही पाए जावैगे। 4 अर हम शारीरिक देह सरीखे घर म्ह रहन्दे होए बोझ तै दबे रोन्दे-पिटते रहवां सां, क्यूँके हम इसनै छोड़णा न्ही चाहन्दे, पर हम चाहवां सां के परमेसवर हमनै सुर्गीय देह देवै, ताके शारीरिक देह नाश होण कै बाद हमनै अनन्त राज्य म्ह सुर्गीय देह मिल जावै। 5 जिसनै म्हारै ताहीं जिस सुर्गीय देह कै खात्तर त्यार करया सै, वो परमेसवर सै, जिसनै म्हारै ताहीं ब्याने म्ह पवित्तर आत्मा भी दिया सै।

6 आखर म्ह हम सारी हाण होसला राक्खां सां, अर या जाणां सां के जिब ताहीं हम देह म्ह रहवां सां, तब तक प्रभु के सुर्ग तै न्यारे सां, जो सुर्ग म्ह सै। 7 हम प्रभु यीशु पै बिश्वास करण तै जिवां सां, ना के उस ताहीं देखण तै। 8 ज्यांतै हम होसला राक्खां सां, अर हम मरण कै बाद, देह तै न्यारे होके प्रभु के गेल्या रहणा हम और भी घणा बढ़िया समझां सां। 9 इस कारण म्हारै मन की इच्छा या सै, चाहे हम सुर्ग म्ह परमेसवर के गैल रहवां, या धरती पै रहवां, पर हम उसनै भान्दे रहवां। 10 क्यूँके जरूरी सै के हम सब मसीह के न्याय आसन के स्याम्ही खड़े होवां, ताके हरेक माणस अपणे-अपणे आच्छे-भुन्दे काम्मां का बदला पावे, जो उसनै शारीरिक देह के जरिये करे सै।

**222222 22 222-22222**

11 ज्यांतै प्रभु का भय मानके हम माणसां ताहीं न्यू समझावां सां, के वे इस सच्चाई पै बिश्वास करै, अर परमेसवर जाणे सै के हम कौण सां, अर मै उम्मीद करूँ सुं, के थम भी अपणी अन्तरात्मा म्ह हमनै आच्छी तरियां जाण ल्यो। 12 हम फेर भी अपणी बड़ाई थारे स्याम्ही कोनी करदे, बल्के हम अपणे बारे म्ह थारे ताहीं गर्व करण का मौक्का देवां सां, के थम उनै जवाब दे सको, जो अपणे मन की बजाये बाहरी रूप पै धमण्ड करै सै। 13 जै कोए कहवै के हम पागल सां, तो परमेसवर कै खात्तर, अर जै श्याणे सा तो थारे खात्तर सां। 14 क्यूँके मसीह का प्यार हमनै मजबूर कर देवै सै। ज्यांतै के हम न्यू समझां सां, के जिब एक माणस सारया कै खात्तर मरया तो सारे माणस मरगे। 15 अर मसीह इस कारण सारे माणसां खात्तर मरया ताके जो जिन्दे सै, वे आगूँ तै अपणे खात्तर न्ही जीवै, पर मसीह कै खात्तर जीवै, जो उनकै खात्तर मरया अर दुबारा जिन्दा होग्या।

**2222 222 22 222222**

16 इस करके इब हमनै माणसां ताहीं दुनियावी नजरिये तै देखणा छोड़ दिया सै। हालाके एक बखत था, जिब हमनै मसीह ताहीं भी दुनियावी नजरिये तै देख्या था, पर इब न्ही, क्यूँके इब हम उस ताहीं जाणगे सां। 17 जै कोए मसीह म्ह बिश्वास करै सै, तो वो नयी जिन्दगी पा लैवै सै। पुराणा सुभाव चल्या जावै सै, अर नया सुभाव आ जावै सै। 18 ये सारी बात परमेसवर की ओड़ तै सै, जिसनै मसीह कै जरिये अपणे गेल्या म्हारा मेळ-मिलाप कर लिया सै, अर मेळ-मिलाप की सेवकाई का काम म्हारै ताहीं सौंप दिया सै। 19 यानिके परमेसवर नै मसीह म्ह होके अपणे गेल्या दुनिया का मेळ-मिलाप कर लिया, अर माणसां के पापां का दोष उनपै न्ही लाया, अर याए बात मेळ-मिलाप का सन्देस सै, जो परमेसवर नै म्हारै ताहीं सौंप दिया सै।

20 ज्यांतै, हम मसीह के राजदूत सां। परमेसवर म्हारै जरिये माणसां तै बिनती करण लाग रहया सै। हम मसीह की ओड़ तै थारे तै बिनती करा सां, के परमेसवर कै गेल्या मेळ-मिलाप कर ल्यो। 21 मसीह जो पाप तै अनजाण था, उस्से ताहीं परमेसवर नै म्हारै खात्तर पापी ठहराया, ताके हम परमेसवर की नजर म्ह धर्मी बण जावां, क्यूँके यीशु मसीह नै म्हारै पापां का दण्ड अपणे उपर ले लिया।



## 6

1 हम जो परमेसवर कै गैल काम करणीये सां, या बिनती करां सां, के उसका अनुग्रह जो थारे पै होया, उसनै बेकार ना जाण द्यो। 2 क्यूँके पवित्र ग्रन्थ म्ह परमेसवर नै कह्या सै, “सही बखत पै मननै तेरी सुण ली, अर उद्धार कै दिन मननै तेरी मदद करी।” सुणो, इब्बे वो सही बखत सै; अर आज ए वो उद्धार का दिन सै। 3 हम परमेसवर कै गैल काम करणीया के कारण, हम किसे बात म्ह ठोक्कर खाण का कोए भी मौक्का कोनी देन्दे, ताके म्हारी सेवा पै कोए दोष ना आवै। 4 इस करके हम सारे हालातां म्ह खुद ताहीं परमेसवर के सच्चे सेवक के समान पेश करां सां, जिसा धीरज तै दुख सहण म्ह, गरीबी म्ह, हर बखत संकट सहण म्ह, 5 अर कोड़े खाण म्ह, कैद होण म्ह, रोळे-रब्दयां म्ह, मेहनत म्ह, जागदे रहण म्ह, ब्रत करण म्ह, 6 पवित्रता म्ह, ज्ञान म्ह, धीरज म्ह, करुणा तै, पवित्र आत्मा तै, 7 सच्चे प्यार म्ह, सच के वचन म्ह, परमेसवर की सामर्थ म्ह, हम धार्मिकता के हथियारां नै सोळे हाथ तै लड़ण खात्तर अर ओळे नै बचाव खात्तर इस्तमाल करां सां। 8 जिव माणस हमनै आच्छे, या बुरे माणस कहवै, जिव वे म्हारी बड़ाई करे या अर बेजती करे, तो हम भकाण आळे जिसे लागगा सां, तोभी सच्चे सां। 9 कई माणस हमनै अनजाणा के बरगे समझे सै, तोभी हम मशहुर सां, मरे होए बरगे दिक्खां सां पर देखो जिन्दे सां, मार खाण आळा के बरगे सां पर जी तै कोनी मारे जान्दे। 10 म्हारा पै भी दुख का बखत आवै सै, पर हम सारी हाण आनन्दित रहवां सां, हम खुद तो कंगालां की तरियां सां, पर घणखरयां नै आत्मिक रूप तै साहूकार बणा देवां सां, हम इसे सा जिस ढाळ म्हारै धौरै किमे कोनी, तोभी सारा किमे सै, येए सारी बात हमनै परमेसवर का सच्चा सेवक बणण म्ह मदद करै सै।

11 हे कुरिन्थियों नगर के बिश्वासियों, हमनै खुलकै थारे तै बात करी सै, हम पूरे मन तै थारे तै प्यार करां सां। 12 म्हारै मन म्ह थारे खात्तर प्यार कम न्ही होन्दा, पर थारा प्यार म्हारै खात्तर कम होग्या। 13 पर मै अपणे बाळक जाणकै थारे तै कहूँ सूँ, के थम भी उसकै बदले पूरे मन तै म्हारै तै प्यार करो।



14 अबिश्वासियों कै गैल साझीदार ना बणो, क्यूँके धार्मिकता अर अधर्म का मेलजोल कोनी। या चाँदणे अर अन्धकार की संगति कोनी होन्दी। 15 अर मसीह का शैतान कै गैल कोए रिश्ता कोनी होन्दा, या बिश्वासी के गेल्या अबिश्वासी का कोए नात्ता कोनी। 16 अर परमेसवर कै मन्दर म्ह मूर्तियां का काम कोनी। क्यूँके हम तो जिन्दे परमेसवर के मन्दर सां, जिसा परमेसवर नै पवित्र ग्रन्थ म्ह कह्या, “मै अपणे माणसां कै गैल रहूँगा, अर उन म्ह हान्डया-फिरया करूँगा, अर मै उनका परमेसवर होऊँगा, अर वे मेरे माणस होवेंगे।” 17 ज्यातै प्रभु अपणे वचनां के जरिये कहवै सै, “उन माणसां के बिचाळे तै लिक्ड़ो जो परमेसवर ताहीं न्ही मानते, अर न्यारे रहो, अर अशुद्ध चिज्जां तै कोए रिश्ता ना राक्खो, तो मै थमनै अपणाऊँगा। 18 अर मै थारा पिता होऊँगा, अर थम मेरे बेटे अर बेटियाँ होओगे। यो सर्वशक्तिमान प्रभु का वचन सै।”

## 7

1 हे प्यारे बिश्वासी भाईयो, जिव हमनै वो वादा मिल्या सै, ताके हम परमेसवर की ऊलाद कुद्दावां, तो आओ, हम अपणी देह अर आत्मा नै गंदा करण आळे सारे बुरे काम छोड़ द्या, अर परमेसवर का भय मानते होए पूरी रीति तै अपणे-आपनै पवित्र करण की कोशिश करां।



2 थम म्हारै तै पूरे मन तै प्यार करो। हमनै ना किसे पै जुल्म करया, ना किसे गैल अन्याय करया, अर ना किसे ताहीं ठग्या सै। 3 मै थमनै कसूरवार ठहराण कै खात्तर न्यू न्ही कहन्दा। क्यूँके मै

पैहल्याए तै कह चुक्या सूं, के हम थारे ताहीं पूरे मन तै प्यार करां सां, अर हम थारे गेल्या जीण-मरण कै खात्तर भी त्यार सां।<sup>4</sup> मै थारे तै घणे विश्वास कै गेल्या बोल्लण लागरया सूं, मन्नै थारे पै घणा गर्व सै, मै बड़ा उत्साहित सूं। अपने सारे क्लेश म्ह, मै आनन्द तै घणा भरपूर रहूं सूं।

<sup>5</sup> त्रोआस नगर तै जिव हम मकिदुनिया परदेस म्ह आये, फेर भी म्हारी देह नै चैन कोनी मिल्या, पर हम चौगरदे तै क्लेश पावां थे, बाहरणै लड़ाई-झगड़ थे, म्हारे मन म्ह डरावणी बात थी।<sup>6</sup> तोभी दुखियां ताहीं तसल्ली देण आळ परमेसवर नै तीतुस के आण तै म्हारे ताहीं उत्साहित करया।<sup>7</sup> ना सिर्फ उसके आण तै, पर उस उत्साह के जरिये भी, जो तीतुस नै थारे म्ह पाया, उसने थारी लालसा, थारे दुख, अर मेरे खात्तर थारी धुन की खबर म्हारे ताहीं सुणायी, जिसतै मन्नै और भी खुशी होई।<sup>8</sup> मे पसताऊ कोनी, के मन्नै थारे ताहीं चिट्ठी लिखी, हालाकि मन्नै अपनी चिट्ठी तै थारे ताहीं दुखी करया, मै पैहल्या तो पछताया, जिव मन्नै देख्या के थम मेरी चिट्ठी तै थोड़े बखत खात्तर तो उदास होए सों।<sup>9</sup> पर इब मै खुश सूं, ज्यातै न्ही के मन्नै थारे ताहीं दुख पोंहवाया, बल्के ज्यातै के थमनै उस दुख के कारण पाप करणा छोड़ दिया, क्यूँके थम दुखी थे, जिसा परमेसवर चाहवै था, के म्हारी ओड़ तै थमनै किसे बात का नुकसान ना पोहोचे।<sup>10</sup> क्यूँके परमेसवर की ओड़ तै मिलण आळा दुख, पापां नै छोड़ण का कारण बणे सै, जिसका नतिज्जा छुटकारा सै, उस तरियां के दुख का पछतावा कोनी होन्दा। पर दुनिया तै मिलण आळा दुख अनन्त मौत का कारण बणे सै।<sup>11</sup> इस करके सुणो, परमेसवर की ओड़ तै मिलण आळे दुख तै थम कितने गुणवाण बण गये, थारे म्ह कितना उत्साह, जबाबदारी, रिस, भय, लालसा, धुन अर बदला लेण का विचार छोड़णा, थमनै सारी तरियां तै न्यू साबित कर दिया सै, के थमनै इन सारी बातों म्ह कोए कमी कोनी छोड़डी।<sup>12</sup> फेर मन्नै पैहले जो थारे धौरे वो चिट्ठी लिखी थी, वा ना तो उसके कारण लिखी, जिसनै नाईसाफी करी, अर ना उसके कारण जिसके साथ नाईसाफी करी गई, पर ज्यातै के थारा जोश जो म्हारे खात्तर सै, वो परमेसवर के स्याम्ही थारे पै जाहिर हो जावै।

<sup>13</sup> ज्यातै हमनै तसल्ली मिली, म्हारी तसल्ली तो तीतुस की खुशी के कारण सै, म्हारे ताहीं और भी घणी खुशी होई क्यूँके उसका मन थारे कारण और भी ज्यादा खुशमिसाज होगया सै।<sup>14</sup> क्यूँके जै मन्नै उसके स्याम्ही थारे बारे म्ह कुछ गर्व दिखाया, तो मै शर्मिन्दा कोनी होया, पर जिसा हमने थारे तै सारी बात सच-सच कह दी थी, उससे तरियां ए म्हारा गर्व दिखाणा तीतुस के स्याम्ही भी सच्चा लिंकइया।<sup>15</sup> जिव तीतुस ताहीं थम सारया के आज्ञाकारी होण की बात याद आवै सै, अर किस ढाळ थम डरदे अर काम्बदे होए उसतै मिले, तो उसका प्यार थारे खात्तर और भी बधता जावै सै।<sup>16</sup> मन्नै घणी खुशी हो सै, क्यूँके मन्नै हरेक बात म्ह थारे पै पूरा भरोसा सै।

## 8

\*\*\*\*\*

<sup>1</sup> इब हे विश्वासी भाईयो, हम थमनै परमेसवर के उस अनुग्रह की खबर देवां सां, जो मकिदुनिया परदेस की कलीसिया के विश्वासियां पै होया सै।<sup>2</sup> उनकी परख बड़ी मुसीबतों म्ह होवै सै, अर घणी गरीब होण पै भी खुशी अर खुल्ले दिल तै दुसरे विश्वासियां की मदद करी।<sup>3</sup> उनके बारे म्ह मेरी या गवाही सै, के उननै जितना दे सके थे दिया, बल्के उसतै भी ज्यादा बढ़के दिया।<sup>4</sup> उननै भोत ज्यादा बिनती करी के यो दान उन विश्वासी भाईयां म्ह बाटचा जावै जो यरुशलेम नगर म्ह सै।<sup>5</sup> उननै म्हारी सोच तै भी बढ़के करया, उननै पैहल्या काम यो करया, के उननै अपने-आप ताहीं परमेसवर के खात्तर अर फेर म्हारे खात्तर अपने-आप ताहीं भी दे दिया, जिसा के परमेसवर चाहवै था के वो इसा करै।<sup>6</sup> ज्यातै हमनै तीतुस तै बिनती करी, के जिस तरियां उननै पैहल्या इस दान देण के काम की शुरुआत करी थी, उससे तरियां ए वो इस सराहनीय काम ताहीं थारे बिचाळे पूरा भी करै ले।<sup>7</sup> ज्यातै जिसा थम हरेक बात म्ह यानिके विश्वास, वचन प्रचार करण म्ह, ज्ञान अर सारी ढाळ की कोशिश

म्ह, अर उस प्यार म्ह जो म्हारै तै करो सो, बढ़दे जाओ सो, उस्से तरियां ए गरीब विश्वासियाँ खात्तर दान देण म्ह भी बढ़ते जाओ।

8 मै थमनै कोए हुकम कोनी देंदा, मै सिर्फ बाकियाँ के उत्साह तै थारे प्यार की सच्चाई नै परखण लागरया सूं। 9 थम म्हारै प्रभु यीशु मसीह के अनुग्रह नै जाणो सो, के वो धनी होके भी थारे खात्तर कंगाल बण गया, ताके उसके कंगाल हो जाण तै थम धनी हो जाओ। 10 पिच्छली साल थमनै दान दिया बल्के दान देण की इच्छा म्ह आगौ भी थे, इस बारे म्ह मै थमनै एक सलाह देणा चाहूँ सूं, के दान देण का सब तै बढ़िया तरिकका के सै? 11 जो काम थमनै शरु करया सै, उस ताहीं पूरा भी करो। इस काम के खतम होण तक, इसे तरियां उत्साहित बणे रहों, जिस तरियां उसकी योजना तैयार करते बखत थे। इस काम नै अपणी पूंजी अर काबलियत के मुताबिक पूरा भी करो, जो इस बखत थारे धारै सै। 12 जै किसे की दान देण की इच्छा हो, तो जो कुछ उसके धारै सै, उस्से के मुताबिक उसका दान लिया जावैगा, ना के उसके मुताबिक जो उसके धारै कोनी। 13 म्हारा मतलब यो कोनी के दुसरयां की भलाई करण तै थम खुद दुख सहो, म्हारा मकसद सिर्फ सब के साथ एक जिसा बरताव करो। 14 इस बखत तो थारी बढ़ोतरी उनकी जरूरत पूरी करण के खात्तर भोत सै, कदे यो भी हो सके सै, के थमनै खुद नै जरूरत पड़े अर वे अपणी बढ़ोतरी म्ह तै थारी मदद करे फेर दोन्नु पक्ष बरोबर हो जावेंगे। 15 जिसा के पवित्र ग्रंथ म्ह लिख्या सै, “जिसनै घणा कट्टा करया उसनै कुछ भी घणा न्ही पाया। अर जिसनै घाट कट्टा करया उसनै कुछ कमी कोनी होई।”

\*\*\*\*\*

16 परमेसवर का धन्यवाद होवे, जिसनै थारे खात्तर वाए चिंता तीतुस के मन म्ह दे दी। 17 जिव हमनै उस ताहीं थारे धारै आण खात्तर बिनती करी, तो उसनै म्हारी बिनती मान ली, अर घणा उत्साहित होके वो अपणी मर्जी तै थारे धारै चल्या गया। 18 हमनै उसके गेल्या उस विश्वासी भाई ताहीं भी भेज्या सै, जिसका नाम सुसमाचार फैलाण के बारे म्ह सारी कलीसिया म्ह फैल्या होया सै। 19 अर इतणाए न्ही, पर वो कलीसिया के माणसां के जरिये ठहरया भी गया, ताके इस दान के काम के खात्तर म्हारै गेल्या जावै। हम दान देण की या सेवा यरुशलेम के विश्वासियाँ ताहीं ज्यातै करा सां के प्रभु की महिमा अर सेवा करण म्ह म्हारै मन की तयारी जाहिर हो जावै। 20 हम इस बात म्ह चौक्कस रहवां सां के खुल्ले दिल तै दान देण की सेवा के इस काम के बारे म्ह जो हम करा सां, कोए म्हारै पै दोष ना लाण पावै। 21 क्यूँके जो बात सिर्फ प्रभु ए के स्याम्ही न्ही, पर माणसां के स्याम्ही भी भली सै हम उननै आच्छी तरियां तै करां सां। 22 हमनै उसके गेल्या अपणे एक और विश्वासी भाई ताहीं भी भेज्या सै, जिस ताहीं हमनै बार-बार परख के घणी बाततां म्ह हौसले आळा पाया सै; पर इब थारे पै उसनै घणा भरोस्सा सै, इस कारण वो और भी घणा हौसले आळा सै। 23 जै कोए तीतुस के बारे म्ह बुझै, तो वो मेरा मित्तर अर थारे खात्तर मेरै गैल काम करणीया सै, अर जै कोए म्हारै विश्वासी भाईयाँ के बारे म्ह बुझै, तो वे कलीसियाओं के भेज्जे होए अर मसीह नै महिमा देण आळे सै। 24 इस करके कलीसियाओं के विश्वासियाँ स्याम्ही अपणे प्यार नै जाहिर करण के जरिये साबित करो, के म्हारा थारे बारे म्ह गर्व करणा साच्चा सै।

## 9

\*\*\*\*\*

1 मन्ने इब उन पवित्र माणसां नै जो यरुशलेम म्ह रहवै सै, उन ताहीं दान देण की सेवकाई के बारे म्ह लिखण की जरूरत कोनी। 2 क्यूँके मदद करण की थारी मन की लालसा नै मै पैहले तै ए जाणु सूं, जिसके कारण मै थारे बारे म्ह मकिदुनिया कलीसिया के विश्वासी भाईयाँ के स्याम्ही गर्व करूँ सूं, के थम अखाया\* परदेस के माणस एक साल पैहल्या तै दान देण खात्तर तयार थे, अर थारे जोश नै घणखरे मकिदुनिया परदेस के विश्वासियाँ ताहीं भी दान देण खात्तर उत्साहित करया सै। 3 पर मै थारे धारै तीतुस अर दो विश्वासी भाईयाँ नै भेज्जू सूं, के हमनै जो गर्व थारे बारे म्ह दिखाया, वो इस

\* 9:2 9:2 यूनान

बात म्ह बेकार ना ठहरै; पर जिसा मन्ने कह्या उसाए थम यरुशलेम के विश्वासी भाईयाँ नै दान देण खात्तर त्यार रहो। <sup>4</sup>इसा ना हो के जिब मकिदुनिया के कुछ विश्वासी भाई मेरै गेल्या आवै अर वो थमनै दान देण खात्तर त्यार न्ही पावै, तो हो सकै सै, के हम थारे पै भरोस्से करण के कारण शर्मिन्दा होवां, पर थम म्हारे तै भी ज्यादा शर्मिन्दा होओगे। <sup>5</sup>ज्यातै मन्ने विश्वासी भाईयाँ तै या बिनती करणा जरूरी समझया के वे पैहल्या तै थारे धोरै जावै, अर जो दान देण का वादा थमनै करया था, उसका इन्तजाम कर ल्यो, जो थमनै कजूसी तै न्ही पर खुल्ले दिल तै देण खात्तर कह्या।

??????

<sup>6</sup>पर बात या सै, जो थोड़ा-सा बोवै सै, वो थोड़ा-सा काट्टैगा भी, अर जो घणा बोवै सै, वो घणा काट्टैगा। <sup>7</sup>हरेक माणस जिसा मन म्ह सोचै उसाए दान करै, ना कुढ़-कुढ़ कै अर मन म्ह दाब तै, क्यूँके परमेसवर राज्जी होकै देण आळे तै प्यार करै सै। <sup>8</sup>परमेसवर इस योग्य सै, के वो थारे ताहीं भोत-ए घणा अनुग्रह दे, ताके सब कुछ थमनै हर बात म्ह हर बखत पर्याप्त मात्रा म्ह मिलता रहवै, अर हरेक भले काम के खात्तर थारे धोरै भोत घणा होवै। <sup>9</sup>जिसा पवित्तर ग्रन्थ म्ह लिख्या सै, “परमेसवर जरूरतमंदां नै खुल्ले दिल तै देवै सै, उसकी धार्मिकता सारी हाण बणी रहवै सै।” <sup>10</sup>परमेसवर ए सै जो किसानां नै बीज अर खाण खात्तर रोट्टी देवै सै। इस तरियां परमेसवर हमेशा थारे खात्तर धन देवैगा, ताके थम उन माणसां की मदद कर सकों जिन ताहीं धन की जरूरत सै। <sup>11</sup>थम हरेक तरियां तै आशीष पाओ, ताके थम खुल्ले दिल तै दे सकों, अर जिब धारा दान गरीब माणसां म्ह बाटचा जावै तो वे सारे परमेसवर का धन्यवाद करै। <sup>12</sup>क्यूँके इस दान की सेवकाई तै ना सिर्फ पवित्तर माणसां की जरूरत पूरी होवै सै, पर भोत-से लोग भी दिल तै परमेसवर का धन्यवाद करै सै। <sup>13</sup>क्यूँके इस दान की सेवकाई नै सबूत मानकै, वे परमेसवर की महिमा करैंगे, क्यूँके थमनै मसीह कै सुसमाचार के हुकम नै मानकै उस ताहीं अपणाया सै, अर गरीब विश्वासियां की मदद खुल्ले दिल तै करी सै। <sup>14</sup>अर वे थारे खात्तर परमेसवर तै प्रार्थना करै सै। वे थारे तै प्यार करै सै, क्यूँके वे जाणै सै, के परमेसवर नै थारे पै बड़ा अनुग्रह करया सै। <sup>15</sup>परमेसवर का उसकै उस दान के खात्तर धन्यवाद हो। जिस ताहीं हम ब्यान न्ही कर सकदे।

## 10

??????

<sup>1</sup>मै पौलुस, थारे ताहीं मसीह की दयालुता अर नम्रता कै साथ बिनती करै सूं, हालाके मन्ने अहसास सै के थमनै इसा लागै सै, के आम्नै-साम्ने बात करण म्ह डरपोक सूं, अर सिर्फ चिट्ठी लिखकै शिक्षा देण म्ह ए साहसी सूं। <sup>2</sup>मै थारे तै या बिनती करै सूं, के जिब मै थारे धोरै आऊँ तो मन्ने उन माणसां तै कड़ाई तै बात ना करणी पड़े, जो ये सोचै सै के हम दुनियावी तौर तरिककां कै मुताबिक चाल्लण आळे सां। <sup>3</sup>हालाके हम इस दुनिया म्ह रहवां सां, पर हम इस दुनिया के बाकी माणसां की ढाळ लड़दे-झगड़ते कोनी। <sup>4</sup>हम इन्सानी विचारां अर झूट्टी बहसबाजी नै नाश करण खात्तर दुनियावी हथियारां का न्ही पर परमेसवर के ताकतवर हथियारां का इस्तमाल करां सां। <sup>5</sup>हम इन्सानी बहस-बाजी की बजह तै आण आळी हरेक रुकावट नै दूर कर देवां सां, जो माणसां नै परमेसवर तै दूर राखै सै, हम उनकी बिद्रोही भावना नै कैद करकै मसीह का आज्ञाकारी बणा देवां सां, <sup>6</sup>अर जिब वे पूरी रीति तै मसीह के हुकम नै मानण आळे बण जावै सै, तो हम मसीह यीशु के हुकम नै ना मानण आळा ताहीं दण्ड देवां सां।

<sup>7</sup>थम बाहरी दिखावट पै ध्यान देओ सां। जै किसे माणस नै खुद पै यो भरोस्सा हो के वो मसीह यीशु का सै, तो वो यो भी जाण ले के जिसा वो मसीह यीशु का सै, उस्से तरियां हम भी मसीह यीशु के सां। <sup>8</sup>क्यूँके जै मै उस हक के बारे म्ह और भी गर्व करै, जो प्रभु नै थारे विश्वास ताहीं घटाण खात्तर न्ही पर थारे विश्वास नै बढ़ाण खात्तर म्हारे ताहीं दिया सै, तो मै शर्मिन्दा न्ही होऊँगा। <sup>9</sup>मै अपणी चिट्ठियाँ के जरिये थमनै डराण की कोशिश न्ही करदा। <sup>10</sup>क्यूँके थारे म्ह तै कई माणस कहवै

सै, “की मेरी सारी चिट्ठी तो भोत कठोर अर असरदार सै; पर जब मै आम्नै-साम्नै मिलु सूं, तो मै कमजोर अर बोल्लण म्ह बेकार लाग्गू सूं।” 11 जो इसा कहवै सै, वो न्यू समझ लेवै के जिसा पीठ पाच्छे, चिट्ठियाँ म्ह म्हारे सन्देस सै, उस्से तरियां ए थारे स्याम्ही म्हारे काम भी होवेंगे। 12 क्यूँके म्हारै म्ह या हिम्मत कोनी के हम अपणे-आपनै उन म्ह गिण्या अर मिलावां, जो अपणी बड़ाई खुद करै सै, अर अपणे-आप ताहीं आप्पस म्ह नाप-तौलकै एक-दुसरे तै बरोबरी करके बेकूफ ठहरावै सै।

13 हम तो उस काम की हद तै बाहरणै घमण्ड कदे भी न्ही करागें, जो काम परमेसवर नै म्हारे ताहीं दिया सै, पर उस्से हद तक जो परमेसवर नै म्हारै खात्तर ठहरा दी सै, अर उस म्ह थम भी आगे सो, अर उन काम्मां की हद म्ह ए घमण्ड करागें। 14 जब हम पैहली बार थारे धोरै पोहचे तो हम घमण्ड करण म्ह उस हद नै न्ही लांघे जित्त परमेसवर नै म्हारे ताहीं काम करण खात्तर ठहराया था। उसनै म्हारे ताहीं थारे इलाके म्ह काम करण खात्तर ठहराया था, अर हम थारे ताहीं मसीह का सुसमाचार सुणाण आळे पैहले माणस सां। 15 अर हम हद तै बाहरणै दुसरयां की मेहनत पै घमण्ड न्ही करदे; पर हमनै आस सै के ज्यों-ज्यों थारा विश्वास बधता जावैगा त्यों-त्यों हम अपणी हद कै मुताबिक थारे कारण और भी माणसां ताहीं मसीह का सुसमाचार सुणा पावागें। 16 ताके हम थारी इलाके की हद तै परै दूर-दूर जगहां म्ह भी माणसां ताहीं सुसमाचार सुणावां, अर न्यू न्ही के हम दुसरयां की हद कै भीत्तर बणे बणाए काम्मां पै घमण्ड करा। 17 पर जिसा के पवित्र ग्रन्थ म्ह लिख्या सै, जै कोए घमण्ड करै, तो वो प्रभु पै घमण्ड करै।

18 क्यूँके जो अपणी बड़ाई करै सै वो न्ही, पर जिसकी बड़ाई प्रभु करै सै, वोए प्रभु की निगांह म्ह सही कुह्लावै सै।

## 11



1 थम उन माणसां की सह ल्यो सां जो अपणी खुद की बड़ाई करते रहवै सै, इस करके मै सोचु सूं, के थम मेरी भी सह ल्योगे जै मै थोड़ा सां बेकुफां के जिसा बरताव करूँ, हाँ, मेरी सह भी ल्यो सो। 2 क्यूँके मै थारे तै प्यार करूँ सूं, अर थारा ख्याल भी राक्खूँ सूं, जिसा परमेसवर राक्खे सै। थम एक पवित्र कुवारी के समान सां, जिसकी सगाई मन्ने सिर्फ मसीह यीशु तै करण की, अर उस्से ताहीं सौंपण का वादा करया सै। 3 पर मै डरूँ सूं के जिस तरियां तै सांप नै अपणी श्याणपत तै पैहली विरबान्नी हव्वा ताहीं भकाया, उस्से तरियां ए थारे मन उस सीधाई अर पवित्रता तै जो मसीह कै साथ चालण तै आवै सै, उसतै कदे बहक न्ही जाओ। 4 जै कोए थारे धोरै आके किसे दुसरे यीशु का प्रचार करै, जिसका प्रचार हमनै न्ही करया; या कोए और आत्मा थमनै मिलै, जो पैहल्या ना मिला था; या और कोए सुसमाचार सुणावै, जिस ताहीं थमनै पैहल्या न्ही मान्या था, तो थम इसनै खुशी तै स्वीकार कर लेते। 5 मै तो समझूँ सूं के मै किसे बात म्ह बडे तै बड़े परेरितां तै घाट न्ही सूं। 6 जै मै बोल्लण मै अनाड़ी सूं, तोभी मन्ने सुसमाचार अर मसीह का ज्ञान सै। मन्ने थारे ताहीं जो भी ज्ञान सिखाया सै, वो ज्ञान मन्ने थारे ताहीं साबित करके दिखाया सै।

7 इस करके मन्ने थारे खात्तर परमेसवर के सुसमाचार का प्रचार मुफ्त म्ह करया, के थारे ताहीं ऊँचा करण के मकसद तै मेरा खुद ताहीं नरम बणा लेणा मेरा अपराध था? 8 मन्ने दुसरी कलीसिया तै दान कट्टा करया, ताके मै हर कीमत पै थारी मदद कर सकूँ, थम इस ताहीं चोरी करणा ना कहों। 9 अर जब मै थारे गेल्या था, अर मेरे ताहीं पईसा की कमी होई, तो मन्ने किसे पै बोझ न्ही गेरया, क्यूँके विश्वासी भाईयाँ नै मकिदुनिया परदेस तै आके मेरी जरूरत नै पूरा करया, अर मन्ने हरेक बात म्ह अपणे-आप ताहीं थारे पै बोझ बणण तै रोक्या, अर रोक्के रहूंगा। 10 जै मसीह की सच्चाई मेरै म्ह सै, तो अखाया परदेस म्ह कोए मन्ने इस घमण्ड तै न्ही रोकैगा। 11 मन्ने थारे तै पईसा न्ही लिया, क्यूँके इस खात्तर न्ही, के मै थारे तै प्यार कोनी करदा? परमेसवर नै न्यू बेरा सै, के मै थारे तै प्यार करूँ सूं।

12 मैं थारे तै आर्थिक मदद कोनी ल्यु, ताके मैं उन माणसां नै घमण्ड करण तै रोक सकूँ, जो या कहवै सै के हम भी परमेशवर की सेवा करां सां, जिंसी थम करो सों। 13 क्यूँके इसे माणस झूट्टे परेरित, अर छळ तै काम करण आळे सै, अर मसीह के परेरित होण का झूट्टा दावा करै सै। 14 या किमे अचम्भे की बात कोनी क्यूँके शैतान खुद भी ज्योतिर्मय सुगंदूत का रूप धारण करै सै। 15 इस करैके जै उसकै सेवक भी धर्म के सेवकां का सा रूप धरै, तो कोए बड्डी बात कोनी, पर उनका अन्त उनकै काम्मां कै मुताबिक होवैगा।

XXXXXXXXXX

16 मैं फेर कहूँ सूँ के, कोए मन्नै बेकूफ ना समझे, न्ही तो बेकूफ ए सोचकै मेरी सह ल्यो, ताके माड़ा-सा मैं भी घमण्ड कर सकूँ। 17 बेधड़क कहे होडी मेरी बात प्रभु की ओड़ तै कोनी, ये तो एक बेकूफ की घमण्ड म्ह कहे होडी बात सै। 18 जब के घणखरे माणस तो अपणे दुनियावी जीवन पै घमण्ड करै सै, तो मैं भी घमण्ड करूँगा। 19 थम तो श्याणे होकै खुशी तै बेकूफ की सह लेओ सों। 20 क्यूँके जब थमनै कोए गुलाम बणा लेवै सै, या जो भी थारे धारै सै सब ले लेवै सै, या फँसा लेवै सै, या अपणे-आपनै बड़ड़ा बणावै सै, या थारे मुँह पै थप्पड़ मारै सै, तो थम सह लेओ सों। 21 के थम न्यू सोच्चों सों, के मन्नै शर्मिन्दा होणा पड़ैगा क्यूँके मन्नै यो काम कोनी करया। पर जिस किसे बात म्ह कोए हिम्मत करै सै, मैं बेकूफी तै कहूँ सूँ, तो मैं भी हिम्मत करूँ सँ।

22 के वे इब्रानी सै? मैं भी इब्रानी सूँ। के वे इस्राएली सै? मैं भी इस्राएली सूँ। के वे अब्राहम के वंशज सै? मैं भी अब्राहम का वंशज सूँ। 23 के वेए मसीह के सेवक सै-मैं बेकूफ के तरियां कहूँ सूँ-मैं उनतै बाध सूँ! मन्नै उनतै घणी मेहनत करी सै, उनतै घणा बार-बार कैदी बणया सूँ, अनगणित बार पिटचा गया सूँ, कई बार मेरी जान संकट म्ह पड़ी। 24 पाँच बर मन्नै यहूदी अगुवां के हाथ तै उन्तालीस कोड़े खाए। 25 तीन बर मन्नै बैत खाई; एक बर मेरै पै पत्थर बरसाए गये; तीन बर जहाज, जिसपै मैं चढ़या था, टूट गए; एक दिन अर एक रात मन्नै समुन्दर म्ह काटचा। 26 बार-बार मन्नै सफर करणा पडचा। कदे नदियां के, कदे डाकुआं के, कदे अपणे देशवासियां के, कदे नगरां के, जात आळा तै, कदे गैर यहूदियां तै, कदे जंगळां के कदे समुन्दरां के, कदे झूट्टे विश्वासी भाईयां के बिचाळै जोख्मां म्ह रहया। 27 मन्नै कई रात जाग के, भूक्खा-तिसाया रहकै, जाडडे म्ह; उचाड़ा रह के, करड़ी मेहनत करी अर भोत सी मुसीबत सहण करी सै। 28 इन सारी मुसीबतां के अलावा रोज मेरे पै सारी कलीसियां की भलाई अर फिकर का बोझ बणया रहवै सै। 29 जब कोए कलीसियां म्ह कमजोर हो सै, तो मैं अपणे-आपनै कमजोर महसूस करूँ सूँ, मैं दुखी हो जाऊँ सूँ, जब कोए किसे तै पाप करवावै सै।

30 जे घमण्ड करणा जरूरी सै, तो मैं अपनी कमजोरी की बातां पै घमण्ड करूँगा। 31 परमेशवर, जो यीशु का पिता सै, वो सदा धन्य सै, वो जाणै सै के मैं झूट्ट न्ही बोल्दा। 32 जब मैं दमिश्क नगर म्ह था, तो अरितास राजा के राज्यपाल नै मेरे ताहीं कैदी बणाण के मकसद तै नगर म्ह पैहरा बिठा दिया था। 33 अर मैं टोकरे म्ह बैठकै खिड़की म्ह तै होकै भीत पै तै तारया गया, अर उसकै हाथ तै बच लिंकडया।

## 12

XXXXXXXXXX

1 ऊतो घमण्ड करणा मेरै खात्तर ठीक कोनी तोभी करणा पड़ै सै; ज्यांतै मैं प्रभु के दिए होए दर्शनां अर प्रकाशनां का जिक्र करूँगा। 2 मैं मसीह म्ह एक माणस\* नै जाणू सूँ; जिसनै चौदहा साल हो लिए, मैं न्ही जाणदा के वो माणस देह म्ह था, या फेर आत्मा म्ह था, सिर्फ परमेशवर ए जाणै सै, इसा माणस सबतै ऊँच्चे सुगं म्ह ठा लिया गया। 3 मैं उस्से बात नै दोहराऊ सूँ, मैं न्ही जाणदा, के इसा होया था या फेर यो एक दर्शन था, परमेशवर ए जाणै सै। 4 के वो सुगंलोक पै ठा

\* 12:2 12:2 यो माणस पौलुस ए था जो अपनी बड़ाई न्ही करणा चाहवै था

लिया गया, अर ओड़ै उसनै इसी अदभुत बात सुणी, जिनका जिक्र करना किसे भी माणस के बस का कोनी, वे बात दुसरे माणसां ताहीं बताणा मना सै।<sup>5</sup> इसे माणस पै तो मै घमण्ड करूंगा, पर अपणे पै अपणी कमजोरियां नै छोड़, अपणे बारे म्ह घमण्ड न्ही करूंगा।<sup>6</sup> क्यूँके जै मै घमण्ड करना चाहूँ भी तो बेकूफ न्ही बणुगाँ, क्यूँके सच बोलूँगा; मै अपणी बड़ाई न्ही करना चाहन्दा, इसा ना होवै के जिसा कोए मन्ने देखै से या मन्ने सुणै सै, मन्ने उसतै बाध समझै।<sup>7</sup> मेरे ताहीं परमेसवर नै जो अदभुत बात दिखाई सै, उन ताहीं देखके मै घमण्ड म्ह ना जाऊँ, इस करके मेरी देह म्ह काण्डा चुभाया, यानिके शैतान का एक दूत मेरै घुस्से मारे ताके मै फूल न्ही जाऊँ।<sup>8</sup> इसके बारे म्ह मन्ने प्रभु तै तीन बर बिनती करी के मेरै तै यो दूर हो जावै।<sup>9</sup> पर उसनै मेरै तै कह्या, “मेरा अनुग्रह तेरे खात्तर भोत सै, क्यूँके मेरी सामर्थ कमजोरी म्ह सिध्द होवै सै।” ज्यातै मै घना राज्जी होके अपणी कमजोरी पै घमण्ड करूंगा के मसीह की सामर्थ मेरै पै छाया कर दी रहवै।<sup>10</sup> इस कारण मै मसीह के खात्तर कमजोरियाँ म्ह, अर बुराईयाँ म्ह, गरीबी म्ह, अर रोठयां म्ह, अर संकटां म्ह राज्जी सूं; क्यूँके जिव मै कमजोर होऊँ सूं, तभी मै मसीह की शक्ति म्ह मजबूत होऊँ सूं।

**परमेश्वर के आशीर्वाद के बिना**

<sup>11</sup> मै बेकूफ तो बणया, पर धमने ए मन्ने न्यु करण के खात्तर मजबूर करया। धमनै तो मेरी बड़ाई करणी चाहिये थी, क्यूँके ऊतो मै किमे भी कोनी, तोभी उन बड्या तै बड़े प्रेरितां तै किसे बात म्ह घाट कोनी सूं।<sup>12</sup> सच्चे प्रेरित के लक्खण भी थारे बिचाळै सारे ढाळ के धीरज सुधा निशान्नां, अर अनोक्खे काम्मां, अर सामर्थ के काम्मां तै दिखाए गये।<sup>13</sup> धम कौण-सी बात म्ह दुसरी कलीसियां तै घाट थे, सिर्फ इस म्ह के मन्ने थारे पै आर्थिक बोझ कोनी गेरया। मेरा यो अपराध माफ करो।<sup>14</sup> देख्खो, मै तीसरी बर थारे धोरे आण नै त्यार सूं, अर मै थारे तै कोए मदद न्ही ल्यूँगा, क्यूँके मै धारी सम्पत्ति न्ही बल्के धमनै ए चाहूँ सूं। क्यूँके बाळकां नै माँ-बाप के खात्तर धन कट्टा न्ही करना चाहिये, पर माँ-बाप नै बाळकां के खात्तर धन कट्टा करना चाहिये।<sup>15</sup> धारी आत्मा के भले खात्तर मै पक्का अपणा सब कुछ खर्च करण खात्तर तैयार सूं, बल्के आप भी खर्च हो जाऊँगा। मै थारे तै प्यार करूँ सूं, पर धम मेरै तै भोत कम प्यार करो सों।<sup>16</sup> कुछ भी हो, मै थारे पै बोझ कोनी बणया। फेर भी कोए नै कोए मेरे पै यो दोष जरूर लगा सकै सै, के मन्ने श्याणपत तै थारे ताहीं धोक्खा देके फँसा लिया।<sup>17</sup> मन्ने ना ए तो तीतुस अर ना ए किसे और के जरिये अपणे खात्तर थारे तै पईसे लिये।<sup>18</sup> मन्ने तीतुस ताहीं समझाके उसके गेल्या उस भाई ताहीं भेज्या। के तीतुस नै छळ करके थारे तै किमे लिया? के म्हारा सुभाव एक ए तरियां तै प्रेरित का न्ही था? के हम उनकी ए लीकां पै न्ही चाल्ले?

<sup>19</sup> धम इब भी योए समझरे सों, के हम थारे स्याम्ही बदले म्ह जवाब देण लागरे सां। हम तो परमेसवर नै हाजर जाणके मसीह म्ह बोल्लां सां, हे प्यारे विश्वासी भाईयो, हम ये सारी बात धमनै विश्वास म्ह मजबूत करण खात्तर कह्लां सां।<sup>20</sup> क्यूँके मन्ने इस बात का डर सै, कदे इसा ना हो के मै आके जिसा चाहूँ सूं, उसाए धमनै पाऊँ; अर मन्ने भी जिसा न्ही चाहो सो उसाए पाओ; मन्ने इस बात का डर सै के ओड़ै झगडा, जळण, छो, उदासी, विरोध, चुगली, घमण्ड अर बखेड़े ना हों; <sup>21</sup> कदे इसा ना हो के जिव मै दुबारा आऊँ, तो मेरा परमेसवर मेरे ताहीं अपमानित करै। अर मन्ने घणखरयां खात्तर फेर दुखी होणा पड़े, जिन नै पैहल्या पाप करया था। अर भुन्डे काम अर जारी अर लुचपण के कारण पाप करना न्ही छोड्या।

## 13

**परमेश्वर के आशीर्वाद के बिना**

<sup>1-2</sup> पवित्र ग्रन्थ म्ह लिख्या सै, के दो या तीन गवाहां के मुँह तै हरेक बात सच साबित हो जावै सै। जिव मै दुसरी बार थारे तै मिलण आया था, तो मन्ने उन माणसां ताहीं चेतावनी देई, जो पैहल्या

तै पाप करण लागरे थे। इब मन्नै दुसरी बार चिट्ठी लिख के थारे ताहीं अर दुसरे बाकी माणसां तै भी चेतावनी देकै कह्या के वे पाप ना करै। इब मै तीसरी बार थारे धारै आण आळा सूं, अर जै इब भी उन माणसां नै पाप करणा न्ही छोडया सै, तो कोए भी उननै परमेसवर के दण्ड तै बचा न्ही पावैगा। 3 मन्नै थारे तै कह्या सै, के उन ताहीं दण्ड मिलैगा पर फेर थम सबूत चाहों सों, के ये बात मै मसीह के जरिये बोल्लू सूं। अर जब मसीह थारे ताहीं सुधारैगा तो थारे खात्तर कमजोर न्ही पर थारे बीच म्ह सामर्थी होगा। 4 वो कमजोर होते होए कूरूस पै चढ़ाया तो गया, तोभी परमेसवर की सामर्थ तै जिन्दा होया। हम भी तो मसीह के समान कमजोर सां, पर थारे खात्तर परमेसवर की सामर्थ तै हम उसकै साथ जीवांगें।

5 अपणे-आप ताहीं परखो, के विश्वास म्ह सच्चे सां के न्ही। जै थम अपणे-आपनै सच्चा पाओ, तो थम इस बात नै जाण ल्योगे, के यीशु मसीह थारे म्ह वास करै सै। अर जै मसीह थारे म्ह वास न्ही करदा तो थम अपणे परखे जाण म्ह हारगे सों। 6 पर मेरी आस सै के थम या जाण ल्यो, के थम अपणे परखे जाण म्ह न्ही हारे। 7 भलाए थारे म्ह तै कईयाँ नै यो लागै सै के हम सच्चे पूरित कोनी। फेर भी हम अपणे परमेसवर तै या प्रार्थना करा सां के थम कोए बुराई ना करो, बल्के भलाई करो। 8 जै हम सच्चाई के बिरोध म्ह हम कुछ भी न्ही कर सकदे। हम सच के पक्षधर ए रह सकां सै। 9 जब हम कमजोर सां अर थम ठाड्डे सों, तो हम राज्जी होवां सां, अर या प्रार्थना भी करा सां, के थम विश्वास म्ह सिध्द हो जाओ। 10 इस करके मै थारे तै दूर रहके ये सारी बात लिखूं मूं, के ओडै आण पै, मन्नै प्रभु के जरिये दिए गये हक तै मन्नै थारे ताहीं दण्ड देणा ना पडै, क्यूँके मै इस हक ताहीं थारे विश्वास ताहीं मजबूत करण खात्तर इस्तमाल करणा चाहूं सूं, ना के थारे विश्वास नै कमजोर करण खात्तर। 11 हे विश्वासी भाईयो, आखर म्ह मै थारे तै कहणा चाहूं सूं, के आनन्दित रहों, सिध्द बणदे जाओ, अर एक-दुसरे नै उत्साहित करो, एक ए मन रहों, मिल-जुल के रहों। अर प्यार अर शान्ति का देण आळा परमेसवर थारे गेल्या होवैगा। 12 आप्स म्ह एक-दुसरे तै गळे मिलके प्यार तै नमस्कार करो। 13 सारे पवित्तर माणस थारे ताहीं नमस्कार कहवै सै। 14 प्रभु यीशु मसीह का अनुग्रह अर परमेसवर का प्यार अर पवित्तर आत्मा का साङ्झापण थारे सारखा कै गैल होंदा रहवै।



## गलातिया परदेस ताहीं पौलुस की चिट्ठी



जिब यीशु के सुसमाचार का प्रचार अर गैर यहूदी माणसां के बीच म्ह होण लाग्या, तो यो सवाल उठ्या के एक साच्चा विश्वासी होण खात्तर एक माणस नै मूसा के नियम-कायदा का पालन करणा जरूरी सै या न्ही। पौलुस यो विचार पेश कर सै, के यो जरूरी कोनी। वो कहवै सै के सच म्ह मसीह जीवन का एकमात्र ठोस आधार विश्वास सै। उसके जरिये सारे माणसां का परमेसवर के साथ रिश्ता सुधरै सै। पर एशिया माइनर म्ह एक रोमी देश के गलातिया परदेस की कलीसियाओं के माणसां नै पौलुस का विरोध अर दावा कर्या, के परमेसवर के साथ सही रिश्ता कायम करण खात्तर एक माणस का मूसा के नियम-कायदा का पालन करणा भी जरूरी सै। गलातियों के नाम पौलुस प्रेरित की चिट्ठी इस खात्तर लिखी गई थी, ताके वे माणस जो गलत शिक्षा तै बहक गये थे, उननै सच्चे विश्वास अर बरताव म्ह उल्टा ल्या जावै। पौलुस इस चिट्ठी की शुरुआत यीशु मसीह का एक प्रेरित होण के, अपने दावे के साथ करै सै। वो इस बात पे जोर देवे सै, के एक प्रेरित होण खात्तर उसका बुलावा परमेसवर की ओड़ तै सै, ना के किसे माणस की ओड़ तै, अर उसका मकसद खासकर गैर-यहूदियों म्ह सुसमाचार प्रचार करणा सै। फेर वो यो विचार देवे सै के सिर्फ विश्वास के जरिये माणसां का परमेसवर गैल रिश्ता सुधर सकै सै। आखरी पाठां म्ह पौलुस यो दिखावै सै, के मसीह पै विश्वास करण तै जो प्रेम पैदा होवे सै, वोए मसीह माणसां का चाल-चलण सै।

### रूप-रेखा


भूमिका 1:1-10

प्रेरित के रूप म्ह पौलुस का हक 1:11-2:21

परमेसवर के अनुग्रह का सुसमाचार 3:1-4:31

मसीह आजादी अर जिम्मेदारी 5:1-6:10

समापन 6:11-18



1 या चिट्ठी मुझ पौलुस की ओड़ तै सै, मै प्रेरित होण के खात्तर बुलाया गया सूं। मेरा प्रेरित होणा किसे माणस या माणसां की ओड़ तै न्ही बल्के यीशु मसीह के जरिये होया सै, जिस ताहीं पिता परमेसवर नै मरे होए म्ह तै जिवाया। 2 या चिट्ठी गलातिया परदेस की कलीसियाओं के खात्तर, उन सारे विश्वासी भाईयाँ की ओड़ तै सै, जो मेरै गेल्या सै। 3 मै प्रार्थना करूं सूं, के परमेसवर पिता अर म्हारे प्रभु यीशु मसीह की ओड़ तै थमनै अनुग्रह अर शान्ति मिल्दी रहवै। 4 म्हारे परमेसवर अर पिता की मर्जी के मुताबिक मसीह यीशु नै अपने-आप ताहीं म्हारे पापां के कारण बलिदान कर दिया ताके हम आज की दुनिया के माणसां के बुरे असर तै बचे रहवां। 5 परमेसवर का गुणगान अर बड़ाई युगायुग होंदी रहवै। आमीन।



6 मन्नै अचम्भा होवे सै के परमेसवर नै थारे ताहीं मसीह के अनुग्रह तै बुलाया उसतै थम इतनी ताबठे भटक के अलग ए तरियां के सुसमाचार पै विश्वास करण लागगे। 7 सच्चा सुसमाचार एके सै, जो के मसीह का सै, पर बात या सै, के कुछ लोग इसे सै जो मसीह के सुसमाचार नै बदलना चाहवै सै, अर थमनै भरमाणा चाहवै सै। 8 पर जै म्हारे म्ह तै, या सुर्ग तै उतरया होया कोए सुर्गदूत भी उस सुसमाचार नै छोड़ जो हमनै थारे ताहीं सुणाया सै, कोए अलग सुसमाचार थारे ताहीं सुणावै, तो परमेसवर उस ताहीं श्राप देगा। 9 जिसा हमनै पैहल्ल्या कह्या सै, उसाए मै इब फेर कर्हूं सूं के उस सुसमाचार नै छोड़ जिस ताहीं थमनै मान्या सै, जै कोए अलग सुसमाचार सुणावै सै, तो श्रापित

हो। <sup>10</sup>मै माणसां नै खुश करण की कोशिश न्ही करता, पर परमेसवर नै खुश करण की कोशिश करूँ सूं, जै मै इब लग माणसां नै खुश करता रहन्दा तो मसीह का दास न्ही होंदा।

**11** हे विश्वासी भाईया, मै थमने बता द्यु सूं, के जो सुसमाचार मन्ने सुणाया सै, वो माणस के जरिये

बणाया गया कोन्या। <sup>12</sup>क्यूँके वो मन्ने मेरे पूर्वजां, की ओड़ तै न्ही पोंहच्या, अर ना माणसां के जरिये सिखाया गया, पर यीशु मसीह नै सुसमाचार समझण म्ह मेरी मदद करी। <sup>13</sup>थमनै सुणा होगा के यहूदी पंथ म्ह जो मेरा चाल-चलण था वो किसा था, मै परमेसवर की कलीसिया के विश्वासियाँ ताहीं घणा काल अर उन ताहीं नाश करण की कोशिश करया करूँ था। <sup>14</sup>अर मै यहूदी मत म्ह अपने पूर्वजां की शिक्षा का अध्यन करण अर उन ताहीं मानण म्ह अपने हम उम्र के यहूदियाँ म्ह भोत उत्सुक था। <sup>15-16</sup>पर परमेसवर की जिब इच्छा होई के वो मेरे पै अपने बेटे नै जाहिर करै के मै गैर यहूदियाँ म्ह उसका सुसमाचार सुणाऊँ, उसने मेरे ताहीं मेरी माँ की कोख म्ह ए चुण लिया, अर अपने अनुग्रह तै मेरे ताहीं बुला लिया था। तो मन्ने किसे की राय कोनी ली, <sup>17</sup>अर ना यरुशलेम म्ह उनके धरै गया जो मेरे तै पैहल्या प्रेरित चुणे गये थे, पर जिब्बे अरब देश म्ह चल्या गया अर फेर ओड़ै तै दमिश्क नगर म्ह बोहड़ गया। <sup>18</sup>फेर तीन साल के पाच्छे मै पतरस\* जो प्रेरित सै उसतै मिलण खातर यरुशलेम गया, अर उसके धरै पन्द्रह दिन तैई रह्या। <sup>19</sup>पर मै प्रभु यीशु मसीह के भाई याकूब नै छोड़ और किसे प्रेरित तै न्ही मिल्या। <sup>20</sup>परमेसवर मेरा गवाह सै के मन्ने थारे ताहीं जो लिख्या सै उस म्ह कुछ भी झूठ कोनी। <sup>21</sup>उन प्रेरितां के मिलण के बाद मै सीरिया अर किलिकिया के परदेसां म्ह आया। <sup>22</sup>पर यहूदिया परदेस की कलीसियां के विश्वासी भाईयाँ नै जो मसीह म्ह विश्वास करै थे, उननै मेरा मुँह कदे न्ही देख्या था, <sup>23</sup>पर न्युए सुण्या करै थे के एक बखत था जो हमनै सताण आळा था, इब वोए उस विश्वास का सुसमाचार सुणावै सै जिननै पैहल्या नाश करै था। <sup>24</sup>अर वे मेरे बारे म्ह परमेसवर की बड़ाई लगातार करै थे।

## 2

**1** चौदहा साल के पाच्छे मै बरनबास के गेल्या फेर यरुशलेम नगर म्ह गया, अर तीतुस नै भी

गेल्या लेग्या। <sup>2</sup>मै इस खातर ओड़ै गया क्यूँके परमेसवर नै मेरे ताहीं ओड़ै जाण खातर कहा था, अर जिब मै ओड़ै था तो मै कलीसिया के अगुवां तै एकान्त म्ह मिला, अर उस सुसमाचार के बारे म्ह उन ताहीं बताया, जो मै गैर यहूदियाँ म्ह प्रचार करूँ सूं, ताके इसा ना हो के जो मन्ने पैहले अर जो इब भी करण लागरया सूं, उसका कोए नतिज्जा ना लिकड़ै। <sup>3</sup>पर तीतुस जो मेरा संगी साथी सै अर जो यूनानी सै, उसका कदे खतना कोनी होया पर कलीसिया के अगुवां नै जो यरुशलेम म्ह सै उस ताहीं अपना लिया, अर उननै उस ताहीं खतना कारण खातर मजबूर कोनी करया। <sup>4</sup>तो या बात एक समस्या बणगी, उन झूठे भाईयाँ\* के कारण होया जो चोरी तै घुस आये थे, के उस आजादी का जो मसीह यीशु म्ह हमनै मिली सै, भेद लेके हमनै यहूदी नियम-कायदा के दुबारा तै दास बणा दे। <sup>5</sup>उनके साथ एक पल भी हमनै सहमत होणा न्ही चाह्या, ताके थम सुसमाचार की सच्चाई के मुताबिक जिन्दगी जिओ। <sup>6</sup>उन कलीसिया के अगुवां ताहीं जो यरुशलेम नगर म्ह थे, उननै मेरे ताहीं मजबूर कोनी करया, के मै अपने सन्देश नै बदलु, जो मै थमनै सिखाऊँ सूं। इसतै कोए फर्क कोनी पड़ता, के वो अगुवें मेरे खातर के सै, क्यूँके परमेसवर बाहरी रूप नै देखके न्याय न्ही करता। <sup>7</sup>पर इसके उल्ट जिब उन अगुवां नै देख्या के परमेसवर नै पतरस ताहीं हक दे राख्या सै, वो के यहूदी माणसां ताहीं सुसमाचार सुणावै, उस्से तरियां गैर यहूदियाँ के खातर मेरे ताहीं भी

\* 1:18 1:18 पतरस का इसरा नाम कैफा भी था

\* 2:4 2:4 झूठे भाईयाँ-ये वो यहूदी मसीह थे जो यो विश्वास करै थे, के मसीह के हुकमां साथ-साथ हमने मूसा नबी के नियम-कायदा ताहीं मानण तै उद्धार होया

सुसमाचार सुणाणा सौप्या गया । 8 (क्यूँके जिसनै पतरस तै यहूदी माणसां म्ह परेरिताई का काम बड़े असरदार ढंग तै करवाया, उससे नै मेरै तै भी गैर यहूदियाँ म्ह असरदार काम करवाया), 9 जो लोग कलीसिया के खम्भे समझे जावै थे, यानी याकूब, पतरस, अर यूहन्ना, उननै अनुग्रह का वो वरदान पिच्छाणा जो मेरे ताहीं मिला सै । उननै मेरै ताहीं अर बरनबास ताहीं अपना साथी समझकै म्हारे ताहीं खास सहभागी बना लिया । वे इस बात खात्तर सहमत होंगे के हम गैर यहूदियाँ के धोरे जावै, अर वे यहूदियाँ के धोरे जावै । 10 उननै म्हारे तै सिर्फ याए बिनती करी के हम यरुशलेम के गरीब विश्वासी भाईयाँ की मदद करां, अर इस्से काम नै करण की मै खुद भी कोशिश करूँ था ।

\*\*\*\*\*

11 एक दिन जिव पतरस अन्ताकिया नगर म्ह आया, तो मन्नै विश्वासी भाईयाँ के स्याम्ही उस ताहीं फटकारा, क्यूँके जो वो काम करै था वो गलत था । 12 वो पैहले गैर यहूदियाँ के गैल खाया-पिया करै था, जिव कुछ विश्वासी जो याकूब नै यरुशलेम नगर म्ह भेज्जे थे, तो उसनै अपणे-आप ताहीं गैर यहूदियाँ तै अलग कर लिया, अर उनकै गैल खाणा-पीणा छोड़ दिया अर उसनै यहूदी माणसां के डरके मारै इसा करया, क्यूँके वे चाहवै थे, के गैर यहूदियाँ का भी खतना हो । 13 पतरस के गेल्या बाकी बचे यहूदी माणस भी उसके कपट म्ह शामिल होंगे, अर उन म्ह बरनबास भी शामिल था । 14 पर जिव मन्नै देख्या के उनका सुभाव सुसमाचार की सच्चाई के मुताबिक कोनी, तो मन्नै सोरे विश्वासी भाईयाँ के स्याम्ही पतरस तै कह्या, “जिव तू यहूदी होकै गैर यहूदियाँ की तरियां चाल्ले सै अर यहूदी माणसां की तरियां कोनी चाल्दा, तो तू गैर यहूदियाँ नै यहूदी माणसां की तरियां चालण खात्तर क्यूँ कहवै सै ।”

\*\*\*\*\*

15 हम तो जन्म तै यहूदी सां, अर पापी गैर यहूदियाँ म्ह तै कोन्या । 16 हम यहूदी विश्वासी यो जाणा सां, के माणस मूसा नबी के नियम-कायदा तै न्ही, पर यीशु मसीह पै विश्वास करण के जरिये परमेसवर की नजर म्ह धर्मी बनै सै, इस खात्तर हमनै खुद भी प्रभु यीशु मसीह पै विश्वास करया, ताके हम नियम-कायदा तै न्ही, पर यीशु मसीह पै विश्वास करण तै परमेसवर की नजर म्ह धर्मी बना, क्यूँके के मूसा नबी के नियम-कायदा तै कोए माणस धर्मी न्ही बनौगा । 17 हम जो मसीह के जरिये परमेसवर की नजर म्ह धर्मी बणणा चांह्दा सां, बल्के इसके के हम मूसा नबी के नियम-कायदा नै मानण के जरिये, तो कुछ यहूदी हमनै पापी समझे सै (क्यूँके इब हम यहूदी नियम-कायदा नै कोनी मानते) तो के इसका मतलब यीशु मसीह नै म्हारे तै पाप करवाया, न्ही बिलकुल न्ही! 18 पर मै सचमुच म्ह पाप करूँ सूँ जै मै उन काम्मां नै करूँ सूँ, जिन ताहीं मन्नै छोड़ दिया था जिसा के माणस परमेसवर की नजर म्ह धर्मी बणणा चाहवै, मूसा नबी के नियम-कायदा के मानण के जरिये । 19 मै जाणु सूँ, के मूसा नबी के नियम-कायदा के मानण तै मै धर्मी न्ही बण सकता, तो मै सोचु सूँ, के मै नियम-कायदा कै खात्तर मर जाऊँ ताके परमेसवर कै खात्तर मै सदा जिन्दा रहूँ । 20 यो इसा सै, के मान्ना जिंसा मै मसीह के गैल क्रूस पै मारया गया, अर इब मै जिन्दा न्ही रह्या, पर मसीह मेरै म्ह जीवै सै, अर इब जो मै जीण लागरया सूँ, तो सिर्फ परमेसवर कै बेट्टै पै विश्वास करण के जरिये जिसनै मेरै तै इतणा प्यार करया के मेरै खात्तर अपनी जान दे दी । 21 मै परमेसवर कै अनुग्रह नै बेकार न्ही बतान्दा, क्यूँके जै नियम-कायदे धार्मिकता का कारण होन्दे तो मसीह का जान देणा बेकार हो जान्दा ।

### 3

\*\*\*\*\*

1 हे बिना अकल के गलातिवासियो! किसनै थारे ताहीं बहका दिया सै? मन्नै थारे ताहीं समझाया सै के यीशु मसीह के क्रूस पै जान देण के जरिये उसने के हासिल करया! 2 मेरे ताहीं एक बात

बताओ के थमनै पवित्र आत्मा, मूसा नबी के नियम-कायदा के मानण तै पाया था या विश्वास की खबर तै जो हमनै थारे ताहीं सुणाई थी? <sup>3</sup> के थम इसे बेअक्ल के सों के थमनै नई जिन्दगी पवित्र आत्मा के जरिये शरू करी पर इब थम अपणी जिन्दगी का अन्त अपणी ताकत तै करणा चाहो सों? <sup>4</sup> जब थम विश्वासी बणे तो थमनै भोत दुख टाया, मै उम्मीद करूँ सूँ के थमनै बेकार म्ह ए वो दुख न्ही टाया। <sup>5</sup> परमेसवर थमनै पवित्र आत्मा भरपूरी तै देवै सै, अर जो थारे म्ह सामर्थ के काम करै सै, के वो मूसा नबी के नियम-कायदा के मानण तै या मसीह के सुसमाचार पै विश्वास करण तै इसा करै सै? <sup>6</sup> अब्राहम के बारे म्ह पवित्र ग्रन्थ या कहवै सै, “अब्राहम नै तो परमेसवर पै विश्वास करया अर उसकी बजह तै परमेसवर नै उस ताहीं धर्मी बना दिया।” <sup>7</sup> तो यो जाण ल्यो के जो अब्राहम की तरियां विश्वास करण आळे सै, वेए अब्राहम के वंशज कुह्त्वावैगें। <sup>8</sup> अर परमेसवर नै पवित्र ग्रन्थ म्ह पैहल्ल्या तै ए यो कह्त्वा, के वो गैर यहूदियाँ नै विश्वास के जरिये धर्मी बनावैगा, परमेसवर नै भोत पैहले तै ए अब्राहम ताहीं यो सुसमाचार सुणा दिया था, के “तेरे म्ह तै सारी जात आशीष पावैगी।” <sup>9</sup> जितने मसीह पै विश्वास करण आळे सै, वे अपणे विश्वास के कारण वोए आशीष पावैगें जो अब्राहम नै पाई थी। <sup>10</sup> इस करके जितने माणस मूसा नबी के नियम-कायदा नै मानके परमेसवर की नजर म्ह धर्मी बणण की सोचवै सै, वे सारे परमेसवर की ओड़ तै श्रापित सै, क्यूँके पवित्र ग्रन्थ म्ह लिख्या सै, “वो श्रापित सै, क्यूँके कोए भी माणस हर पल नियम-कायदा की किताब म्ह लिखी होई सारी बाततां नै निभा न्ही सकदा।” <sup>11</sup> पर या बात साफ सै, के मूसा नबी के नियम-कायदा के मानण के जरिये परमेसवर की नजर म्ह कोए भी धर्मी न्ही बणदा, क्यूँके पवित्र ग्रन्थ कहवै सै, के “जो मसीह पै विश्वास करैगा, परमेसवर उसनै ए धर्मी बनावैगा।” <sup>12</sup> पर मूसा नबी के नियम-कायदा नै मानके जीणा अर परमेसवर पै विश्वास करके जीणा एक जिसा कोनी, जिसा पवित्र ग्रन्थ म्ह लिख्या सै पर “जो इन सारी बाततां नै मानैगा, वो उनके कारण जिन्दा रह्हेगा।” <sup>13</sup> हम सारे परमेसवर के श्राप के लायक थे, क्यूँके हम उसके नियम-कायदा नै पूरी तरियां न्ही मानते, तोभी मसीह म्हारे ताहीं उस श्राप तै छुड़ावै सै, जो नियम-कायदा के जरिये आवै सै। जब मसीह करूस पै मारया गया, तो उसनै अपणे उप्पर वो श्राप ले लिया, जिसा के पवित्र ग्रन्थ म्ह लिख्या सै, के “श्रापित सै वो जो करूस पै लटकाया जावै सै।” <sup>14</sup> मसीह नै यो इस करके करया, ताके जिसका वादा परमेसवर नै अब्राहम तै करया था, वो आशीष मसीह यीशु पै विश्वास करण तै गैर यहूदियाँ तक पोहच सकै, अर हम मसीह म्ह विश्वास कै जरिये उस पवित्र आत्मा नै पा लेवां, जिसका देण का वादा उसनै म्हारे तै करया सै।

### ???? ? ? ? ? ?

<sup>15</sup> हे विश्वासी भाईयो, मै रोज की जिन्दगी का उदाहरण देके थमनै समझाऊँ सूँ, जब दो आदमी कोए करार करे सै अर उस ताहीं पक्का करे सै, तो ना कोए उसनै घटा सके सै अर ना उस म्ह किमे बढ़ा सके सै। <sup>16</sup> इस तरियां परमेसवर नै वादा अब्राहम अर उसके वंश तै करया था। पवित्र ग्रन्थ न्यू कोनी कहवै, के तेरी “वंशां नै,” जिसका मतलब भोत सारे माणस, पर यो एक माणस के बारे म्ह कहवै सै “तेरे वंश नै” अर वो मसीह सै। <sup>17</sup> मेरे कहण का मतलब यो सै, के परमेसवर नै अब्राहम के गैल करार करण के चार सौ तीस साल के बाद मूसा नबी के नियम-कायदे दिए, जो उस करार नै ना तो तोड़ पाए, अर ना उसके वादे नै टाळ पाए। <sup>18</sup> परमेसवर माणसां नै इस बजह तै आशीष कोनी देवै, के वे मूसा नबी के नियम-कायदा नै मान्ने, बल्के वो इस करके देवै सै, क्यूँके इसका देण का परमेसवर नै वादा करया था, अर अब्राहम ताहीं भी ये आशीष इस करके मिली थी। <sup>19</sup> जब फेर नियम-कायदे क्यूँ दिये गये? नियम-कायदे इस खात्तर दिए गये ताके लोग जाण सकै के पाप के सै। मूसा नबी के नियम-कायदे तब तक रहणे थे, जब तक अब्राहम की पीढ़ी म्ह तै जिसका परमेसवर नै वादा करया था के वो आ ना जावै। मूसा नबी ताहीं नियम-कायदे सुर्गदूतां कै जरिये दिए गये थे

अर मूसा नबी लोग्गों के बीच एक बिचौलिया बणया। 20 परमेसवर नै अब्राहम तै वादा करया था इस करके बिचौलिया की जरूरत कोनी थी।



21 तो के मूसा नबी के नियम-कायदे परमेसवर के वादे के बिरोध म्ह सै? न्ही बिल्कुल न्ही! क्यूँके जै इसे नियम-कायदे सै, जो परमेसवर की नजर म्ह हमनै धर्मी बणावै, तो सदा का जीवन मूसा नबी के नियम-कायदा के मानण तै हम पा सकां सां। 22 पर पवित्र ग्रन्थ हमनै बतावै सै के हम सब पापी सां, ताके परमेसवर उन माणसां नै जो यीशु मसीह पै बिश्वास करै सै वो दे सकै जिसका उसनै उसका वादा करया सै। 23 पर इसतै पैहल्या के लोग प्रभु यीशु मसीह पै बिश्वास करै हम यहूदी कैद म्ह थे, नियम-कायदे म्हारी रुखाळी करै थे। हम कैद म्ह जिब ताहीं रहे जिब के मसीह कौण सै अर हम उस म्ह बिश्वास करते रहवां। 24 नियम-कायदे म्हारे ताहीं इस खात्तर दिए गये, ताके मसीह के आण तक वो म्हारी अगुवाई कर सकै अर म्हारे ताहीं सम्भाळ सकै, ताके हम मसीह पै बिश्वास करण के जरिये परमेसवर की नजर म्ह धर्मी बणा। 25 जिब हमनै मसीह यीशु पै भरोस्सा करया सै तो नियम-कायदा की अगुवाई अर मदद की जरूरत कोनी। 26 थम सारे मसीह यीशु पै बिश्वास करण के कारण परमेसवर की ऊलाद सां। 27 अर थारे म्ह तै जितना नै मसीह के नाम म्ह बपतिस्मा लिया सै, उननै नई जिन्दगी पा ली सै। 28 इब मसीह म्ह यहूदी अर गैर यहूदी म्ह कोए फर्क न्ही रह्या, अर ना नौक्कर ना आजाद म्ह, ना लोग अर लुगाई म्ह कोए फर्क रह्या, क्यूँके थम सारे मसीह यीशु म्ह एक सां। 29 अर जै थम मसीह के सां तो अब्राहम के वंश अर वादे के मुताबिक वारिस भी सां।

#### 4

1 मै थमनै एक उदाहरण देके समझाऊँ सूँ, के बेट्टा पिता की सम्पत्ति का वारिस होगा, जिब ताहीं वो बाळक सै, वो एक दास की तरियां सै, इब ताहीं उसका सम्पत्ति पै कोए हक कोनी पर आण आळे बखत म्ह वो पिता की सम्पत्ति का माल्लिक होवैगा। 2 पर जिब ताहीं बेट्टे की सही उमर न्ही हो अर सारी सम्पत्ति का माल्लिक ना बण जावै सै, वो रुखवाळियां अर भण्डारियां कै बस म्ह रहवै सै। 3 उससे तरियां जिब हम मसीह नै न्ही जाणा थे, तो दुनिया की रीति-रिवाजां अर नियम-कायदा के गुलाम थे। 4 पर जिब सही बखत आया तो परमेसवर नै अपणा बेट्टा इस दुनिया म्ह भेज्या, अर एक बीरबानी नै उस ताहीं जन्म दिया, वो यहूदी माणसां म्ह पैदा होया अर उसनै मूसा के नियम-कायदा ताहीं मान्या। 5 ताके हमनै छुड़ाले जो हम मूसा नबी के नियम-कायदा के अधीन सां, अर हमनै उसकी ऊलाद होण का हक मिल्या। 6 इब थम उसकी ऊलाद सां, इस करके परमेसवर नै अपणे बेट्टे की आत्मा नै म्हारे दिलां म्ह भेज्या सै, जो आत्मा परमेसवर ताहीं “हे अब्बा, हे पिता” कहके नै बुलावै सै। 7 इस करके तू इब नौक्कर कोनी, पर उसकी ऊलाद सै, अर परमेसवर वो सारी चीज थमनै देवैगा जिसनै उसका वादा थारे ताहीं देण का करया सै।



8 जिब थम परमेसवर नै न्ही जाणा थे तो उस बखत थम उसके गुलाम थे, जो असलियत म्ह परमेसवर सै ए कोनी। 9 इब थारा रिश्ता परमेसवर कै गैल सै, उसनै म्हारे ताहीं अपणा बेट्टा होण खात्तर बुलाया सै, तो उन कमजोर अर निकम्मी पुराणी शिक्षाओं के गुलाम बणण खात्तर क्यूँ उसकी ओड़ जाओ सां, के थम दुबारा उनके गुलाम होणा चाह्को सां? 10 थम गैर यहूदी बिश्वासी लोग दिन, महिन्ना, सही बखत अर साल्लां नै मान्को सां, जो मूसा नबी के नियम-कायदा के मुताबिक सै। 11 मै थारे वारै म्ह डरूँ सूँ, जो थम करो सां, कदे इसा ना हो के जो मेहनत मन्ने थारे खात्तर करी सै वा बेकार हो जावै। 12 हे बिश्वासी भाईयो, मै थारे तै बिनती करूँ सूँ, के अपणे-आपने मूसा नबी के नियम-कायदा तै आजाद करो, क्यूँके मै भी मूसा नबी के नियम-कायदा तै आजाद होग्या सूँ, जिस तरियां थम गैर यहूदी होण तै नियम-कायदा तै आजाद हो, थमनै मेरे साथ बुरा बरताव न्ही करया। 13 थमनै याद होगा के मन्ने पैहलम पहल देह की बीमारी के कारण थारे ताहीं सुसमाचार सुणाया।

14 मेरी बीमारी थारे खात्तर मूसीबत थी, फेर भी थमनै ना तो मेरे तै नफरत करी, अर ना ए मेरे ताहीं तुच्छ जाणया, पर परमेसवर के सुर्गादत बल्के खुद मसीह यीशु के समान मेरे ताहीं अपनाया 15 थम खुश थे, पर इब धारी खुशी कित्त गई? मै थारा गवाह सूं के थम मेरे खात्तर सब कुछ कुरबान कर सको थे, बल्के अपनी आँख भी लिकाड़के मन्नै दे देन्दे। 16 तो के थारे तै सच बोलण के कारण मै थारा बैरी बणगया सूं? 17 वे थमनै अपने पक्ष म्ह करणा तो चाहवै सै, पर भले मकसद तै न्ही, बल्के उनका मतलब तो थारे ताहीं मेरे तै न्यारा पाड़ना सै ताके थम उनके ए चेल्ले बण जाओ। 18 सदा ए आच्छे मकसद के खात्तर उत्साही होणा आच्छा सै अर सिर्फ उस्से बखत न्ही, जिव मै थारे गेल्या रहूँ सूं। 19 हे मेरे बाळकों, जिस तरियां एक औरत बच्चा होण के बखत जो दद सहवै सै उस्से तरियां मै भी थारे खात्तर दद सहू सूं मै जिव ताहीं दद म्ह रहूँगा जिव ताहीं थम मसीह म्ह सिध्द ना हो जाओ। 20 जी तो इसा करै सै, के इस बखत मै थारे धौरे होन्दा अर प्यार तै थारे ताहीं समझान्दा, क्यूँके मेरी समझ म्ह कोनी आन्दा के मै थमनै के कहूँ।

### \*\*\*\*\*

21 थम जो मूसा नबी के नियम-कायदा के अधीन होणा चाहवै सों, मेरी बातों पै ध्यान द्यो, मै बताऊँ सूं के मूसा नबी के नियम-कायदा की किताब म्ह के लिख्या सै? 22 पवित्र ग्रन्थ म्ह यो लिख्या सै, के अब्राहम के दो छोरे होए, उसका एक छोरा हाजिरा नाम की नौकराणी तै पैदा होया अर दुसरा सारा तै पैदा होया जो उसकी ब्याहता\* थी। 23 पर जो नौकराणी तै पैदा होया था वो एक साधारण बच्चा था जो शरीर की इच्छा तै पैदा होया, अर जो उसकी ब्याहता वीरबानी तै पैदा होया, वो परमेसवर के वादे के मुताबिक पैदा होया जो उसनै अब्राहम तै करया था। 24 इन बातों तै हमनै या सीख मिलै सै, ये वीरबानी मान्नों दो करार सै। करार जो परमेसवर नै सीनै पहाड़ पै इस्राएली माणसां तै जो करया था वो हाजिरा की तरियां सै। 25 अर हाजिरा मान्नों अरब देश का सीनै पहाड़ सै, अर वो आज के यरुशलेम नगर की तरियां सै जडै के माणस मूसा के नियम-कायदा के समान सै। 26 पर सुर्गीय यरुशलेम अब्राहम की विरबान्नी सारा के समान सै, अर उसके बाळक गुलाम कोनी, यो यरुशलेम विश्वासियां के खात्तर माँ की तरियां सै। 27 जिसा यशायाह नै पवित्र ग्रन्थ म्ह लिख्या सै, “हे बाँझ विरबान्नी, तू जो बाळक पैदा न्ही कर सकदी, आनन्दित हो, तू जो प्रसव-पीड़ा तै अनजाण सै, ऊँची आवाज म्ह जयजयकार कर, क्यूँके छोडडी होई की ऊलाद सुहागण की ऊलाद तै भी घणी सै।” 28 हे विश्वासी भाईयो, थम इसहाक की तरियां हो क्यूँके थारा जन्म परमेसवर के वादे के मुताबिक होया सै जो उसनै अब्राहम तै करया सै। 29 अर जिसा उस बखत शरीर की इच्छा के मुताबिक जन्मा होया बेट्टा परमेसवर की आत्मा के शक्ति के मुताबिक जन्मे होए बेट्टे नै सतावै था, उस्से तरियां हम भी उन माणसां तै सताये जावां सां, जो यो चाहवै सै के परमेसवर की नजर म्ह धर्मी बणण खात्तर मूसा नबी के नियम-कायदा नै मानना जरूरी सै। 30 पर पवित्र ग्रन्थ कहवै सै, के “नौकराणी अर उसके बेट्टे नै लिकाड़ दे, क्यूँके वो ब्याहता विरबान्नी के बेट्टे के गैल कदे भी पिता की सम्पत्ति का वारिस न्ही होगा।” 31 इस करके हे विश्वासी भाईयो, हम नौकराणी की ऊलाद कोनी जो के मूसा नबी के नियम-कायदे सै, बल्के ब्याहता विरबान्नी की ऊलाद सां जो के विश्वास सै।

## 5

### \*\*\*\*\*

1 मसीह नै म्हारे ताहीं मूसा नबी के नियम-कायदा तै आजाद कर दिया सै, इस करके अपनी आजादी बणा के राख्को, अर मूसा के नियम-कायदा नै मानण खात्तर कोए थमनै गुलाम ना बणावै। 2 सुणो! मै, पौलुस, थारे तै कहूँ सूं के जै खतना करावोगे, तो मसीह तै थमनै किमे फायदा न्ही होगा। 3 फेर भी मै एक खतना कारण आळें नै बता द्यु सूं, के उसनै सारे नियम-कायदे मानने पड़ेंगे। 4 थम जो

\* 4:22 4:22 ब्याहता-जिसके गैल ब्याह होया हो

नियम-कायदा के जरिये धर्मी बणणा चाह्को सों, तो फेर थमनै यीशु मसीह तै रिश्ता तोड़ लिया सै, अर थमनै अपणे-आप ताहीं उस दया तै अलग कर लिया सै जिसके जरिये परमेसवर थमनै बचा सके सै।<sup>5</sup> मै यो इस खात्तर कहूँ सूँ, क्यूँके हमनै पवित्तर आत्मा की ओड़ तै पूरा भरोस्सा सै, के परमेसवर यीशु मसीह पै विश्वास करण के कारण हमनै धर्मी बणावैगा।<sup>6</sup> जै थम यीशु मसीह नै मानण आळे सों, तो उसतै कोए फर्क कोनी पड़ता के थारा खतना होया सै के न्ही होया, पर जरूरी यो सै, के हम मसीह पै विश्वास करां, अर परमेसवर अर माणसां प्रति प्यार राक्खा।<sup>7</sup> थम मसीह पै विश्वास करण म्ह बढ़ण लागरे थे, पर इब थमनै सच्चाई मानण तै कोए रोक न्ही ले।<sup>8</sup> इसी सीख परमेसवर की ओड़ तै न्ही आन्दी जो थमनै अपणी ऊलाद होण खात्तर बुलावै सै।<sup>9</sup> सीख जो सच्ची न्ही सै वो इस कहावत की तरियां सै, थोड़ा-सा खमीर सारे गूँधे होए चुन नै खमीर बणा दे सै।<sup>10</sup> पर मै परमेसवर पै भरोस्सा राक्खूँ सूँ, के वो थमनै झूट्टी अर भरमाण आळी सीख तै बचावे राक्खैगा, पर जो थमनै भरमा दे सै चाहे वो कोए भी क्यूँ ना हो परमेसवर तै दण्ड पावैगा।<sup>11</sup> हे विश्वासी भाईयो, थम जाणो सों के मै यो प्रचार करूँ सूँ, के खतना करवाणा जरूरी कोनी, इस करके यहूदी माणस मेरे ताहीं सारी हाण सतावै सै, जै मै क्रूस नै छोड़के खतना का प्रचार करूँ तो उसतै यहूदी माणस मेरे ताहीं कोनी सतावैगें।<sup>12</sup> भला होंदा जो थमनै डामाडोल करै सै, वे अपणे-आपनै नपुंसक बणा लवै।<sup>13</sup> हे विश्वासी भाईयो, थम आजाद होण के खात्तर परमेसवर के जरिये बुलाए गये सों, इस खात्तर थमनै मूसा नबी के नियम-कायदा ताहीं मानण की जरूरत कोनी, पर इसा ना होवै के थम इसनै बुरी लालसा पूरी करण का जरिया बणा ल्यो, पर हरेक के गैल प्यार करो अर सेवा करो।<sup>14</sup> क्यूँके सारे नियम-कायदे इस एक बात म्ह पूरे हो ज्या सै, “तू अपणे पड़ोसी तै अपणे जिसा प्यार कर।”<sup>15</sup> पर जै थम एक-दुसरे नै जानवरां की ढाळ पाड़ खाओ सों, तो चौक्कस रहो, के थम एक-दुसरे नै नाश ना कर दियो।

### XXXXXXXXXX

<sup>16</sup> पर मै कहूँ सूँ, पवित्तर आत्मा नै थारे जीवन म्ह अगुवाई करण द्यो, ताके थम अपणी बुरी आदत्तां नै (लालसा) नै पूरी ना कर सकों।<sup>17</sup> देह की बुरी लालसा पवित्तर आत्मा के बिरोध म्ह, अर पवित्तर आत्मा देह की बुरी लालसा के बिरोध म्ह लड़दी रहवै सै। इस कारण जो भले काम थम करणा चाह्को सों वो न्ही कर पान्दे।<sup>18</sup> जै थम आत्मा की अगुवाई म्ह चाल्लों सों, तो थम मूसा के नियम-कायदा के अधीन न्ही सों।<sup>19</sup> देह के काम तो दिक्खे सै, यानी के जारी, भुन्डे काम, लुचपण,<sup>20</sup> मूर्तिपूजा, टोणा, बैर, गुस्सा, बिरोध, फूट विधर्म,<sup>21</sup> डाह, मतवालापण, रासलीला अर इनके जिसे और काम सै, इनके बारे म्ह मै थारे तै पैहल्य्या कह द्यूँ सूँ जिसा पैहल्य्या कह्दा था, के इसे-इसे काम करणीये परमेसवर के राज्य के वारिस न्ही होंगे।<sup>22</sup> पर आत्मा का फळ प्यार, आनन्द, शांति, धीरज, करुणा, भलाई, विश्वास,<sup>23</sup> नम्रता, अर संयम सै, इसे-इसे काम्मां के बिरोध म्ह कोए भी नियम-कायदे कोनी।<sup>24</sup> अर जो मसीह यीशु म्ह सै उननै देह की बुरी लालसाओं\* ताहीं क्रूस पै चढ़ा दिया सै।<sup>25</sup> क्यूँके पवित्तर आत्मा नै म्हारे ताहीं नई जिन्दगी दी सै, इस खात्तर पवित्तर आत्मा नै जिन्दगी के हरेक क्षेत्र म्ह अगुवाई करण द्यो।<sup>26</sup> हम घमण्डी होके ना एक-दुसरे नै छेड़ा, अर ना एक-दुसरे तै जळण करा।

## 6

### XXXXXXXXXX

<sup>1</sup> हे विश्वासी भाईयो, जै कोए माणस किसे पाप या कसूर म्ह पकडचा भी जावै, तो थम जो पवित्तर आत्मा के चलाए चाल्लों सों, उसनै नरमाई के गेल्या धर्म की राह पै उल्टा ल्यावण म्ह उसकी मदद करो, अर अपणा भी ध्यान राक्खों के थम भी इसे इम्तिहान म्ह ना पड़ जाओ।<sup>2</sup> म्हारे म्ह तै जै कोए भी मुसीबत म्ह हो, तो हमनै एक-दुसरे की मदद करणी चाहिए, अर इस तरियां हम

\* 5:24 5:24 बुरी लालसाओं शरीर की बुरी आदत





## इफिसुस नगर के माणसां ताहीं प्रेरित पौलुस की चिट्ठी



इफिसुस नगर के माणसां ताहीं प्रेरित पौलुस की चिट्ठी परमेसवर की योजना जुड़ी सै, के जो कुछ सुगं म्ह सै अर जो कुछ धरती पै सै, सारा सब कुछ वो मसीह म्ह कट्टा करां (1:10)। इफिसियों के पैहले भाग म्ह लेखक एकता के बारे म्ह बात करै सै, उस राह के बारे म्ह बतावै सै, जिसके जरिये परमेसवर पिता नै अपने माणसां का चुनाव करया, कै किस तरियां बेट्टे यीशु मसीह के जरिये उन ताहीं अपने पाप तै माफी मिल्ली अर वे छुड़ाए गये सै, अर किस तरियां पवित्र आत्मा के जरिये परमेसवर का महान वादे नै पूरा करण का भरोस्सा दिया गया सै। दुसरा भाग म्ह वो पाठकां ताहीं इसी जिन्दगी जीण की बिनती करै सै, के मसीह म्ह उनकी एकता उनके सामूहिक जीवन की सच्चाई बण जावै।

मसीह तै जुड़े परमेसवर के माणसां म्ह एकता नै दिखाण खात्तर कई मिसाल काम म्ह लाई गई सै, कलीसिया एक देह की तरियां सै, जिसका सिर मसीह सै, या फेर यो एक मकान के तरियां सै, जिस म्ह कुण के सिरे का पत्थर मसीह सै, यो एक पत्नी की तरियां सै जिसका धणी मसीह सै। हर एक बात इस म्ह मसीह के प्रेम, बलिदान, माफी, अनुग्रह अर सिद्धता की रोशनी म्ह देख्या गया सै।

### रूप-रेखा


जानकारी 1:1,2

मसीह अर कलीसिया 1:3-3:21

मसीह म्ह नया जीवन 4:1-6:20

समापन 6:21-24

1 या चिट्ठी पौलुस की ओड़ तै सै, जो परमेसवर की इच्छा तै यीशु मसीह का प्रेरित सै, मै या चिट्ठी उन पवित्र अर मसीह यीशु म्ह विश्वासी माणसां के नाम लिखूं सूं, जो इफिसुस नगर म्ह रहवै सै।<sup>2</sup> मै प्रार्थना करूं सूं, के म्हारे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्ली रहवै।



<sup>3</sup> म्हारे परमेसवर अर प्रभु यीशु मसीह के पिता का धन्यवाद हो के उसनै म्हारे ताहीं मसीह म्ह आत्मिक रूप तै हरेक तरियां तै, उन आशीषां के जरिये आश्रित करया जो सुगं तै आवै सै।<sup>4</sup> परमेसवर नै धरती अर अकास बणाण तै पैहले ए उसनै मसीह म्ह म्हारे ताहीं चुण लिया, ताके हम इसकी निगांह म्ह पवित्र अर बेकसूर होवां।<sup>5</sup> अर प्यार म्ह उसनै अपनी भले मकसद मुताबिक म्हारे ताहीं अपने खात्तर पैहले तै ठहराया के यीशु मसीह के जरिये हम उसकी गोद ली होई ऊलाद हो।<sup>6</sup> तो आओ हम परमेसवर के अदभुत अनुग्रह की महिमा करा, अर यो इस खात्तर होया सै क्यूंके म्हारा रिश्ता उसके बेट्टे के गैल सै, जिसतै वो प्यार करै सै।<sup>7</sup> यीशु मसीह के लहू बहाए जाण के कारण हम छुड़ाए गये, जिसका मतलब यो सै के म्हारे सारे पाप माफ होए। परमेसवर के भोत अनुग्रह के मुताबिक मसीह म्ह उसके लहू के जरिये छुटकारा यानी पापां तै माफी मिलै सै।<sup>8</sup> परमेसवर नै सारी बुद्धि अर ज्ञान तै म्हारै पै भोत-ए धणी दया करी।<sup>9</sup> परमेसवर नै अपनी इच्छा का भेद म्हारै पै भले मकसद के मुताबिक जाहिर करया, जिस ताहीं उसनै खुद मसीह म्ह स्थापित करया।<sup>10</sup> अर परमेसवर की योजना कै मुताबिक, तय करे गए बखत पै, जो किमे सुगं अर धरती पै सै, वो सारा किमे मसीह के हाथ म्ह सौंपेगा।<sup>11</sup> परमेसवर नै मसीह म्ह हम यहूदी माणसां ताहीं भी अपने माणस होण खात्तर छुँटा लिया सै, क्यूंके शुरु तै ए उसकी या योजना थी, उसनै यो सब कुछ अपनी इच्छा अर योजना के मुताबिक करया।<sup>12</sup> यो उसनै इस खात्तर करया जिसतै के हम

यहूदियाँ ताहीं जो पैहले माणस सै, जो मसीह पै आस राख्खै सै, अर उसकी महिमा की बड़ाई के कारण बणा ।<sup>13</sup> अर योए थारे गैल भी होया के थमनै सच्चाई का वचन सुण्या, अर वो सुसमाचार यो सै, के थमनै वो किस तरियां बचा सकै सै, जिब थम मसीह पै विश्वास करो सों तो परमेसवर थमनै वादे के मुताबिक पवित्र आत्मा देवै सै, यो दिखाण खात्तर के थम परमेसवर के माणस सों ।<sup>14</sup> क्यूँके परमेसवर नै म्हारे ताहीं पवित्र आत्मा दिया सै, तो हम यो जाणा सां के परमेसवर म्हारे ताहीं और भी आच्छी चीज देवैगा, जिसका उसनै वादा करया सै, अर यो उस बखत होगा जिब परमेसवर अपने माणसां नै पूरी तरियां तै छुड़ावैगा, उसके अदभुत अनुग्रह की बड़ाई होवै ।

### २२२२२ २२ २२२२२२२२

15-16 इस कारण, जिब तै मन्नै भी प्रभु यीशु मसीह म्ह थारे विश्वास अर पवित्र माणसां के प्रति थारे प्यार के बाँरे म्ह सुण्या, तो मै परमेसवर का सदा धन्यवाद करूँ सूँ, अर अपनी प्रार्थना म्ह थमनै हमेशा याद राखूँ सूँ ।<sup>17</sup> मै प्रार्थना करूँ सूँ, के महिमामय परमेसवर जो के म्हारे प्रभु यीशु मसीह का पिता सै, वो थारे ताहीं आत्मिक समझ अर ज्ञान देवै, ताके थम परमेसवर नै पूरी तरियां जाण सकों ।<sup>18</sup> मै या भी प्रार्थना करूँ सूँ, के वो सच्चाई जाणण म्ह थारी मदद करै के थम जाण सकों के परमेसवर के जरिये बुलाये जाण की आस के सै, अर थम जाण सकों के इतनी बड़ी अर महान् आशीष अपने पवित्र माणसां खात्तर राख राख्खी सै ।<sup>19</sup> मै चाहूँ सूँ के थम उसनै जाण सको, के उस महान् परमेसवर नै यीशु मसीह पै विश्वास करण आळे खात्तर जो शक्ति राख राख्खी सै, या वाए बड़ी शक्ति सै ।<sup>20</sup> जिसनै मसीह ताहीं मरे होया म्ह तै जिवाया अर सुर्ग म्ह अपनी सोळी ओड़ बैठाया ।<sup>21</sup> सारी ढाळ की प्रधानता, हक, सामर्थ, प्रभुता के उपर राज करैगा जो इस लोक म्ह सै, अर आण आळे लोक म्ह भी राज करैगा ।<sup>22</sup> परमेसवर नै सारा किमे उसके पायां तळे कर दिया, अर उसनै कलीसिया की भलाई खात्तर सब किमे उसके हाथ्यां म्ह सौप दिया ।<sup>23</sup> कलीसिया मसीह की देह सै, अर उसतै भरपूर सै, वो अपनी मौजूदगी तै हरेक चीज अर हरेक जगहां नै भरे सै ।

## 2

### २२२२२ २२ २२२२ २२ २२२

1 पुराणे बखत म्ह थारे धारे नई जिन्दगी कोनी थी, थम अपने बुरे कामां अर पापां के कारण मरे होए माणसां के समान थे ।<sup>2</sup> थम उस बखत दुनिया की रीति-रिवाज के मुताबिक, बुरी आत्मायाँ के सरदार जो अकास म्ह सै, उसके मुताबिक चाल्लों थे, जो इब भी उनके मनां म्ह काम करै सै, जो परमेसवर का हुकम न्ही मानते ।<sup>3</sup> इन म्ह हम भी सारे के सारे पैहले अपनी देह की लालसाओं म्ह दिन बितावा थे, अर देह अर मन की मर्जियाँ नै पूरी करा थे, अर और माणसां की ढाळ सुभाव तै ए छो की ऊलाद थे ।<sup>4</sup> पर परमेसवर नै जो दया का धनी सै, अपने उस घणे प्यार के कारण जिसतै उसनै म्हारे तै प्यार करया ।<sup>5-6</sup> अपने पुराणे जीवन म्ह पापां के कारण हम मरे होए थे तो परमेसवर नै जिस तरियां यीशु मसीह ताहीं जिन्दा करया, हमनै भी आत्मिक रूप तै जिन्दा करैगा, अर सुर्गीय जगहां म्ह मसीह के गेल्या बिठावैगा, अर परमेसवर के अनुग्रह तै ए थारा उद्धार होया सै ।<sup>7</sup> परमेसवर नै यो इस खात्तर करया के अपनी दया तै जो मसीह यीशु म्ह म्हारे पै सै, आण आळे दिनां म्ह दिखा सकै, के उसका अनुग्रह कितना बड़ा सै, हम जो मसीह म्ह सां, उसनै म्हारे पै भी अनुग्रह दिखाया ।<sup>8</sup> जिब थमनै परमेसवर पै विश्वास करया तो उसनै अपने अनुग्रह के जरिये थारा उद्धार करया सै, थारा उद्धार थारी ओड़ तै न्ही, बल्के परमेसवर ओड़ तै दान सै ।<sup>9</sup> यो इस करके न्ही होया के थमनै कोए भला काम करया सै, अर थम उसपै घमण्ड करो ।<sup>10</sup> क्यूँके हम उसके बणाए होए सां, अर मसीह यीशु म्ह उन भले कामां के खात्तर रचे गये जिन ताहीं परमेसवर नै पैहले तै म्हारे करण के खात्तर तैयार करया ।

### २२२२ २२२२ २२

11 इस कारण थम याद राक्षों के थम जन्म तै गैर यहूदी सों, अर यहूदी लोग थारा मजाक उड़ावे सै, के थारा खतना कोनी होया, पर उनका खतना होया सै, इस खात्तर वे परमेसवर के लोग सै। पर उननै खतना अपणी देह का करवाया सै मन का कोनी करवाया। 12 थम उस बखत मसीह ताहीं कोनी जाणो थे, अर थम परमेसवर के चुणे होए इस्त्राएली माणस कोनी थे, अर वादे के करार के भी साइझी कोनी थे, जो उसनै अपणे माणसां तै बाँधी थी, अर बिना आस अर दुनिया म्ह बिना ईश्वर के थे। 13 पर पैहले जो थम, परमेसवर तै दूर थे, परमेसवर नै थारे ताहीं मसीह यीशु के लहू बहाण के जरिये धौरै बुला लिये सों। 14 मसीह नै हम यहूदी अर थम गैर यहूदी माणसां म्ह शान्ति बणाई सै, पुराणे बखत म्ह यो लागै था के यहूदी अर गैर यहूदी माणसां म्ह एक दीवार सै, वो एक-दुसरे तै नफरत करै थे, पर मसीह नै वा दीवार ढा दी सै, अर दोन्नु दला\* ताहीं एक कर दिया सै। 15 उसनै अपणी मौत के जरिये मूसा के नियम-कायदा ताहीं रद कर दिया, ताके वो यहूदी अर गैर यहूदी माणसां म्ह शान्ति लेके आवै, अर इसके जरिये वो अपणे-आप म्ह यहूदी अर गैर यहूदी की जगहां एक नई जात बणा दे। 16 उसने करूस पै अपणी जाण देके यहूदी-अर गैर यहूदी माणसां म्ह वैर का नाश करके एक देह बणाके परमेसवर तै मिला दिया। 17 मसीह नै आके थम गैर यहूदी जो उसतै दूर थे, अर थम यहूदी माणस जो परमेसवर के लोवे थे, दोनुआ ताहीं मेळ-मिलाप का सुसमाचार सुणाया। 18 क्यूँके मसीह म्ह ए हम सब उस एक पवित्तर आत्मा के जरिये ए पिता के धौरै पोहच सका सां। 19 इस करके थम गैर यहूदी इब विदेशी अर मुसाफिर कोनी रहे, पर पवित्तर माणसां के साथी देशी अर परमेसवर के कुण्बे के होंगे सों। 20 थम उस घर की तरियां सों जिसकी नीम प्रेरित अर नबी सै, अर जिसके कोणे का पत्थर मसीह यीशु आप सै। 21 मसीह ए सै जिसनै घर ताहीं टिकाके राख्या सै, अर उसतै प्रभु के खात्तर एक पवित्तर मन्दर बणदा जावै सै। 22 क्यूँके थम मसीह म्ह सों, इस खात्तर थम गैर यहूदी बिश्रवासी परमेसवर के माणसां गैल एक होंगे, ताके थम वो घर बणदे जाओ जिस म्ह परमेसवर रहवै सै।

### 3

\*\*\*

1 इस कारण मै पोलुस थारे खात्तर केद म्ह सूँ, क्यूँके मै थम गैर यहूदी माणसां नै सुसमाचार सुणाके मसीह यीशु की सेवा करूँ सूँ। 2 पक्का थमनै सुण्या होगा के परमेसवर नै अपणे अनुग्रह तै थारे ताहीं सुसमाचार की खबर सुणाण की जिम्मेदारी मेरे ताहीं दी सै। 3 परमेसवर की गुप्त योजना घणे लम्बे बखत तै छुपी होई थी, पर परमेसवर नै इस ताहीं मेरे उप्पर जाहिर करया, मै इस चिट्ठी के जरिये परमेसवर के उस गुप्त भेद नै थारे ताहीं समझाणा चाहूँ सूँ। 4 जब थम मेरी चिट्ठी नै पढ़ोगे तो थम जाण पाओगे, के मै मसीह के उस भेद के बारे म्ह कितनी आच्छी तरियां जाणु सूँ। 5 पुराणे बखत म्ह परमेसवर नै इस भेद ताहीं माणसां के उप्पर जाहिर कोनी करया, पर इब उसनै उस भेद ताहीं पवित्तर आत्मा के जरिये, अपणे पवित्तर प्रेरितां अर नबियाँ पै जाहिर करया। 6 अर वो भेद यो सै के मसीह यीशु म्ह सुसमाचार के जरिये गैर यहूदी वाए विरासत हासिल करै, जो यहूदी माणसां के धौरै सै, अर एकेए देह के अंग अर परमेसवर के वादे के साइझी सै। 7 परमेसवर के अनुग्रह अर बड़ी सामर्थ के जरिये मेरे ताहीं सुसमाचार सुणाण का काम मिला सै। 8 मेरै पै जो सारे पवित्तर माणसां म्ह तै, छोटटे तै भी छोटटा सूँ, यो अनुग्रह होया के मै गैर यहूदियाँ नै मसीह का सुसमाचार सुणाऊँ, अर लोग्गानै परमेसवर की योजना ताहीं समझण म्ह मदद करूँ। 9 अर हरेक माणसां ताहीं समझा सकूँ के उसनै उस योजना ताहीं जो उसने पैहले तै सोच्ची थी, किस तरियां पूरी करी, या योजना पैहले तै जाहिर कोनी होई थी क्यूँके परमेसवर जो सारी चिज्जां नै रचणियाँ सै, उस ताहीं छिपाए राख्या। 10 ताके इब कलीसिया के जरिये, परमेसवर का बेसुमार ज्ञान आसमान के उन प्रधानां अर

\* 2:14 2:14 दलां टोळ, समूह

अधिकारियां पै जाहिर करया जावै। 11 परमेसवर नै दुनिया बणाण तै पैहले या योजना बणाई थी, जिस ताहीं उसने म्हारे प्रभु यीशु मसीह के जरिये पूरा करया। 12 क्यूँके म्हारा मसीह पै विश्वास सै, अर उसके कारण परमेसवर की मौजूदगी म्ह हिम्मत अर भरोस्से के गेल्या परमेसवर के लोवै आ सका सां। 13 इस कारकै मै बिनती करूँ सूँ के जो क्लेश थारे खात्तर मन्ने होवै सै, उनके कारण हिम्मत ना छोड़ो, क्यूँके हम पिता परमेसवर के धौरे जा सका सां।

???? ? ? ? ? ? ?

14 मै इस्से कारण उस पिता परमेसवर के आगौ घुटने टेक के प्रार्थना करूँ सूँ। 15 वोए सै जो सुगं अर धरती पै, हरेक वंश का पिता सै। 16 मै प्रार्थना करूँ सूँ, के परमेसवर अपनी महिमा के असीमित धन के मुताबिक थारे पै अनुग्रह करै, ताके थम उसकी पवित्र आत्मा तै अपने भीतरी माणसपण म्ह सामर्थ पाके शक्तिशाली होन्दे जाओ। 17-18 अर विश्वास के जरिये मसीह म्हारे मन म्ह बसै, ताके थम प्यार म्ह मजबूत होके बणे रहों, अर सारे पवित्र माणसां के गेल्या आच्छी ढाळ समझण की ताकत पाओ, के उसके प्यार की चौड़ाई, लम्बाई, अर ऊँचाई, अर गहराई कितनी सै। 19 मै प्रार्थना करूँ सूँ, के थम मसीह के उस प्यार नै जाण सको जो ज्ञान तै परै सै, ताके थारा सुभाव परमेसवर के सुभाव जिसा हो जावै। 20 परमेसवर ताकतवर सै, अर वो म्हारी बिनती अर समझ तै भी घणा काम कर सके सै, उस सामर्थ के मुताबिक जो म्हारे म्ह काम करै सै। 21 कलीसिया म्ह अर मसीह यीशु म्ह उसकी बड़ाई पीढ़ी तै पीढ़ी तैई युगानुयुग होंदी रहै। आमीन।

## 4

???? ? ? ? ? ? ?

1 मै प्रभु की सेवा करण के कारण कैद म्ह सूँ, अर थारे तै बिनती करूँ सूँ, के जिस बुलाहट तै परमेसवर नै थारे ताहीं बुलाया सै, उससे तरियां जीवन बिताओ। 2 यानी सारी दीनता अर नम्रता गैल, धीरज धरके प्यार तै एक-दुसरे नै सह ल्यो। 3 इसा करण की भरपूर कोशिश करो, के थम रळ-मिलके रह सकों, क्यूँके परमेसवर की आत्मा के जरिये थम एक ए होण खात्तर बुलाए गये सों। 4 हम सारे विश्वासी, देह के अंगां की ढाळ सां, अर सारया नै एकैए पवित्र आत्मा पाई सै, उससे ढाळ जिब परमेसवर नै थारे ताहीं अपने माणस होण खात्तर बुलाया था, तो थारे ताहीं एक उम्मीद दी गई थी। 5 सिर्फ एक प्रभु सै, एक विश्वास सै, हम सारया नै यीशु के नाम म्ह बपतिस्मा पाया सै, 6 सिर्फ एक परमेसवर सै जो सारे माणसां का पिता सै, जो सब के उप्पर राज करै सै, अर हम सब के जरिये काम करै सै, अर हम सारया के म्ह रहवै सै। 7 पर मसीह नै हम सारया ताहीं उसके काम करण खात्तर न्यारे-न्यारे ढाळ की खास काबलियत देई सै। 8 इस करके पवित्र-ग्रन्थ मसीह के बारे म्ह कहवै सै, “वो ऊँच्चे पै चढ़ा अर कैदियां नै बाँधले गया, अर माणसां ताहीं आत्मिक दान दिए।” 9 उसके ऊँच्चे पै चढ़ण का, के मतलब हो सके सै, सिवाए इसके के वो अधोलोक म्ह भी उतर गया। 10 अर जो उतर गया, यो वोए सै, जो सुगं म्ह सारे तै ऊँच्चे पद पै पोहच गया, जिसतै के उसका राज सारे ब्रह्माण्ड म्ह फैल जावै। 11-12 यो मसीह सै जो म्हारे ताहीं वरदान देवै सै, उसने कईयां तै प्रेरित, अर कईयां तै नबी, कईयां तै सुसमाचार सुणाण आळे, कईयां तै सेवक अर शिक्षक नियुक्त करया, इनकी जिम्मेदारी या सै के ये और दुसरे माणसां नै सीखा के परमेसवर का काम करवा सके, अर कलीसिया जो मसीह की देह सै उस ताहीं मजबूत कर सके। 13 यो तब तक होन्दा रहवैगा जिब तक के हम अपने विश्वास, अर परमेसवर के बेटे के बारे म्ह अपनी समझ म्ह एक ना हो जावां, फेर हम सिध्द बणागे जिस तरियां मसीह सिध्द सै, अर हम पूरी तरियां तै उसके जिसे बण जावांगे। 14 मसीह म्ह बढ़ण अर सिध्द होण के कारण, हम बाळकां के जिसा बरताव ना करां, हम उस किस्ती की ढाळ ना बणा, जिसनै झाल\* आगौ-पाच्छै, अर हवा आस्से-पास्से उछाड़ै सै। इसका मतलब यो सै, के चलाक, अर टग माणस अपनी झूट्टी शिक्षा के जरिये हमने धोक्सा न्ही देण पावै। 15 बल्के सच नै

\* 4:14 4:14 झाल लहरे

प्यार तै बोल्लों, अर सारी बातों म्हे मसीह यीशु की तरियां सिध्द बणो, जो के म्हारा सिर सै।<sup>16</sup> हम सारे जो मसीह म्हे बिश्वास करां सां, हम उसकी देह के अंग की तरियां सां, जिस तरियां एक माणस की देह, जोड़ा के जरिये एक साथ जुड़ी हो सै अर जब देह का हर हिस्सा आच्छी तरियां काम करै सै, तो देह का विकास होकै मजबूत बणे सै, इस्से तरियां म्हारे म्हे तै जै कोए मसीह का काम करै सै, जो मसीह नै म्हारे ताहीं दिया सै, तो हम भी मजबूत अर सिध्द होवां सां, अर हम एक-दुसरे तै ज्यादा प्यार करां सां।

☞☞☞ ☞☞☞ ☞☞☞ ☞☞☞

<sup>17</sup> इस करके परमेसवर नै जो अधिकार मेरे ताहीं दिया सै, उसकी बजह तै मै न्यू कहुँ सूं, के जिसा अबिश्वासी माणस अपने मन की बेकार की रीति-रिवाजां म्हे अपना जीवन जीवै सै, थम आज तै इसा जीवन ना जिओ।<sup>18</sup> क्यूँके वे समझ न्ही पाण लागरे, के उस अज्ञानता के कारण, अर उनके मन की कठोरता के कारण, जो उन म्हे सै, वे परमेसवर के उस जीवन तै न्यारे करे गए सै जो परमेसवर देवै सै।<sup>19</sup> वे बुरे काम की बजह तै अपनी गलती महसूस न्ही करते अर उननै अपने-आप ताहीं बुरे काम्मां खात्तर सौप दिया सै, वे सारी ढाळ के भुन्डे काम लगातार करते जावै सै।<sup>20</sup> पर थमनै मसीह की शिक्षायां म्हे इसे काम करणे न्ही सीखे।<sup>21</sup> बल्के जो थमनै यीशु मसीह के वारें म्हे सुण्या अर जो थारे शिक्षकां नै सिखाया, वोए उसकी ओड़ तै सच्चा सन्देस सै।<sup>22</sup> अर थारे शिक्षकां नै थारे बुरे काम अर बुरा सुभाव छोड़णा सिखाया सै, थारी बुरी लालसायां नै थारा जीवन नाश कर दिया।<sup>23</sup> थम पवित्र आत्मा नै थारे सुभाव अर सोच्चण के तरिककें नै बदलण द्यो।<sup>24</sup> परमेसवर नै थारे ताहीं एक नया सुभाव दिया सै, जो के उसके अपने सुभाव की तरियां सै, इस करके इस नये सुभाव के मुताबिक बरताव करो। असलियत म्हे धर्मी अर पवित्र बणो।<sup>25</sup> इस कारण झूट बोलणा छोड़के हरेक अपने पड़ोसी तै सच बोल्ले, क्यूँके हम आप्स म्हे हम एक ही देह के अंग सां।<sup>26</sup> जै थारे ताहीं गुस्सा आ भी जावै तो उस गुस्से म्हे पाप ना करियो, अर सूरज ढळण तै पैहल्या थारा गुस्सा भी न्ही रहणा चाहिए।<sup>27</sup> अर अपने-आप ताहीं शैतान नै परखण का मौक्का ना द्यो।<sup>28</sup> चोरी करण आळा फेर चोरी ना करै, बल्के मेहनत करके अपनी कमाई के जरिये दुसरे माणसां की भी मदद कर सकै, जो जरूरत मन्द हो।<sup>29</sup> कोए भी गलत बात थारे मुँह तै ना लिकड़े, पर जरूरत के मुताबिक वोए लिकड़े जो दुसरयां के बिश्वास की बढ़ोतरी के खात्तर हो, ताके वा बात जो थारे मुँह तै लिकड़े सै वा सुणण आळा नै उत्साहित कर सकै।<sup>30</sup> परमेसवर के पवित्र आत्मा नै दुखी ना करो, जो उसनै थारे ताहीं दिया सै, जो पक्का छुटकारे के दिन थमनै बचा सकै सै।<sup>31</sup> इस करके सारी ढाळ की कड़वाहट, प्रकोप, गुस्सा, झगड़ा, अर बुराई, सारे बैरभाव नै अपनी जिन्दगी तै लिकाड़ द्यो।<sup>32</sup> एक-दुसरे पै दयालु अर करुणामय हो, अर जिसा परमेसवर नै मसीह म्हे थारे कसूर माफ करे, उस्से तरियां थम भी एक-दुसरे के कसूर माफ करो।

## 5

☞☞☞☞☞ ☞☞☞☞☞ ☞☞☞☞☞

<sup>1</sup> थम परमेसवर के बाळक सां, जिनतै वो प्यार करै सै, इस करके उसकी ढाळ बणण की कोशिश करो।<sup>2</sup> दुसरयां तै प्यार करण आळी जिन्दगी जिओ, जिस तरियां मसीह जिया, जिसनै थारे तै प्यार करया अर म्हारे पापां नै मिटाण खात्तर अपने-आप ताहीं कुरबान कर दिया, अर परमेसवर उसकी कुरबान्नी तै खुश था, क्यूँके वा कुरबान्नी परमेसवर के खात्तर खसबूदार भेट के समान थी।<sup>3</sup> जिसा पवित्र माणसां के लायक सै, उसाए थारे म्हे जारी अर किसे ढाळ के अशुद्ध काम या लोभ का जिक्र तैई ना हो,<sup>4</sup> अर ना बेशर्मी, ना मूर्खता की बातचीत, ना मजाक की, क्यूँके ये बात शोभा न्ही देदी, बल्के थारे मुँह तै परमेसवर का ए धन्यवाद सुण्या जावै।<sup>5</sup> क्यूँके थम यो आच्छी तरियां तै जाणो सां, के कोए भी जार, दुराचारी, या लोभी माणस जो मूर्तिपूजकां के समान सै, ये मसीह अर परमेसवर के राज्य के भागी न्ही हो सकदे।<sup>6</sup> कोए थमनै धोक्खा ना देवै के परमेसवर पाप करण आळे माणसां नै

दण्ड कोनी देवै, क्यूँके परमेसवर का छोड़ो हुकम ना मानण आळे पै भड़कै सै।<sup>7</sup> इस करकै थम उनके पापी काम्मां म्ह उनके साझीदार ना होओं।<sup>8</sup> क्यूँके थम तो पैहल्या उन माणसां की ढाळ थे जो अन्धकार म्ह थे, पर इब थम परमेसवर के लोग बणगे सों, इस करकै थम इब चाँदणे म्ह सों, तो इब थमनै उन माणसां की ढाळ जीणा चाहिए जो चाँदणे म्ह सै।<sup>9</sup> क्यूँके जै माणस चाँदणे म्ह सै तो उसका सुभाव आच्छा अर धर्मी सै, अर उसपै बिश्वास करया जा सकै सै।<sup>10</sup> अर यो परसो के पूरभु नै के आच्छा लागै सै।<sup>11</sup> थम उनके बुरे काम्मां म्ह उनके साझीदार ना होओं, बल्के लोगगां नै बताओ के ये काम बुरे सै।<sup>12</sup> क्यूँके उनकै गुप्त काम्मां का जिक्र भी शर्म की बात सै।<sup>13</sup> जिव बुरे लोग थारा आच्छा सुभाव देखै सै तो उनका बुरा सुभाव जाहिर हो जावै सै, उसकी बजह तै वो अपना बुरा सुभाव छोड़ दे सै, अर थारे जिसे आच्छे बण जावै सै।<sup>14</sup> इस कारण एक कहावत सै के “हे सोण आळे जाग! अर मुदां म्ह तै जी उठ! ताके मसीह थारे पै अपना चान्दणा चमकावै।”<sup>15</sup> इस करकै ध्यान तै देखसों, के किसा जीवन जीण लागरे सों। बेअक्ला की तरियां न्ही पर अकलमंद की तरियां जिओ।<sup>16</sup> मौकै नै घणा कीमती समझों, क्यूँके दिन बुरे सै।<sup>17</sup> इस कारण बेअक्ल ना होओं, पर ध्यान तै समझों के पूरभु की मर्जी के सै।<sup>18</sup> मदिरा पी कै मतवाले ना बणों, क्यूँके इसतै लुचपण होवै सै, पर पवित्तर आत्मा तै भरदे जाओ।<sup>19</sup> जिव थम पवित्तर आत्मा के कहे म्ह चाल्लोंगे तो ये काम करोगे, जिव थम कटूटे होओगे तो आप्पस म्ह परमेसवर के भजन, उसकी जै-जै कार अर आत्मिक गीत गाया करोगे, अर अपणे-अपणे मन म्ह पूरभु के आगुँ गान्दे अर कीर्तन करदे रहो।<sup>20</sup> अर सदा सारी बाततां के खात्तर म्हारे पूरभु यीशु मसीह के नाम तै परमेसवर पिता का धन्यवाद करते रहो।<sup>21</sup> मसीह के प्रति श्रद्धा-भक्ति राक्खण के कारण एक-दुसरे के अधीन रहो।

??????

<sup>22</sup> हे पत्नियों, अपणे-अपणे पति कै इस ढाळ अधीन रहो जिस ढाळ पूरभु के अधीन रहो सों।<sup>23</sup> क्यूँके पति तो पत्नी का सिर सै, जिस ढाळ मसीह कलीसिया का सिर सै, अर कलीसिया मसीह की देह सै अर उद्धारकर्ता भी सै।<sup>24</sup> पर जिस ढाळ कलीसिया मसीह कै अधीन सै, उससे तरियां पत्नियाँ भी हर बात म्ह अपणे-अपणे पति कै अधीन रहै।<sup>25</sup> हे पतियों, अपनी-अपनी पत्नियाँ तै प्यार राक्खो, जिसा मसीह नै भी कलीसिया तै प्यार करके उसकै खात्तर अपनी जान दे दी।<sup>26</sup> ताके वो कलीसिया (बिश्वासी लोगगां) ताहीं वचन तै नाहण के जरिये पापां तै शुद्ध करै, अर पवित्तर बणावै।<sup>27</sup> वो अपनी कलीसिया खात्तर मरया ताके वो अपणे माणसां नै सिध्द बणाके अपनी हजुरी म्ह ल्या सकै, जिस म्ह ना कलंक, ना झुरी, ना कोए और इसी चीज हो बल्के पवित्तर अर बेकसूर हो।<sup>28</sup> इस तरियां सही सै के पति अपनी-अपनी पत्नी तै अपनी देह के समान प्यार राक्खै। जो अपनी पत्नी तै प्यार करै सै। वो अपणे-आप तै प्यार करै सै।<sup>29</sup> क्यूँके किसे नै कदे अपणे देह तै बैर न्ही करया बल्के वो उसका पालन-पोषण करै सै, जिसा मसीह भी कलीसिया कै गैल करै सै।<sup>30</sup> इस करके के हम मसीह की देह के अंग के समान सां।<sup>31</sup> जिसा के पवित्तरग्रन्थ म्ह लिख्या सै, “इस कारण माणस अपणे माँ बाप नै छोड़के अपनी पत्नी तै मिल्या रहूँगा, अर वे दोनु एक देह होंगे।”<sup>32</sup> यो भेद तो बड़डा सै, पर मै या डै मसीह अर कलीसिया के बारे म्ह कहूँ सूं।<sup>33</sup> पर थारे म्ह तै हरेक अपनी पत्नी तै अपणे समान प्यार करै, अर पत्नी भी अपणे पति का डर मानै।

## 6

??????

<sup>1-3</sup> पवित्तर ग्रन्थ कहवै सै, के “अपणे माँ बाप का आदर कर, तो तेरा भला होगा अर इस धरती पै तेरी उम्र भी लम्बी होवेगी।” अर यो परमेसवर की ओड़ तै दिया गया पैहला हुकम सै, जिसके गैल वादा भी सै। हे बाळकां आळो, यो थारे खात्तर सही सै, के थम जो परमेसवर पै बिश्वास करो सों, तो अपणे माँ-बाप का कहणा मान्णो।<sup>4</sup> हे बाळकां आळो, अपणे बाळकां नै गुस्सा ना दुवाओ, पर शिक्षा अर चेतावनी देंदे होए उनका पालन-पोषण करो।

?????? ? ?

5 हे नौकरों, जो माणस इस दुनिया म्ह थारे माल्लिक सै, उनका हुकम डरदे अर कापते होए मान्नो, जिस मन तै थम मसीह का हुकम मान्नो सों। 6 माणसां नै खुश करण आळा कै समान दिखावटी सेवा ना करो, पर थम मसीह के दास सों, इस करके थम पूरे मन तै वो काम करो जो परमेसवर चाहवै सै। 7 अर उस सेवा नै माणसां की न्ही, पर प्रभु की सेवा जाणकै सच्चे मन तै करो। 8 क्यूँके थम जाणो सों के जो कोए जिसा आच्छा काम करैगा, चाहे दास हो चाहे आजाद माणस, प्रभु तै उसका फळ पावैगा। 9 हे मालिकों, थम भी थमकी देणा छोड़कै नौकरां गैल उसाए व्यवहार करो, क्यूँके थम जाणो सों के उनका अर थारा दोनुआ का माल्लिक सुर्गा म्ह सै, अर वो किसे का पक्षपात न्ही करदा।

?????? ???? ? ?

10 इस करके मे कहुँ सूँ के थम प्रभु म्ह आत्मिक रूप तै शक्तिशाली बणो। 11 परमेसवर के सारे हथियार बाँध ल्यो ताके थम शैतान की चालां कै स्याम्ही खड़े रह सको। 12 क्यूँके म्हारा यो आत्मिक युध्द माणसां तै कोनी, पर प्रधानां, अधिकारियां, अर इस संसार के अन्धकार के हाकिमां अर दुष्टता की आत्मिक सेनाओं तै सै, जो अकास म्ह सै। 13 इस करके परमेसवर के सारे हथियार बाँध ल्यो ताके जिव बुरे दिन आवै तो उनका सामना कर सको, अर सब कुछ करण म्ह मजबुती तै डटे रह सको। 14 इस करके परमेसवर की सच्चाई के मुताबिक जिओ, यो इस तरियां सै, जिसा एक सिपाही का बेल्ट तै अपणी कमर कसणा, अर धार्मिकता की झिलम पैहर ल्यो जो थारे आच्छे सुभाव नै दिखावै सै, जो थमनै शैतान के हमले तै बचावैगा। 15 जिस तरियां एक सिपाही युध्द लड़ण के खात्तर पैरां म्ह जूत्ते पैहरै सै, उस्से तरियां थम भी परमेसवर के साथ शान्ति के सुसमाचार के जरिये, शैतान तै लड़ण खात्तर त्यार हो जाओ। 16 अर इन बात्तां के होन्दे होए जिस तरियां सिपाही, ढाल तै अपणे-आपनै दुश्मन के तीरां तै बचावै सै, उस्से तरियां मसीह म्ह पक्का विश्वास करो ताके थम शैतान के हमलां तै खुद नै बचा सको। 17 जिस तरियां सिपाही युध्द म्ह अपणे सिर नै बचाण खात्तर टोप पैहरै सै, उस्से तरियां परमेसवर की ओड़ तै मिल्या उद्धार भी म्हारा टोप सै, जो थमनै शैतान के हमलां तै बचावैगा, अर जिस तरियां सिपाही युध्द म्ह तलवार तै अपणे-आपनै बचावै सै, अर थम भी आत्मा की तलवार, जो परमेसवर का वचन सै, ले ल्यो, अर शैतान तै खुद नै बचा ल्यो। 18 हरेक बखत अर हरेक ढाळ तै पवित्तर आत्मा की अगुवाई म्ह प्रार्थना अर बिनती करते रहों, इस करके जागते रहों अर सारे पवित्तर माणसां खात्तर लगातार बिनती करते रहों। 19 अर थम मेरै खात्तर भी प्रार्थना करो, ताके मेरे बोल्लण कै बखत इसे शब्द दिये जावै के मै हिम्मत कै गैल सुसमाचार का भेद बता सकूँ। 20 इस्से खात्तर मै बेल्लां तै जकड़ा होया राजदूत के समान सेवा करण लाग रह्या सूँ, प्रार्थना करो के जिस तरियां मन्नै बोलणा चाहिए, उस्से ढाळ बेधड़क होकै सुसमाचार का प्रचार कर सकूँ।

???? ?

21 तुखिकुस जो प्रभु म्ह मेरा प्यारा भाई अर विश्वास लायक सेवक सै, वो थारे ताहीं मेरे सारे हालात अर सारी बात्तां के बारे म्ह बता देवैगा। 22 उस ताहीं मन्नै थारे धौरै इस्से खात्तर भेज्या सै के थम म्हारी दशा नै जाणो, अर वो थारे मनां नै होसला दे। 23 परमेसवर पिता अर प्रभु यीशु मसीह की ओड़ तै विश्वासी भाईयां नै शान्ति अर विश्वास गैल प्यार मिलै। 24 उन सारा पै अनुग्रह होंदा रहवै, जो म्हारै प्रभु यीशु मसीह तै कदे ना खतम होण आळा प्यार करै सै।

## फिलिप्पी नगर के माणसां ताहीं प्रेरित पौलुस की चिट्ठी

???????

फिलिप्पी नगर के माणसां ताहीं प्रेरित पौलुस की चिट्ठी यूरोप की धरती पै बणाई पैहली कलीसिया ताहीं लिखी गई थी, जिसकी शुरुआत पौलुस नै करी थी। या रोमी प्रान्त के मकिडूनिया परदेस म्ह थी। या चिट्ठी उस बखत लिखी गई थी, जिव प्रेरित पौलुस जेळ म्ह था, अर जिव वो दुसरे मसीह कार्यकर्ताओं के जरिये अपने बिरोध के कारण परेशान अर फिलिप्पी की कलीसिया म्ह घणी गलत शिक्षा तै दुखी था। फेर भी या चिट्ठी एक खुशी अर तसल्ली नै दिखावै सै, के सिर्फ यीशु मसीह म्ह पौलुस के गहरे बिश्वास के जरिये समझया जा सकै सै।

इस चिट्ठी का जिब्बे लिखण का कारण यो था, फिलिपियों के बिश्वासियाँ ताहीं धन्यवाद देणा, उस दान खात्तर जो उननै पौलुस की जरूरत के बखत पै उस ताहीं भेज्जा था। वो इस मौकै का इस्तमाल उन ताहीं भरोस्सा देण खात्तर करै सै, के वे उसकी अर साथ-साथ खुद अपनी सारी मुसीबतां के बाद भी हिम्मत अर भरोस्सा राखै सै। वो उनतै बिनती करै सै, के वे स्वार्थी लालसा अर घमण्ड के बदले यीशु के दीन सुभाव नै अपनावै। वो उननै याद करावै सै, के मसीह म्ह उनका जीवन परमेसवर के अनुग्रह का एक दान सै, जो उननै बिश्वास के जरिये पाया सै, ना के यहूदी नियम-कायदा ताहीं पुगाण के जरिये। वो उस आनन्द अर शान्ति के बारे म्ह लिखै सै, जो परमेसवर उन माणसां ताहीं देवै सै, जो मसीह कै गेल्या एकता का जीवन जीवै सै। मसीह बिश्वास अर जीवन म्ह आनन्द, निश्चय, एकता अर मजबुत्ती पै जोर देणा इस चिट्ठी की खासियत सै। या चिट्ठी फिलिप्पी नगर की कलीसिया के प्रति पौलुस के गहरे प्रेम नै दिखावै सै।

### रूप-रेखा

जानकारी 1:1-11

पौलुस की निजी हालात 1:12-23

मसीह म्ह जीवन 1:27-2:18

तीमुथियुस अर इपफुरुदीतुस कै खात्तर योजना 2:19-30

दुश्मनां अर खतरां के खिलाफ चेतावनी 3:1-4:9

पौलुस अर उसके फिलिप्पी नगर के मित्तर 4:10-20

समापन 4:21-23

1 या चिट्ठी पौलुस अर तीमुथियुस की ओड़ तै सै, जो यीशु मसीह के दास सै, मै पौलुस कलीसिया के सारे पवित्र माणसां, अगुवां, अर सेवकां के नाम जो प्रभु यीशु मसीह म्ह होकै फिलिप्पी नगर म्ह रहवै सै।<sup>2</sup> हम प्रार्थना करां सां के म्हारे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै।

????? ?? ?????????? ?? ????????

3 मै जिव-जिव थमनै याद करै सूं, तब-तब अपने परमेसवर का धन्यवाद करै सूं,<sup>4</sup> अर खुशी कै गैल अपनी हरेक प्रार्थना म्ह थारे सारया खात्तर हमेशा परमेसवर तै मदद की बिनती करै सूं।<sup>5</sup> इस करके के पैहले दिन तै जिव थमनै सुसमाचार पै बिश्वास करया, तब तै आज तक थम यीशु मसीह कै प्यार के बारे म्ह सुसमाचार फैलाण म्ह म्हारे साथ रह्यो सों।<sup>6</sup> मन्नै इस बात का भरोस्सा सै, के परमेसवर जिसनै थारे म्ह आच्छा काम शुरु करया सै, वोए उसनै जिव यीशु मसीह बोहड़ के आवेगा तब तक पूरा करैगा।<sup>7</sup> सही सै ताके मै थारे सारया खात्तर इसाए विचार करै। क्यूँके थारे खात्तर मेरै मन म्ह खास जगहां सै, इब मै कैद म्ह सूं, अर सुसमाचार की सच्चाई नै साबित अर बचाव करण म्ह लागरया सूं, तो थम सब मेरै गैल परमेसवर के अनुग्रह म्ह साझीदार सों।<sup>8</sup> इस म्ह परमेसवर मेरा



गवाह सै, के मै मसीह यीशु की तरियां लगाव करके, थारे सारया की मिलण की लालसा करूं सू।<sup>9</sup> मै या प्रार्थना करूं सू, के थारा प्यार वास्तविक ज्ञान अर अन्तरात्मा म्ह और भी बढ़ता जावै।<sup>10</sup> ताके थम आच्छी तै आच्छी बात नै चुण सकों, अर मसीह के बोहड़ण तक हरेक बुराई तै बचे रहों, अर टोक्कर ना खाओ।<sup>11</sup> अर उस धार्मिकता के काम नै जो यीशु मसीह के जरिये होवै सै, भरपूर होन्दे जाओ जिसतै परमेसवर की महिमा अर बड़ाई होंदी रहवै।

~~~~~

<sup>12</sup> हे विश्वासी भाईयो, मै चाहूं सू के थम या जाण ल्यो, के जो मेरे पै बित्या सै, उसतै भोत सारे माणसां नै सुसमाचार पै विश्वास करया सै।<sup>13</sup> उरै ताहीं के महाराजा के राजभवन की सारी पलटन अर बाकी सारे माणस यो जाणगे सै, के मै कैद म्ह सू, क्यूँके मै मसीह का दास सू।<sup>14</sup> अर प्रभु म्ह जो विश्वासी भाई सै, उन म्ह तै घणखरे मेरे कैद होण के कारण, साहस के गैल परमेसवर का वचन बिना डरे सुणावै सै।<sup>15</sup> कुछ लोग तो जळण अर झगड़े के कारण मसीह के सुसमाचार के बारे म्ह सुणावै सै, अर कई माणस भली इच्छा तै, ताके मेरे वचन फैलाण म्ह मदद कर सकै।<sup>16</sup> भली इच्छा तै प्रचार करण आळे प्यार तै प्रचार करै सै, क्यूँके वो जाणै सै, के मै सुसमाचार के बचाव के खात्तर जेळ म्ह बन्द सू।<sup>17</sup> कई माणस तो जळण अर बिरोध के कारण मसीह का प्रचार करै सै, यो सोचके के मेरी कैद म्ह मेरे खात्तर और क्लेश पैदा कर सकै।<sup>18</sup> तो के होया? सिर्फ यो के हर ढाळ तै, बुरी इच्छा तै चाहे सच्चाई तै, मसीह के वचन का प्रचार हरेक जगहां करया जाण लागरया सै, अर मै इसतै आनन्दित सू अर आनन्दित रहूंगा भी।

~~~~~

<sup>19</sup> क्यूँके मै जाणु सू, के थारी बिनती के जरिये, अर पवित्र आत्मा जो यीशु मसीह की ओड़ तै आया सै, इसका प्रतिफळ जो मेरे विश्वास म्ह बणे रहण अर कैद तै लिक्ड़ण का कारण होगा।<sup>20</sup> मै तो याए मन तै लालसा अर आस राखूं सू, के मै किसे बात म्ह शर्मिन्दा ना होऊँ, पर साहस के साथ परमेसवर का वचन सुणा सकूं, जिसा पैहले मन्ने सुण्या था, चाहे मै जिन्दा रहूं या मरु, मसीह की बड़ाई मेरी देह के जरिये होन्दी रहवै।<sup>21</sup> क्यूँके मेरे खात्तर जिन्दा रहणा मसीह सै, अर मर जाणा और भी आच्छा सै, क्यूँके मै मसीह के धारे चला जाऊंगा।<sup>22</sup> पर जै देह तै जिन्दा रहणा ए परमेसवर के काम के खात्तर फायदेमन्द सै, तो मै न्ही जाणदा के किसनै चुणु।<sup>23</sup> क्यूँके मै उळझन म्ह सू, के मै के करूं, जी तो करै सै, के मै दुनिया छोड़के मसीह के धारे चला जाऊँ, क्यूँके यो घणाए आच्छा सै,<sup>24</sup> पर देह म्ह रहणा थारे कारण और भी जरूरी सै, ताके मै थारी मदद कर सकूं।<sup>25</sup> इस करके के मन्ने इसका भरोसा सै। मै जाणु सू के मै जिन्दा रहूंगा, बल्के सारा के गेल्या रहूंगा, जिसतै थमनै विश्वास म्ह मजबूत कर सकूं, अर उस म्ह आनन्दित रहों।<sup>26</sup> जब मै थारे धारे बोहड़ के आऊंगा तो यीशु मसीह जो मेरे जरिये काम करण लागरया सै, उसपै थम गर्व कर सकों सों।<sup>27</sup> सिर्फ इतणा करो, के थारा चाल चलण मसीह के सुसमाचार के लायक हो जावै। चाहे मै आँके थमनै देखूं, चाहे ना भी आऊँ, तोभी थारे बारे म्ह योए सुणु, के थारा एक ए मकसद हो, अर एक मन होके विश्वास तै जो सुसमाचार तै आवै सै, उसके खात्तर मेहनत करते रहों।<sup>28</sup> अर किसे बात म्ह बिरोधियां तै भय ना खाओ। उनके खात्तर विनाश का, अर थारे खात्तर उद्धार का साफ सबूत सै, अर यो परमेसवर की ओड़ तै सै।<sup>29</sup> क्यूँके मसीह के कारण थारे पै या अनुग्रह होया के ना केवल उसपै विश्वास करो पर उसके खात्तर दुख भी ठाओ,<sup>30</sup> अर थमनै उसीए मेहनत परमेसवर के खात्तर करणी सै, जिसी थमनै मेरे ताहीं पैहले फिलीपी नगर म्ह करते देख्या सै, अर इब भी सुणो सों के मै उसाए करूं सू।

## 2

~~~~~

<sup>1</sup> थम यीशु मसीह के कारण उत्साहित हो, अर जो उसका प्यार थारे खात्तर सै, वो थमनै शान्ति देवै सै, क्यूँके पवित्र आत्मा के गैल थारी संगति सै, अर मसीह की करुणा अर दया थारे पै सै।

2 तो मेरा यो आनन्द पूरा करो के एक मन रहों, अर एके प्यार, एके चित्त, अर एके मनसा राक्खों।  
 3 मतलबीपण या झूट्टी बड़ाई के खात्तर कुछ ना करो, पर दीनता तै एक-दुसरे नै अपणे तै घणा आदर मान द्यो। 4 हरेक अपणे ए हित की न्ही, बल्के दूसरयां के हित की भी चिंता करै। 5 जिसा मसीह यीशु का सुभाव था उसाए तेरा भी सुभाव हो। 6 यीशु, परमेसवर के समान होकै भी होकै भी परमेसवर के बराबर होण नै अपणे बस म्ह राक्खण की चीज ना समझा। 7 बल्के अपणा सारा सुर्गीय हक छोड़ दिया, अर दास का रूप धारण करते होए माणस की समानता म्ह होगया। 8 अर माणस के रूप म्ह जाहिर होकै अपणे-आपनै दीन करया, अर परमेसवर का आज्ञाकारी रहया अर याडै तक के अपराधियाँ की तरियां मौत, हाँ करूस की मौत भी सह ली। 9 इस कारण परमेसवर नै उस ताहीं ऊँच्ची उपाधि दी, अर उसनै वो नाम दिया जो सारे नाम्मां म्ह ऊँच्चा सै, 10 के जो सुर्ग म्ह अर धरती पै धरती के नीच्चे सै, वे सारी यीशु के नाम की बड़ाई करै, 11 अर परमेसवर पिता की महिमा के खात्तर हरेक इन्सान मान ले के यीशु मसीह ए प्रभु सै।

### ?????? ???? ??????? ?? ??? ?????

12 इस करकै हे मेरै प्यारे विश्वासी भाईयो, जिस ढाळ थम सदा तै हुकम मानते आये सों, उसाए इब भी ना सिर्फ मेरै गैल रहंदे होए, पर खास करकै इब मेरै दूर रहण पै, भी परमेसवर तै डरदे अर कापते होए अपणे उद्धार के काम नै पूरा करो। 13 क्यूँके परमेसवर थारे म्ह काम करण लागरया सै, अर वोए थमनै अपणी इच्छा अर सामर्थ देवै सै, वो काम करो जो उसनै पसन्द सै। 14 सारे काम बिना कुड़कड़ाए अर बिना विवाद के करया करो, 15 ताके थम परमेसवर की ऊलाद की तरियां इस दुनिया के बुरे अर मतलबी माणसां के बीच म्ह पवित्तर अर बेदाग जीवन जी सकों। दुनिया के माणसां के बीच म्ह थम जीवन का वचन लिये होए, आसमान के तारां के समान चमकों। 16 जब मसीह बोहडै तो मन्नै गर्व करण का कारण हो, ताके मेरी कोशिश अर मेरी मेहनत करणा बेकार ना होवै। 17 जब मन्नै थारे ताहीं वचन सुणाया, तो थमनै यीशु मसीह पै विश्वास करया, अर अपणा जीवन भी सेवा खात्तर प्रभु ताहीं बलिदान दिया। इस करकै मे प्रभु खात्तर मर भी जाऊँ, तोभी थारे साथ खुश अर आनन्दित सूँ। 18 उससे तरियां थम भी आनन्दित होओ, अर मेरै गैल आनन्द करो।

### ?????????? ?? ???????????????

19 मन्नै प्रभु यीशु मसीह म्ह आस सै, के मै तीमुथियुस नै थारे धोरै तावळा-ए भेजूगाँ, ताके थारे हाल नै जाणके, मै उत्साहित होऊँ। 20 क्यूँके मेरै धोरै तीमुथियुस के जिसा सुभाव आळा माणस और कोए न्ही सै जो शुद्ध मन तै थारी चिंता करै। 21 क्यूँके सारे अपणे स्वार्थ की खोज म्ह रहवै सै, परमेसवर के काम्मां खात्तर न्ही। 22 पर थम जाणो सों, के तीमुथियुस तो विश्वास लायक अर आच्छे सुभाव का सै, जिसा बेट्टा पिता के गेल्या रहवै सै, उसाए उसनै सुसमाचार के फैलाण म्ह मेरै गैल मेहनत करी। 23 इस करकै मन्नै आस सै, के ज्यो ही मन्नै बेरा लागैगा के मेरा के हाल होगा, त्यो ही मै उसनै तावळी सी भेज देऊँगाँ। 24 अर मन्नै प्रभु म्ह भरोस्सा सै, के मै आप भी तावळा आऊँगा। 25 मन्नै इपफुरुदीतुस नै थारे धोरै भेजणा जरूरी समझा, जो मेरा भाई अर सहकर्मी साथी योधा, अर जरूरतां म्ह मेरी मदद करण आळा थारी ओड़ तै भेज्जा गया दूत सै। 26 क्यूँके उसका मन थारे सारया म्ह लागया रह्या था, अर वो बेचैन रहवै था क्यूँके थमनै उसकी बीमारी का हाल सुण्या था। 27 पक्का वो बीमार तो होगया था, उरै ताहीं वो मरण पै था, पर परमेसवर नै उस ताहीं मरण न्ही दिया, अर सिर्फ उससे पै न्ही पर मेरै पै भी दया करी, ताके मन्नै दुख पै दुख ना हो। 28 इस करकै मन्नै उस ताहीं भेजण का और भी जल्न करया, के तू उसतै फेर मिलके आनन्दित हो जा, अर मेरी भी चिन्ता घट जावै। 29 इस करकै तू प्रभु म्ह उसतै घणे आनन्द के गैल मिलये, अर इसा का आदर करया करिये। 30 क्यूँके वो मसीह के काम खात्तर अपणी जान जोखिम म्ह गेर के मौत के धोरै आ गया था। ताके वो मेरी मदद कर सकै जिस काम नै थम कर न्ही पाये, क्यूँके थम दूर थे।

## 3

????? ?????????

1 इस करके हे मेरे विश्वासी भाईयो, प्रभु म्ह आनन्दित रहों। वेए बात थारे ताहीं बारबार लिखण म्ह मन्ने तो कोए दिक्कत कोनी होन्दी, पर ये बात थमने इस्से झूट्टे शिक्षाकां ते बचाके राक्खेगी। 2 उन बुरे माणसां ते चौक्कस रहों जो कुत्त्यों के समान सै, अर जो कहवै सै, के उद्धार पाण खात्तर खतना करणा जरूरी सै। 3 हम्मे परमेसवर के सच्चे लोग सां, जो पवित्तर आत्मा की अगुवाई म्ह आराधना करा सां, अर मसीह यीशु पे घमण्ड करा सां, पर अपणे उन काम्मां के जरिये न्ही जो हम शरीर तै करा सां। 4 पर मै तो शारीरिक काम्मां पे घमण्ड राक्ख सकू सूं। जै किसे और का शारीरिक काम्मां पे घमण्ड राक्खण का विचार हो, तो मै उसते भी बढ़के राक्ख सकू सूं। 5 परमेसवर के हुकम के मुताबिक जन्म के आठवे दिन मेरा खतना होया, मै जन्म तै इस्राएली अर विन्यामीन के गोत्र का सूं, मेरे माँ-बाप इब्रानी थे, इस करके मै भी इब्रानी सूं, अर (मूसा नबी के) नियम-कायदा नै मानण के कारण मै फरीसी भी था। 6 उत्साह के बारे म्ह जै कहो तो कलीसिया का सतावण आळा, अर सारे यहूदी नियम-कायदा नै मानण आळा था, इस करके लोग मन्ने धर्मी मान्ने थे। 7 पर जिन बात्तां नै मै लाभ की समझू था, उन ताहीं मन्ने मसीह यीशु के कारण नुकसान समझू लिया सै। 8 बल्के अपणे प्रभु मसीह यीशु नै आच्छी तरियां जाणण के महत्व के आगै, मै बाक्की की सारी बात्तां नै बेकार समझू सूं। जिसके कारण मन्ने उन सारी चिज्जां ताहीं छोड़ दिया सै, अर उननै कूड़ा समझू सूं। ताके मै मसीह नै आच्छी तरियां जाण सकू। 9 अर मै उसका कहलाऊँ, इब मेरी अपणी धार्मिकता वा कोनी जो नियम-कायदा के पुगाण तै आवै सै, बल्के मेरी धार्मिकता वा सै जो सिर्फ परमेसवर की ओड़ तै मसीह पै मेरे विश्वास करण के कारण आवै सै। 10 मै चाहूँ सूं, के मसीह नै जाण ल्यु। अर मै उसके पुनरुत्थान के सामर्थ्य नै अनुभव करूँ, अर उसके गैल दुखां म्ह साझीदार हो के मसीह की मृत्यु की समानता नै पा सकू। 11 ताके मै भी मेरे होए माणसां म्ह तै जी उठण आळा म्ह शामिल हो जाऊँ।

????????? ?? ?? ?

12 इसका यो मतलब कोनी के मन्ने यो सारा काम करया सै, या मै सिध्द हो लिया सूं, मै आगै बढ़ण की कोशिश करते जाण लागरया सूं, ताके मन्ने वो मिल जावे, जिसके खात्तर मसीह यीशु नै मेरे ताहीं चुण्या सै। 13 हे मेरे विश्वासी भाईयो, मेरे विचार तै मै इस ताहीं इब तक पा न्ही सका सूं, पर हाँ, मै यो जरूर करण लागरया सूं, क्यूँके जो बात हो ली सै, मै उननै भूलके जो आगै होण आळा सै उसके खात्तर मेहनत करण लागरया सूं। 14 मै निशान्ने की ओड़ भाज्या चाल्या ज्या सूं ताके वो ईनाम पाऊँ, अर वो ईनाम यो सै के परमेसवर मन्ने सुर्ग म्ह बुलाण लागरया सै क्यूँके मसीह यीशु मेरे खात्तर मरया। 15 म्हारै म्ह तै जितने आत्मिक रूप तै सिध्द सै, जो इसा विचार राक्खै सै, अर जै किसे बात म्ह थारा ए विचार न्ही हो, तो परमेसवर उस ताहीं भी थारे पे जाहिर कर देगा। 16 इस करके हमनै सब के मुताबिक चालणा सै, जो परमेसवर नै म्हारै पे जाहिर करया। 17 हे मेरे विश्वासी भाईयो, थारा सुभाव मेरे जिसा हो, अर उन माणसां ताहीं पिच्छाणो, जिनका सुभाव मेरे जिसा सै, अर उनकी तरियां जिन्दगी जिओ। 18 क्यूँके घणेए इसी चाल चाल्ले सै, जिनका जिक्क मन्ने थारे ताहीं बार-बार करया सै, अर इब भी रो-रोके कहुँ सूं के उनका सुभाव यो दिखावे सै, के वे मसीह के क्रूस पे मरण के सन्देश का बिरोध करै सै। 19 उनका अंत विनाश सै, वो अपणी शारीरिक इच्छा नै ए पूरी करणा चाहवै सै, अर वे अपणी शर्म के काम जो वे करै सै, उनपे घमण्ड करै सै, अर दुनियावी चिज्जां के बारे म्ह सोचते रहवै सै। 20 पर म्हारा देश सुर्ग म्ह सै, अर हम एक उद्धारकर्ता प्रभु यीशु मसीह के ओड़ै तै आण की बेसवरी तै बाट देखण लाग रहे सां। 21 वो अपणी शक्ति के असर के मुताबिक जिसके जरिये वो सारी चिज्जां नै अपणे बस म्ह कर सके सै, म्हारी दीन-हीन देह का रूप बदलके, अपणी देह के अनुकूल बना देगा।

## 4

XXXXXXXXXXXXXXXXXXXX

1 हे मेरे विश्वासी भाईयो, मे थारे ताहीं भोत प्यार करूँ सूं, मन्ने थारे तै मिलण की बड़ी इच्छा सै। थम मेरा आनन्द अर मुकुट हो, मजबुत्ती तै विश्वास करो, अर प्रभु के हुकम नै मानते रहों। 2 मै यूओदिया नै भी समझाऊँ सूं, अर सुन्तुखे नै भी, के थम आप्स म्ह एक-दुसरे तै बहस मत करो। 3 हे मेरे सच्चे सहकर्मी, मै तेरे तै भी बिनती करूँ सूं के तू उन विरवानियाँ की लड़ाई बन्द करवाण म्ह मदद कर, क्यूँके उननै मेरै गैल सुसमाचार फैलाण म्ह, क्लेमेंस अर मेरै और सहकर्मियाँ गैल मेहनत करी, जिनके नाम जीवन की किताब म्ह लिखे होए सै। 4 प्रभु म्ह सदा आनन्दित रहों, मै फेर करूँ सूं, आनन्दित रहों। 5 थारी कोमलता सारे माणसां पै जाहिर हो। प्रभु का आणा लोवै सै, 6 किसे भी बात की चिंता ना करो, पर हर हालात म्ह थारे निवेदन, प्रार्थना, बिनती अर धन्यवाद के गैल परमेसवर के आगवै पेश करै जावै। 7 फेर परमेसवर की शान्ति, जो माणस की समझ तै परै सै, थारे मन अर विचारां नै मसीह यीशु म्ह सुरक्षित राखैगी। 8 इस करके हे विश्वासी भाईयो, जो बात सच सै, जो बात आदरणीय, जो धर्मी सै, पवित्र सुहावनी अर जो-जो बात बड़ाई लायक सै, यानी जो भी सदगुण अर प्रशंसा की बात सै उनपै ए मन लगाया करो। 9 जो बात थमनै मेरै तै सुणी, मेरे म्ह देखी, सीखी, अर पाई सै, उननै मान्या करो, फेर शान्ति का परमेसवर थारे गैल रहूँगा।

XXXXXXXXXXXXXXXXXXXX

10 मै प्रभु मै घणा आनन्दित सूं के जब इतने दिनां के पाछे थारी चिंता मेरै बारे म्ह फेर जागगी सै, पक्का थारे शरुआत म्ह भी इसका विचार था, पर थमनै मौक्का न्ही मिला। 11 क्यूँके मेरे धोरे वो कोनी जो मन्ने चाहिए, पर मन्ने यो सिख्या सै के मै जिन हालातां म्ह मै सूं, उस्से म्ह सबर करूँ। 12 मन्ने कंगाली अर भरपूरी म्ह रहणा सीख लिया सै, हरेक हालातां अर हरेक बात म्ह मन्ने तृप्त अर भूक्खा रहणा, बढ़णा अर घटना सीख लिया सै। 13 मसीह मन्ने सामर्थ देवै सै उस म्ह मै सब कुछ कर सकूँ सूं। 14 तोभी थमनै भला करया के मेरे क्लेश म्ह मेरे साझीदार होए। 15 हे फिलिप्पी नगर के माणसां, थम आप भी जाणो सां के सुसमाचार के शरुआत म्ह, जब मै मकिदुनिया परदेस तै बिदा होया, जब थारे अलावा किसे कलीसिया के विश्वासी नै लेण देण के बारे म्ह मेरी मदद न्ही करी। 16 इसे ढाळ थिस्सलुनीके नगर म्ह मेरी जरूरतां नै पूरा करण म्ह थमनै दो बार रपिये भेजके मेरी मदद करी। 17 मै यो न्ही लिखता, के मै दान चाहूँ सूं पर मै चाहूँ सूं के थारे दान के बदले थमनै आशीष मिले। 18 मेरै धोरे सब कुछ सै, बल्के भोत घणाए सै, जो चीज थमनै इपफूरुदीतुस के हाथ तै भेजी थी उननै पाके मै तृप्त होगया सूं, थारे दान तो मनमोहक सुगन्धित भेट की तरियां सै, अर उस बलिदान की तरियां सै, जो याजक परमेसवर नै चढ़ावै सै, अर वे उसनै भावै सै। 19 म्हारा पिता परमेसवर, अपणे अपार धन के मुताबिक जो महिमा समेत मसीह यीशु म्ह थारी हरेक जरूरत नै पूरी करैगा। 20 म्हारे परमेसवर अर पिता की बड़ाई युगानुयुग होंदी रहवै। आमीन।

XXXXXXXXXXXXXXXXXXXX

21 यीशु मसीह म्ह सभी पवित्र माणसां नै, मेरी ओड़ तै नमस्कार कहो। जो विश्वासी भाई मेरे गैल सै वे थारे ताहीं नमस्कार कहवै सै। 22 सारे पवित्र माणस, जो मेरे साथ सै, अर खास करके वे माणस जो केसर के घराने तै विश्वासी बणे सै, थारे ताहीं नमस्कार कहवै सै। 23 म्हारे यीशु मसीह का अनुग्रह थारी आत्मा के गैल रहवै।

## कुलुस्से नगर के माणसां ताहीं प्रेरित पौलुस की चिट्ठी



कुलुस्से नगर के माणसां ताहीं पौलुस प्रेरित की चिट्ठी एशिया माइनर के कुलुस्से नगर की कलीसिया ताहीं लिखी गई थी, जो इफिसुस नगर के पूरब दिशा म्हा था। इस कलीसिया ताहीं पौलुस नै कोनी बणाया, पर या उस जगहां म्हा थी जिसकी जिम्मेदारी पौलुस अपने कान्धयां पै महसूस करै था, जिसा के हम पौलुस तै रोमी राज्य के एक परदेस, अखाया की राजधानी इफिसुस नगर सै, मसीह सेवकां ताहीं भेजदे होए पावां सां। पौलुस ताहीं यो बेरा लाग्या था के कुलुस्से नगर की कलीसिया म्हा कुछ गलत शिक्षा देणीये थे, जो इस बात पै जोर देवै थे के परमेसवर ताहीं जाणण अर पूरी तरियां मुक्ति पाण खात्तर एक आदमी ताहीं कुछ खास “आत्मिक प्रधानां अर अधिकारियां” की भगति करणी जरूरी था। इसके साथ-साथ ये शिक्षा देणीये कहवै थे के माणस ताहीं कुछ खास धर्म-विधियाँ जिस तरियां खतना करवाणा, खाणा, अर कई दुसरी बात्तां तै जुड़े कठोर नियमां का पालन करणा जरूरी सै। पौलुस इन सारी शिक्षा का विरोध करण खात्तर सच्चे मसीह सन्देश के साथ या चिट्ठी लिखै सै। उसके जवाब म्हा मर्म यो सै, के यीशु मसीह पूरी तरियां मुक्ति देण म्हा सामर्थी सै, अर दुसरा विश्वास अर रीति-रिवाज सच म्हा माणस नै उसतै दूर कर देवै सै। मसीह के जरिये परमेसवर नै इस सृष्टि की रचना करी, अर इव उसके जरिये ए वो अपने धोरै उल्टा ल्यावै सै। सिर्फ मसीह म्हा ए दुनिया ताहीं उद्धार की आशा सै। पौलुस जब विश्वासियाँ के जीवन खात्तर इस बड़ी शिक्षा का मतलब बतावै सै। तो या ध्यान देण आळी बात सै, के तुखिकुस, जो पौलुस की या चिट्ठी कुलुस्से नगर लेग्या था, के साथ म्हा उनेसिमस भी था यो गुलाम जिसके पक्ष म्हा पौलुस नै फिलेमोन की चिट्ठी लिखी थी।

### रूप-रेखा

जानकारी 1:1-8

मसीह का सुभाव अर काम 1:9-2:19

मसीह म्हा नया जीवन 2:20-4:6

समापन 4:7-18



1 या चिट्ठी पौलुस अर म्हारे विश्वासी भाई तीमुथियुस की ओड़ तै सै, जो परमेसवर की इच्छा तै मसीह यीशु का प्रेरित सै।<sup>2</sup> मसीह म्हा उन पवित्र अर विश्वासी भाईयाँ के नाम जो कुलुस्से नगर म्हा रहवै सै: म्हाारा पिता परमेसवर थारे ताहीं अनुग्रह अर शान्ति देंदा रहवै।



3 जब हम थारे खात्तर बिनती करां सां, तो हम अपने प्रभु यीशु मसीह के पिता, यानी परमेसवर का धन्यवाद करा सां।<sup>4</sup> क्यूँके हमनै सुण्या सै के यीशु मसीह पै थारा विश्वास सै, अर सारे पवित्र माणसां तै थम प्यार करो सो।<sup>5</sup> जो विश्वास अर प्यार इन विश्वासी भाईयाँ के धोरै सै, वो उस आस की बजह तै ए सै, जो थारे खात्तर सुर्ग म्हा धरी सै, जिसका वर्णन थमनै पैहले तै सुण राख्या सै। जब माणस थारे धोरै आए अर यीशु मसीह का सुसमाचार थारे ताहीं सुणाया, जो के परमेसवर का वचन सै।<sup>6</sup> जो थारे धोरै पोहचा सै, अर जिसा दुनिया म्हा यो नतिज्जा ल्याण लागरया सै अर दुनिया म्हा हरेक जगहां फैलण लागरया सै, उस्से तरियां जिस दिन तै थमनै उस ताहीं सुण्या अर या सच्चाई आच्छी तरियां समझी के परमेसवर मुफ्त म्हा उन माणसां का पाप माफ करै सै जो यीशु पै विश्वास करै सै। थारे म्हा भी इसाए करै सै।<sup>7</sup> उस्से की शिक्षा थमनै म्हारे गैल काम करणीये प्यारे इफ्फरास तै पाई, जो म्हारे खात्तर मसीह का विश्वास लायक दास सै।<sup>8</sup> उस्से नै म्हारे ताहीं पवित्र आत्मा के प्यार के बारे म्हा बताया सै, जो परमेसवर नै म्हारे ताहीं दिया सै।<sup>9</sup> इस करके जिस दिन तै हमनै

यो सुण्या सै, हम भी थारे खात्तर सदा प्रार्थना करां सां। के थम परमेसवर का आत्मा थारे ताहीं आत्मिक ज्ञान अर समझ देवै, ताके थम उसकी इच्छा नै समझ सको। <sup>10</sup> थारा बरताव इसा होणा चाहिए जिंसा परमेसवर के माणसां का हो सै, ताके थम परमेसवर नै हरेक काम म्ह खुश कर सको, ताके थम सारी हाण भले काम करते रहों अर थम परमेसवर की पिच्छाण म्ह बढ़ते जाओ। <sup>11</sup> उसकी महिमा की शक्ति के मुताबिक सारी ढाळ की सामर्थ तै शक्तिशाली होन्दे जाओ, ताके थम खुशी अर धीरज कै गैल दुखां नै सह सको। <sup>12</sup> अर पिता परमेसवर का धन्यवाद करते रहो, जिसनै थारे ताहीं इस लायक बनाया के थम उसके राज्य म्ह साझीदार हो सको, जो उसनै अपने माणसां खात्तर सुगं म्ह तैयार करया सै। <sup>13</sup> उससे नै म्हारे ताहीं शैतान की सामर्थ तै छुड़के अपने प्यारे बेटे के राज्य म्ह दाखल करया, <sup>14</sup> जिसतै अपने बेटे की कुरबान्नी के जरिये म्हारे ताहीं छुटकारा दिया, यानी पापां की माफी।

~~~~~

<sup>15</sup> परमेसवर नै कोए न्ही देख सकता, पर जब उसका बेटा यीशु मसीह इन्सान की देह धारण करके इस धरती पै आया तो हम उसनै जाण पाए के परमेसवर किसा सै, वो बिलकुल उसके समान सै। <sup>16</sup> क्यूँके मसीह नै परमेसवर के साथ मिलके सारी चिज्जां की सृष्टि करी, सुगं की हो या धरती की, देखी या अनदेखी, के सिंहासन, के प्रभुताएँ, के प्रधानताएँ, के हक, सारी चीज उससे कै जरिये अर उससे खात्तर बनाई गई। <sup>17</sup> सारी चिज्जां के बणण तै पैहला मसीह था, अर सारी चीज उससे म्ह मिलके काम करै सै। <sup>18</sup> मसीह की देह कलीसिया नै चलावै सै, जिस तरियां सिर पूरे देह नै चलावै सै, यानी मसीह कलीसिया का सिर सै, वोए शरुआत सै, अर मरे होया म्ह तै जी उठण आळा म्ह जेट्टा सै, ताके सारी बात्तां म्ह वोए प्रधान बणै। <sup>19</sup> क्यूँके पिता परमेसवर की खुशी इस्से म्ह सै के मसीह म्ह परमेसवर की सारी भरपूरी रहवै। <sup>20</sup> अर उसके क्रूस पै बहे होए लहू के जरिये मेळ-मिलाप करके, परमेसवर नै अपने बेटे ताहीं भेज्जा, जिसनै अपना लहू बहाया अर अपनी जाण दे दी। परमेसवर नै यो इस खात्तर करया ताके उसका अर सारी चिज्जां तै दुबारा मेळ हो सकै। इस तरियां तै उसने अपने बीच अर सारी चीज जो सुगं म्ह सै या अर सारी चीज जो धरती पै सै शान्ति की स्थापना करी। <sup>21</sup> थम जो पैहले पराये थे अर बुरे काम्मां के कारण मन तै बैरी थे। <sup>22</sup> परमेसवर नै इब अपने बेटे ताहीं इन्सान बनाके भेज्जा ताके वो क्रूस पै मारया ज्या, जिसकी बजह तै थारा भी मेळ करवाया ताके थमनै अपने आगूँ पवित्तर अर बिना कलंक अर बेकसूर बनाके खड्या करै। <sup>23</sup> जै थम मसीह म्ह विश्वास करो सां, अर थारा विश्वास उस घर की तरियां हो जो मजबूत नीम पै खड्या सै, अर उस सुसमाचार की आस नै ना छोड़ो, जिस ताहीं थमनै सुण्या सै, जिसका प्रचार दुनिया के माणसां म्ह करया गया सै, उसका मै, पौलुस, वचन का सुणण आळा बणया।

~~~~~

<sup>24</sup> मै उन दुखां के कारण आनन्दित सूं, जो थारे खात्तर टाऊँ सूं अर मसीह के क्लेश की कमी उसकी देह के खात्तर, यानी कलीसिया के खात्तर, अपने गात म्ह पूरी करूँ सूं, <sup>25</sup> इस्से कलीसिया के खात्तर मै थारे खात्तर परमेसवर के जरिये सौंपी गई सेवा के मुताबिक दास चुण्या गया के मै परमेसवर के आदेश नै पूरी तरियां प्रचार करूँ। <sup>26</sup> यानी उस राज नै जो बखत अर पीढ़ियां तै गुप्त रह्या, पर इब उसके उन पवित्तर माणसां पै दिख्या सै। <sup>27</sup> परमेसवर चाहवै सै के मसीह के धन अर महिमा नै गैर यहूदियां के माणस जाणै सै, अर वो राज यो सै के मसीह थारे म्ह रहवै सै, यो थमनै परमेसवर की महिमा नै साँझा करण की आस देवै सै। <sup>28</sup> इस खात्तर हम दुसरयां नै मसीह के बारे म्ह बतावां सां, अर हरेक आदमी नै चेतावनी देवा सां अर परमेसवर के दिए गए ज्ञान तै हरेक आदमी नै सिखावा सां, हरेक आदमी नै मसीह म्ह सिध्द करके परमेसवर के स्याम्ही पेश करणा चाहवां सां। <sup>29</sup> इस्से ताहीं पूरा करण खात्तर मै भोत मेहनत अर कष्ट सहू सूं। उस सामर्थ के जरिये जो मसीह देवै सै अर जो मेरे म्ह काम करण लागरया सै।

## 2

1 मैं चाहूँ सूँ के थम जाण ल्यों के थारे अर उनके खात्तर जो लौदीकिया नगर म्ह सै अर उन सारया खात्तर जिनतै मैं न्ही मिला, मैं उनके खात्तर किसी मेहनत करूँ सूँ। 2 मैं इस खात्तर मेहनत करूँ सूँ ताके मैं उनके विश्वास नै मजबूत कर सकूँ। थारा एक-दुसरे के खात्तर प्यार थारे ताहीं आप्स म्ह बाँधके राखै, मैं चाहूँ सूँ के उननै पूरा भरोस्सा हो क्यूँके उन ताहीं परमेसवर की गुप्त योजना की पूरी समझ सै, जो के मसीह सै ए। 3 परमेसवर ए सै जो बुद्धि अर ज्ञान की समझ देवै सै जो छिपे होए खजान्ने की ढाळ सै। 4 यो मैं इस करके कहूँ सूँ के कोए आदमी थमनै झूट्टी शिक्षा तै ना भरमावै। 5 हालाकि मैं थारे तै दूर सूँ, तोभी मैं थारे बारे म्ह सोचता रहूँ सूँ, अर जिंसा थमनै जीणा चाहिए उसा जीवन अर थारे मजबूत विश्वास नै देखके जो मसीह म्ह सै, मैं राज्जी होऊँ सूँ।

~~~~~

6 इस करके जिस तरियां थमनै मसीह यीशु ताहीं प्रभु करके मान लिया सै, उस्से तरियां उस ताहीं मानते रहो। 7 थारा मसीह पै विश्वास उस जमीन म्ह लगाये गये पेड़ की तरियां हो, जिसकी जड़ गहरी अर मजबूत हो सै। विश्वास म्ह मजबूत होन्दे जाओ, जिंसा के थारे ताहीं सिखाया गया सै, अर सदा परमेसवर का धन्यवाद करते रहो। 8 इस कारण हम मानवीय शिक्षा का पालन न्ही करणा चाहन्दे, ताके कोए थमनै उस बेकार ज्ञान अर धोक्खे के जरिये अपणे बस म्ह ना करले, जो माणसां के रिवाज अर दुनियावी शिक्षा के मुताबिक तो सै, पर मसीह के मुताबिक कोनी। 9 थारे ताहीं ये लोग धोक्खा ना देण पावै, जिव के मसीह नै मानव रूप धारण करया पर वो पूरी तरियां तै परमेसवर था। 10 अर हरेक शक्ति अर प्रधानता पै उसका अधिकार सै। जै थम मसीह के कहलाओ हो, तो थमनै किसे चीज की कमी कोनी। 11 जिव थम मसीह म्ह विश्वास करो सों, तो थारा माणसां के जरिये खतना कोनी करया जान्दा, पर मसीह के जरिये करया जावै सै, जो के खुद ताहीं पापमय सुभाव तै दूर करणा सै। 12 जिव थारा वपतिस्मा होया (यो थारा पापमय सुभाव दिखावै सै) तो थम मसीह की तरियां गाड़े गये, अर जिंसा मसीह जिवाया गया, अर उस्से तरियां थम भी जिन्दा करे गए (नये सुभाव तै)। यो इस खात्तर होया क्यूँके थम विश्वास करो सों, के परमेसवर नै मसीह ताहीं अपणी शक्ति तै मुदाँ म्ह तै जिवाया। 13 थम जो अपणे कसूर अर अपणे पापमय सुभाव तै आजाद न्ही थे, परमेसवर नै थारे ताहीं भी मसीह के गैल जिवाया, अर म्हारे सारे कसूर माफ कर दिए। 14 अर इसा लागवै सै जिंसा परमेसवर नै म्हारे पापां का वो लेख मिटा दिया, जो म्हारे खिलाफ इल्जाम नै बतावै थे। जिव मसीह ताहीं क्रूस पै कील्लां तै जकड़ा गया तो उसनै उस लेख ताहीं पूरी तरियां हटा दिया। 15 अर उसनै प्रधानता अर अधिकारां ताहीं हरा के उनका खुल्लमखुल्ला तमाशा बणाया अर क्रूस के जरिये उनपै जयजयकार की आवाज सुणाई। 16 इस करके थमनै कोए धोक्खा ना देवै, अर ना कोए थमनै खाण-पीण या त्योहार, नये चाँद अर आराम के दिन के बारे म्ह परखै। 17 क्यूँके ये सारी आण आळी बात्तां की छाया सै, पर मूल चीज मसीह की सै। 18 कोए आदमी झूट्टी विनम्रता अर सुगुंदात्तां की पूजा करा के थारे ताहीं दौड़ के ईनाम तै राख ना दे। इसा आदमी देखी होइ बात्तां म्ह लागया रहवै सै अर अपणी शरीरिक समझ पै बेकार फुल्ले सै, 19 उसनै विश्वास अर मसीह का सच्चा सन्देश सिखाणा छोड़ दिया सै, जो के देह म्ह सिर की तरियां सै। जिंसा तरियां एक सिर देह नै निर्देश देवै सै, उस्से तरियां मसीह अपणे लोग्गां ताहीं निर्देश देवै के वे एक साथ अर एक जुट रहवै जिंसा तरियां देह के जोड़ अर नस देह नै पकड़ै सै, अर यो बढ़े सै, जिंसा तरियां परमेसवर उन ताहीं बढाणा चाहवै सै।

~~~~~

20 जिव के थम मसीह के गैल दुनिया की पुराणी शिक्षा की ओड़ तै मरगे सों, तो फेर क्यूँ उनकी तरियां जो दुनिया के सै जीवन बिताओ सों? थम इसी विधियाँ के बस म्ह क्यूँ रहों सों, 21 के ना तो "इसनै छुईये," ना "उस ताहीं खाके देखिये," अर ना उसके हाथ लगाईये? 22 ये सारी चीज काम म्ह लादे-लादे नाश हो जावैगी, क्यूँके ये माणस के हुकम अर शिक्षा के मुताबिक सै। 23 ये तीन

नियम बुध्दमानी का राह दिखावै सै, जो ये सै, खुद ताहीं परमेसवर के प्रति समर्पित करणा, झूट्टी विनमूरता अर अपणी देह कै गैल कठोरता तै बरताव करणा। पर माणस इन विधियाँ नै मान्ने सै, तोभी पापमय सुभाव नै न्ही छोड़ पान्दा।

### 3

1 यो इसा सै, के मान्नों जणु परमेसवर नै थारे ताहीं मुर्दा म्ह तै जिवा दिया हो, जिस तरियां उसनै मसीह ताहीं मुर्दा म्ह तै जिवाया, तो सुर्गीय चिज्जां की खोज म्ह रहों, जडै मसीह परमेसवर के साथ महिमाय जगहां म्ह बेटचा होया सै। 2 धरती पै की न्ही पर सुर्गीय चिज्जां पै ध्यान लगाओ, 3 क्यूँके यो इसा सै थम तो मर गये जिब मसीह मारा गया अर थारा जीवन मसीह के गैल परमेसवर म्ह छिप्या होया सै। 4 जिब मसीह जो म्हारा जीवन सै, बोहड़ के आवैगा, तो थम भी उसके गैल दिखोगे अर उसकी महिमा म्ह शामिल होओगे।

#### XXXXXXXXXXXXXXXXXXXX

5 इस करके अपने उन बुरे काम्मां नै छोड़ दो जो थारे पापमय सुभाव का कारण बणै सै, जो धरती पै सै, यानी जारी, अशुद्धता, दुष्कामना, बुरी लालसा अर लालची ना बणो यो मूर्तिपूजा के बराबर सै। 6 क्यूँके माणस ये बुरे काम करै सै, इस कारण परमेसवर उन ताहीं बड़्डा दण्ड देवैगा। 7 अर थम भी, जिब इन बुराईयां म्ह जीवन बिताओ थे, तो इन बुरी लालसा के मुताबिक जिओ भी थे। 8 पर इब थम भी इन सारया नै, यानी छो रोष, बैरभाव, बुराई अर मुँह तै गाळी बकणा ये सारी बात छोड़ दो। 9 एक-दुसरे तै झूट ना बोल्लो, क्यूँके थमने बुरा सुभाव अर बुरे काम छोड़ दिये सै। 10 अर इब थमने नये सुभाव ताहीं धारण कर लिया सै, यो नया सुभाव ज्यादा तै ज्यादा म्हारे रचण आळे के मुताबिक बणण लागरया सै, ताके हम उसनै आच्छी तरियां जाण पावां। 11 इस नई जिन्दगी म्ह कोए फर्क कोनी पड़ता चाहे यूनानी हो या यहूदी हो, खतना हो या खतनारहित हो, जंगळी हो या असभ्य हो, दास हो या आजाद हो, पर मसीह ए सै, जो सब तै खास सै अर वो हम सब म्ह बसै सै। 12 क्यूँके परमेसवर नै थारे ताहीं पवित्तर माणस बणण खात्तर चुण्या सै, अर वो थारे ताहीं प्यार करे सै, इस करके बड़ी करणा, भलाई, दीनता, नमूरता, अर सहनशीलता नै धारण करो। 13 अर जै किसे नै किसे पै दोष लगाण का कोए कारण हो, तो एक-दुसरे की सह ल्यो अर एक-दुसरे के कसूर माफ करो, जिस तरियां प्रभु नै थारे कसूर माफ करे, उससे तरियां थम भी करो। 14 इन सारा तै बढ़के थम जो काम कर सकों सों, वो यो सै, के थम एक-दुसरे तै प्यार करो, प्यार ही सै जो म्हारे ताहीं एक-दुसरे के गैल एकता म्ह जोड़े राखै सै। 15 जो शान्ति मसीह देवे सै, वा थारे दिलां पै राज करैगी, क्यूँके थम सारे एक देह के अंग सों, इस करके थारे ताहीं एक-दुसरे के साथ शान्ति तै रहण के खात्तर बुलाया गया सै, अर थम सदा उसका धन्यवाद करदे रहों। 16 हर बखत मसीह कै वचन के उपर ध्यान करते रहवों ताके थारा सोचणा अर काम करणा उसके मुताबिक हो, अर सिध्द ज्ञानसुधा एक-दुसरे नै सिखाओ अर समझाओ, अर अपने-अपणे मन म्ह धन्यवाद के गैल परमेसवर के खात्तर भजन अर जै-जै कार अर आत्मिक गीत गाओ। 17 वचन म्ह या काम म्ह जो किमे भी करो, सारा प्रभु यीशु मसीह के नाम तै करो, अर उसके जरिये परमेसवर पिता का धन्यवाद करो।

#### XXXXXXXXXXXXXXXXXXXX

18 हे पत्नियों, जिसा प्रभु म्ह सही सै, उसाए अपने-अपणे धणी के अधीन रहो। 19 हे पतियों, अपणी-अपणी घरआळी तै प्यार राखो, अर उनके गैल नरमाई तै पेश आओ। 20 हे बाळकों, सारी बात्तां म्ह अपने-अपणे माँ बाप के हुकम नै मान्नों, क्यूँके प्रभु इसतै खुश होवै सै। 21 हे बाळकां आळो, अपने बाळकां नै तंग ना करो, इसा ना होके वे परेशान हो जावै। 22 हे सेवको, जो इस दुनिया म्ह थारे माल्लिक सै, सारी बात्तां म्ह उनके हुकम का पालन करो, माणसां नै राज्जी करण आळा के समान दिखाण कै खात्तर न्ही, पर मन की सीधई अर परमेसवर के डर तै। 23 जो किमे थम करो सों, पूरे मन तै करो, यो समझके के माणसां के खात्तर न्ही पर प्रभु के खात्तर करो सों, 24 याद राखों



परमेसवर धमनै ईनाम देवैगा, या फेर वो धमनै आशीष म्ह साझीदार करैगा जो उसनै अपणे माणसां के खात्तर राक्खी सै, क्यूँके धम मसीह यीशु की सेवा करो सो। <sup>25</sup> जो बुरा काम करै सै, परमेसवर हरेक ताहीं उसकी बुराई का उसनै दण्ड देवैगा, क्यूँके परमेसवर किसे के गैल पक्षपात कोनी करदा।

## 4

1 हे मालिकों, अपणे-अपणे नौकरां के गैल न्याय अर एक सा बरताव करो, या समझकै के सुर्ग म्ह थारा भी एक माल्लिक सै।

?? ?????????? ????

2 प्रार्थना म्ह लाग्गे रही, अर जब प्रार्थना करो तो सावधान रहियो अर परमेसवर का धन्यवाद हमेशा करते रही। <sup>3</sup> अर उसके गैल ए गैल म्हारे खात्तर भी प्रार्थना करते रही के परमेसवर म्हारे खात्तर वचन सुणाण का इसा द्वार खोल दे, के हम मसीह कै उस भेद का वर्णन कर सकां जिसकै कारण मै कैद म्ह सूं, <sup>4</sup> प्रार्थना करो के मै स्पष्ट रूप तै अर खुल्ले तौर पै मसीह के भेद नै बता पाऊं। <sup>5</sup> अविश्वासी के गैल जब बात करो तो उस मौकै का सही इस्तमाल करो। <sup>6</sup> थारा बोलणा सदा अनुग्रह समेत सलोना हो ताके धमनै हरेक माणस ताहीं बढ़िया ढाळ तै जवाब देणा आ जावै।

????? ????????

7 प्यारे विश्वासी भाईयो अर विश्वास लायक दास तुखिकुस, जो प्रभु म्ह मेरै गैल दास सै, वो धमनै सारी बात बता देगा। <sup>8</sup> उस ताहीं मननै इस खात्तर थारे धोरे भेज्जा, ताके धमनै म्हारे हाल का बेरा पाट जावै अर वो धमनै उत्साहित करैगा। <sup>9</sup> उसके गैल मननै उनेसिमुस ताहीं भी भेज्जा सै, जो विश्वास लायक अर पिरय विश्वासी भाई सै, अर वो भी थारे ए नगर का सै, ये धमनै याड्डे की सारी बात बता देंगे। <sup>10</sup> मेरै गैल कैदी अरिस्तर्खुस अर मरकुस की ओड़ तै धमनै नमस्कार, मरकुस जो बरनबास का चचेरा भाई सै, जिसके बारे म्ह धमनै चिट्ठी मिली सै, के जै वो थारे धोरे आवै, तो उसतै आच्छी ढाळ बरताव करियो। <sup>11</sup> अर यीशु जो यूस्तुस कुह्हावै सै, थारे ताहीं नमस्कार कहवै सै। यहूदी विश्वासियाँ म्ह तै सिर्फ ये तीन माणस सै, जो परमेसवर के राज्य कै खात्तर मेरै गैल काम करणीये अर मेरे उत्साहित होण का कारण सै। <sup>12</sup> इपफ्रास, जो थारे नगर का सै, अर मसीह यीशु का दास सै, थारे तै नमस्कार कहवै सै। वो सदा थारे खात्तर मन लगाकै प्रार्थना करै सै, अर परमेसवर तै सदा बिनती करै सै, के परमेसवर धमनै मजबूत अर सिध्द बणावै, अर धमनै पूरा भरोस्सा हो के धम परमेसवर की इच्छा का पालन करो सों। <sup>13</sup> मै उसका गवाह सूं, के वो थारे खात्तर अर लौदीकिया अर हियरपुलिस नगर के माणसां के खात्तर बड़ी मेहनत करदा रहवै सै। <sup>14</sup> म्हारे पिरय वैद लूका अर देमास का थारे ताहीं नमस्कार। <sup>15</sup> लौदीकिया नगर के विश्वासी भाईयाँ नै, अर नुमफास अर उनके घर की कलीसिया नै नमस्कार कहिये। <sup>16</sup> जब या चिट्ठी धम पढ़ ल्यो तो इसा करियो के लौदीकिया की कलीसिया म्ह भी या पढ़ी जावै, अर वा चिट्ठी जो लौदीकिया तै आवै उसनै धम भी पढ़ईयो। <sup>17</sup> अर अरखिप्पुस तै कहिये के जो सेवा प्रभु म्ह तेरे ताहीं सौप्यी गयी सै, पक्का इरादा करो के उस सेवकाई नै पूरा कर सको। <sup>18</sup> मै (पौलुस) अपणे हाथ्यां तै धमनै नमस्कार लिखूँ सूं। याद राखियो के मै कैद म्ह सूं, अर मेरे खात्तर प्रार्थना करो। परमेसवर का अनुग्रह थारे पै होंदा रहवै। आमीन।

## थिस्सलुनीकियों नगर के माणसां ताहीं प्रेरित पौलुस की पैहली चिट्ठी

??????

रोमी राज म्ह घणे परदेस थे, उन म्ह तै मकिदुनिया परदेस एक था अर थिस्सलुनीके नगर उसकी राजधानी था। फिलिपी शहर तै आण के बाद पौलुस नै याडै एक कलीसिया बणाई थी। याडै भी, तावळी ए उन यहूदिया गैल बिरोध शरु होग्या, जो गैर-यहूदियों म्ह पौलुस के मसीह सन्देश की कामयाबी तै जळै थे, जो के गैर यहूदी, यहूदी धर्म म्ह दिलचस्पी राखै थे। आखर म्ह पौलुस नै थिस्सलुनीके नगर छोडणा पड्या, अर वो बिरीया नगर चला गया। बाद म्ह, जिब वो कुरिन्थुस नगर पोहचा, तो पौलुस नै अपने साथी तीमुथियुस के जरिये व्यक्तिगत रूप तै थिस्सलुनीके नगर की कलीसिया के मौजूदा हाल के बार म्ह समाचार मिल्या। यो समाचार मिल्या पाच्ये थिस्सलुनीकियों नगर के नाम पौलुस प्रेरित की पैहली चिट्ठी विश्वासियाँ म्ह हिम्मत बढ़ाण अर तसल्ली देण के खात्तर लिखी गई। वो उनके विश्वास अर प्रेम के बारे म्ह सन्देश के खात्तर आभार प्रगट करै सै। वो उननै अपने जीवन की याद दुवावै सै, जो उसनै उनके साथ रहन्दे होए बिताया था। जिब वो मसीह के दुवारा आण तै जुड़े सवाला का जवाब देवै सै, जो उस कलीसिया म्ह उठरे थे। सवाल यो था, के एक विश्वासी, जो मसीह के दुवारा आण तै पैहल्याए मर जावै सै, उस जीवन का भागी होवैगा ताके जो उसके आण तै मिलण आळा सै? मसीह का दुसरा आगमन कद होवैगा? पौलुस इस मौकै पै उननै यो बतावै सै, के उस हालत म्ह जिब के थम मसीह के दुसरे आगमन की आशा म्ह बाट देखण लागरे सों, चुपचाप अपने काम म्ह लागरे रहो।

रूप-रेखा

जानकारी 1:1

धन्यवाद अर बड़ाई 1:2-3:13

मसीह चाल-चलण तै जुड़े उपदेश 4:1-12

मसीह के दुसरा आगमन के बारे म्ह शिक्षा 4:13-5:11

आखरी उपदेश 5:12-22

समापन 5:23-28

??????

1 या चिट्ठी पौलुस अर सिलवानुस अर तीमुथियुस की ओड़ तै थिस्सलुनीकियों नगर की कलीसिया के उन विश्वासियाँ के नाम लिखी सै, जो परमेसवर पिता अर प्रभु यीशु मसीह म्ह सै। परमेसवर का अनुग्रह अर शान्ति थारे ताहीं मिल्दी रहवै।

??????????????

2 हम अपनी प्रार्थनायां म्ह थारे ताहीं याद करदे अर सारी हाण थम सारया के बारे म्ह परमेसवर का धन्यवाद करा सां। 3 अर अपने परमेसवर अर पिता के स्याम्ही जो काम विश्वास तै करे, अर विश्वासियाँ खात्तर इतने प्यार तै मेहनत करी, अर प्रभु यीशु मसीह के बोहड़ण की आस के कारण बड़ी धीरजता तै दुखां नै सहन्दे होए, सारी हाण थमनै याद करा सां। 4 हे विश्वासी भाईयो, अर परमेसवर के प्यारे माणसों हम जाना सां, के परमेसवर नै थारे ताहीं अपने माणस होण खात्तर छाट्या सै। 5 क्यूंके म्हारा सुसमाचार जो यीशु मसीह के बारे म्ह था, थारे धारे ना सिर्फ बात्तां तै ए न्ही बल्के पवित्र आत्मा की सामर्थ अर बड़े पक्के सबूत के गैल पोंहच्या सै; जिसा थमनै बेरा सै, के थारे कल्याण खात्तर थारे म्ह म्हारा बरताव किसा था। 6 थारे उप्पर बड़े कळेश थे, पर थमनै पवित्र आत्मा के जरिये दिए गये आनन्द के गेल्या सुसमाचार ताहीं मान लिया, थमनै म्हारी अर प्रभु यीशु की तरियां बरताव कराया। 7 उरै ताहीं के मकिदुनिया परदेस अर अखाया परदेस के सारे विश्वासियाँ के

खात्तर थम बढ़िया मिसाल बणै।<sup>8</sup> क्यूँके थारे उरै तै ना सिर्फ मकिदुनिया परदेस अर अखाया परदेस म्ह पूरभु का वचन सुणाया गया, पर थारे विश्वास की जो परमेसवर पै सै, हरेक जगहां जित्त भी हम गये, तो हमनै माणसां तै थारे विश्वास के बारे म्ह सुण्या, इस करके हमनै माणसां ताहीं थारे बारे म्ह बताण की जरूरत ए कोनी।<sup>9</sup> क्यूँके वे आप ए म्हारै बारे म्ह बतावै सै, के जब हम थारे धौरे आये, तो थमनै म्हारा स्वागत किस ढाळ कराया; अर थम किस ढाळ मूर्तियाँ तै दूर होकै, परमेसवर की ओड़ मुड़ गये, ताके जिन्दे अर सच्चे परमेसवर की सेवा करो।<sup>10</sup> अर परमेसवर के बेटटे यीशु की सुगं तै बोहड़ के आण की बाट देखदे होए, जिस ताहीं परमेसवर नै मरे होयां म्ह तै जिन्दा करया, जो म्हारै ताहीं आण आळे न्याय तै बचावै सै।

## 2

<sup>1</sup> हे विश्वासी भाईयो, थमनै आप्णे बेरा सै, के म्हारा थारे धौरे आणा कितना फायदेमन्द था,<sup>2</sup> बल्के थमनै खुद नै ए बेरा सै, के पैहल्या हमनै फिलिप्पी नगर म्ह दुख टाया, के म्हारा नगर के माणसां नै सख्त विरोध करया, अर परमेसवर नै म्हारै तै इसी हिम्मत देई, के हम परमेसवर का सुसमाचार घणे विरोध होण के बावजूद भी थमनै सुणावां।<sup>3</sup> क्यूँके म्हारा उपदेश ना भ्रम तै सै, अर ना गलत इरादे तै, अर ना छळ के गैल सै; <sup>4</sup> पर परमेसवर नै म्हारै ताहीं लायक समझके सुसमाचार सौंप्या, इस करके हम माणसां नै न्ही, पर जो म्हारै मनां नै जाँचण आळे परमेसवर ताहीं राज्जी करण खात्तर उपदेश देवा सां।<sup>5</sup> थमनै बेरा सै, परमेसवर गवाह सै, के हमनै कदे चापलूसी की बात कोनी करी, अर ना ए लोभ के खात्तर हमनै कोए इसा काम करया, अर ना कुछ थारे तै छुपाया।<sup>6</sup> तोभी हम माणसां तै आदर कोनी चाहवां थे, अर ना थारे तै, ना और किसे तै, हालाकि हम मसीह के प्रेरित होण के कारण थारी मदद पाणा म्हारा हक था।<sup>7</sup> पर जिस तरियां माँ अपणे बाळकां का पालन-पोषण करै सै, उस्से तरियां ए हमनै भी थारे बिचाळै रहकै नरमाई दिखाई सै; <sup>8</sup> एक माँ की तरियां ए हम थारी चाहना करदे होए, ना सिर्फ परमेसवर का सुसमाचार, पर अपणा-अपणा प्राण भी थारे ताहीं देण नै त्यार थे, क्यूँके के हम थारे तै भोत प्यारे करां सां।

<sup>9</sup> हे विश्वासी भाईयो, म्हारी कड़ी मेहनत नै याद राखो, हमनै ज्यातै दिन-रात काम-धन्धा करदे होए, परमेसवर का सुसमाचार प्रचार करया, के थारे म्ह तै किसे पै बोझ ना बण जावां।<sup>10</sup> थम अर परमेसवर भी इस बात के गवाह सां, के सारे विश्वासी भाईयाँ के गैल म्हारा सुभाव कितना सच्चा, धर्मी अर बेकसूर था।<sup>11</sup> थमनै बेरा सै के जिसा पिता अपणे बाळकां के गेल्या बरताव करै सै, उस्से तरियां ए हम भी थारे म्ह तै हरेक ताहीं उपदेश देन्दे, अर शान्ति देन्दे, अर समझावां थे <sup>12</sup> के थम इसा जीवन जिओ, जिसा परमेसवर चाहवै सै, जो थमनै अपणे राज्य अर महिमा म्ह बुलावै सै।

<sup>13</sup> ज्यातै हम भी परमेसवर का धन्यवाद सारी हाण करा सां के जब म्हारै जरिये परमेसवर के सुसमाचार का वचन थमनै सुण्या, तो थमनै उस ताहीं माणसां का न्ही पर परमेसवर का वचन समझके अपणाया; अर सच म्ह यो परमेसवर का वचन सै भी, अर यो सुसमाचार थारे म्ह काम करण लागरया सै, जो यीशु पै थम विश्वास करो सो।<sup>14</sup> ज्यातै थम, हे विश्वासी भाईयो, परमेसवर की उस कलीसियाओं के स्याम्ही दुख सहण लाग्गे जो यहूदिया परदेस म्ह सै, अर मसीह यीशु पै विश्वास राखै सै, क्यूँके थमनै भी अपणे माणसां तै उसाए दुख पाया, जिसा उननै अपणे यहूदी माणसां तै पाया था।<sup>15</sup> जिन नै पूरभु यीशु ताहीं अर नबियाँ ताहीं मार दिया। अर म्हारै ताहीं भी सताया, अर परमेसवर उनतै राज्जी कोनी, अर वे सारे माणसां का विरोध करै सै।<sup>16</sup> अर वे दुसरी जात्तां म्ह उनके उद्धार के खात्तर बात करण तै हमनै रोक्के सै, अर वे पाप पै पाप करते जावै सै, जिन ताहीं के परमेसवर उननै दण्ड ना दे दे; अर इब परमेसवर उननै बड़ा भरी दण्ड देण आळा सै।

~~~~~

<sup>17</sup> हे विश्वासी भाईयो, जिन हम थोड़ बखत खात्तर थारे धौरे न्ही थे, पर हम सदा थारे बारे म्ह ए सोच्चा थे, तो हमनै और भी बड़ी लालसा तै थारे ताहीं मिलण की अर देखण की कोशिश करी।

<sup>18</sup> ज्यातै हमनै (यानिके मुझ पौलुस नै) एक बर न्ही बल्के दो या तीन बार आण की कोशिश करी,

पर श्रैतान हमनै रोक्के रहया। 19 भला! म्हारी आस, खुशी या बड़ाई का ताज कौण सै? वो थमे होओगे जिब यीशु बोहड़ के आवैगें? 20 म्हारी बड़ाई अर खुशी थमे सो।

### 3

~~~~~

1 आखिर जिब हम थारे तै दूर ना रह पाए, तो मै पौलुस अर सीलास नै यो तय करया के एथेंस नगर म्ह एकले रह जावां। 2 अर हमनै तीमुथियुस ताहीं जो मसीह के सुसमाचार म्ह म्हारा भाई, अर परमेसवर का सेवक सै, इस करके भेज्या, के वो थारे ताहीं मसीह के विश्वास म्ह मजबूत अर उत्साहित करै। 3 ताके कोए इन क्लेशां के कारण डगमगा न्ही जावै; क्यूँके थम जाणो सो, के म्हारे ताहीं परमेसवर नै इसे तरियां सताये जाण खात्तर छाट्या सै। 4 क्यूँके पैहल्या भी, जिब हम थारे साथ थे, तो थारे तै कह्या करा थे, के म्हारे ताहीं सताया जावैगा, अर इसाए होया सै, अर थम जाणो भी सो। 5 इस कारण जिब मेरै तै और न्ही रहया गया, तो थारे विश्वास का हाल जाणण के खात्तर मन्नै तीमुथियुस ताहीं भेज्या, मन्नै डर था, के परखण आळे श्रैतान नै थारे ताहीं परख्या ना हो, अर म्हारी मेहनत बेकार ना होगी हो।

~~~~~

6 पर इब्ब तीमुथियुस नै जो थारे थारे तै म्हारे उरै आके थारे विश्वास अर प्यार का सुसमाचार सुणाया अर इस बात ताहीं भी सुणाया, के थम सारी हाण प्यार के गेल्या म्हारे ताहीं याद करो सो, अर म्हारे देखण की चाहना राखो सो, जिसा हम भी थमनै देखण की। 7 हे विश्वासी भाईयो, हम अपणी सारे दुख अर क्लेश म्ह उत्साहित सां, क्यूँके हमनै थारे विश्वास के बारे म्ह सुणया के थम इब भी यीशु मसीह के विश्वास म्ह मजबूत सां। 8 क्यूँके इब जै थम प्रभु म्ह मजबूत हो तो हम जिन्दे सां। 9 अर थारे बारे म्ह जो खुशी हमनै मिली से, उसकी बजह तै हम परमेसवर का धन्यवाद किस तरियां तै करा? 10 हम दिन-रात घणीए प्रार्थना करदे रहवां सां, के थमनै दुबारा देखवां, अर थारे मसीह पै मजबूती तै विश्वास करण म्ह मदद करा।

11 हम प्रार्थना करां सां, के म्हारा परमेसवर अर पिता आप ए अर म्हारा प्रभु यीशु, थारे ताहीं पोहचने म्ह म्हारी मदद करै। 12 हम प्रार्थना करां, के जिसा हम थारे तै प्यार करां सां; उस्से तरियां ए थारा प्यार भी आप्स म्ह, अर सारे माणसां के गेल्या बधै, अर परमेसवर थारे प्यार म्ह बढ़ोतरी करदा जावै। 13 हम प्रार्थना करां सां, के वो थारे मनां नै इसा मजबूत करै, के जिब म्हारा प्रभु यीशु अपणे सारे पवित्तर लोगां के गैल बोहड़ के आवै, तो वे म्हारे परमेसवर अर पिता के स्याम्ही पवित्तरता म्ह बेकसूर ठहरै।

### 4


~~~~~

1 हे विश्वासी भाईयो, हम थारे तै विनती करा सां, अर थारे तै प्रभु यीशु म्ह समझावां सां, के इसे जिओ के, परमेसवर ताहीं हम राज्जी करणा आळे बण सकां, जिसा हमनै थारे तै सिखाया सै, थम इस्से तरियां जीण लागरे थे, अर थमनै उत्साहित करां सां के और भी ज्यादा इसा करते रहों। 2 क्यूँके थमनै बेरा सै के हमनै प्रभु यीशु के हक तै थारे ताहीं कौण-कौण से आदेश\* दिये सै। 3 परमेसवर की मर्जी या सै के थम पवित्तर बणो: अर जारी ना करो, 4 थारे म्ह तै हरेक माणस अपणी देह नै काबू करणा जाणे क्यूँके थारी देह पवित्तर अर सम्मान जोगी रहवै। 5 यो काम अभिलाषा तै न्ही, ना उन जात्तां के तरियां, जो परमेसवर नै न्ही जाणदी, 6 ताके इस बात म्ह कोए अपणे विश्वासी भाई के विरुध्द पाप ना करै, अर ना इसा मौक्का देखै के वो पाप करै, क्यूँके प्रभु यीशु उसनै दण्ड देवैगा, जो इसे काम करै सै; जिसा के हमनै पैहल्याए थारे तै कह्या अर चिताया भी था। 7 क्यूँके परमेसवर नै म्हारे ताहीं अपवित्तर जीवन जीण खात्तर न्ही, पर पवित्तर जीवन जीण खात्तर बुलाया सै। 8 इस

\* 4:2 4:2 आदेश-निर्देश

करके जो इन हुकमां नै न्ही मानता, वो माणस नै न्ही, पर परमेसवर नै तुच्छ जाणे सै, जो अपणा पवित्र आत्मा थारे ताहीं देवै सै।

9 पर विश्वासी भाई-चारे के प्यार के बारे म्ह यो जरूरी न्ही, के मै थारे धोरे कुछ लिक्खूं, क्यूँके आप्स म्ह प्यार राखणा थमनै आप ए परमेसवर तै सिख्या सै; 10 थमनै पैहले ए अपणे विश्वासी भाईयाँ के प्यार ताहीं दिखाया सै, जो हर जगहां सारे मकिदुनिया परदेस म्ह सै। पर हे विश्वासी भाईयो, हम थारे तै बिनती करां सां, के थम और भी बढ़ते जाओ। 11 अर जिसी हमनै थारे ताहीं हुकम दिया सै, के शान्ति तै जीवन जिओ अर दुसरे माणसां की बात्तां म्ह दखल ना दो, अर अपणे-अपणे हाथ्यां तै कमाण की कोशिश करो। 12 ताके अविश्वासी माणस देख्खै, के थारा रोज का जीवन किसा सै, अर थारे बरताव नै देखके थारा आदर करै, अर अपणी जरूरत के खात्तर थम किसे के मोहताज ना रहो।



13 हे विश्वासी भाईयो, हम न्ही चाहन्दे के थम उनके बारे म्ह जो मर लिये सै, अनजाण रहो; इसा ना हो के थम दुसरयां की तरियां दुख करो जिन नै आस कोनी, के वो मरके जिन्दा होवैगा। 14 क्यूँके जै हम विश्वास करा सां के यीशु मरया अर जिन्दा भी उठचा, तो उससे तरियां ए परमेसवर उननै भी जो यीशु पै विश्वास करते होए मरै सै, उन ताहीं भी वापिस ले आवैगा। 15 क्यूँके हम प्रभु यीशु के वचन के मुताबिक थारे तै न्यू कद्दां सां के हम जो जिन्दे सां अर प्रभु के दुबारा आण ताहीं बचे रहवांगे, तो पक्के उनतै पैहले प्रभु तै न्ही मिलैगे जो मौत की नींद सो ग्ये सै। 16 क्यूँके प्रभु यीशु आप ए सुर्ग तै उतरैगा; अर लोग उस बखत उसकी ललकार सुणैंगे, अर प्रधान दूत का बोल नै भी सुणैंगे, अर सुर्गदूतां जरिये परमेसवर की तुरही फूँकी जावैगी; अर जो विश्वासी लोग मसीह म्ह मरे सै, वे पैहल्या जी उठैंगे। 17 फेर हम जो जिन्दे अर बचे होडे सां, उनके गेल्या बादळां पै टा लिए जावांगे, ताके आसमान म्ह प्रभु यीशु तै मिला; अर इस तरियां तै हम हमेशा के खात्तर प्रभु के गेल्या रहवांगे। 18 इस तरियां इन बात्तां तै एक-दुसरे ताहीं तसल्ली दिया करो।

## 5



1 पर हे विश्वासी भाईयो, इसकी कोए जरूरत कोनी, के हम यीशु के दोबारा आण के बखत अर काल्लां के बारे म्ह थारे धोरे कुछ लिखां। 2 क्यूँके थम जाणो सां, के परमेसवर के आण का दिन, उस चोर की तरियां होगा, जो रात नै चोरी करण आवै सै, अर थमनै बेरा भी कोनी लागगैगा के चोर कद आवैगा। 3 जिव माणस कहन्दे होंगे, “राज्जी-खुशी सां, अर किमे डर कोनी,” तो उनपै चाणचक विनाश आण पड़ेगा, जिस ढाळ गर्भवती बच्चा जनन के दुख तै बच न्ही सकदी, उससे तरियां वो भी बच न्ही पावेंगे। 4 पर हे विश्वासी भाईयो, थम तो अन्धकार के काम्मां तै अनजाण न्ही सो, के प्रभु के आण का दिन थारे पै चोर की ढाळ आ पड़े। 5 क्यूँके थम सारे चाँदणे की ऊलाद अर दिन की ऊलाद सो; हम ना रात के सां, ना अन्धकार के सां। 6 ज्यांतै हम अविश्वासी माणसां की तरियां सोन्दे ना रहवां, पर जागदे अर चौकन्ने रहवां। 7 क्यूँके जो सोवें सै, वे रात ए नै सोवें सै, अर जो मतवाले होवै सै वे रात ए नै मतवाले होवै सै। 8 पर हम जो दिन के सां, विश्वास अर प्यार की झिलम पैहर के अर उद्धार की आस का टोप पैहर के होशियार रहवां। 9 क्यूँके परमेसवर नै म्हारै ताहीं छो के खात्तर न्ही, पर ज्यांतै ठहराया सै, के हम अपणे प्रभु यीशु मसीह के जरिये उद्धार पावां। 10 वो म्हारै खात्तर इस कारण मरया, के हम चाहे जिन्दा हों, चाहे मर लिये हों, सारे मिलके उससे के गेल्या जिवां। 11 इस कारण एक-दुसरे ताहीं तसल्ली द्यो अर एक-दुसरे ताहीं विश्वास म्ह मजबूत करो, जिसा के थम करो भी सो।



12 हे विश्वासी भाईयो, हम थारे तै बिनती करा सां, के जो थारे म्ह मेहनत करै सै, अर प्रभु म्ह थारे अगुवें सै, अर थमनै शिक्षा देवें सै, उनका आदर करो। 13 अर उनके काम्मां के कारण प्यार के

गेल्या उन ताहीं घणाए आदर कै जोगगा समझो। आप्स म्ह मेळ-मिलाप तै रहो। <sup>14</sup> हे विश्वासी भाईयो, हम थारे तै बिनती करां सां के जो आलसी सै, उन ताहीं समझाओ, डरपोकां ताहीं हिम्मत द्यो, कमजोरां ताहीं सम्भाळो, सारया की ओड़ सहनशीलता दिखाओ। <sup>15</sup> सावधान रहों! कोए किसे तै बुराई कै बदले बुराई ना करै; पर सारी हाण भलाई करण खात्तर त्यार रहवै, आप्स म्ह एक-दुसरे खात्तर अच्छे काम करो, अर दुसरयां खात्तर भी। <sup>16</sup> सारी हाण राज्जी रहो। <sup>17</sup> लगातार प्रार्थना म्ह लागे रहो। <sup>18</sup> हरेक हालात म्ह धन्यवाद करो; क्यूँके थारे खात्तर मसीह यीशु म्ह परमेसवर की याए मर्जी सै। <sup>19</sup> पवित्र आत्मा ताहीं माणसां के जीवन म्ह काम करण तै ना रोक्को। <sup>20</sup> परमेसवर के जरिये जो भविष्यवाणीयाँ माणसां ताहीं बताई गई सै उननै तुच्छ ना जाणो। <sup>21</sup> इन सारी बाततां ताहीं परखो; जो आच्छी सै उसने थाम्बे राक्खो। <sup>22</sup> सारी ढाळ की बुराई तै बचे रहो।



<sup>23</sup> शान्ति देण आळा परमेसवर आप ए थमने पूरी तरियां तै पवित्र करै; अर थारी आत्मा अर प्राण अर देह म्हारै प्रभु यीशु मसीह के बोहड़ण ताहीं पूरे-पूरे अर बेकसूर सुरक्षित रहवै। <sup>24</sup> थारा बुलाण आळा साच्चा सै, अर वो इसाए करैगा। <sup>25</sup> हे विश्वासी भाईयो, म्हारै खात्तर प्रार्थना करो। <sup>26</sup> आप्स म्ह एक-दुसरे ताहीं गळे मिलके मसीह के प्यार म्ह नमस्कार करो। <sup>27</sup> मै थारे ताहीं प्रभु की हुकम देऊँ सूँ के या चिट्ठी सारे विश्वासी भाईयाँ नै पढ़के सुणाई जावै। <sup>28</sup> म्हारै प्रभु यीशु मसीह का अनुग्रह थारे पै होंदा रहवै।

## थिस्सलुनीकियों नगर के माणसां ताहीं प्रेरित पौलुस की दुसरी चिट्ठी

??????

मसीह का दुबारा आण तै जुड़ी उळझन के कारण थिस्सलुनीकियों की कलीसिया म्ह गड़बड़ी के हालात बणे होए थे। थिस्सलुनीकियों के नाम पौलुस प्रेरित की दुसरी चिट्ठी इस विश्वास पै के प्रभु के आण का दिन पैहल्या आ लिया सै। विचार करण खात्तर लिखी गई सै। पौलुस यो बतान्दे होए इस विचार नै सुधारै सै, के मसीह के आण तै पैहल्या दुष्टता अर बुराई अपनी हद पार कर जावैगी। यो रहस्यमय राजा के अधीन म्ह होगा जिसनै “पाप का माणस मतलब नाश का बेटा” कहा गया सै, जो मसीह का विरोध करैगा। प्रेरित याडै इस जरूरत पै जोर देवै सै, के सारे दुखां अर कष्टां का होन्दे होए भी उसके पाठकां नै अपने विश्वास म्ह मजबूती तै बणे रहणा चाहिए, अपनी कमाई खात्तर काम करदे रहणा चाहिए, जिस तरियां पौलुस अर उसके साथी करै थे, अर भलाई करण म्ह लागगे रहणा चाहिए।

रूप-रेखा

जानकारी 1:1,2

बड़ाई अर तारीफ 1:3-12

मसीह के दुबारा आण तै जुड़ी शिक्षा 2:1-17

मसीह चाल-चलण तै जुड़े उपदेश 3:1-15

समापन 3:16-18

??????

1 या चिट्ठी हम पौलुस, सिलवानुस अर तीमुथियुस की ओड़ तै थिस्सलुनीकियों नगर की कलीसिया के विश्वासियां ताहीं लिखां सां, जो म्हारै पिता परमेसवर अर प्रभु यीशु मसीह के सै।  
2 म्हारै पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलदी रहवै।

?????? ?? ???? ?

3 हे विश्वासी भाईयो, थारे बाँरे म्ह हमनै हरेक बखत परमेसवर का धन्यवाद करणा चाहिये, अर यो सही भी सै ज्यातै के थारा विश्वास यीशु मसीह म्ह घणा बढ़दा जावै सै, अर थारा एक-दुसरे के खात्तर आप्स म्ह प्यार घणाए बढ़ता जावै।<sup>4</sup> इस करके हम परमेसवर की कलीसिया के विश्वासियाँ के बाँरे म्ह गर्व करा सां, के जितने थम इम्तिहान अर मुसीबतां तै गुजरो सां, थम उननै धीरज तै सहण लागरे सां, अर थम फेर भी यीशु मसीह पै विश्वास राक्खों सां।

5 अर परमेसवर इन दुखां का इस्तमाल अपने न्याय ताहीं दिखान अर थारे ताहीं अपने राज्य के लायक बणाण खात्तर करैगा, जिस खात्तर थम दुख भी टाओ सो।<sup>6</sup> क्यूँके परमेसवर हमेशा सही न्याय करै सै, ताके जो थमनै दुख देवै सै, उननै बदले म्ह वो दुख देवै।<sup>7</sup> अर थमनै वो इस दुख तै राहत देवैगा, जो थम इब उठाण लागरे सां, अर म्हारे ताहीं भी राहत दे, यो उस बखत होगा जब प्रभु यीशु अपने सामर्थी सुगंदतां के गैल, धधकती होई आग म्ह सुगं तै आवैगा।<sup>8</sup> अर जो परमेसवर नै न्ही पिच्छाणदे, अर जो म्हारे प्रभु यीशु के बारे म्ह सुसमाचार ताहीं न्ही मानते उनतै वो बदला लेवैगा।<sup>9</sup> वे परमेसवर तै हमेशा खात्तर अलग हो जावैगे अर उसकी महिमामय शक्ति म्ह शामिल न्ही हो पावैंगे अर वे अनन्त विनाश का दण्ड पावैंगे।<sup>10</sup> यो उस दिन होवैगा, जब प्रभु यीशु मसीह बोहड़के आवैगा, ताके वो उन माणसां तै महिमा पावै जो उसके कहलावै सै, उन माणसां तै सम्मानित करया जावैगा जो उसपै विश्वास करै सै, अर उस दिन थम भी उनकी तारीफ करण आळा म्ह तै एक होओगे, क्यूँके थमनै उसपै विश्वास करा, जो हमनै थारे ताहीं बताया।<sup>11</sup> ज्यातै हम सारी हाण थारे बाँरे म्ह प्रार्थना भी करा सां, के म्हारा परमेसवर थारे ताहीं इसा करण म्ह काबिल बणावैगा, जिसके

खात्तर उसनै म्हारे ताहीं बुलाया सै, अर वो थारी हरेक भली इच्छा नै सामर्थी रूप तै पूरा करै, अर हर उस काम नै पूरा करा जो थम विश्वास तै करो सों। <sup>12</sup> इस तरियां म्हारे प्रभु यीशु मसीह का नाम थारे जरिये महिमा पावैगा, यो सब कुछ म्हारे परमेसवर अर प्रभु यीशु मसीह के अनुग्रह तै होवैगा।

## 2

~~~~~

<sup>1</sup> हे विश्वासी भाईयो, इब हम अपने प्रभु यीशु मसीह के बोहड़ण, अर जब हम कठे होके उसतै मिलानें तो उस दिन कै बारे म्ह थारे ताहीं बताणा चाहूँ सँ। <sup>2</sup> थम किसे भविष्यवाणी या किसे उपदेश या किसे चिट्ठी नै म्हारी ओड़ तै लिखी होई मानकै चाणचक बोखळा ना जाइयो, अर ना ए अपने-आप म्ह धरवाईयो के परमेसवर का दिन पैहले ए आ लिया सै। <sup>3</sup> किसे ढाळ तै भी किसे कै धोक्खे म्ह ना आइयो, क्यूँके प्रभु यीशु के आण तै पैहले इसा बखत आवैगा, जब भोत सारे लोग परमेसवर के विरोधी हो जावैगे, अर वो अधर्मी माणस यानिके विनाश का बेट्टा दिखाई देवैगा, जिस ताहीं परमेसवर सदा खात्तर खतम कर देवैगा। <sup>4</sup> वो अधर्मी माणस परमेसवर अर उन दुसरी चिज्जां का विरोध करैगा। जिनकी लोग भगति करै, वो दावा करैगा के वो उनतै भी घणा बड़ा सै, उरै ताहीं के वो परमेसवर के मन्दर म्ह बैठके अपने-आप ताहीं ईश्वर बतावैगा। <sup>5</sup> के थमनै याद कोनी के जब मै थारे धारै था, तो थारे तै ये बात कह्या करूँ था? <sup>6</sup> वो जो अधर्मी माणस इब ताहीं दिख्या न्ही सै, क्यूँके इसा कुछ तो सै जिसनै उस ताहीं रोक राख्या सै, पक्का थम जाणो सों, के वो के सै। इस करके जब परमेसवर का बखत आवैगा तो वो अधर्मी माणस दिख जावैगा। <sup>7</sup> अर उस अधर्मी माणस की शक्ति पैहले तै गुप्त रूप तै इस दुनिया म्ह काम करण लागरी सै, पर वो सै जो उस शक्ति नै रोकण लागरया सै, अर जब ताहीं वो दूर ना हो जावै तब तक वो इस ताहीं रोकणा जारी राखैगा। <sup>8</sup> फेर वो अधर्मी माणस दिख जावैगा, पर बाद म्ह जब प्रभु यीशु आवैगा तो वो अपने मुँह की फूँक तै अधर्मी माणस ताहीं मार देवैगा, अर अपने आगमन के तेज तै भस्म करैगा। <sup>9</sup> वो अधर्मी माणस शैतान की शक्ति गैल आवैगा, वो सारे ढाळ के झूठे चमत्कार, अर अचम्भे के काम करैगा, जो हमनै यो सोचण कै खात्तर मजबूर करैगा के योए परमेसवर सै जो इननै करण लागरया सै। <sup>10</sup> वो सारी ढाळ के बुरे तरिकके अपनावैगा उन माणसां खात्तर जो अनन्त विनाश के राह की ओड़ जावै सै, क्यूँके उननै सच्चाई पै विश्वास कोनी करया जिसतै उनका उद्धार हों सके सै। <sup>11</sup> इस्से कारण परमेसवर उन माणसां म्ह एक भटकाण आळी शक्ति नै भेज्जै सै, जो उन ताहीं सच्चाई तै दूर ले जावैगी, ताके वे झूठ पै विश्वास करै। <sup>12</sup> परमेसवर उन सब का न्याय करैगा जिननै सच्चे सन्देश (यीशु मसीह के बारे म्ह) विश्वास कोनी करया, अर जिननै अधर्म के काम्मां तै प्यार करया।

~~~~~

<sup>13</sup> हे विश्वासी भाईयो, उरै थारे खात्तर परमेसवर कै स्याम्ही म्हारा हमेशा धन्यवाद देणा सही सै, थम प्रभु के प्यारे सों, क्यूँके परमेसवर नै थारे ताहीं दुनिया की शरूआत तै ए उद्धार के खात्तर चुण लिया सै। ताके वो थमनै पवित्र आत्मा के काम के जरिये पवित्र बनावै, अर यीशु मसीह के सच्चे सुसमाचार पै विश्वास करण के जरिये थमनै बचाले। <sup>14</sup> म्हारे सुसमाचार के जरिये उसनै थारे ताहीं बचाण खात्तर बुलाया सै, ताके थम उसकी महिमा म्ह हिस्सा ले सको, जो परमेसवर नै म्हारे प्रभु यीशु मसीह ताहीं दी सै। <sup>15</sup> ज्यातै हे विश्वासी भाईयो, मजबूत रहो, अर जो-जो शिक्षा थमनै चाहे वचन या चिट्ठी कै जरिये म्हारे जरिये सीक्खी सै, उननै थाम्बे राखो।

<sup>16</sup> हम प्रार्थना करां सां के खुद म्हारा प्रभु यीशु मसीह, अर म्हारा पिता परमेसवर, जिसनै म्हारे तै प्यार करया अर अनुग्रह तै अनन्त शान्ति अर घणी बढ़िया उम्मीद देई सै, <sup>17</sup> थारे मनां म्ह शान्ति दे अर थमनै हरेक आच्छे काम अर वचन म्ह मजबूत करै।



## 3

\*\*\*\*\*

1 इस करके, हे विश्वासी भाईयो, म्हारे खात्तर प्रार्थना करया करो के प्रभु के बारे म्ह सन्देश भोत तावळा दुसरी जगहां म्ह भी सुणाया जा सके, अर लोग उसपै विश्वास करैगें जिंसा थम विश्वास करो सों। 2 या भी प्रार्थना करया करो के परमेसवर हमनै बैरी अर बुरे माणसां के जरिये दिए जाण आळे नुकसान तै भी बचावै, क्यूँके भोत-से लोग सुसमाचार पै विश्वास कोनी करते। 3 पर प्रभु भरोस्सेमंद सै, वो थमनै अन्दरूनी रूप तै मजबूत करेगा अर उसकी रक्षा करेगा, ताके बुराई, शैतान थमनै नुकसान ना पंहुचा सकै। 4 हमनै प्रभु म्ह थारे उप्पर भरोस्सा सै हमनै जो कुछ थारे ताहीं करण खात्तर कहाा सै थम उसाए करण लागरे सों अर करते भी रहोगे। 5 हम प्रार्थना करा सां के प्रभु यीशु थमनै यो समझण कै काबिल बणावै के परमेसवर थमनै कितना प्यार करै सै, अर धीरज राखणा सिखावै जिंसा मसीह राक्खै सै।

\*\*\*\*\*

6 हे विश्वासी भाईयो, प्रभु यीशु मसीह नै जो हक म्हारे ताहीं दिया सै, उसके कारण हम थमनै हुकम देवां सां, के थम हरेक इसे विश्वासी भाई तै न्यारे रहां जो कोए काम न्ही करदा, अर जो शिक्षा उसनै म्हारे तै पाई उसके मुताबिक न्ही करदा। 7 क्यूँके थम सारे अपणे-आपने आच्छी तरियां जाणो सों, के थमनै उससे तरियां जीणा चाहिए जिस तरियां हम जिवां सां, क्यूँके जिव हम थारे बिचाळे रहण लागरे थे, तो हम आलसी कोनी थे। 8 अर किसे की रोटी मुफ्त म्ह कोनी खाई, मेहनत अर कष्ट तै दिन-रात काम-धन्धा करा थे, ताके हम अपणी जरूरतां खात्तर थारे भरोस्से ना रह्हां। 9 हालाकि थारे तै आर्थिक मदद पाण का म्हारा हक बणै सै, फेर भी हम कड़ी मेहनत करा सां, पर ज्याते के अपणे-आप ताहीं थारे खात्तर आच्छा नमूना बणावां ताके थम भी म्हारे जिंसा जीवन जिओ। 10 क्यूँके जिव हम थारे धौरे थे, तब भी योए कहाा करा थे, के जै कोए काम करणा ना चाहवै\* तो उसका खाण का भी हक कोनी। 11 हम सुणां सां के कुछ माणस थारे बिचाळे सुस्त सै अर वे कोए काम न्ही करदे, पर दुसरयां कै काम म्ह रुकावट करै सै, अर उन ताहीं भी काम करण तै रोक्कै सै। 12 प्रभु यीशु मसीह नै म्हारे ताहीं हक दिया सै, अर हम थमनै भी समझावां सां, के चुपचाप काम करके अपणी ए कमाई तै रोटी खाया कर। 13 पर हे विश्वासी भाईयो, थम खुद वो काम करण तै पाच्छै, ना हटियो, जो सही अर भले सै। 14 जै कोए म्हारी इस चिट्ठी म्ह दी गई हिदायत† नै कोनी मान्ने तो सब जाण ल्यो के वो कौण सै, अर उसकी संगति ना करो, जिसतै वो शर्मिन्दा होवै। 15 तोभी उस ताहीं दुश्मन मतना समझो, पर विश्वासी भाई जाणकै समझाओ।

\*\*\*\*\*

16 मै प्रार्थना करूँ सूँ, के प्रभु जो शान्ति का चोवा सै आप ए थारे ताहीं सारी हाण अर हरेक तरियां तै शान्ति देवै। प्रभु थम सारया कै साथ रहवै। 17 मै, पौलुस, अपणे हाथ तै नमस्कार लिक्खूँ सूँ। इस्से तरियां तै मै अपणी सारी चिट्ठियाँ के अन्त म्ह न्युए लिक्खूँ सूँ, ताके थम जाण ल्यो के ये मेरी ओड़ तै सै। 18 मै प्रार्थना करूँ सूँ, के म्हारे प्रभु यीशु मसीह का अनुग्रह थम सारया पै होंदा रहवै।

\* 3:10 3:10 जै कोए काम करणा ना चाहवै जो कोए आलसी सै

† 3:14 3:14 हिदायत निर्देश

## तीमुथियुस के नाम प्रेरित पौलुस की पैहली चिट्ठी

???????

तीमुथियुस एक जवान विश्वासी था, जो एशिया माइनर का रहणीया था, उसकी माँ यहूदी अर पिता यूनानी था। वो पौलुस के प्रचार के काम म्ह उसका साथी अर मददगार बणग्या था। तीमुथियुस के नाम पौलुस की पैहली चिट्ठी तीन खास बाततां पै विचार करण खात्तर लिखी गई सै। सब तै पैहल्या, या चिट्ठी कलीसिया म्ह झूट्टी शिक्षा के खिलाफ एक चेतावनी सै। या शिक्षा, जो के यहूदी अर गैर यहूदी विचारां की मिलावट थी, इस सोच पै आधारित थी के भौतिक संसार ए बुरा सै। अर एक आदमी खास गुप्त ज्ञान अर थोड़े-से रीति-रिवाज, जिस तरियां कुछ खाण की चीज न्ही खाणा अर ब्याह न्ही करणा भोत सी बाततां के मानण तै ए मुक्ति मिल सकै सै। इस चिट्ठी म्ह कलीसिया के प्रबन्ध अर आराधना तै जुड़े सुझाव भी सै, साथ म्ह चाल-चलण का भी जिक्र सै जो कलीसिया के अगुवां अर सहायकां खात्तर जरूरी सै। आखर म्ह, तीमुथियुस तै या सलाह दी सै के वो किस तरियां यीशु मसीह का एक आच्छा सेवक बण सकै सै, अर कई और भी विश्वासी झुण्डां के खात्तर उसकी के-के जिम्मेदारी सै।

रूप-रेखा

जानकारी 1:1,2

कलीसिया अर इसके अगुवां तै जुड़ी सलाह 1:3-3:16

तीमुथियुस ताहीं उसके काम तै जुड़ी सलाह 4:1-6:21

???????

1 या चिट्ठी पौलुस की ओड़ तै सै, जो यीशु मसीह का प्रेरित सै, अर परमेसवर जो म्हारा उद्धारकर्ता सै, अर यीशु मसीह जो म्हारी आस सै, उसने मेरे ताहीं प्रेरित होण खात्तर बुलाया सै। 2 मे या चिट्ठी तीमुथियुस नै लिखूं सूं, मसीह पै विश्वास करण के नाते तू मेरे आत्मिक बेट्टे की तरियां सै, मे प्रार्थना करूं सूं, के पिता परमेसवर, अर म्हारे प्रभु मसीह यीशु की ओड़ तै तन्ने अनुग्रह, दया अर शान्ति मिलदी रहवै।

?????? ??????? ?? ??????? ???????

3-4 जिसा के तू तीमुथियुस जाणै सै, इफिसुस नगर म्ह कई माणस सै जो झूट्टी शिक्षा देवै सै, वे माणसां ताहीं लगातार झूट्टी कहाणियाँ अर पूर्वजां की लम्बी वंशावलियाँ नै सिखावै सै, जिसा के मन्ने मकिडोनिया जान्दे बखत तेरे तै कह्या था, के इफिसुस नगर म्ह रहकै उन ताहीं कह के इसी शिक्षा ना देवै, जब वे इसी शिक्षा देवै सै, तो माणसां म्ह विवाद पैदा होवै सै, इसका नतिज्जा यो सै के ये शिक्षक परमेसवर का काम न्ही करते जो परमेसवर नै उन ताहीं दिया सै, यो तो सिर्फ मसीह पैए विश्वास करण के जरिये करया जा सकै सै। 5 योए म्हारे हुकम का मकसद सै, के थम सच्चे मन, शुद्ध अन्तरात्मा अर सच्चे विश्वास तै एक-दुसरे के गेल्या बिना कपट के प्यार करो। 6 झूट्टे शिक्षकां नै इन सारी चिज्जां ताहीं छोड़ दिया सै, अर सिर्फ बेकार की चिज्जां पै बातचीत करै सै। 7 अर वकील तो बणणा चाहवै सै, पर जो बात कहवै अर जिन ताहीं मजबूती तै बोल्लै सै, उन ताहीं समझदे भी कोनी। 8 हम जाणा सां के मूसा के नियम-कायदा नै जै सही तरिके तै सिखावै तो वो भला सै। 9 हम यो जाणा सां, के मूसा नबी के नियम-कायदे धर्मी माणस के खात्तर कोनी, पर उन माणसां खात्तर सै जो परमेसवर के नियम-कायदा नै अणदेखा करै सै, अर उन ताहीं मानते कोनी, अर उन माणसां खात्तर जो परमेसवर की आराधना कोनी करते, अर जो सारी हाण पाप करते रहवै सै, जो माणस दुष्ट सै, अर परमेसवर का आदर कोनी करते, अर जो अपणे माँ-बाप नै, अर दुसरयां नै मार देवै सै। 10 जारी करणीये, माणसां गैल कुकर्म करणीये, माणस नै बेचण आळे, झूट बोल्लण

आळे, झूट्टी कसम खाण आळे, अर इनके अलावा खरे उपदेश के सारे बिरोधियाँ के खात्तर बणाई गई सै। <sup>11</sup> या सही शिक्षा उस सुसमाचार पै आधारित सै, जो के धन्य परमेसवर की महिमा के बारे म्ह सै, जिसकी मेरै ताहीं प्रचार करण की जिम्मेदारी दी गई सै।

~~~~~

<sup>12</sup> मै अपणे प्रभु मसीह यीशु का जिसने मेरै ताहीं सामर्थ दी सै, धन्यवाद करूँ सूँ, के उसने मेरै ताहीं विश्वास जोगगा समझके अपनी सेवा के खात्तर चुण्या। <sup>13</sup> विश्वास करण तै पैहले, मै बुराई करण आळा, सताण आळा, अर अन्धेर करण आळा था, तोभी मेरै पै दया होई, क्यूँके यीशु मसीह पै विश्वास करण तै पैहले मन्ने अविश्वास अर बिना सोच्चे-समझे ये काम करे थे। <sup>14</sup> अर परमेसवर का अनुग्रह मेरे पै भोत-ए घणा होया, उसने मेरे ताहीं विश्वास अर प्यार दिया, क्यूँके मै मसीह यीशु म्ह सूँ। <sup>15</sup> या बात साच्ची अर हरेक तरियां तै मानण जोगगी सै, के मसीह यीशु पापियाँ का उद्धार करण खात्तर दुनिया म्ह आया, जिन म्ह सारया तै बड़ड़ा पापी मै सूँ। <sup>16</sup> परमेसवर नै अपनी दया मेरे पै दिखाई, उसने यो इस कारण करया ताके मुझ माणस के जरिये, जिसने दुसरे माणसां तै ज्यादा बुरे काम करे सै, मसीह यीशु दिखा सकै सै, के वो मेरे खात्तर कितना धीरज राक्खे सै, या उन माणसां खात्तर एक मिसाल सै जो बाद म्ह उसपै विश्वास करैगें, अर वे अनन्त जीवन पावैगें। <sup>17</sup> इब राजा जो सदा खात्तर जिन्दा सै, उस अविनाशी, अनदेक्खे, एकमात्र परमेसवर का आदर अर उसकी महिमा युगानुयुग होंदी रहवै। आमीन। <sup>18</sup> हे बेट्टे तीमथियुस, मै यो हुकम सौँपूँ सूँ, जो उन भविष्यवाणीयाँ के मुताबिक सै, जो पैहल्या तेरे बारे म्ह करी गई थी, उनके मुताबिक एक सिपाही की तरियां आच्छी लड़ाई नै लड़ता रह। <sup>19</sup> थम मसीह पै लगातार विश्वास करते रहो, ताके थारी अन्तरात्मा साफ रहवै, कई माणसां नै अपनी साफ अन्तरात्मा ताहीं त्याग दिया सै, अर उनकी मसीह पै विश्वास करण की काबलियत भी खतम होगी सै, अर इब वे विश्वास भी कोनी करते। <sup>20</sup> उन म्ह हूमिनयुस अर सिकन्दर भी शामिल सै, जिन ताहीं मन्ने शैतान की बुरी शक्तियाँ के हाथ सौँप दिया सै, ताके वे परमेसवर की बुराई करणा छोड़ दे।

## 2

~~~~~

<sup>1</sup> इब मै सारया तै पैहल्या यो आग्रह करूँ सूँ, के बिनती, प्रार्थना, निवेदन, अर धन्यवाद सारे माणसां के खात्तर करे जावै। <sup>2</sup> राजयां अर सारे ऊँच्चे ओट्टा आळा के खात्तर ज्यातै ताके वो हमने आराम अर चैन के गेल्या सारी भगति अर गम्भीरता तै जीवन बिताण देवै। <sup>3</sup> इसी प्रार्थना सही सै अर म्हारे परमेसवर उद्धारकर्ता नै आच्छी लागै सै। <sup>4</sup> वो चाहवै सै के हरेक इन्सान सच्चाई के ज्ञान नै समझ ले अर वे बच जावै। <sup>5</sup> क्यूँके परमेसवर एके सै, अर परमेसवर अर माणसां के बीच म्ह भी एक ए बिचोल्ला सै, जो मसीह यीशु सै, जो मानव रूप धारण करके आया। <sup>6</sup> मसीह नै अपने-आप ताहीं बलिदान कर दिया, ताके लोगां नै पाप अर मौत की शक्ति तै आजाद करै। मसीह की मौत के जरिये, परमेसवर नै यो सबूत दिया के सही बखत पै सब लोग बच जावै। <sup>7</sup> इस कारण तै परमेसवर नै मेरे ताहीं सुसमाचार का प्रचारक अर प्रेरित चुण्या सै, उसने मेरे ताहीं गैर यहूदियाँ ताहीं विश्वास अर सच्चाई का सन्देश सुणाण आळा बणाया सै, मै झूट न्ही बोल्दा, सच कहूँ सूँ।

<sup>8</sup> ज्यातै मै चाहूँ सूँ, के हरेक जगहां सभाओं म्ह माणस जो पवित्र जिन्दगी जीवै सै, वे हाथ्यां नै ठाके बिना छोड़ो अर विवाद के परमेसवर तै प्रार्थना करै। <sup>9</sup> इस्से तरियां मै चाहूँ सूँ के मसीह बिरबानियाँ नै भी सही तरियां के लत्ते पैहरणे चाहिए, जो के सादे हो, ना के भड़कीले। ना के खूबसूरती तै बाळ गूँथणा, ना सोन्ने, मोतियाँ अर घणे महुँगे लत्यां तै अपने-आपने सवारणा। <sup>10</sup> पर इसके बजाए वो लोगां की भलाई करै, जो उनने खूबसूरत बणावे सै, क्यूँके परमेसवर की भगति करण आळी बिरबानियाँ के खात्तर योए सही सै। <sup>11</sup> जिब कोए, बिश्वासियाँ ताहीं सिखाण लागरया हो तो, बिरबानियाँ नै चुपचाप रहके पूरी शान्ति तै सिखाणा चाहिये। <sup>12</sup> मै बिरबानियाँ ताहीं मर्दां नै सिखाण

या उसपै हावी होण की इजाजत कोनी देंदा, जिव थम आराधना म्ह मिलो हो, तो बिरबानियाँ नै चुप रहणा चाहिए। <sup>13</sup> मै इस करके कहूँ सूं, क्यूँके पैहल्या आदम, उसके पाच्छे, हव्वा बनाई गई। <sup>14</sup> आदम साँप के जरिये भकाया न्ही गया, पर बिरबान्नी भकाई म्ह आके कसूरवार होई। <sup>15</sup> तोभी बिरबान्नी बाळक पैदा करण कै जरिये उद्धार पावैगीं, जै वा मसीह पै बिश्वास करै, दुसरे तै प्यार, अर पवित्र अर सही बरताव करै।

### 3

?????? ???? ?????

<sup>1</sup> या बात सच्ची सै, के जो कलीसिया का अगुवां बणणा चाहवै सै, तो वो भले काम की चाह करै सै। <sup>2</sup> यो जरूरी सै के अगुवां नै बेकसूर, अर एक ए बिरबान्नी का धणी, संयमी, सुशील, सभ्य, मेहमान का आदर-सत्कार करणीया, अर सिखाण म्ह सही होणा चाहिए। <sup>3</sup> दारूबाज या मारपीट करण आळा ना हो, बल्के नरम हो, अर ना रोळा करण आळा, अर ना धन का लोभ्मी हो। <sup>4</sup> अपने घर का सही इन्तजाम करण आळा हो, अर उसनै अपने बाळ-बच्चां ताहीं हरेक काम म्ह आदरपूर्वक उनका कहणा मानना सिखाणा चाहिए। <sup>5</sup> जिव कोए अपने घर का ए इन्तजाम करणा ना जाणदा हो, तो परमेसवर की कलीसिया की रुखाळी किस ढाळ करैगा? <sup>6</sup> वो नया बिश्वासी ना हो, इसा ना हो के घमण्ड करके शैतान की तरियां सजा भुगतै। <sup>7</sup> अर कलीसिया के बाहर के माणसां म्ह भी वो सम्मान लायक हो, ताके वो बदनामी अर शैतान के फंदे म्ह ना फँस जावै।

?????? ???? ???? ?

<sup>8</sup> उससे तरियां ए कलीसिया के सेवकां नै भी गम्भीर होणा चाहिये, दोगली बात करण आळा, दारूबाज अर नीच कमाई का लोभ्मी ना हो। <sup>9</sup> उनके धौरै साफ अन्तरात्मा हो, क्यूँके वे मानते रहवैगे, के परमेसवर नै जो शिक्षाएँ जाहिर करी वे सच सै। <sup>10</sup> अर ये इन सारी बाततां म्ह पैहले परखे जावै, फेर जै बेकसूर लिंकडै तो सेवक का काम करै। <sup>11</sup> इससे तरियां तै बिरबानियाँ नै भी गम्भीर होणा चाहिये, दोष लाण आळी ना हों, पर सचेत अर सारी बाततां म्ह बिश्वास जोगगी हों। <sup>12</sup> कलीसिया का सेवक एक ए बिरबान्नी का धणी हों अर बाळ-बच्चां अर अपने घरां का आच्छा इन्तजाम करणा जाणदे हों। <sup>13</sup> क्यूँके जो कलीसिया के सेवक का काम आच्छी ढाळ तै कर सके सै, वो माणसां म्ह सम्मान लायक होगा, पर मसीह यीशु म्ह अपने बिश्वास के बारे म्ह वो बड़ी दिलेरी तै बोल्लण आळा हो।

?????? ???? ?

<sup>14</sup> मे तेरे धारे तावळा आण की आस करते होए भी, ये बात तेरे तै ज्यातै लिक्खूँ सूं, <sup>15</sup> ताके जै मेरे ओड़ै आण म्ह देर हो भी जावै, तो मै चाहूँ सूं, थम इस बात नै जाण ल्यो, के परमेसवर का परिवार जो के एक कलीसिया सै, उस म्ह हमने एक-दुसरे तै किसा बरताव करणा चाहिए। जिन्दे परमेसवर की कलीसिया के माणस सच्चाई की शिक्षा की नीम अर खम्भे की तरियां सै। <sup>16</sup> हम दावे के साथ कह सका सां, के परमेसवर नै जो शिक्षाएँ जाहिर करी सै, वो पूरी तरियां तै सच सै, यानी, वो जो देह म्ह जाहिर होया, वो पवित्र आत्मा के जरिये परमेसवर का बेटा साबित होया, अर उस ताहीं सुगंदूतां नै देख्या, दुनिया के माणसां नै उसपै बिश्वास करया, दुसरी जात्तां म्ह उसका प्रचार होया, अर महिमा म्ह उप्पर ठाया गया।

### 4

?????? ???? ?

<sup>1</sup> पर पवित्र आत्मा साफ तौर पै कहवै सै, के अन्त के दिनां म्ह कुछ लोग मसीह शिक्षा ताहीं मानना छोड़ देवैगे, वो ओपरी आत्मायाँ ताहीं अपना लेवैगे जो उन ताहीं भटका देवैगी, अर वो उस झूटठी शिक्षा पै मन लगावैगे जो ओपरी आत्मा की ओड़ तै सै। <sup>2</sup> वे पाखण्डी झूटठे लोग सै जो झूटठी शिक्षा सिखावै सै, उनकी अन्तरात्मा, जो सही या गलत के बीच का फैसला करै सै, वा मर

चुकी सै, जिस तरियां के एक गरम लोहे नै अन्तरात्मा ताहीं जळा दिया हो।<sup>3-4</sup>ये झूट्टे लोग सिखावै सै, के ब्याह करणा अर कई चीज जो खाण-पीण की सै, वे गलत सै, पर परमेसवर नै इन खाण-पीण की चिज्जां ताहीं बिश्वासियाँ खातर बणाया सै, जो सच्ची शिक्षा नै जाणै सै के परमेसवर की बणाई हरेक चीज आच्छी सै, कोए भी चीज नकारन की कोनी, जै उस ताहीं धन्यवाद देकै खावै।<sup>5</sup>क्यूँके परमेसवर के वचन अर प्रार्थना कै जरिये सब कबूल हो जावै सै।

???? ???? ?? ????? ???? ?

<sup>6</sup>जै तू लगातार बिश्वासी भाई-भाणा नै याद दुआन्दा रहवै, के जो मननै निर्देश दिए सै, अर तू जो बिश्वास अर आच्छे शिक्षा के सन्देस के जरिये मजबूत बणाया गया सै, जिसका तन्नै पालन करया सै, तो तू यीशु मसीह का एक आच्छा सेवक सै।<sup>7</sup>सांसारिक अर मनघडन्त कहाँनियाँ तै दूर रहों, अर धम अपणे-आपने ईश्वरीय जीवन जीण खातर अनुशासित कर ल्यो।<sup>8</sup>क्यूँके देह की कसरत तै माड़ा सा फायदा होवै सै, पर भगति सारी बात्तां कै खातर फैयदेमन्द सै, क्यूँके यो इस धरती पै जिन्दा रहन्दे होए अर मरण कै बाद भी एक ईनाम का वादा सै।<sup>9</sup>या बात सच्ची अर हरेक ढाळ तै मानण जोगगी सै।<sup>10</sup>क्यूँके हम मेहनत अर कोशिश इस्से खातर करा सां के म्हारी आस उस जिन्दे परमेसवर पै सै, जो सोरे माणसां अर खास करके अपणे बिश्वासियाँ का उद्धार करणीया सै।

<sup>11</sup>बिश्वासियाँ नै ये बात करणा अर उननै मानना सीखा।<sup>12</sup>छोट्टी उमर के कारण कोए तन्नै तुच्छ ना समझै पर वचन, अर चाल-चलण, अर प्यार, अर बिश्वास, अर पवित्रता म्ह बिश्वासियाँ के खातर बढ़िया नमूना बण जा।<sup>13</sup>जिब ताहीं मै न्ही जाऊँ, जिब तक बखत लिकाडकै पवित्र ग्रन्थ बिश्वासियाँ ताहीं पढकै सुणा, अर उन ताहीं उत्साहित अर वचन सिखाण म्ह लगया रह।<sup>14</sup>उस आत्मिक वरदान कै बारे म्ह, जो तेरे म्ह सै, अर भविष्यवाणी कै जरिये कलीसिया के अगुवां के हाथ धरदे बखत तन्नै मिल्या था, निश्चिन्त मतना रह।<sup>15</sup>इन बात्तां नै सोचदा रह अर इन्नै म्ह अपना ध्यान लाये रह, ताके तेरी बढ़ोतरी सारया पै दिख जावै।<sup>16</sup>यो ध्यान राक्खों के धम किस तरियां जिन्दगी जिओ सों, अर के सिखाओ सों। इन बात्तां पै स्थिर रह, क्यूँके इसा करदा रहवैगा तो तू अपणे अर अपणे सुणण आळा कै खातर भी उद्धार का कारण होगा।

## 5

?????????????? ?? ????? ????????????

<sup>1</sup>किसे वूढ़े ताहीं छो म्ह ना धमका, पर उस ताहीं अपना बाप जाणकै समझा दे, अर जवानां नै अपना भाई जाणकै समझा दे।<sup>2</sup>वूढ़ी विरवानियाँ नै माँ जाणकै, अर जवान विरवानियाँ नै पूरी पवित्रता तै भाण मानकै समझा दे।

<sup>3</sup>उन बिधवा विरवानियाँ का, जिनकी देखभाळ करणीया कोए कोनी उनका आदर कर।<sup>4</sup>जै किसे बिधवा के बाळक या नात्ती-पोत्ते हों, तो वे सब तै पैहल्या अपणे ए कुणवे कै प्रति अपणे फर्ज नै पूरा करके परमेसवर का भगत बणणा सीखै, अर अपणे माँ-बाप के उपकारां का फळ दे, क्यूँके यो परमेसवर नै भावै सै।<sup>5</sup>जो सच म्ह ए बिधवा सै, अर उसका मदद करण आळा कोए न्ही, वा परमेसवर पै आस राक्खै सै, अर दिन-रात विनती अर प्रार्थना म्ह लागगी रहवै सै।<sup>6</sup>पर जो बिधवा भोगविलास म्ह पड़गी, वा जिन्दे जी मरगी सै।<sup>7</sup>इन बात्तां का भी हुकम दिया कर ताके कोए उनपै दोष ना लगा सकै।<sup>8</sup>पर जै कोए अपणे रिश्तेदारां की अर खास करके अपणे कुणवे की फिकर ना करै, तो वो बिश्वास तै मुकर गया सै अर अबिश्वासी तै भी बुरा बण गया सै।

<sup>9</sup>उस्से बिधवा का नाम लिख्या जावै जो साठ साल तै उप्पर की हो, अर जो एके धणी की बिश्वास लायक रही हों।<sup>10</sup>अर भले काम म्ह आच्छी नाम्मी रही हो, जिसनै बाळकां का पालन-पोषण, मेहमानां की सेवा, परमेसवर के माणसां की सेवा, दुखियाँ की मदद करी हो, अर हरेक भले काम म्ह मन लगाया हो।<sup>11</sup>पर जवान बिधवा विरवानियाँ के नाम ना लिखिए, क्यूँके जिब उनकी शारीरिक अभिलाषा मसीह की सेवा करण तै बढ़कै हो जावै सै, तो वा ब्याह करणा चाहवै सै।<sup>12</sup>दुबारे ब्याह


करके, वे खुद कसूरवार बणैगी, क्यूँके उननै अपणे पैहलडे वादे ताहीं जो के ब्याह ना करण का था, उस ताहीं तोड़ दिया सै। 13 इसके गेल्या ए गेल्या वे घर-घर हाँड के आलसी होणा सिक्खै सै, अर सिर्फ आलसी न्ही पर बकबक कर दी रहै सै, अर दुसरयाँ के काम म्ह भी दखल देती रहवै सै, अर चुगली कर दी रहवै सै। 14 ज्यातै मै न्यु चाहूँ सूँ के जवान बिधवां ब्याह करै, अर बाळक जामै अर घर-बार सम्भाळै, अर किसे बिरोधी नै बदनाम करण का मौक्का ना देवै। 15 मै इस करके कहूँ सूँ, के उन म्ह तै कईयाँ नै प्रभु का कहणा मानना छोड़ दिया सै, अर श्रैतान के पाच्छे चालणा शुरु कर दिया सै। 16 जै किसे विश्वासी परिवार म्ह कोए बिधवां हों, तो वैए उनकी मदद करै के कलीसिया पै बोझ ना हो, ताके कलीसिया उनकी मदद कर सके जो साच्चए बिधवां सै।

17 कोए भी कलीसिया का अगुवां जो अपणा काम आच्छी तरियां करै सै उस ताहीं बड़ा सम्मान अर पर्याप्त वेतन पाण के लायक मान्या जाणा चाहिए, खासकर जो लोग परमेसवर के सन्देश नै पढ़ाण अर प्रचार करण म्ह कड़ी मेहनत करै सै। 18 क्यूँके पवित्र ग्रन्थ म्ह लिख्या सै, “नाज लिकाड़ण आळे बळध का मुँह ना बाँधिये,” क्यूँके “मजदूर अपणी मजदूरी का हुकदार सै।” 19 किसे भी कलीसिया के अगुवै के बिरुध दो या तीन गवाह के बिना कोए भी उसनै दोषी ना मान्नो। 20 पाप करण आळा नै सारया के स्याम्ही समझा दे, ताके बाक्की के विश्वासी भी डरै। 21 परमेसवर, अर मसीह यीशु अर छाँटि होड़ सुर्गदूतां नै मौजूद जाणकै मै तन्नै हुकम देऊँ सूँ, के बिना भेदभाव के तू इन हुकमां नै पूरा कर, अर सब कै गैल एक जिसा बरताव कर। 22 किसे ताहीं जल्दबाजी म्ह अगुवां ना बणाईये, अर जै तू इसा करै सै, तो उसका जिम्मेदार भी तू खुद होवैगा, तू यो तय करके मै कोए पाप न्ही करूँगा।

23 आण आळे बखत म्ह सिर्फ पाणी ए का पीण आळा ना रह, पर अपणे पेट के अर अपणे बार-बार बीमार होण के कारण माड़ा-माड़ा अंगूर का रस भी काम म्ह ल्याया कर। 24 मै कहूँ सूँ, के किसे ताहीं जल्दबाजी म्ह अगुवां ना बणाईये, क्यूँके कई लोग सब कै स्याम्ही पाप करै सै, इसतै पैहले के उनका न्याय हो, विश्वासियाँ कै स्याम्ही वे पापी बण चुके सै, दुसरे माणसां के पाप दिखाई न्ही देन्दे, पर पाच्छे नजर आवै सै। 25 उससे तरियां तै जिव माणस आच्छे काम करै सै तो दुसरे माणस उसके काममां नै देखै सै, अर जै इब न्ही दिखदे तो बाद म्ह वे दिख जावै सै।

## 6

1 जितने विश्वासी गुलाम सै, वे अपणे-अपणे माल्लिक का आदर करै, ताके दुसरे लोग परमेसवर की अर म्हारी शिक्षा की बुराई ना करै। 2 जिनके माल्लिक विश्वासी सै, वे अपणे माल्लिकां का अपमान ना करै, यो जाणकै के इब तो वे उनके विश्वासी भाई सै, बल्के वे उनकी सेवा और भी ज्यादा मन तै करै, क्यूँके वे जो सेवा तै फायदा ठाण लागरे सै, अर उननै वे मसीह म्ह अपणे भाईयाँ की तरियां प्यार करै, इन बाततां का उपदेश देँदा रह, अर उन ताहीं मानण खात्तर भी उत्साहित करदा रह।



3 जै कोए झूठी शिक्षा देवै सै अर खरी शिक्षा नै न्ही मानता, यानिके म्हारै प्रभु यीशु मसीह की शिक्षा अर हुकम नै जिसतै परमेसवर नै महिमा मिलै सै। 4 तो वो घमण्डी सै, अर किमे न्ही जाण्दा, बल्के इसा माणस फालतू के मुँदे अर शब्दां के बारै म्ह बहस करणा चाहवै सै, जिसतै जळण, अर झगड़े, अर बुराई की बात, भुन्डे-भुन्डे शक, 5 अर उन माणसां म्ह बेकार रगड़े-झगड़े पैदा होवै सै, जिनकी अकल खराब हो जा सै, अर वे सच तै दूर हो गये सै, जो समझे सै, के परमेसवर की सेवा करणा कमाई का साधन सै। 6 पर यो म्हारे खात्तर भला सै, के हम वो करा जिसतै परमेसवर खुश होवै सै, अर उससे म्ह सबर करा जो वो म्हारे ताहीं देवै सै। 7 क्यूँके ना हम दुनिया म्ह किमे ल्याए सां, अर ना किमे लेके जा सकां सां। 8 जै म्हारै धरै खाण अर पैहरण नै हो, तो इन्ने म्ह सबर करणा चाहिये। 9 पर जो साहूकार होणा चाहवै सै, वे हर तरियां के पाप करण के जरिये धोक्ख म्ह पड़े सै,



## तीमुथियुस के नाम प्रेरित पौलुस की दुसरी चिट्ठी



तीमुथियुस के नाम पौलुस प्रेरित की दुसरी चिट्ठी, पौलुस के एक जवान साथी अर मदद करणीये के रूप म्ह काम करणीया तीमुथियुस ताहीं पौलुस की व्यक्तिगत सलाह सै। इसकी खास बात सै धीरता। तीमुथियुस ताहीं सलाह अर होसला देवै सै, के सताव अर बिरोध होण के बाद भी वो बिश्वास योग्यता के साथ यीशु मसीह की गवाही देन्दा रहवै, सुसमाचार अर पुराणे-नियम की सच्ची शिक्षा पै मजबूत बणया रहवै, अर शिक्षक अर प्रचारक के रूप म्ह अपणे फर्ज का पालन करदा रहवै। तीमुथियुस ताहीं खास तौर पै “बेवकूफी अर बेकार की बातचीत” म्ह उलझन तै पैदा खतरा के बारे म्ह चेतावनी देई गई सै। इसतै किमे फायदा कोनी होन्दा, पर यो सुणण आळा खात्तर नाश का कारण हो जावै सै। इन सब म्ह, तीमुथियुस नै खुद लेखकां ताहीं अपणे जीवन अर मकसद, उसके बिश्वास, सहनशक्ति, प्रेम, धीरज, अर सताव के बखत दुख-के उदाहरण ताहीं याद दिलाया गया सै।

### रूप-रेखा

जानकारी 1:1,2

बड़ाई अर उपदेश 1: 3-2:13

सलाह अर चेतावनी 4: 6-18

समापन 4:19-22



1 या चिट्ठी मुझ पौलुस की ओड़ तै सै, परमेसवर नै मेरे ताहीं मसीह यीशु का प्रेरित होण खात्तर चुण्या सै, ताके मै यो सन्देश प्रचार कर सकू, के परमेसवर नै अनन्त जीवन देण का वादा करया सै, जो यीशु मसीह पै बिश्वास करण तै मिलै सै। 2 मै तीमुथियुस ताहीं या चिट्ठी लिखूँ मूं, जिसतै मै प्यार करूँ मूं, अर मै प्रार्थना करूँ मूं, के पिता परमेसवर अर म्हारै प्रभु मसीह यीशु की ओड़ तै तन्ने अनुग्रह, दया अर शान्ति मिलदी रहवै।



3 मै परमेसवर का धन्यवाद करूँ मूं, जिसकी आराधना मै साफ अन्तरात्मा तै उस्से ढाळ करूँ मूं, जिस तरियां मेरे पूर्वज करै थे, मै अपणी प्रार्थनायां म्ह तन्ने दिन रात याद करूँ मूं। 4 मन्ने याद सै के जिव मन्ने थारे ताहीं छोड़कै जाणा पड्या था, तो थम मेरे खात्तर किस तरियां रोए थे। मै दिन-रात तेरे तै मिलण की लालसा राखूँ मूं, ताके आनन्द तै भर जाऊँ। 5 मन्ने तेरी माँ यूनिके का खरा बिश्वास भी याद सै, अर तेरी नानी लोइस का भी इसाए बिश्वास था, अर मन्ने पक्का बिश्वास सै के थारा भी बिश्वास उसाए होगा सै। 6 इस्से कारण मै तन्ने याद दुवाऊँ मूं के तू परमेसवर के उस वरदान नै जो मेरै हाथ धरण के जरिये तन्ने मिल्या सै प्रज्वलित करदे। 7 क्यूँके परमेसवर नै म्हारै ताहीं डरपोक न्ही बणाया, बल्के उसका आत्मा म्हारै मन मजबूत बणावै सै, जो म्हारे ताहीं दुसरयां तै प्यार करण म्ह मदद करै सै, अर म्हारे ताहीं अपणे-आप पै काबू राखणा सिखावै सै।

8 इस कारण म्हारै प्रभु यीशु मसीह के बारे म्ह लोगगां ताहीं बताण म्ह शर्मिन्दा मत होओ, अर शर्मिन्दा होणा भी न्ही चाहिए, क्यूँके मै उसकी सेवा करण के कारण जेळ म्ह मूं, इसके बजाये थमने उस शक्ति का इस्तमाल करणा चाहिए जो परमेसवर थमनै देवै सै, अर सुसमाचार के खात्तर मेरे गेल्या दुख नै सह ल्यो। 9 परमेसवर नै म्हारा उद्धार करया सै, अर म्हारे ताहीं पवित्र जीवन जीण खात्तर बुलाया सै। उसने म्हारै ताहीं इस कारण कोनी चुण्या के हमने आच्छे काम करे सै, बल्के अपणी अनुग्रह अर इच्छा के मुताबिक चुण्या सै। उसने यीशु मसीह ताहीं भेजके म्हारे उपर अनुग्रह दिखान की योजना दुनिया बणाण तै पैहले ए बणा ली थी। 10 पर इब म्हारै उद्धारकर्ता



मसीह यीशु जाहिर होए, अर अपणी करुणा दिखाई, जिसनै मौत की शक्ति ताहीं हरा दिया अर म्हारे ताहीं सुसमाचार कै जरिये दिखाया के अनन्त जीवन का एक ए रास्ता सै। <sup>11</sup> जिसकै खात्तर परमेसवर नै मेरे ताहीं प्रचारक, प्रेरित, अर उपदेशक भी बनाया। <sup>12</sup> इस कारण मै जेठ म्ह इन दुखां नै भी सहूँ सूं, पर सरमान्दा कोनी, क्यूँके मै मसीह नै जानूँ सूं, जिसपै मन्नै विश्वास करया सै, अर मन्नै पक्का विश्वास सै के मसीह मेरी उस धरोहर की रक्षा जिब तक करदा रहवैगा जिब तक के वो आ ना ले, क्यूँके वो भरोस्सेमंद सै। <sup>13</sup> जो खरी बात तन्नै मेरे तै सुणी सै, उन ताहीं उस विश्वास अर प्यार कै गैल, जो मसीह यीशु म्ह सै, अपना बढ़िया नमूना बनाके राख। <sup>14</sup> अर उस धरोहर की रक्षा करो जो पवित्र आत्मा कै जरिये थारे ताहीं सौप्या गया सै, जो म्हारे भित्तर रहवै सै। <sup>15</sup> तन्नै बेरा सै के आसिया परदेस के भोत-से विश्वासी भाईयाँ नै मेरे ताहीं छोड़ दिया सै, जिन म्ह फूगिलुस अर हिरमुगिनेस भी शामिल सै। <sup>16</sup> उनैसिफुरस कै कुण्वे पै प्रभु दया करै, क्यूँके वो कई बार मेरे धोरे आया अर उसनै मेरे ताहीं उत्साहित करया अर जेठ म्ह भी मेरे तै मिलण खात्तर आण म्ह शर्मिन्दगी महसूस कोनी करी। <sup>17</sup> पर जिब वो रोम नगर म्ह आया, तो उसनै मेरे ताहीं हरेक जगहाँ हूँदचा, अर हूँद के मेरे तै मिल्या।

<sup>18</sup> (प्रभु करै के उस दिन उसपै प्रभु की दया हो)। जिब मै इफिसुस नगर म्ह था, तो उसनै वो सब कुछ मेरे खात्तर करया जिसनै थम भी जानो सों।

## 2

~~~~~

<sup>1</sup> ज्याँतै हे मेरे बेटटे तीमथियुस, तू उस अनुग्रह म्ह जो मसीह यीशु म्ह सै, मजबूत हो जा। <sup>2</sup> थमनै मेरे ताहीं कई माणसां के स्याम्ही मसीह की शिक्षा के बारे म्ह सन्देस सिखान्दे देख्या होगा। इस करके मै चाहूँ सूं, के थम उन दुसरे विश्वासियाँ ताहीं भी वोए सन्देस सिखाओ जिन माणसां पै थम भरोस्सा करो सों, जो दुसरयां नै भी वोए सन्देस सीखा सकै। <sup>3</sup> इस्से तरियां एक सैनिक धीरज तै लड़ाई के मैदान म्ह सारे दुख सहवै सै, थमनै भी सारे दुख सहण करणे पड़ैगें, जिसा हम मसीह यीशु खात्तर सहवां सां। <sup>4</sup> जिब कोए सैनिक लड़ाई पै जावै सै, तो उसका काम अपणे-आपनै दुनियादारी के काम्मां म्ह फसाणा कोनी बल्के उसका काम अपणे भर्ती करण आळे नै खुश करणा सै। <sup>5</sup> जै दौड़ म्ह दौड़ण आळा सही तरीके तै न्ही दौड़ता तो वो ईनाम न्ही पा सकदा। <sup>6</sup> जो किसान मेहनत करै सै, फसल के पैहले हिस्से पै हक उसका सै। <sup>7</sup> या सोच्चों के ये उदाहरण हमनै के सिखाणा चाहवै सै, परमेसवर इन सारी बात्तां नै समझण म्ह थारी मदद करै। <sup>8</sup> यीशु मसीह नै याद राख, जो दाऊद की पीढ़ी तै पैदा होया अर जिस ताहीं परमेसवर नै मरे होया म्ह तै जिन्दा करया, अर वोए सुसमाचार सै जिसका हम प्रचार करां सां। <sup>9</sup> क्यूँके मै सुसमाचार सुणाऊँ सूं, जिसकै खात्तर मै भुन्डे काम करणीये की ढाळ दुख टाऊँ सूं, उरै ताहीं के कैद भी सूं, पर कोए भी चीज परमेसवर का सुसमाचार प्रचार करण तै लोग्गां नै रोक न्ही सकदी। <sup>10</sup> इस कारण मै छोट्टे होए माणसां के खात्तर सब कुछ सहूँ सूं, ताके वे भी यीशु मसीह पै विश्वास करके बच सकै अर अनन्त महिमा नै हासिल कर पावें। <sup>11</sup> या बात साच्ची सै, के जै हम मसीह कै गेल्या मरगे सां, तो उसकै गेल्या जीवांगें भी। <sup>12</sup> जै हम उसकै खात्तर दुख सहन्दे रहवांगें, तो उसकै गेल्या राज भी करांगें, जै हम इन्कार करां, के हम उसनै न्ही जाणते, तो वो भी कह देवैगा, के वो भी हमनै न्ही जाणता। <sup>13</sup> जै हम विश्वासघाती भी हों, तोभी वो भरोसेमन्द बना रहवै सै, क्यूँके वो हमेशा अपणे सुभाव के मुताबिक काम कर करै सै।

~~~~~

<sup>14</sup> विश्वासियाँ नै ये बात समझा दे, अर प्रभु की मौजूदगी म्ह समझा दे, के शब्दां पै बहस-बाजी ना करया करै, जिसते कुछ फायदा कोनी होन्दा, क्यूँके यो उन माणसां के उस विश्वास नै नुकसान पुहचा सके सै जो उननै सुणे सै। <sup>15</sup> अपणे-आपनै परमेसवर का अपनाण जोगगा अर इसा काम करण आळा बणाण की कोशिश कर, जो शर्मिन्दा न्ही होण पावै, अर जो सच कै वचन नै सही ढाळ तै

समझा सकै। 16 पर दुनियावी अर बेकार की बात्तां तै दूर रह, क्यूँके जो लोग दुनियावी अर बेकार की बात्तां म्ह शामिल होवै सै, वे परमेसवर तै और घणे दूर हो जावै सै। 17 उनकी बातें सड़े घांव की ढाळ फैलदी जावैगी, जो दुसरयां के बिश्वास नै कमजोर कर देंगी जो उन बात्तां नै सुणै सै, अर हुमिनयुस अर फिलेतुस उनकी तरियां ए सै। 18 उननै सच्चाई पै बिश्वास करणा बन्द कर दिया सै, वे कहवै सै के परमेसवर नै पैहले ए भरे होए बिश्वासियाँ ताहीं अनन्त जीवन कै खात्तर जिन्दा करया था, इस करके वे कुछ बिश्वासियाँ ताहीं कहवै सै, के मसीह पै बिश्वास ना करो। 19 परमेसवर के लोग इसी नीम की ढाळ सै जो हालदी कोनी, अर उस नीम पै या छाप लागरी सै: “प्रभु अपने माणसां ताहीं पिच्छाणै सै,” अर “जो कोए प्रभु का नाम लेवै सै, उसनै बुराई करणा छोड़ देणा चाहिए।”

20 एक बड़े घर म्ह ना सिर्फ सोन्ने-चाँदी ए के, पर काठ अर माट्टी के बासण भी होवै सै, कुछ खास मौकै, अर कुछ रोज के खात्तर इस्तमाल करे जावै सै। 21 इस्से तरियां जै कोए बिश्वासी अपने-आपने नै इन बुरी चिज्जां तै दूर कर लेवैगा, तो वो माल्लिक के उस उपयोगी बासण की तरियां होवैगा, जो खास मौक्या पै इस्तमाल करया जावै सै, वो पवित्तर बण जावैगा, अर वो माल्लिक के जरिये हरेक भले काम के खात्तर इस्तमाल करया जावैगा। 22 जवान्नी की अभिलाषाओं तै दूर भाज्जो, अर उनकी संगति म्ह रहों जो धार्मिकता, बिश्वास, प्यार, अर शान्ति का सुभाव राखै सै, जो साफ मन तै परमेसवर नै पुकारै सै। 23 पर बेकूपी अर अज्ञानता के बहस तै दूर रह, क्यूँके तन्नै बेरा सै के इनतै झगड़े पैदा होवै सै। 24 प्रभु के दास नै झगड़ालू न्ही होणा चाहिये, पर वो सब के गेल्या नरम अर शिक्षा म्ह निपुण अर सहनशील हो। 25 वो विरोधियाँ नै नम्रता तै समझावै, के बेरा परमेसवर उननै इसा मन देवै के वे पाप करणा छोड़ दे ताके वे भी सच नै पिच्छाणै। 26 अर ये लोग आच्छी तरियां फेर तै सोचण अर शैतान के धोक्खे तै बचण के लायक हो जावैगे, अर यो धोक्खा एक फदे के तरियां सै। शैतान नै उन ताहीं इस खात्तर पकड्या सै, ताके जो वो चाहवै सै वो उनतै करवा सकै।

### 3

~~~~~

1 मे इब के कहूँ सू, उन बात्तां पे ध्यान दे अन्त के दिनां म्ह कष्ट का बखत भी आवैगा। 2 क्यूँके माणस स्वार्थी, लोभी, डिंगमार, अभिमानी, बुराई करण आळे, माँ-बाप का हुकम टाळण आळे, अहसान-फरमोस, अपवित्तर, 3 निर्दयी, माफ ना करण आळे, दोष लाण आळे, असंयमी, कठोर, भले के बैरी, 4 बिश्वासघाती, द्वीट, घमण्डी, अर परमेसवर के न्ही बल्के सुखविलास ए के चाहण आळे होंगे। 5 वे भगति का भेष तो धरेंगे, पर वे उस शक्ति नै अपनावै कोनी, जो उननै ईश्वरीय बणा सकै सै, इसा तै परे रहियो। 6 इन्हे म्ह तै वे माणस सै जो घरां म्ह दबे पाँ बड़ जावै सै, अर उन लुगाईयां ताहीं बस म्ह कर लेवै सै, जो पापां तै दबी अर हरेक ढाळ की अभिलाषायां के बस म्ह हो सै। 7 अर वे हमेशा नई बात सिखदी तो रहवै सै, पर सच की पिच्छाण तक कदे न्ही पोहोचदी। 8 जिस तरियां यत्रेस अर यम्ब्रेस\* नै मूसा नबी का विरोध करया था, उस्से तरियां ए ये भी सच का विरोध करै सै, ये इसे माणस सै, जिनकी बुद्धि भ्रष्ट होगी सै अर वे बिश्वास के बारे म्ह निकम्मे सै। 9 उनकी कामयाबी थोड़े बखत की थी, क्यूँके जिस तरियां माणसां नै मान लिया के यत्रेस अर यम्ब्रेस बेकूप थे, अर हर कोए यो स्वीकार कर लेगा के वे बेकूप सै।

~~~~~

10-11 पर तन्नै उपदेश, चाल-चलण, मनसा, बिश्वास, सहनशीलता, प्यार, धीरज, अर सताए जाण, अर दुख टाण म्ह मेरा साथ दिया, अर इसे दुखां म्ह भी जो अन्ताकिया नगर अर इकुनियुम अर लुस्तुरा नगरां म्ह मेरे पै आण पड़े थे, अर दुसरे दुखां म्ह भी जो मन्नै टाए सै, पर प्रभु नै मेरे ताहीं उन सारया तै छुटा लिया। 12 पर जितने मसीह यीशु म्ह भगति के गेल्या जीवन बिताणा

\* 3:8 3:8 यत्रेस अर यम्ब्रेस इनके बारे म्ह निर्गमन की किताब पढ़े

चाहवैँ सै वे सारे सताए जावैँगे। 13 पर दुष्ट अर भकाण आळे बिगड़दे चले जावैँगे, वे दुसरयां नै धोक्खा देवैँगे, अर खुद दुसरयां तै धोक्खा खावैँगे। 14 थमनै बिश्वास करते रहणा चाहिए जो हमनै थारे ताहीं सिखाया सै, क्यूँके थम हमनै जाणो सों, अर म्हारे पै भरोस्सा कर सको सों जिननै थारे ताहीं ये बातें सिखाई सै। 15 जिब थम छोटटे बाळक थे, जिब तै ए थमनै अपणे पवित्तर ग्रन्थां म्ह सिख्या सै, जो थारे ताहीं या समझण म्ह मदद करै के जिब थम मसीह यीशु म्ह बिश्वास करो सों तो परमेसवर थमनै बचावैँ सै। 16 साब्ता पवित्तर ग्रन्थ परमेसवर की प्रेरणा तै रच्या गया, अर म्हारे ताहीं सिखाण खात्तर उपयोगी सै, के सच के सै, अर म्हारे ताहीं यो महसूस करण खात्तर के म्हारी जिन्दगी म्ह के गलत सै। यो म्हारी गलतियाँ नै सुधारैँ, जिब हम गलत होवां सां, अर वोए करणा सिखावैँ सै जो सही सै। 17 ताके परमेसवर का जन हरेक भले काम करण खात्तर त्यार अर सिध्द बण जावैँ।

## 4

1 जिब मसीह यीशु राजा के रूप म्ह शासन करण खात्तर आवैँगा, तो वो उन जिन्दे अर मरे होए माणसां का न्याय करेगा जो मर चुके सै, तो गवाह के रूप म्ह परमेसवर अर मसीह कै साथ, मै ईमानदारी कै साथ थारे तै आग्रह करूँ सूँ। 2 के तू परमेसवर के वचन का प्रचार कर, परमेसवर के वचन ताहीं सुणाण खात्तर सदा तैयार रह, चाहे लोग इस ताहीं सुणाणा चाहवैँ या ना चाहवैँ, ताके थम माणसां नै दिखा सको, के जो उननै करया सै, वो गलत करया सै, अर उनके पापां खात्तर उन ताहीं डाट सको, पर थम माणसां नै उत्साहित भी करो जिब थम उननै बड़े धीरज तै सिखाओ सों। 3 क्यूँके इसा बखत आवैँगा जिब माणस खरयां उपदेश न्ही सह सकैँगे, पर अपनी ए इच्छा पूरी करैँगे अर वे अपणे खात्तर कई उपदेशक कट्टे करैँगे जो उपदेश वे सुणाणा चाहवैँ सै उन ताहीं वे बतावैँगे। 4 अर वे सच्चाई नै अणदेखा कर देवैँगे, अर झूट्टी कथा-कहानियाँ पै मन लगावैँगे। 5 थमनै हरेक बखत अपणे-आप पै काब्बू राखणा चाहिए, दुख ठा, सुसमाचार प्रचार का काम कर, अर परमेसवर के जरिये दी गई सेवा नै पूरी कर।

6 जैँ वे मन्नै मार भी देवैँगे, तो मेरी जिन्दगी परमेसवर ताहीं चढ़ाई गई एक भेट की तरियां होगी। इस दुनिया ताहीं छोड़ण का इब मेरा बखत आ लिया सै। 7 मन्नै मसीह की सेवा करण खात्तर कड़ी मेहनत करी सै, मन्नै अपनी दौड़ पूरी कर ली सै, मन्नै आखरी तक उसपै बिश्वास करया। 8 आण आळे बखत म्ह प्रभु मेरे ताहीं मुकुट देवैँगा, जो के धार्मिकता का मुकुट सै, वो जो सच्चा न्याय करैँ सै, अर मन्नै वो ईनाम देवैँगा जिब बोहड़ के आवैँगा बल्के मेरे ताहीं ए न्ही उन सब ताहीं भी देवैँगा, जो उसके दुबारा आण की बात बड़ी आस तै देखण लागरे सै।

## \*\*\*\*\*

9 मेरे धरे तावळा आण की कोशिश कर। 10 क्यूँके देमास नै इस दुनिया की चिज्जां तै प्यार करया सै, अर मेरे ताहीं छोड़ दिया सै, अर वो थिस्सलुनीके नगर म्ह चल्या गया सै। क्रेसकेंस, गलातिया नगर की ओड़ चल्या गया अर तीतुस दलमतिया परदेस कान्ही चल्या गया सै। 11 सिर्फ लुका मेरे गैल सै। मरकुस नै लेके चल्या आ, क्यूँके वो मेरे काम करण म्ह मेरी मदद करेगा। 12 तुखिकुस ताहीं मन्नै इफिसुस नगर म्ह भेज्या सै। 13 जो चोल्ला, मै, त्रोआस नगर म्ह करपुस के घर छोड़ आया सूँ, जिब तू आवैँ तो उस ताहीं अर उस किताब ताहीं भी लेंदे आईये, खास करके चर्मपत्रों\* नै। 14 सिकन्दर ठठरे नै मेरा बड़ा नुकसान करया सै, प्रभु उस ताहीं उसके काम्मां के मुताबिक बदला देवैँगा। 15 तू भी उसतै चौकन्ना रह, क्यूँके उसनै म्हारी शिक्षायां का घणाए विरोध करया सै। 16 पैहली बार मै खुद नै बचाण खात्तर अदालत गया, कोए भी मेरे गैल न्ही था, पर सब नै मेरे ताहीं छोड़ दिया, परमेसवर इस बात का दण्ड उननै ना देवैँ, मै प्रार्थना करूँ सूँ, मेरे ताहीं छोड़ण के कारण उन ताहीं परमेसवर माफ करदे। 17 पर मेरे गैल मेरा प्रभु मददगार रह्या, मेरे जरिये सन्देस

\* 4:13 4:13 चर्मपत्रों चमड़े की बणी चिट्ठियां सै

की घोषणा पूरी तरियां सम्पन्न हो जावै अर उरै जितने भी गैर यहूदी लोग मौजूद सै, ये बात सुण ले, के उसनै मेरे ताहीं मौत के मुँह म्ह तै छुड़ाया। <sup>18</sup> अर प्रभु मन्ने हरेक भुन्डे काम तै छुड़ावैगा, अर वो अपणे सुर्गीय राज्य म्ह सही-सलामत ले जावैगा। उस्से की महिमा युगानुयुग होन्दी रहवै। आमीन।

~~~~~

<sup>19</sup> पिरसकिल्ला अर उसका धणी अक्विला अर उनेसिफुरुस कै कुणबे नै मेरी ओड़ तै नमस्कार। <sup>20</sup> इरास्तुस कुरिन्थुस नगर म्ह रह गया, अर तरुफिमुस ताहीं मन्ने मीलेतुस नगर म्ह बीमार छोडचा सै। <sup>21</sup> जाड्डे तै पैहल्या चले आण की कोशिश कर। यूबूलुस, अर पूदेस, अर लीनुस अर क्लौदीया, अर सारे विश्वासी भाईयाँ की ओड़ तै तन्नै नमस्कार। <sup>22</sup> मै प्रार्थना करूँ सूँ, के प्रभु तेरी आत्मा कै गैल रहवै। धारे पै अनुग्रह होंदा रहवै।

## तीतुस के नाम प्रेरित पौलुस की चिट्ठी



तीतुस एक गैर यहूदी विश्वासी था, जो पौलुस के प्रचार के काम में उसका साथी अर मददगार बण गया था। तीतुस के नाम पौलुस प्रेरित की चिट्ठी करते में रहणीये पौलुस के इस जवान साथी के सम्बन्ध में है, जिसने ओडे कलीसिया के काम की जाँच करण खात्तर छोड़ गया था। या चिट्ठी तीन भोत खास बातों नै दिखावे है। पहिल्या, तीतुस नै यो याद करावे है के कलीसिया के अगुवां का चाल-चलण किस तरियां का होणा चाहिए, खासकर भोत-से क्रेती माणसां के बुरे चाल-चलण नै देखदे होए उनतै यो सब कह्या गया है। दुसरा, तीतुस नै या सलाह देवे है, के कलीसिया में हाजिर कई झुण्डां नै किस तरियां की शिक्षा दी जावे, मतलब बूढ़े माणस, बूढ़ी बिरबानियाँ नै (जो जवान बिरबानियाँ नै शिक्षा दे), जवान्ना नै, अर दास। तीसरा, लेखक तीतुस नै मसीह चाल-चलण के बारे में सलाह देवे है, खास करके शांतिपूर्ण अर मित्र बणण के खात्तर, अर नफरत, वाद-विवाद अर कलीसिया में दलबन्दी तै बचण खात्तर।


रूप-रेखा

जानकारी 1:1-4

कलीसिया के अगुवे 1:5-16

उपदेश अर चेतावनी 3:1-11

समापन 3:12-15



1 या चिट्ठी मुझ पौलुस की ओड़ तै है, जो परमेश्वर का दास अर यीशु मसीह का प्रेरित है, मैं इस करके भेज्या गया हूँ ताके उन माणसां के विश्वास नै स्थापित कर सकूँ जिन ताहीं परमेश्वर नै चुप्या है, अर उन ताहीं सीखा सकूँ के वो उस सच्चाई नै जाण सकै, जो उन ताहीं दिखा सकै के पवित्र जिन्दगी किस तरियां जीणी है।<sup>2</sup> वे हमेशा के खात्तर परमेश्वर के साथ रहण की आस करै है, क्यूँके परमेश्वर, जो कदे झूठ नही बोल्दा, उसने दुनिया बणण तै पहिले वादा करया था के उसके लोग हमेशा खात्तर जिन्दा रहवेंगे।<sup>3</sup> अर ठीक बखत पै परमेश्वर नै यो सुसमाचार म्हारे पै जाहिर करया, अर हमने यो सुसमाचार सारया ताहीं सुणाया। परमेश्वर जो म्हारा उद्धारकर्ता है, उसने मेरे ताहीं या जिम्मेदारी दी है, अर अपना काम करण खात्तर मेरे ताहीं उसने हुकम दिया है।<sup>4</sup> मैं या चिट्ठी तीतुस नै लिखूँ हूँ, मसीह पै विश्वास करण के नाते तू मेरे आत्मिक बेटे की तरियां है, मैं प्रार्थना करूँ हूँ, के पिता परमेश्वर, अर म्हारे उद्धारकर्ता प्रभु मसीह यीशु की ओड़ तै तन्ने अनुग्रह, दया अर शान्ति मिलदी रहवे।



5 मैं इस करके तन्ने करते टापू में छोड़ आया था, ताके तू ओड़े उस काम नै खतम कर सकै जो अधूरा रह गया था, अर मेरे हुकम के मुताबिक उस टापू के हरेक नगर में कलीसिया के अगुवां नै तैयार कर सकै, जिसे मन्ने कह्या है।<sup>6</sup> अगुवां बेकसूर अर एके पत्नी का पति हो, जिनके बाळक विश्वासी हो, अर उन में लुचपण अर निरंकुशता का दोष ना हो।<sup>7</sup> क्यूँके अगुवां, नै परमेश्वर का भण्डारी होण के कारण बेकसूर होणा चाहिए, ना जिदी, ना गुसेल, ना पियकड़, ना मारपीट करण आळा, ना नीच कमाई का लोभी हो,<sup>8</sup> पर मेहमान का आदर करण आळा, भलाई का चालू आळा, अपण-आपे में रहण आळा, न्यायकारी, पवित्र अर अपण मन नै काबू राखण आळा हो।<sup>9</sup> वो यीशु मसीह के सन्देश के बारे में मजबुती तै विश्वास करदा हो, जो हमने थारे ताहीं सिखाया है, अर वो दुसरयां ताहीं उत्साहित कर सकै, ताके वे सही शिक्षा का पालन कर सकै, अर उन ताहीं भी समझा सकै जो सही शिक्षा का विरोध करै है।<sup>10</sup> क्यूँके भोत-से माणस सही शिक्षा के विरुद्ध खड़े

होवेंगे, जो बेकार की बात सिखावै सै अर जो दुसरयां ताहीं धोक्खा देवै सै, उन म्ह तै कुछ लोग यहूदी सै जो विश्वासी बणगे सै। <sup>11</sup> इन माणसां ताहीं सिखाण का मौक्का न्ही देणा चाहिए, क्यूँके वे इसी शिक्षा देवै सै जो उन ताहीं देणी न्ही चाहिए, अर ये पूरे घराने का विश्वास खतम कर देवै सै, अर वे यो इस खात्तर करै सै ताके उन ताहीं परईसे मिल सकै। <sup>12</sup> उन म्ह तै एक जण्यै नै, जो उनका नबी सै, कह्या सै, “करते नगर का माणस जिस ताहीं वे नबी मान्नै सै उसनै करेती के माणस के बारे म्ह कह्या, के ये सदा झूठ बोल्लै सै, ये जंगली-जानवरां की तरियां बरताव करै सै, ये आलसी होवै सै अर ये भोत पेटटू सै।” <sup>13</sup> या बात करेती माणसां के बारे म्ह सच सै, इस करके उननै सखताई तै चेतावनी दिया कर, के वे यीशु मसीह की सच्ची शिक्षा पै विश्वास करै। <sup>14</sup> अर यहूदिया की कथा कहानियाँ अर माणसां के हुकम पै मन ना लगावै, जो सच तै भटक जावै सै। <sup>15</sup> वे माणस जिनके मन म्ह कोए पाप कोनी, उनके खात्तर सारी चीज शुद्ध सै, पर उन माणसां खात्तर जो बुरे सै, अर जो मसीह यीशु पै विश्वास कोनी करते, उन खात्तर कोए भी चीज शुद्ध कोनी, वे हर बखत बुरे काम करै सै, क्यूँके उनका मन पूरी तरियां अशुद्ध हो लिया सै। <sup>16</sup> ये झूठे शिक्षक कहवै सै, के हम परमेसवर नै जाणा सां, पर उनके काम दिक्खै सै, के वो परमेसवर ताहीं न्ही जाणते क्यूँके वे घृणित अर हुकम ना मानण आळे सै, अर किसे अच्छे काम के लायक कोन्या।

## 2

### ॐ नमो भगवते वासुदेवाय

<sup>1</sup> पर तीतुस तेरे खात्तर योए सही सै के तू विश्वासियाँ ताहीं वोए सीखा जो सच्ची शिक्षा के मुताबिक हो। <sup>2</sup> यानी के बूढ़े माणस शान्त गम्भीर अर संयमी हो, अर उनका विश्वास, प्यार अर धीरज पक्का हो। <sup>3</sup> इस ढाळ बूढ़ी बिरबानियाँ का बरताव इसा हो के परमेसवर नै महिमा मिलै, वे लाच्छण लगाण आळी अर पियक्कड़ न्ही हो, पर आच्छी बात सिखाण आळी हो। <sup>4</sup> जवान बिरबानियाँ नै तीतुस तै न्ही बल्के बूढ़ी बिरबानियाँ तै निर्देश पाणा चाहिए, ताके वो उन ताहीं सीखा सकै किस तरियां अपणे धणी अर बाळाकां तै प्यार करै। <sup>5</sup> अर वे मन पै काबू राखण आळी, पतिव्रता, घर का कामकाज सम्भाळण आळी, भली अर अपणे-अपणे धणी के प्रति विश्वास लायक हो, ताके कोए परमेसवर के वचन की बुराई ना कर सकै। <sup>6</sup> इसे तरियां जवान माणसां नै भी समझाया कर, के वे खराई तै चाल्लण आळे हो। <sup>7</sup> हरेक काम म्ह तू अपणे आच्छे बरताव तै दुसरयां खात्तर एक मिसाल बण जा, जिब तू विश्वासियाँ ताहीं परमेसवर के बारे म्ह सिखावै सै, तो उन ताहीं आच्छे मकसद तै सीखा, अर इसा सीखा ताके लोग तेरा आदर कर सकै। <sup>8</sup> तेरी शिक्षाओं म्ह हमेशा सच्चाई हो, जिसकी आलोचना ना हो सकै, जिसतै बिरोधी नै म्हारै म्ह कोए दोष लगाण का मौक्का ना मिलै अर वो खुद पै शर्मिन्दा हो जावै। <sup>9</sup> नौकरां नै समझा के अपणे-अपणे माल्लिक के कह्ये म्ह रहवै, अर सारी बाततां म्ह उसनै राज्जी राखै, अर उल्ट के जवाब ना दे। <sup>10</sup> चोरी चलाकी ना करो, अर हमेशा यो दिक्खै के वो विश्वास लायक सै, अर थारे आच्छे सुभाव नै देखकै, वे भी म्हारे उद्धारकर्ता परमेसवर की शिक्षा ताहीं सुणणा चाहवेंगे। <sup>11</sup> परमेसवर नै अपणा अनुग्रह इस बात म्ह जाहिर करया के उसनै मसीह यीशु ताहीं म्हारा उद्धारकर्ता बणाके भेज दिया, ताके हरेक माणस बचाए जा सकै। <sup>12</sup> अपणी दया के कारण परमेसवर म्हारे ताहीं सिखावै सै, के हम उन तरिकां तै बरताव करणा बन्द कर द्या, जो उस ताहीं खुश न्ही कर सकदे, अर इसी लालसा ना राक्खा जिसी अविश्वासी लोग राखै सै, पर बुद्धिमानि अर धार्मिकता तै बरताव करां, अर इसा बरताव करा जो परमेसवर नै पसन्द हो, जिब तक हम दुनिया म्ह रहवां। <sup>13</sup> हम इस तरिके तै बरताव करा, जिसा के हम उस अदभुत दिन की बाट देखदे हो, जिसकी हम आस राक्खां सां, यो वो दिन सै जिब यीशु मसीह जो म्हारा परमेसवर अर उद्धारकर्ता सै बड़ी महिमा म्ह इस दुनिया म्ह बोहड़ के आवैगा। <sup>14</sup> इस मसीह यीशु नै अपणे-आप ताहीं म्हारे पापां खात्तर बलिदान कर दिया, ताके हम सारे पापां तै आजाद हो जावां, अर म्हारे ताहीं शुद्ध करया ताके हम उसके अपणे खास माणस बण जावां, जो भले काम करण

की बड़ी इच्छा राखै सै। <sup>15</sup> पूरे अधिकार कै गैल इन सारी बाततां की शिक्षा देते होए लोगगां नै समझा अर उत्साहित करदा रह, अर कोए तन्नै तुच्छ न्ही जाणण पावै।

### 3

~~~~~

<sup>1</sup> विश्वासियां नै याद दुआ के हाकिमां अर अधिकारियां का आदर कर, अर उनका हुकम मान्नै, अर दुसरयां का भला करदे रहो। <sup>2</sup> किसे नै बदनाम ना करै, अर ना झगड़ालू बणै, पर दुसरे माणसां कै खात्तर दया दिखाण आळे बणो, अर सारे माणसां कै गैल बड़ी नरमाई के गैल रहवै। <sup>3</sup> क्यूँके हम भी पैहल्या बेअक्ल, परमेसवर का हुकम ना मानण आळे, भरम म्ह पड़े होए अर न्यारी-न्यारी ढाळ की बुरी अभिलाषा अर सुखभोगण की गुलामी म्ह, अर बैरभाव अर माणसां के प्रति जळण करण म्ह जीवन वितान लागरे थे, हम घृणा के लायक माणस थे, अर हर कोए म्हारे तै घृणा करै था, अर हम भी उनतै घृणा करा थे। <sup>4</sup> पर फेरभी परमेसवर जो म्हारा उद्धारकर्ता सै उसनै अपणी दया अर प्यार हम माणसां पै दिखाया। <sup>5</sup> उसनै म्हारे ताहीं पापां के दण्ड तै बचाया, अर यो धार्मिक काम्मां के जरिये न्ही होया जो हमनै खुद करे, पर उसनै म्हारे पै दया करी। उसनै म्हारे ताहीं पवित्तर आत्मा देण कै जरिये बचाया, जो म्हारे पापां नै माफ करै सै, अर हमनै नई जिन्दगी अर नया सुभाव देवै सै। <sup>6</sup> परमेसवर नै मुफ्त म्ह पवित्तर आत्मा दिया ताके वो म्हारे म्ह सामर्थी रूप तै काम करै क्यूँके मसीह यीशु म्हारे पापां खात्तर मरया अर म्हारा उद्धारकर्ता बण गया। <sup>7</sup> ताके हम अनन्त जीवन की आस राख सका, जिसका परमेसवर नै अपणे माणसां ताहीं देण का वादा करया सै, अर हमनै उसपै पूरा भरोस्सा सै, क्यूँके वो अपणी करुणा के मुताबिक म्हारे ताहीं धर्मी बणावै सै। <sup>8</sup> या बात सच सै, अर मै चाहूँ सूँ, के तू इन बाततां के बारे म्ह मजबूती तै बोल्लै इस करके के जिननै परमेसवर पै विश्वास करया सै, वे भले काम करण खात्तर हमेशा ध्यान लगावैगे। ये बात भली अर माणसां के फायदे की सै। <sup>9</sup> पर बेवकूफी के विवादों, पीढियाँ, बिरोध अर झगड़ा तै जो मूसा नबी के नियम-कायदा के बारे म्ह हो, इनतै बचा रह, क्यूँके वे फायदेमन्द कोनी बल्के बेकार सै। <sup>10</sup> तू उन माणसां नै एक दो बार समझा जो कलीसिया म्ह फूट गेरै सै, अर उन ताहीं इसा करण तै मना कर, उसके बाद उनपै और बखत बरबाद ना करै। <sup>11</sup> तन्नै पक्का बेरा सै, के इस ढाळ का माणस भटक गया सै, अर अपणे काम्मां के जरिये दोषी ठहराया जावैगा।

~~~~~

<sup>12</sup> जब मै तेरे धारे अरतिमास या तुखिकुस नै भेज्जूं तो मेरै धारे निकुपुलिस नगर आण की कोशिश करिये, क्यूँके मन्नै ओडैए जाइडा लिकाइण का मन बणाया सै। <sup>13</sup> जेनास वकील अर अपुल्लोस जे सफर खात्तर आगरे जावे, तो जो मदद थम उनकी कर सको तो वा जरूर करियो। <sup>14</sup> इतणाए न्ही बल्के तू विश्वासियां नै यो सीखा, के वो अपणा ध्यान कड़ी मेहनत करण म्ह लगावै, ताके उन माणसां खात्तर जिनके धारे सै कोनी उनकी जरूरत पूरी हो सकें, अर वे एक अच्छे मकसद के साथ जिन्दगी जी सकें। <sup>15</sup> मेरे सारे साथियां की ओड तै तेरे ताहीं नमस्कार। जो विश्वास के कारण म्हारे तै प्यार करै सै, उननै भी नमस्कार। थारे सारया पै परमेसवर का अनुग्रह होंदा रहवै।

## फिलेमोन के नाम प्रेरित पौलुस की चिट्ठी



फिलेमोन एक खास विश्वासी था, जो इसा लागू सै के वो कुलुस्से की कलीसिया का सदस्य था, अर उनेसिमुस नाम का एक गुलाम का माल्लिक था। यो गुलाम अपणे माल्लिक के धोरै तै भाग गया था, अर फेर किसे तरियां पौलुस ताहीं मिल्या, जो उस बखत जेळ म्ह था। पौलुस के जरिये, उनेसिमुस एक विश्वासी बणग्या। फिलेमोन के नाम पौलुस प्रेरित की चिट्ठी फिलेमोन सै यो बिनती कर सै, के वो अपणे दास तै दुबारा मेळ-जोळ करले, अर उसनै पौलुस फेर तै उसके धोरै भेज्जै सै, अर उस ताहीं माफ करे गए एक दास के रूप म्ह ए न्ही पर एक विश्वासी भाई के रूप म्ह उसका स्वागत करै।

रूप-रेखा

जानकारी 1-3 फिलेमोन की बड़ाई 4-7

उनेसिमुस के खात्तर बिनती 8-22

समापन 23-35



1 या चिट्ठी मुझ पौलुस, की ओड़ तै सै, जो मसीह यीशु का कैदी सै। हे फिलेमोन, मेरी अर विश्वासी भाई तीमुथियुस की ओड़ तै तन्नै नमस्कार। तू म्हारा प्यारा मित्र अर मसीह के काम करण म्ह म्हारा साझेदारी सै। 2 मै भाण अफफिया, अर अरखिप्पुस ताहीं जो परमेसवर की सेवा एक सिपाही की तरियां करण लागरया सै, अर उस कलीसिया नै भी लिखूँ सूँ, जो फिलेमोन के घर म्ह कट्टी हो सै। 3 मै प्रार्थना करूँ सूँ, के म्हारे पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलती रहवै।

4 मै जब भी थारे खात्तर प्रार्थना करूँ सूँ, तो मै सारी हाण थारे खात्तर परमेसवर का धन्यवाद करूँ सूँ। 5 मै प्रभु यीशु मसीह पै थारे विश्वास अर परमेसवर के पवित्तर माणसां के प्रति प्यार के बारे म्ह सुणदा रहूँ सूँ। 6 मै प्रार्थना करूँ सूँ, के जो विश्वासियाँ गैल थारी साझेदारी सै, उन भली चिज्जां के जाणण के जरिये जो परमेसवर नै म्हारे ताहीं दी सै, वा और घणी बढ़ती जावै। अर या म्हारे मसीह की महिमा खात्तर हो। 7 क्यूँके हे विश्वासी भाईयो, मै भोत खुश सूँ, अर मेरे प्रति थारे प्यार तै मै घणा उत्साहित सूँ, अर इस कारण पवित्तर माणसां नै घणी खुशी मिली सै।



8-9 जो हक मेरे ताहीं मसीह नै दिया सै, उसकी बजह तै मै थमनै हुकम दे सकूँ सूँ, के थमनै के करण की जरूरत सै, पर मै इसा कोनी करूँ, मै पौलुस, बुजुर्ग माणस होण के नाते अर मसीह यीशु का कैदी होण के कारण थारे तै प्यार तै बिनती करूँ सूँ। 10 मेरी बिनती या सै के उनेसिमुस जो मेरे बाळक की तरियां सै, वो मसीह म्ह मेरा आत्मिक बेटा जिब बणया जिब मै कैद म्ह था, थम उसपै दया करियो। 11 वो तो पैहला तेरे किमे काम का ना था, पर इब तेरे अर मेरे दोनुआ के खात्तर बडे काम का सै। 12 उससे नै यानी जो मेरे दिल का टुकड़ा सै, मै तेरे धोरै भेज्जुँ सूँ। 13 उसनै मै अपणे ए धोरै राखणा चाहूँ था, ताके वो तेरी जगहां मेरी मदद कर सकै, जिब के मै मसीह का सुसमाचार सुणाण के खात्तर कैद म्ह सूँ। 14 पर मन्नै तेरी इच्छा बगैर कुछ भी न्ही करणा चाह्या। मै चाहूँ था के तू मेरी मदद मजबूरी म्ह न्ही पर खुद की इच्छा तै खुशी तै करै। 15 हो सकै सै के परमेसवर नै उनेसिमुस ताहीं, तेरे तै इस करके थोडे बखत खात्तर दूर जाण का मौक्का दिया, ताके वो मसीह पै विश्वास कर सकै, अर उसकी बजह तै तू सदा खात्तर उसनै पा लेवै। 16 पर इब वो तेरा दास ए कोनी बल्के दास तै भी बढ़कै, यानी विश्वासी भाई सै। मै उसतै भोत प्यार करूँ सूँ, पर इब तू मेरे तै भी ज्यादा उसतै प्यार कर, दास की तरियां न्ही, पर विश्वासी भाई की तरियां। 17 इस करके जै तू मन्नै



अपणा साझीदार समझै सै, तो उनेसिमूस जिब थारे धोरै बोहड़ के आवैगा, तो उसनै प्यार तै अपणा लियो, जिस तरियां थम मन्नै अपणाओ सों। 18 जै उसनै तेरा कुछ भी नुकसान करया सै, या उसपै तेरा कुछ कर्ज सै, तो आकै दे दियुंगा। 19 मै पौलुस अपने हाथ तै लिखूँ सूँ, के उसका कर्जा मै आप दे दियुंगा, तू खुद जाणै सै, जै मै तेरी मदद न्ही करदा, तो तन्नै नई जिन्दगी न्ही मिलती, इस करके तू जिन्दगी भर मेरा कर्जदार सै। 20 हे मेरे प्यारे भाई, मेरे खात्तर योए कर क्यूँके हम बिश्वासी भाई सां, अर तेरे इसा करण तै मै मसीह म्ह उत्साहित हो जाऊँगा। 21 मै तेरे पै भरोस्सा करके तेरे तै लिखूँ सूँ, अर या जाणूँ सूँ के जो कुछ मै कहूँ सूँ, तू उसतै घणा बढ़के करैगा। 22 अर या भी कै मेरै खात्तर रुकण की जगहां तैयार राक्खै। मन्नै उम्मीद सै, के परमेसवर थारी प्रार्थनायां का जवाब देवैगा, अर मै थारे धोरै आकै थमनै देख पाऊँगा।

### ~~~~~

23 इपफ़रास, जो मेरे गैल जेळ म्ह कैद सै, क्यूँके वो यीशु मसीह की सेवा करै सै थारे ताहीं नमस्कार कहवै सै। 24 अर मरकुस, अरिस्तखुंस, देमास अर लूका जो मेरे गैल परमेसवर का काम करणीये सै, इनका भी तेरे ताहीं नमस्कार। 25 मै प्रार्थना करूँ सूँ, के म्हारे प्रभु यीशु मसीह का अनुग्रह थारे साथ होंदा रहवै। आमीन।

## इब्रानियों के नाम चिट्ठी



इब्रानियों के नाम चिट्ठी विश्वासियों के एक झुण्ड ताहीं लिखी गई सै, जो बढ़ते होए विरोध के कारण, अपने मसीह विश्वास नै छोड़ण के खतरे म्हे थे। लेखक उननै अपने विश्वास म्हे बणे रहण के खात्तर हिम्मत बढ़ावै सै, खास तौर पै यो दिखान्दे होए के यीशु मसीह ही परमेसवर का सच्चा अर आखरी प्रकाशन सै। इसा करते बखत वो तीन सच्चाईयाँ पै जोर देवै सै: (1) यीशु ए परमेसवर का सच्चा बेट्टा सै, उसनै दुख ठा-ठाकै पिता की सच्ची आज्ञाकारिता सीक्खी। परमेसवर के बेट्टे के रूप म्हे यीशु पुराणा-नियम के नबियों, सुगंदूत्तां, अर खुद मूसा तै भी बढ़कै सै। (2) यीशु परमेसवर के जरिये अंत काल का महायाजक बणाया गया सै, पुराणे-नियम के महायाजक के रूप म्हे सच्चा मुक्ति देणिया सै, यहूदी धर्म की धर्म-विधियाँ अर पशु बलि के जरिये जिनका मात्र पैहले तै ए जिक्र मिलै सै। इस्राएली इतिहास के कुछ नाम्मी माणसां के विश्वास के उदाहरणा नै पेश करदे होए (पाठ 11), लेखक अपने पाठकां तै विश्वास म्हे बणे रहण की बिनती करै सै, और 12 वे पाठ म्हे वो अपने पाठकां तै बिनती कर सै, के अन्त ताहीं विश्वास म्हे बणे रहो अर अपनी आँख यीशु पै लगाई राक्खो, अर जो दुख और सताव उनपै आवै सै उसनै धीरज तै सह ल्यो। या चिट्ठी कुछ सलाह अर चेतावनी के साथ खतम हो सै।

### रूप-रेखा

जानकारी : मसीह, परमेसवर का पूर्ण प्रकाशन 1:1-3

मसीह, सुगंदूत्तां तै भी श्रेष्ठ सै 1:2-18

मसीह, मूसा अर यहोशू तै श्रेष्ठ सै 3:1-4:13

मसीह के याजक के पद की श्रेष्ठता 4:14-7:28

मसीह के करार की श्रेष्ठता 8:1-9:28


मसीह की कुरबान्नी की श्रेष्ठता 10:1-39

विश्वास की श्रेष्ठता 11:1-12:29

आखरी उपदेश अर समापन 13:1-25



1 पैहल्ले युग म्हे परमेसवर नै म्हारे पूर्वजां तै भोत बार अर अलग-अलग ढाळ तै नबियाँ के जरिये बात करी। 2 पर इन आखरी के दिनां म्हे म्हारे तै, अपने बेट्टे के जरिये बात करी। परमेसवर नै सारी सृष्टि की रचना अपने बेट्टे के जरिये करी अर उसने उस ताहीं सारी चिज्जां का वारिस बणाया। 3 बेट्टा ए परमेसवर की महिमा का चाँदणा सै अर उस म्हे हम देख्वां सां, के वो किसा सै, अर सारी चिज्जां नै अपने शक्तिशाली हुकम तै सम्भाळै सै। वो माणसां के पापां की माफी का कारण बणया, अर ऊँच्ची जगहां पै महिमाय के सोळी ओड जा बेट्या, 4 इसा करण तै सुगंदूत्तां तै उतनाए बढ़िया ठेहराया, जितना उसनै बड़े ओद्रे का उसका पद सुगंदूत्तां तै ऊँच्चा ठेहराया।



5 क्यूंके परमेसवर नै कदे किसे सुगंदूत्त तै न्ही कह्या, के “तू मेरा बेट्टा सै, आज मै घोषणा करूँ सूं के, तू मेरा बेट्टा सै” अर सुगंदूत्तां म्हे तै उसने कद किसे तै कह्या, के “मे उसका पिता होऊँगा, अर वो मेरा बेट्टा होवैगा?” 6 अर जब परमेसवर नै अपने जेट्टे बेट्टे ताहीं इस दुनिया म्हे भेज्या, तो कहवै सै, “परमेसवर के सारे सुगंदूत्त उस ताहीं मोध्धे मुँह पडके प्रणाम करे।” 7 अर सुगंदूत्तां के बारे म्हे न्यू कहवै सै, “वो अपने सुगंदूत्तां ताहीं हवा, अर अपने सेवकां नै भड़कदी होई आग बणावै सै।” 8 पर बेट्टे के बारे म्हे कहवै सै, “हे परमेसवर, उसका राज युगायुग रहवैगा, तेरे राज्य का राजदण्ड न्याय का राजदण्ड सै।” 9 तन्नै धर्म तै प्यार अर अधर्म तै बैर राख्या, इस कारण परमेसवर,

तेरे परमेसवर नै, तेरे साथियाँ तै बढ़कै हर्षरूपी तेल तै तेरा अभिषेक करया ।” 10 अर यो के, “हे परभु, शरुआत म्ह तन्नै धरती अर जो कुछ अकास म्ह सै उन ताहीं बणाया, अर सुर्ग तेरे हाथ्याँ की कारीगरी सै । 11 वे तो नाश हो जावेंगे, पर तू सदा खात्तर जिन्दा रहवैगा, अर वे सारे लत्ते की ढाळ पुराणे हो जावेंगे, 12 अर तू उन ताहीं चादर की तरियाँ लपेटैगा, अर वे लत्ते की ढाळ बदल जावेंगे पर तू कदे न्ही बदलैगा, अर तू सदा खात्तर जिन्दा रहवैगा ।” 13 अर सुर्गदूताँ म्ह तै उसनै किसतै कद कह्या, “तू मेरै सोळी ओड़ बैठ, यानी के तू हक की जगहाँ पै बैठ । जिव ताहीं के मै तेरे बैरियाँ नै पूरी तरियाँ तै हरा ना दूँ?” 14 के वे सारे परमेसवर की सेवा-पाणी करण आळी आत्मा कोनी, जो उद्धार पाण आळा कै खात्तर मदद करण नै भेजी जावै सै?

## 2


### \*\*\*\*\*

1 इस करके म्हारे ताहीं जो कुछ सिखाया गया था उसका पालन करण खात्तर हमनै और सावधान रहणा चाहिए । तब हम सच्चाई तै दूर न्ही जावांगे । 2 क्यूँके जो वचन सुर्गदूताँ कै जरिये कह्या गया था । जिव वो सच साबित होया अर हरेक अपराध अर हुकम ना मानण का परमेसवर नै उन ताहीं दण्ड दिया । 3 तो हम माणस इसे महान उद्धार नै अणदेखा करके किस तरियाँ बच सकाँ सां? इस महान उद्धार की पैहली बार परभु यीशु नै घोषणा करी थी, अर जिन चेल्याँ नै उस ताहीं सुण्या, तो चेल्याँ नै म्हारे ताहीं साबित करके दिखा दिया के यो सच सै । 4 अर गेल्या ए परमेसवर भी अपनी मर्जी कै मुताबिक चमत्कार, अर अनोक्खे काम्माँ, अर कई ढाळ के सामर्थ के काम्माँ, अर पवित्तर आत्मा के वरदान्नाँ के बांडण के जरिये इन वात्ताँ नै सच साबित करदा रहया । 5 उसनै उस आण आळी दुनिया ताहीं जिसका जिक्र हम करण लागरे साँ, सुर्गदूताँ कै अधीन न्ही करया, पर अपने बेटटे के अधीन कर दिया । 6 पवित्तर ग्रन्थ म्ह किते, किसे नै परमेसवर तै यो कह्या सै, के “माणस के सै के तू उसकी सुधि लेवै सै? या माणस का बेटटा के सै, के तू उसकी फिक्र करै सै? 7 तन्नै उस ताहीं सुर्गदूताँ तै थोड़ा ए कम महत्वपूर्ण बणाया, तन्नै उस ताहीं राजा की तरियाँ महिमा अर सम्मान दिया, अर सब किमे उसके अधीन कर दी । 8 तन्नै उस ताहीं सारी चिज्जाँ पै हक दिया ।” इसा लागै सै के परमेसवर नै सारा कुछ उसके अधीन कर दिया सै, उरै ताहीं के कुछ भी न्ही बचा जो उसके अधीन ना हो, पर हम देख सका साँ, के सारी चिज्जें उसके अधीन म्ह न्ही ।

9 पर हम यो देख्वाँ साँ, के यीशु ताहीं कुछ बखत खात्तर सुर्गदूताँ तै कम करया गया था, ताके परमेसवर के अनुग्रह तै वो हरेक किसे खात्तर मर सकै, क्यूँके उसनै दुख टाया अर मर गया, इस करके परमेसवर नै उस ताहीं महिमा अर सम्मान दिया । 10 परमेसवर नै जो कुछ भी बणाया सै, वो सारा अपने खात्तर सै, अर उस ताहीं योए आच्छा लाग्या के जिव वो भोत सारे माणसाँ ताहीं अपनी महिमा म्ह साँझा करै, तो यीशु मसीह जो उनका उद्धारकर्ता सै, उसके दुख टाण कै जरिये उन ताहीं सिध्द बणा लेवैगा । 11 क्यूँके जो माणसाँ नै उनके पाप तै साफ करै सै, अर जिन माणसाँ के पाप साफ होण लागरे सै, दोन्नु एक ए पिता परमेसवर की ऊलाद सै, इस्से कारण वो उननै भाई-भाण कहण तै कोनी सरमान्दा । 12 अर वो (मसीह) परमेसवर तै कहवै सै, “मै अपने भाईयाँ ताहीं बताऊँगा के तन्नै मेरे खात्तर कितने भले काम करे सै, अर जिव आराधना करण खात्तर मण्डली म्ह कट्टे होंगे तो मै तेरी महिमा करूँगा ।” 13 अर वो दुबारा कहवै सै, के मै उन माणसाँ कै साथ सूँ, “जो परमेसवर नै मेरे ताहीं दिए सै ।” 14 ज्यातै जिव के परमेसवर के बच्चे सै, जो के माँस अर लहू तै बणे सै, अर उसका बेटटा (यीशु मसीह) भी इन्सान बण्या, इस करके वो एक इन्सान के रूप म्ह ए मर सके था, अर सिर्फ मरण तै ए वो शैतान की शक्ति नै तोड़ सके था, जिसके धोरे मौत की शक्ति थी । 15 अर इस तरियाँ यीशु नै उन सारे माणसाँ ताहीं मुक्त कर दिया जो हर बखत गुलाम्माँ की तरियाँ जीवै थे, अर वे मरण तै डरे थे । 16 क्यूँके मसीह यीशु तो सुर्गदूताँ ताहीं न्ही बल्के अब्राहम की पीढ़ी नै सम्भाळै सै । 17 इस कारण उस ताहीं चाहिये था, के वो हर वात्ताँ म्ह विश्वासी भाईयाँ की तरियाँ

बणौ, ताके वो परमेसवर का महायाजक बण सकै, जो दयालु अर विश्वास जोगगा सै, अर वो माणसां के पापां की माफी खात्तर खुद नै बलिदान कर सकै। <sup>18</sup>क्यूँके यीशु का इम्तिहान हो लिया अर उसनै खुद दुख टाया सै, इस करके वो इम्तिहान म्ह पड़े होए माणसां की मदद कर सकै सै।

### 3



<sup>1</sup>ज्याते हे विश्वासी भाईयो, थम जो परमेसवर के कुह्वाओ सां, सुगं म्ह साइझी होण खात्तर बुलाये गये सां, यीशु पै ध्यान द्यो, जो म्हारे खात्तर परमेसवर की ओड़ तै भेज्जा गया प्रेरित अर महायाजक सै, जिसपै हम विश्वास करा सां। <sup>2</sup>यीशु परमेसवर के प्रति वफादार था, जिस ताहीं उसनै नियुक्त करया था, जिसा मूसा नबी नै भी वफादारी तै पूरा काम करया जो भी परमेसवर नै उस ताहीं करण खात्तर कह्या था। <sup>3-4</sup>जिसा के घर बणाण आळे माणस नै घर तै बढ़के सम्मान मिल्ले सै। इस्से तरियां यीशु मूसा नबी तै घणा सम्मान जोगगा सै। क्यूँके हरेक घर का कोए ना कोए बणाण आळा होवै सै, पर जिसनै सारा किमे बणाया वो परमेसवर सै। <sup>5</sup>मूसा नबी तो परमेसवर के घर के माणसां खात्तर सेवक की तरियां विश्वास जोगगा रहया। के जो मूसा नबी नै करया था, वो दिखावै सै के परमेसवर आण आळा बखत म्ह के करण आळा सै। <sup>6</sup>पर परमेसवर के कुणवे म्ह मसीह, तो एक बेदटे के रूप म्ह विश्वास लायक सै, अर उस आस म्ह विश्वास नै बणाए राक्खे सै, तो हमे उसका कुणवा सां। <sup>7</sup>जिसा परमेसवर अपने पवित्र आत्मा के जरिये कहवै सै, “जै आज थम परमेसवर की आवाज सुणो,

<sup>8</sup>“तो अपने मन ताहीं कटोर ना करो, जिसा के छो दुवाण के बखत अर इम्तिहान के दिन जंगळ म्ह थारे पूर्वजां नै करया था। <sup>9</sup>थारे पूर्वजां नै चाळीस साल तक मेरे महान काम देखण के बाद भी चुनौती देन्दे होए मेरे ताहीं परख्या था। <sup>10</sup>इस कारण मै उस बखत के माणसां तै गुस्सा रहया, अर कह्या, ‘उननै मेरे पाछै चालणा न्ही चाह्या, अर इसा करण तै इन्कार कर दिया जो मन्नै उन ताहीं करण का आदेश दिया था।’ <sup>11</sup>फेर मन्नै छो म्ह आके कसम खाके कह्या, के ‘उस आराम की जगहां म्ह थम बड़ण न्ही पाओगे, जित्त मै उननै आराम देऊंगा।’ ” <sup>12</sup>हे विश्वासी भाईयो, चौक्कस रहो के थारे म्ह इसा बुरा अर अविश्वासी मन ना हो, जिसतै थम जिन्दे परमेसवर तै दूर हो जाओ। <sup>13</sup>जिव भी थम पवित्र ग्रन्थ नै यो कहते सुणो, “आज का दिन” तो एक-दुसरे नै उत्साहित करते रहो, इसा ना हो पाप थारे ताहीं धोक्खा देवै, अर थम परमेसवर के खिलाफ जिद्दी हो जाओ। <sup>14</sup>क्यूँके जै हम अन्त तक मजबुत्ती के साथ अपने शरुआती विश्वास नै थाम्मे राक्खां सां, तो हम मसीह के साइझीदार बण जावां सां। <sup>15</sup>जिसा पवित्र ग्रन्थ कहवै सै, “जै आज थम परमेसवर का शब्द सुणो, तो अपने मनां नै कटोर ना करो, जिसा के छो दुवाण के बखत थारे पूर्वजां नै करया था।” <sup>16</sup>कौण थे वे माणस जिननै परमेसवर की आवाज सुणके भी उस ताहीं छो दुवाया? ये वे माणस थे जिन ताहीं मूसा नबी मिस्र देश तै बाहर लेके गया था। <sup>17</sup>चाळीस साल तक परमेसवर ताहीं इन माणसां नै गुस्सा दुवाया, ये इस्राएल के माणस थे, जिननै मरुस्थल म्ह पाप करया अर वे मरगे, अर उनकी लाश जंगळ म्ह पड़ी रहीं? <sup>18</sup>अर जिव परमेसवर नै कसम खाई के “वे उस आराम की जगहां म्ह कदे न्ही बड़ पावेंगे, जित्त मै उननै आराम देऊंगा।” वो वास्तव म्ह उन माणसां के बारे म्ह बात करे था जिननै उसका विरोध करया था। <sup>19</sup>इस बात तै हमनै यो बेरा लाग्या सै, के वे अपने अविश्वास के कारण बड़ न्ही सके।


### 4



<sup>1</sup>इस करके परमेसवर नै म्हारे ताहीं वादा करया सै, के हम आराम की जगहां पै जावेंगे, क्यूँके आराम की जगहां म्ह बड़ण का वादा इब भी सै, तो हमनै भोत सावधान रहणा चाहिए, इसा ना हो के थारे म्ह तै कोए माणस आराम की जगहां जाण म्ह नाकामयाब हो जा, जिस ताहीं देण का वादा

परमेसवर नै म्हारे ताहीं करया सै।<sup>2</sup> जिस तरियां हमनै यीशु मसीह के बारे म्ह सुसमाचार सुण्या, अर उन इस्राएल के माणसां नै भी जिन नै आराम की जगहां म्ह बड़ण के बारे म्ह सुसमाचार सुण्या पर उननै उस सुसमाचार पै बिश्वास न्ही करया, इस कारण उनके खात्तर संदेश बेकार टैहराया।<sup>3</sup> पर म्हारे ताहीं जो परमेसवर नै कह्या सै, हम उसपै भरोस्सा करां सां, अर हम आराम की जगहां म्ह बडांगे। जिंसा औरां खात्तर परमेसवर नै कह्या सै, “मन्नै अपणे छो म्ह कसम खाई के वे मेरी आराम की जगहां म्ह बड़ण न्ही पावेंगे।” फेर भी उसके काम दुनिया के बणाण तै पैहल्याए पूरे हो लिए थे।<sup>4</sup> क्यूँके सातमै दिन कै बारे म्ह परमेसवर नै पवित्र ग्रन्थ म्ह न्यू कह्या सै, “परमेसवर नै सातमै दिन अपणे सारे काम्मां ताहीं निपटा कै विश्राम करया।”<sup>5</sup> हमनै यो भी पढ़या के उसनै बाद म्ह कह्या, के “वे मेरे आराम की जगहां म्ह बड़ण न्ही पावेंगे।”<sup>6</sup> इस्राएल के वे माणस जिन ताहीं सुसमाचार सुणाया गया था, वो आराम की जगहां म्ह बड़ण म्ह नाकामयाब रहे, क्यूँके उननै परमेसवर के हुकम ताहीं कोनी मान्या था, पर उस आराम की जगहां म्ह जाण का इब भी मौक्का सै।<sup>7</sup> ज्यांतै उसनै आराम की जगहां म्ह बड़ण का एक और मौक्का तय करया, अर वो मौक्का आज सै। म्हारे पूर्वजां के बिद्रोह के कई साल्लां बाद, दाऊद के मुँह तै यो कह्या था, “जै आज थम उसकी आवाज सुणो, तो उस ताहीं सुणके इन्कार ना करो।”

<sup>8</sup> हम यो भी जाणा सां के परमेसवर नै जो आराम की जगहां का वादा करया सै, वो कनान देश कोनी, जिसपै यहोशू नै म्हारे पूर्वजां की अगुवाई करी थी, जै यो कनान देश होन्दा, तो परमेसवर नै बाद म्ह यो न्ही कह्या होगा, के एक और मौक्का सै।<sup>9</sup> यो भी हो सकै सै, के परमेसवर के माणसां नै इस तरियां के तरिकके तै आराम करणा पड़े, जिस तरियां तै परमेसवर नै दुनिया बणाण के सातवे दिन आराम करया था।<sup>10</sup> क्यूँके जो उसके आराम की जगहां म्ह बड़या सै, उसनै भी परमेसवर की ढाळ अपणे काम पूरे करके विश्राम करया सै।<sup>11</sup> इस करके हम उस आराम की जगहां म्ह बड़ण की कोशिश बड़ी मेहनत के साथ करा, ताके कोए भी उन माणसां की तरियां ना बणे जिननै परमेसवर के हुकम ताहीं मानण तै इन्कार कर दिया, फेर हम उसकी आराम की जगहां म्ह बड़ण पावांगे।<sup>12</sup> क्यूँके परमेसवर का वचन जिन्दा, अर प्रभावशाली सै, अर वो एक दोधारी तलवार तै भी घणा पैना सै। वो प्राण अर आत्मा ताहीं, अर गाँठ-गाँठ अर गुद्रे-गुद्रे ताहीं न्यारा करके आरम-पार पाड़ दे सै अर मन की भावनायां अर विचारां ताहीं परख ले सै।<sup>13</sup> जिस ताहीं लेखा देणा सै, उसकी नजर तै कोए भी प्राणी छुप्या कोनी। सारी चीज उसके स्याम्ही साफ अर खुली होइ सै।



<sup>14</sup> ज्यांतै जिव म्हारा इसा बड़ड़ा महायाजक सै, जो सुर्ग म्ह चल्या गया सै, यानिके परमेसवर का बेट्टा यीशु, तो आओ, हम बिश्वास म्ह पक्के बणे रहवां जो हमनै सारे माणसां के आगै स्वीकार करया सै।<sup>15</sup> क्यूँके म्हारा यो महायाजक जो यीशु मसीह सै, म्हारी हरेक कमजोरियां नै जाणे सै, बल्के वो सारी बात्तां म्ह म्हारै तरियां परख्या तो गया, फेर भी निष्पाप लिक्डया।<sup>16</sup> इस करके आओ, हम परमेसवर के स्याम्ही बिना डर के जावां जो करुणा तै भरा होया सै, फेर परमेसवर म्हारै पै दया करैगा, अर जिव हमनै मदद की जरूरत होगी तो वो म्हारी मदद करैगा।

## 5

<sup>1</sup> परमेसवर इस्राएल के माणसां म्ह तै एक महायाजक ताहीं चुणै सै, अर वो महायाजक ताहीं नियुक्त करै सै, ताके वो उसकी सेवा भेट चढ़ाके, अर माणसां के पापां की माफी के खात्तर बलि चढ़ाके कर सकै।<sup>2</sup> वो बेअक्ले अर भूले भटक्यां के गेल्या नर्मी तै बरताव कर सकै सै, ज्यांतै वो आप भी कमजोरी तै धिरया सै।<sup>3</sup> उसके खात्तर एक महायाजक के रूप म्ह अपणे अर माणसां के पापां नै दूर करण खात्तर बलि चढ़ाणा जरूरी सै।<sup>4</sup> कोए भी इन्सान अपणे-आपनै तै महायाजक होण का पद न्ही ले सकता। एक माणस सिर्फ महायाजक जिब्बे बण सकै सै, जिव परमेसवर उस ताहीं याजक होण के खात्तर बुलावे सै, जिस तरियां हारुन ताहीं परमेसवर नै पैहला महायाजक होण खात्तर बुलाया था।

5 उससे तरियां ए मसीह नै भी खुद ताहीं महायाजक बणाकै खुद का सम्मान करण का फैसला कोनी करया, परमेसवर नै उस ताहीं यो सम्मान दिया जिब उसनै कहा, के “तू मेरा बेटा सै, आज मन्नै ए तेरे ताहीं पैदा करया सै।” 6 एक और जगहां परमेसवर उस ताहीं दुबारा कहवै सै, “तू मलिकिसिदक\* की रीत पै सारी हाण खात्तर याजक सै।” 7 जिब यीशु इस दुनिया म्ह रहवै था, तो टाइडू शब्दां तै रुक्का मार-मारकै अर आँसू बहा-बहाकै परमेसवर तै प्रार्थनाएँ अर बिनती करी, जो उस ताहीं मौत तै बचा सकै था, अर आदरपूर्ण समर्पण कै कारण परमेसवर नै उसकी सुण ली। 8 परमेसवर का बेटा होण पै भी मसीह यीशु नै दुख ठा-ठाकै भी उसका हुकम मानना सिख्या। 9 फेर सिध्द हो जाणकै बाद वो खुद उन सब खात्तर, जो उसके हुकमां नै मानणीयां कै खात्तर अनन्त काल के उद्धार का कारण बणग्या। 10 अर उस ताहीं परमेसवर की ओड़ तै मलिकिसिदक की रीत पै महायाजक का पद मिल्या।

### \*\*\*\*\*

11 इसके बारे म्ह हमनै घणीए बात कहणी सै, पर उनके बारे म्ह खुलकै जिक्र करणा मुशिकल सै, क्यूँके थम परमेसवर के वचन के बारे म्ह जाणण खात्तर आलसी होगे सों। 12 बखत कै विचार तै तो थमनै शिक्षा देण आळा बण जाणा चाहिए था, पर थमनै तो इब भी इसे माणस की जरूरत सै, जो थारे ताहीं नये सिरे तै परमेसवर की शिक्षा की शरुआती बात ए सिखावै, थम तो इब्वे भी उन छोटे-वाळक की ढाळ सों, जिन ताहीं दूध चाहिए, पर भारी खाणा न्ही। 13 याद राख्वों जो माणस इब भी वचन की शरुआती शिक्षा नै सीखण लागरे सै, वे न्ही जाणदे, के परमेसवर धर्मी बणण के बारे म्ह के कहवै सै, वो दूध पीन्दे वाळक की तरियां सै। 14 पर जिस माणस की तुलना श्याणे माणस तै करी जा सै, जो ठीक तै खाण चबा-चबा के खा सकै सै, वो यो माणस सै जिसका विश्वास पक्का सै अर जो खरी शिक्षा नै समझ सकै सै, उसनै आच्छे अर बुरे की पिच्छाण करणा सीखा लिया सै।

## 6

1 इस करके जिब म्हारे ताहीं मसीह के बारे म्ह शरु म्ह सिखाया गया था, तो आओ हम उन ताहीं छोड़ के खरी शिक्षा पै चर्चा करण खात्तर आगवै बढदे जावां। शरुआती शिक्षा जिसा पाप तै भरे काम तै जो मौत नै लेकै आवै सै, परमेसवर पै विश्वास करण नै नीम की तरियां ना धरो, 2 अर वपतिस्मा अर हाथ धरण, अर मरे होया के जिन्दा उठण, अर आखरी न्याय की शिक्षा रूपी नीम दुबारा ना बणावां। 3 जै परमेसवर नै चाह्या तो मै थमनै खरी शिक्षा दिऊंगा। 4 क्यूँके जो माणस अपने विश्वास नै खो दे सै, तो उन ताहीं फेर तै पश्चाताप करण कै खात्तर उलटा न्ही ल्याया जा सकता। एक बार उननै परमेसवर की सच्चाई नै जाणा अर सुगं तै वरदान्नां ताहीं पाया, अर बाकियां की तरियां पवित्र आत्मा भी पाया। 5 अर उननै अनुभव करया था के परमेसवर का वचन आच्छा सै, अर वे परमेसवर की आण आळी शक्ति का अनुभव कर चुके थे। 6 उननै फेर तै उल्टा ल्याण का कोए तरिकका कोन्या, क्यूँके वे परमेसवर के बेटे ताहीं अपने खात्तर दुबारा क्रूस पै चढ़ावै सै, अर सबके स्याम्ही उसपै कलंक लगावै सै। 7 जिन माणसां नै आच्छी शिक्षा मिलै सै, वे उस जमीन की तरियां सै, जित्त बारिस होन्दी ए रहवै सै, जै जमीन बढ़िया सै, तो या किसान खात्तर बढ़िया फसल देवै सै, अर उसपै परमेसवर की आशीष होवै सै। 8 पर दुसरे माणस उस जमीन की तरियां सै जो काण्डे अर खरपतवार उगावै सै तो या बेकार सै। उस ताहीं परमेसवर के जरिये श्राप दिये जाण का खतरा सै, अर वो आग तै नाश हो जावैगा।

9 हे प्यारे भाईयो, भलाए हम इस ढाळ की बात करण लागरे सों, पर हम असलियत म्ह विश्वास न्ही करते के यो थारे खात्तर लागू होवै सै। हमनै विश्वास सै के थम बढ़िया चिज्जां खात्तर बणाये गये सों, जो उद्धार के साथ आवै सै। 10 जिसा के थमनै आच्छे काम करे सै, अर इब थम परमेसवर के नाम म्ह विश्वासी भाईयां के खात्तर प्यार तै, सेवा के काम करण लागरे सों, इसकी बजह तै परमेसवर थारे ताहीं भुल्लैगा न्ही, क्यूँके वो धर्मी सै। 11-12 आलसी ना बणो। पर कड़ी मेहनत करण आळा की

\* 5:6 5:6 मलिकिसिदक अब्राहम के बखत का एक याजक अर सम्राट था। उत्पत्ति 14:17-24

तरियां थमनै इन परेमपूर्वक काम्मां ताहीं जारी राखणा चाहिए, ताके परमेसवर के वादे पाण खात्तर थारी आस पक्की हो।

XXXXXXXXXX

13 जिव परमेसवर नै अब्राहम तै करार करया, तो तब खुद परमेसवर तै बड़ड़ा कोए और न्ही था, जिसकी कसम ली जा सकै, इस करके अपनी खुद की कसम लेन्दे होए परमेसवर नै अब्राहम तै कहा, 14 "मै सचमुच तेरे ताहीं घणा आशीष दियुंगा, अर तेरे वंशां नै अनगिणत बना दिऊंगा।" 15 अब्राहम नै भोत धीरज धरण के बाद वादा का ईनाम मिल्या। 16 माणस तो अपने तै किसे बड़े का नाम लेके कसम खाया करै सै, अर उन म्ह कसम के जरिये बात का फैसला होवै सै, अर सारा विवाद खतम हो जावै सै। 17 योए कारण था, के परमेसवर नै भी कसम खाई थी। इस बात तै वो उन माणसां नै साफ तरियां तै दिखाणा चाहवै था, के वो जो भी वादा करै सै, उस ताहीं वो पूरा करै सै। 18 तो उरै दो बात सै उसका वादा अर उसकी कसम जो कदे बदल न्ही सकदे अर जिनके बारे म्ह परमेसवर कदे झूठ कोनी बोल सकता। इस करके हम जो परमेसवर के धोरे बचण आये सां अर जो आस उसनै म्हारे ताहीं दी सै उस ताहीं थाम्मे होए घणे उत्साहित सां। 19 जिस तरियां किस्ती ताहीं लंगर तै बाँधया जावै सै, जो किस्ती नै पकड़के राखे सै, इस्से तरियां तै आस म्हारी जिन्दगी नै मजबूत अर टिकाए राखे सै, अर म्हारी आस यीशु सै, वो परमेसवर के धोरे सुगं म्ह पवित्र मन्दर म्ह परदे के पाच्छे, पोहचा सै। 20 जित्त यीशु नै मलिकिसिदक\* की रीत पे सारे हाण के बखत का महायाजक बणके, म्हारे खात्तर अगुवां के रूप म्ह दाखल होया सै।

## 7

XXXXXXXXXX

1-3 यो मलिकिसिदक शालेम नगर का राजा अर परमप्रधान परमेसवर का याजक था, उनके नाम का मतलब "राजा" सै जो नियम के साथ न्याय करै सै, शालेम के राजा का मतलब सै "शान्ति का राजा।" पवित्र ग्रन्थ म्ह उसके माँ-बाप, उसके पूर्वज, या उसकी मौत या जन्म के बारे म्ह, कुछ भी न्ही लिख्या गया सै। वो हमेशा खात्तर एक याजक सै। इस करके वो परमेसवर के बेटे की तरियां सै। जिव अब्राहम नै चार राजां की हत्या कर दी थी, तो मलिकिसिदक नै उसतै मुलाकात करी, अर उस ताहीं आशीवाद दिया। अब्राहम नै युध्द म्ह जीत हासिल करी, अर सारी चिज्जां का दसमां हिस्सा भी दिया। 4 इब इसपै ध्यान करो के वो किसा महान् था जिस ताहीं पूर्वज अब्राहम नै दुश्मनां की लूट के बढ़िया तै बढ़िया माळ का दसमां हिस्सा दिया। 5 मूसा नबी के नियम-कायदे बतावे सै के लेवी के वंशज जो याजक का पद पावै सै, उननै इस्राएल के माणसां तै दसमां हिस्सा लेणा चाहिए, यानिके उसके खुद के माणस तै, पर वे याजक अर दुसरे विश्वासी भाईयाँ की तरियां सै, क्यूँके वे सब अब्राहम के वंश के सै। 6 पर इसनै, जो लेवी-वंशी भी न्ही था, अब्राहम तै दसमां हिस्सा लिया, फेर भी अब्राहम वो था जिसके धोरे परमेसवर का वादा था, फेर भी मलिकिसिदक नै उस ताहीं आशीवाद दिया। 7 इस म्ह कोए शक कोनी के जो आशीवाद देवै सै, वो उस माणस तै बड़ड़ा हो सै जिस ताहीं आशीवाद देवै सै। 8 उरै तो याजक दसमां हिस्सा लेवै सै, भलाए वो सिर्फ एक माणस सै, जो जीवै सै अर फेर मर जावै सै, पर मलिकिसिदक, जिसनै अब्राहम तै दसमां हिस्सा लिया, वो इब भी जिन्दा सै, जिसा के पवित्र ग्रन्थ कहवै सै। 9 के जिव अब्राहम नै मलिकिसिदक ताहीं दसमां हिस्सा दिया, जिव ताहीं लेवी माणसां का जन्म अब्राहम के वंश म्ह न्ही होया था। पर इब भी उसके वंश होण के कारण, यो इस तरियां सै के लेवी नै खुद ही अब्राहम के जरिये मलिकिसिदक ताहीं दसमां हिस्सा दिया। 10 क्यूँके जिस बखत मलिकिसिदक उसके पिता तै मिल्या, उस बखत वो अपने पिता की देह म्ह था।

XXXXXXXXXX

\* 6:20 6:20 मलिकिसिदक अब्राहम के बखत का एक याजक अर सम्राट था। उत्पत्ति 14:17-24

11 माणसां ताहीं जिन याजकां के आधार पै नियम-कायदे दिए गये थे, जो हारुन के परिवार का अर लेवी के गोत्र का था, पर ये याजक सिध्द न्ही बण सकै। इस करके यो जरूरी था, के एक और याजक आवै, जो हारुन जिंसा न्ही, पर मलिकिसिदक जिंसा हो।<sup>12</sup> क्यूँके इब एक्के तरियां का याजक कोनी, तो नियम-कायदे का भी बदलना जरूरी सै।<sup>13</sup> क्यूँके हम मसीह के बारे म्हे ये बात करण लागरे सां, जो एक अलग गोत्र तै थे। उस जनजात्ति म्हे तै किसे नै भी वेदी\* पै एक याजक के रूप म्हे सेवा न्ही करी,<sup>14</sup> सब जाणै सै, के म्हारा प्रभु यीशु यहूदा के गोत्र म्हे तै पैदा होया सै, मूसा नबी नै यहूदा के किसी भी वंशज के बारे म्हे न्ही बताया, जो यहूदा के याजक बणगे अर यहूदा का कोए वंशज कदे याजक न्ही बणा।<sup>15</sup> इब हम और भी आच्छी तरियां तै समझा सां, जिब मलिकिसिदक के तरियां एक और याजक पैदा होण आळा था, जो के यीशु मसीह सै।<sup>16</sup> यीशु का याजक बणणा, नियम-कायदा नै पुगाण पै, या लेवी के वंश म्हे तै पैदा होण पै आधारित कोनी। पर वो अपने अविनाशी जीवन की शक्ति के कारण याजक बणगया।<sup>17</sup> क्यूँके उसके बारे म्हे पवित्र ग्रन्थ कहवै सै, “तू मलिकिसिदक की रीत पै युगानुयुग याजक सै।”<sup>18</sup> इस करके, पैहल्डी आज्ञा कमजोर अर बेअसर होण के कारण बदलगी।<sup>19</sup> (ज्यातै के नियम-कायदे नै किसे बात ताहीं सिध्द कोन्या करया), अर उसकी जगहां पै एक बेहतर उम्मीद सै, जो के यीशु मसीह सै, जिसके जरिये हम परमेसवर के लोवे जा सकां सां।<sup>20</sup> जिब यीशु मसीह ताहीं परमेसवर नै याजक बणा दिया तो परमेसवर नै कसम खाई।<sup>21</sup> क्यूँके लेवी के वंश तो बिना कसम याजक बणाए गये, पर यीशु मसीह बिना कसम के परमेसवर की ओड़ तै नियुक्त करया गया, जिसनै उसके बारे म्हे कहुया, “प्रभु नै कसम खाई, अर उसतै फेर ना पछतावैगा के तू युगानुयुग याजक सै।”<sup>22</sup> इस करके यीशु नै म्हारे ताहीं परमेसवर के गैल सब तै आच्छे करार का वादा करै सै।

<sup>23</sup> यीशु के याजक होण का एक और फायदा सै, पैहले तो घणी बड्डी गिणती म्हे याजक बणदे आये, क्यूँके हरेक याजक की मौत के साथ उसकी सेवा खतम हो जावै थी।<sup>24</sup> यीशु युगानुयुग जिन्दा रहवै सै, इस कारण उसके याजक का पद कोए न्ही ले सकता।<sup>25</sup> इस्से खात्तर जो यीशु के जरिये परमेसवर के धारे आवै सै, वो उनका पूरा-पूरा उद्धार कर सकै सै, क्यूँके वो उनके खात्तर बिनती करण ताहीं सारी हाण जिन्दा सै।<sup>26</sup> इसाए महायाजक म्हारी जरूरतां नै पूरा कर सकै सै, जो पवित्र, अर बेकसूर, शुद्ध, अर पापमुक्त हो, अर सुर्ग तै भी जिस ताहीं ऊँच्चा करया होया हो।<sup>27</sup> जो महायाजक हारुन के वंश तै सै, उसनै जरूरत कोनी के हरेक दिन पैहल्या अपने पापां के खात्तर बलिदान चढ़ावै, क्यूँके यीशु नै अपने-आप ताहीं बलिदान चढ़ाके उसनै एक ए बर म्हे पूरा कर दिया।<sup>28</sup> क्यूँके नियम-कायदे तो कमजोर माणसां ताहीं महायाजक नियुक्त करै सै, पर कसम जो नियम-कायदा के बाद आवै सै, उस बेटटे नै नियुक्त करै सै जो युगानुयुग के खात्तर सिध्द महायाजक सै।

## 8

????????????????????

1 इब जो बात हम कहण लागरे सां उन म्हे तै सारया तै बड्डी बात या सै म्हारे धारे इस तरियां का महायाजक सै, जो सुर्ग पै महामहीम के सिंहासन के सोळी ओड़ सै,<sup>2</sup> म्हारा महायाजक सब तै घणी पवित्र जगहां अर उस सच्चे तम्बू (सुर्ग म्हे) काम करै सै, जो के माणसां के जरिये न्ही, परमेसवर के जरिये बणाया गया सै।<sup>3</sup> क्यूँके हरेक महायाजक पापां की माफी के खात्तर बलिदान अर भेंट चढ़ावै सै, इस कारण जरूरी सै के म्हारे महायाजक मसीह यीशु के धारे भी चढ़ाण खात्तर किमे हो।<sup>4</sup> जै वो धरती पै होंदा तो कदे भी याजक न्ही होंदा, ज्यातै के मूसा के नियम-कायदे के मुताबिक भेंट चढ़ाण खात्तर याजक सै।<sup>5</sup> वे सुर्ग म्हे की चिज्जां के नकल अर छाया की सेवा करै सै, जिंसा जिब मूसा नबी तम्बू बणाण पै था, तो उस ताहीं या चेतावनी मिली, “लखा, जो नमूना तेरे ताहीं पहाड़ पै दिखाया गया था, उसके मुताबिक सारा किमे बणाणा।”<sup>6</sup> पर जो काम यीशु ताहीं दिया गया सै, वो

\* 7:13 7:13 वेदी-परमेसवर ताहीं भेंट चढ़ाण खात्तर एक जगहां



दुसरे याजकों तै दिए गये काम तै ज्यादा बाध सै, क्यूँके वो जिस करार का बिचौलिया सै, वो पुराणे करार तै बढ़िया सै, अर बढ़िया चिज्जां की कसमां पै आधारित सै।

7 क्यूँके जै वो पैहल्डा करार बेकसूर होन्दा, तो दुसरे करार के खात्तर मौक्का ना टोहया जान्दा। 8 पर प्रभु उनपै दोष लाकै कहवै सै, “प्रभु कहवै सै, लखाओ, वे दिन आवै सै के मै इस्राएल के माणसां के गेल्या, अर यहूदा के माणसां के गेल्या नया करार करूंगा। 9 यो उस करार की तरियां न्ही होवैगा, जिसा मन्नै उनके पूर्वजां के गेल्या उस बखत करया था, जिव मन्नै उनका हाथ मिस्र देश तै लिकाइ ल्याण खात्तर पकडचा था, क्यूँके प्रभु कहवै सै, के वे मेरे करार के बिश्वासी न्ही रहे, ज्यांतै मन्नै उनतै मुँह फेर लिया। 10 फेर प्रभु कहवै सै, के जो करार मै आण आळे दिनां म्ह इस्राएल के माणसां के गेल्या करूंगा, वो यो सै के मै अपणे नियमां नै उनके मनां म्ह गेरूंगा, मै उन ताहीं अपणे नियमां के बारे म्ह उननै याद दुआऊंगा, अर मै उनका परमेसवर ठहरूंगा अर वे मेरे माणस ठहरेंगे। 11 अर हरेक अपणे यहूदी भाई ताहीं अर अपणे सगे-सम्बन्धी ताहीं या शिक्षा न्ही देवैगा, के तू प्रभु ताहीं पिच्छाण, क्यूँके छोट्टे माणसां तै लेकै बड़े माणसां ताहीं सारे मन्नै जाण लेवेंगे। 12 मै उनकी दुष्टता की ओड़ दया करूंगा, अर उनकै पापां नै दुबारा याद कोनी करूंगा।” 13 परमेसवर नै इस ताहीं नया करार कह्या, इस करके उसनै पैहल्डे करार ताहीं पुराणा ठहरा दिया, जो चीज पुराणी अर घिसी होई सै उसका मिट जाणा जरूरी सै।

## 9

### इव्रानियों 9:1-12

1 इब, उस पैहल्डे करार म्ह भी सेवा के नियम थे, अर इसी पवित्र जगहां थी, जो इस दुनिया की थी। 2 यानी के एक तम्बू बणाया गया जिस म्ह दो कमरे थे, पैहले कमरे म्ह दीवट\*, मेज अर मेज के उप्पर भेंट की चढ़ाई होई रोटियां थी, अर वा पवित्र जगहां कुह्वावे सै। 3 ओड़े एक परदा था उस परदे के पाछे दुसरा कमरा था, जो परमपवित्र जगहां कुह्वावे सै। 4 उस दुसरे कमरे म्ह सोन्ने की धूपदानी, अर चौगरदके सोन्ने तै मन्ढया होया करार का सन्दूक था, अर उस म्ह मन्ना तै भरया होया सोने का मर्तबान भी था, अर हारुन की छड़ी जिस म्ह फूल फळ आ गये थे, अर करार की पत्थर की पटियां भी थी। 5 इसके अलावा सन्दूक के उप्पर दोन्नु ओड़ तेजोमय करुब थे, जो प्रायश्चित्त के ढक्कण जिस ताहीं प्रायश्चित्त के दिन पापबलि के लहू तै छिड़क दिया जावै था। इनका एक-एक करके जिक्र करण का इब्बै बखत न्ही सै।

6 ये चीज इस तरियां तै धरी गई थी। उस पैहल्डे कमरे म्ह परमेसवर की आराधना करण के खात्तर याजक हरेक दिन पैहले कमरे म्ह जाया करै था। 7 पर दुसरे कमरे म्ह यानी घणी पवित्र जगहां म्ह, सिर्फ महायाजक साल भर म्ह एक ए बर जावै सै, अर बलिदान के जानवर का लहू लिये जाया करै था, जिस ताहीं वो अपणे खात्तर अर माणसां की भूल-चूक म्ह करया पापां खात्तर भेंट चढ़ावै सै। 8 इसतै पवित्र आत्मा योए दिखावै सै, के पुराणे करार के मुताबिक दुसरा कमरा यानी घणी पवित्र जगहां जो सुगं म्ह सै, जित्त परमेसवर रहवै था, ओड़ तक पुहचण का रास्ता बन्द था। 9 यो तम्बू आज के दिन का एक उदाहरण सै, जिस म्ह याजक भेंट अर बलिदान चढ़ावै सै, जिव माणस बलिदान की भेंट लेके आवै थे, तो उनकी अन्तरात्मा समझ न्ही पावै थी, के इब उसके पाप माफ होए सै या न्ही। 10 क्यूँके ये उपहार अर बलिदान सिर्फ खाण-पीण की चिज्जां, अर कई ढाळ की शुद्ध करण की शारीरिक विधियां, तब तक थी, जिव तक परमेसवर कोए नई विधि न्ही देता।

### इव्रानियों 9:13-15

11 पर जिव मसीह म्हारा महायाजक बणके आया, तो अपणे साथ बढ़िया-बढ़िया चीज लेके आया जो इब भी मौजूद सै, जिव वो दिख्या तो वो परमेसवर की मौजूदगी म्ह चला गया, यो तम्बू हाथ का बणाया होया कोनी यानिके इस सृष्टि का कोनी। 12 जिव मसीह तम्बू म्ह चला गया तो वो सब

\* 9:2 9:2 दीवट भोत-से दीवे रखण का एक बरतन

खात्तर सब तै पवित्र जगहां म्ह दाखल होया, उसनै बलिदान के रूप म्ह बकरयां अर बाछड़याँ का लहू न्ही लिया, बल्के उसनै अपणा लहू लिया, ताके हम अनन्त छुटकारा पा सके। <sup>13</sup> क्यूँके जै मूसा नबी के नियम-कायदा के मुताबिक जिब बकरयां अर बळ्यां का लहू अर बाछड़े की राख का अपवित्र माणसां पै छिड़के जाण की विधि के मुताबिक, अशुद्धता दूर हो जावै सै। <sup>14</sup> तो मसीह का बेकसूर लहू जो म्हारी अन्तरात्मा नै, म्हारे पाप, जो म्हारी मौत की बजह बणै सै, उनतै शुद्ध करै सै, ताके हम जिन्दे परमेसवर की आराधना कर सका। पवित्र आत्मा की शक्ति के जरिये मसीह नै म्हारे ताहीं अपणे पापां खात्तर एक सम्पूर्ण बलिदान के रूप म्ह परमेसवर ताहीं अपणे-आप ताहीं दे दिया।

<sup>15</sup> इस कारण मसीह परमेसवर अर माणसां के बीच म्ह नये करार का बिचोल्ला सै, ताके जो माणस परमेसवर के जरिये बुलाये गये सै, वो सनातन आशीषें पा सके, जिसका परमेसवर नै वादा करया सै, क्यूँके पैहल्ले करार के अधीन रहन्दे होए जितने माणसां नै पाप कराया, उन ताहीं छुड़ाण खात्तर यीशु नै अपणी जान दे दी। <sup>16</sup> करार एक वसियत के समान हो सै। एक वसियत के नियम नै लागू करण खात्तर यो साबित करणा जरूरी होवै सै, के जिसनै वा वसियत बणाई हो, वो मर चुक्या हो। <sup>17</sup> क्यूँके एक वसियत जिब्वे लागू हो सके सै, जिब उसके बणाण आळा की मौत होगी हो। वो जिब तक लागू न्ही होन्दी जिब ताहीं उसका बणाण आळा जिन्दा हो। <sup>18</sup> इस कारण पैहल्ले करार का नियम जानवरां के लहू ताहीं बहाए जाण पै लागू होवै था। <sup>19</sup> क्यूँके जिब मूसा नबी सारे माणसां नै नियम-कायदे का हरेक हुकम सुणा चुक्या तो उसनै बकरयां अर बाछड़याँ का लहू लेके, पाणी म्ह मिला लिया अर लाल ऊन अर जूफा (झाड़ी) की छड़ी के गेल्या, उस नियम-कायदे की किताब अर सारे माणसां पै छिड़क दिया <sup>20</sup> अर कहा, “के यो लहू परमेसवर के साथ करे गये करार नै पक्का करै सै, जिसका हुकम परमेसवर नै थारे खात्तर दिया सै।” <sup>21</sup> अर इस्से तरियां तै उसनै तम्बू अर सेवा के सारे समान पै लहू छिड़क्या, जित्त सारे माणस आराधना करण लागरे थे। <sup>22</sup> सच तो यो सै के नियम-कायदे के मुताबिक आमतौर पै सारी चीज लहू के जरिये शुद्ध करी जावै सै, मसीह नै जो लहू बहाया उसके बगैर पापां की माफी कोन्या।

*~~~~~*

<sup>23</sup> यो जरूरी सै के तम्बू अर उसकी सारी चीज, जो सुर्ग की चिज्जां का हुबहू सै, इन जानवरां का लहू सै, जो शुद्ध करया जा, पर सुर्ग की चीज नै शुद्ध करण के खात्तर बढ़िया बलिदानां की जरूरत थी। <sup>24</sup> क्यूँके मसीह जिस पवित्र जगहां म्ह दाखल होया, वो माणसां के हाथ की बणाई होई न्ही थी, वो असली तम्बू की सिर्फ एक नकल सै, बल्के वो सीध्वा सुर्ग गया अर इब म्हारी मदद करण खात्तर परमेसवर के साथ सै। <sup>25</sup> वो सुर्ग म्ह इस करके दाखल होया के माणसां के पापां के कारण बारबार अपणे-आपनै बलिदान करै, जिस तरियां महायाजक हरेक साल दुसरे का लहू लिए पवित्र जगहां म्ह दाखल होया करै था, <sup>26</sup> जै इसा करणा जरूरी था तो दुनिया की शुरुआत तै लेके इब तक उसनै बार-बार दुख ठाणा पड़दा, पर इब युग के आखरी म्ह वो एक ए बर जाहिर होया सै, ताके अपणे कूस पै बलिदान के जरिये पाप ताहीं दूर कर देवै। <sup>27</sup> अर जिस तरियां माणसां के खात्तर एक बर मरणा अर उसके पाछ्छे न्याय का होणा तय सै, <sup>28</sup> उस्से तरियां ए मसीह भी माणसां के पापां की माफी खात्तर एक बर धरती पै आया अर सूळी पै अपणी जान दे दी, अर जो माणस उसकी बोहड़ण की बाट देखै सै, उनके उद्धार के खात्तर दुसरी बर बिना पाप उठाए होए दिखैगा।

## 10

*~~~~~*

<sup>1</sup> मूसा नबी के नियम-कायदे, आण आळी असली चिज्जां की छाया सै, पर ये वो आळी असली चीज कोनी, ज्यातै नियम-कायदा की विधि के मुताबिक बलिदानां के जरिये जो हरेक साल हर बार

चढ़ाए जावै सै, बलिदान चढ़ाण आळा, कदे भी माणसां नै पूरी तरियां तै शुद्ध न्ही कर सकदा।<sup>2</sup> जै बलिदानां कै जरिये माणस पूरी तरियां शुद्ध हो जावै, तो उनका चढ़ाणा बन्द क्यातै न्ही हो जान्दा? बलिदान करण आळा, आराधना करण आळा अर सेवा करण आळे एक ए बर शुद्ध हो जान्दे, तो उनका बलिदान चढ़ाण पै भी उनका मन उन ताहीं क्यूँ कहवै सै, के वे पापी सै।<sup>3</sup> उनके जरिये चढ़ाया गया बलिदान उन ताहीं हर साल यो याद दुआवै सै, के उननै पाप करया सै।<sup>4</sup> क्यूँके या अनहोणी बात सै, के बळ्थां अर बकरयां का लहू माणसां के पापां नै माफ करै।

<sup>5</sup> इस्से कारण जिव मसीह इस दुनिया म्ह आया तो उसनै परमेसवर तै कह्या, “बलिदान अर भेंट तन्नै कोनी चाही, पर मेरे खात्तर एक देह त्यार करी सै।<sup>6</sup> बलिदान के रूप म्ह चढ़ाये गये जानवरां की भेंट अर पाप के खात्तर चढ़ाये गये बलिदान तै तू खुश कोनी होया।<sup>7</sup> फेर मसीह नै कह्या, “लखा, परमेसवर मै तेरी इच्छा पूरी करण खात्तर आ गया सूँ, जिसा पवित्र ग्रन्थ मेरे बारे म्ह कहवै सै।”<sup>8</sup> पैहले तो मसीह कहवै सै, “बलिदान के रूप म्ह चढ़ाये गये जानवरां की भेंट अर पाप के खात्तर चढ़ाया गया बलिदान कोनी मांग्या, अर ना ए उन भेटां तै तू खुश होया।” हालाकि ये बलिदान तो नियम-कायदे कै मुताबिक चढ़ाए जावै सै।<sup>9</sup> फेर मसीह यो भी कहवै सै, “लखा, मै तेरी इच्छा पूरी करण आ गया सूँ,” इस करके पापां की माफी के पैहले तरिके ताहीं, जो नियम-कायदा के मुताबिक थे, उननै हटा के नये तरिके तै जो मेरे लहू के जरिये माफ होवै सै, उन ताहीं लाग्गू करूँ।<sup>10</sup> परमेसवर याए चाहवै था, के हम मसीह यीशु की देह के एके बार बलिदान चढ़ाए जाणके जरिये पवित्र करे जावां।

<sup>11</sup> पैहले करार के मुताबिक हरेक याजक वेदी के स्याम्ही खड़े होके रोज सेवा करै सै, अर एक ए ढाळ के बलिदान नै, जो पापां नै कदे भी दूर न्ही कर सकदे, बार-बार चढ़ावै सै।<sup>12</sup> पर मसीह जो म्हारा बड़ा याजक सै, उसनै माणसां के पापां कै खात्तर एक ए बलिदान के रूप म्ह, परमेसवर के स्याम्ही सदा कै खात्तर अपने-आप ताहीं चढ़ा दिया, अर परमेसवर कै सोळी ओड़ महिमामय जगहां म्ह पै जा बेट्या,<sup>13</sup> अर उससे बखत तै मसीह इस बात की बाट देखण लागरया सै, के कद परमेसवर उसके बैरियां नै पूरी तरियां तै हरावैगा।<sup>14</sup> क्यूँके कूरुस पै बलिदान के जरिये, परमेसवर नै जिन माणसां ताहीं पवित्र करया, उन ताहीं सदा खात्तर सिध्द कर दिया सै।<sup>15</sup> अर पवित्र आत्मा भी हमनै यीशु के बलिदान के बारे म्ह याए गवाही देवै सै, के यो सच सै, अर म्हारे ताहीं यो बतावै सै के परमेसवर नै इस बलिदान के बारे म्ह के कह्या सै।

<sup>16</sup> “परभु कहवै सै, के जो नया करार, मै आण आळे दिनां म्ह, उनतै करूँगा, वो यो सै, के मै अपने नियम उन ताहीं याद दुआऊँ, अर नियमां नै मानण म्ह उनकी मदद करूँगा।”<sup>17</sup> फेर यो भी कहवै सै, “मै उनकै पापां नै अर उनकै अधर्म के काम्मां नै दुबारा याद कोनी करूँगा।”<sup>18</sup> अर जिव पापां की माफी होगी तो पापां खात्तर बलिदान चढ़ाण की कोए जरूरत कोनी।<sup>19</sup> ज्यांतै हे विश्वासी भाईयो, यीशु के सलीब पै लहू बहाण कै जरिये हम पिता कै धारे बिना डरे घणी पवित्र जगहां म्ह जा सका सां।<sup>20-21</sup> इस करके हे विश्वासी भाईयो, परमेसवर के परिवार म्ह म्हारे खात्तर एक सबतै उत्तम याजक निर्धारित सै, यीशु के सलीब पै लहू बहाण कै जरिये म्हारे खात्तर एक नया अर जिन्दगी देण आळा राह खोल दिया सै। जिस ताहीं उसनै उस पड़दे, यानिके अपनी देह के बलिदान के जरिये म्हारे ताहीं घणी पवित्र जगहां म्ह जाण का साहस होया सै।<sup>22</sup> तो आओ, हम सचे मन अर पूरे विश्वास कै गेल्या, अर अपनी अन्तरात्मा ताहीं पापां तै मुक्त करण खात्तर अर सच्चे मन तै, देह ताहीं शुद्ध पाणी तै धोकै, परमेसवर के लोवै जांवा।<sup>23</sup> अर इब हम बिना किसे शक के अपनी उस आस म्ह मजबूत रहवां, जिस ताहीं हमनै मान्या सै, क्यूँके जिसनै वादा करया सै, वो विश्वास जोग्गा सै।<sup>24</sup> अर हम यो भी खास ध्यान राख्वां के हम आप्स म्ह प्यार, अर भले काम्मां म्ह उकसाण कै खात्तर हम एक-दुसरे की फिकर करते रहवां।<sup>25</sup> अर हम आराधना सभायां म्ह लगातार कटूट होण म्ह सुस्त ना हो जावां, जिसा के भोत-से तो सुस्त हो भी लिये सै, पर एक-दुसरे नै उत्साहित करते रहौं, जिसा के थम जाणो सों, के यीशु का आण का बखत लोवै सै।<sup>26</sup> क्यूँके मसीह नै जाणण के बाद

जै हम जाण-बुझकै पाप करदे रहवां, तो पापां की माफी खात्तर फेर कोए बलिदान बाकी न्ही बचा । 27 तो हॉं, परमेसवर के न्याय का दिन आवैगा, अर वो अपणे विरोधियां नै नाश कर देवैगा, अर ये सारी बात होण आळी सै । 28 जो माणस मूसा नबी के नियम-कायदा के मुताबिक दो या तीन माणसां की गवाही पै, बिना दया कै मार दिया जावै सै, 29 तो सोच ल्यो के वो माणस और भी भारया दण्ड कै जोगगा ठहरैगा, जिसनै परमेसवर के बेटटे की कदर न्ही जाणी अर मसीह के लहू ताहीं अपवित्तर जाण्या, जो उस ताहीं शुद्ध करै सै, अर उस पवित्तर आत्मा का अपमान करै सै, जो हमनै अनुग्रह देवै सै । 30 क्यूँके हम उसनै जाणा सा, जिसनै कह्या सै, “बदला लेणा मेरा काम सै, मै ए बदला दियुंगा ।” अर फेर यो भी कह्या के “प्रभु अपणे माणसां का न्याय करैगा ।” 31 जिन्दे परमेसवर कै हाथ्यां म्ह पड़णा भयानक (डरावणी) बात सै । 32 पर उन पाच्छले दिनां नै याद करो, जिव थमनै पैहली बार मसीह पै विश्वास करया अर परमेसवर कै खात्तर दुख ठाण म्ह पाच्छै न्ही हटे । 33 कदे-कदे तो माणसां नै सब कै स्याम्ही थारी बुराई करी अर थारे ताहीं मारा पिटचा भी, अर थमनै उन माणसां कै गैल भी दुख सहया जो इसे दुख ठावै सै । 34 क्यूँके जो लोग कैद म्ह थे, उनकै दुख म्ह भी थम दुखी होए, अर अविश्वासी नै थारी सम्पत्ति ताहीं भी लूट ली, तो थम लुटण खात्तर भी तैयार होगे, न्यू जाणकै के थारे गेल्या एक और भी सारया तै बढ़िया अर सारी हाण ठहरण आळी सम्पत्ति सै । 35 ज्यातै अपणे दुख म्ह भी विश्वास म्ह बणे रहों क्यूँके उसका इनाम बड़ड़ा सै । 36 क्यूँके थारा धीरज धरणा जरूरी सै, ताके थम परमेसवर की इच्छा नै पूरी करकै वो पा सको जो परमेसवर नै थारे तै वादा करया सै । 37 “क्यूँके पवित्तर ग्रन्थ म्ह लिख्या सै, घणाए थोड़ा बखत रहग्या सै, जिव के आण आळा आवैगा अर वार न्ही करैगा । 38 पर मेरे धर्मी माणस विश्वास तै जिन्दा रहवेंगे, जै वो विश्वास तै पाच्छै हट जावै तो मेरा मन उसतै राज्जी कोनी होवैगा ।” 39 पर हम विश्वास तै हटण आळे कोनी के नाश हो जावै पर परमेसवर पै विश्वास करण आळे सां ताके हम अनन्त मौत तै बचाएँ जावां ।

## 11

### \*\*\*\*\*

1 जो माणस परमेसवर म्ह विश्वास करै सै, वो ये बात आच्छी तरियां जाणै सै, के परमेसवर वे चीज उन ताहीं जरूर देवैगा, जिसकी आस वे राखै सै । उननै पूरा विश्वास सै, के जो चीज उननै इब्ने न्ही देखी, वो असलियत म्ह सै । 2 म्हारे पूर्वजां नै परमेसवर म्ह इस तरियां विश्वास करया था, इस करकै परमेसवर उनतै खुश थे । 3 विश्वास तै ए हम जाणा सां, के सृष्टि परमेसवर के वचन तै बणी सै । हम या भी जाणै सां, के जो चीज हम देख सका सां, वे अनदेखी चिज्जां म्ह तै बणी सै । 4 विश्वास तै ए आदम के बेटटे हाबिल नै, अपणे बड़े भाई कैन तै घणा बढ़िया बलिदान परमेसवर कै खात्तर चढ़ाया, अर उस बलिदान के जरिये परमेसवर नै गवाही दी, के हाबिल एक धर्मी जन सै, क्यूँके परमेसवर उसकी भेंट तै खुश था, इब हाबिल मर लिया सै, अर हमनै उसके जरिये परमेसवर पै विश्वास करणा सिख्या सै । 5 हनोक के विश्वास के जरिये परमेसवर नै उस ताहीं जिन्दा ए सुगं पै उठा लिया, इस बजह तै इब ताहीं किसे नै उसकी लाश न्ही मिली, सुगं म्ह जाण तै पैहले उसनै परमेसवर ताहीं खुश करया था, जिसा के परमेसवर का पवित्तर ग्रन्थ बतावै सै । 6 माणस परमेसवर नै खुश कर सकै सै, जै वे उसपे विश्वास करै तो । क्यूँके परमेसवर के धौरे आण आळे माणस नै विश्वास करणा चाहिये के वो परमेसवर सै, अर वो पूरी सच्चाई तै अपणे टोह्ण आळे नै इनाम देवै सै । 7 विश्वास ए तै नूह नै परमेसवर के जरिये बाढ़ की चेतावनी पाके, जिस ताहीं उसनै देख्या भी कोनी था । परमेसवर का डर मानतै होए, अपणे कुणवे नै बचाण के खात्तर उसनै जहाज बनाया, नूह के विश्वास के कारण उसनै उस बखत के माणसां ताहीं जिननै विश्वास न्ही करया था, उन ताहीं दोषी ठहराया, अर वो डूबके मरगे । नूह नै परमेसवर पै विश्वास करया था, इस करकै परमेसवर नै उस ताहीं धर्मी ठहराया था । 8 जिव परमेसवर नै अब्राहम ताहीं किते जाण खात्तर बुलाया था, तो उसनै विश्वास तै ए परमेसवर के हुकम ताहीं मानकै, एक इसी जगहां लिकड़ गया, जो जगहां परमेसवर अब्राहम ताहीं उसकी

जायदाद के तौर पे देण आळा था, पर वो या कोनी जाणै था के वो कित्त जावै सै, अर वो फेर भी चला गया। <sup>9</sup> विश्वास ए तै जिस देश ताहीं परमेसवर नै देण का वादा करया था, ओइ अब्राहम नै एक परदेशी की तरियां रहकै अपणे बेटे इसहाक अर अपणे पोत्ते याकूब सुधा तम्बुआ म्ह बसेरा करया, जो उसके गेल्या उस्से वादे के वारिस थे। <sup>10</sup> क्यूँके वो उस नगर की जो सुर्ग म्ह सै, अर जिसकी नीम पक्की सै, उसकी वाट देखै था, जिसका रचण आळा अर बणाण आळा परमेसवर सै। <sup>11</sup> यो सिर्फ विश्वास ए सै, जिसके जरिये अब्राहम बाप बण सका, हालाकि अब्राहम भोत बूढ़ा था, अर उसकी पत्नी सारा भी बाळक न्ही पैदा कर सकै थी, परमेसवर वो जरूर करै सै, जो उन ताहीं वादा करया था। <sup>12</sup> जब अब्राहम इतणा बूढ़ा होगया था, के मरण आळा ए था, तो अकास म्ह सुर्ग के तारा अर समुन्दर के किनारे की बाळू की तरियां उसके अनगिणत वंश पैदा होए। <sup>13</sup> ये सारे माणस जिननै परमेसवर पे विश्वास करया था, वे उन चिज्जां नै पाए बिना मरगे, जिसका परमेसवर नै उन खात्तर वादा करया था। वादा करी होई चीज न्ही पाई, पर उननै अपणे मन म्ह देखकै राज्जी होए अर मान लिया के हम धरती पे परदेशी अर बाहर के सां। <sup>14</sup> ये उन माणसां के बारे म्ह सै, जो कहवै सै के वे इस दुनिया म्ह अजनबी सै, वे दिखावै सै के अपणे देश की टोह म्ह सै। <sup>15</sup> अर जिस देश ते वे लिकड़ आये थे, जै उसके बारे म्ह सोचते तो वे उल्टा जा सकै था। <sup>16</sup> पर वे एक घणा बढ़िया यानिके सुर्गीय देश के चाहण आळे सै, उस्से खात्तर परमेसवर उनका परमेसवर कुह्वाण म्ह खुशी महसूस करै सै, क्यूँके उसनै उनकै खात्तर एक नगर तयार करया सै।

<sup>17</sup> विश्वास ए तै अब्राहम नै, परखे जाणकै बखत म्ह, अपणे बेटे इसहाक ताहीं बलिदान चढ़ाया, उस्से नै परमेसवर के वादा ताहीं पाया, क्यूँके वो अपणे इकलौते बेटे की बलि देण खात्तर भी तैयार होगया था। <sup>18</sup> अर जिसतै न्यू कह्या गया था, “इसहाक तै तेरा वंश कुह्वावैगा,” वोए अपणे एकलौते बेटे ताहीं बलिदान चढ़ाण लागया। <sup>19</sup> क्यूँके उसनै मान लिया, के परमेसवर सामर्थी सै के इसहाक ताहीं मरे होया म्ह तै जिन्दा कर सकै सै। यो इसाए था के उननै इसहाक ताहीं मौत के मुँह तै उल्टा पा लिया हो, उदाहरण की रीत पे वो उस ताहीं फेर मिल्या। <sup>20</sup> विश्वास ए तै इसहाक नै अपणे दो बेटे याकूब अर एसाव ताहीं आण आळी बाततां के बारे म्ह आशीर्वाद दिया। <sup>21</sup> विश्वास ए तै याकूब नै मरदे बखत यूसुफ के दोन्नु बेटेचॉं म्ह तै एक-एक ताहीं आशीर्वाद दिया, अर अपनी लाट्टी का सहारा लेकै प्रभु की आराधना करी। <sup>22</sup> विश्वास ए तै यूसुफ नै, जब वो मरण पे था, तो आत्मविश्वास तै कह्या, के इस्राएल के माणस मिस्र देश छोड़ देंगे, हुकम देकै जब वो मिस्र देश छोड़ के जान्दे, तो उसकी हाड्डियां ले जान्दे। <sup>23</sup> तब मिस्र के राजा नै यो हुकम दिया था के सारे इस्राएली छोरे पैदा होण पे मारे जावेंगे, तो विश्वास के कारण ए तै मूसा नबी के माँ-बाप नै उस ताहीं, पैदा होए पाच्छे तीन महिन्ने ताहीं ल्हकोए राख्या, क्यूँके उननै देख्या के बाळक भोत सुधरा सै, अर वे राजा के हुकम मानण ते डरे कोनी थे। <sup>24</sup> मिस्र देश के फिरौन की बेट्टी नै मूसा ताहीं अपना लिया था, जब मूसा बड़ा होया, विश्वास तै वो न्ही चाहवै था, के माणस उस ताहीं राजकुमारी के बेटे के रूप म्ह बुलावै। <sup>25</sup> ज्यांतै के उस ताहीं पाप म्ह माइ-से दिन के सुख भोग्गण तै परमेसवर के माणसां के गेल्या दुख भोग्गण घणा बढ़िया लागया। <sup>26</sup> उसनै मसीह के कारण बदनाम होण ताहीं मिस्र देश के भण्डार तै बड़ड़ा धन समझया, क्यूँके वो जो करण लागरया था, उस ताहीं वो जाणे था, के सुर्ग म्ह उसका ईनाम मिलेगा। <sup>27</sup> विश्वास ए तै राजा के छो ते ना डरके उसनै मिस्र देश ताहीं छोड़ दिया, क्यूँके वो समझ गया था, के उसनै इसा लागया, के मान्नों उसनै परमेसवर ताहीं देख लिया हो, जो अदृश्य सै। <sup>28</sup> विश्वास ए तै मूसा नबी नै फसह अर लहू छिड़कण का तरीका मान्या, जिसतै के जेट्टा का विनाशक दूत इस्राएलियाँ के जेट्टे बेट्टा पे हाथ न्ही गेरै।

<sup>29</sup> विश्वास ए तै इस्राएल के माणस लाल समुन्दर के पार इसे उतरगे, जिस तरियां सूखी धरती पर तै, अर जब मिस्र देश नै उस्से तरियां ए करणा चाह्या तो समुन्दर उल्टा अपनी जगहों पे आ गया अर बाढ़ आ गयी अर सब डूब मरे। <sup>30</sup> क्यूँके इस्राएल के माणस परमेसवर पे विश्वास करै

थे, इस करके वे यरीहो नगर की चारदीवारी के च्यारु ओड़ सात दिनां तक लगातार चालते रहे, तो चारदीवारी पड़गी। <sup>31</sup> विश्वास ए तै राहाब बेश्या परमेसवर का हुकम ना मानण आळा के गेल्या नाश न्ही होई, उसने इस्राएली जासूसां का स्वागत करया जो यरीहो नगर नै छुप के देखण आये थे। <sup>32</sup> इब और के कहूँ? क्यूँके बखत कोनी रहया के गिदोन का, अर बाराक का अर शिमशोन का, अर यिफतह जिंसा माणसां के बाँरे म्ह, अर दाऊद अर शमूएल का, अर नबियाँ का जिक्र करूँ। <sup>33</sup> इसे विश्वास के जरिये राज्य जीत्ते, धर्म के काम करे, वादा करी होई चीज पाई, शेर उन ताहीं खा न्ही सका। <sup>34</sup> आग की ज्वाला ताहीं शीळा करया, तलवार की धार तै बच लिक्डे, एक बार कमजोर होण पै फेर तै ठाड्डे बणा दिया, वे लड़ाई म्ह वीर लिक्डे, उननै अपणे दुश्मनां की पलटन ताहीं खदेड दिया। <sup>35</sup> लुगाईयाँ नै अपणे मेरे होया ताहीं दुबारा जिन्दा पाया, कितने तो मार खादे-खादे मरगे अर वे अपना विश्वास न्ही छोड़णा चाहवै थे, ताके वे जेळ तै रिहा करे जा सकै, ज्यांतै के घणे मरण के बाद फेर तै जिन्दा हो जावै, अर वे एक बढ़िया जिन्दगी पा सकै। <sup>36</sup> घणखरयां नै मखौल म्ह उड़ाया गया, अर कई नै कोडे खाणे पड़े, बल्के कई नै बेलां तै जुड़कै, जेळ म्ह गेरया गया। <sup>37</sup> कईयाँ पै पत्थर बरसाए गए, और तै चीरे गये, कईयाँ ताहीं तलवार तै मौत के घाट उतार दिया गया, वे गरीब थे, उन ताहीं यातनाए भी दी गई, अर उनकै गैल बुरा व्यवहार करया गया, वे भेड़डां अर बकरियाँ की खाल ओढ़ के आस्से-पास्से भटकदे रहे। <sup>38</sup> अर जंगळां, अर पहाड़ां, अर गुफायां म्ह, अर धरती की दरारां म्ह भटकदे हाँडें। या बुरी दुनिया इन विश्वासियाँ जोगगी कोनी थी। <sup>39</sup> विश्वास ए के जरिये इन सारया के बाँरे म्ह परमेसवर नै उनके तारीफ करी सै, तोभी वादा करी होई उस चीज नै वो पा न्ही सकै जो परमेसवर नै उन ताहीं वादा करया था। <sup>40</sup> क्यूँके परमेसवर के धारे सिर्फ उनके खात्तर न्ही, बल्के म्हारे खात्तर भी एक घणी बढ़िया तरकीब सै, परमेसवर उन ताहीं सिध्द बणाणा चाहवै सै, पर सिर्फ म्हारे साथ मिलकै।

## 12

### ?????? ???? ?????? ?????

<sup>1</sup> इस बजह तै जिब घणखरे माणसां के विश्वास की गवाही जो उनकी जिन्दगी म्ह सै, म्हारे बाँरे म्ह बडे बाढळ की तरियां घेरे होए सै, तो आओ, हरेक रोकणआळी चीज अर उलझाण आळे पाप ताहीं दूर करके, अर राह पै हमनै चालणा सै, धीरज तै चाल्ला। <sup>2</sup> अर विश्वास के कर्ता अर सिध्द करण आळे यीशु की ओड़ लखान्दे रहवां, उस आनन्द के खात्तर जो विश्वास म्ह मिलण आळा था, शर्म की कुछ परवाह न्ही करके कूरुस का दुख सहया, अर परमेसवर के सिंहासन के सोळी ओड़ महिमामय जगहां जा बेटचा। <sup>3</sup> यीशु के उदाहरण के बाँरे म्ह सोचो, जिसनै अपणे विरोध म्ह पापियाँ का इतणा विरोध सह लिया ताके थम निराश होकै हिम्मत ना छोड़ दो। <sup>4</sup> पाप के विरुध्द अपणे संघर्ष म्ह थमनै उसतै इसी मुठभेड़ न्ही करी के धारा लहू बह्या हो, <sup>5</sup> अर थम उस उपदेश ताहीं, जो थारे ताहीं बेट्टा की तरियां दिया जावै सै, भूल गये सो: "हे मेरे बेट्टे, परभु की ताड़ना नै हल्की बात ना जाण, अर जिब वो तन्नै घुड़कै तो हिम्मत ना छोड़डे। <sup>6</sup> क्यूँके परभु जिसतै प्यार करै सै, उसकी ताड़ना भी करै सै, अर जिस ताहीं बेट्टा बणा लेवै सै, उसकै कोड़े भी मारै सै, ताके अपणे बाळकां नै सुधार सकै।"

<sup>7</sup> थम दुख नै पिता की ताड़ना समझके सह ल्यो, परमेसवर थारे ताहीं बेट्टा जाणकै थारे गेल्या सलूक करै सै वो कौण सा बेट्टा सै, जिसकी ताड़ना पिता न्ही करदा? <sup>8</sup> जै वा ताड़ना जिसकै सब भागी होवै सै, अर थारी कोनी होई, तो थम परमेसवर की ऊलाद कोनी। <sup>9</sup> फेर जिब के म्हारा शारीरिक पिता भी म्हारी ताड़ना करया करै था अर हमनै उसका आदर-मान करया, तो यो और भी जरूरी सै के अपनी आत्मार्यां के पिता के ओड़ तै अनुशासन स्वीकार करा सां, ताके म्हारे धारे अनन्त जीवन हो। <sup>10</sup> म्हारे धन्यवादी पिता तो, अपनी समझके मुताबिक थोड़े-से बखत के खात्तर म्हारी ताड़ना करै सै, पर वो तो म्हारे फेयदे के खात्तर करै सै, के हम भी उसके समान पवित्तर बण जावां। <sup>11</sup> इस बखत ताड़ना दी जावै सै, उस बखत ताड़ना आच्छी कोनी लाग्गी, बल्के वा दुख की बात दिखाई

देवै सै। तोभी जो उस ताहीं सहन्दे-सहन्दे पक्के होगे सै, बाद म्ह उननै चैन कै गेल्या धर्म का ईनाम मिलै सै।

### \*\*\*\*\*

12 इन सारी बातों के कारण सब मजबूत बणो अर उत्साहित होओ, 13 अर अपने पायां के खात्तर सीधी राही बणाओ के लंगड़ा भटक ना जावै पर भला-चंगा हो जावै। 14 सारया तै मेळ-मिलाप राखो, अर पवित्र होण खात्तर हरेक ढाळ की कोशिश म्ह रहों, जिसके बिना कोए प्रभु ताहीं कदे भी न्ही देखैगा। 15 सावधान रहो, इसा ना हो के कोए परमेसवर के अनुग्रह तै दूर रह जावै या कोए कड़वी जड़ फूटके दर्द देवै, अर उसके जरिये घणखरे माणस परमेसवर के सच्चे रास्ते तै भटक जावै सै। 16 इसा ना हो के कोए माणस जार, या अब्राहम के पोते एसाव की तरियां उस म्ह कोए बुराई ना होवै, क्यूँके वो जेटटा बेटटा था, उसनै खास उत्तराधिकारी होण का हक था, पर उसनै अपने जन्म सिध्द होण के पद का सम्मान न्ही करया, इस करके उसनै अपने छोटटे भाई याकूब ताहीं एक बर के खाणे के बदले म्ह अपना जन्म सिध्द होण का पद बेच दिया। 17 धमनै बेरा सै के बाद म्ह जब उसनै आशीष पाणी चाही तो उस ताहीं मना कर दिया गया, अर आंसू बहा-बहाके आशीष के मांगण पै भी वो पैहले जो कुछ भी करया था, उस ताहीं बदलण खात्तर कुछ भी न्ही कर सका। 18 धम आग की लपटे, अन्धेरे, काळी घटा जिसा असली पहाड़ पै न्ही आये सों, जिसा के इस्राएल के माणस सीनै पहाड़ पै आये थे, जब परमेसवर नै उन ताहीं अपने नियम दिए थे। 19 धम तुरही की आवाज कै धोरै कोनी सों, अर बोल्लण आळे के इसे शब्द कै धोरै न्ही आए, जिसके सुनणआळे तै बिनती करी के इब म्हारे तै और बात ना करी जावै। 20 उननै इसा इस करके कह्या, क्यूँके वे इस हुकम नै बर्दाश्त न्ही कर सके, के परमेसवर नै उनतै कह्या था, “जै कोए पशु भी पहाड़ ताहीं छुवै तो उसपै पत्थर बरसाये जावै।” 21 अर वो दर्शन इसा डरावणा था के मूसा नबी नै भी कह्या, “मै घणा डरूँ अर कापूँ सूं।”

22 पर धम सिध्दोण के पहाड़ पै आये सों, जित्त सुर्गाय यरुशलम सै, जो जिन्दे परमेसवर का नगर सै, उसके धोरै अर लाखों सुर्गदूत खुशी उत्सव मनावै सै। 23 धम उन परमेसवर के खास बाळकां की सभा अर कलीसिया म्ह आये सों, जिनके नाम सुर्ग म्ह लिक्खे होए सै, परमेसवर के धोरै जो सब का न्यायी सै, सुर्ग म्ह धर्मी माणसां की आत्मायां खात्तर जो इब सिध्द करे गये सै। 24 धम यीशु के धोरै आए सों, जो परमेसवर अर माणसां के बीच म्ह करार बणाया, अर छिड़काव का लहू जो माफी के बारे म्ह बोल्लै सै, ना के न्याय के बारे म्ह, जो हाबिल कै लहू तै घणी बढ़िया बात कहवै सै। 25 सावधान रहो, परमेसवर के हुकम मान्नो, जो थारे तै बात करण लागरया सै, क्यूँके इस्राएल के माणस जब धरती पै मूसा नबी की चेतावनी पाके बच पाए, क्यूँके उननै मूसा नबी की बात कोनी मान्नी थी, तो हम सुर्ग पै तै चेतावनी देण आळे परमेसवर तै मुँह मोड़के उसके छोड़ो तै किस तरियां बच सकांगे? 26 जब परमेसवर सीनै पहाड़ पै तै बोल्ल्या, तो उसके शब्द नै धरती ताहीं भी हला दिया, पर इब उसनै यो वादा करा सै, “एक बर फेर मै ना सिर्फ धरती ताहीं बल्के अकास ताहीं भी हला देऊंगा।” 27 अर यो बोल “एक बर फेर” इस बात ताहीं दिखावै सै के बणाई होई चीज हलाई, अर हटा दी जावैगी, ताके जो चीज हलाई न्ही जान्दी, वे पक्की तरियां बणी रहवें। 28 हमनै जो राज्य मिला सै वो न्ही हिलाया जा सकता, इस कारण हमनै उसका धन्यवादी होणा चाहिए, जिसके जरिये हम भगति, अर भय सुधा परमेसवर की इसी आराधना कर सकां सां जिसतै वो राज्जी होवै सै, 29 क्यूँके म्हारा परमेसवर राख करण आळी आग सै।

## 13

### \*\*\*\*\*

1 एक-दुसरे तै भाण-भाई की तरियां प्यार करो। 2 अजनबी की भी सेवा पाणी करो, क्यूँके इसके जरिये कई माणसां नै अनजाणे म्ह सुर्गदूतां का आदर-मान करया सै। 3 कैदियां का इस ढाळ बेरा




लेओ के मान्नों उनके गैल थम भी कैद सो, अर जिन ताहीं पीड़ित करया जावै सै, जिसा के थम अपणी देह म्ह दद महसूस करो सों।<sup>4</sup> ब्याह सारया म्ह आदर की बात समझी जावै, अर ब्याह होण के बाद एक-दुसरे के प्रति वफादार रहों, क्यूँके परमेसवर जार, अर बिगान्नी लुगाई के धोरे जाणीयां का न्याय करेगा।<sup>5</sup> अपणी जिन्दगी नै धन के लालच तै मुक्त राखवों, अर जो थारे धोरे सै उससे पै सन्तोष करो, क्यूँके उसने आप्णे ए कह्या सै, “मै तन्नै कदे भी न्ही छोड़ूँगा, अर ना कदे भी त्यागूँगा।”<sup>6</sup> ज्यांतै हम बिना डरे कह्वां सां, “प्रभु मेरा मददगार सै, मै न्ही डरूँगा, माणस मेरा के करै सकै सै।”

<sup>7</sup> जो थारे अगुवें थे, अर जिन नै थारे ताहीं परमेसवर का वचन सुणाया सै, उननै याद राखवो, अर गौर करो के किस तरियां जीणा अर मरणा सै, परमेसवर म्ह एके तरियां का विश्वास दिखाओ जो उननै दिखाया।<sup>8</sup> यीशु मसीह काल अर आज अर युगानुयुग एक सा सै, वो कदे न्ही बदलता।<sup>9</sup> क्यूँके यीशु मसीह कदे न्ही बदलता, इस करके थम नई अर अलग शिक्षा ना अपनाओ। क्यूँके थारे मनां खात्तर आच्छा सै, के वे अनुग्रह के जरिये मजबूत बणौ, ना के उन खाण-पीण आळी चिज्जां के जरिये, उन माणसां नै कोए फायदा न्ही होन्दा जो इसे काम करै सै।<sup>10</sup> म्हारे धोरे एक वेदी सै जिस म्ह तै तम्बू के याजक नै खाण का कोए हक कोनी, जो तम्बू की सेवा करै सै।<sup>11</sup> क्यूँके पैहले करार के मुताबिक हर साल जिन जानवरों का लहू महायाजक पापबलि कै खात्तर घणी पवित्तर जगहां म्ह पापां की माफी खात्तर ले जावै सै, उनकी देह छावणी कै बाहरणै जळ्हाई जावै सै।<sup>12</sup> इस्से के कारण, यीशु नै भी माणसां ताहीं अपणे ए लहू कै जरिये पवित्तर करण कै खात्तर यरुशलेम नगर के बाहरणै दुख सहया अर मारा गया।<sup>13</sup> आओ हम यहूदी नियम-कायदा नै छोड़के यीशु म्ह विश्वास करां, अर उसके साथ दुख टावां।<sup>14</sup> क्यूँके इस दुनिया म्ह म्हारा कोए स्थाई घर कोनी, बल्के हम एक आण आळे नगर की टोह म्ह सां।<sup>15</sup> इस करके हम प्रभु यीशु कै जरिये हम अपणे होट्टां तै परमेसवर की स्तुति करणा जारी राख्वां, वो म्हारा बलिदान सै, यानिके उन होटा का फळ जो उसके नाम का अंगीकार करै सै, परमेसवर ताहीं सारी हाण चढ़ाया करै।<sup>16</sup> भलाई करणा अर उदारता दिखाणा ना भूलो, क्यूँके परमेसवर इसे बलिदानां तै राज्जी होवै सै।

<sup>17</sup> अपणे अगुवां का हुकम मान्नों अर उनके अधीन रहो, क्यूँके वे थमनै देखण लागरे सै, ताके थम भटक ना जाओ, अर उन ताहीं अपणी सेवा के बारे म्ह परमेसवर ताहीं लेखा देणा सै, वे यो काम राज्जी होके करै, यो काम उदास्सी कै साथ कोनी करणा, क्यूँके इस हालत म्ह थमनै किमे फायदा कोनी।<sup>18</sup> म्हारे खात्तर प्रार्थना करदे रहो, क्यूँके हमनै भरोस्सा सै के म्हारी अन्तरात्मा शुद्ध सै: हम हर बखत भले काम करणा चाहवां सां।<sup>19</sup> प्रार्थना करण कै खात्तर मै थमनै और भी समझाऊँ सूँ के मै तावळा थारे धोरे दुबारा आ सकूँ।<sup>20-21</sup> अर इब शान्तिदाता परमेसवर, जिसनै म्हारे प्रभु यीशु ताहीं मुर्दा म्ह तै जिन्दा करया, वो थारे ताहीं सब कुछ दे, जो उसकी इच्छा पूरी करण खात्तर चाहिये सै, परमेसवर यीशु मसीह की शक्ति के जरिये वो सब थारे म्ह पूरा करै, जो उस ताहीं खुशी दे सकै सै, यीशु मसीह भेड़ों का महान् रुखाळा सै, उसनै अपणे लहू कै जरिये सदा के करार नै स्थापित करया सै, उस ताहीं सदा महिमा मिलती रहवै। आमीन।<sup>22</sup> हे विश्वासी भाईयो, मै थारे तै बिनती करूँ सूँ, के उत्साहित करण आळे इन सन्देशां ताहीं धीरज तै सह ल्यो, क्यूँके मन्नै थारे ताहीं थोड़े-से शब्दां म्ह लिख्या सै।<sup>23</sup> थमनै यो बेरा लाग्या हो के तीमुथियुस, म्हारा भाई जेळ की कैद तै छुटग्या सै, अर जै वो तावळा आ गया तो मै उसके गेल्या थारे तै भेट करूँगा।<sup>24</sup> अपणे सारे अगुवां अर सारे पवित्तर माणसां ताहीं नमस्कार कहो। इटली देश के विश्वासी थमनै नमस्कार कहवै सै।<sup>25</sup> थम सारया पै परमेसवर का अनुग्रह होदा रहवै। आमीन।



## याकूब की ओड़ तै चिट्ठी




याकूब की चिट्ठी दुनियादारी के बारे में ह्द ह्दयायतां की एक सूची सै, जो सारे दुनिया ह्द तित्तर-वितर होके रहण आठे परमेसवर के माणसां खात्तर लिखी गई सै। लेखक मसीह बरताव अर चाल-चलण के खात्तर दुनियादारी ज्ञान अर मार्गदर्शन तै सम्बन्ध ह्दयायत नै पेश करण खात्तर कई जिन्दा मिसाल का इस्तमाल करै सै। वो कई तरियां की बाततां नै मसीह नजरिये तै विचार करै सै, जिस तरियां अमीरी अर गरीबी, इम्तिहान, आच्छा चाल-चलण, पक्षपात, बिश्वास, अर कर्म, जीभ के काम, अकलमन्दी, लड़ाई-झगड़ा, घमण्ड अर दीनता, दुसरयां पै दोष लगाणा, डींग मारणा, धीरज धरणा, अर प्रार्थना करणा। या चिट्ठी मसीहयत का पालन करण ह्द बिश्वास के साथ कर्म करण के उपर जोर देवै सै।

### रूप-रेखा

- जानकारी 1:1 बिश्वास अर अकलमन्दी 1:2-8
- गरीबी अर धन-दौलत 1:9-11
- परख अर लोभ 1:12-18
- सुणणा अर करणा 1:19-27
- पक्षपात के खिलाफ चेतावनी 2:1-13
- बिश्वास अर कर्म 2:14-26
- मसीह अर उसकी जीभ 3:1-18
- मसीह अर संसार 4:1-5:6
- कई तरियां के आदेश 5:7-20



1 मैं याकूब, परमेसवर अर प्रभु यीशु मसीह का दास सूं, मेरी ओड़ तै थम सारया नै मेरा नमस्कार। मैं या चिट्ठी इस्राएल के उन यहूदी मसीह बिश्वासियां नै लिखूं सूं, जिनके बाराह गोत्र सारी दुनिया ह्द तित्तर-वितर होके रहण लागरै सै।



2 हे मेरे बिश्वासी भाईयो, जिव थम कई ढाळ की मुसीबतां का सामना करो सो, तो इसनै पूरे आनन्द की बात समझो, <sup>3</sup> क्यूँके थम जाणो सां, के थारे बिश्वास के परखे जाण तै धीरज बढ़ै सै। <sup>4</sup> हरेक बात ह्द धीरज धरणा सीखो, ताके थम आत्मिकता ह्द पूरे सिध्द हो जाओ, अर थारे ह्द किसे बात की कमी ना रहवै। <sup>5</sup> पर थारे ह्द तै जै किसे नै बुद्धि की कमी सै, तो परमेसवर तै माँगै, जो बिना उल्हाणा दिये, सारया नै बड़ी उदारता तै देवै सै, अर उस ताहीं दी जावैगी। <sup>6</sup> पर वो बिना शंका के बिश्वास तै माँगै, अर कुछ शक ना करै, क्यूँके शक करण आळा माणस टिक्या न्ही रहन्दा जो समुन्दर की उस लैहर की तरियां सै जो हवा के चाल्लण तै उच्छळै सै। <sup>7</sup> शक करण आळा माणस या बात बिल्कुल ना सोचवै, के उसनै प्रभु तै कुछ मिलेगा, <sup>8</sup> वो माणस दोगला सै अर अपनी किसे बात ह्द टिकता कोनी।



9 जो बिश्वासी भाई गरीब सै, उननै खुश होणा चाहिए, क्यूँके परमेसवर उनकी इज्जत करै सै, <sup>10</sup> अर धनवान अपने ऊँचे पद पै घमण्ड ना करै, क्यूँके वो घास के फूल की ढाळ सूख जावैगा। <sup>11</sup> सूरज लिकड़दे ए घना घाम पड़े सै, अर घास नै सुक्खा देवै सै, अर उसका फूल झड़ जावै सै, अर उसकी खूबसूरती जान्दी रहै सै। इस ढाळ धनवान भी अपने काम करदे-करदे माट्टी ह्द मिल ज्या जावैगा।



12 धन्य सै वो माणस जो परखे जाण पै खरे उतरे सै, क्यूँके परखे जाणके बाद ए जीवन का वो मुकुट पावेंगे, जिसका वादा परमेसवर नै उन माणसां तै करया सै, जो परमेसवर तै प्यार करै सै। 13 जिव किसे की परख हो सै, तो वो या ना कहवै के परमेसवर मन्नै परखण लागरया सै, क्यूँके परमेसवर बुरी बातों की परख म्ह कोनी पड़ता, अर ना वो किसे की परख आप करै सै। 14 पर हरेक माणस अपनी ए लालसा म्ह पड़के अर फँसके परख्या ज्या सै। 15 जिव बुरी इच्छा भोत घणी बढ़ ज्या सै, तो पाप नै जन्म देवै सै, अर पाप जिव भोत घणा बढ़ जावै सै, तो अनन्त मौत नै जन्म देवै सै।

16 हे मेरे प्यारे विश्वासी भाईयो, धोक्खे म्ह ना रहों। 17 क्यूँके हरेक आच्छा वरदान अर हरेक उत्तम दान परमेसवर की ओड़ तै ए सै, जो सिध्द सै, जिसनै आसमान की ज्योतियाँ बणाई सै, अर वो इनकी छाया की तरियां कंदे बदलता कोनी। 18 उसनै अपनी ए इच्छा तै, म्हारै ताहीं सच के वचन के जरिये जन्म दिया, ताके हम उसकी बणाई होई रचना म्ह सब तै खास हो, जिस तरियां किसान खात्तर फसल का पैहला हिस्सा नाज होवै सै।



19 हे मेरे प्यारे विश्वासी भाईयो, या बात थम जाण ल्यो, हरेक माणस सुणण के खात्तर तैयार अर बोल्लण म्ह उतावळा ना हो, अर अपने छो नै काबू म्ह करण आळा हो। 20 क्यूँके माणस जिव छो म्ह हो सै तो वो धार्मिकता के काम न्ही कर सकता, जो परमेसवर उसतै करवाणा चाहवै सै। 21 इस करके सारे मन की गंदगी अर नफरत नै दूर करके, परमेसवर के उस वचन नै नमूरता तै मान ल्यो, जो मन म्ह बोया गया सै, अर जो थारे प्राणा का उद्धार कर सकै सै।

22 पर परमेसवर के वचन पै चाल्लण आळे वणो, अर सिर्फ सुणण आळे ए न्ही, जो अपने-आपनै धोक्खा देवै सै।

23 क्यूँके जो कोए परमेसवर के वचन का सुणण आळा हो, अर उसपै चाल्लण आळा ना हो, तो वो उस माणस के समान सै, जो अपना मुँह शीशे म्ह देखै सै। 24 इस करके के वो अपने-आपनै देखके चाल्या जावै सै, पर जिव्बे भूल जावै सै, के मै किसा था। 25 पर जो माणस ध्यान तै परमेसवर के सिध्द नियम-कायदा नै पढ़ता रहवै सै, जो हरेक माणसां नै पापां तै आजादी देवै सै, परमेसवर उसनै आशीर्वाद देवैगा, क्यूँके वो सुणके भूलता कोनी, पर उसाए करै सै।

26 जै कोए अपने-आपनै परमेसवर का भगत समझे, अर अपनी जीभ पै लगाम ना लगावै, पर अपने मन नै धोक्खा दे, तो उसकी भगति बेकार सै। 27 म्हारे पिता परमेसवर की नजर म्ह सच्ची अर शुद्ध भगति या सै, के अनाथ्यां अर विधवाया के क्लेश म्ह उसकी सुधि ले, अर अपने-आपनै दुनिया तै बेदाग राखै।

## 2



1 हे मेरे विश्वासी भाईयो, थम म्हारे महिमामय प्रभु यीशु मसीह के चेल्ले सों, इस करके थारे म्ह भेद-भाव की भावना ना हो। 2 जै एक माणस सोन्ने के छल्ले अर सुथरे लत्ते पहेरे होए थारी मण्डली म्ह आवै, अर एक कंगाल भी मैल्ले कुचले लत्ते पहेरे होए आवै, 3 अर थम उस सुथरे लत्ते आळे नै इज्जत देके कहो, “तू ओड़ै खास जगहां बैठ,” अर उस कंगाल तै कहो, “तू ओड़ै खड्या रहै,” या “मेरे पायां धारे बैठ।” 4 तो के थमनै भेद-भाव कोनी करया, अर बुरे विचार तै न्याय करण आळे न्ही वणे?

5 हे मेरे प्यारे विश्वासी भाईयो, सुणो। के परमेसवर नै इस दुनिया के कंगालां ताहीं न्ही छाट्या, के विश्वास म्ह धनी हो जाओ, अर उस राज्य के अधिकारी हो जाओ, जिसका वादा उसनै उनते करया सै, जो उसतै प्यार करै सै? 6 पर थमने उस कंगाल की बेजती करी सै। के धनी माणस ए थारे पै जुल्म न्ही करदे, अर के वे थमने कोट-कचेहड़ी म्ह न्ही घसीट-घसीट के ले जान्दे? 7 ये वे धनी माणस ए सै, जो प्रभु यीशु के महिमामय नाम की, जिसके थम कहवाओ सों, बेजती करै सै।

8 तोभी जै थम पवित्तर ग्रन्थ के इस वचन कै मुताबिक के “तू अपणे पड़ोसी तै अपणे समान प्यार कर” साच्ये उस राजसी नियम नै पूरा करो सों, तो आच्छा ए करो सों। 9 पर जै थम भेद-भाव करो सों तो पाप करो सों, अर मूसा के नियम-कायदे थमनै कसूरवार बतावै सै। 10 क्यूँके जो कोए मूसा के सारे नियम-कायदे नै पुगावै सै, पर एके बात म्ह चूक जावै, तो वो सारी बातों म्ह कसूरवार बण लिया सै। 11 इस करकै के जिसनै यो कह्या, “तू जारी ना करिये” उसने नै यो भी कह्या, “तू हत्या ना करिये,” इस करकै जै तन्नै जारी तो कोनी करी, पर हत्या करी सै, तोभी तू नियम-कायदा का तोड़ण आळा बणग्या।

12 इस करकै थारी कथनी अर करणी उनके समान हो, जिनका न्याय उस नियम-कायदा कै मुताबिक करया जावैगा, जो म्हारे ताहीं आज्ञादी देवै सै।

13 क्यूँके जिसनै दया न्ही करी, उसका न्याय बिना दया के होगा: जै थम दुसरयां पै दया न्ही करते, तो न्याय के दिन परमेसवर भी थारे पै दया कोनी करैगा।

### XXXXXXXX XX XXXX

14 हे मरे विश्वासी भाईयो, जै कोए कहवै के मै प्रभु यीशु मसीह पै विश्वास करूं सूं, पर वो उसकै मुताबिक आच्छे काम न्ही करदा हो, तो इसतै के फायदा? कै इसा विश्वास उसका उद्धार कर सकै सै? 15 जै कोए विश्वासी भाई या भाण जिनकै धौरै पैहरण खात्तर भी लत्ते ना हो, अर उननै रोज खान नै भी ना मिलता हो, 16 मान ल्यो थारे म्ह तै कोए उनतै कहवै, “ठीक-ठाक जाओ, थम गरम लत्ते पैहरो अर छिके रहों,” पर जो चीज देह खात्तर जरूरी सै, वा उनतै ना देवै, तो के फायदा? 17 उससे तरियां विश्वास भी, जै आच्छे कर्म सुधा ना हो, तो अपणे सुभाव म्ह मरया होया सै।

18 बल्के कोए या कह सकै सै, “तन्नै विश्वास सै, अर मै कर्म करूं सूं।” तू अपणा विश्वास मन्नै आच्छे कर्म बिना तो दिखां, अर मै अपणा विश्वास तन्नै अपणे कर्मों के जरिये दिखाऊंगा। 19 तन्नै विश्वास सै, के एके परमेसवर सै, तू आच्छा करै सै। ओपरी आत्मा भी विश्वास करै सै, अर डर तै धरधर कापै सै।

20 पर हे बिना अकल के माणस, के तू यो भी न्ही जाणदा के बिना आच्छे कर्म विश्वास बेकार सै? 21 म्हारे पूर्वज अब्राहम नै अपणे बेटे इसहाक ताहीं (बलि खात्तर) वेदी\* पै चढ़ाया, तो वो आच्छे कर्मों तै धर्मी ठहरया गया। 22 थमनै देख लिया के उसके काम के गैल विश्वास नै मिलकै असर करया, अर आच्छे काम के कारण उसका विश्वास सिध्द होगया। 23 अर पवित्तर ग्रन्थ का यो वचन पूरा होया: “के अब्राहम नै परमेसवर का विश्वास करया,” अर इस खात्तर धर्मी बण गया, अर वो परमेसवर का साथी कुह्याया। 24 इस ढाळ थमनै देख लिया, के माणस सिर्फ विश्वास तै ए न्ही, पर भले कर्मों तै भी धर्मी मान्ना जावै सै।

25 उससे तरियां राहाब बेश्या भी, जिव उसनै जासूसों ताहीं अपणे घर म्ह शरण दी अर दुसरे राह तै बिदा करया, तो आच्छे कर्मों तै वा धर्मी बणी। 26 जिस तरियां देह आत्मा बिना मरी होई सै, उससे तरियां विश्वास भी आच्छे कर्म बिना मरया होया सै।

## 3

### XXXX XX XX XXXX XXXX

1 हे मरे विश्वासी भाईयो, थारे म्ह तै कलीसिया म्ह घणे उपदेशक ना बणै, क्यूँके थम जाणो सों के हम जो उपदेशक सां, म्हारा न्याय दुसरयां तै भी घणा सख्ताई तै करया जावैगा। 2 हम सब घणीए बार चूक जावां सा, पर जो कोए मुँह तै गलत बात न्ही बोलता, वोए तो सिध्द माणस सै, अर वोए सारी देह पै भी लगाम लगा सकै सै।

3 जिव हम बस म्ह करण खात्तर घोडचा कै मुँह पै लगाम लगावा सां, तो हम उस घोड़े नै भी काबू कर सकां सां। 4 चाहे हवा कितनी भी तेज क्यूँ ना हो, एक छोट्टी सी पतवार तै, एक माँझी एक बड़े जहाज नै भी मोड़ सकै सै।

\* 2:21 2:21 वेदी-परमेसवर ताहीं भेट चढ़ाण खात्तर एक जगहा

5 उससे तरियां जीभ भी एक छोट्टा सा अंग है, अर वा बड़ी-बड़ी बात करण की डींग मारै है। देखों, छोट्टी सी चिंगारी तै कितने बड़े बण म्ह आग लाग ज्या है।<sup>6</sup> हाँ, जीभ एक आग के समान है, या म्हारे देह का एक इसा खतरनाक हिस्सा है, जो माणस तै अधर्म के काम करवा देवै है, अर उसकी पूरी जिन्दगी नै बरबाद कर देवै है, या म्हारे जीवन नै नरक की आग के समान खतम कर सकै है।

7 हरेक ढाळ के जंगळी पशु, पंछी, रेंगण आळे जन्तु, अर पाणी के जीव, तो माणस के बस म्ह हो सकै है, अर बस म्ह हो भी गये।<sup>8</sup> पर जीभ नै कोए भी बस म्ह न्ही कर सकता, या एक इसी खतरनाक बला है, जो कदे रूकती कोन्या, जो साँप के समान, जहर तै भरी होई है।

9 जीभ तै ए हम पिता परमेसवर अर प्रभु की बड़ाई करा सां, अर इस्से तै जो परमेसवर के रूप म्ह बणाये गये माणसां नै श्राप देवां सां।<sup>10</sup> एके मुँह तै आशीष अर श्राप दोनु लिकड़ै है। हे मेरे विश्वासी भाईयो, इसा न्ही होणा चाहिए।<sup>11</sup> धरती के एके चोवै\* तै मिट्टा अर खाया पाणी दोनु न्ही लिकड़ सकदे।<sup>12</sup> हे मेरे विश्वासी भाईयो, के अंजीर के पेड़ म्ह जैतून, या अंगूर की डाळी म्ह अंजीर लाग सकै है? उससे तरियां खारे चोवै तै मिट्टा पाणी न्ही लिकड़ सकता।



13 जे थम समझदार अर परमेसवर की बातं नै समझण आळे माणस सां, तो इस बात नै नरमाई अर समझदारी तै एक आच्छा जीवन जी के, साबित करो।<sup>14</sup> पर जे थारे मन म्ह घणी जळण अर मतलबीपण है, तो अपने ज्ञान का ज्यादा दिखावा ना करो, क्यूँके इसा करण तै थम सच नै छुपाओ सां।<sup>15</sup> इसा ज्ञान परमेसवर की ओड़ तै न्ही, बल्के वो ज्ञान दुनियावी, शारीरिक अर शैतान की ओड़ तै है।<sup>16</sup> क्यूँके जड़े जळण अर मतलबीपण होवै है, ओड़ै बखेड़ा अर हरेक ढाळ के बुरे काम भी होवै है।

17 पर जो ज्ञान परमेसवर देवै है, वो पैहला तो पवित्र होवै है, फेर शांतिपरिय, सहनशील, विनम्र, खियास राक्खण आळा, भले काम अर दया तै भरया होया परोपकारी अर बिना भेद-भाव का, अर बिना कपट का होवै है।<sup>18</sup> मेळ-मिलाप करण आळा, किसान की तरियां है, जो शान्ति का बीज बोवै है, अर धार्मिकता की फसल काटै है।

## 4



1 थारे म्ह लड़ाई झगड़ें का कारण के है? के थारे भित्तर उन बुरी लालसा तै न्ही, जो थारे म्ह लड़ै-भीड़ै है? 2 थम लालसा राक्खो सां, पर थमनै मिलता कोनी, ज्यातै थम हत्या करण का भी इरादा राक्खो सां। थम जळण करो सां, अर कुछ पान्दे कोनी, इस करके थम लड़ो अर झगड़ो सां। थमनै इस करके न्ही मिलदा क्यूँके थम परमेसवर तै माँगते कोनी।

3 हालाकि थम माँगो सां, फेर भी थमनै मिलता कोनी, क्यूँके भुंडी इच्छा तै माँगो सां, ताके अपने ऐसो-आराम म्ह उड़ा यो।

4 हे बेईमान माणसां, के थम न्ही जानते, दुनिया की चिज्जां तै प्यार करणा, परमेसवर तै बैर करणा है। इस करके जो कोए संसार का साथी बणणा चाहवै है, वो अपने-आपनै परमेसवर का बैरी बणावै है।<sup>5</sup> के थम पवित्र ग्रन्थ म्ह लिखी होई इस बात नै बेकार समझो सां, जिस म्ह लिख्या है, “जिस पवित्र आत्मा ताहीं परमेसवर नै म्हारे भित्तर बसाया है, वो बड़ी लालसा करै है, के हम परमेसवर तै प्यार करां।”<sup>6</sup> पर परमेसवर तो और भी अनुग्रह करै है, ताके हम बुरी इच्छा तै लड़ सकां, इस कारण पवित्र शास्त्र म्ह यो लिख्या है, “परमेसवर घमण्ड करण आळा का विरोध करै है, पर दीन माणसां पै अनुग्रह करै है।”

7 इस करके परमेसवर के अधीन हो जाओ, अर शैतान का विरोध करो, तो वो थारे धारे तै भाग ज्यागा।<sup>8</sup> परमेसवर के धारे आओ तो वो भी थारे धारे आवैगा। हे पापियों, अपने जीवन तै पाप दूर

\* 3:11 3:11 चोवै सोते

करो, अर हे दोगले माणसों अपणे मन नै पवित्तर करो। <sup>9</sup>अपणे पापां के कारण दुखी होओ, अर शोक करो, रोओ। थारी हाँसी शोक म्ह अर थारा आनन्द उदासी म्ह बदल जावै। <sup>10</sup>प्रभु कै स्याम्ही नरम बणो तो वो धमनै आदर मान देवैगा।

\*\*\*\*\*

<sup>11</sup>हे विश्वासी भाईयो, एक-दुसरे की बदनामी ना करया करो। जो अपणे विश्वासी भाई की बदनामी करै सै या उसपै दोष लगावै सै, वो मूसा के नियम-कायदा का विरोध करै सै, अर जै तू मूसा के नियम-कायदा का विरोध करै सै, तो तू नियम-कायदा पै चाल्लण आळा कोनी, पर उसपै न्याय करण आळा बणगया। <sup>12</sup>मूसा के नियम-कायदे देण आळा अर न्याय करण आळा एके सै, जो परमेसवर सै, जो बचाण अर नाश करण म्ह दोनुआ का हक राखै सै, पर तन्नै किसे पै इल्जाम लगाण का कोए हक कोनी।

\*\*\*\*\*

<sup>13</sup>धम जो या कहाँ साँ, “आज या तड़के हम किसे और नगर म्ह जाके ओड़ै एक साल बितावागें, अर व्यापार करके फायदा कमावागें।” <sup>14</sup>पर धम यो न्ही जाण्डे के कल के होवैगा? सुण तो ल्यो, थारा जीवन सै एके? धम तो धुंध की तरियाँ साँ, जो थोड़ी देर दिक्खे सै फेर खू ज्या सै। <sup>15</sup>इसकी बजाए धमनै या कहणा चाहिए, “जै प्रभु चाहवै तो हम जिन्दा रहवागें, अर यो काम भी करागें।” <sup>16</sup>पर इव धम अपणे-आप पै धमण्ड करो साँ, यो धमण्ड पाप सै। <sup>17</sup>इस करके जो कोए भलाई करणा जाणै सै, अर कोनी कर्दा, उसके खात्तर यो पाप सै।

## 5

\*\*\*\*\*

<sup>1</sup>हे साहूकारो, सुण तो ल्यो, धम अपणे आण आळे दुखाँ पै किल्की मारकै रोओ। <sup>2</sup>थारा धन खराब होगया अर थारे लत्ता नै कीड़े खाँगे सै। <sup>3</sup>थारे सोन्ने चाँदी की कोए किम्मत कोनी रही, जिस सोन्ना चाँदी ताहीं धमने कट्टा करया सै, बाए थारी गवाही देंगे, अर थारी देह नै राख कर देगी। धमनै अन्त के युग म्ह धन कट्टा करया सै। <sup>4</sup>देक्खो जिन मजदूरों नै थारे खेत काट्टे, उनकी वा मजदूरी जो धमने धोक्खा देकै राखली सै। वे मजदूर चिल्लावै सै, अर उनकी दुहाई सेनाओं के प्रभु कै कान्ना तक पहुँच गयी सै। <sup>5</sup>धम धरती पै ऐसो-आराम म्ह लागे रहै, अर बड़ड़ा ए सुख भोगया, अर इसा करते-करते धम जानवरां की तरियाँ बणगे साँ, जिन ताहीं काट्टण तै पहले मोट्टा ताजा करया जावै सै, उससे तरियाँ धम न्ही जाणते के धम भी अपणे-आप ताहीं परमेसवर की सजा खात्तर तैयार करण लागे साँ। <sup>6</sup>जो धर्मी जन थारा सामना न्ही कर सकै थे, धमनै उन ताहीं कसूरवार बणाकै मार दिया।

\*\*\*\*\*

<sup>7</sup>इस करके हे विश्वासी भाईयो, प्रभु कै आण तक धीरज धरो। जिस तरियाँ जमीदार धरती की कीमती फसल की आस धरकै पैहली अर आखरी बारिस होण तक धीरज धरै सै। <sup>8</sup>धम भी धीरज धरो, अर अपनी आस नै ना खोओ, क्यूँके प्रभु का आणा लोवै सै। <sup>9</sup>हे विश्वासी भाईयो, एक-दुसरे पै कुड़कुड़ाओ ना, न्ही तो परमेसवर भी धमनै दण्ड देवैगा, क्यूँके लखाओ, न्याय करण आळा आण खात्तर घणा लोवै सै।

<sup>10</sup>हे विश्वासी भाईयो, जिन नबियाँ नै प्रभु के नाम तै बात करी, उननै दुख उठाण अर धीरज धरण का एक आदर्श समझों। <sup>11</sup>हम धीरज धरण आळे नै धन्य कहुँ साँ। धमनै अय्यूब नामक माणस कै धीरज कै बारे म्ह तो सुण्या ए सै, अर किस तरियाँ प्रभु नै उस ताहीं प्रतिफळ दिया, जिसतै धमनै प्रभु ताहीं जाण भी लिया के किस तरियाँ प्रभु करुणा अर दया करै सै। <sup>12</sup>पर हे मेरे विश्वासी भाईयो, सारा तै बड़डी बात या सै कै कसम ना खाईयो, ना सुगं की, ना धरती की, ना किसे और चीज की, पर थारी बात हाँ की हाँ ना की ना हो, ताके परमेसवर धमनै दण्ड ना देवै।

\*\*\*\*\*

13 जै थारे म्ह तै कोए दुखी सै, तो वो प्रार्थना करै। जै आनन्दित सै, तो परमेशवर की बड़ाई के भजन गावै। 14 जै थारे म्ह तै कोए रोगगी सै, तो कलीसिया के अगुवां नै बुलावै, अर वे प्रभु के नाम तै उसपै तेल मल के उसकै खात्तर प्रार्थना करै, 15 अर बिश्वास की प्रार्थना के जरिये रोगगी बच ज्यागा अर प्रभु उस ताहीं ठीक करैगा, अर उसनै जै पाप भी करे हो, तो उनकी भी माफी हो ज्यागी। 16 इस करके थम एक-दुसरे के विरुद्ध किये गये, अपणे-अपणे पापां नै मान ल्यो, अर एक-दुसरे खात्तर प्रार्थना करो, जिसतै ठीक हो जाओ: धर्मी जन की प्रार्थना के असर तै सब कुछ हो सकै सै।

17 एलिय्याह नबी भी तो म्हारै समान दुख-सुख भोगी माणस था, अर उसनै मन लगाकै प्रार्थना करी, के मिह ना बरसै, अर साढ़े तीन साल तक धरती पै मिह कोनी बरसा। 18 फेर उसनै प्रार्थना करी, तो अकास तै बरसा होई, अर धरती पै फसल भी होई।

19 हे मेरे बिश्वासी भाईयो, जै थारे म्ह तै कोए सच की राह तै भटक जावै अर दुसरा कोए उसनै बोहड़ के उस राह पै ले आवै सै, 20 तो वो यो सच जाण लेवै के जो कोए भटके होए पापी नै पाप छोड़ण म्ह उसकी मदद करैगा, पाप छोड़ण आळे के अनेक पाप माफ हो जावेंगे अर उसकी जिन्दगी अनन्त मृत्यु तै बचावैगा।

## पतरस की पैहली चिट्ठी



पतरस की पैहली चिट्ठी उन विश्वासियाँ के नाम लिखी गई थी, जिनने ओड़ै “परमेसवर के चुणे होए माणस” कहा गया सै, जो एशिया माइनर के सारे उतरी इलाके म्ह तित्तर-बितर हो के रहवै थे। इस चिट्ठी का खास मकसद अपने पाठकां ताहीं उत्साहित करना सै, जो के अपने विश्वास के कारण दुःख अर सताव का सामना करण लागरे थे। लेखक अपने पाठकां ताहीं यीशु मसीह के सुसमाचार की याद दुवा, के इसा कर सै, क्यूँके यीशु का मरणा, जी उठणा, अर यीशु का दुवारै आण के बारे म्ह बेरा होणा उननै तसल्ली देवै सै। इस नजरिये तै उननै अपने दुखां अपणाना अर सहण करणा था, इस विश्वास के साथ के यो उनके विश्वास की सच्चाई की परख सै, अर यो सै के “यीशु मसीह के परगट होण” के दिन उननै इसका फळ मिलैगा। सताव के बखत हिम्मत बढ़ाण के साथ, लेखकां नै या भी बिनती करै सै, के उसके पाठक इसे माणसां की तरियां जीवन बितावै जो मसीह के जन सो।

रूप-रेखा

जानकारी 1:1,2

परमेसवर के उद्धार नै याद करवाणा 1:3-12

पवित्र जीवन के खात्तर उपदेश 1:13-2:10

दुखां के बखत विश्वासी की जिम्मेदारियां 2:11-4:19

मसीह की दीनता अर सेवा 5:1-11

समापन 5:12-14

1 या चिट्ठी पतरस की ओड़ तै सै, जो यीशु मसीह का प्रेरित सै, मै या चिट्ठी परमेसवर के चुणे होए माणसां के खात्तर लिखण लागरया सूं, जो परदेशी होके पुन्तुस, गलातिया, कप्टूकिया, आसिया अर विधुनिया परदेसां म्ह तित्तर-बितर होके रहवै सै।<sup>2</sup> परमेसवर पिता नै थारे ताहीं अपने माणस बणाण खात्तर, भोत पैहले चुण लिया था, ताके थमनै पवित्र आत्मा के काम के जरिये पवित्र बणावै, यो उसनै इस खात्तर करया ताके थम यीशु मसीह का कहणा मान्नो, अर उसके लहू तै शुद्ध हो जाओ। हम प्रार्थना करा सां के परमेसवर थमनै अनुग्रह अर शान्ति भोत-ए घणी दे।<sup>3</sup> म्हारे मसीह यीशु के पिता अर परमेसवर का धन्यवाद हो, जिसनै म्हारे पै बड़ी दया करके म्हारे ताहीं नई जिन्दगी दी सै, क्यूँके परमेसवर नै यीशु मसीह ताहीं मुदां म्ह तै जिन्दा करया, उसनै म्हारे ताहीं बड़े विश्वास के साथ जीण के लायक बणाया, ताके हम उन चिज्जां की आस राक्खां जिसका देण का उसनै वादा करया सै।<sup>4</sup> हम उस वसियत नै जो परमेसवर नै म्हारे खात्तर तैयार करी सै, उस ताहीं लेण की हम बाट देक्खां सां, उसनै म्हारे खात्तर उस ताहीं सुर्ग म्ह राख्या सै, जित्त वा कदे गळ नही सकदी, खराब नही हो सकदी, अर नाश नही हो सकदी।<sup>5</sup> परमेसवर नै अपनी महान शक्ति तै थारे ताहीं सम्भाळ के राख्या सै, क्यूँके थम मसीह पै विश्वास करो सां, जिस दिन मसीह बोहड़के आवैगा, उस दिन तक मसीह थमनै सम्भाळ के राक्खैगा, फेर थम जाणोगे के परमेसवर नै थारे ताहीं पाप अर मौत तै बचा के राख्या सै।<sup>6</sup> थमनै इन सारी बाचां तै खुश होणा चाहिए भलाए थम कुछ बखत खात्तर कई ढाळ की मुसीबतां के कारण दुखी सो।<sup>7</sup> ये मुसीबत इस्से खात्तर आवै सै, ताके देख्या जा सकै, के परमेसवर पै थारा पक्का विश्वास सै के नही। थारा मसीह यीशु पै विश्वास करणा सोन्ने तै भी घणा कीमती सै, जिस तरियां नाशवान सोन्ना आग म्ह परख्या अर शुद्ध करया जावै सै, उस्से तरियां जै थारा विश्वास घणी मुसीबतां म्ह भी बणया रहवै सै, तो जब प्रभु यीशु मसीह बोहड़ के आवैगें तो थारे ताहीं बड़ाई महिमा अर आदर मिलैगा।<sup>8</sup> थमनै मसीह ताहीं कदे नही देख्या, उसतै थम बिन देखे प्यार करो सो, अर इब तो उसपै बिन देखे भी विश्वास करके इसे राज्जी अर मग्न होवो सो, जिस ताहीं बताण खात्तर म्हारे धरै शब्द कोनी।<sup>9</sup> थम इस खात्तर खुश सां, क्यूँके

परमेसवर नै थारे ताहीं पाप की सजा तै बचा लिया सै, अर योए मसीह पै विश्वास करण का ईनाम सै। <sup>10</sup>इस्से उद्धार कै बारे म्ह उन नबियाँ नै घणी खोज अर जाँच-पड़ताळ करी, जिननै उस अनुग्रह कै बारे म्ह, जो थारे पै होण आळा था, भविष्यवाणी करी थी। <sup>11</sup>मसीह का आत्मा जो उन म्ह था अर उन ताहीं बताण लागरया था, के मसीह किसा दुख ठावैगा अर उसके पाच्छे, उस बारे म्ह उस ताहीं महिमा मिलैगी, इस कारण उननै यो बेरा पाड़ण खात्तर उसकी खोज करी, मसीह कौण होवैगा, अर यो कद होवैगा। <sup>12</sup>पर परमेसवर नै इन नबियाँ ताहीं बताया था, के यो सन्देस उन खात्तर न्ही बल्के थारे खात्तर सै, यो सन्देस मसीह यीशु के बारे म्ह खुशखबरी सै, जिसके बारे म्ह थम इब सुणो सों। परमेसवर नै सुगं तै पवित्तर आत्मा ताहीं भेज्या ताके वो माणसां नै सुसमाचार सुणाण म्ह मदद कर सकै, यो इतणा अदभुत सै, के सुगंदूत भी इन चिज्जां नै होन्दे होए देखणा चाहवै सै। <sup>13</sup>इस खात्तर गौर तै सोच्चों के थम के करण आळे सों, अर अपणे-आप पै काबू राक्खों अर परमेसवर तै उद्धार पाण का भरोस्सा राक्खों जो अनुग्रह तै मिलै सै, अर वो थमनै जिब देवैगा जिब मसीह यीशु सुगं तै बोहड़के आवैगा। <sup>14</sup>परमेसवर के आज्ञाकारी बणो जिस तरियां आच्छे, बाळक अपणे पिता का हुकम मान्ने सै, अर पुराणी जिन्दगी के मुताबिक मत जिओ, जिब थम बुरी लालसा नै पूरी करो थे। <sup>15</sup>पर जिसा थारा बुलाण आळा पवित्तर सै, उस्से तरियां ए थम भी अपणे सारे चाल-चलण म्ह पवित्तर बणो। <sup>16</sup>क्यूँके पवित्तर ग्रन्थ म्ह लिख्या सै, “पवित्तर बणो, क्यूँके मै पवित्तर सूँ।” <sup>17</sup>अर जिब के थम हे पिता कहके परमेसवर तै प्रार्थना करो सो, जो बिना पक्षपात, हरेक के काम के मुताबिक न्याय करै सै, तो इब जो थम, जिब इस धरती पे परदेशियाँ की तरियां जीण लागरे सों, तो थम उसके प्रति बड़े आदर रखते होए अपनी जिन्दगी जीणी चाहिए। <sup>18</sup>क्यूँके थमनै बेरा सै, के थारा निकम्मा चाल-चलण जो बाप-दादां तै चल्या आवै सै, उस बेकार जिन्दगी तै थम बचगे सों, अर थारा छुटकारा चाँदी-सोन्ने यानिके नाश होण आळी चिज्जां के जरिये न्ही होया। <sup>19</sup>पर बेकसूर अर बेदाग मन्ने, यानिके मसीह के कीमती लहू के जरिये होया। <sup>20</sup>दुनिया बणाण तै पैहल्याए परमेसवर नै मसीह यीशु ताहीं उद्धारकर्ता करके चुण लिया था, पर इब वो इन आखरी दिनां म्ह इस खात्तर आया के थारी मदद कर सकै। <sup>21</sup>जो मसीह नै करया उसकी बजह तै थम परमेसवर पै विश्वास करो सो, अर अपनी आस अर विश्वास परमेसवर पै राक्खो सो, क्यूँके उसनै मसीह ताहीं मुर्दा म्ह तै जिन्दा करया, अर उस ताहीं बड़ी महिमा दी। <sup>22</sup>क्यूँके थम सच मानण के जरिये शुद्ध करे गये सों, इस खात्तर थमनै विश्वासी भाईयाँ तै सच्चे दिल तै प्यार करणा चाहिए, अर तन-मन लाके एक-दुसरे तै प्यार करो। <sup>23</sup>थम एक-दुसरे तै इस खात्तर प्यार करो, क्यूँके थमनै परमेसवर तै नई जिन्दगी पाई सै, थमनै या जिन्दगी उसतै न्ही पाई जो नाशवान सै, पर उसतै पाई सै जो सदा के खात्तर सै। या नई जिन्दगी हमनै परमेसवर के वचन तै मिली सै, जो जीवित अर सदा रहण आळा सै। <sup>24</sup>क्यूँके पवित्तर ग्रन्थ यो कहवै सै, “हरेक जीव घास के बरगा सै, अर उनकी शोभा जंगळी फूल्लां के समान सै। घास सूख जावै सै, अर फूल झड़ जावै सै।” <sup>25</sup>पर प्रभु का वचन युगानुयुग स्थिर रहवैगा।” यो वोए सुसमाचार का वचन सै जो थारे ताहीं सुणाया गया था।

## 2

<sup>1</sup>इस करके सारी ढाळ का बैरभाव अर छळ अर कपट अर जळण अर बुराई नै दूर करके, <sup>2</sup>नये जन्मे बच्चे की तरियां जो हमेशा माँ के निर्मल दूध की लालसा करै सै, उस्से तरियां थम भी परमेसवर के वचन ताहीं सुणण की लालसा करो, ताके थारा परमेसवर पै विश्वास मजबूत हो सकै, अर थारा उद्धार हो जावै। <sup>3</sup>क्यूँके पवित्तर ग्रन्थ कहवै सै, के थमनै चख के जाण लिया सै के प्रभु कितना भला सै। <sup>4-5</sup>थम प्रभु यीशु मसीह के धारे आए हो, वो उस खास पत्थर की ढाळ सै जो नीम म्ह लगाया जावै सै, पर वो जिन्दा पत्थर सै। भोत सारे माणसां नै उस ताहीं त्याग दिया, पर परमेसवर नै उस ताहीं चुण्या, अर उस ताहीं कीमती बणाया, अर थम जो विश्वासी लोग प्रभु यीशु के धारे आए हो, ताके थम भी उसके जरिये जिन्दे पत्थरां की ढाळ हो जाओ, जो परमेसवर की आत्मिक आराधना का घर बणण म्ह काम आ सकै। उसनै थारे ताहीं भी पवित्तर याजक बणाया, जिस तरियां याजक



परमेसवर ताहीं भेट चढ़ावै सै, उससे तरियां थम भी अपणे दिल नै भेट के रूप म्ह चढ़ा द्यो, अर याए भेट परमेसवर नै आच्छी लागै सै, क्यूँके थम यीशु मसीह के कहलाओ सों।<sup>6</sup> यो उससे तरियां सै, जिसा परमेसवर पवित्र ग्रन्थ म्ह कहवै सै: “देखों, मन्ने किसे ताहीं यरुशलेम नगर म्ह कोणे के पत्थर की तरियां राख्या सै, वो उस पत्थर की तरियां सै, जो नीम पै धरया जावै सै, अर जो कोए उसपै विश्वास करैगा, वो किसे तरियां तै शर्मिन्दा कोनी होवैगा।”<sup>7</sup> यो पत्थर थारे खात्तर कीमती सै, जो मसीह यीशु पै विश्वास करो सों, पर पवित्र ग्रन्थ उन माणसां के बारे म्ह जो विश्वास न्ही करदे कहवै सै, “जिस पत्थर ताहीं राजमिस्त्रियाँ नै निकम्मा ठहराया था, वोए कोणे का पत्थर हो गया।”<sup>8</sup> पवित्र ग्रन्थ यो भी कहवै सै, के “इस पत्थर तै लोगगां कै ठोक्कर लागैगी, या वा चट्टान सै जिसतै लोग ठोक्कर खाकै गिर जावेंगे,” वे इस खात्तर गिरै सै, क्यूँके उननै परमेसवर के वचन पै विश्वास कोनी करया, परमेसवर नै उन खात्तर याए योजना बणाई सै।<sup>9</sup> पर थारे म्ह इसा ना हो, क्यूँके थम परमेसवर के चुणै होए माणस सो, थम परमेसवर के याजक सों, जो के राजा सै, थम परमेसवर के समर्पित माणस सों, अर थम जो परमेसवर के कुह्वावै सों, उसनै थारे ताहीं अन्धकार म्ह तै रोशनी म्ह बुलाया सै, ताके थम परमेसवर के उन अनोक्खे काम्मां के बारे म्ह माणसां ताहीं बता सको।<sup>10</sup> पैहले थम परमेसवर के माणस न्ही थे, पर इब परमेसवर के माणस सो, पैहले थम परमेसवर की दया नै कोनी जाणो थे, पर इब जाणो सों, क्यूँके उसनै अपनी दया पैहल्या तै थारे ताहीं दिखाई सै।<sup>11</sup> हे प्यारे विश्वासी भाईयो, मै थारे तै बिनती करूँ सूँ, के थम अपणे-आपनै दुनिया म्ह परदेशी अर मुसाफर जाणके उन दुनियावी अभिलाषायां तै जो आत्मा तै युध्द करै सै, बचे रहो।<sup>12</sup> वे लोग जो परमेसवर पै विश्वास न्ही करदे, वे भी थारे आस्सै-पास्सै ए रहवै सै, अर वे भी कह सकै सै, के थम बुरा काम करण लागरे हो। थमनै इसी आच्छी जिन्दगी जीणी चाहिए, ताके वो थारे भले काम्मां नै देखके परमेसवर की महिमा उस दिन कर सकै जिब मसीह बोहड़ के आवेगा।<sup>13</sup> प्रभु नै महिमा देण खात्तर थम उन सारे माणसां का हुकम मान्नो जो इस दुनिया के शासक सै, जिस तरियां राजा, जो के सब पै प्रधान शासक सै।<sup>14</sup> अर राज्यपालों के भी अधीन रहों, क्यूँके राजा उन बुरे काम करणीया नै दण्ड देण अर आच्छे काम करणीया नै सम्मानित करण खात्तर इस्तमाल करै सै।<sup>15</sup> परमेसवर चाहवै सै के थम भले काम करो ताके थम उन बेकूफ माणसां नै जो परमेसवर नै न्ही जाणदे, अर थारे पै झूठे दोष लगावै सै, उन ताहीं रोक सको।<sup>16</sup> थारे खात्तर भी इसा कोए कोनी जो थारे ताहीं रोक सकै, जो थम करणा चाहवो सों, क्यूँके यीशु मसीह के जरिये थम आजाद करे गये सों, पर इस बात नै थम बुरे काम करण का बहाना ना बणाओ, पर अपणे काम्मां के जरिये दिखाओ के थम परमेसवर के सच्चे दास सों।<sup>17</sup> सब का आदर करो, विश्वासी भाईयाँ तै प्यार करो, परमेसवर तै डरो, राजा का आदर करो<sup>18</sup> हे सेवको\* थम जो घर म्ह काम करो सों, अर विश्वासी भी सों, अपणे मालिकां का कहणा मान्नो अर सदा उनका आदर करो, हरेक ढाळ के मालिक के साथ इसाए बरताव करो, चाहे वो भले हो, नम्र हो, या फेर चाहे वे बुरे हो।<sup>19</sup> क्यूँके जै हम दुख ठान्दे, फेर भी जिब म्हारी कोए गलती भी ना हो, तोभी हम इस खात्तर सह लेवां सां, क्यूँके हमनै बेरा सै, के परमेसवर सब कुछ जाणै सै, परमेसवर इसतै ए खुश होवै सै।<sup>20</sup> क्यूँके जै थमनै अपराध करके घूसै खाए, अर धीरज राख्या, तो इस म्ह के बड़ाई की बात सै? पर जै भला काम करके दुख टाया हो अर धीरज राख्या हो, तो यो परमेसवर नै भावै सै।<sup>21</sup> अर थम इस्से कै खात्तर बुलाए भी गये सो, क्यूँके मसीह भी थारे खात्तर दुख ठाकै थारे ताहीं एक बढ़िया नमूना दे गया सै, ताके थम भी उसके नक्शे-कदम पै चाल्लों।<sup>22</sup> पवित्र ग्रन्थ म्ह मसीह के बारे म्ह न्यु लिख्या सै, के “ना तो उसनै पाप करया अर ना उसके मुँह तै छळ-कपट की कोए बात लिक्डी।”<sup>23</sup> वो गाळी सुणके गाळी कोनी देवै था, अर दुख ठाकै किसे ताहीं भी धमकी कोनी देवै था, पर अपणे-आप ताहीं परमेसवर कै हाथ म्ह सौंप दिया, जो धार्मिकता तै न्याय करै सै।<sup>24</sup> वो आप ए म्हारे पापां नै अपनी देह पै लिये होए कूरूस पै चढ़ गया, जिसतै हम पापां कै खात्तर मरके धार्मिकता कै खात्तर जीवन बितावां, उससे कै मार खाण तै थम चंगे होए।

\* 2:18 2:18 सेवको नौक्कर, गुलाम

25 क्यूँके थम पैहल्या भटकी होइ भेड्डां कै बरगे थे, पर इब अपने जीवन के रुखाळे अर पाळी कै धोरै बोहड़ आए सों।

### 3

1-2 हे विरबानियों, थम भी अपने धणी के अधीन रहो, अर जै थारे पिता परमेसवर के वचन पै विश्वास करण तै मना करै सै, तो जिस तरियां थम उनतै बरताव करो सों, उसकी बजह तै थारे बिना कहे वे विश्वास करैगें, वो मसीह पै जब विश्वास करैगें, जब वो थारा शुद्ध अर भक्तिमय जीवन नै देखैगें।<sup>3</sup> बाहरली की खूबसूरती के बारे म्हे चिन्ता ना करै, जिस तरियां खूबसूरती तै बाळ गूथणा, महँगे गहणे, या सुथरे लत्तें पैहरणा।<sup>4</sup> पर थारा भीतरी माणसपण, नम्रता अर दीनता जिसे अविनाशी गुणा तै सजा हो, क्यूँके परमेसवर की निगांह म्हे इसका मोल बड्डा सै।<sup>5</sup> पैहल्ले बखत म्हे पवित्र विरबान्नी भी, जो परमेसवर पै विश्वास अर आस राखे थी, वे अपने-आपने नै इस्से तरियां तै सिगारे थी, अर अपने-अपने धणी का हुकम मान्ने थी।<sup>6</sup> जिस तरियां सारा अब्राहम के हुकम म्हे रहवै थी, अर उसने स्वामी कहा करै थी। इस्से ढाळ थम भी जै दुसरयां की भलाई करो, अर थमनै किसे बात का डर ना हो, तो थम सारा\* की बेटियाँ की तरियां होओगी।<sup>7</sup> इस्से तरियां ए हे पतियों, थम अपनी पत्नियाँ के साथ मेळ-मिलाप के साथ रहों, अर सोचवों के उनकी मदद किस तरियां करी जा सके सै, थमनै यो बेरा होणा चाहिए के विरबान्नी थारे तै कमजोर सै, इस करके थमने उनका आदर करणा चाहिए, क्यूँके थम दोन्नु उस वरदान के साझेदार सों, जिसा के परमेसवर नै थारे ताहीं दिया सै, जो के अनन्त जीवन सै, यो इस खात्तर करो ताके जब थम परमेसवर तै प्रार्थना करो तो वो थारी सुणे।<sup>8</sup> आखरी म्हे मै कहणा चाहूँ सूं, के थम एक मन हो जाओ, एक-दुसरे तै भाई-भाण की तरियां प्यार करो, एक-दुसरे के बाबत दयालु रहो, अर नरम बणो।<sup>9</sup> बुराई के बदले बुराई ना करो अर ना गाळी के बदले गाळी द्यो, पर इसके उल्ट आशीष ए द्यो, क्यूँके परमेसवर नै थारे ताहीं इस खात्तर बणाया सै, के थम दुसरयां के खात्तर आशीष बण सको, जै थम इसा करोगे, तो परमेसवर थारे ताहीं भी आशीष देवैगा।<sup>10</sup> क्यूँके पवित्र ग्रन्थ कहवै सै, के "जै कोए इन्सान जिन्दगी का आनन्द टाणा चाहवै सै, अर आच्छे दिन देखणा चाहवै सै, तो वो ध्यान राखे के बुरी बातें अर जो बात सच न्ही उन ताहीं ना बोल्लो।<sup>11</sup> जो बुरे काम सै, उन ताहीं करणा छोड़ दे, इसकी बजाए वो भले काम करै, अर एक-दुसरे के साथ शान्ति तै रहण का पूरा जतन करै।<sup>12</sup> क्यूँके प्रभु की आँख धर्मियाँ पै लागी रहवै सै, अर उसके कान उनकी विनती की ओड़ लागे रहवै सै, पर प्रभु बुराई करण आळे तै दूर रहवै सै।"<sup>13</sup> जै थम सदा भले काम करो तो कोए थमनै नुकसान न्ही पुहुचा सकदा।<sup>14</sup> जै थम धार्मिकता के कारण दुख भी टाओ, तो थम धन्य सों, पर माणसां के डराण तै ना डरो, अर ना घबराओ, <sup>15-16</sup> पर अपने-अपने मन म्हे मसीह के प्रति आदर राखवों, अर उस ताहीं अपना प्रभु जाणो। जो कोए थारे तै थारी आस के बारे म्हे बुझवै, जो हम विश्वासियाँ की सै, तो उस ताहीं जवाब देण के खात्तर सारी हाण त्यार रहो, पर नम्रता अर आदर के गैल उस ताहीं जवाब द्यो। जो सही सै वोए करो, जै माणस थारे बारे म्हे बुरा बोल्लै सै, तो वो खुद शर्मिन्दा होवैगें, जब वो थारे आच्छे चाल-चलण नै देखैगें, क्यूँके मसीह के गैल थारा गहरा रिश्ता सै।<sup>17</sup> कई बार परमेसवर म्हारे ताहीं दुख अर मुसीबतां तै गुजारे सै, भलाए हम भला काम करदे हो, पर यो म्हारे खात्तर आच्छा सै, बजाए इसके के हम बुरे काम्मां के कारण दुख अर मुसीबत टावां।<sup>18</sup> मसीह नै भी म्हारे पापां खात्तर एके बार अपनी जान दे दी, यानी के एक धर्मी नै सारे अधर्मियाँ खात्तर दुख टाया, ताके वो थमने परमेसवर तक ले जावै, उसकी शारीरिक मौत तो होई पर परमेसवर की आत्मा के जरिये वो जिन्दा करया गया।<sup>19</sup> तब उसकी आत्मा नै उन आत्मायाँ ताहीं सुसमाचार सुणाया, अर प्रचार करया जो उस जगहां पै परमेसवर के जरिये कैद करी गई थी, जित्त मरे होए लोग्गां की आत्मा रहवै सै।<sup>20</sup> ये वो आत्मा सै, जिनने परमेसवर का भोत पैहले कहणा न्ही मान्या। जब नूह

\* 3:6 3:6 सारा अब्राहम की घरआळी

जहाज बणाण लागरया था, तो परमेसवर धीरज तै देखण लागरया था, के ये लोग माफी माँगै सै के न्ही, पर पाणी नै पूरी दुनिया ताहीं नाश करया सिर्फ आठ माणस जो जहाज म्ह बचे थे।<sup>21</sup> उससे पाणी का उदाहरण भी, यानिके बपतिस्मा, यीशु मसीह के जी उठण के जरिये, इब थमने बचावै सै, इसतै देह का मैल दूर करण का मतलब न्ही सै, पर शुद्ध अन्तरात्मा तै परमेसवर के पाच्छै हो जाणा सै।<sup>22</sup> वो सुर्ग पै जाके परमेसवर के सोळी ओड़ बैठ गया, अर सुर्गदूत अर अधिकारी अर सामर्थ्य उसके अधीन करे गये सै।

## 4

1 इस करके मसीह नै दुख टाया जिव उसने देह रूप धारण करया, थारा भी रविया उससे तरियां दुख उठाण का होणा चाहिए, जिसा उसका था, क्यूँके जै थमने मसीह खात्तर दुख टाण की सोच ली सै, तो थमने पाप ना करण की भी सोच ली सै, ताके आगै तै कदे थम पाप ना करो।<sup>2</sup> उस कारण वो इन्सान अपनी बाकी की जिन्दगी, इस दुनिया म्ह पापमय अभिलाषायां नै पूरी करण के खात्तर न्ही इस्तमाल करदा, पर वो, वो करै सै जो परमेसवर उस ताहीं करण के खात्तर कहवै सै।<sup>3</sup> पैहले थमने भोत सारा बखत वो काम करण म्ह बेकार कर दिया जिस म्ह गैर बिश्वासी खुशी मनावै सै, जिस तरियां लुचपण की बुरी अभिलाषाओ, मतवाळापण, लीलाक्रीडा, दारु-बाजी, जारी अर घृणित मूर्तिपूजा जिसे काम्मां तै परमेसवर नफरत करै सै।<sup>4</sup> इस कारण थारे पुराणे मित्तर अचम्भा करै सै, के थम इसे अंधाधुंध लुचपण म्ह उनका साथ न्ही देदे, अर वे इब थमने गाळी देवै सै।<sup>5</sup> पर वे उसने जो जिन्दयां अर मरे होए माणसां का न्याय करण नै त्यार सै, लेक्खा देवैगें।<sup>6</sup> योए कारण सै के सुसमाचार उन माणसां ताहीं सुणाया गया, जो इब मर चुके सै, हालाकि वे सब माणसां की तरियां मरण के जोगे ए थे, इब वे आत्मा म्ह परमेसवर के साथ हमेशा के खात्तर रहवै सै।<sup>7</sup> सारी बात्तां का अन्त तावळा होणाआळा सै, इस करके सावधान रह अर शान्त मन राख ताके तू प्रार्थना कर सकै।<sup>8</sup> सारया म्ह बढ़िया बात या सै के एक-दुसरे तै घणा प्यार करो, क्यूँके जै थम माणसां तै प्यार करोगे तो थम उन ताहीं माफ करण खात्तर तैयार रहोगे, जो थारा बुरा करै सै।<sup>9</sup> बिना कुड़कुड़ाए एक-दुसरे की मेहमान-नवाजी करो।<sup>10</sup> हरेक इन्सान ताहीं परमेसवर के जरिये काबलियत मिली सै अर वो उस काबलियत नै दुसरे लोगगां की मदद करण खात्तर इस्तमाल करै, वो परमेसवर के आच्छे सेवक की तरियां उसके अनुग्रह के जरिये दिए गए वरदानां का बढ़िया इस्तमाल करै।<sup>11</sup> जै थारे धौरे प्रचार करण का वरदान सै, तो थमने परमेसवर के वचन का प्रचार करणा चाहिए, जै थारे धौरे दुसरयां की मदद करण का वरदान सै, तो उस शक्ति तै करो जो परमेसवर नै थारे ताहीं दी सै, फेर जो भी काम करोगे, यीशु मसीह के जरिये परमेसवर नै महिमा मिलैगी, सारी महिमा अर सामर्थ्य युगानुयुग उससे का सै। आमीन।<sup>12</sup> हे प्यारे बिश्वासी भाईयो, उन दुखां के खात्तर अचम्भा ना करो जो थम सहण लागरे सों, क्यूँके थम मसीह के कुह्नाओ सों, ये चीज इस खात्तर होण लागरी सै, क्यूँके सचमुच थम यीशु पै बिश्वास करो सों, तो इसा ना समझो के अनोक्खी बात थारे ए गैल होण लागरी सै।<sup>13</sup> इस बात खात्तर खुश होओ, के थम मसीह के दुख म्ह साझेदारी हो सके, उस बजह तै जिव मसीह बोहड़ के आवैगा, अपनी महिमा लोगगां नै दिखान खात्तर, तो थम खुशी तै भर जाओगे।<sup>14</sup> फेर जै मसीह के नाम के खात्तर थारी बुराई करी जावै सै तो थम धन्य सो, क्यूँके परमेसवर की महिमाय आत्मा सै जो थारे म्ह रहवै सै।<sup>15</sup> जै दुख टाओ सों, तो यो दुख खून्नी, चोर, किसे बुरे काम, या किसे और के काम म्ह दखलंदाजी करण के कारण न्ही होणा चाहिए।<sup>16</sup> पर जै मसीह होण के कारण दुख पावै, तो शर्मिन्दा ना होइयो, पर इस बात के खात्तर परमेसवर की महिमा करो, क्यूँके थम उसके कुह्नाओ सों।<sup>17</sup> क्यूँके वो बखत आण पोंहच्या सै, के पैहल्या परमेसवर के माणसां का न्याय करया जावैगा, अर जिव के न्याय की शरुआत म्हारे ए तै होगी, तो उनका के अन्त होगा जो परमेसवर के सुसमाचार नै न्ही मानते? <sup>18</sup> जिसा पवित्र ग्रन्थ कहवै सै, के “जै धर्मी माणस ए मुश्किल तै उद्धार पावैगा, तो भगतिहीन अर पापी का के ठिकाणा?” <sup>19</sup> ज्यातै जो परमेसवर की मर्जी के मुताबिक दुख टावै सै, उनने परमेसवर पै सदा बिश्वास करते रहणा चाहिए, जिसने उन ताहीं बणाया सै। परमेसवर नै

जो भी वादा करया सै, उस ताहीं वो हमेशा पूरा करै सै, इस खात्तर हमनै हमेशा भलाई करदे रहणा चाहिए।

## 5

1 थारे म्ह जो कलीसिया के अगुवें सै, मै थारे ताहीं कुछ बताणा चाहूँ सँ, क्यूँके मै थारी तरियां बुजुर्ग सँ, मन्नै खुद वे दुख देखे सै, जो मसीह नै भोत पैहले सहे सै, जिव वो बोहड़ के आवैगा तो मै भी उसकी महिमा म्ह शामिल होऊँगा। 2 जिस तरियां एक पाळी भेड्या की रुखाळी करै सै, उससे तरियां थमनै भी उन लोग्गां की रुखाळी करणी चाहिए, जिन ताहीं परमेसवर नै थारे ताहीं सौप्या सै, अर यो मजबूरी म्ह न्ही पर खुद की इच्छा तै राज्जी होकै करो, क्यूँके परमेसवर यो चाहवै सै के थम इसाए करो, पर इसा काम पईसा कै खात्तर न्ही पर परमेसवर अर माणसां की सेवा करण खात्तर करो। 3 उन माणसां पै हक ना जमाओ, जो थारे ताहीं सौपे गये सै, पर उनके खात्तर बढ़िया मिसाल बणो। 4 जिव प्रभु यीशु मसीह जो के पाळीयां का प्रधान बोहड़ के आवैगा, तो थारे ताहीं वो महिमा का मुकुट दिया जावैगा जिसकी चमक कदे न्ही जावैगी। 5 इस्से ढाळ हे जवान्नों, थम भी कलीसिया के अगुवां का कहणा मान्नों, बल्के थम सारे के सारे दीनता तै एक-दुसरे की सेवा करते रहो, क्यूँके हम पवित्तर ग्रन्थ म्ह पढ़ा सां, के “परमेसवर घमण्डियां का विरोध करै सै, पर दीन पै अनुग्रह करै सै।” 6 इस करके परमेसवर के स्याम्ही दीन बणो, जो थमनै बचा सकै, ताके वो थमनै सही बखत आण पै बढ़ा सकै। 7 अपणी सारी चिन्ता परमेसवर ताहीं दे द्यो, क्यूँके उसनै थारा ध्यान सै। 8 सावधान रहो, अर जागदे रहो, क्यूँके थारा विरोधी शैतान गरजनआळे शेर की ढाळ इस टाह म्ह रहवै सै, के किसनै पाड़ खावे, ताके थम परमेसवर की राह ना चाल सको। 9 विश्वास म्ह मजबूत होके, अर न्यू जाणके उसका सामना करो, के थारे भोत-से विश्वासी भाई जो दुनिया म्ह इसेए दुख सहण लागरे सै। 10 इब परमेसवर जो सारे अनुग्रह का दात्ता सै, जिसनै थारे ताहीं मसीह म्ह अपणी अनन्त महिमा कै खात्तर बुलाया, थारे कुछ बखत तक दुख टाण कै पाचछै आप ए थमनै सिध्द अर स्थिर अर मजबूत करैगा। 11 उससे का साम्राज्य युगानुयुग रहवै। आमीन। 12 मन्नै या छोट्टी चिट्ठी लिखकै सिलवानुस के हाथ थारे धरै भेजी सै, जिस ताहीं मै मसीह म्ह विश्वास जोग्गा भाई समझूँ सँ, मेरे लिखण का यो मकसद सै के मै थारे ताहीं उत्साहित कर सकूँ, अर थारे ताहीं विश्वास दिला सकूँ, के जो थम अनुभव करण लागरे सों, वो असलियत म्ह परमेसवर की करुणा का हिस्सा सै, थम उस कृपा म्ह बणे रहों। 13 जो विश्वासी बेबीलोन नगर म्ह सै, उन ताहीं भी परमेसवर नै चुण्या सै, जिस तरियां थारे ताहीं चुण्या, उनका अर मरकुस जो मेरे बेटटे की तरियां सै, उसका थारे ताहीं नमस्कार। 14 आप्स म्ह एक-दुसरे ताहीं गळे मिलकै प्यार तै नमस्कार करो। थम सारया ताहीं, जो मसीह म्ह हो, थमनै शान्ति मिलदी रहवै।

## पतरस की दुसरी चिट्ठी



पतरस की दुसरी चिट्ठी शरूआती विश्वासियाँ के एक बड़े झुण्ड के नाम लिखी गई है। इस चिट्ठी की बड़ी चिन्ता की बात झूठे शिक्षकों के काम अर उनकी शिक्षा तै पैदा होण आळे गलत काम के खिलाफ मुकाबला करणा है। इन सारी समस्या का जवाब परमेसवर अर प्रभु यीशु मसीह के सच्चे ज्ञान म्ह बणे रहण म्ह मिलै है। वो ज्ञान उन माणसां के जरिये पोहचया गया है, जिननै खुद यीशु मसीह ताहीं देख्या अर उसकी सारी शिक्षा ताहीं सुण्या है। लेखक खास तौर पै उन माणसां की शिक्षा तै चिन्ता म्ह है जो दावा कर है के मसीह फेर बोहड़ के न्ही आवैगा। लेखक कहवै है के इसा लागगै है, के मसीह के आण म्ह देर हो रही है, पर सच म्ह इसा इस खात्तर है क्यूँके परमेसवर “न्ही चाहन्दा के कोए नाश होवै, पर यो इस खात्तर है ताके सब नै मन फिराण का मौक्का मिलै।”

रूप-रेखा

जानकारी 1:1,2

मसीह का बुलावा 1:3-21

झूठे शिक्षक 2: 1-22

मसीह का आखरी आणा 3:1-18

1 या चिट्ठी शमौन पतरस की ओड़ तै है, जो यीशु मसीह का दास अर प्रेरित है, उन माणसां के नाम है, जिन नै म्हारै परमेसवर अर उद्धारकर्ता यीशु मसीह की धार्मिकता के जरिये म्हारी तरियां बेसकिमती विश्वास पाया है।<sup>2</sup> मै परार्थना करूँ, के परमेसवर थारे ताहीं ज्यादा तै ज्यादा अनुग्रह अर शान्ति दे, जिस तरियां थम परमेसवर के ज्ञान अर म्हारै प्रभु यीशु मसीह म्ह बढ़ण लागरे सों।<sup>3</sup> परमेसवर जिसनै अपणी शक्ति के जरिये म्हारे ताहीं वो सब दिया है, जो हमनै भगतिमय जिन्दगी जीण खात्तर चाहिए, यो इस खात्तर मुमकिन है, क्यूँके हम परमेसवर नै जाणा सां, अर उसनै अपणी महिमा अर सदगुणा के मुताबिक अपणे माणस होण खात्तर बुलाया है।<sup>4</sup> अर उसकी महिमा अर भलाई के कारण उसनै म्हारै ताहीं बड़े महान अर कीमती वादे करे है, ताके इनके जरिये थम इस दुनिया की बुरी लालसा तै बच जाओ, जिन ताहीं वे लोग करणा चाहवै है, जो मसीह पै विश्वास न्ही करदे, पर थम ईश्वरीय सुभाव के गैल-साइद्धी हो जाओ।<sup>5</sup> इस कारण थम सिर्फ मसीह पै विश्वास करण आळे न्ही, पर हमेशा दुसरयां की भलाई करण म्ह लागगै रहों, अर सिर्फ भलाई ए न्ही बल्के बुध्दमानी तै बरताव करण आळे भी बणो।<sup>6</sup> थम सिर्फ बुध्दमानी तै ए बरताव करण आळे न्ही बल्के अपणे-आप पै काबू राक्खण आळे भी बणो, अर अपणे-आप पै काबू राक्खण आळे ए न्ही बल्के दुखां नै धीरज तै सहण आळे भी बणो, अर दुखां नै धीरज तै सहण आळे ए न्ही बल्के भगति म्ह जिन्दगी वितान आळे भी बणो।<sup>7</sup> ना सिर्फ थम परमेसवर नै भावण आळी जिन्दगी जिओ, बल्के विश्वासियाँ तै भी अपणे परिवार के माणस की तरियां प्यार करो, एक-दुसरे ताहीं अपणे परिवार के माणस की तरियां प्यार करण आळे ए न्ही बल्के सब नै प्यार करण आळे भी बणो।<sup>8</sup> जै थारे म्ह ये गुण मौजूद है अर जै थारे म्ह इनकी बढ़ोतरी होण लागरी है तो इनके कारण थम म्हारे प्रभु यीशु मसीह के सम्पूर्ण ज्ञान म्ह ना तो निकम्मे अर ना बिना फळ के होओगे।<sup>9</sup> जै कोए इन्सान इसी जिन्दगी न्ही वितान्दा, तो वो उस इन्सान की तरियां है, जो सही तै न्ही देख पान्दा, अर वो आन्धा से। वो भूल जावै है के परमेसवर नै उसके पाप माफ कर दिये, जो उसनै मसीह पै विश्वास करण तै पैहले करे है।<sup>10</sup> इस कारण हे विश्वासी भाईयो, आच्छा करण की कोशिश करदे रहों, ताके थम अपणे-आपनै अर दुसरे माणसां नै दिखा सको, के परमेसवर नै थारे ताहीं चुण्या है, अर बुलाया है। जै थम इसाए करदे रहों, तो थम कदे भी परमेसवर तै अलग न्ही होओगे।<sup>11</sup> बल्के इस तरियां तै थम म्हारै प्रभु अर उद्धारकर्ता यीशु मसीह के अनन्त राज्य म्ह बड़े आदर के गैल बड़ण पाओगे।<sup>12</sup> ज्यातै हालाकि

थम ये बात जाणो सो, अर जो सच्चा वचन थारे ताहीं मिल्या सै उस म्ह बणे रहो सो, तोभी मै थारे ताहीं ये बात याद दुवाण खात्तर सारी हाण ल्यार रहूंगा। 13 मै यो जाणुं सूं के जिव तक मै जिन्दा सूं, यो सही सै, के मै उन बात्तां के बारे म्ह थारे तै बात करदा रहूँ, ताके थम इन बात्तां नै कदे भूल ना जाओ। 14 क्यूँके मै जाणुं सूं के मै तावळा मरण आळा सूं, अर परभु यीशु मसीह नै मेरै ताहीं इस बारे म्ह बता दिया सै। 15 ज्यांतै मै इसी कोशिश करूंगा, के मेरे इस दुनिया तै जाये पाच्छै, थम इन सारी बात्तां नै सारी हाण याद कर सको। 16 क्यूँके जिव हमनै थारे ताहीं, अपणे परभु यीशु मसीह की सामर्थ अर बोहड़ण की खबर दी थी, तो हमनै श्याणपत तै गद्दी होई कहाँनियाँ का सहारा कोनी लिया, बल्के हमनै आप ए उसके प्रताप ताहीं देख्या था। 17-18 क्यूँके जिव उसने परमेसवर पिता तै आदर अर महिमा पाई जो के प्रतापमय महिमा सै, हमनै उस ताहीं यो कहन्दे सुणा, “यो मेरा प्यारा बेटा सै, जिसतै मै राज्जी सूं।” फेर हम उसके गेल्या पवित्र पहाड़ पै थे, अर सुर्ग तै योए बोल आन्दे सुण्या। 19 हम जाणा सां के जो वचन नबियाँ नै मसीह के बारे म्ह लिख्या सै, वो सच सै, थम इन वचनां नै गौर तै सुणो, जिस तरियां अन्धकार म्ह दीवै का चाँदणा, माणसां नै राह दिखावै सै, उस्से तरियां ये वचन भी सच्चाई नै जाणण म्ह थारी मदद करैगें, थम इन वचनां नै ध्यान तै सुणते रहो, जिव तक के यीशु मसीह बोहड़के ना आ जावै। उसका आणा एक नये दिन की सुबह की तरियां सै, जो उजाळा लेके आवै सै, अर वो सुबह के तारे की तरियां होगा। उस बखत उसका चाँदणा थारे मन म्ह चमकैगा, अर परमेसवर नै साफ तौर पै थारे पै जाहिर करैगा। 20 पर सबतै पैहले यो जाण ल्यो के पवित्र ग्रन्थ की कोए भी भविष्यवाणी, खुद नबियाँ का अपणा विचार कोनी 21 क्यूँके कोए भी भविष्यवाणी माणस की मर्जी तै कदे न्ही होई, पर भगतजन पवित्र आत्मा के जरिये उभारे जाके परमेसवर की ओड़ तै बोल्लै थे।

## 2

1 जिस तरियां इस्राएली माणसां म्ह झूठे नबी थे, उस्से ढाळ थारे म्ह भी झूठे शिक्षक होंगे, वे थारे ताहीं चुपके तै झूठटी शिक्षा सिखावेंगे, जिसकी बजह तै लोग मसीह पै विश्वास न्ही करैगें, वे झूठे शिक्षक मसीह ताहीं अपणा परभु न्ही मान्नेगें, जिसनै उन ताहीं मोल लिया सै, अर पाप की शक्ति तै आजाद करया सै, इस तरियां वे चाणचक अपणे-आप ताहीं नाश कर लेवेंगें। 2 घणखरे जो कहवेंगें के हम विश्वासी सां, वे उनकी ढाळ लुचपण के सुभाव नै अपणावेंगे, अर उनके कारण जो लोग विश्वासी कोनी सच के राह की बुराई करैगें। 3 ये शिक्षक लालची होंगे, अर थारे तै धन पाण के खात्तर मनघडन्त कहाँनी सुणाके थारे ताहीं धोक्खा देवेंगें, परमेसवर नै भोत पैहले फैसला ले लिया था, के वो उन ताहीं दण्ड देवैगा, अर वो यो करण आळा सै, वो सच म्ह उन ताहीं नाश करण आळा सै। 4 क्यूँके जिव परमेसवर नै उन सुर्गदूतां ताहीं जिननै पाप करया था, उन ताहीं माफ न्ही करया, पर उन ताहीं नरक म्ह भेजके अँधेरे कुण्डां म्ह गेर दिया ताके न्याय के दिन ताहीं कैदी रहवै। 5 थम यो भी जाणो सों, के जो लोग भोत पैहले जिन्दा थे, उन म्ह परमेसवर का भय न्ही था, परमेसवर नै उनकी बुराईयां ताहीं नजरअंदाज कोनी करया, जो उननै करी थी, पर उन ताहीं बाढ़ के जरिये नाश कर दिया, उन म्ह तै परमेसवर नै आठ माणसां ताहीं बचाया जिस म्ह नूह भी था, जिसने धार्मिकता का प्रचार करया। 6 थम यो भी जाणो सों, के जो लोग भोत पैहल्या सदोम अर अमोरा के नगर म्ह रहवै थे, परमेसवर नै उन ताहीं भी दण्ड दिया, क्यूँके उननै भोत बुरे काम करे थे, अर उन ताहीं आग म्ह भस्म करके राख बणा दिया। इसा करण के जरिये उसने दिखा दिया, के उन माणसां का के होगा जो उसका कहणा न्ही मानते। 7 सदोम नगर का नाश करण तै पैहले उसनै, लूत जो के एक धर्मी माणस था, उस ताहीं उस नगर तै लिकाड़के उस ताहीं बचा लिया। लूत दुखी था क्यूँके सदोम नगर के लोग परमेसवर का कोए भी हुकम कोनी मान्ने थे, अर वे भोत बुरे काम करे थे। 8 वो उन बुरे माणसां के बीच म्ह रहवै था, अर हरेक दिन उनके बुरे काम्मां नै देख्लै था जो वे करे थे, अर बुरी बात्तां नै सुणे था जो वे बोल्लै थे, अर ये सारी बात उस ताहीं दुखी करे थी, क्यूँके वो धर्मी माणस

था।<sup>9</sup> वे सारी बात जो परमेसवर नै पुराणे बखत म्ह करी सै, वे ये दिखावै सै, के परमेसवर पवित्तर माणसां नै मुसीबतां तै किस तरियां बचावै सै, अर न्याय होण के दिन तक बुरे माणसां नै लगातार दण्ड दिया जावै।<sup>10</sup> परमेसवर बुरे माणसां नै दण्ड देवैगा, खास करके उन झूठे शिक्षकां नै जो अशुद्ध अभिलाषायां कै पाच्छे, देह कै मुताबिक चाल्दे, अर प्रभुता नै तुच्छ जाणै सै। वे द्वीट, अर जिद्दी सै, अर सुर्गीय चिज्जां के बारे म्ह आच्छा-भुंडा कहण तै न्ही डरदे।<sup>11</sup> तोभी सुर्गदूत जो झूठे शिक्षकां तै अर सामर्थ म्ह उनतै बड़े सै, प्रभु कै स्याम्ही जिव उन झूठे शिक्षकां पै दोष लगावै सै तो वे अपमानजनक बात कहकै उनकी बुराई न्ही करदे।<sup>12</sup> पर ये झूठे शिक्षक जंगली-जानवरों की तरियां सै, ये जानवर न्ही जाणते के किस तरियां सोचणा सै, अर उनका मकसद पकड़े जाणा अर मरणा सै। ये लोग भी वोए काम करै सै जो इनकै मन म्ह आवै सै, अर उन चिज्जां के बारे म्ह बुराई करै सै, जिसके बारे म्ह वे न्ही समझते, वे नाश हो जावैगे।<sup>13</sup> दुसरयां का बुरा करण कै बदले उन्हें का बुरा होवैगा। उननै दिन-दोफारी म्ह भोग-विलास करणा आच्छा लागू सै। ये थारे पै कलंक अर दोष सै, जिव वे थारे गेल्या प्रीति भोज म्ह शामिल होवै सै, तो अपणे छलावे का आनन्द ले सै।<sup>14</sup> वो हरेक जनानी नै देखकै उसके साथ जारी करणा चाहवै सै, अर पाप करण का मौक्का टोहवै सै, ये उन माणसां ताहीं धोक्सा देवै सै जो परमेसवर पै पक्का बिश्वास कोनी राखदे, अर उन ताहीं पाप करण खात्तर उकसावै सै, उनकी सदा बढ़दी रहण आळी लालसा के कारण परमेसवर उन ताहीं दण्ड देवैगा।<sup>15</sup> उननै वो करणा छोड़ दिया सै, जो सही सै, अर उननै बओर के बेट्टे विलाम की तरियां बुरे काम करणे शरू कर दिए, जो उसनै भोत पैहले करे थे, क्यूँके उसने बुरे काम्मां तै पईसा कमाण्णा चाह्या।<sup>16</sup> पर परमेसवर नै विलाम नबी की गधी के जरिये उस ताहीं डांटा-फटकारा जो बुरे काम वो करण जावै था, हालाकि गधी जो बोल न्ही सके थी, उसनै विलाम नबी तै इन्सान की वाणी म्ह बात करी, जिव वो राजा तै मिलण जाण लागरया था, तो गधी नै विलाम नबी ताहीं उसके बावळपण तै रोक्का।<sup>17</sup> ये झूठे शिक्षक उस बेकार पाणी के चोवै की तरियां सै जो सूख लिया सै, अर ये उस बाहळ की तरियां भी सै जिस ताहीं बारिस तै पैहले हवा उड़ा ले जावै सै, परमेसवर नै उन खात्तर, अनन्त अन्धकार म्ह जगहां राक्खी सै।<sup>18</sup> जिव वे माणसां नै सिखावै सै तो वो बेकार के अर धमण्डी शब्दां नै इस्तमाल करै सै, वे माणसां नै समझावै सै के वो बुरे काम कर सकै सै जो उनकी देह करणा चाहवै सै, अर उन माणसां तै भी दुबारा धोक्खें तै पाप करवाणा चाहवै सै, जो बुरी जिन्दगी तै बाळ-बाळ बचे सै।<sup>19</sup> ये झूठे शिक्षक माणसां ताहीं कहवै सै के थम सारे काम करण खात्तर आजाद सों, जो थम करणा चाहों सों, पर वो खुद गुलाम की तरियां सै, क्यूँके उनका पापी सुभाव उन ताहीं बुरे काम करवावै सै, थम हर उस चीज के गुलाम सों जो थमनै काबू करै सै।<sup>20</sup> माणस इस दुनिया की बुराईयां तै भाज्जै सै जिव वो मसीह यीशु नै अपना उद्धारकर्ता मान लेवै सै, पर वे फेर तै बुरे काम करण लागू सै, अर वे बुरी चीज उन ताहीं काबू म्ह राक्खै सै, इब उनकी दशा जो के मसीह नै छोड़ देण तै सै, वो पैहल्दी दशा तै भी भुंडी सै, जिव उननै मसीह पै बिश्वास करया था।<sup>21</sup> मेरे कहण का मतलब यो सै, के परमेसवर उन माणसां ताहीं घणा दण्ड देवैगा जो मसीह ताहीं छोड़ देवै सै, उन माणसां तै ज्यादा जो उस ताहीं कदे न्ही अपनादे, उन खात्तर यो ठीक होन्दा के वो कदे न्ही जाणते के धार्मिकता का जीवन किस तरियां जीणा सै, उन ताहीं बेरा सै के सही के सै, पर वो परमेसवर के हुकम नै कोनी मानते जो हम परेरितां नै उन ताहीं सिखावै सै।<sup>22</sup> उनपै ये दो कहावत सही बेट्टै सै, के कुत्ता अपना उलटी नै चाट्टै सै, अर नुहाई होई सुरी कीचड़ म्ह लोट्टण कै खात्तर फेर चली जावै सै।

### 3

<sup>1</sup> हे प्यारे बिश्वासी भाईयो, इब मै थारे ताहीं दुसरी चिट्ठी लिक्खूं सूं, अर मै दोन्नु चिट्ठियां म्ह थारे ताहीं कुछ चीज याद दुआ के थमनै सही ढंग तै सोचण खात्तर उत्साहित करण की कोशिश करण लागरया सूं, जो थमनै पैहले तै सीख ली सै।<sup>2</sup> मै यो इस करके करण लागरया सूं, क्यूँके मै थमनै उन नबियां के शब्द याद दुवाणा चाहूं सूं, जो उननै भोत पैहले कहे अर प्रभु यीशु मसीह जो

महारा उद्धारकर्ता सै, उसकी शिक्षा जो धमनै उन परेरितां तै सीखी जो थारे धोरै आए थे।<sup>3</sup> यो जाण ल्यो के आखरी के दिनां म्ह मसीह के आण तै पैहल्या भोत-से इसे माणस होवेंगे जो थारा मजाक उड़ावेंगे, क्यूँके थम विश्वास करो सों के मसीह बोहड़ के आवैगा, अर वे बुरे तै बुरा काम करैगें जो उन ताहीं खुश करै सै।<sup>4</sup> अर कहवैगें, “उसकै आण का वादा कित्त गया? क्यूँके जिब तै उनके पूर्वज सो गये सै, सारा किमे उस्से तरियां ए सै जिस तरियां सृष्टि की शरूआत तै था?”<sup>5</sup> वो इस करकै कहवैगें क्यूँके वो भूलणा चाहवै सै, के परमेसवर के वचन के जरिये अकास पुराणे बखत तै विद्यमान सै। उसनै धरती ताहीं भी पाणी म्ह तै बणाया अर पाणी तै न्यारा करया।<sup>6</sup> यो उनके मजाक का ए नतिज्जा था, के बाद म्ह उसनै एक बड़ी बाढ़ के जरिये इस दुनिया ताहीं पाणी म्ह डूबो के नाश कर दिया।<sup>7</sup> पर परमेसवर नै इब के बखत का अकास अर धरती उस्से वचन के जरिये ज्यांतै राख राक्खे सै, के जळाए जावै, अर ये भगतिहीन माणसां के न्याय अर नाश होण के दिन ताहीं इसेए धरे रहवेंगे।<sup>8</sup> हे प्यारे विश्वासी भाईयो, या बात थारे तै लुकही ना रहवै के प्रभु के उरै एक दिन हजार साल के बराबर सै, अर हजार साल एक दिन के बराबर सै, उसके खात्तर दोन्नु एकके सै।<sup>9</sup> प्रभु अपने वादे के बारे म्ह वार न्ही करदा, जिसी देर कुछ माणस समझे सै, पर थारे बारे म्ह धीरज धरे सै, अर न्ही चाहन्दा के कोए नाश हो, बल्के यो, के सारया ताहीं मन पलटन का मौक्का मिलै।<sup>10</sup> पर मसीह जरूर बोहड़ के आवैगा, उस दिन अकास म्ह बड़ा गरजण होगा अर अकास गायब हो जावैगा, जो कुछ अकास म्ह सै जिस तरियां सूरज, चाँद अर तारे ये सब आग म्ह पूरी तरियां जळ जावेंगे, उस दिन परमेसवर सब जाहिर करैगा, अर इस दुनिया म्ह होण लागरे सारे काम्मां का भी न्याय करैगा।<sup>11</sup> जिब के ये सारी चीज इस तरियां तै पिंघळ के खतम होण आळी सै, तो थारे ताहीं पवित्तर चाल-चलण अर भगति म्ह किस ढाळ का माणस होणा चाहिये,<sup>12</sup> जिब थम उस दिन की बाट देखो सों जिब परमेसवर इस दुनिया का न्याय करण आवैगा, तो उस दिन ताहीं तावळा ल्याण खात्तर पूरी कोशिश करो, उस दिन आग अकास ताहीं जळा के भस्म कर देवैगी अर जो कुछ अकास म्ह सै उस ताहीं गर्मी पिंघळा देवैगी।<sup>13</sup> पर उसके वादे के मुताबिक हम एक नये अकास अर नयी धरती की आस देखो सों, जिस म्ह परमेसवर की धार्मिकता वास करैगी।<sup>14</sup> जिब के थम इन बातों नै पूरा होण की बाट देखो सों तो थम इसी जिन्दगी जिओ जो परमेसवर नै पसन्द सै यानी थम एक-दुसरे के साथ शान्ति तै उसके स्याम्ही बेदाग अर बेकसूर रहो।<sup>15</sup> यो जाण ल्यो के, क्यूँ महारा प्रभु धीरजवान सै? क्यूँके वो माणसां नै कुछ और बखत देणा चाहवै सै, ताके वो पाप करणा छोड़ दे, अर वो उन ताहीं बचा सके, जिब महारा संगी विश्वासी भाई पौलुस जिसतै हम प्यार करां सों, उसनै परमेसवर के ज्ञान के जरिये थारे ताहीं लिख्या सै, उसनै भी थारे ताहीं येए बात बताई सै, जो मन्ने थारे ताहीं बताई सै।<sup>16</sup> उस्से तरियां ए उसनै अपनी सारी चिट्ठियां म्ह भी जो विश्वासियां ताहीं लिखी सै इन बातों का जिक्र करया सै, जिन म्ह कुछ बात इसी सै जिनका समझणा ओक्खा सै, अर अनपढ़ अर चंचल माणस उनके मतलबां नै गलत तरिकेनै तै बतावै सै जिसा वो पवित्तर ग्रन्थ की दुसरे वचनां का गलत मतलब लिकाड़ै सै, इसा करके वो परमेसवर नै मजबूर करै ताके वो उन ताहीं नाश करदे।<sup>17</sup> ज्यांतै हे प्यारे विश्वासी भाईयो, थम जाणो सों, के ये सारी बात होवैगी, तो ध्यान राक्खो के जो लोग परमेसवर का हुकम ताहीं न्ही मानते वो झूठ के जरिये थारे ताहीं बहका ना दे, अर उन बातों के बारे म्ह शक करण लागरे सों, जिनपै पैहले विश्वास करो थे।<sup>18</sup> पर महारे प्रभु अर उद्धारकर्ता यीशु मसीह के अनुग्रह अर ज्ञान की पहचान म्ह बढ़दे जाओ। उस्से की महिमा इब भी हो, अर युगानुयुग होन्दी रहवै। आमीन।



## यूहन्ना की पैहली चिट्ठी



यूहन्ना की पैहली चिट्ठी के दो खास मकसद सै: (1) अपने पाठकों ताहीं परमेसवर अर उसके बेटे यीशु मसीह, की साझेदारी म्ह जीवन बिताण के खात्तर उत्साहित करना सै। (2) अर उन झूठी शिक्षा के मानण तै, जिसतै या साझेदारी टूट जावैगी, इसके बिरुध्द चेतावनी देणा। यो झूठी शिक्षा इस धारणा पै आधारित थी के बुराई भौतिक दुनिया के साथ मिलण का नतिज्जा होवै सै, अर इस करके यीशु परमेसवर का बेटा, सचमुच एक माणस होए न्ही सकदा। इन शिक्षकों का दावा था के मुक्ति पाण खात्तर एक माणस नै इस संसार म्ह जीवन तै जुड़ी बातों तै मुक्त होणा होगा। अर वे यो भी सिखावै थे के शिष्टाचार अर अपने भाई तै प्रेम राखण जिसी बातों का मुक्ति तै कोए रिश्ता कोनी। इस शिक्षा के बिरोध म्ह लेखक साफ तौर पै यो दिखावै सै के यीशु मसीह सचमुच एक माणस था, अर वो इस बात पै जोर देवै सै, के जो यीशु मसीह म्ह बिश्वास करै सै, अर परमेसवर तै प्रेम करै सै तो जरूरी सै के वे आप्स म्ह एक-दुसरायां गैल प्रेम करै।

### रूप-रेखा

जानकारी 1:1-4 चाँदणा अर अन्धेरा 1:5-2:29  
 परमेसवर के बाळक अर शैतान के बाळक 3:1-24  
 सच अर झूठ 4:1-6  
 प्रेम का फर्ज 4:7-21  
 जीत देण आळा बिश्वास 5:1-21



1 हम उस जीवन देण आळे वचन के बारे म्ह लिखण लागे सां, जो शुरु तै था, जिस ताहीं हमनै सुण्या, अर जिस ताहीं हमनै अपनी आँखां तै देख्या, बल्के जिस ताहीं हमनै ध्यान तै देख्या अर हाथ्यां तै छुआ।<sup>2</sup> (यो जीवन दुनिया म्ह आया अर हमनै इस ताहीं देख्या, अर हम उसके गवाह सां, अर थमनै उस अनन्त जीवन की खबर देवां सां, जो पिता के गैल था अर म्हारै पै जाहिर होया)।<sup>3</sup> जो किमे हमनै यीशु मसीह के बारे म्ह देख्या अर सुण्या सै उसकी खबर थमनै भी देवा सां, इस करके के थम भी म्हारै गैल संगति करो; अर म्हारी या संगति पिता अर उसके बेटे यीशु मसीह के गैल सै।<sup>4</sup> अर ये बात हम इस करके लिखा सां ताके थम खुशी तै भर जाओ।



5 जो खबर हमनै यीशु मसीह तै सुणी अर थमनै सुणावां सां, वो या सै के परमेसवर चाँदणे के समान पवित्र सै, अर उस म्ह कुछ भी अन्धकार के समान कोए बुराई कोनी।<sup>6</sup> जै हम कहवां, के परमेसवर के गैल म्हारी संगति सै पर फेर भी अन्धकार म्ह चाल्लां, तो हम झूठे सां अर सच की राह पै कोनी चाल्दे; <sup>7</sup> पर जिसा परमेसवर चाँदणे के समान सै, उसेए हम भी चान्दणा म्ह चाल्लां, तो एक-दुसरे तै संगति राख्वा सां, अर उसके बेटे यीशु मसीह का लहू हमनै सारे पाप तै शुद्ध करै सै।

8 जै हम कहवां के म्हारै म्ह कोए भी पाप कोनी, तो अपने-आपने धोक्खा देवा सां, अर म्हारै म्ह सच्चाई कोनी।<sup>9</sup> जै हम अपने पाप नै परमेसवर के स्याम्ही मान ल्या, तो वो म्हारै पाप नै माफ करण म्ह भरोसेमन्द अर धर्मी सै, अर वो हमनै सारे अधर्म तै शुद्ध करै सै।<sup>10</sup> जै हम कहवां के हमनै पाप न्ही करया, तो परमेसवर नै झूठटा बणावा सां, अर हम उसके वचन के मुताबिक जीवन कोनी जिन्दे।

## 2



1 हे मेरे प्यारे बाळकों, मैं ये बात थारे ताहीं इस करके लिखूँ सूँ, के थम पाप ना करो; अर जै कोए पाप करै, तो परमेसवर पिता के धारै म्हारा एक मददगार सै, यीशु मसीह जो धर्मी सै,, जो म्हारे पापां की माफी खात्तर पिता तै बिनती करै सै। 2 यीशु मसीह ए म्हारै पापां के खात्तर प्रायश्चित बलि सै, अर सिर्फ म्हारे ए न्ही बल्के सारी दुनिया के माणसां के पापां खात्तर भी।

3 जै हम परमेसवर के हुकम का पालन करारंगे, उस्से तै हमनै बेरा लागगैगा के हम उस ताहीं जाणागे सां। 4 जो कोए या कहवै सै, "मै उसनै जाण गया सूँ," अर उसके हुकम नै न्ही मानता, यो वो माणस झूट्टा सै, उस म्ह सच कोन्या; 5 पर जो कोए परमेसवर के वचन नै मान्नै सै, उस म्ह सचमुच परमेसवर का प्यार सिध्द होया सै, परमेसवर म्ह म्हारे बणे रहण का सबूत योए सै, इस्से तै हम जाणा सां के हम उस म्ह सां। 6 जो कोए या कहवै सै के मै मसीह यीशु म्ह बणया रहूँ सूँ, तो उसके खात्तर जरूरी सै, के जिसा मसीह यीशु जिया उसाए वो भी जीवे।

### 22-22222

7 हे प्यारे विश्वासी भाईयो, मै थमनै कोए नया हुकम न्ही, पर वोए पुराणा हुकम लिखूँ सूँ, जो शरु तै था, यो वाए हुकम सै, जिस ताहीं थमनै मसीह म्ह विश्वास करते बखत सुण्या था। 8 फेर भी मै थमनै नया हुकम लिखूँ सूँ, उस हुकम की सच्चाई मसीह म्ह थी, अर वाए थारे म्ह भी सै; क्यूँके अन्धकार मिटता जावै सै, अर सच का चान्दणा इब चमकण लागया सै।

9 जो कोए या कहवै सै, के मै चाँदणे म्ह रहूँ सूँ, पर अपणे विश्वासी भाई तै बैर राक्खै सै, तो वो इब ताहीं अन्धकार म्ह ए रहण लागरया सै। 10 जो कोए अपणे विश्वासी भाई तै प्यार करै सै, वो चान्दणा म्ह रहवै सै, अर उस म्ह इसा कुछ कोनी के दुसरयां नै पाप करवावै। 11 पर जो कोए अपणे विश्वासी भाई तै बैर राक्खै सै, वो अन्धकार म्ह रहवै सै अर अन्धेरे म्ह चाल्लै सै, अर न्ही जाणदा के कित्त जावै सै, क्यूँके अन्धकार नै उसकी आँख आँधी कर दी सै।

12 हे बाळकों, मै थमनै इस करके लिखूँ सूँ के यीशु के नाम तै थारे पाप माफ होए सै।

13 हे बुजुर्गाँ, मै थमनै इस करके लिखूँ सूँ के जो शरु तै सै, थम उसनै जाणो सों। हे गाबरूओ, मै थमनै इस करके लिखूँ सूँ के थमनै उस शैतान पै जीत पाई सै। हे लडको, मन्नै थारे ताहीं इस करके लिख्या सै के थम पिता परमेसवर नै जाणगे सों।

14 हे बुजुर्गाँ, मन्नै थारे ताहीं इस करके लिख्या सै, के जो शरु तै सै, थम पिता परमेसवर नै जाणगे सों। हे गाबरूओ, मन्नै थारे ताहीं इस करके लिख्या सै, के थम ताकतवर बणो, अर परमेसवर का वचन थारे म्ह बणा रहवै सै, अर थमनै उस शैतान पै जीत पाई सै।

### 22222-22-22222-22-2222

15 थम ना तो दुनिया तै अर ना दुनियावी चिज्जां तै प्यार राक्खो। जै कोए दुनिया तै प्यार राक्खै सै, तो उस म्ह पिता परमेसवर का प्यार कोन्या। 16 क्यूँके जो किमे दुनिया म्ह सै, यानी देह की अभिलाषा, आँखां की अभिलाषा अर रोजी रोटी का घमण्ड, वो पिता परमेसवर की ओड़ तै कोनी पर दुनिया की ए ओड़ तै सै। 17 दुनिया अर उसकी अभिलाषा दोनु मिटते ज्या सै, पर जो परमेसवर की मर्जी पै चाल्लै सै वो सदा बणया रहवैगा।

### 2222-2222222

18 हे बाळकों, यो मसीह के आण का आखरी बखत सै; अर जिसा थमनै सुण्या सै, के मसीह का विरोधी भी आण आळा सै, उसके मुताबिक इब भी घणेए मसीह विरोधी उठ खड़े होए सै; इसतै हम जाणगे सां, के यो आखरी बखत सै। 19 मसीह विरोधी लिकड़े तो म्हारी कलीसिया म्ह ए तै सै, पर वे म्हारे थे ए कोनी; जै वे म्हारे होन्दे, तो हमनै छोड़ के ना जान्दे; उनका म्हारे ताहीं छोड़ के जाणा ए यो साबित करै सै, के उन म्ह तै कोए भी म्हारा कोनी था।

20 पर थारे ताहीं तो पवित्तर आत्मा मसीह के जरिये मिला सै, इस करके थम सारी सच्चाई नै जाणो सों। 21 मन्नै थारे ताहीं इस करके न्ही लिख्या, के थम सच्चाई नै न्ही जाणदे, पर इस करके के थम उस ताहीं जाणो सों, क्यूँके कोए भी झूठ, सच की ओड़ तै कोनी लिकड़ता। 22 झूट्टा कोण

सै? सिर्फ वो जो यीशु नै मसीह होण तै नाटै सै; अर मसीह का बिरोधी वोए सै, जो पिता परमेसवर का अर बेट्टे का इन्कार करै सै।<sup>23</sup> जो कोए बेट्टे नै (मानण) तै नाटै सै उसके धारे पिता परमेसवर भी कोनी जो बेट्टे नै मान ले सै, उसके धारे पिता परमेसवर भी सै।

<sup>24</sup> जो संदेश थमनै शुरु तै सुणया सै, जिब थमनै मसीह पै विश्वास करया, जै वो थारे म्ह बणया रहवै, तो थम भी बेट्टे म्ह अर पिता परमेसवर म्ह बणै रहोगे।<sup>25</sup> परमेसवर नै म्हारे तै वादा करया सै, के वो हमनै अनन्त जीवन देवैगा।

<sup>26</sup> मै थारे ताहीं उन माणसां के बारे म्ह चेतावनी देऊ सूं, जो थमनै झूठी शिक्षा तै भरमावै सै; <sup>27</sup> अर थारे म्ह पवित्र आत्मा जो मसीह की ओड़ तै मिला सै, वो थारे म्ह रहवै सै; इस करके यो जरूरी कोनी, के कोए थमनै उस सच्चाई के बारे म्ह सिखावै, बल्के पवित्र आत्मा थारे ताहीं उन बातों की सारी सच्चाई बतावै सै, अर पवित्र आत्मा जो थारे ताहीं सिखावैगा, वो बिल्कुल सच सै, अर थारे तै झूठ कोनी बोल्लैगा, इस करके मसीह म्ह बणै रह्यो, जिसा थारे ताहीं पवित्र आत्मा नै सिखाया सै।

~~~~~

<sup>28</sup> हे बाळकों, मसीह म्ह बणै रह्यो, के जिब वो दुबारा आवैगा, तो म्हारी हिम्मत बणी रहवै, ताके मसीह के आण पे उसके स्याम्ही शर्मिन्दा ना होआ।

<sup>29</sup> जै थम जाणो सों, के मसीह धर्मी सै, अर जो कोए धर्म का काम करै सै, वो परमेसवर की ऊलाद सै।

### 3

<sup>1</sup> सोचवों तो सही के पिता परमेसवर नै म्हारे तै किसा प्यार करया, के हम पिता परमेसवर की ऊलाद कुहवाए; अर हम सां भी। पर इस कारण दुनिया के माणस हमनै कोनी जाणते, के हम परमेसवर की ऊलाद सां, क्यूँके वे पिता परमेसवर नै भी कोनी जाणते।<sup>2</sup> हे मेरे प्यारे विश्वासी भाईयो, इब हम परमेसवर की ऊलाद सां अर इब ताहीं यो तय न्ही होया, के आण आळे बखत म्ह हम के बणांगे! इतणा जाणा सां के जिब यीशु मसीह आवैगा तो हम उसके समान होवांगे, क्यूँके हम मसीह नै उसेए दिक्वांगे जिसा वो सै।<sup>3</sup> अर जो कोए मसीह पै या आस राक्खै सै, वो अपणे-आपनै उसाए पवित्र करै सै, जिसा वो पवित्र सै।

<sup>4</sup> जो कोए बार-बार पाप करै सै, वो नियम-कायदा का बिरोध करै सै। अर हुकम ना मानना ए पाप सै।<sup>5</sup> थम जाणो सों के मसीह इस खात्तर आया, ताके पाप नै दूर करै; अर उसके म्ह कोए भी पाप कोनी।\*<sup>6</sup> जो कोए उस म्ह बणया रहै सै, वो बार-बार पाप न्ही करदा: जो कोए बार-बार पाप करै सै, वे कोनी जाणते के मसीह कौण सै, अर ना ए उसके गैल कोए उनका रिश्ता सै।

<sup>7</sup> हे बाळकों, किसे के बहकावै म्ह ना आइयो। जो धर्म के काम करै सै, वोए मसीह के समान धर्मी सै।<sup>8</sup> जो कोए पाप करदा रहवै सै, वो शैतान की ओड़ तै सै, क्यूँके शैतान शुरु तै ए पाप करदा आया सै। परमेसवर का बेट्टा इस खात्तर आया के शैतान के काम्मां का नाश करै।<sup>9</sup> जो परमेसवर की ऊलाद सै, वो बार-बार पाप न्ही करदा; क्यूँके मसीह का सुभाव उस म्ह बणया रहवै सै, अर वो पाप कर ए न्ही सकता, क्यूँके वो परमेसवर की ऊलाद सै।<sup>10</sup> परमेसवर की अर शैतान की ऊलाद की पिच्छाण इस्से तै हो ज्या सै: कोए भी माणस, जिसका जीवन धार्मिकता का कोनी, वो परमेसवर की ओड़ तै कोनी, अर ना ए वो, जिसनै अपणे भाई तै प्यार न्ही करया।

~~~~~

<sup>11</sup> जो खबर थमनै शुरु तै सुणी, वो या सै के हम एक-दुसरे तै प्यार करां; <sup>12</sup> अर आदम के बेट्टे कैन की दाळ ना बणो, जो उस शैतान की ओड़ तै था, अर जिसनै अपणे भाई ताहीं मार दिया। अर उस ताहीं क्यूँ मारया? क्यूँके उसके खुद के काम बुरे थे, अर उसके भाई के काम धर्म के थे।<sup>13</sup> हे विश्वासी भाईयो, जै दुनिया के माणस थारे तै बैर करै सै तो अचम्भा ना करो।<sup>14</sup> हम जाणा सां, के

\* 3:5 3:5 (यूह-1:29)

हम मौत के मुँह तै लिकड़के जीवन म्ह दाखल होवा सां; क्यूँके हम विश्वासी भाईयाँ तै प्यार राख्वा सां। जो प्यार न्ही राख्वा वो मृत्यु के सिकन्जे म्ह रहवै सै।<sup>15</sup> जो कोए अपने विश्वासी भाई तै बैर राख्खै सै, वो हत्यारा सै; अर थम जाणो सों के हत्यारे म्ह अनन्त जीवन न्ही रहन्दा।

<sup>16</sup> प्यार के सै? इस्से तै हमनै जाण लिया के यीशु मसीह नै म्हारै खात्तर अपनी जान दे दी; इस करके हमनै भी अपने विश्वासी भाईयाँ के खात्तर जान देणी चाहिए।<sup>17</sup> पर जिस किसे के धोरे दुनिया की दौलत हो अर वो अपने विश्वासी भाई नै कंगाल देखके उसपै तरस ना खावै, तो उस म्ह परमेसवर का प्यार किस तरियां बणया रहै सकै सै? <sup>18</sup> हे प्यारे बाळकों, म्हारे बोल्लण तै ए न्ही, पर काम अर सच्चाई म्ह भी म्हारा प्यार दिखणा चाहिए।

XXXXXXXX XX XXXXXXXXXXXX XXXXX

<sup>19</sup> जब हम दुसरयां तै प्यार करां सां, तो हम जाण लेवां सां, के हम सच के सां; अर जिस बात म्ह म्हारा मन हमनै दोष देवै सै, उसके बारे म्ह हम परमेसवर के आगै अपने-अपने मन नै होसला दे सकां सां; <sup>20</sup> जै बुरे काम की बजह तै म्हारा मन हमनै दोषी बणावै तोभी हम परमेसवर के स्याम्ही जा सकां सां, क्यूँके परमेसवर म्हारे मन तै बड़ा अर सब कुछ जाणण आळा सै। <sup>21</sup> हे प्यारे विश्वासी भाईयो, जै म्हारा मन हमनै दोष ना दे, तो हमनै परमेसवर के आगै जाण म्ह होसला मिलै सै। <sup>22</sup> अर जो कुछ हम परमेसवर तै माँग्या सां, वो हमनै उसतै मिलै सै, क्यूँके हम उसके हुकम नै मान्ना सां अर जो उसने आच्छा लाग्गै सै, वोए हम करा सां। <sup>23</sup> उसका हुकम यो सै के हम उसके बेटटे यीशु मसीह पै विश्वास करा, अर जिसा उसने म्हारै ताहीं हुकम दिया सै उससे कै मुताबिक हम आप्स म्ह प्यार करां। <sup>24</sup> जो परमेसवर के हुकम नै मान्ने सै, वो परमेसवर म्ह वास करे सै, अर वो उन म्ह वास करे सै: अर इस्से तै, हम जाणा सां, के वो म्हारै म्ह रहवै सै उस पवित्र आत्मा के जरिये जो उसने म्हारै ताहीं दिया सै।

## 4

XXXXXXXXXX XX XXXXX

<sup>1</sup> हे प्यारे विश्वासी भाईयो, हरेक आत्मा का विश्वास ना करो, बल्के आत्मायाँ नै परखो के वो परमेसवर की ओड़ तै सै के न्ही; क्यूँके षणखरे झूठे नबी दुनिया म्ह उठ खड़े होए सै। <sup>2</sup> परमेसवर की आत्मा थम इस रीति तै पिच्छाण सको सों: जो आत्मा मान ले सै के यीशु मसीह देह धारण करके आया सै, वो परमेसवर की ओड़ तै सै। <sup>3</sup> अर जो आत्मा यीशु नै न्ही मानती, वो परमेसवर की ओड़ तै न्ही सै; अर वोए तो मसीह के बिरोधी की आत्मा सै, जिसका जिक्र थमने सुण्या सै के वो आण आळा सै, अर इब भी दुनिया म्ह सै।

<sup>4</sup> हे प्यारे बाळकों, थम परमेसवर के लोग सों, अर थमनै झूठे नबियाँ पै जीत पाई सै; क्यूँके पवित्र आत्मा जो थारे म्ह बसै सै, वो शैतान तै बड़्ठा सै, जो इस दुनिया म्ह सै। <sup>5</sup> झूठे नबी दुनिया के लोग सै, इस कारण वे दुनिया की बात बोल्ले सै, अर लोग उनकी सुणै सै। <sup>6</sup> हम परमेसवर के लोग सां। जो परमेसवर नै जाणै सै, वो म्हारी सुणै सै; जो परमेसवर नै न्ही जाणता वो म्हारी न्ही सुणदा। इस ढाळ हम सच की आत्मा अर भ्रम की आत्मा नै पिच्छाण लेवां सां।

XXXXXXXX XXXXXX XX

<sup>7</sup> हे प्यारे विश्वासी भाईयो, हम आप्स म्ह प्यार करां; क्यूँके प्यार परमेसवर की ओड़ तै सै, जो कोए प्यार करै सै, वो परमेसवर की ऊलाद सै, अर वो परमेसवर नै जाणै सै। <sup>8</sup> जो दुसरयां तै प्यार न्ही करते, वो परमेसवर नै न्ही जाणदा, क्यूँके परमेसवर प्यार सै। <sup>9</sup> जो प्यार परमेसवर म्हारै तै करै सै, वो इसतै जाहिर होया के परमेसवर नै अपने इकलौते बेटटे ताहीं दुनिया म्ह भेज्जा सै, ताके हम उसके जरिये सच्चे जीवन नै पावां। <sup>10</sup> प्यार वो न्ही जो हमने परमेसवर तै करया सै, बल्के प्यार वो सै जो उसने म्हारै तै करया, के म्हारे पापां के प्रायश्चित के खात्तर अपने बेटटे ताहीं भेज्जा। <sup>11</sup> हे प्यारे विश्वासी भाईयो, जब परमेसवर नै म्हारै ताहीं इसा प्यार करया, तो हमने भी आप्स

म्ह प्यार करणा चाहिए। 12 परमेसवर ताहीं भी किसे नै न्ही देख्या; जै हम आप्सस म्ह प्यार करां, तो परमेसवर म्हारै म्ह बसा रहवै सै अर उसका प्यार म्हारै म्ह सिध्द होगया।

13 इस्से तै हम जाणा सां के हम उस म्ह बणे रह्हा सां, अर वो म्हारै म्ह; क्यूँके उसनै अपणे पवित्तर आत्मा म्ह तै म्हारै ताहीं दिया सै। 14 हमनै देख भी लिया अर गवाही देवा सां के पिता परमेसवर नै बेट्टे ताहीं दुनिया का उद्धारकर्ता बणाकै भेज्जा सै। 15 जो कोए या मान ले सै के यीशु परमेसवर का बेट्टा सै, परमेसवर उस माणस म्ह वास करै सै, अर वो परमेसवर म्ह। 16 हम जाणगे सां, अर हमनै विश्वास सै के परमेसवर म्हारै तै प्यार करै सै। परमेसवर प्यार सै, अर जो प्यार म्ह बण्या रहवै सै, वो परमेसवर म्ह वास करै सै, अर परमेसवर उस म्ह वास करै सै। 17 इस्से तै प्यार म्हारै म्ह सिध्द होया, के न्याय कै दिन हमनै यो होसला मिलै, के परमेसवर हमनै दण्ड न्ही देगा। जिसा मसीह दुनिया म्ह रहन्दे होए परमेसवर म्ह वास करै था, उसाए हम भी परमेसवर म्ह वास करां सां। 18 प्यार म्ह डर न्ही होंदा, बल्के सिध्द प्यार डर नै दूर करदे सै; क्यूँके डर का सम्बन्ध दण्ड तै होवै सै, अर जो डरै सै वो प्यार म्ह सिध्द न्ही होया।

19 हम इस करकै प्यार करा सां, के पैहले उसनै म्हारै तै प्यार करया। 20 जै कोए कहवै, “मै परमेसवर तै प्यार करूँ सूँ,” पर अपणे विश्वासी भाई तै बैर राक्खै तो वो झूट्टा सै; क्यूँके जो अपणे विश्वासी भाई तै जिस ताहीं उसनै देख्या सै प्यार न्ही कर सकता, तो वो परमेसवर तै भी जिस ताहीं उसनै न्ही देख्या प्यार न्ही कर सकता। 21 परमेसवर तै हमनै यो हुकम मिल्या सै, कै जो कोए परमेसवर तै प्यार राक्खै सै वो अपणे भाई तै भी प्यार राक्खै।

## 5

~~~~~

1 जिसका यो विश्वास सै, के यीशु ही मसीह सै, वो परमेसवर पिता की ऊलाद सै; अर जो कोए परमेसवर तै प्यार करै सै, वो उसके माणसां तै भी प्यार करेगा। 2 जिब हम परमेसवर तै प्यार करां सां अर उसके हुकम नै मान्ना सां, तो इस्से तै हम जाणा सां, के हम परमेसवर अर उसके माणसां तै प्यार करां सां। 3 परमेसवर तै प्यार करण का मतलब यो सै के हम उसके हुकमां नै मान्ना; अर उसके हुकम मुश्किल कोन्या। \* 4 क्यूँके जो परमेसवर पिता की ऊलाद सै, उसनै दुनिया पै जीत हासिल करी सै; अर वा जीत दुनिया ताहीं हरा देवै सै, वो म्हारा विश्वास ए सै। 5 दुनिया पै जीत पावैण आळा कौण सै? सिर्फ वो जिसका यो विश्वास सै के यीशु ए परमेसवर का बेट्टा सै।

~~~~~

6 मसीह यीशु ए सै, जिसने बपतिस्मा लिया अर म्हारे खात्तर सूळी पै अपना लहू भी बहाया। 7 गवाही देण आळे तीन सै। 8 आत्मा, पाणी अर लहू; ये तीन्नु एके बात पै सहमत सै। 9 जिब हम माणसां की गवाही मान ल्यां सां, तो परमेसवर की गवाही तो उसतै बढ़कै सै; अर परमेसवर की गवाही या सै के उसने अपणे बेट्टे कै बारे म्ह गवाही दी सै। 10 जो परमेसवर के बेट्टे पै विश्वास करै सै, वो अपणे मन म्ह ए विश्वास राक्खै सै। जिसने परमेसवर पै विश्वास न्ही करया उसने परमेसवर ताहीं झूट्टा बताया, क्यूँके उसनै उस गवाही पै विश्वास न्ही करया जो परमेसवर नै अपणे बेट्टे कै बारे म्ह दी सै। 11 अर वा गवाही या सै के परमेसवर के बेट्टे के जरिये हमनै अनन्त जीवन पाया सै, अर यो जीवन उसके बेट्टे म्ह सै। 12 उसके बेट्टे तै म्हारा गहरा रिश्ता सै, उसके धौरै अनन्त जीवन सै; अर जिसका परमेसवर के बेट्टे तै रिश्ता कोनी, उसके धौरै अनन्त जीवन भी कोनी।

~~~~~

13 मै या चिट्ठी थारे ताहीं लिखूँ सूँ, जो परमेसवर के बेट्टे कै नाम पै विश्वास करो सां, ताके थम जाणगे के अनन्त जीवन थारा सै। 14 हमनै परमेसवर के स्याम्ही यो होसला मिलै सै, वो होसला यो सै, के जो हम उसकी इच्छा के मुताबिक माँगगा सां, तो वो म्हारी सुणै सै। 15 जिब हम जाणा सां, के

\* 5:3 5:3 मत्ती 11:30

जो कुछ परमेश्वर तै मांग्या सै, वो म्हारी सुणै सै, तो यो भी जाणा सां, के जो कुछ हमनै परमेश्वर तै मांग्या, वो पाया सै।

16 जै कोए अपने विश्वासी भाई नै इसा पाप करते देखै, जिसका नतिज्जा मौत ना हो, तो बिनती करै, अर परमेश्वर उस ताहीं उन खात्तर, जिन नै इसा पाप कर्या सै, जिसका कारण मौत ना हो, जीवन देगा। जिस पाप का नतिज्जा मृत्यु सै; मै इसके बारे में बिनती करण खात्तर न्ही कहन्दा 17 सारी ढाळ के बुरे काम तो पाप सै, पर इसा पाप भी सै जिसका नतिज्जा मृत्यु कोनी।

18 हम जाणा सां, के जो कोए परमेश्वर ऊलाद सै, वो बार-बार पाप न्ही करते; क्यूँके परमेश्वर का बेट्टा यीशु मसीह उसनै पाप तै बचाई राक्खैगा, अर शैतान उसनै छू भी न्ही पांदा। 19 हम जाणा सां, के हम परमेश्वर तै सां, अर सारी दुनिया उस शैतान के बस म्ह पड़ी सै। 20 हम यो भी जाणा सां, के परमेश्वर का बेट्टा यीशु मसीह आ गया सै, उसनै म्हारे ताहीं उस सच्चे परमेश्वर नै पिच्छाणण की समझ दी सै; के म्हारा परमेश्वर का करीबी रिश्ता सै, क्यूँके म्हारा उसके बेट्टे के गेल्या करीबी रिश्ता सै। सच्चा परमेश्वर अर अनन्त जीवन योए सै।

21 हे बाळकों हरेक उस चीज तै दूर रहों जो थमनै परमेश्वर तै दूर करै सै।

## यूहन्ना की दुसरी चिट्ठी



यूहन्ना की दुसरी चिट्ठी "यूहन्ना" की ओड़ तै चुणी होई बिरबान्नी अर उसके बाळकां के नाम लिक्खी गई सै, हो सके सै: उसका मतलब एक घरेलू कलीसिया अर उसके सदस्य। साफ तौर तै इसका सन्देश सै, एक-दुसरयां तै प्यार करण की बिनती अर झूट्टी शिक्षकां अर उनकी झूट्टी शिक्षा के खिलाफ चेतावनी।


रूप-रेखा

जानकारी 1-3


प्यार की बड़ाई 4-6

झूट्टे रीति-रिवाजां के खिलाफ चेतावनी 7-11

समापन 12,13



1 या चिट्ठी मुझ यूहन्ना की ओड़ तै सै, जो कलीसिया का अगुवां सै, मै उस परमेसवर के जरिये चुणी गई बिरबान्नी अर उसके बाळकां के नाम या चिट्ठी लिखण लागरया सूं, जिनतै मै सच्चा प्यार करूं सूं, अर सिर्फ मै ए न्ही बल्के वे सारे भी प्यार करै सै, जो सच्चाई नै जाणै सै।<sup>2</sup> हम थारे तै प्यार करा सां, क्यूँके सच्ची शिक्षा म्हारे म्ह रहवै सै, अर म्हारे साथ सदा रहवैगी।<sup>3</sup> परमेसवर पिता, अर उसके बेटे यीशु मसीह की ओड़ तै अनुग्रह, दया, शान्ति, ये सब उनके साथ रहवैगी, जो इस सच्चाई नै मान्ने सै, अर एक-दुसरे तै प्यार करै सै।



4 मै घणा राज्जी होया के मन्ने तेरे कई बाळकां ताहीं उस हुकम के मुताबिक, जो म्हारे पिता की ओड़ तै मिल्या था, सच पै चाल्दे होए पाया।<sup>5</sup> इब हे नारी, मै तेरे तै बिनती करूं सूं, के हमनै एक-दुसरे तै प्यार करणा चाहिए, यो कोए नया हुकम कोनी, बल्के यो वो हुकम सै जिसनै हम उस बखत तै जाणा सां, जब हमनै मसीह के पाच्छे चालणा शुरु करया था।<sup>6</sup> अर सच्चा प्यार यो सै, के हम परमेसवर के हुकमां के मुताबिक चाल्लां, जिस दिन तै थमनै मसीह के पाच्छे चालणा शुरु करया था, उस दिन तै थम जाणो सों, के परमेसवर नै म्हारे ताहीं हुकम दिया सै, के हम सदा एक-दुसरे तै प्यार करा।<sup>7</sup> मै ज्यांतै कहूं सूं, क्यूँके भोत-से लोग झूट्टी शिक्षा तै दुसरयां नै धोक्खा देण आळे, इस दुनिया म्ह अलग-अलग जगहां तै लिकड़ आए सै, वे कहवै सै, के मसीह इस दुनिया म्ह इन्सान का रूप धारण करके न्ही आया, जै कोए माणस ये बात कहवै सै तो वो माणस यीशु मसीह का बिरोधी सै, वो दुसरयां ताहीं भरमाण आळा सै।<sup>8</sup> थमनै चौक्कस रहणा चाहिए, के ये लोग थमनै धोक्खा न्ही देण पावै, ताके परमेसवर की सेवा करण म्ह जो मेहनत थमनै करी सै, वा बेकार ना जावै, पर परमेसवर थारी उस मेहनत का थमनै ईनाम देवैगा।<sup>9</sup> जै कोए माणस, मसीह नै जो शिक्षाएँ दी सै उसका पालन न्ही करदा, अर अपणी ओड़ तै उन शिक्षा म्ह कुछ और जोड़ै सै, तो उसकी परमेसवर के गैल साझेदारी कोनी, पर जो कोए उसकी दी गई शिक्षा का पालन करदा रह सै, उसकी पिता परमेसवर अर उसके बेटे यीशु मसीह के गैल साझेदारी सै।<sup>10</sup> जै कोए थारे धोरे आवै अर वा शिक्षा दे जो मसीह की शिक्षा तै न्यारी सै, तो उस ताहीं थम ना तो घर म्ह आण द्यो अर ना नमस्कार करो।<sup>11</sup> क्यूँके जो कोए इसे माणस नै नमस्कार करै सै, वो उसके भुन्डे काम्मां म्ह साइड्डी होवै सै।



12 मन्ने घणीए बात थारे ताहीं बताणी सै, पर मै उन बाततां नै इस चिट्ठी म्ह लिखणा कोनी चाहन्दा, अर उम्मीद सै के मै थारे धोरे आऊंगा, अर आम्ही-स्याम्ही थारे तै बात करैगा, अर फेर

हम आच्छी ढाळ खुशी मनावांगे । 13 परमेसवर के जरिये चुणी गई बेब्बे के बाळकां का, थारे ताहीं नमस्कार ।



## यूहन्ना की तीसरी चिट्ठी

???????

यूहन्ना की तीसरी चिट्ठी “यूहन्ना” की ओड़ तै कलीसिया के एक अगुवें, गयुस, ताहीं लिखी गई थी। लेखक गयुस की इस करकै बड़ाई करै सै क्यूँके वो दुसरे विश्वासियों की भोत मदद कर सै, साथ म्ह दियुत्रिफेस नाम के एक माणस तै चौक्कस रहण की चेतावनी भी चेतावनी भी देवै सै।

रूप-रेखा

जानकारी 1-4

गयुस की बड़ाई 5-8

दियुत्रिफेस ताहीं उल्हाणा 9,10

देमेत्रियुस ताहीं सराहया जाणा 11,12

समापन 13-15

???????

1 या चिट्ठी मुझ यूहन्ना की ओड़ तै, जो कलीसिया का अगुवां सै, प्यारे मित्तर गयुस कै नाम सै, जिसतै मै सच्चा प्यार करहूँ सूं। 2 हे प्यारे मित्तर, मेरी या प्रार्थना सै, के जिसा तू आत्मिक बढ़ोतरी करण लाग रह्या सै, उससे तरियां तू सारी बाततां म्ह बढ़ोतरी करै अर भला चंगा रहवै। 3 क्यूँके जिव कुछ विश्वासी भाईयाँ नै आणके मेरे ताहीं बताया के तू ईमानदारी तै परमेसवर की सच्ची राह पै चाल्लण लागरया सै, तो मै भोत-ए राज्जी होया। 4 मन्नै इसतै बढ़के किसे और बात की खुशी कोनी के जिव मै सुणु सूं, के वे लोग जो मेरे बाळकां की तरियां सै, वे परमेसवर की सच्ची राह पै चाल्लण लागरे सै।

???? ?? ?????

5 हे प्यारे मित्तर, तू म्हारे विश्वासी भाईयाँ की मदद कै खात्तर ईमानदारी तै भोत कुछ करण लागरया सै, तन्नै उनकी भी मदद करी जिन ताहीं तू न्ही जाणदा। 6 जिनकी तन्नै मदद करी थी, उन म्ह तै कई माणसां नै, उरै की कलीसिया के विश्वासी भाईयाँ ताहीं बताया, के तू अपने विश्वासी भाईयाँ तै कितना प्यार करै सै, इब मै थमनै कहुँ सूं के तू इसे माणसां की हमेशा मदद करदा रहै, जिव वे दुसरी जगहां सफर खात्तर जावै सै, क्यूँके योए परमेसवर नै आच्छा लागगै सै। 7 क्यूँके ये लोग हरेक जगहां सफर करै सै, ताके मसीह का वचन सुणा सकै, अर गैर यहूदियाँ तै कुछ मदद न्ही लेंदे। 8 इस करकै हमनै अपने घर म्ह, इसे माणसां का स्वागत करकै उनकी सेवा-पाणी करणी चाहिए, अर उनकी हरेक जरूरत पूरी करणी चाहिए, ताके हम माणसां म्ह सच्चा सन्देश फैलाण म्ह उनके साझीदार हो सका।

?????????????? ?? ?????????????

9 मन्नै पैहले थारी कलीसिया के विश्वासियों ताहीं एक चिट्ठी लिखी थी, पर दियुत्रिफेस नै मेरी हिदायत मानण तै इन्कार कर दिया क्यूँके वो खुद हमेशा कलीसिया का अगुवां बणणा चाहवै था। 10 इस करकै जिव मै आऊंगा तो, थारे स्याम्ही उसके जरिये करे गये सारी बाततां नै स्पष्ट कर देऊंगा, यानी सारे बुरे-बुरे शब्दां का इस्तमाल करदे होए जो उसनै म्हारे पै दोष लगाए, इतणाए न्ही बल्के वो ना ए तो किसे शिक्षक ताहीं स्वीकार करै सै, अर ना ए कलीसिया के किसे विश्वासी ताहीं इसा करण देवै सै, जो स्वीकार करणा चाहवै सै, उन ताहीं वो कलीसिया तै बाहर कर देवै सै। 11 हे प्यारे मित्तर, बुराई करण आळे न्ही, पर भलाई करण आळे बणो। जो भलाई करै सै, वो परमेसवर की ओड़ तै सै, पर जो बुराई करै सै, वो परमेसवर ताहीं कोनी जाणदा। 12 कलीसिया म्ह हर कोए कहवै सै, के देमेत्रियुस एक आच्छा माणस सै, क्यूँके उसका बरताव परमेसवर के सच्चे सन्देश के मुताबिक सै, अर तू भी जाणै सै के जो हम कहवा सां वो सच सै।

~~~~~

13 मन्ने तेरे ताहीं भोत कुछ बताणा तो था, पर मै उन बाततां नै इस चिट्ठी म्ह लिखणा कोनी चाहन्दा। 14 पर मन्ने उम्मीद से, के तेरे तै तावळा-ए मिलूंगा, फेर हम आम्ही-स्याम्ही बात करागें। 15 मै प्रार्थना करूं सू, के परमेसवर थमनै शान्ति देवै। ओड़ै के मित्तरां तै नाम ले-लेकै म्हारी ओड़ तै नमस्कार कह दिये।

## यहूदा की चिट्ठी

~~~~~

यहूदा की चिट्ठी झूट्टी शिक्षा देणिया के खिलाफ चेतावनी देण खात्तर लिक्खी गई सै, क्यूँके वे विश्वासी होण का दावा करै थे। इस छोट्टी सी चिट्ठी की कई बात पतरस की दुसरी चिट्ठी के समान सै, इस म्ह लेखक अपने पाठकां नै उत्साहित करै सै के “उस विश्वास के खात्तर पूरी कोशिश करो जो पवित्र माणसां ताहीं एके बार सौप्या गया था।”

रूप-रेखा

जानकारी 1,2

झूट्टे शिक्षाकां का चाल-चलण, शिक्षा, अर अंत 3-16

विश्वास म्ह बणे रहणे की चेतावनी 17-23

आशीष वचन 24,25

1 या चिट्ठी मुझ यहूदा की ओड़ तै सै, मै, मसीह यीशु का दास अर याकूब का छोट्टा भाई सूं। मै या चिट्ठी उन माणसां ताहीं लिखण लागरया सूं, जिन ताहीं परमेसवर नै अपने पै विश्वास करण खात्तर बुलाया सै। पिता परमेसवर थारे तै प्यार करै सै, अर मसीह यीशु म्ह थारे ताहीं सुरक्षित राक्खै सै।<sup>2</sup> मै प्रार्थना करूं सूं, के परमेसवर थारे ताहीं दया, शान्ति अर प्यार भोत-ए घणा देवै।<sup>3</sup> हे प्यारे विश्वासी भाईयो, जिन मै उस नई जिन्दगी के बारे म्ह लिखण म्ह घणी मेहनत करण लागरया था, जो म्हारे ताहीं मसीह यीशु के जरिये परमेसवर तै मिलै सै, अर जिस म्ह हम सब साझीदार सां। तो मन्नै महसूस होया के मै इस चिट्ठी के जरिये थमनै उत्साहित करूं, ताके थम अपने विश्वास की बढ़ोतरी खात्तर और भी मेहनत करो, परमेसवर नै यो विश्वास सारे माणसां ताहीं सदा खात्तर एके बार दे दिया सै, अर यो बदल्या न्ही जा सकदा।<sup>4</sup> क्यूँके परमेसवर का कहणा ना मानण आळे भोत-से झूट्टी शिक्षा देण आळे लोग चुपचाप म्हारे बिना जाणे म्हारे म्ह आ मिले सै, ये वो लोग सै जिनके बारे म्ह परमेसवर नै सदियाँ पैहले पवित्र ग्रन्थ म्ह कह्या था, के उन ताहीं परमेसवर दण्ड देवैगा। वे परमेसवर के अनुग्रह के सन्देस नै बिगाड़ के उस ताहीं भोग-विलास म्ह बदल देवै सै। यीशु मसीह जो म्हारा एकमात्र माल्लिक अर प्रभु सै, वे उसका इन्कार करै सै।<sup>5</sup> हालाकि थमनै सारी बाततां का बेरा सै, फेर भी मै थमनै वे बात याद दुवाणा चाहूं सूं, जिन प्रभु नै इस्राएली माणसां ताहीं मिस्र देश की गुलाम्मी तै छुड़ाया था, तो उसके बाद उन म्ह विश्वास ना करणीया का प्रभु नै जंगल-बियाबान म्ह नाश कर दिया।<sup>6</sup> यो भी याद राक्खों के परमेसवर नै उन सुगंदतां ताहीं भी दण्ड दिया, जिननै अपनी प्रभुता बणाए न्ही राक्खी, बल्के अपनी खुद की रहण की जगहां जो के सुगंधी छोड़ दी, परमेसवर नै उन ताहीं भी भीषण दिन के न्याय खात्तर अन्धेरै म्ह, जो सदा काल के खात्तर सै, बेल्लां तै बाँधके राख्या सै, जिन ताहीं कोए तोड़ न्ही सकदा।<sup>7</sup> उस्से तरियां उन माणसां के बारे म्ह जो सदोम अर अमोरा नगर अर उसके लोवै-धोवै के नगर के माणसां के गैल के बणी थी। वे माणस जार होंगे थे, अर अप्राकृतिक यौन-सम्बन्धां के पाच्छे लागे थे, तो परमेसवर नै उन ताहीं आग तै भस्म कर दिया, जो उनके गैल होया वा दुसरयां खात्तर चेतावनी सै, क्यूँके वे भी अनन्त आग के जरिये दण्ड पावेंगे।<sup>8</sup> इन बाततां के बारे म्ह बेरा होन्दे होए, परमेसवर का कहणा ना मानण आळे लोग इस्से तरियां तै पाप करे सै, उनका कहणा सै, के वे दर्शन देखे सै, वे अपनी-अपनी देह नै अशुद्ध करे सै, अर वे परमेसवर की प्रभुता नै अस्वीकार करे सै, अर सुगंदतां की बुराई करे सै।<sup>9</sup> पर परमेसवर के प्रधान सुगंदत मीकाईल नै, जिन शैतान तै मूसा नबी की लाश के बारे म्ह वाद-विवाद करया, तो मीकाईल सुगंदत नै भी उसतै आच्छा-भुंडा कहके खोट लाण की हिम्मत कोनी करी, पर

सिर्फ इतनाए कह्या, के “प्रभु तन्नै फटकारै\*।” 10 पर परमेसवर का कहणा ना मानण आळे ये लोग उन बात्ता की आलोचना बुरे शब्दां तै करै सै, जिन ताहीं वे जाणदे ए कोनी, अर जिन बात्तां नै वे जाणै सै, उन ताहीं वे बिना सोच्चे-समझे जंगली-जानवरों की तरियां करै सै, इसे काम्मां खात्तर परमेसवर उन ताहीं दण्ड देवैगा। 11 धिक्कार सै उनपै! जो कैन की तरियां बुरी जिन्दगी जीवै सै, जिसनै अपणे भाई का खून इस करके करया था, क्यूँ परमेसवर नै उसकी भेट स्वीकार कोनी करी, अर उसके भाई की कर ली थी, अर वो उस बिलाम की तरियां सै, जिसनै परमेसवर के माणसां ताहीं पाप करण खात्तर उकसाया, ताके वो धन ले सके जिसकी पेशकस उस ताहीं करी गई थी, अर जो कोरह की ढाळ मूसा नबी के अधिकार का विरोध करण के कारण नाश होंगे। 12 जिव थम परमेसवर के प्यार नै, याद करण के खात्तर प्रीति भोज† म्ह कट्टे होओ सों, तो वे भी थारे म्ह शामिल हो जावै सै, तब वे उस समुन्दर म्ह लुक्की होए पत्थर की चट्टान की तरियां सै, जो थारे ताहीं डूबो सके सै। वे उस पाळी की तरियां सै जो सिर्फ अपणा पेट भरे सै, अर वे बिना पाणी के बादल सै, जिन ताहीं हवा उड़ा ले जावै सै, वे पतझड़ के इसे दरखत सै, जिन म्ह कदे फळ कोनी लागदे, अर ये जड़ तै उखड़गे सै। 13 ये समुन्दर की तेज झाल के हिलोरे सै, जो अपणी गंदगी का झाग उछाळै सै, ये लोग शर्मनाक काम करे सै, ये उन राह तै भटके होए तारां की ढाळ सै, जो किसे नै सही राह न्ही दिखा सकदे, जिनके खात्तर परमेसवर नै सदा खात्तर घोर अन्धकार की जगहां तय कर राक्खी सै, जइँ वो सदा खात्तर रहवेंगे। 14 हनोक नै भी जो आदम की सातवीं पीढ़ी म्ह तै था, इन माणसां के बाबत या भविष्यवाणी करी थी, “देक्खों, प्रभु अपणे लाखां पवित्तर सुर्गदूतां के गेल्या आवैगा, 15 तो उन सब माणसां का न्याय करैगा, अर बुरे माणसां नै उनके बुरे काम्मां का अर दुष्ट माणसां नै जिननै परमेसवर के विरोध म्ह कड़वे शब्द इस्तमाल करे थे, उन ताहीं कसूरवार ठहरावैगा।” 16 ये तो बेसबरे, बड़बड़ाण आळे, अर अपणी मर्जिया के मुताबिक लगातार बुरे काम करै सै, अर अपणे मुँह तै घमण्ड की बात बोल्ले सै, वे अपणे फायदे के खात्तर चापलूसी की बात करै सै। 17 पर हे प्यारे भाईयो, थम इन बात्तां नै याद राक्खो, जो म्हारे प्रभु यीशु मसीह के परेरित भोत पैहल्याए कहगे सै। 18 वे थमनै कह्या करै थे, “के प्रभु यीशु मसीह के बोहड़ण तै पैहले इसे माणस भी होवेंगे जो प्रभु का मजाक उड़ावेंगे, वे इसे माणस सै, जो अपणी बुरी अभिलाषायां के मुताबिक जिन्दगी जिवेंगे।” 19 ये वे माणस सै, जो थारे म्ह फूट गैरे सै, अर जिन म्ह पवित्तर आत्मा न्ही सै उनकी बुरी अभिलाषा, उन ताहीं अपणे बस म्ह राक्खै सै। 20 हे प्यारे विश्वासी भाईयो, थम लगातार एक-दुसरे की बढ़ोतरी करते जाओ, अर आप्स म्ह एक-दुसरे नै सच्ची शिक्षा जिसपै थम विश्वास करो सों, उसतै उत्साहित करदे रहों, अर जिस तरियां पवित्तर आत्मा थारे ताहीं अगुवाई करै सै थम प्रार्थना करदे रहों। 21 थमनै यो जाणके जीवन जीणा चाहिए, के परमेसवर थारे तै प्यार करै सै, अर थम उस दिन की बाट देखदे रहो जिस दिन म्हारा प्रभु यीशु मसीह बोहड़के आवैगा ताके थमनै अनन्त जीवन मिले, क्यूँके उसने म्हारे पै दया करी सै। 22 उन माणसां पै दया करो जिनका विश्वास डामाडोल होरया सै। 23 घणखरे माणसां नै न्याय की आग तै झपटटा मारके लिकाड़ो, अर दुसरे माणसां के प्रति दयालु रहों, पर इसके साथ चौक्कस भी रहों, उस लत्ते तै भी नफरत करो जो पाप तै भरे काम्मां तै कलंकित हो गया सै। 24-25 वो एकमात्र सच्चा परमेसवर सै, जो थमने ठोक्कर खाण तै बचा सके सै, अर वो थमने बेकसूर अर मगन करके अपणे महिमा म्ह अपणे स्याम्ही खड्या करैगा। जो प्रभु यीशु मसीह नै म्हारे खात्तर करया, उसके जरिये परमेसवर नै म्हारे ताहीं बचाया सै। म्हारा प्रभु यीशु मसीह माणसां म्ह, परमेसवर की तारीफ करण का कारण बणा, ताके वो पिच्छाण सके, के शरुआत तै, इब अर सदा के खात्तर शक्ति अर अधिकार उस्से का सै। आमीन।

\* 1:9 1:9 फटकारैधमकावे † 1:12 1:12 प्रीति भोज परमेसवर के लोग जो भाई चारे म्ह कट्टे हो के खाणा खावै सै उस ताहीं प्रीति भोज कहवै सै

## प्रकाशित वाक्य



यूहन्ना का प्रकाशित-वाक्य उस बखत लिख्या गया था, जिव विश्वासियाँ ताहीं उनके विश्वास के खात्तर तंग करया जाण लाग रहया था। यीशु मसीह पै प्रभु अर माल्लिक के रूप म्ह विश्वास करण के कारण। इसके लेखक की चिन्ता की बड्डी बात या सै के अपने पढ़णियाँ म्ह आसा अर हिम्मत देणा अर उन ताहीं या बिनती करणी थी के इस दुःख अर सताव के बखत विश्वास म्ह बणे रहवै। इस किताब का घणखरा भाग प्रकाशनां अर दर्शणा की मालाओं के रूप म्ह सै, जिस तरियाँ सांकेतिक भाषा म्ह दिखाया गया सै, हो सके सै उस बखत के विश्वासियाँ की समझ म्ह आगी थी, पर दुसरे माणसां खात्तर यो भेद रह्या। जिस तरियाँ संगीत म्ह धुन होवै सै, उसे तरियाँ इस किताब म्ह कई चीज बार-बार कई तरियाँ तै न्यारे-न्यारे दर्शणा की मालाओं के जरिये दुहराई जावै सै। पर इस किताब की व्याख्या म्ह उसके बारे म्ह मतभेद सै। फेर भी जरूरी बात साफ सै: के परमेसवर प्रभु यीशु मसीह के जरिये अपने सारे दुश्मनां नै जिन म्ह शैतान भी शामिल सै, सदा के खात्तर पूरी तरियाँ तै हरा देवैगा। अर जिव या जीत पूरी हो ज्यागी तो वो अपने विश्वास लायक माणसां नै नया अकास अर नई धरती नै आशीषां तै भर देवैगा।

रूप-रेखा

जानकारी 1: 1-8

शुरूआती दर्शन अर सात्तु कलीसिया ताहीं चिट्ठी 1:9-3:22

सात मोहर के जरिये बन्द चमड़े की चिट्ठी 4:1-8:1

सात तुरही 8:2-11:19

अजगर अर दो पशु 12:1-13:18

और दर्शन 14:1-15:8

परमेसवर के छो के सात कटोरे 16:1-21

वेबिलोन का नाश, अर पशु, झूठे नबी, और शैतान की हार 17:1-20:10

आखरी न्याय 20:11-15

नया अकास, नई धरती, अर नया यरुशलेम 21:1-22:5 समापन 22:6-21

1 परमेसवर नै यीशु मसीह ताहीं वो गुप्त बातें दिखाई जो भोत तावळी होण आळी सै, ताके वो अपने दास्सां पै इन बातों नै जाहिर करै, उसके बाद मसीह नै सुगंदत भेज्या, ताके अपने दास यूहन्ना ताहीं ये बात दिखावै।<sup>2</sup> यूहन्ना नै वो सब कुछ लिख लिया, जो उस ताहीं दिखाया गया था, यानी वो वचन जो परमेसवर की ओड़ तै आया था, अर जो कुछ भी मसीह यीशु नै कहा था।<sup>3</sup> धन्य सै वे जो इस भविष्यवाणी के वचन नै पढ़े सै, अर वे जो सुणे सै अर इस म्ह लिक्खी होई बातों नै मान्ने सै, क्यूँके ये बात तावळी होण आळी सै।



4 ये चिट्ठियाँ यूहन्ना की ओड़ तै आसिया परदेस की सात कलीसियाओं के नाम सै।

परमेसवर पिता की ओड़ तै थमने अनुग्रह अर शान्ति मिले, जो सै, अर जो था, अर जो आण आळा सै, अर इन सात आत्मायाँ की ओड़ तै जो उसके सिंहासन के स्याम्ही सै।<sup>5</sup> अर यीशु मसीह जो विश्वास जोग्गा गवाह अर मरे होया म्ह तै जी उठण आळा म्ह तै जेट्ठा अर धरती के राजयां का हाकिम सै, उसकी की ओड़ तै थारे ताहीं अनुग्रह अर शान्ति मिल्दी रहवै। वो म्हारे तै प्यार करै सै, अर उसने अपने लहू के जरिये म्हारे ताहीं पाप तै छुटाया सै।<sup>6</sup> उसने म्हारे ताहीं वे माणस बणा दिये सै, जिनका परमेसवर राजा सै, अर उसने म्हारे ताहीं परमेसवर जो उसका पिता सै, उसका याजक बणा दिया सै, उस्से की महिमा अर पराक्रम युगानुयुग रहवै। आमीन।<sup>7</sup> लखाओ, वो बादळां के गेल्या आण आळा सै, अर हरेक आँख उसने देखैगी, बल्के जिनने उस ताहीं बेधा था, वे भी उस

ताहीं देखेंगे, अर धरती के सारे कुल उसके कारण छात्ती पीटटेंगे, जब उस ताहीं देखेंगे। हाँ। आमीन। 8 प्रभु परमेसवर यो कहवै सै, के वो जो सै, अर जो था, अर जो आण आळा सै, जो सब तै शक्तिशाली सै, “मै अल्फा अर ओमेगा सू।”

\*\*\*\*\*

9 मै यूहन्ना, जो थारा विश्वासी भाई अर मसीह के खात्तर दुख सहण म्ह अर परमेसवर के राज्य म्ह, अर धीरज तै दुख सहण म्ह साइझी सू, जो दुख उन माणसां पै आया सै, जिनका उसके साथ रिश्ता सै, मै पतमुस नाम के टापू पै भेज दिया गया, क्यूँके मन्ने परमेसवर के वचन का प्रचार करया था, अर मसीह यीशु के सच्चे सन्देश ताहीं सुणाया था। 10 प्रभु के दिन, पवित्र आत्मा मेरे पै आ गया, अर मन्ने अपने पाच्छे तुरही बरगा बड़ड़ा शब्द सुण्या। 11 उसने उसते कहा, के “जो कुछ तू देखे सै, उसने किताब म्ह लिखके सात्तु कलीसियाओं के धौरै भेजदे, जो इन नगरां म्ह सै, यानिके इफिसुस, स्मुरना, पिरगमुन, थुआतीरा, सरदीस, फिलदिलफिया, अर लौदीकिया ताहीं।”

12 फेर मन्ने उस ताहीं, जो मेरे तै बोल्लण लागरया था, देखण के खात्तर अपना मुँह फेरया, अर पाच्छे घूमके मन्ने सोन्ने की सात दीवट देखी, 13 अर उन दीवटा\* के बिचाळै माणस के वेट्टे के बरगा एक आदमी देख्या, जो पायां ताहीं के लत्ते पहेरे, अर छात्ती पै सोन्ने का पटुका बाँधे होइ था। 14 उसके सिर के बाळ धोळी ऊन बल्के बर्फ की ढाळ जमा धोळे थे, अर उसकी आँख आग की तरियां धधकण लागरी थी। 15 अर उसके पैर भट्टी म्ह तपा के चमकाए होए पीत्तळ के जिसे थे, अर उसका बोल घणे पाणी के गरजन जसा था। 16 वो अपने सोळे हाथ म्ह सात तारे लिए होइ था, अर उसके मुँह म्ह तै पैन्नी दोधारी तलवार लिकडै थी। उसका मुँह इस ढाळ बळे था, जिस ढाळ सूज करडी धूप के बखत चमके सै। 17 जब मन्ने उस ताहीं देख्या, तो उसके पायां पै मुर्दा की ढाळ पड़ग्या। उसने मेरे पै अपना सोळा हाथ, धरके कहा, “मतना डरै, मै पैहलड़ा अर आखरी अर जिन्दा सू।” 18 मै मरग्या था, अर इब देख मै युगानुयुग जीऊँ सू, अर मौत अर पाताळ लोक की ताळी मेरे धौरै सै। 19 इस करके जो बात तन्ने देखी सै अर जो बात होण लागरी सै अर जो बात इसके पाच्छे, होण आळी सै, उन सारियां नै लिख ले। 20 इब मै उन सात तारां का भेद जिन ताहीं तन्ने मेरे सोळे हाथ म्ह देख्या था अर उन सोन्ने की दीवटां का भेद तन्ने बताऊँ सू, वे सात तारे सात्तु कलीसियाओं के धौरै भेजजे गये सुर्गदूत सै, अर वे सात दीवट, सात कलीसिया सै।

## 2

\*\*\*\*\*

1 उसने मेरे ताहीं यो भी कहा के इफिसुस नगर की कलीसिया के सुर्गदूत नै न्यू लिख

के, “जो सात्तु तारे अपने सोळे हाथ म्ह लिए होइ सै, अर सोन्ने की सात्तु दीवटां\* के बिचाळै हाँडे सै, वो न्यू कहवै सै” 2 के मै तेरे काम, अर मेहनत, अर तेरा धीरज जाणु सू, अर मै जाणु सू, के तू बुरे माणसां की शिक्षा नै सह नही सकदा, अर जो अपने-आपने प्रेरित कहवै सै, अर सै नही, उन ताहीं तन्ने परख के झूट्टा पाया। 3 अर तू धीरज धरै सै, अर मेरे नाम के खात्तर दुख टा-टाके भी तन्ने मेरी सेवा करणा नही छोडचा। 4 पर मन्ने तेरे खिलाफ म्ह न्यू कहणा सै, के तेरे म्ह वो प्यार नही रह्या जो तू पैहले मेरे तै करै था। 5 यो याद कर के तन्ने शरु म्ह मेरे तै किसा प्यार करया था, अर इब उसा प्यार नही करदा, तू पाप करणा छोड दे, अर जिसा तन्ने शरु म्ह मेरे तै प्यार करया था उसाए प्यार कर, अर जै तू पाप करणा नही छोडैगा, तो मै तेरे धौरै आके तेरी दीवट नै उस जगहां तै हटा दियुंगा। 6 पर हाँ, तेरे म्ह या बात तो सै, के तू नीकुलइयों† के काम्मां तै नफरत करै सै, जिनतै मै भी नफरत करै सू। 7 जिसके कान हों, वो ध्यान तै सुण ले, के परमेसवर का आत्मा कलीसिया तै

\* 1:13 1:13 दीवटां भोट-से दीवे रखण का एक बरतन \* 2:1 2:1 दीवट भोट-से दीवे रखण का एक बरतन † 2:6 2:6 नीकुलइयों एक इसा धार्मिक टोळ था जो विश्वासियों ताहीं यो सिखाया करदा के हम लुचण अर मूर्तिपूजा कर सका सं

के कहवै सै: वे लोग जो बुराई की ताकत पै जीत पावै सै, मै जीवन कै दरखत म्ह तै जो जीवन देवै सै, जो सुर्गलोक म्ह सै, उस ताहीं उस फळ म्ह तै खाण नै दियुंगा।

**XXXXXXXX XX XX XXXXXXXX XXXXX XXXXX**

8 अर उसने मेरे ताहीं स्मुरना नगर की कलीसिया के सुर्गदूत ताहीं यो लिखण खात्तर कहा, के, जो पैहल्डा अर आखरी सै, जो मर लिया था अर इब जिन्दा होगया सै, वो न्यू कहवै सै के, 9 मै तेरे क्लेश अर गरीबी नै जाणुं सू, (पर तू साहूकार सै), अर जो माणस अपने-आप ताहीं यहूदी कहवै सै, अर सै न्ही, पर वो शैतान के झुण्ड म्ह तै सै, मै उनकी बुराई नै भी जाणुं सू। 10 जो दुख तन्नै झेलणे होंगे, उनतै मत घबरा, क्यूँके देखो, शैतान अपने माणसां के जरिये थारे म्ह तै कितन्याँ ताहीं जेळखान्ने म्ह गेरैगा, ताके थम परखे जाओ, अर थारे ताहीं दस दिन तक क्लेश ठाणा पडैगा। जान देण तक विश्वासी रह, तो मै थारी जीत के कारण ईनाम के तौर पै थमनै अनन्त जिन्दगी देऊंगा। 11 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकत पै जीत पावै सै, उसनै दुसरी मौत तै नुकसान कोनी होवैगा।

**XXXXXXXX XX XX XXXXXXXX XXXXX XXXXX**

12 अर उसने मेरे ताहीं पिरगमुन नगर की कलीसिया के सुर्गदूत ताहीं यो लिखण खात्तर कहा, के, "जिसके धारे दोधारी अर पैन्नी तलवार सै, वो न्यू कहवै सै" 13 के मन्नै न्यू तो बेरा सै, तू ओड़े रहवै सै जित्त शैतान का राज सै, अर मेरै नाम पै स्थिर रहवै सै, अर मेरै पै विश्वास करण तै उन दिनां म्ह भी पाच्छे, न्ही हट्या जिन म्ह मेरा विश्वास जोगगा गवाह अन्तिपास, तेरे नगर म्ह उस जगहां पै मारया गया जित्त शैतान रहवै सै। 14 पर मन्नै तेरे खिलाफ म्ह न्यू कहणा सै, थम उन माणसां का बिरोध कोनी करदे, जो पुराणे जमान्ने के नबी विलाम की तरियां झूठी शिक्षा सिखावे सै, विलाम नै राजा बालाक ताहीं यो सिखाया, के इस्राएल के माणसां तै पाप करवाण कै खात्तर के करणा चाहिए, के वे इन्तिहान म्ह पड़े, अर पाप कर बेट्टे। उसनै उन ताहीं मूर्तियाँ के आगै चढ़ाई होइ चिज्जां ताहीं खाणा अर अनैतिक जिन्दगी जीणा सिखाया। 15 उससे तरियां-ए तेरे ऊँ कितने तो इसे सै, जो नीकुलइयों की शिक्षा नै मान्ने सै। 16 इस करके पाप करणा छोड़ दे, न्ही तो मै तेरे धारे तावळा-ए आऊंगा, अर झूठी शिक्षा देण आळे उन माणसां के खिलाफ अपने मुँह तै लिक्कण आळी उस तलवार तै लडूंगा, जो के मेरा वचन सै। 17 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकतां पै जीत पावै सै, उस ताहीं मै गुप्त मन्ना म्ह तै दियुंगा, अर उस ताहीं एक धोळा पत्थर भी दियुंगा, अर उस पत्थर पै एक नाम लिख्या होया होगा, जिस ताहीं उसके पाण आळे कै सिवाए और कोए न्ही जाणैगा।

**XXXXXXXX XX XX XXXXXXXX XXXXX XXXXX**

18 अर उसने मेरे ताहीं थुआतीरा नगर की कलीसिया के सुर्गदूत ताहीं यो लिखण खात्तर कहा, के, मै परमेसवर का बेटटा, जिसकी आँख आग की ज्वाला की तरियां, अर जिसके पैर बढ़िया पीत्तळ के जिसे सै, न्यू कहूँ सू, के 19 मै तेरे काम, तेरे प्यार, विश्वास, सेवा, अर धीरज नै जाणुं सू, अर न्यू भी जाणुं सू, के तेरे पाच्छले काम पैहल्डा तै बढ़के सै, जिव तन्नै मेरे पै विश्वास करया था। 20 पर मन्नै तेरे खिलाफ न्यू कहणा सै, के तू उस जनानी इजेबेल नै रहण देवै सै, जो अपने-आपनै नबी कहवै सै, अर मेरै दास्सां नै जारी करण, अर मूर्तियाँ के आगै चढ़ाई होइ चीज नै खाणा सिखाके भकावे सै। 21 मन्नै उस ताहीं पाप छोड़ण का मौक्का दिया, पर वा अपने जारीपणे के पाप नै छोड़णा कोनी चाहन्दी। 22 मै उस ताहीं बीमार कर दियुंगा। अर जो उसके गेल्या जारी करै सै, जे वे भी उसके बरगे काम्मां नै जो वा करै सै करणा न्ही छोड़ेंगे, तो उननै मै मारया दण्ड दियुंगा। 23 अर मै उसके चेल्यां नै मार दियुंगा, अर फेर सारी कलीसिया नै बेरा पाट जावैगा, के हृदय अर मन जाँचण आळा मै ए सू, अर मै थारे म्ह तै हरेक नै उसके काम्मां कै मुताबिक बदला देऊंगा। 24 पर थम जो थुआतीरा के बाकी लोग जिननै इस झूठी शिक्षा ताहीं न्ही मान्या, अर उन बात्तां नै जिन नै शैतान की गहरी बात कहवै सै, उन म्ह भाग न्ही लेते, मै न्यू कहूँ सू, के मै थारे ताहीं और हुकम कोनी दियुंगा, पर मै

जिब तक ना आ जाऊँ मेरे पै मजबूती तै विश्वास करते रहों। 25 पर हाँ, जो धारे धोरे सै उसनै मेरे आण तक थाम्बे रहो। 26 वे लोग जो बुराई की ताकतां पै जीत पावै सै, अर मेरे काम्मां के मुताबिक आखरी ताहीं करदा रहवै, मै उसनै देश-देश के माणसां पै राज करण का हक देऊँगा। 27 मै उसनै भी राज करण का वोए हक देऊँगा जो मेरे पिता नै मेरे ताहीं दिया सै, वो उनपै बिना दया के राज करैगा, अर वो उन ताहीं चकणाचूर कर देवैगा, जिस ढाळ कुम्हार के माट्टी के बासण चकणाचूर हो जावै सै। अर मन्नै भी इसाए हक अपणे पिता तै मिल्या सै। 28 अर मै उसनै भोर का तारा देऊँगा। 29 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै।

### 3

????? ???? ? ? ???? ???? ???? ???? ???? ???? ???? ?

1 उसनै मेरे ताहीं यो भी कहा के सरदीस नगर की कलीसिया के सुगंदूत नै लिख, के “जिसके धोरे परमेसवर की सात आत्मा अर सात तारे सै, वो न्यू कहवै सै,” के मै तेरे काम्मां नै जाणु सू, के तू मेरा विश्वास लायक विश्वासी तो कुह्वावै सै, पर असल म्ह तन्नै मेरा कहणा मानना छोड़ दिया सै। 2 इस करके सावधान हो जा, अर अपणे विश्वास नै जो मेरे पै सै उसनै मजबूत कर, क्यूँके तेरे म्ह थोड़ा-सा ए विश्वास बाक्की सै, ताके तेरा बचा होइ विश्वास भी ना जान्दा रहवै, मै जाणु सू के तेरे काम अधूरे सै, पर तेरे काम्मां तै, जो तू करण लागरया सै परमेसवर खुश कोनी। 3 इस करके याद कर, के तन्नै किस तरियां तै शिक्षा पाई अर सुणी थी, अर उस म्ह बणया रह, अर पाप करणा छोड़ दे। जै तू जागदा न्ही रहवैगा, तो मै चोर की ढाळ आ जाऊँगा अर तन्नै कदे भी न्ही बेरा पाट्टैगा, के मै किस बखत तेरे पै आण पडूँगा। 4 पर हाँ, तेरे धोरे सरदीस म्ह कुछ लोग सै, जो पाप के जरिये अशुद्ध कोनी होए, वे थोळे लत्ते पहेरे होइ मेरे गैल हाँडिं क्यूँके वे इस लायक सै। 5 वे लोग जो बुराई की ताकत पै जीत पावै सै, उस ताहीं इस्से ढाळ थोळे लत्ते पहिराए जावैंगे, अर मै उसका नाम जीवन की किताब म्ह तै किसे तरियां तै भी न्ही काटूँगा, पर उसका नाम अपणे पिता अर उसके सुगंदूतां के स्याम्ही मान ल्युँगा के ये मेरे लोग सै। 6 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै।

???????????? ???? ? ? ???? ???? ???? ???? ?

7 अर उसनै मेरे ताहीं यो भी कहा सै, के फिलदिलफिया नगर की कलीसिया के सुगंदूत नै न्यू लिख

के जो कहवै सै, मै पवित्र अर सच्चा सू, अर मेरे धोरे वा ताळी सै, जो राजा दाऊद की सै, जिब मै ताळी लैके दरबाजा खोल्लू सू, तो उसनै कोए बन्द न्ही कर सकता, जिब मै ताळी लैके दरबाजा बन्द करूँ सू, तो उसनै कोए खोल न्ही सकता, वो तेरे तै न्यू कहवै सै के, 8 मन्नै तेरे काम्मां का बेरा सै, देख, मै जाणु सू के तेरे म्ह भोत कम काबलियत सै, पर तन्नै वा बात मान्नी सै जिसके बारे म्ह मन्नै तेरे ताहीं कहा था, अर तन्नै इस बात का इन्कार न्ही करया के तू मेरे पै विश्वास करै सै, इस करके मन्नै एक दरबाजा खोल्या सै, जिसनै कोए बन्द न्ही कर सकदा। 9 देख, जो शैतान के झुण्ड म्ह तै सै, अर खुद नै यहूदी कहवै सै, पर सै न्ही, बल्के झूठ बोल्लै सै, देख, मै इसा करूँगा, के वे आके तेरे पायां म्ह मोध्धे पडैंगे, अर न्यू जाण लेवैंगे, के मन्नै तेरे तै प्यार करया सै। 10 क्यूँके जिब तेरे ताहीं सताया जाण लागरया था, तो तन्नै मेरे वचन ताहीं धीरज तै पुगाया सै, उसकी बजह तै मै भी तन्नै इम्तिहान के उस बखत म्ह बचा के राखूँगा, जो धरती पै रहण आळे माणसां नै परखण के खात्तर साबती दुनिया पै आण आळा सै। 11 मै तावळा-ए आण आळा सू, अपणे विश्वास म्ह मजबूत बणो, ताके कोए थमनै थारा ईनाम लेण तै रोक ना पावै। 12 वे लोग जो बुराई की ताकत पै जीत पावै सै, उन ताहीं मै अपणे परमेसवर के मन्दर म्ह खम्बा बणाऊँगा, वो फेर कदे बाहरणे न्ही लिकडैंगे, अर मै अपणे परमेसवर का नाम, अर अपणे परमेसवर के नगर, यानिके नये यरुशलैम का नाम, जो मेरे



परमेश्वर की ओड़ तै सुर्ग पै तै उतरण आळा सै, अर अपणा नया नाम उसपै लिखूंगा। 13 जिसकै कान हों, ध्यान तै सुण ले के परमेश्वर का आत्मा कलीसिया तै के कहवै सै।

~~~~~

14 अर उसने मेरे ताहीं यो भी कहा सै, के 'लोदीकिया नगर की कलीसिया के सुर्गदूत नै न्यू लिख'

के, जो आमीन, अर विश्वास जोगगा, अर सच्चा गवाह सै, अर परमेश्वर की सृष्टि का खास कारण सै, वो न्यू कहवै सै। 15 के मै तेरे काम्मां नै जाणु सू के तू उस पाणी की ढाळ सै, जो ना तो शीळा सै अर ना तात्ता, आच्छा था के तू इन म्ह तै एक होन्दा\* 16 क्यूँके तू गुणगुणा सै, अर ना शीळा अर ना तात्ता, मै तन्नै अपणे मुँह म्ह तै उगळण पै सू। 17 तू जो कहवै सै, के मै धनी सू, अर धनवान होग्या सू, अर मन्नै किसे चीज का घाट्टा न्ही, अर न्यू न्ही जाण्दा, के तू निरभाग, नीच, कंगाल, आन्धा, अर उघाड़ा सै। 18 इस करके मै तन्नै राय दियुँ सू, के आग म्ह त्याया होड़ सोन्ना मेरे तै मोल ले, के तू साहूकार हो जावे, अर धोळा लत्ता ले-ले के पहर कै तन्नै अपणे उघाड़ेण पै शर्म न्ही आवै, अर अपणी आँखां म्ह लाण कै खातर सुरमा ले, के तू देखण लागौ। 19 मै जिस-जिसतै प्यार राखूँ सू, उन सारया ताहीं उल्हाणा अर ताड़ना दियुँ सू, इस करके हिम्मत राख, अर पाप करणा छोड़ दे। 20 देख, मै दरबाजे पै खड्या होया खटखटाऊँ सू, जै कोए मेरा बोल सुणके दरबाजा खोल्लैगा, तो मै उसके धौरे भित्तर आके उसके गेल्या खाणा खाऊँगा, अर वो मेरे गेल्या। 21 जो जीत पावै, मै उस ताहीं अपणे गेल्या अपणे सिंहासन पै विटाऊँगा, जिसा मै भी जीत पाके, अपणे पिता के गेल्या उसके सिंहासन पै बैठ गया। 22 जिसके कान हों, वो ध्यान तै सुण लेवे के परमेश्वर का आत्मा कलीसिया तै के कहवै सै।

## 4

~~~~~

1 इन बातों के पाच्छे, जो मन्नै निर्गाह करी, तो के देखूँ सू, के सुर्ग म्ह एक दरबाजा खुल्या होया सै, अर ओड़ कोए था जो मेरे तै बात करण लागरया था, अर जो बात करण लागरया था, वो वोए था जिसनै मेरे तै पैहले बात करी थी, अर जिसकी आवाज तुरही के शब्द की तरियां थी, अर उसनै मेरे तै कहा, के "उरै ऊपरान आ ज्या, अर मै वे बात तन्नै दिखाऊँगा, जिनका इन बातों के पाच्छे, पूरा होणा जरूरी सै।" 2 अर जिब्बे पवित्तर आत्मा मेरे पै आ गया, अर मै के देखूँ सू, के एक सिंहासन सुर्ग म्ह सै, अर उस सिंहासन पै कोए बैठचा सै। 3 अर जो उसपै बैठचा सै, उसकी चमक सूर्यकान्त मणि अर माणिक्य पत्थर के समान थी, अर उस सिंहासन के चौगरदेके मेघ-धनुष था, उसकी चमक पन्ने\* के समान की थी। 4 अर उस सिंहासन के चौगरदेके चौबीस सिंहासन सै, अर इन सिंहासनों पै चौबीस बुजुर्ग धोळे लत्ते पहरे होड़ बेदुटे सै, अर उनके सिरां पै सोन्ने के ताज सै। 5 अर उस सिंहासन म्ह तै बिजळी चमकण की अर गरजण की आवाज आण लागरी थी, अर सिंहासन के स्याम्ही आग के सात दिवें जळण लागरे सै, जो के परमेश्वर की सात आत्मा सै। 6 अर उस सिंहासन के स्याम्ही पारस था जो के समुंदर जिसा चौड़ा था, अर शीशे जिसा साफ था, सिंहासन के बिचाळै अर सिंहासन के चौगरदेके चार प्राणी सै, जिनके आगौ-पाच्छे आँखें-आँख सै। 7 पैहला प्राणी शेर के बरगा सै, अर दुसरा प्राणी का मुँह बळध के बरगा सै, तीसरे प्राणी का मुँह माणस के बरगा सै, अर चौथा प्राणी उड़दे होड़ उकाब के बरगा सै। 8 अर च्यारू प्राणियाँ के छः, छः पंख सै, उनके उप्पर अर हरेक जगहां ए आँख थी, बल्के पंखां के तळे भी, अर वे दिन-रात बिना आराम करे न्यू कहवै सै, के पवित्तर, पवित्तर, पवित्तर परभु परमेश्वर, जो सब तै शक्तिशाली था, अर जो था, जो सै, अर जो आण आळा सै। 9 अर जब वे प्राणी उसकी जो सिंहासन पै बैठचा सै, अर जो युगानुयुग जीवै सै, महिमा अर आदर अर धन्यवाद करैगें, 10 फेर सब चौबीस बुजुर्ग सिंहासन पै बैठण आळे के स्याम्ही

\* 3:15 3:15 आच्छा था के तू इन म्ह तै एक होन्दा जै तू मेरे पाच्छे चाल्ले सै तो सही तरियां चाल या फेर चाल्ले ए ना।

\* 4:3 4:3 पन्ना-एक कीमती पत्थर हो सै

पड़ जावेंगे, अर उस ताहीं जो युगानुयुग जीवै सै प्रणाम करैंगे, अर अपणे-अपणे ताज सिंहासन कै स्याम्ही न्यू कहन्दे होए धर देवैंगे ।

11 “हे म्हारे प्रभु अर परमेसवर, तू-ए महिमा, अर आदर, अर सामर्थ कै जोगगा सै, क्यूँके तन्नै ए सारी चिज्जां ताहीं बणाया अर वे तेरी-ए मर्जी तै थी अर रची गई ।”

## 5

????????? ???? ? ? ???? ?

1 अर जो सिंहासन पै बैठचा था, मन्नै उसके सोळे हाथ म्ह एक किताब देखी, जो भीत्तर अर बाहरणै लिक्खी होइ अर वा सात मोंहर लाकै बन्द करी गई थी । 2 फेर मन्नै एक शक्तिशाली सुगंदूत ताहीं देख्या, जो जोर तै बोलण लागरया था, के इस किताब कै खोल्लण अर उसकी मोंहर तोड़ण कै जोगगा कौण सै? 3 पर ना सुगं म्ह, ना धरती पै, ना धरती कै तळै कोए उस किताब नै खोल्लण या उस ताहीं पढ़ण लायक कोए कोनी लिक्कइया । 4 अर मै फूट-फूटकै रोण लाग्या, क्यूँके उस किताब ताहीं खोल्लण, या उस ताहीं पढ़ण लायक कोए न्ही मिल्या । 5 फेर उन बुजुगां म्ह तै एक नै मेरै तै कह्या, मतना रोवै, लखा, यहूदा कै गोत्र का वो शेर, जो दाऊद का मूल सै, उस किताब नै खोल्लण अर उसकी सात्तु मोंहर तोड़ण कै खात्तर जयवन्त होया सै । 6 फेर मन्नै उस सिंहासन अर च्यारु प्राणियाँ अर उन बुजुगां कै बिच्चालै, मान्नो एक मारया होइ मेम्ना खड्या देख्या जो पैहले मर गया था, पर इब वो जिन्दा होग्या सै, उसके सात सींग अर सात आँख थी, ये परमेसवर की सात्तु आत्मा सै, जो साब्वी धरती पै भेज्जी गई सै । 7 उसनै आकै उसके सोळे हाथ तै जो सिंहासन पै बैठचा था, वा किताब ले ली, 8 अर जिब उसनै किताब ले ली, तो वे च्यारु प्राणी अर सब चौबीस बुजुगं उस मेम्ने कै स्याम्ही झुकगे, अर हरेक हाथ म्ह वीणा अर धूप तै भरे होइ सोन्ने के कटोरे थे, ये तो पवित्र माणसां की प्रार्थना सै । 9 अर वे यो नया गीत गाण लागगे, के तू इस किताब कै लेण, अर उसकी मोहरां नै खोल्लण जोगगा सै, क्यूँके तन्नै मरकै अपणे लहू तै हरेक कुल, अर भाषा, अर माणस, अर जात म्ह तै परमेसवर कै खात्तर माणसां ताहीं मोल लिया सै । 10 अर उन ताहीं म्हारै परमेसवर कै खात्तर एक राज्य अर याजक बणाया, ताके वो परमेसवर की सेवा करै, अर वे धरती पै राज्य करै सै ।

11 अर जिब मन्नै देख्या, तो उस सिंहासन अर उन प्राणियाँ अर उन बुजुगां कै चौगरदेकै अनगिणत सुगंदूतां का बोल सुण्या, जिनकी गिणती लाक्खां अर करोड़ां की थी । 12 अर वे ऊँची आवाज म्ह गाण लागरे थे, के मारया होया मेम्ना ए सामर्थ, धन, ज्ञान, ताकत, आदर, महिमा, अर धन्यवाद कै लायक सै । 13 फेर मन्नै सुगं म्ह, धरती पै, अर धरती कै तळै, अर समुन्दर की सारी बणाई होइ चिज्जां नै, अर सारा किमे, जो उन म्ह सै, उन ताहीं न्यू कहन्दे सुण्या, के “जो सिंहासन पै बैठचा सै, उसका, अर मेम्ने का धन्यवाद हो, मेम्ना ए सामर्थ, धन, ज्ञान, ताकत, आदर, महिमा कै लायक सै, अर उसका राज्य, युगानुयुग रहवै ।” 14 अर च्यारु प्राणियाँ नै आमीन कह्या, अर बुजुगां नै झुककै प्रणाम करया ।

## 6

???? ???? ? ? ???? ?

1 फेर मन्नै देख्या, के मेम्ने नै उन सात्तु मोहरां म्ह तै एक ताहीं खोल्या, अर उन च्यारु प्राणियाँ म्ह तै एक का गरजण जिसा शब्द सुण्या, के आ जाओ । 2 अर मन्नै निगांह करी, अर देख्यो, मन्नै एक धोळा घोड़ा दिख्या, अर उसका सवार धनुष लिए होइ सै, अर उस ताहीं एक ताज पहिराया गया, अर वो सुगं तै चाल्या अर धरती पै लिक्कइया, जो पैहले तै ए जीत चुका सै, अर फेर तै वो जीत जावैगा ।

3 अर जिब मेम्ने नै दुसरी मोंहर खोल्ली, तो मन्नै दुसरे प्राणी ताहीं न्यू कहन्दे सुण्या, के आ ।

4 फेर एकदम तै एक और घोड़ा लिक्कइया, जो लाल रंग का था, उसके सवार ताहीं यो हक दिया

गया, के धरती पै तै मेळ-मिलाप ठा ले, ताके माणस एक-दुसरे नै मारै, अर उस ताहीं एक बड्डी तलवार दी गई थी।

5 अर जब उसने तीसरी मोंहर खोल्ली, तो मन्नै तीसरे प्राणी ताहीं न्यू कहन्दे सुण्या, के “आ” अर मन्नै निगांह करी, अर देख्खो, मन्नै एक काळे घोड़े ताहीं लिकडदे देख्या, अर उसके सवार के हाथ म्ह एक ताखड़ी\* सै। 6 अर मन्नै उन च्यारु प्राणियाँ के बिचाळै तै एक शब्द न्यू कहन्दे सुण्या, के एक दीनार एक दिन की मजदूरी भोत सै, एक किलो गेहूँ, या तीन किलो जौ लेण खात्तर, पर तेल अर अंगूर के रस की किम्मत ना बदलिये।

7 अर जब मेम्ने नै चौथी मोंहर खोल्ली, तो मन्नै चौथे प्राणी का बोल न्यू कहन्दे सुण्या, के आ। 8 अर मन्नै निगांह करी, अर देख्खो, एक पीळा-सा घोड़ा सै, अर उसके सवार का नाम मौत सै: अर अधोलोक उसके पाच्छै-पाच्छै आण लागरया था, अर उन ताहीं धरती पै रहण आळे चार माणस (या एक चौथाई माणसां) म्ह तै एक-एक ताहीं मारण का हक मिल्या, उननै तलवार, भूख, बीमारी, अर धरती के जंगली-जानवरों के जरिये माणसां ताहीं मार दिया। 9 अर जब मेम्ने नै पाँचवी मोंहर खोल्ली, तो मन्नै वेदी† के तळै उनके प्राणां ताहीं देख्या, जो परमेसवर के वचन के कारण, अर उसपै विश्वास करण के कारण मारे गये थे। 10 अर उसनै जोर तै रुक्का मारके परमेसवर तै कह्या, हे मारल्लिक, हे पवित्र, अर सच्चे प्रभु, तू इतनी बाट क्यूँ देखण लागरया सै, उन बुरे माणसां ताहीं दण्ड देण खात्तर, जो इस धरती पै रहण लागरे सै? हम तेरे तै बिनती करां सां, के तू उन माणसां तै बदला ले, जिनने म्हारे ताहीं जान तै मार दिया सै। 11 अर उन म्ह तै हरेक ताहीं धोळै लत्ते देके, परमेसवर ने उनतै कह्या, के और थोड़ी-देर ताहीं आराम करी, जब ताहीं के थारे संगी दास, अर विश्वासी भाई, जो थारी तरियां मरण आळे सै, उनकी भी गिणती पूरी ना हो लेवै।

12 जब मेम्ने नै छठी मोंहर खोल्ली, तो मन्नै देख्या, के एक बड्डी हाल्लण होया, अर सूरज का रंग मोट्टे काळे काम्बळ की ढाळ काळा पड्ग्या, अर पूरा चाँद लहू जिसा लाल होग्या। 13 अर अकास के तारे धरती पै इस ढाळ पड्गो जिस तरियां आँधी तै हालके अंजीर के दरखत म्ह तै काच्चे फळ झड़ै सै। 14 आसमान पाटग्या अर एक किताब की ढाळ सुकड ग्या था, अर हरेक पहाड़, अर टापू, अपणी-अपणी जगहां तै हटगो। 15 अर इसका नतिज्जां यो होया के, धरती के राजा, प्रधान, सरदार, साहूकार, अर सामर्थी माणस, हरेक गुलाम, अर हरेक आजाद माणस, पहाड़ां की खोह म्ह, अर चट्टानां म्ह जा लुहके। 16 अर पहाड़ां, अर चट्टानां तै कहण लागगे, के “म्हारे ताहीं लहूको ल्यो, अर म्हारे ताहीं उसके मुँह तै जो सिंहासन पै बेट्या सै, अर मेम्ने के प्रकोप तै लहूको ल्यो। 17 क्यूँके उनके प्रकोप के भयानक दिन जब परमेसवर अर मेम्ना उन सारया का न्याय करैगा तो कोए भी उननै दण्ड तै बचा न्ही पावेगा।”

## 7

1, 44,000

1-2 उसके पाच्छै मन्नै दुनिया के च्यारु कुणयां पै चार सुगंदूत खड़े देख्खे, उन सुगंदूतां नै परमेसवर तै यो हक मिल्या था, के वे दुनिया के माणसां ताहीं मरी तै मारै, चाहे वे धरती पै हो या समुन्दर पै हो, उननै हवा ताहीं धरती के च्यारु कुणयां पै तै रोक राख्या था, ताके हवा धरती, समुन्दर, या किसी भी जंगल तै ना गुजरे, अर मन्नै एक और सुगंदूत ताहीं पूरब दिशा की ओड़ आन्दे देख्या, उसके हाथ म्ह परमेसवर की ओड़ तै एक मोंहर थी, जो युगानुयुग जिन्दा सै, उस सुगंदूत नै ऊँच्ची आवाज म्ह दुसरे चार सुगंदूतां तै यो कह्या। 3 जब ताहीं हम अपणे परमेसवर के दास्सां के माथ्ये पै मोंहर न्ही ला देवां, जद ताहीं धरती अर समुन्दर अर दरखतां ताहीं नुकसान ना पोहोचाईयो। 4 अर जब सुगंदूतां नै मोंहर लगा ली, तो किसे नै मेरे ताहीं बताया के एक लाख चवाळीस हजार पै मोंहर लगा दी गई सै, ये सारे लोग इस्राएल के बारहां गोत्र म्ह तै सै। 5 यहूदा के गोत्र म्ह तै बारहा

\* 6:5 6:5 ताखड़ी-तराजू † 6:9 6:9 वेदी-परमेसवर ताहीं भेट चढाण खात्तर एक जगहां

हजार पै मोहर दी गई, रुबेन के गोत्र म्ह तै बारहा हजार पै, गाद के गोत्र म्ह तै बारहा हजार पै।<sup>6</sup> अशेर के गोत्र म्ह तै बारहा हजार पै, नप्ताली के गोत्र म्ह तै बारहा हजार पै, मनशिशह के गोत्र म्ह तै बारहा हजार पै।<sup>7</sup> शमौन के गोत्र म्ह तै बारहा हजार पै, लेवी के गोत्र म्ह तै बारहा हजार पै, इस्साकार के गोत्र म्ह तै बारहा हजार पै।<sup>8</sup> जबूलून के गोत्र म्ह तै बारहा हजार पै, यूसुफ के गोत्र म्ह तै बारहा हजार पै अर बिन्यामीन के गोत्र म्ह तै बारहा हजार पै मोहर दी गई।

२२ २२२२२ २२२२

<sup>9</sup> इसके पाच्छे, मन्ने निगांह करी, अर देखो, हरेक जात, अर कुल, अर माणस अर भाषा म्ह तै एक इसी बड़डी भीड़, जिस ताहीं कोए गिण न्ही सकै था धोळे लत्ते पैहरे, अर अपणे हाथ्यां म्ह खजूर की डाळी लिए होए सिंहासन कै स्याम्ही अर मेम्ने कै स्याम्ही खड़ी से।<sup>10</sup> अर जोर तै रुक्का मारकै कहवै से, के उद्धार म्हारे परमेसवर जो सिंहासन पै विराजमान से, अर मेम्ने की ओड़ तै आवै से।<sup>11-12</sup> अर सारे सुगंदूत, उस सिंहासन, बुजुर्गा अर च्यारु प्राणियाँ के चौगरदेकै खड़े से, फेर वे सिंहासन कै स्याम्ही मुंह के बळ पड़गे, अर परमेसवर ताहीं प्रणाम करके कह्या, म्हारे परमेसवर की बड़ाई, महिमा, ज्ञान, धन्यवाद, आदर, सामर्थ, अर ताकत युगानुयुग बणी रहवै। आमीन।

<sup>13</sup> इसपे बुजुर्गा म्ह तै एक नै मेरै तै कह्या, के तू जाणे से, के या धोळी पोशाक पैहरे होए कौण से? अर कित तै आये से? <sup>14</sup> मन्ने उसतै कह्या, “हे माल्लिक, तन्ने ए बेरा से।” उसने मेरे तै कह्या, “ये वे से, जो उस बड़े कळेश म्ह तै लिकड़के आये से, इन्ने अपणे-अपणे लत्ते मेम्ने के लहू म्ह धोके धोळे करे से।”

<sup>15</sup> इससे कारण वे परमेसवर कै सिंहासन कै स्याम्ही खड़े से, अर परमेसवर कै घर म्ह दिन-रात उसकी सेवा करै से, अर जो सिंहासन पै बैठचा से, वो उन म्ह रहवैगा अर उन ताहीं बचावैगा। <sup>16</sup> वे इब ना तो कदे भूक्खे होवैंगे अर ना तिसाए, अर ना तो सूरज की गर्मी उन ताहीं झुलसावैगी अर ना कोए दुसरी गर्मी। <sup>17</sup> क्यूँके जो मेम्ना सिंहासन कै बिचाळे से वो उनकी रुखाळी करैगा, अर उन ताहीं जीवन रूपी पाणी के चोवै के धोरै ले जाया करैगा, अर परमेसवर उनकी आँखां तै सारे आँसू पुंज देवैगा।

## 8

२२२२२ २२२२२ २२ २२२२२२२ २२ २२२२२२

<sup>1</sup> अर जब मेम्ने नै सातमी मोहर खोल्ली, तो सुगे म्ह आध्धे घंटे ताहीं सन्नाटा छा गया।<sup>2</sup> अर मन्ने उन सात्तु सुगंदूतां ताहीं जो परमेसवर कै स्याम्ही खड़े रहवै से, देख्या, अर उन ताहीं सात तुरही दी गई।

<sup>3</sup> फेर एक और सुगंदूत सोन्ने का धूपदान लिए होड़ आया, अर वेदी कै लोवै खडचा होया, अर उस ताहीं भोत सारी धूप दी गई, ताके वो उस ताहीं सारे पवित्र माणसां की प्रार्थना कै साथ उस सोन्ने की वेदी पै भेट चढ़ावै जो सिंहासन कै स्याम्ही से।<sup>4</sup> अर सुगंदूतां के हाथ म्ह लिये होए उस धूपदान का धुम्मा, पवित्र माणसां की प्रार्थना के साथ परमेसवर कै धोरै उप्पर पोहच गया।<sup>5</sup> अर सुगंदूत नै धूपदान लेकै उस म्ह वेदी की आग भरी, अर उस ताहीं धरती पै गेर दी, अर गरजण गड़गड़ाहट, बिजळी चमकी अर हाल्लण होण लाग्या।

२२२ २२२२२२२२

<sup>6</sup> फेर वे सात्तु सुगंदूत जिनके धोरै सात तुरही थी, उन ताहीं फुककण खात्तर त्यार होए।<sup>7</sup> पैहले सुगंदूत नै तुरही फूक्की, अर लहू ते मिले होड़ ओळे अर आग पैदा होई, अर धरती पै गरी गई, अर धरती का एक तिहाई हिस्सा जळग्या, अर दरख्तां का तीसरा हिस्सा जळग्या, अर सारी हरी घास भी जळगी।

<sup>8</sup> जब दुसरे सुगंदूत नै तुरही फूक्की, तो मान्नो आग जिसा जळदा होया एक बड़ड़ा पहाड़ समुन्दर म्ह गेरया गया, अर समुन्दर का एक तिहाई हिस्सा लहू म्ह होग्या।<sup>9</sup> अर समुन्दर की एक तिहाई\*

\* 8:9 8:9 एक तिहाई यानी के तीसरा हिस्सा

बणाई होड़ चीज जो जिन्दी थी मरगी, अर जहाज के तीसरे हिस्से का नाश होगया ।

10 अर तीसरे सुगंदूत नै तुरही फूक्की, अर एक बड़ड़ा तारा जो मशाल की ढाळ जळै था, सुगं तै टूट्या, अर नदियाँ के तीसरे हिस्से पै, अर पाणी के चोवां पै आण पड्या । 11 उस तारे का नाम नागदौना सै, अर एक तिहाई हिस्से का पाणी नागदौना<sup>†</sup> बरगा कड़वा होगया, अर घणखरे माणस उस पाणी के कड़वे हो जाण तै मरगे ।

12 अर चौथे सुगंदूत नै तुरही फूक्की, अर सूरज का एक तिहाई हिस्सा, अर चाँद का एक तिहाई हिस्सा अर तारां के एक तिहाई हिस्से पै आपफत आई, ताके उनका एक तिहाई हिस्सा अन्धेरै म्ह डूब जावे, अर दिन के एक तिहाई हिस्से म्ह चाँदणा न्ही रह्या, अर उस्से तरियां एक तिहाई रात भी बिना चाँदणे की हो गई ।

13 जिव मन्नै फेर देख्या, तो अकास के बिचाळै एक उकाव ताहीं उड़दे अर ऊँच्चे शब्द तै न्यू कहन्दे सुण्या, “उन तीन सुगंदूतां की तुरही के शब्दां के कारण, जिनका फूकणा इब्बे बाक्की सै, धरती के बासिन्दयां पै धिक्कार सै, धिक्कार, धिक्कार ।”

## 9

1 जिव पाँचमै सुगंदूत नै तुरही फूक्की, तो मन्नै सुगं तै धरती पै एक तारा पड़दा होड़ देख्या, अर उस तारे ताहीं घणे अथाह कुण्ड की ताळी दी गई । 2 अर उसनै घणे अथाह कुण्ड ताहीं खोल्या, अर कुण्ड म्ह तै बड़डी भट्टी जिसा धुम्मा उठ्या, अर कुण्ड के धुम्मै तै सूरज अर आसमान म्ह अन्धेरा छाग्या । 3 अर उस धुम्मै म्ह भोत सारी टिड्डी लिकड़ी अर वे सारी धरती पै फैलगी, अर उन ताहीं बिच्छुआ की तरियां माणसां के लड़ण की शक्ति दी गई । 4 अर उनतै कह्या गया, के ना धरती की घास ताहीं, ना किसे हरियाली ताहीं, ना किसे दरखत ताहीं नुकसान पोहोचाओ, सिर्फ उन माणसां ताहीं नुकसान पोहोचाओ, जिनके माथ्यै पै परमेसवर की मोँहर कोनी । 5 अर उनकी जान लेण का तो न्ही, पर पाँच महिन्ना तक माणसां ताहीं दर्द देण का हक दिया गया, अर उनका दर्द इसा था, जिसा बिच्छु के डंक मारण तै माणस का होवै सै । 6 उन पाँच महिन्ना म्ह माणस मरण के तरिकेँ टोहवैगें, वे मरणा तो चाहवैगें, पर वे मर न्ही पावैगें ।

7 अर उन टिड्डियाँ के आकार लड़ाई के खात्तर त्यार करे होए घोड्या के जिसे थे, अर उनके सिरां पै मान्नो सोन्ने के ताज थे, अर उनके मुँह माणसां बरगे थे । 8 अर उनके बाळ लुगाईयाँ के जिसे, अर दाँत शेरों के जिसे थे । 9 अर उनका शरीर मान्नो लोहे के कवच तै ढक्या होया था, अर उनके पंखां का शब्द इसा था जिसा रथां अर भोत-से घोड्या का जो लड़ाई म्ह भाज्जै सै । 10 अर उनकी पूछ अर डंक बिच्छुआ के समान थी, अर उन ताहीं पाँच महिन्ना तक माणसां नै दुख पोहोचाण की जो सामर्थ्य थी, वा उनकी पुन्झड़ां म्ह थी । 11 घणे अथाह कुण्ड का दूत उनपै राजा था, उसका नाम इब्रानी म्ह अबदोन, अर यूनानी म्ह अपुल्लयोन सै ।

12 पाँच महिन्ना बाद वा बिप्दा खतम हो जावैगी, लखाओ इब इनके पाच्छै दो बिप्दा और आण आळी सै । 13 अर जिव छटमै सुगंदूत नै तुरही फूक्की तो जो सोन्ने की वेदी परमेसवर के स्याम्ही सै उसके सीन्गां म्ह तै मन्नै इसा शब्द सुण्या । 14 मान्नो कोए छटमै सुगंदूत तै जिसके धौरै तुरही थी कहण लागरया सै, के “उन चार सुगंदूतां नै जो बड़डी नदी फरात के धौरै बन्धे होड़ सै, खोल दे ।” 15 अर वे च्यारु सुगंदूत जो उस घड़ी, दिन, महिन्ने, या साल के खात्तर एक तिहाई माणसां नै मारण खात्तर छोड़ दिए गये थे । 16 उननै भोत बड़े घुड़सवारां की पलटन ताहीं कट्टा करया जिनकी गिणती बीस करोड़ सै । 17 अर मन्नै अपणे दर्शन म्ह घोड़े अर उसके इसे सवार दिक्खे, उनके धौरै कवच था जो लाल, गहरा नीला अर गन्धक की तरियां पीळा था, अर उन घोड्या के सिर शेर के सिर बरगे थे, अर उनके मुँह तै आग, अर धुम्मा, अर गन्धक लिकड़े थी । 18 इन तीन्नु महामारियाँ तै, यानिके आग, अर धुम्मा, अर गन्धक तै जो उसके मुँह तै लिकड़े थी, एक तिहाई माणस मारे गये ।

† 8:11 8:11 नागदौना एक पौधा का सै, जिस म्ह तै भोत कड़वा प्रदार्थ लिकड़े सै

19 क्यूँके उन घोडचा की ताकत उनके मुँह, अर उनकी पुन्झड़ां म्ह थी, ज्यांतै के उनकी पुन्झड़ साँपां जिसी थी, अर उन पुन्झड़ां के सिर भी थे, अर इन्हे तै वे दर्द देवें थे। 20 अर बाकी माणस जो उन महामारियाँ तै न्ही मरे थे, उननै अपणे बुरे काम करणे न्ही छोडडे, जो के ये थे भुंडी ओपरी आत्मायाँ की, अर सोन्ने, चान्दी, पीत्तळ, पत्थर, अर काठ की मूर्तियाँ की पूजा करणा, जो ना देख, ना सुण, ना चाल सकै सै। 21 अर ना ए उननै खून करणा, जादू-टोणा, जारी, अर चोरी करणा छोडचा।

## 10

XXXXXXXXXX

1 फेर मन्ने एक और शक्तिशाली सुगंदूत ताहीं सुगं तै उतरदे देख्या, जिसनै बाहळां ताहीं लत्यां के समान धारण करया होया था, उसके सिर पै मेघ-धनुष था, अर उसका मुँह सूरज जिसा अर उसके पाँ आग के खम्भे बरगे थे। 2 उसनै अपणा सोळा पाँ समुन्दर पै, अर ओळा पाँ धरती पै धरया, अर उसके हाथ म्ह एक छोट्टी सी खुली होइ किताब थी,। 3 अर इतनी जोर तै चिल्लाया, जिस ढाळ शेर गरजै सै, अर जिब वो चिल्लावे था तो गरजण के सात शब्द सुणाई दिए, जिननै मै समझ न्ही पाया। 4 अर जिब सात्तु गरजण के शब्द सुणाई दे लिए, तो मै लिखण पै था, अर मन्ने सुगं तै यो शब्द सुण्या, के जो बात गरजण के उन सात शब्दां तै सुणी सै, उननै ल्हूकोए राख, अर लिखै ना। 5 अर जिस सुगंदूत ताहीं मन्ने समुन्दर अर धरती पै खडे होइ देख्या था, उसनै अपणा सोळा हाथ कसम खाण खात्तर सुगं कै कान्ही टाया। 6 अर जो युगानुयुग जिन्दा रहवैगा, अर जिसनै सुगं अर उस म्ह बसी होई चिज्जां ताहीं, अर धरती अर उस म्ह बसी होई चिज्जां ताहीं, अर समुन्दर उस म्ह बसी होई चिज्जां ताहीं बनाया सै, उससे की कसम खाकै बोल्या, “इब तो और वार न्ही होगी।”

7 जिब सातमै सुगंदूत का तुरही फूंककण का बखत होगा, तो परमेसवर की योजना पूरी हो जावैगी, जिस ताहीं उसनै अपणे नबियाँ ताहीं बताया, जो उसकी सेवा करै सै, पर वो योजना दुसरे माणसां पै जाहिर कोनी करी थी। 8 अर जिस शब्द करण आळे ताहीं मन्ने सुगं तै बोलदे सुण्या था, वो फेर मेरै गेल्या बात करण लाग्या, के जा, जो सुगंदूत समुन्दर अर धरती पै खडचा सै, उसके हाथ म्ह की खुली होइ किताब ले ले। 9 अर मन्ने सुगंदूत कै धोरै जाकै कहा, “या छोट्टी किताब मन्ने दे, अर उसनै मेरै तै कहा, ‘ले इसनै खा ले,’ या तेरै मुँह म्ह शहद जिसी मिट्टी लागवैगी, पर या तेरा पेट कडवा कर देगी।” 10 ज्यांतै मै वा छोट्टी किताब उस सुगंदूत कै हाथ म्ह तै लेकै खाग्या, वा मेरै मुँह म्ह शहद जिसी मिट्टी तो लागगी, पर जिब मै उसनै खाग्या, तो मेरा पेट कडवा होग्या। 11 फेर मेरै तै न्यु कहा गया, “तन्नै घणेए माणसां, जात्तां, भाषा अर राजयां के बारे म्ह फेर तै भविष्यवाणी करणी होगी।”


## 11

XXXXXX

1 फेर मेरै ताहीं नाप्पण कै खात्तर एक सरकण्डा दिया, जो नाप्पण के यन्त्र जिसा था, अर किसे नै मेरे तै कहा, “उठ, परमेसवर के मन्दर अर वेदी ताहीं नाप ले, अर उस म्ह आराधना करण आळा की गिणती करले। 2 अर मन्दर कै बाहर का आँगण छोडडे, उसनै मतना नाप, क्यूँके वो गैर यहूदियाँ ताहीं दिया गया सै, अर वे पवित्र नगर नै बियाळीस महिन्ने ताहीं रौदेगी। 3 अर मै अपणे दो गवाहां ताहीं यो हक देऊंगा, के टाट ओढ़ होए एक हजार दो सौ साठ दिन ताहीं भविष्यवाणी करै।”

4 ये वैए जैतून के दो दरखत अर दो दीवट की तरियां सै, जो धरती के प्रभु के स्याम्ही खडे रहवें सै। 5 अर जै कोए उननै नुकसान पोहचावे सै, तो उनके मुँह तै आग लिकड़कै उनके बैरियाँ ताहीं भस्म करै सै, अर जै कोए उन ताहीं नुकसान पोहोचाणा चाहवैगा, तो जरूर इस्से ढाळ मारया जावैगा। 6 परमेसवर नै उन ताहीं हक दिया सै, के उनकी भविष्यवाणी के दिनां म्ह अकास तै मिह न्ही बरसै, अर उननै यो भी हक सै, के जिब-जिब वे चाहवें जद-जद वे पाणी नै लहू म्ह बदल दे, अर धरती पै हरेक ढाळ की बिपदा ल्यावै। 7 अर जिब वे अपणी गवाही दे लेवेंगे, तो वो पशु जो घणे अथाह कुण्ड

म्ह तै लिकडैगा, उनतै लड़के उन ताहीं जितैगा अर मार देवैगा ।<sup>8</sup> अर उनकी लाश उस बड़े नगर के चौक म्ह पड़ी रहवैगीं, जित उनका प्रभु भी क्रूस पै चढ़ाया गया था, जो आत्मिक तौर तै सदोम अर मिस्र देश कुह्लावै सै ।<sup>9</sup> अर सारे माणस, सारे कुल, सारी भाषा, अर सारी जात्तां के लोग उनकी लाश साढ़े तीन दिन ताहीं देखदे रहवैंगे, अर उनकी लाश कबर म्ह धरण न्ही देवैंगे ।<sup>10</sup> अर धरती के बासिन्दे, उनके मरण तै राज्जी अर मग्न होवैंगे, अर एक-दुसरे के धोरे तोप्फे भेज्जैंगे, क्यूँके इन दोनु नबियाँ नै धरती के बासिन्द्यां ताहीं भोत सताया था ।<sup>11</sup> अर साढ़े तीन दिन के पाच्छै, परमेसवर के कान्ही तै जीवन का साँस उन म्ह आ गया, अर वे अपणे पायां के बळ खड़े होगये, अर उनके देखण आळे डरगे ।<sup>12</sup> अर उननै सुर्ग तै एक बड़ड़ा बोल सुणाई दिया, के उरे ऊपरान आओ, न्यू सुण वे बाहळां पै सवार होके अपणे बैरियाँ के देखदे-देखदे सुर्ग पै चढ़गे ।<sup>13</sup> फेर उस्से बखत एक बड़ड़ा भूकम्प यरुशलेम नगर म्ह होया, अर नगर का दसमां हिस्सा पड़ग्या, अर उस भूकम्प तै सात हजार माणस मरगे अर बाक्की बचे होइ माणस डरगे, अर सुर्ग के परमेसवर की महिमा करी ।<sup>14</sup> दुसरी बिपदा बीत ली, देख्खो, तीसरी बिपदा तावळी आण आळी सै ।




<sup>15</sup> अर जिव सातमे सुर्गदूत नै तुरही फूक्की, तो सुर्ग म्ह इस बारे म्ह बड़े-बड़े शब्द होण लागगे, के “दुनिया का राज्य म्हारे प्रभु का, अर उसके मसीह का होगया सै, अर वो युगानुयुग राज्य करैगा ।”  
<sup>16</sup> अर सब चौबीस बुजुर्ग जो परमेसवर के स्याम्ही अपणे-अपणे सिंहासन पै बैठे थे, मुँह के बळ मोध्धे पड़के परमेसवर की आराधना करैंगे ।

<sup>17</sup> न्यू कहण लागगे, “के हे सर्वशक्तिमान प्रभु परमेसवर, जो सै, अर जो था, हम तेरा धन्यवाद करा सां, के तन्नै अपणी बड़डी सामर्थ के काम तै धरती पै राज करणा शरू करया ।<sup>18</sup> अर दुसरी जात्तां के छो उठचा, अर तेरा प्रकोप आण पडचा अर वो बखत आण पोंहच्या सै, के मरे होया का न्याय करया जावै, अर तेरे दास नबियाँ अर पवित्तर माणसां ताहीं अर उन छोटे-बड़ा ताहीं जो तेरे नाम तै डरे सै, वो तेरी महिमा करै, अर धरती पै जो माणस दुसरे माणसां नै बिगाडै सै, उन ताहीं नाश करा जावै ।”

<sup>19</sup> फेर परमेसवर का जो मन्दर सुर्ग म्ह सै वो खोल्या गया, अर उसके मन्दर म्ह उसका करार का सन्दूक दिख्या, विजळियाँ, शब्द, गरजण अर भूकम्प होए अर बड़े ओळे पड़े ।

## 12



<sup>1</sup> फेर इन बाततां के बाद सुर्ग पै एक बड़ड़ा निशान दिख्या, यानिके एक जनानी जो सूरज नै ओढ़े होइ थी, अर चाँद उसके पायां के तळै था, अर उसके सिर पै बारहा तारां का ताज था ।<sup>2</sup> अर वा गर्भवती थी, अर किल्की मारे थी, क्यूँके जापे का दर्द उसके होण लागया था, अर वा बाळक जाम्मण के दर्द म्ह थी ।<sup>3</sup> अर एक और निशान सुर्ग पै दिख्या, अर देख्खो, एक भोत बड़ड़ा लाल अजगर था जिसके सात सिर अर दस सींग थे, अर उसके सिरां पै सात राजमुकुट थे ।<sup>4</sup> अर उसकी पुन्झइ नै अकास के एक तिहाई हिस्से के तारे खिंचके धरती पै गेर दिए, अर वो अजगर उस जनानी के स्याम्ही जो जच्चा थी, खडचा होया, के जिव वा बाळक जणै तो उसके बाळक नै निगळ जावै ।<sup>5</sup> अर उसके छोरा होया जो लोहे का राजदंड लिए होइ, सारी जात्तां पै राज करण पै था, अर उसका बाळक चाणचक परमेसवर के धोरे, अर उसके सिंहासन के धोरे ठा के पोहोचा दिया गया ।<sup>6</sup> अर वा जनानी उस वण म्ह भाजगी, जित परमेसवर की ओइ तै उसके खात्तर एक जगहां त्यार करी गई थी, ताके ओडै एक हजार दो सौ साठ दिन ताहीं उसकी देखभाळ अर उसका पालन-पोषण करया जावै ।

<sup>7</sup> फेर सुर्ग पै लड़ाई होई, मीकाईल अर उसके सुर्गदूत अजगर तै लड़ण नै लिकडे, अर अजगर अर उसके दूत उसतै लड़े ।<sup>8</sup> पर अजगर हार गया अर सुर्ग तै लिकाइ दिया गया, अर सुर्ग म्ह उनके खात्तर फेर जगहां कोनी रही ।<sup>9</sup> अर वो बड़ा अजगर यानिके वोए पुराणा साँप, जो इब्नीस अर शैतान कुह्लावै सै, अर साब्ती दुनिया नै भकाण आळा सै, धरती पै गेर दिया गया, अर उसके

दूत उसके गैल गेर दिए गए।<sup>10</sup> फेर मन्ने सुर्ग पै तै यो बड्डा शब्द आन्दे होइ सुण्या, के इब म्हारा परमेसवर माणसां ताहीं बचा लेवैगा, अर वो अपणी शक्ति का इस्तमाल करैगा, अर राजा की तरियां राज करैगा, इब उसका मसीह दुनिया पै अपणा हक जतावैगा, क्यूँके शैतान परमेसवर की हजुरी म्ह खड़ा होके, जो दिन रात उसके दासां पै दोष लाया करै था, वो सुर्ग तै गिरा दिया गया सै।<sup>11</sup> म्हारे विश्वासियाँ नै शैतान ताहीं हराया सै, अर वे मेम्ने के लहू के कारण, अर अपणी गवाही के वचन के कारण, उसपै जीते, अर उननै अपणे जी ताहीं प्यारा न्ही जाणया, उरै ताहीं के मौत भी सहण कर ली।<sup>12</sup> ज्यांतै, हे सुर्ग, अर उस म्ह रहण आळो आनन्दित होओ, अर हे धरती, अर समुन्दर म्ह रहण आळो, थारे पै धिक्कार सै! क्यूँके शैतान घणे छो के गेल्या थारे धौरै उतर आया सै, क्यूँके वो जाणै सै, के उसका थोड़ा-ए बखत और बच रया सै।

<sup>13</sup> अर जब अजगर नै देख्या, के मै धरती पै गेर दिया गया सूँ, तो उस जनानी ताहीं जिन नै बेट्टा पैदा करया था, उसका पिच्छा करया।<sup>14</sup> अर उस जनानी ताहीं बडे उकाब के दो पंख दिए गये, के अजगर के स्याम्ही तै उड़ के बण म्ह उस जगहां पोहच जावै, जित्त उसकी एक बखत, अर समयों, अर आध्धे बखत ताहीं देख-रेख करी जावै।<sup>15</sup> अर अजगर नै उस जनानी के पाच्छे अपणे मुँह तै नदी की तरियां पाणी बहाया, के उसनै नदी तै बहा दे।<sup>16</sup> पर धरती नै उस जनानी की मदद करी, अर अपणा मुँह खोल के उस नदी ताहीं जो अजगर नै अपणे मुँह तै बहाई थी, पी लिया।<sup>17</sup> फेर अजगर नै जनानी पै गुस्सा करया, अर उसके वंशजां ताहीं, जो परमेसवर के हुकम नै मान्ने सै, अर यीशु की गवाही देण पै अटल सै, उनतै लड़ण नै गया।<sup>18</sup> अर वो समुन्दर के बालू पै जा खड्या होया।

## 13

### २२ २२२

<sup>1</sup> अर मन्ने एक पशु ताहीं समुन्दर म्ह तै लिकइदे होइ देख्या, जिसके दस सींग अर सात सिर थे, उसके सीन्गां पै दस राजमुकुट अर उसके सिरां पै परमेसवर की बुराई के नाम लिक्खे होइ थे।<sup>2</sup> अर जो पशु मन्ने देख्या, वो चित्तै बरगा था, अर उसके पाँ भाल्लू जिसे, अर मुँह शेर के बरगा था, अर उस अजगर नै अपणी सामर्थ, अर अपणा सिंहासन, अर बड्डा हक, उस ताहीं दे दिया।<sup>3</sup> अर मन्ने उसके सिरां म्ह तै एक पै इसा जानलेवा घाव लाग्या होइ देख्या, मान्नो वो मरण पै सै, फेर उसका जानलेवा घाव ठीक होग्या, अर साब्ती धरती के माणस हैरान होगे अर उस पशु के भगत बण जावेंगे।<sup>4</sup> अर उननै अजगर की पूजा करी, क्यूँके उसनै पशु ताहीं अपणा हक दे दिया था, अर न्यू कहके पशु की भी पूजा करी, के इस पशु के बरगा कौण सै? कौण उसतै लड़ सकै सै?

<sup>5</sup> उस ताहीं डींग मारण अर परमेसवर की बुराई करण का हक अर बियाळीस महिन्ने ताहीं राज करण की इजाजत दी गई।<sup>6</sup> पशु नै, परमेसवर अर उसके नाम, उसके रहण की जगहां यानी सुर्ग अर उन सब की, जो सुर्ग म्ह रहवै सै, उनकी बुराई करणा शरू कर दिया।<sup>7</sup> अर उस ताहीं न्यू हक दिया गया, के पवित्तर माणसां तै लड़ै, अर उनपै जीत पावै, अर उस ताहीं हरेक कुल, अर माणस, अर भाषा, अर जात पै हक दिया गया।<sup>8</sup> अर धरती पै रहण आळे वे सारे उस पशु की पूजा करैगें। मतलब जिनका दुनिया की शरूआत के बाद के वे सारे माणस जिनके नाम उस मेम्ने की जीवन की किताब म्ह लिक्खे न्ही गये सै। मेम्ना वोए सै जो मारया गया सै।<sup>9</sup> जिसके कान हों वो ध्यान तै सुणै।


<sup>10</sup> जिस ताहीं कैद म्ह पड़णा सै, वो कैद म्ह पड़ैगा, जो तलवार तै मारैगा, जरूरी सै के वो तलवार तै मारया जावैगा। पवित्तर माणसां का धीरज दुख टाण अर उसपै विश्वास करण म्ह सै।

<sup>11</sup> फेर मन्ने एक और पशु ताहीं धरती म्ह तै लिकइदे देख्या, उसके मेम्ने की ढाळ दो सींग थे, अर वो अजगर की ढाळ बोल्लै था।<sup>12</sup> अर यो उस पैहल्डे पशु का सारा हक उसके स्याम्ही काम म्ह ल्यावै था, अर धरती अर उसके बासिन्द्यां तै उस पैहल्डे पशु की जिसका जानलेवा घाव ठीक होग्या था, पूजा करै था।<sup>13</sup> अर वो बडे-बडे निशान दिखावै था, उरै ताहीं के माणसां के देखते-देखते



सुर्ग तै धरती पै आग बरसा देवै था। 14 अर उन चमत्कारां के कारण जिन ताहीं उस पशु के स्याम्ही दिखाण का हक उस ताहीं दिया था, वो धरती के वासिन्दयां ताहीं इस तरियां भकावै था, के धरती के वासिन्दयां तै कहवै था, के जिस पशु के तलवार लागरी थी, वो जिन्दा होगया सै, उसकी मूर्ति बणाओ। 15 अर उस ताहीं उस पशु की मूर्ति म्ह जी घाल्लण का हक दिया गया, के पशु की मूर्ति बोल्लण लागगै, अर जितने माणस उस पशु की मूर्ति की पूजा न्ही करै, उन ताहीं मरवा देवै। 16 अर उसनै छोदटे, बड़े, साहूकार, कंगाल, आजाद, गुलाम सारया के सोळे हाथ या उनके माथ्यै पै छाप लगावाण खात्तर उन ताहीं मजबूर कर दिया। 17 के उस ताहीं छोड़ जिसपै छाप यानिके उस पशु का नाम, या उसके नाम का अंक हो, अर कोए लेण-देण न्ही कर सकै। 18 ज्ञान इस्से म्ह सै: जिस म्ह अकल हो वो इस पशु का अंक जोड़ ले, क्यूँके वो माणस का अंक सै, अर उसका अंक छ: सौ छियासठ सै।

## 14



1 पर उसके बाद मन्ने कुछ और भी देख्या, वो मेम्ना सिय्योन पहाड़ पै खड्या सै, अर उसके गेल्या एक लाख चवाळीस हजार माणस सै, जिनके माथ्यै पै उसका अर उसके पिता का नाम लिख्या होड़ सै। 2 अर सुर्ग तै मन्ने एक इसा शब्द सुणाई दिया, जो पाणी की घणी धारा अर बड़े गरजण जिसा शब्द था, अर जो शब्द मन्ने सुण्या, वो इसा था, मान्नो वीणा बजाण आळे वीणा बजान्दे हों। 3 अर वे सिंहासन के स्याम्ही अर च्यार पूराणियाँ अर बुजुर्गाँ के स्याम्ही मान्नो, एक नया गीत गाण लागरे थे, अर उन एक लाख चवाळीस हजार माणसां ताहीं छोड़ जो धरती पै तै छुड़ाए गये थे, कोए वो गीत न्ही सीख सकै था। 4 ये वे सै, जो जनानियाँ के गेल्या अशुद्ध न्ही होए, पर कुवारे सै। ये वैए सै, के जित्त किते मेम्ना जावै सै, वे उसके पाच्छै हो लेवें सै। जिस तरियां लोग अपणी फसल म्ह तै पैहला फळ परमेसवर ताहीं चढ़ावै सै, उस्से तरियां वो भी परमेसवर अर मेम्ने खात्तर पैहले फळ के रूप म्ह चढ़ाए गए सै। 5 अर उनके मुँह तै झूठ न्ही लिकड़या था, वे बेकसूर सै।



6 फेर मन्ने एक और सुर्गदूत ताहीं अकास के बिचाळे उड़दे होड़ देख्या जिसके धरै धरती पै के वासिन्दयां की हरेक जात, अर कुल, अर भाषा, अर माणसां ताहीं सुणाण के खात्तर घणा सनातन सुसमाचार था। 7 अर उसनै ऊँची आवाज म्ह कह्या, “परमेसवर तै डरो, अर उसकी महिमा करो, क्यूँके उसके न्याय करण का बखत आण पोंहच्या सै, अर उसकी आराधना करो, जिसनै सुर्ग अर धरती अर समुन्दर अर पाणी के सोते बणाए।” 8 फेर इसके पाच्छै एक और दुसरा सुर्गदूत न्यू कहन्दा होड़ आया, के पड़ग्या, वो बड़ड़ा बेबीलोन नगर पड़ग्या जिसनै अपणी जारी की कोपमय मदिरा सारी जात्तां ताहीं पिलाई सै। 9 फेर इनके पाच्छै एक और सुर्गदूत जोर तै न्यू कहन्दा होड़ आया, के जो कोए उस पशु अर उसकी मूर्ति की पूजा करै, अर अपणे माथ्यै या अपणे हाथ पै उसकी छाप ले। 10 तो वो परमेसवर के प्रकोप की निरी मदिरा जो उसके खुन्दक के कटोरे म्ह घाल्ली गई सै, पीवेगा अर पवित्र सुर्गदूतां के स्याम्ही, अर मेम्ने के स्याम्ही आग अर गन्धक की पीड़ा म्ह पड़ेगा। 11 अर उनकी पीड़ा का धुम्मा युगानुयुग उठदा रहवैगा, अर जो उस पशु अर उसकी मूर्ति की पूजा करै सै, अर जो उसके नाम की छाप लेवें सै, उन ताहीं दिन-रात चैन न्ही मिलेगा। 12 पवित्र माणसां का धीरज इस्से म्ह सै, के धीरज तै दुख सहन्दे रहवै अर अन्त ताहीं मजबूत बणके परमेसवर के हुकमां नै मान्ने, अर यीशु पै विश्वास राखै। 13 फेर मन्ने सुर्ग तै यो शब्द सुण्या, के लिख, जो मुर्दे प्रभु म्ह मरै सै, वे इब तै धन्य सै, आत्मा कहवै सै, हॉ, क्यूँके वे अपणी मेहनतां तै आराम पावेंगं, अर उनके काम उनके गेल्या हो लेवेंगं।



14 अर मन्ने निगांह करी, अर देख्वो, एक धोळा बादळ सै, अर उस बादळ पै माणस के बेट्टे बरगा कोए बेट्चा सै, जिसके सिर पै सोन्ने का ताज अर हाथ म्ह तेज दराती सै। 15 फेर एक और सुगंदूत नै मन्दर म्ह तै लिकड़के, उसतै जो बादळ पै बेट्चा था, जोर तै रुक्का मारके कह्या, “के अपणी दराती ल्याके लामणी कर, क्यूँके लामणी का बखत आण पोंहच्या सै, ज्यातै के धरती की खेती पक ली सै।” 16 इस करके जो बादळ पै बेट्चा था, उसनै धरती पै अपणी दराती लाई, अर धरती की लामणी करी गई। 17 फेर एक और सुगंदूत उस मन्दर म्ह तै लिकड़या, जो सुगं म्ह सै, अर उसके धौरै भी तेज दराती थी। 18 फेर एक और सुगंदूत जिस ताहीं आग पै हक था, वेदी म्ह तै लिकड़या, अर जिसके धौरै तेज दराती थी, उसतै जोर तै बोल्या,, “अपणी तेज दराती ल्याके धरती की दाखलता के गुच्छे काट ले, क्यूँके उसकी दाख पक ली सै।” 19 अर उस सुगंदूत नै धरती पै अपणी दराती लाई, अर धरती की दाखलता का फळ काटके, अपणे परमेसवर के प्रकोप के बड़े रस के कुण्ड म्ह घाल दिया। 20 अर नगर के बाहरणै उस रसकुण्ड म्ह अंगूर रँदें गये, अर रसकुण्ड म्ह तै इतणा लहू लिकड़या के वो नदी म्ह तबदील होग्या, जो के तीन सौ किलो मीटर लम्बी अर इतनी गहरी थी, के उस म्ह घोड़े भी समा जावै।

## 15

██████████ ██████████ ██████████ ██████████ ██████████

1 फेर इसके बाद मन्ने सुगं म्ह एक और बड़ड़ा अर अदभुत निशान देख्या, यानिके सात सुगंदूत जिनके धौरै सात आखरी विपदा थी, क्यूँके उनके खतम हो जाण पै परमेसवर के प्रकोप का अंत सै। 2 फेर मन्ने इसा लाग्या जणु मान्नो मै एक काँच के समुन्दर नै देखण लागरया सूँ, जिस म्ह आग मिली होई थी, मन्ने इस समुन्दर के किनारे पै उन माणस ताहीं खड़े देख्या, जिननै उस बड़े पशु ताहीं हराया था, क्यूँके उननै उसकी मूर्ति की आराधना करण तै अर उसके नाम की मोहर लगाना तै भी मना कर दिया था, उन माणसां के हाथ म्ह परमेसवर के जरिये दी गई वीणा थी। 3 वे परमेसवर के दास मूसा नबी का गीत, अर मेम्ने का गीत गा-गाके कहवै थे, “हे सर्वशक्तिमान प्रभु परमेसवर, तेरे काम महान, अर अनोखे सै, हे युग-युग के राजा, तेरी चाल सही अर सच्ची सै।” 4 “हे प्रभु, कौण तेरे तै न्ही डरैगा अर तेरे नाम की महिमा न्ही करैगा? क्यूँके सिर्फ तू ए पवित्र सै। सारी जात आकै तेरे स्याम्ही मोब्धे पड़के प्रणाम करैगी, क्यूँके तेरे न्याय के काम दिखगे सै।”

5 जिव माणसां नै गाणा बन्द कर दिया, तो मन्ने सुगं म्ह मन्दर ताहीं खुल्या होया देख्या, जो के परमेसवर के तम्बू की तरियां था। 6 अर वे सात्तु सुगंदूत जिनके धौरै सात्तु विपदा थी, शुद्ध अर चमकदी होई मलमल के लत्ते पहरे होइ, छात्ती पै सुनहरे परणे बाँधे होइ मन्दर तै लिकड़े। 7 अर उन च्यारु प्राणियां म्ह तै एक नै उन सात सुगंदूतां ताहीं परमेसवर के, जो युगानुयुग जीवै सै, प्रकोप तै भरे होइ सात सोन्ने के कटोरें दिए। 8 अर परमेसवर की महिमा अर उसकी सामर्थ के कारण मन्दर धुम्मे तै भर गया, अर जिव तक उन सात्तु सुगंदूतां की सात्तु विपदा खतम न्ही होई तब तक कोए मन्दर म्ह न्ही जा सक्या।

## 16

██████████ ██████████ ██████████ ██████████ ██████████

1 फेर मन्ने मन्दर म्ह किसे ताहीं जोर तै उन सात्तु सुगंदूतां तै न्यू कन्हन्दे सुण्या के जाओ, परमेसवर के प्रकोप के सात्तु कटोरयां ताहीं धरती पै उंडेल द्यां। 2 इस करके पैहलड़े सुगंदूत नै जाके अपणा कटोरा धरती पै उंडेल दिया, अर उन माणसां का जिनपै पशु की छाप थी, अर जो उसकी मूर्ति की पूजा करै थे, उनकै एक तरियां तै बुरा अर दुख देण आळा फोड़ा लिकड़या। 3 अर दुसरे सुगंदूत नै अपणा कटोरा समुन्दर पै उंडेल दिया, अर वो मरे होए माणसां के लहू जिसा होग्या, अर समुन्दर म्ह रहण आळा हरेक प्राणी मर गया। 4 अर तीसरे सुगंदूत नै अपणा कटोरा नदियां, अर पाणी के चोवां पै उंडेल दिया, अर वो लहू बणग्या। 5 फेर मन्ने पाणी के अधिकारी सुगंदूत ताहीं न्यू कन्हन्दे सुण्या,,

के हे पवित्तर, जो सै, अर जो था, तू न्यायी सै, अर तन्नै यो न्याय करया । 6 क्यूँके उननै पवित्तर माणसां, अर नबियाँ का लहू बहाया था, इस करके तन्नै उनतै लहू पियाया, क्यूँके वे इत्से जोगगे सै । 7 दुबारा मन्नै वेदी तै यो शब्द सुणया, के हाँ! हे सर्वशक्तिमान प्रभु परमेसवर, तेरे फैसले सही अर सच्चे सै ।

8 अर चौथे सुर्गदूत नै अपना कटोरा सूरज पै उडेल दिया, तो सूरज ताहीं यो हक दिया गया के वो माणसां नै अपना गर्मी तै झुलसा दे । 9 अर माणस घणी तपण तै झुलसगे, अर वे परमेसवर के नाम की, जिन ताहीं इन मुसीबतां पै हक सै, उस ताहीं श्राप देण लागगे, अर ना ए पाप करणा छोड्या, ना उसकी महिमा करी । 10 अर पाँचमै सुर्गदूत नै अपना कटोरा उस पशु के सिंहासन पै उडेल दिया अर उसके राज्य पै अन्धेरा छाग्या, अर माणस दर्द के मारे अपनी-अपनी जीभ चबाण लागगे । 11 अर अपने दर्दां अर फोड्यां के कारण सुर्ग के परमेसवर की बुराई करी, अर अपने-अपने बुरे काम्मां ताहीं करणा न्ही छोड्या । 12 अर छठमै सुर्गदूत नै अपना कटोरा बड्डी नदी फरात पै उडेल दिया, अर उसका पाणी सूख गया, ताके पूरब दिशा के राजयां के खात्तर राह त्यार हो जावै । 13 अर मन्नै उस अजगर के मुँह म्ह तै, अर उस पशु के मुँह म्ह तै, अर उस झूठे नबी के मुँह म्ह तै तीन भुंडी ओपरी आत्मायाँ ताहीं मेंढकां के रूप म्ह लिकडदे देख्या । 14 ये चमत्कार दिखाण आळी भोत सी भुंडी ओपरी आत्मा सै, जो साबती दुनिया के राजयां के धोरे तै लिकडके ज्याते जावै सै, के उन ताहीं सर्वशक्तिमान परमेसवर के उस बडे दिन की लड़ाई के खात्तर कट्टे करै । 15 अर देखीं, मेरा आणा एक चोर की ढाळ होगा जो चुपके तै आवै सै, धन्य वो सै, जो जागदा रहवै सै, अर अपने लत्यां की चौकसी करै सै, के उधाड़ा कोनी हाँडे, अर माणस उसका उधाड़ापण ना देख पावै । 16 अर उन भुंडी ओपरी आत्मायाँ नै सारे राजा ताहीं उस जगहां कट्टा करया, जो इब्रानी म्ह हर-मगिदोन कुह्वावै सै ।

17 अर सातमै सुर्गदूत नै अपना कटोरा हवा पै उडेल दिया, अर मन्दर के सिंहासन तै यो बड्ड़ा शब्द होया, के, हो चुक्या । 18 फेर बिजलियाँ, अर शब्द, अर गरजण होए, अर एक इसा बड्ड़ा हाल्लण होया, के जिव तै माणस धरती पै बनाया गया, जद तै इसा बड्ड़ा हाल्लण कदे न्ही होया था । 19 अर उस बडे नगर के तीन टुकडे होगे, अर देश-देश के नगर पडगे, क्यूँके परमेसवर नै बेबीलोन नगर के माणसां ताहीं दण्ड देण का अपना वादा पूरा करया, अर यो इसा होगा जिसा मान्नों के वो अपने छो की जळण की मदिरा उननै प्याणा । 20 अर हरेक टापू अपनी जगहां तै टळ गया, अर पहाड़ां का बेरा न्ही पाटया । 21 अकास तै माणसां पै मण-मण के बडे ओळे पडे, अर इस करके के या बिप्दा घणीए भरया थी, लोगां नै ओळ्यां की बिप्दा के कारण परमेसवर की बुराई करी ।

## 17

### REPEATED

1 अर जिन सात सुर्गदूतां के धोरे वे सात कटोरे थे, उन म्ह तै एक नै आके मेरे तै न्यू कह्या, के उरै आ, मै तन्नै उस बेश्या का दण्ड दिखाऊँ, जो घणेए पाणी पै बेठठी सै । 2 जिसके गेल्या धरती के राजयां नै जारी करी, अर धरती के बासिन्दे उसकी जारी की मदिरा तै मतवाले होगे थे । 3 फेर सुर्गदूत मेरी आत्मा नै एक जंगल-बियावान म्ह लेग्या, ओडै मन्नै एक जनानी ताहीं लाल रंग के एक पशु पै बेठठे देख्या, वो पशु परमेसवर की बुराई करण आळे शब्दां तै ढक्या होइ था, अर इसके सात सिर अर दस सींग थे । 4 या जनानी बैजनी, अर लाल रंग के लत्ते पैहर-री थी, अर सोन्ने अर घणी कीमती मणियाँ अर मोतियाँ के गहणा तै सजी होइ थी, अर उसके हाथ्यां म्ह एक सोन्ने का कटोरा था जो अश्लीलता की घृणित चिज्जां तै अर उसकी जारी की भुंडी चिज्जां तै भरया होइ था । 5 अर उसके माथ्ये पै एक रहस्यमय नाम लिख्या था, “बड्ड़ा बेबीलोन धरती की बेश्यायाँ अर घृणित चिज्जां की माँ, अर सारी अश्लीलता नै जन्म देण आळी ।” 6 अर मन्नै उस जनानी ताहीं पवित्तर माणसां के लहू अर यीशु के गवाहां के लहू पीण म्ह मतवाली देख्या अर उस ताहीं देखके मै हैरान होग्या ।

7 उस सुर्गदूत नै मेरै तै कह्या, “तू क्यातै हैरान होया?” मै इस जनानी, अर उस पशु का, जिसपै वा चढ़री सै, अर जिसके सात सिर अर दस सींग सै, उसका तेरे ताहीं भेद बताऊँ सूं। 8 जो पशु तन्नै देख्या सै, यो पैहल्या तो था, पर इब न्ही सै, अर घणे अथाह कुण्ड तै लिकड़के विनाश म्ह पड़ैगा, अर धरती के बासिन्दे जिनके नाम दुनिया के बणण के बखत तै जीवन की किताब म्ह लिक्खे न्ही गये सै, इस पशु की या हाल्लत देखके अचम्भा करैगें, के पैहल्या था, अर इब कोनी, पर यो दुबारा आवैगा। 9 यो समझाण के खात्तर के एक ज्ञान्नी मन जरूरी सै: वे सात्तु सिर सात पहाड़ सै, जिनपै वा जनानी बेट्टी सै। 10 अर वे सात राजा भी सै, पाँच तो मर लिये सै, अर एक बाक्की सै, अर एक इब ताहीं आया कोनी, अर जिब आवैगा, तो कुछ बखत ताहीं उसका रहणा भी जरूरी सै। 11 अर जो पशु पैहल्या था, अर इब न्ही, वो खुद आठमां राजा सै, अर उन सात्तुआ म्ह तै सै, जिसका विनाश तय सै। 12 अर जो दस सींग तन्नै देखे सै, वे दस राज्जे सै, जिननै इब ताहीं राज्य न्ही मिल्या, पर उस पशु के गेल्या थोड़े-से बखत खात्तर राज्यां बरगा हक दिया जावैगा। 13 ये सारे एक मन होवैगें, वे अपणी-अपणी सामर्थ अर हक उस पशु ताहीं देवैगें। 14 ये मेम्ने गैल लड़ैगें, अर मेम्ना उनतै जीत जावैगा, क्यूँके वो प्रभुओं का प्रभु, अर राज्यां का राजा सै: अर जो बुलाए होइ, चुणे होइ, अर विश्वासी उसके गैल सै, वे भी जीत पावैगें।

15 फेर उसनै मेरै तै कह्या, के जो पाणी तन्नै देख्या, जिनपै बेश्या बेट्टी सै, वो देश, माणस, जात्ति, अर भाषा सै। 16 अर जो दस सींग तन्नै देखे, वे अर पशु उस बेश्या तै बैर राक्खैगें, अर उस ताहीं लाचार अर उघाड़ी कर देवैगें, अर उसका माँस खा जावैगें, अर उस ताहीं आग म्ह जळा देवैगें। 17-18 वा जनानी, जिसनै तू देखे सै, वो बड़ड़ा नगर सै, जो धरती के राज्यां पै राज करे सै। ये सब बात उसके गैल होवैगी, क्यूँके यो परमेसवर ही सै, जो अपणे मकसद नै पूरा करण खात्तर उनके मन नै उकसावैगा, ताके वे उसकी मनसा पूरी करै, योए कारण सै के वो अपना हक पशु ताहीं राज करण खात्तर दे देंगे, जिब तक के परमेसवर नै जो कह्या सै वो पूरा ना हो ले।

## 18



1 इसके बाद मन्नै एक और सुर्गदूत ताहीं सुर्ग तै उतरदे देख्या, जिसके धौरै बड़ड़ा अधिकार था, अर धरती उसके तेज तै चमक गयी। 2 उसनै जोर तै रुक्का मारके कह्या, पड़ग्या, बड़ड़ा बेबीलोन नगर पड़ग्या सै, अर भुंडी ओपरी आत्मायाँ का घर, हरेक भुंडी आत्मा का बसेरा, एक अशुद्ध अर घृणित पंछी का बसेरा होग्या। 3 यो इस कारण होवैगा क्यूँके बेबीलोन नगर उस विरबान्नी की तरियां सै, जिसकी जारी की डरावणी मदिरा के कारण सारी जात पड़गी सै, अर धरती के राज्यां नै उसके गेल्या जारी करी सै, अर धरती के व्यापारी उसके भोग-विलास के धन के कारण साहूकार होए सै। 4 फेर मन्नै सुर्ग तै किसे और का बोल सुण्या, के हे मेरे माणसों, उस म्ह तै लिकड़ आओ, के थम उसके पापां म्ह साइझी न्ही होओ, अर उसकी मुसीबतां म्ह तै कोए मुसीबत थारे पै ना आण पड़े। 5 क्यूँके उसके पाप सुर्ग ताहीं पोहोचगे सै, अर उसके अधर्म परमेसवर नै याद आये सै। 6 जिसा उसनै थारे ताहीं दिया सै, उससे तरियां ए उस ताहीं भी भर द्यो, अर उसके काम्मां के मुताबिक उस ताहीं दो गुणा बदला द्यो, जिस कटोरे म्ह उसनै भर दिया था उससे म्ह उसके खात्तर दो गुणा भर द्यो। 7 जितनी उसनै अपणी बड़ाई करी अर सुख-विलास करया, थम भी उसनै उतनाए दुख अर दर्द द्यो, क्यूँके वा अपणे मन म्ह कहवै सै, मै राणी के सामान बण बेट्टी सूं, मै बिधवा कोनी, अर ना ए कदे विलाप करूंगी। 8 इस करके एक ए दिन उसके अंहकार के कारण उसपै विपदा आण पड़ैगी, यानिके मौत, दुख, अकाळ, अर वा आग म्ह भस्म कर दी जावैगी, क्यूँके उसका न्याय करण आळा प्रभु परमेसवर शक्तिशाळी सै। 9 अर धरती के राजा जिननै उसके गेल्या जारी, अर भोगविलास करया, जिब उसके जळण का धुम्मा देखैगें, तो उसके खात्तर रोवैगें, अर छाती पीटैटेंगें। 10 अर उसके दर्द

के डर नै याद करके दूर खड़े होके कहवेंगे, हाय! हाय! हे बड़े नगर, बेबीलोन, हे शक्तिशाली नगर, थोड़ी-ए देर म्ह तेरे पै दण्ड आ लेवैगा।

11 अर धरती के व्यापारी उसके खात्तर रोवेंगे अर कळपेंगे, क्यूँके इब कोए उनकी ये चीज मोल लेण आळा कोन्या रह्या। 12 उन धोरै भोत सारी चीज थी यानिके सोन्ना, चान्दी, रत्न, मोत्ती, अर मलमल, बैजनी, रेशमी, लाल रंग लत्ते, अर हरेक ढाळ की खसबूदार लाकड़ी, अर हाथी दाँत की हरेक ढाळ की चीज, घणी कीमती लाकड़ी, पीत्तळ, लोहा, अर संगमरमर के सारे ढाळ के बरतन। 13 अर दालचीनी, मसाले, धूप, गन्धरस, लोबान, अंगूर का रस, तेल, मैद्दा, गेहूँ, गऊँ, बळध, भेड़, बकरियाँ, घोड़े, रथ, गुलाम, अर माणसां के पूराण का कोए खरीदार कोनी रह्या। 14 व्यापारी उस ताहीं कहवेंगे, के जिन चिज्जां की तन्नै इच्छा करी थी, इब वा कोनी रही, अर एणो-आराम अर शोहरत की चीज तेरे तै दूर होई सै, अर वे कदे भी न्ही मिलैगी। 15 इन चिज्जां के व्यापारी जो उसके जरिये साहूकार होंगे थे, उसके दद के डर नै याद करके दूर खड़े होके रोन्दे अर कळपदे होए कहवेंगे,

16 “हाय! हाय! यो बड़ड़ा नगर जो मलमल, अर बैजनी, अर लाल रंग के लत्ते पहरे था, अर सोन्ने, अर रत्नां, अर मोतियाँ तै सज्या था,

17 थोड़ी-ए देर म्ह उसका इसा सारा धन नाश होग्या, अर हरेक माँझी, अर पाणी म्ह सफर करणीया, किस्ती चलाणीए, अर जितने समुन्दर तै कमावें सै, सारे दूर खड़े होके।” 18 अर उस नगर के जळण का धुम्मा देखदे होए रुक्का मारके कहवेंगे, “कौण सा नगर इस बड़े नगर के जिसा सै?”

19 अर अपणे-अपणे सिरां पै धूळ गरेंगे, अर रोन्दे होए अर कळपदे होए किल्की मार-मारके कहवेंगे, के, हाय! हाय! यो बड़ड़ा नगर जिसकी सम्पत्ति के जरिये समुन्दर के सारे जहाज आळे साहूकार होंगे थे, इब थोड़ी-ए देर म्ह तू उजड़ ग्या। 20 हे थम जो सुर्ग म्ह रहण आळे, अर हे पवित्तर माणसां, परेरितों, अर नबियों, जो उसके गैल होया सै, इस कारण थम खुशी मनाओ, क्यूँके परमेसवर नै बेबीलोन नगर ताहीं दण्ड देके उसतै थारा बदला लिया सै। 21 फेर एक ताकतवर सुर्गदूत नै बड़ड़ी चाक्की के पाट जिसा पत्थर टाया, अर न्यू कहके समुन्दर म्ह बगा दिया, के, “बड़ड़ा नगर बेबीलोन इस्से ढाळ घणी ताकत तै गिराया जावैगा, अर फेर कदे भी उसका बेरा न्ही पाट्टैगा। 22 अर बेबीलोन नगर म्ह गायक, वीणा बजाण आळे, बाँसुरी बजाण आळे, अर तुरही फूकण आळा का शब्द फेर कदे भी तन्नै सुणाई न्ही देवैगा, अर किसे काम का भी कोए कारीगर तन्नै कदे न्ही मिलैगा, अर चाक्की के चाल्लण का शब्द फेर कदे भी तन्नै न्ही सुणैगा। 23 अर दीवै का चाँदणा फेर कदे भी तेरे म्ह न्ही चमकैगा, अर बन्दड़ा-बन्दड़ी का शब्द फेर कदे भी तन्नै सुणाई न्ही देवैगा, क्यूँके तेरे व्यापारी धरती के प्रधान थे, अर तेरे जादू-टूणे तै सारी जात भकाई गई थी। 24 परमेसवर बेबीलोन नगर ताहीं इस कारण सजा देवैगा, क्यूँके नबियाँ, पवित्तर माणसां, अर धरती पै सारे घात करे होया का लहू उस्से म्ह पाया गया सै।”

## 19

1 इसके बाद मन्नै सुर्ग म्ह मान्नो भीड़ ताहीं जोर तै न्यू कहन्दे सुण्या, के, हालेलूय्याह! उद्धार, महिमा, अर सामर्थ, म्हारै परमेसवर ए की सै। 2 क्यूँके उसका न्याय सच्चा अर सही सै, ज्यांतै के उसनै उस बड़ड़ी बेश्या का जो अपणी जारी तै धरती के माणसां तै पाप करवाण लागरी थी, परमेसवर नै उस ताहीं दण्ड देके अपणे दासां के लहू का बदला लिया सै। 3 फेर दुसरी बर उननै कह्या, हालेलूय्याह! अर बेबीलोन नगर के जळण का धुम्मा युगानुयुग उठदा रहवैगा। 4 सब चौबीस बुजुर्ग अर च्यारु प्राणियाँ नै झुकके परमेसवर ताहीं प्रणाम करया, जो सिंहासन पै बैठथा था, अर कह्या, “आमीन! हालेलूय्याह!”



5 अर सिंहासन म्ह तै मन्नै एक आवाज सुणाई दी, के, हे म्हारे परमेसवर तै सारे डरण आळे दासों, के छोटे, के बड़े, थम सारे उसकी जै-जै कार करो। 6 फेर मन्नै बड्डी भीड़ का शोर सुणाई दिया, यो भोत घणे पाणी अर जबरदस्त गडगडाहट बरगा शब्द था, हालेलूव्याह! परभु म्हारा परमेसवर, सर्वशक्तिमान राज्य करै सै। 7 आओ, हम खुश अर मग्न होवां, अर उसकी जै-जै कार करा, क्यूँके मेम्ने का ब्याह आण पोहोचा, अर उसकी बन्दड़ी नै अपणे-आप ताहीं त्यार कर लिया सै। 8 अर उस ताहीं शुद्ध अर चमकदार सुथरे मलमल नै पैहरण का हक दिया गया, क्यूँके उस सुथरे मलमल का मतलब पवित्र माणसां के धर्म के काम सै। 9 अर सुगंदत नै मेरै तै कह्या, न्यू लिख, के, धन्य वे सै, जो मेम्ने के ब्याह के भोज म्ह न्योदे गये सै, फेर उसनै मेरै तै कह्या, ये परमेसवर की कही गई सच्ची बात सै। 10 अर मै उसनै पूज्जण कै खात्तर उसके पायां के म्ह पड़ग्या, उसनै मेरै तै कह्या, “देख, इसा मतना करै, मै तेरे अर तेरे भाईयां की तरियां ए दास सूं, जो यीशु की गवाही देण पै अटल सै, परमेसवर नै ए पूज, क्यूँके यीशु की गवाही भविष्यवाणी की आत्मा सै।”

XXXXXXXXXX

11 फेर मन्नै सुगं ताहीं खुल्या होइ देख्या, अर के देखूं सूं, के एक धोळा घोड़ा सै, अर उसपै एक सवार सै, जो विश्वास जोगगा, अर सच्चा कुह्वावै सै, अर वो धर्म के साथ न्याय अर लड़ाई करै सै। 12 उसकी आँख आग की लपट की तरियां थी, अर उसके सिर पै भोत-से मुकुट थे, अर उसके माथ्ये पै एक नाम लिख्या था, जिस ताहीं उसनै छोड़ और कोए न्ही जाणै था। 13 अर उसनै लहू म्ह डबोया होइ बाणा पैहरे राख्या था, अर उसका नाम परमेसवर का वचन था। 14 अर सुगं की पलटन धोळे घोड्या पै चढ़कै अर धोळा अर शुद्ध मलमल के लत्ते पैहरे होइ उसके पाच्छै-पाच्छै, चाल्लण लागरी थी। 15 अर हरेक देश के माणसां ताहीं मारण कै खात्तर, उसके मुँह तै एक पैन्ही तलवार लिकड़ै थी, अर वो लोहवै का राजदण्ड लिए होइ उनपै राज करैगा, अर वो सर्वशक्तिमान परमेसवर के छो की जलन की मदिरा के कुण्ड म्ह अंगूरां नै रौदैगा। 16 अर उसके लत्ते अर जाँघ पै यो नाम लिख्या था, राजयां का राजा अर परभुओं का परभु। 17 फेर मन्नै एक सुगंदत ताहीं सूरज पै खड्या देख्या, अर उसनै जोर तै रुक्का मारके अकास म्ह उड़ण आळे सारे पंछियाँ तै कह्या, “आओ, परमेसवर के बड़े भोज कै खात्तर कट्टे हो जाओ। 18 ताके थम राजा, प्रधान, ताकतवर माणसां का, घोड्या का, उनके सवारां का, अर सारे ढाल के आजाद, गुलाम, छोटे, बड़े, सारे माणसां का माँस खा सको।” 19 फेर मन्नै उस पशु जो समुन्दर म्ह तै लिकड्या था, धरती के राजयां अर उनकी पलटन ताहीं उस धोळे घोड़े के सवार, अर उसकी पलटन तै लड़ण कै खात्तर कट्टे देख्या। 20 अर वो पशु अर उसके गेल्या वो झूट्टा नबी पकड्या गया, जिसनै उसके स्याम्ही इसे चमत्कार दिखाए थे, जिनके जरिये उसनै उन ताहीं भकाया, जिन नै उस पशु की छाप ली थी, अर जो उसकी मूर्ति की पूजा करै थे, ये दोन्नु जिन्दे जी उस आग की झील म्ह जो गन्धक तै जळै सै, गेरे गये। 21 बाक्की लोग उस घोड़े की तलवार तै, जो उसके मुँह तै लिकड़ै थी, मार दिए गये, अर सारे पंछी उनके माँस तै छिकगे।

## 20

XXXXXXXXXX

1 फेर मन्नै एक सुगंदत ताहीं सुगं तै उतरदे देख्या, जिसके हाथ म्ह अथाह कुण्ड की ताळी, अर एक बड्डी बेल थी। 2 अर उसनै उस अजगर, यानिके पुराणे साँप ताहीं, जो इब्लीस अर शैतान सै, पकड़कै हजार साल के खात्तर बाँध दिया। 3 अर उस ताहीं अथाह कुण्ड म्ह गेर कै मूंद दिया, अर उसपै मोँहर ला दी, ताके वो हजार साल के पूरे होण तक देश-देश के माणसां ताहीं दुबारा न्ही भका सके, यो सब होण कै बाद यो जरूरी सै, के थोड़ी देर खात्तर वो दुबारा खोल्या जावैगा। 4 फेर मन्नै सिंहासनां पै कई माणसां ताहीं बेट्टे देख्या, अर उन ताहीं न्याय करण का हक दिया गया, अर फेर मन्नै उन माणसां की आत्मा ताहीं भी देख्या, जिनके सिर यीशु की गवाही देण अर परमेसवर के वचन के कारण धड़ तै अलग करे गये थे। उननै उस पशु अर उसकी मूर्ति की पूजा कोनी करी थी, अर ना

उसकी छाप अपने माथे और हाथों पे ली थी, वे जिन्दा होके मसीह के गेल्या हजार साल ताहीं राज करदे रहे।<sup>5</sup> जब तक ये हजार साल पूरे न्ही होए तब तक बाकी मरे होए जिन्दा न्ही होए, यो तो पैहला पुनरुत्थान सै।<sup>6</sup> धन्य और पवित्र सै वो माणस, जो इस पैहलडे पुनरुत्थान\* म्ह शामिल होवैगा, इस्यां पै दुसरी मौत का किमे भी हक कोन्या, पर वे परमेसवर और मसीह के याजक होंगे, अर उसके गैल हजार साल ताहीं राज्य करेंगे।

\*\*\*\*\*

7 अर जब हजार साल पूरे हो लेंगे, तो शैतान कैद तै छोड़ दिया जावैगा।<sup>8</sup> अर उन जात्तां ताहीं जो धरती के चौगरदेके होंगी, यानिके गोग अर मगोग जिनकी गिणती समुन्दर की बाळू के बराबर होगी, उन ताहीं भकाके, कट्टे करके लड़ाई करण खात्तर लिकड़ैगा।<sup>9</sup> वे साब्ती धरती पै फैल जावेंगी, अर पवित्र माणसां की छावणी अर प्यारे नगर नै घेर लेवेंगी, पर सुर्ग म्ह परमेसवर की आग उतरके उसकी सारी पलटन ताहीं भस्म कर देवैगी।<sup>10</sup> अर उनका भकाण आळा शैतान आग अर गन्धक की उस झील म्ह गेर दिया, जिस म्ह वो पशु अर झूठटा नबी भी होगा, अर वे दिन-रात युगानुयुग दर्द तै तड़पदे रहवेंगे।

\*\*\*\*\*

11 फेर मन्ने एक बड़ड़ा धोळा सिंहासन अर उसपे बेट्ठे होए परमेसवर ताहीं देख्या, जिसके स्याम्ही तै धरती अर अकास भाजगे, अर उसके बाद वे दिखाई न्ही दिए।<sup>12</sup> फेर मन्ने छोट्टे-बड़े सारे मरे होया ताहीं परमेसवर के सिंहासन के स्याम्ही खड़े होए देख्या, अर किताबें खोल्ली गई, अर फेर एक और किताब खोल्ली गई, यानिके जीवन की किताब। मरे होया का न्याय उनके काम्मां के मुताबिक करया गया, जिनका बयान इन किताबां म्ह लिख्या होइ था।<sup>13</sup> अर समुन्दर नै उन मरे होए माणसां ताहीं उगळ दिया, जो उस म्ह थे, अर मौत अर अधोलोक नै भी उन मरे होए माणसां ताहीं उगळ दिया, जो उस म्ह थे, अर हरेक का न्याय उनके काम्मां के मुताबिक करया गया।<sup>14</sup> मौत अर अधोलोक भी आग की झील म्ह गेरे गये, या आग की झील ए दुसरी मौत सै।<sup>15</sup> अर जिस किसे का नाम जीवन की किताब म्ह लिख्या होया न्ही मिल्या, वो आग की झील म्ह गेर दिया गया।

## 21

\*\*\*\*\*

1 फेर मन्ने नये अकास अर नयी धरती ताहीं देख्या, क्यूँके पैहला अकास अर पैहली धरती खतम हो ली थी, अर समुन्दर भी न्ही रहया।<sup>2</sup> फेर मन्ने पवित्र नगर नये यरुशलैम ताहीं सुर्ग पै तै, परमेसवर के धोरे तै उतरदे देख्या, अर वो नगर उस बन्दड़ी की तरियां था, जो अपने बन्दड़े खात्तर सिंगार करके सिंगरी हो सै।<sup>3</sup> फेर मन्ने सिंहासन म्ह तै किसे ताहीं जोर तै न्यू कहन्दे सुणया, के, देख, आज तै ए परमेसवर का डेरा माणसां के बिचाळे होवैगा, वो उनके गेल्या वास करैगा, अर वे उसके माणस होंगे, अर परमेसवर खुद उनके गेल्या रहवैगा, अर वो उनका परमेसवर होगा।<sup>4</sup> अर वो उनकी आँखां तै सारे आँसू पुंज देवैगा, अर इसके बाद ना मौत, ना दुख, ना बिलाप, अर ना दर्द रहवैगा, क्यूँके पुराणी बात बीत ली सै।

5 अर जो सिंहासन पै बेट्ठया था, उसनै कह्या, के देख, इव मै नई सृष्टि की रचना करण लागरया सूं, फेर उसनै कह्या, के लिख ले, क्यूँके जो कुछ कह्या जाण लागरया सै, जो मै कहण लागरया सूं, तू उसपे विश्वास कर सके सै, क्यूँके यो पक्का होवैगा।<sup>6</sup> फेर उसनै मेरे तै कह्या, “सब कुछ पूरा होगया सै, मै अल्फा अर ओमेगा, आदि अर अन्त सूं। जो तिसाए सै मै उन ताहीं उस पाणी के चोवै म्ह तै जो अनन्त जिन्दगी देवे सै उस ताहीं मुफ्त म्ह प्याऊँगा।<sup>7</sup> जो बुराई की ताकतां पै जीत पावै, वोए ये सारी आशीष मेरे तै पावैगा, अर मै उसका परमेसवर होऊँगा, अर वो मेरा बेट्ठा होगा।

\* 20:6 20:6 पुनरुत्थान दुबारा जी उठणा

8 पर डरपोक, अविश्वासी, घिनौणे, हत्यारे, जार, जादू-टूणे करणीये, मूर्ति पूजणीये, अर सारे झूट्टे माणसां का भाग उस झील म्ह मिलेगा, जो आग अर गन्धक तै जळदी रहवै सै, या दुसरी मौत सै ।”



9 फेर जिन सात सुर्गदूत कै धोरै आखरी सात मुसीबतां तै भरे होइ कटोरें थे, उन म्ह तै एक मेरै धोरै आया, अर मेरै गेल्या बात करकै कह्या, “उरै आ मै तन्नै बन्दड़ी यानिके मेम्ने की घरआळी दिखाऊंगा ।” 10 अर वो मन्नै आत्मा म्ह, एक बड़े अर ऊँचे पहाड़ पै लेग्या, अर पवित्र नगर यरुशलम ताहीं सुर्ग पै तै परमेसवर कै धोरै उतरदे दिखाया । 11 परमेसवर की महिमा उस म्ह थी, अर उसकी चमक बेसकिमती पत्थर पारस कै समान अर पन्ने की ढाळ सुथरी थी । 12 अर उसकी चारदीवारी घणी ऊँची थी, अर उसके बारहा फाटक अर फाटकां पै बारहा सुर्गदूत थे, अर उनपै इस्राएलियाँ के बारहा गोत्रां के नाम लिक्खे थे । 13 पूरब कान्ही तीन फाटक, उत्तर कान्ही तीन फाटक, दक्खिन कान्ही तीन फाटक, अर पश्चिम कान्ही तीन फाटक थे । 14 अर नगर की चारदीवारी की बारहा नीम थी, अर उनपै मेम्ने के बारहा परेरितां के बारहा नाम लिक्खे होइ थे । 15 अर जो सुर्गदूत मेरै गेल्या बात करण लागरया था, उसके धोरै नगर, उसके फाटकां अर उसकी चारदीवारी ताहीं नाप्पण कै खात्तर एक सोन्ने का सरकण्डा दिया गया था । 16 अर वो नगर चकोर बस्या होइ था, अर उसकी लम्बाई अर चौड़ाई एक सी थी, अर उसनै उस सरकण्डे तै नगर ताहीं नाप्या, तो साढ़े सात सौ कोस का लिकइया, उसकी लम्बाई, चौड़ाई, अर ऊँचाई एक सी थी । 17 अर उसनै उसकी चारदीवारी ताहीं माणस के, यानिके सुर्गदूत के नाप तै नाप्या, तो छियासठ मीटर लिकइी । 18 अर उसकी चारदीवारी म्ह पन्ने जड़े थे, अर नगर इसे शुद्ध सोन्ने का था, जो कती शीशे बरगा साफ था । 19 अर उस नगर की नीम हरेक ढाळ के घणे महंगे पत्थरां तै सजाई होइ थी, पैहल्डी नीम पन्ने की थी, दुसरी नीलमणि की, तीसरी लालड़ी की, चौथी मरकत की । 20 पाँचमी गोमेदक की, छठी माणिक्य की, सातमी पीतमणि की, आठमी परोज की, नौम्मी पुखराज की, दसमी लहसनिए की, ग्यारमी धूम्रकान्त की, बाहरमी याकूत की । 21 अर बारहां फाटक, बारहा मोतियाँ के थे, एक-एक फाटक, एक-एक मोत्ती का बण्या होइ था, अर नगर की सड़क साफ-सुथरे काँच के जिसे शुद्ध सोन्ने की थी ।

22 अर मन्नै उस म्ह कोए मन्दर न्ही देख्या, क्यूँके सर्वशक्तिमान प्रभु परमेसवर, अर मेम्ना उसका मन्दर सै । 23 अर उस नगर म्ह सूरज अर चाँद के चाँदणे की जरूरत कोनी, क्यूँके परमेसवर कै तेज तै उस म्ह चाँदणा होरया सै, अर मेम्ना उसका दीवा सै । 24 अर हरेक देश के माणस उसके चाँदणे म्ह चाल्लै-फिरेंगे, अर धरती के राजा अपणी शानों-शोकत उस म्ह ल्यावेंगे । 25 अर उसके फाटक दिन म्ह कदे भी न्ही मूंदे जावेंगे, अर ओड़ै रात न्ही होगी । 26 अर हरेक देश के माणस अपणी शानों-शोकत उस म्ह ल्यावेंगे । 27 पर उस नगर म्ह कोए अशुद्ध चीज, या घृणित काम करण आळा, या झूट का गढनआळा किसे भी तरियां तै उस म्ह दाखल न्ही हो पावैगा, पर सिर्फ वे लोग दाखल होवेंगे जिनके नाम मेम्ने की जीवन की किताब म्ह लिक्खे सै ।

## 22

1 फेर सुर्गदूत नै मेरै ताहीं पाणी दिखाया जो जीवन देण आळा पाणी कहलावै सै, अर वो पाणी शीशे की तरियां साफ था, अर उसका चोवां परमेसवर का सिंहासन सै, जो के मेम्ने का भी सिंहासन सै । 2 वो नदी नगर के बीचों बीच सड़क के बिचाळै बहवै थी । अर नदी के इस पार, अर उस पार, उसके दोन्नु किनारां पै जीवन का दरखत था, जो जीवन देवै सै, उस म्ह बारहा ढाळ के फळ लाग्गै थे, अर वो हरेक महिन्ने फळ ल्यावै था, अर उस दरखत के पत्त्यां तै हरेक देश के माणस चंगे होवै थे । 3 अर फेर कोए श्राप न्ही होगा । परमेसवर अर मेम्ने का सिंहासन उस नगर म्ह होगा, अर उसके दास उसकी सेवा करेंगे । 4 अर वे परमेसवर ताहीं आम्ही-स्याम्ही देखेंगे, अर परमेसवर का नाम उनके माथ्यां पै लिख्या होया होगा । 5 अर फेर कदे रात न्ही होगी, अर ना ए उन ताहीं दीवै अर सूरज



के चाँदणे की जरूरत होगी, क्योंकि प्रभु परमेसवर उन ताहीं चाँदणा देवैगा, अर वे युगानुयुग राज करैंगे।

**XXXXXXXXXX**

6 फेर सुगंदूत नै मेरै तै कहुआ, “जो मै कहण लागरया सूं, तू उसपै विश्वास कर सके सै, क्योंकि वो पक्का होवैगा, अर प्रभु जो नबियाँ की आत्मायाँ का परमेसवर सै, अपणे सुगंदूत ताहीं ज्यांतै भेज्या, के अपणे दास्सां ताहीं वे बात जिनका तावळा पूरा होणा जरूरी सै दिखावै।” 7 देख, मै तावळा आण आळा सूं, धन्य सै वो, जो इस किताब की भविष्यवाणी की बाततां नै मान्नै सै। 8 मै वोए यूहन्ना सूं, जो ये बात सुणै, अर देखै था, अर जिब मन्नै सुण्या, अर देख्या, तो जो सुगंदूत मन्नै ये बात दिखावै था, मै उसके पायां म्ह प्रणाम करण कै खात्तर मोध्या पड़ग्या। 9 अर उसनै मेरै तै कहुआ, “देख, इस ढाळ मतना करै, क्योंकि मै तेरा अर तेरे भाई नबियाँ का अर इस भविष्यवाणी की अर इस किताब की बाततां कै मानण आळा का जोड़ीदार दास सूं, परमेसवर नै ए पूज।” 10 फेर उसनै मेरै तै कहुआ, “इस किताब की भविष्यवाणी की बाततां ताहीं बन्द मतना करै, क्योंकि बखत आ लिया सै। 11 जो जुल्म करै सै, वो जुल्म ए करदा रहवै, अर जो बुरा सै, वो बुरा बणया रहवै, अर जो धर्मी सै, वो धर्मी बणया रहवै, अर जो पवित्तर सै, वो पवित्तर बणया रहवै।” 12 लिखा, मै तावळा-ए आण आळा सूं, अर हरेक के काम कै मुताबिक बदला देण कै खात्तर प्रतिफळ मेरै धोरै सै। 13 मै अल्फा अर ओमेगा, पैहला अर आखरी, आदि अर अन्त सूं।

14 धन्य वे सै, जो अपणे लत्ते धो लेवै सै, क्योंकि उन ताहीं जीवन के दरखत कै लोवै आण का हक मिलैगा, अर वे फाटकां तै हो के नगर म्ह दाखल होवैंगे। 15 पर कुत्ते, अर जाद्-टूणा करणीये, जार, हत्यारे, मूर्ति पूजणीया, हरेक झूठ का चाहण आळा, अर झूठ गढ़ण आळा बाहरणै रहवैगा। 16 मुझ यीशु नै अपणे सुगंदूत ताहीं ज्यांतै भेज्या सै, ताके धारे आगै कलीसियाओं के बारे म्ह इन बाततां की गवाही दियु, मै दाऊद का मूल, अर वंश, अर भोर का चमकदा होड़ तारा सूं। 17 अर आत्मा, अर बन्दड़ी दोन्नु कहवै सै, “आ!” अर सुणण आळा भी कहवै, के “आ!” अर जो तिसाया हो, वो आवै अर जो कोए चाहवै वो जीवन का पाणी मुफ्त म्ह ले।

**XXXXXX**

18 मे हरेक ताहीं जो इस किताब की भविष्यवाणी की बात सुणै सै, गवाही दियुं सूं, के जै कोए माणस इन बाततां म्ह किमे बधावै, तो परमेसवर उन मुसीबतां ताहीं जो इस किताब म्ह लिक्खी सै, उसपै बढावैगा। 19 अर जै कोए इस भविष्यवाणी की किताब की बाततां म्ह तै किमे लिकाड़ै, तो परमेसवर उस जीवन के दरखत अर पवित्तर नगर म्ह तै जिसका जिक्र इस किताब म्ह सै, उसका हिस्सा लिकाड़ देवैगा। 20 जो इन बाततां की गवाही देवै सै, वो न्यू कहवै सै, “हाँ, मै तावळा आण आळा सूं, आमीन। हे प्रभु यीशु आ!” 21 प्रभु यीशु का अनुग्रह पवित्तर लोगां के गैल रहवै। आमीन।